

# Cacaiyari Niuquieya Xapayari

EL NUEVO TESTAMENTO  
de Nuestro Señor y Salvador Jesucristo



**La Liga Bíblica**

*Las Sagradas Escrituras para Todos*

El Nuevo Testamento  
en el huichol

La Liga Bíblica 5C primera edición 1967 [hch]  
La Liga Bíblica 5C segunda impresión 1967  
La Liga Bíblica 1M segunda edición 1988  
La Liga Bíblica versión electrónica 2009

Publicado por

© La Liga Bíblica 1967 y 1988

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ▶ Sin obras modificadas. No se puede alterar, transformar o generar una obra a partir de ésta.

# Índice

Mateu.....	1
Maricuxi .....	71
Rucaxi.....	114
Vani .....	187
Nü'arisixi .....	238
Xumatari.....	301
1 Curinitutari.....	331
2 Curinitutari.....	359
Carasiyatari.....	379
'Epesutari.....	391
Piriputari .....	402
Curusetari .....	410
1 Tesarunicatari.....	417
2 Tesarunicatari.....	423
1 Timuteu .....	427
2 Timuteu .....	436
Titu .....	442
Quirimuni .....	446
Hepürayusixi.....	448
Satiyacu .....	471
1 Pecuru.....	479
2 Pecuru.....	488
1 Vani .....	494
2 Vani .....	501
3 Vani .....	503
Cura .....	505
Masiücütü Que Müratüa .....	508



# MATEU

## Niuqui 'Aixüa Manuyüne Que Mütiu'üxasitacai

---

Quesusi Cürisitu 'inüarieya, que mü'ane münü'ayatücai

(Rucaxi 3:23-38)

**1** 'Inüari canihücütüni 'icü. Nuivarite mecani'inüarini, Quesusi Cürisitu que mü'ane müxiüyarieyatücai. Raviri canitusieyatücaitüni, 'Apurahami meta. <sup>2</sup>'Apurahami 'Isahaqui cani'uquiyarieyatücaitüni. 'Isahaqui meta Cacuvu pü'uquiyarieyatücai. Cura pü'uquiyarieyatücai, 'ivamamata. <sup>3</sup>Cura meta Parexi Sara püva'uquiyaritücai, Tamari vavarusitücacu. Parexi Hesirumi pü'uquiyarieyatücai. Hesirumi 'Arami pü'uquiyarieyatücai. <sup>4</sup>'Arami 'Aminaravi pü'uquiyarieyatücai. 'Aminaravi Nahasuni pü'uquiyarieyatücai. Nahasuni Sarumuni pü'uquiyarieyatücai. <sup>5</sup>Sarumuni Puhuxi pü'uquiyarieyatücai, Xahavi varusieyatücacu. Puhuxi Huveri pü'uquiyarieyatücai, Xuti varusieyatücacu. Huveri Quisahi pü'uquiyarieyatücai. <sup>6</sup>Quisahi Raviri pü'uquiyarieyatücai,

que mü'ane cuiepa müti'aitametücai. Raviri Sarumuni pü'uquiyarieyatücai, heitivitüca que mü'ane Huriyaxi mü'üyayatücai.

<sup>7</sup>Sarumuni Xupuhami pü'uquiyarieyatücai. Xupuhami 'Aviyaxi pü'uquiyarieyatücai. 'Aviyaxi 'Asa pü'uquiyarieyatücai. <sup>8</sup>'Asa Cusapati pü'uquiyarieyatücai. Cusapati Curami pü'uquiyarieyatücai. Curami 'Usiyaxi pü'uquiyarieyatücai. <sup>9</sup>'Usiyaxi Cutami pü'uquiyarieyatücai. Cutami 'Acaxi pü'uquiyarieyatücai. 'Acaxi 'Esequiyaxi pü'uquiyarieyatücai. <sup>10</sup>'Esequiyaxi Manasexi pü'uquiyarieyatücai. Manasexi 'Amuni pü'uquiyarieyatücai. 'Amuni Cusiyaxi pü'uquiyarieyatücai. <sup>11</sup>Cusiyaxi Quecuniyaxi pü'uquiyarieyatücai, 'ivamamata quepaucua vaüriyarica memevitüqui Vaviruniasiepaitü. <sup>12</sup>Mehevitüquieca Vaviruniya, Quecuniyaxi Saratieri pü'uquiyarieyatücai. Saratieri Suruvaveri pü'uquiyarieyatücai. <sup>13</sup>Suruvaveri 'Aviyuri pü'uquiyarieyatücai. 'Aviyuri

'Eriyaquimi pü'uquiyarieyatücai.  
 'Eriyaquimi 'Asuru  
 pü'uquiyarieyatücai. <sup>14</sup>'Asuru  
 Saruqui pü'uquiyarieyatücai.  
 Saruqui 'Aquimi  
 pü'uquiyarieyatücai. 'Aquimi  
 'Eriyuri pü'uquiyarieyatücai.  
<sup>15</sup>'Eriyuri 'Erehasari  
 pü'uquiyarieyatücai. 'Erehasari  
 Matani pu'üquiyarieyatücai. Matani  
 Cacuvu pü'uquiyarieyatücai.  
<sup>16</sup>Cacuvu Cuse pü'uquiyarieyatücai.  
 Cuse Mariya pücünayatücai.  
 Mariyasie caniyenuiva Quesusi,  
 Manayexeyarie mütitevacai  
 Cürisitutütü.  
<sup>17</sup>Mücü 'Apurahamisie memüyecü  
 nuivarite xiüyarimama tamamata  
 heimana nauca xiüyariyari  
 mecaniyupaümecaitüni Raviri  
 'amuyeicacaique. Tamamata  
 heimana nauca xiüyariyari  
 mepüyupaümecai Ravirisie  
 memüyecü Vaviruniyapai  
 memevitüquieque xiüyarimama.  
 Tamamata heimana nauca  
 xiüyariyari mepüyupaümecai  
 Vaviruniyapai memevitüquie  
 vaxiüyarima Cürisitu  
 mutinuivaxüque.

### Quesusi Cürisitu que mütiunuivaxü

(Rucaxi 2:1-7)

<sup>18</sup>Merücüsü müpaü catiniuyüni  
 quepaucua Quesusi Cürisitu  
 mutinuivaxü. Mariya  
 müvarusieyatücaimatü Cusematü  
 mepüyutivitüniqecai, peru  
 mecatineneüquivavetü cuxi,  
 mücü nayehucacaitüni, 'Iyari  
 Mütiyupata ya'ane 'ipitüacu. <sup>19</sup>Cuse  
 cünaya mayaniquecai, mücü  
 heiseriemecü yacatinicamiecaitüni,

peru pücayuvaüriyacai  
 mixaneticü. 'Ayumieme  
 pü'eirimücücai 'avie. <sup>20</sup>Merücüsü  
 müpaü püreuyutimaixüa. Hicü  
 Ti'aitamesüa mieme niuqui  
 tuayame niuxeiya yuheinüsita  
 müpaü 'utaineme, Cuse 'acu  
 Raviri pemünü'aya. 'Axa  
 pepücati'acühüaveni Mariya  
 pemütivitünicü 'a'üya. 'Iyari  
 Mütiyupata ya'ane 'ipitüacu,  
 hesiena püyeya 'icü nunusi.  
<sup>21</sup>'Uquitüme pütiniveni. Mücü  
 canivatavicueisitüamücü  
 yuteüterima, tita 'axa memüteyurie  
 canivanavairiemücü. 'Ayumieme  
 pepitaterüva Quesusi, taniuquicü  
 Tiyuvicueisitüvame maine.

<sup>22</sup>'Icü naitü müpaü catiniuyüni,  
 maye'anicü tita mütixatacai  
 Ti'aitame, tixaxatame müpaü  
 'utainecacu,

<sup>23</sup>Camüsü 'üimari müyuxeve  
 payehucani,

'Uqui pütiniveni.

'Emanuheri pütaterüvarieni.

Mücü taniuquicü, Cacaüyari  
 Tahesüa Muca paine.

<sup>24</sup>Merücüsü Cuse yatüheinuca  
 'anutaniereca müpaü pütüuyuri que  
 mütita'aitüya Ti'aitamesüa mieme  
 niuqui tuayame. Canitivitüni  
 yü'üya. <sup>25</sup>Peru püca'icumavacai,  
 'ariqueque 'uqui 'utinivecuque.  
 Pitaterüvaxü Quesusi.

### Temaivavemete que memüte'u'axüa

**2** Merücüsü Quesusi Verenipai  
 canetinuiva Cureya cuieyarisie,  
 quepaucua Herurexi mana  
 müti'aitametücai. 'Ana yucüiepa  
 meheyecüneca temaivavemete  
 tayeta mepayenexüa, tahixüapa

mepu'axüa quiecarisie  
 Querusareme müracuseva, <sup>2</sup>müpaü  
 me'utiyuatü, Haqueri peca  
 Huriyusixi teüteriyari tiva'aitüvame  
 metinuivaxü. Tame xurave tepexei  
 'anatineximecacu, pü'inüarieya.  
 Nenevieri te'ipitüanique tepu'axüa.

<sup>3</sup>Hicü ti'aitame Herurexi  
 tiutamarieca niyuxamuriecaitüni,  
 yunaitü Querusaremetarita  
 hepaüna. <sup>4</sup>Varucuxeürieca  
 mara'acate memühüritüariecai,  
 müme meta 'inüaricü  
 memüte'üiquitametetücai  
 teüteri vasata miemete  
 yunaime, nivaruta'ivaviya haque  
 metinuivaquecai Cürisitu. <sup>5</sup>Müpaü  
 metenicühüaveni, Verenipai  
 vaniu Cureya cuieyarisie. Tamüsü  
 tixaxatame müpaü tiniu'utüani,

<sup>6</sup>Vereni quiecatari 'acu,  
 Cureya cuieyarisie xemütitei,  
 Que memütexexeiya,  
 Te'aitamete Cura cuieyarisie  
 miemete,  
 Canimarivani xequiecarisi.  
 Xesata quiecametütü  
 Cananucuquemücü ti'aitametütü,  
 Neteüterima va'üviyanique,  
 'Ixaherisixi teüteriyari.

<sup>7</sup>Hicü Herurexi temaivavemete  
 nivaruta'inieni 'avie.  
 Nivaruta'ivaviya heiseriemecü  
 quepaucua masiücütü matüa  
 xurave. <sup>8</sup>Nivarenü'ani Verenipai  
 müpaü 'utayüca, Mana xequenehu,  
 heiseriemecü xequenativava nunusi  
 hepaüsita. Quepaucua xemeitaxeiya  
 yaxequeneteneutahüavi, mana  
 nemineneviyamiecü neta.

<sup>9</sup>Me'i'enieca ti'aitame  
 menecüne. Camüsü xurave  
 memexei 'anatineximecacu,

mücü vahüxie neutamiecaitüni.  
 Heta'aca haque müyecatei  
 nunusi, heimana niyuhayeve.  
<sup>10</sup>Me'ixeyatü xurave cuini  
 mieme meniyutemamaviecaitüni  
 yemecü. <sup>11</sup>Quita meheutahaxüaca  
 nunusi meniuxeiya varusieya  
 meta Mariya Me'utihüxima'uca  
 nenevieri meneipitüani. Yupinite  
 mana mete'ucupica, 'imiquieri  
 metenimini huru, 'üca visi  
 mu'üa, mixaxi. <sup>12</sup>Hicü yuheinüsita  
 mete'utaxatüarieca quename  
 Herurexisüa tavari mecaheuhuni,  
 xeime huyeyari 'utüa meniucacüne  
 yucueipapai.

**Que memüte'uyuta'unaxü  
 'Equipitu cuieyarisiepaitü**

<sup>13</sup>Mericüsü mehecünecu müme,  
 Cuse yuheinüsita canixeiya  
 Ti'aitamesüa mieme niuqui tuayame.  
 Müpaü niutayüni niuqui tuayame,  
 Quenanucuquexi, quenivaranuvitüqui  
 nunusi varusieyamame.  
 'Equipitupai xequeneyuta'una.  
 Mana xequene'uvani, 'ariqueque  
 nematitahüave xemahunicü. Herurexi  
 canitivaumücü nunusi 'imienique.  
<sup>14</sup>Anucuqueca Cuse, yüvicüta  
 nivarevitüni nunusi varusieyata.  
 'Equipitupai menecüne. <sup>15</sup>Mana  
 mene'uvacaitüni mexi camüvecai  
 Herurexi. Müpaü tinaye'ani que  
 mainecai Ti'aitame, tixaxatame  
 ya'utainecacu, Nenitahüave nenive,  
 'Equipitu cuieyarisie müvayeyanicü.

**Herurexi cuyaxi que mütivarenü'a  
 türi memüvarecuinicü**

<sup>16</sup>Hicüsüari tiutamarieca Herurexi  
 memicuamanaxücü temaivavemete,  
 cui niuyeha'ani. Nivarenü'ani

cuyaxi memüvarecuinicü türi  
yunaima haica viyari memücahücai  
cuxi, Vereni memütitecai naisarie  
'auriena memütitecai, que  
memüte'itahüavixü temaivavemete  
tucari hepaüsita. <sup>17</sup>'Anari  
catinaye'ani tita mütixatacai  
Cacaüyari, tixaxatame Queremiyaxi  
müpaü 'utainecacu,

<sup>18</sup>Xevitü pe'eniecie Xamasie  
'Utasuatü yuheiverietü cuini  
mieme,

Xaqueri 'utasuatü yunivema  
vacü

Cayunütüarinüatü  
'amemüca'u'uvacü.

<sup>19</sup>Mericusü Herurexi  
'umücu, Cuse yuheinüsita  
canixeiya Ti'aitamesüa mieme  
niuqui tuayame 'Equipitu  
cuieyarisie heyeicatü. <sup>20</sup>Müpaü  
niutayüni, Quenanucuquexi,  
quenivaranuvitüqui nunusi  
varusieyata. Mana quenemie  
'Ixaherisixi vacuieyarisie.  
Menecuiniri müme memivautüvecai  
nunusi memimiecucai.

<sup>21</sup>Hicüri 'anucuqueca nivarevitüni  
nunusi varusieyata. Mana  
caneta'ani 'Ixaheri cuieyarisie.

<sup>22</sup>TiutamariECA quename 'Ariquerau  
ti'aitametücai Cureya cuieyarisie  
'uquiyarieya que müti'aitacai  
Herurexi, peumacai mana  
munuanicü. Müpaü tiutahüavariECA  
yuehinüsita, Carereya cuieyarisie  
püta caneutiyune. <sup>23</sup>Mana  
heta'aca quiecarisie nayerüni  
Nasareti müracusevasie. Müpaü  
catinaye'ani Ti'aitame que mutayü,  
texaxatamete yame'utiyanecacu,  
quename Nasaretitanaca  
titevacaquecai.

### Ti'üyame Vani que müticuxatacai

(*Maricuxi 1:1-8; Rucaxi 3:1-9,  
15-17; Vani 1:19-28*)

**3** Mericusü Cureya cuieyarisie  
caninuani Ti'üyame Vani  
macumavesie ticuxatatü <sup>2</sup>müpaü  
'utaitü, Xequeteneuhayeva que  
xemüteyuriecai. Canayehuraniri,  
que mü'ane taheima müti'aita  
cuitü canisutüamücü 'ena ti'aitatü.  
<sup>3</sup>Icü canihücütüni que mü'ane  
müxasivacai, quepaucua tixaxatame  
Quisariyaxi müpaü mutayü,  
Xevitü mahiva macumavesie  
'uvetü  
Xequeneucuha'aritüa Ti'aitame  
huyeya haitü,  
Xexeuravime xequeneutivevi  
huyeya haitü.

<sup>4</sup>Mücü Vani cameyu huxariyari  
cananacatücaitüni, navi  
hüyameyariCü rayühüacai. Tüpuxi  
nivacuacaitüni yeuta mieme  
xiete ti'iecai. <sup>5</sup>'Ana yunaitü  
Querusalemari, yunaitü Cureya  
cuie quiecatari, yunaitü Curutani  
hatuxame tesita quiecatari  
meni'axecaitüni hesüana. <sup>6</sup>Mücü  
nivaruca'üyacaitüni Curutani  
hatuxamesie, meyuhecüatcacu  
'axa que memüteyuriecai.

<sup>7</sup>Hicü yumüireme vaxeyatü  
Pareseusixi Saruseusixi hesüana  
memü'axecai 'üyarica hepaüsita,  
müpaü tinivarutahüave, Cari xeme  
terücacaxi xepüva'ivama. Quepaicü  
pütixehecüatüa xemüyuta'unacü  
capa 'uxa'a varie xe'uyehecarienicü.  
<sup>8</sup>Müme memüte'uhayevaxü que  
memüteyuriecai, vahepaü püta  
xequeteneyuriecai, 'uximayasica  
que müreuyevese. <sup>9</sup>Müpaü



xepücateyücüühüaveni quename xeyüvave müpäü xemutiyanenicü yu'lyarisie, Tame tepünaquil'eriva ta'uquiyari temexeyacı 'Apurahami xe'utiuyatü. Müpäü nepütixecüühüave, Cacaüyari caniyüveni 'icü tetexi teüteri müvarayeitüanicü, 'Apurahami nivemama memacüñecü. <sup>10</sup>Hasa caniucuha'aritüarieni cüyexi maxüriyanicü. 'Ayumieme naitü cüye 'aixüa 'anenetü müca'utixuxuavere, mücü 'ari canaxüriyamücü, taipä caneuxüriyamücü. <sup>11</sup>Neri necanixe'uca'üyani hacü, xemüte'uhayevaxücü que xemüteyuriecäi. Que mü'ane ne'utüma 'umamie, mücü cui pütürücaüye, necatürücaüyecacu ne. 'Aixüa nepüca'ane nehiesie mütinaquenicü ni nemiparevienicü. Mücü püta que mütixe'uca'üyani, 'Iyari Mütiyupata canixepitüamücü, canixe'itimücü tai que mütiyu'itiva. <sup>12</sup>Cuxari 'itivame pacue'le, cuini mieme pütiveque yutüricu. Niti'utamücü yu'icuxaxi caxetunisie, cuxariyari püta pütataiyani tai mücatüvesie.

#### **Quesusi que mütiuca'üyarie**

(*Maricuxi 1:9-11; Rucaxi 3:21-22*)

<sup>13</sup>Mericsü 'ana Quesusi caninuani Carereya cuieyarisie heyeyaca. Curutani hatuxamesie caninuani Vanisüa, 'iya mica'üyacı. <sup>14</sup>Vani masi niyucu'imavacaitüni müpäü 'utaitü, Neuyeveca masi 'ecü püta pemünesica'üya ne. Queri titayari nehesüa petinua. <sup>15</sup>Quesusi müpäü tinitahüave, Müpäü pütüyüni hicü. 'Aixüa cani'aneni

yatemütecahunicü naime 'aisicasie, 'ipäu teteyurietü. Hicü Vani müpäü piyuri. <sup>16</sup>'Uca'üyarieca Quesusi, hapa nanatiyani cuitü cuiepa. Hicü muyuavi nanacatenire. Nixeiya Cacaüyari 'Iyarieya heimana 'acamiecacu cucurupäu 'anetü, hesiena yuhayevaque. <sup>17</sup>Xevitüta müpäü netayüni taheima, 'Icü caninenivetüni münaquil'eriva. Mücücü necaninaquil'aca.

#### **Quesusi que mütiuta'inüasie**

(*Maricuxi 1:12-13; Rucaxi 4:1-13*)

**4** Hicüsüari 'Iyari canevitüni Quesusi macumavesiepai. Mana Cauyumarie ni'inüatamücücäitüni, siparasü xüca 'axa tiyurieni, haitü.

<sup>2</sup>Huta teviyari tucari huta teviyari tucari 'uyuhaquieca, caneuhacamücücäitüni Quesusi. <sup>3</sup>Hicü Cauyumarie nuaca 'ita'inüataque müpäü tinitahüave, Tamüsü, 'ecü Cacaüyari xüca penu'ayatüni, müpäü quetineutahüavi 'icü tetexi, pa mayueitüanicü. <sup>4</sup>Mücü müpäü tinita'eiya, 'Utüarica müpäü paine,

Tevi xüca pa cuaca xeicüa, Mücücü püca'ayeyurini. Cacaüyari que mutayü, Niuquieya naitü peuyeveseta Mayeyurinicü tevi.

<sup>5</sup>Hicü Cauyumarie Querusareme neivitüni Cacaüyari quiecarienapaitü. Vatuqui yecürita nenutivitüni. <sup>6</sup>Müpäü tinitahüave, 'Ecü Cacaüyari xüca penu'ayatüni, vatipai queneucasuna. 'Utüarica müpäü paine,

Yuhesüa miemete niuqui tuayamete

Pütiva'aitüaca 'ahepaüsita.  
Yumamacü mepümasituicani  
Capa tetesie pe'uti'ücamürecü.

<sup>7</sup>Qesusi müpaü tinita'eiya, Müpaü  
paineta 'utüarica, Pepüca'lisipaneni  
Ti'aitame mü'acacaüyari, haitü.

<sup>8</sup>Hicü tavari Cauyumarie  
neivitüni yemuri cui manutitevasie.  
Cuiapa memütama vacuie xexuime  
nixeyasitüani visi mü'ane. <sup>9</sup>Müpaü  
tinitahüave, Nepümasimini  
'icü naime, xüca nenevieri  
penesi'upitüani pe'utitunumaqueme.

<sup>10</sup>Qesusi müpaü tinitahüave,  
Quenemie Cauyumarie. 'Utüarica  
müpaü paine,

Nenevieri pecanipitüaca Ti'aitame  
Mü'acacaüyari hücüame.  
Mücü hücüa  
pecanayexeyacamücü.

<sup>11</sup>Hicü Cauyumarie nicu'eirieni  
neyani, niuqui tuayamete  
me'u'axüaca menipareviecaitüni.

**Qesusi que mütisutüa ti'uximayatü  
Carereya cuieyarisie**

*(Maricuxi 1:14-15; Rucaxi 4:14-15)*

<sup>12</sup>Mericüsü tiutamariECA quename  
Vani hevyarie, Carereyapai neyani  
Qesusi. <sup>13</sup>Nasaretisie 'uyupataca,  
Caperünaume henuaca haracuna  
tesita maniere, mana nayerüni  
Savuruni Nepütari vacuieyari  
müracutevasie. <sup>14</sup>Müpaü tinaye'ani  
tita mütixasivacai quepaucua  
tixaxatame Quisariyaxi müpaü  
mutayü,

<sup>15</sup>Savuruni cuieyari  
Nepütari cuieyari,  
Haracuna mananiere  
Curutani 'anutaüye meta,  
Carereya haque memetitei  
müme memücatateüterima,

<sup>16</sup>Teüteri yüvipa memütitecai  
Müme hecüariya meniuxeiya  
cui müxavatü.

Müme 'etüripa memütitecai  
Haque memücuiximecai,  
Müme vahesie mieme  
Hecüarivivame cananatineni.

<sup>17</sup>Mericüsü 'ana Qesusi  
nisutüani ticuxatatü, müpaü  
'utaitü, Xequeteneuhayeva que  
xemüteyuriecäi. Canayehuraniri,  
que mü'ane taheima müti'aita cuitü  
canisutüamücü 'ena ti'aitatü.

**Qesüteveyamete Qesusi que  
mütivarutahüavixü yunaucame**

*(Maricuxi 1:16-20; Rucaxi 5:1-11)*

<sup>18</sup>Hicüsüari haracuna tesita  
'uyemietü Carereya cuieyarisie,  
nivaruxeiya yuhutame  
yu'ivamacame. Xevitü Simunitütü  
Pecuru catinitevacaitüni, 'ivaya  
meta 'Atürexä. Mana taxaya  
meneutavivivacaitüni haracunäsie,  
memüquesüteveyametetücaicü  
müme. <sup>19</sup>Hicü müpaü  
tinivarutahüave, Cümü,  
nehesie xequetenevyani.  
Teüteri xevacuxexeürivame  
necanixe'ayeitüamücü, quesüte  
xemütevaruxexeürivapaü hicü.  
<sup>20</sup>Müme yapaucua yutaxaya  
me'ucu'eirica hesiena meteniuviya.

<sup>21</sup>Mericüsü 'uma 'uyemietü  
hipame nivaruxeiya yuhutame  
yu'ivamacame, Cacuvu  
Vani, Severeu nivemama.  
Canuväsie meniyetecaitüni  
Severeumatü va'uquiyarimatü  
yuvipi memanesiquitüatü.  
Hicü nivaruta'inieni hesiena  
memütevyanicü. <sup>22</sup>Cuitü  
me'icu'eirica canuva, yu'uquiyari

me'ucu'eirieca, hesiena  
meteniuviya.

**Quesusi que mütiva'üquitüacai  
yumüireme**

(Rucaxi 6:17-19)

<sup>23</sup>Mericsü naisarie Carereya  
cuieyarisie caniuycacaitüni,  
ti'üquitatü vatuquiteta, ticuxatatü  
niuqui 'aixüa manuyüncü, que  
müti'ane Cacaüyari ti'aitametücacu  
ticuxatatü, varanayexürivatü  
teüteri naime cuiniyacü naime  
veranariyacü. <sup>24</sup>Naisarie Siriya  
cuieyarisie tiniutamariva que  
mütiyuriencai. Meni'atüirivacaitüni  
yunaima 'axa memü'itüariecai,  
müireme cuiniya müvaviyacai,  
müiremecü memü'uximatüariecai,  
müme cacaüyarixi 'axa memü'anene  
memüvaviyacai, quierixiecate,  
huriecate. Nivaranayexürivacaitüni.  
<sup>25</sup>Cui yumüiretü meneiveiyacaitüni,  
Carereyasie Tamamata Quiecaritesie  
Querusaresiesie Cureyasie Curutani  
'anutaüyesie meheycüneca.

**Xasicaya, yemurisie 'anutiyaca  
que müticuxatacai**

**5** Mericsü teüteri yumüireme  
vaxeyatü, mana yemurisie  
neutiyune. Muva 'anacayacu  
teyü'üquitüvemetemama  
'auriena meniu'axüani. <sup>2</sup>Mücü  
tinivaruti'üquitüani ya'utaitü,

**Müme 'aixüa memü'itüarie vaxatatü**

(Rucaxi 6:20-23)

<sup>3</sup>'Aixüa mecani'itüarieca  
Müme vaüca memüteheuyehüva  
yu'iyarisie que  
memüteyumate.

Que mü'ane taheima  
macave mecanexeyacuni  
tiva'aitüvametüme.

<sup>4</sup>'Aixüa mecani'itüarieca  
Müme memüyuheiverie.  
Mepünütüarieni.

<sup>5</sup>'Aixüa mecani'itüarieca  
Müme memüca'ayu'eririyä.  
Vahesie pütinaque cuie naitü.

<sup>6</sup>'Aixüa mecani'itüarieca  
Müme memüyuvaüriya  
Heiseriemecü

yamemütecahunicü  
Yaxeicüa tevipaü  
Meuhacamücüpaü  
meuharimücüpaü.  
Yamepütepütüarieni  
mepütihuxani.

<sup>7</sup>'Aixüa mecani'itüarieca  
Müme memüteyucanenimaya.  
Mepütinenimayasieni.

<sup>8</sup>'Aixüa mecani'itüarieca  
Müme memü'itiyatüca va'iyari  
müyuxevinicü.  
Mepixeyä Cacaüyari.

<sup>9</sup>'Aixüa mecani'itüarieca  
Müme memüvanütüani teüteri,  
'aixüa memüteyuxeyanicü.  
Mepümasiücüni Cacaüyari  
nivemama que memütehüme.

<sup>10</sup>'Aixüa mecani'itüarieca  
Müme memuveiyarie  
memüyuvaüriyacü  
heiseriemecü  
yamemütecahunicü.

Que mü'ane taheima  
macave mecanexeyacuni  
tiva'aitüvametüme.

<sup>11</sup>'Aixüa xecani'itüarieca xeme  
Quepaucua  
memüxeta'uxive'erieni,  
quepaucua memüxe'uveiyani,

quepaucua mete'itavatü 'axa memutiyaneni xehepaüsita naimecü nehese xemümiemetecü. <sup>12</sup>Xequeneyutemamavieca 'ana xequenenaqui'aca müpaü xetemaitü, 'aixüa 'aneme xecanipitüariecuni vaüca taheima mieme. Müpaüta metenivaruveiyacaitüni texaxatamete xehetüa memü'axecai.

**Cuiepa memütama va'una  
vahecüarivivamete**

(*Maricuxi 9:50; Rucaxi 14:34-35*)

<sup>13</sup>Xeme cuiepa memütama va'una xecanihümetüni. 'Una xüca hamuritü 'ayanique, titacü ha'usivitü rayaniqueyu. 'Asipücaýüve. Panuyevivivaniqueyu xEICÜA, teüteri mepicaquesinaniqueyu.

<sup>14</sup>Xeme cuiepa memütama vahecüarivivamete xecanihümetüni. Yemuri heima quiecarü pücaýüve müti'aviesieni. <sup>15</sup>Mücü meta, 'ititayame cüxeme, cacunicü püca'enucanani, masi vapaitü neitiyemücü. Nivahecüariyacamücü yunaime quita memayetei. <sup>16</sup>Yaxeicüa xeme, hecüariya xehesüa mieme müpaü quetihecüaca teüteri vahüxie, memüxexeyanicü 'aixüa que xemüteyurie, 'aixüa memutiyanenicü xe'uquiyari taheima macave hepaüsita.

**Quesusi que mutayü 'inüari  
niuquiyari hepaüsita**

<sup>17</sup>Müpaü xepücatecu'erivani quename nenua ne'lica'unaque 'inüari niuquiyari, texaxatamete vaniuquiyari. Que nemütinua, ne'lica'unaque necapunua,

ne'eye'atüanique püta necaninuani. <sup>18</sup>Icü niuqui caniseüyeni que nemütixecühüave, mexi cataxüve muyuavi cuie, xei hüxiyari xei tuniyari pücatatümaiyarieni 'inüari niuquiyarisie mieme, naitü mexi ca'aye'ave. <sup>19</sup>Que mü'ane mitixani'erieni 'icü 'aisica sepa 'imatüme, yativa'üquitüatü teüteri, mücüta 'imatüme pütaterüvarieni, que memütemariva müme memeixeiya que mü'ane taheima macave tiva'aitüvametüme. Perusü que mü'ane yamüticamie yamüti'üquita, mexüacame püta pütaterüvarieni. <sup>20</sup>Müpaü nepütixecühüave, xeme xepüyuvaüriya heiseriemecü yaxemütecahunicü. Mümeta 'inüaricü memüte'üquitamete, Pareseusixi meta, müme yaxEICÜA vaniu mepüteyuvaüriya. Mericüte, peuyevese xeme masi yemecü yaxemütecahunicü. Me xüca catixaütüni, tixaü xepücaheutahaxüani haque müra'aita que mü'ane taheima macave.

**Quesusi que mutayü memüha'a  
vahepaüsita**

(*Rucaxi 12:57-59*)

<sup>21</sup>Xepü'enana quename meripai miemetexi müpaü mete'utahüavarie, Pepücati'amemivani. Que mü'ane mütiyumemivani, 'isücame hesiena 'apürahüpani. <sup>22</sup>Ne masi müpaü nepütixecühüave, que mü'ane miheca yu'iva, 'isücame hesiena 'apürahüpani. Que mü'ane 'axa müticühüaveni yu'iva, mücüsie mepüte'uhüpani ta'uquiyarima. Que mü'ane müpaü mütitahüave, Cari

pepüca'amate, mücü panutahüiyani xasi taiyariyarisie.

<sup>23</sup>Ayumieme xüca 'a'imiquieri pe'atüani mürayutimavatüre, mana xüca yapera'erivani quename 'a'iva tixaütücü 'aixüa camatixeiya, <sup>24</sup>mana mürayutimavatüre queneucu'eiri 'a'imiquieri. Quenemie meri, 'aixüa xeteyuxeiyatü xequenacüni yu'ivamatü. 'Ariqueque muva pe'ayeneme queneutimava.

<sup>25</sup>Cuitü quenehamicutani que mü'ane mümasixaneta mexi huyeta pe'uyeica hamatüana, capa masiyetuanicü 'isücomesüa masixanetame, 'isücame capa masiyetuanicü tupirisüa, capa pe'anutahüiyanicü. <sup>26</sup>Icü niuqui caniseüyeni que nematicühüave, muva pepüca'vayeyani mexi pecati'atuave naimecü.

**Quesusi que mutayü, que mü'ane micumaüva xeime 'üyaya xeime cünaya, mücü hepaüsita**

<sup>27</sup>Xepu'enana quename müpaü metecühüavarüvacai, Xeime 'üyaya cünaya pepücacumaüvani. <sup>28</sup>Ne masi müpaü nepütixecühüave, que mü'ane mixeiya 'uca 'ihive'erietü, mücü canicumaüvani yu'iyarisie.

<sup>29</sup>Ayumieme 'ahüxicü 'aserieta miemecü xüca 'axa petiyurieneni, mecuxi quenivatitu'i quenehüva. 'Aixüa caniyümücü masi tixaütü müreuyevenicü 'avaiyarisie mieme, capa pe'axevitü peheucahüiyanicü xasi taiyariyarisie. <sup>30</sup>'Amama 'aserieta mieme xüca 'axa 'ane matiumayüisitüvani, mecuxi quenavitequi quenehüva. 'Aixüa caniyümücü masi pemanupurunicü

capa pe'axevitü peheucahüiyanicü xasi taiyariyarisie.

**Quesusi que mutayü, 'uqui yü'üya mucu'eirie hepaüsita**

*(Mateu 19:9; Maricuxi*

*10:11-12; Rucaxi 16:18)*

<sup>31</sup>Müpaüta mepüte'utahüavarie meripai miemetexi, Que mü'ane micu'eirie yü'üya, 'eiriya xapayari que'ihuritüani. <sup>32</sup>Ne masi müpaü nepütixecühüave, que mü'ane micü'eiri yü'üya, mücü xeime cünaya cumaüvame canayeitüani yü'üya me xüca 'uca 'icumayüirieni que mü'ane mücayücüna xEICÜA. Que mü'ane mitivitüni 'uca mucu'eiriva, mücüta picumaüvani xeime 'üyaya.

**Quesusi que mutayü, memyühuritüa vahepaüsita**

<sup>33</sup>Mücü meta, xepu'enana quename meripai miemetexi müpaü metecühüavarüvacai, Pepüca'ahuritüani peti'itavatü, masi que pemüti'ahuritüa yapepüticamieni Ti'aitame masixeyacacu. <sup>34</sup>Ne masi müpaü nepütixecühüave, yemecü xepüca'yühuritüaca. Taheima mieme muyuavi xexatatü xepüca'yühuritüaca Cacaiyari muva yu'üvenisie 'acaitü müti'aitacü. <sup>35</sup>Cuie xexatatü xepüca'yühuritüaca cuie 'üvenieyatüa mieme quetayatüa mieme mühücücü. Querusareme xexatatü xepüca'yühuritüaca ti'aitame mütürücaüye quiecarieya mühücü. <sup>36</sup>'Amu'u pexatatü pepüca'ahuritüaca pemüca'yüvecü tuxame yüvime pemeyeitüanicü ni

xei cüpayari. <sup>37</sup>Xüca xeyuvaüriyani, hü xequeneutiyaneni xeicüa, me xüca xecayuvaüriyani, tixaü xequeneutiyaneni. Tavari xei niuquiyari panayuhayeve, que mü'ane 'axa mütiyuruvasüa canimiemetüni.

**Quesusi que mutayü, 'axa memüvayurie 'axa me'itüarieca vahepaüsita**

*(Rucaxi 6:29-30)*

<sup>38</sup>Xepu'enana quename müpaü metecühüavarüvacai, Yühüxicü pürapica rahüxicü, yutamecü ratamecü. <sup>39</sup>Ne masi müpaü nepütixecühüave, müpaü xeteyurietü xepüca'inenaca que mü'ane 'axa müxeyurie. Masi que mü'ane 'a'apucuesie mümasicuvaya 'aserieta, ta'aurie pe'aveme queneupitüa tapata. <sup>40</sup>Que mü'ane masixanetatü mümasinavairiemücü 'acamixa, queneutauniri 'a'ücarita. <sup>41</sup>Que mü'ane masiviya hesiena mieme tixaütü pemüranutünicü xei queyari, huta queyari queneumieni 'utüana. <sup>42</sup>Que mü'ane tixaütü mümativaviri, queneupitüa, que mü'ane mümasiniüviriemücü pepüca'ixani'erieca.

**Que müreuyevese müvanaqui'eriecü müme memeye'unie**

*(Rucaxi 6:27-28, 32-36)*

<sup>43</sup>Xepu'enana quename müpaü metecühüavarüvacai, Pepinaqui'erieca 'auravatanaca, pepi'uxive'erieca que mü'ane mümasi'aye'unie. <sup>44</sup>Ne masi müpaü nepütixecühüave, xequenivanaqui'erieca

müme memüxe'aye'unie, xequeneyunenevieca müme memüxe'uveiya vahesie mieme. <sup>45</sup>Müpaü xeyüatü püyuritüni yu'uquiyari taheima macave nivemama xemühümecü. Mücü canenatinetüvani yutau 'axa memüteyurie vahesüa 'aixüa memüteyurie vahesüa. Viyeri panacanü'ava müme heiseriemecü yamemütecahu vahesie müme heiseriemecü yamemücatecahu vahesie yaxeicüa. <sup>46</sup>Xüca xevanaqui'erieca müme memüxenaqui'erie, que xete'a'liva mücücü. Camü, 'asita müme cuviyexunusie mieme memüteyuriyari yaxeicüa mepüteyurie. <sup>47</sup>Xüca yu'ivamarixi xevavaüritüaca hücüa, titasü xeteyurie hipatü yamemücateyurie. Camü, müme memücatateüterima yaxeicüa mepüteyurie. <sup>48</sup>Xeme püta yemecü xequenaye'axüa, maye'avepaü xe'uquiyari taheima macave.

**Quesusi que mutayü, müme 'aixüa memüteyurie vahepaüsita**

**6** Xequeneyucuerivayurie ca capa xete'ayexeiyanicü teüteri vahüxie, müme memüxe'ixüariecacü xeicüa. Me xüca vahüxie xeicüa yaxeteyurieca, tixaütü xepücatepitüarieni, yu'uquiyarisüa taheima macavesüa. <sup>2</sup>Quepauca pemiparevie puvüre, cuxineta pepüca'aitani 'ahüxie mühüsieriecacü pemüxeiyarienicü, tuquipa caye 'utüa que memüteyurie müme yacü xeicüa memüteyurie, teüteri 'aixüa memutiyanenicü vahepaüsita.

'Icū niuqui caniseüyeni que nemütixecühüave, 'ari meheixeyatü mepacü tita memütepitüarieni. <sup>3</sup>'Ecü püta quepaucua pemiparevie, 'asipepücatayüni, sepa 'amama 'aserieta mieme 'asimücatimate que mütiyuriene 'a'utata mieme, <sup>4</sup>'avie pemiparevicü. 'Ana 'a'uquiyari 'ixeyatü tita müti'aviesie pümatipitüani 'a'ivarica yunaima vahüxie.

**Quesusi que mutayü nenevieri  
hepaüsita**

*(Rucaxi 11:2-4)*

<sup>5</sup>Quepaucua xemüyunenevie, müme yacü xecüa memüyüa vahepaü xepüca'yüaca. Cui püvanaque tuquipa memüti'unicü 'isiquinásie memüti'unicü meyunenevietü teüteri memüvaxeyanicü. 'Icū niuqui caniseüyeni que nemütixecühüave, 'ari meheixeyatü mepacü tita memütepitüarieni. <sup>6</sup>'Ecü püta quepaucua pemü'anenevie 'a'quita queneutahaca. Quitenie pereuname nenevieri quenepitüaca 'a'uquiyari mana muyeica muye'aviesie. 'A'uquiyari 'ixeyatü tita müti'aviesie pümatipitüani 'a'ivarica yunaima vahüxie.

<sup>7</sup>Xeyunenevietü xepüca'imüiriyani niuqui hipame nuivarite vahepaü. Vaüca memutiniucacü, me'enieriecame mepüyu'erie. <sup>8</sup>Vahepaü xe'anenetü xepüca'acüne. Cacaüyari müxe'uquiyari yapütimate tita xemütheueyhüva, yaxecate'itavavirievavecacu cuxi. <sup>9</sup>'Ayumieme 'ipaü püta xequeteneyunenevieca xeme,

Ta'uquiyari taheima pemacave, Pequereueyhüviyarieni que pemütipasie.

<sup>10</sup>'Enata queneusutüa peti'aitatü, Yamequeteyurieca que mümatinaque Taheima que memüteyurie, cuiepata yaquetiuyüni.

<sup>11</sup>'Icuai hicü mieme que temütheueyhüva, Yaquetatineumicuani hicü.

<sup>12</sup>Quetatineueyhüvirieca 'axa temüte'uyuricü Tameta temütevareueyhüviricü müme 'axa memütasi'uyuri.

<sup>13</sup>Pepücatasipitüaca temüta'inüasienicü, Masi quetaneutavicueisitüa 'axa temüca'itüarienicü.

'Ecüsü 'aheyemecü pecatini'aitametüni Pecanitürücaüyeni Visi pecani'aneni 'aheyemecü. Müpaü xecüa cani'aneni.

<sup>14</sup>Xüca xetevareueyhüvirieca teüteri 'axa memüteyurie, xe'uquiyari taheima macave püxereueyhüvirieca xemeta. <sup>15</sup>Me xüca xecatevareueyhüvirieca teüteri, xe'uquiyari püxaxereueyhüvirieca xemeta 'axa xete'uyurieyu.

**Quesusi que mutayü  
haquiya hepaüsita**

<sup>16</sup>Quepaucua xemüyuhaquiva müme yacü xecüa memüteyurie vahepaü xepüca'yüaca. Müme yuheiveriecate vahepaü meteyuxexeyame mepayuyeitüva yacü xecüa, yuhaquivamete vahepaü memüteyuxexeyanicü teüteri que memütevaxeyia. 'Icū niuqui caniseüyeni

que nemütixecühüave, 'ari  
meheixeyatü mepacü  
tita memütepitiuarieni.

<sup>17</sup>'Ecü püta quepaucua  
pemü'ahaquiva, quene'acaviri  
'amu'usie, quenanacahütaima,

<sup>18</sup>tiyuhaquivamepaü  
pemücati'axexeyanicü, teüteri que  
mematexeyia. 'A'uquiyari mana  
muyeica muye'aviesie, mücü püta  
que matixeyia pepümasiücünü.

'A'uquiyari 'ixeyiatü tita  
müti'aviesie, mücü pümatipitüaca  
'a'ivarica yunaima vahüxie.

#### Que müti'tuta taheima mieme

(Rucaxi 12:33-34)

<sup>19</sup>Xequeteneuhayeva  
cuiepa timieme xetixeuërietü  
xeicüa. Cuiepa timieme  
pütüyusevixima ticümüyarietü  
tiyucuitamatü, tenavayamete  
qui vari mepeuhaque, mepinava.

<sup>20</sup>Taheima mieme masi  
xequetenexeürieca. Mücü  
pücatiyusevixima caticümüyarietü  
catiyucuitamatü, tenavayamete  
mepücaheutahaque mepüca'inava.

<sup>21</sup>Haque pemeitixeuërie, manata  
'a'iyari püyecani.

#### Tavaiyari cüxemeya

(Rucaxi 11:34-36)

<sup>22</sup>Tahüxie canihücütüni  
tavaiyari cüxemeya. 'Ayumieme  
xüca 'ahüxi yuxevini que  
pemütixeyia 'apini, 'avaiyarisie  
naime pepühecüariviyarieca.

<sup>23</sup>Me xüca 'ahüxi 'axa 'aneni  
peti'acahive'eriecacu, 'avaiyarisie  
pecaniyüriyariecamücü. Mericüte,  
'acüxeme xüca 'uyüre, yemecü  
pepüyüriyarieni.

#### Cacaüyarisie tiviyatü, yupinisie tiviyatü püca'yüve müti'uximayaca 'axeicüa

(Rucaxi 16:13)

<sup>24</sup>Tevi püca'yüve 'axeicüa  
yuhutame vahesie tiviyatü  
müti'uximayaca yucusiyarima.  
Ni'uxive'eriecamücü xeime  
'inaqui'erietü xeime, mesü  
xeimesie pütüviyani 'ixani'erietü  
xeime. Xepüca'yüvave 'axeicüa  
xemüte'uximayaca Cacaüyarisie  
xeteviyatü yupinisie xeteviyatü.

#### Cacaüyari que müti'ävüya yunivema

(Rucaxi 12:22-31)

<sup>25</sup>'Ayumieme müpaü  
nepütixecühüave,  
xequeteneuhayeva xeyu'iyaritüatü  
yutucari hepaüsita, tita  
tetecuanini tita tete'ieni  
xecateyücühüavetü, yuvaiyari  
hepaüsita xepüca'yü'iyaritüaca  
tita tete'anacatüxüani  
xecateyücühüavetü. 'Icuai xeicüa  
que titucari, 'ixuriqui ravaiyari que  
tihücütüni. <sup>26</sup>Xequenivaru'ixüari  
viquixi taheima miemete.  
Mepüca'uca'esa mepüca'uca'isana,  
caxetunisie mepücateti'uta.  
Sepanetü, xe'uquiyari taheima  
macave pütivamicua. Mericüte,  
xeme cuini mieme masi  
xepeuyevese ni que müme. <sup>27</sup>Xeme  
quepaicü püyüve yu'iyaritüatü  
'a'utevitü mayuyetitüani xüca  
'esi'utevini, sepa xei sicuriyari.

<sup>28</sup>'Ixuriqui hepaüsita  
titayaricutaxi xeteyu'iyaritüa.  
Xequeteneyü'üquitüaca xehe'erivatü  
texuxuri 'üsita mieme que



mütiuyüraxüa. Capüti'uximaya capüvita. <sup>29</sup>Siepüre müpaü nepütixecühüave, Sarumuni sepa naimecü marivetü mayuyeitüvacai visi pücatiyuquemaritüvacai texuxuripaü. <sup>30</sup>Xüca müpaü 'aneni, xüca Cacaiyari müpaü tiquemaritüaca 'üxa 'üsita mieme hicü meuti'lu 'uxa'a huxunuta meucahüiva, masi yemecü catixequemaritüaca xeme sepa haveri mieme xeicüa yuri xemüte'erie. <sup>31</sup>Ayumieme xepücayu'iyaritüaca yaxe'utiyuatü, Queri tetecuaca, titari tete'ieca, titacü tetetaquemaritüaca, xe'utiyuatü. <sup>32</sup>Müme memücatateüterima mepivautüve mücü naime. Xe'uquiyari taheima macave yapütimate xemeiyehüvacü 'icü naime. <sup>33</sup>Xeme masi xequeneyuvaüriyani mücü tixe'aitüvame mühücütünicü, heiseriemecü yaxemütecahunicü. Müpaü xeteyurietü, xepütemiqüienita mücü naime. <sup>34</sup>Ayumieme xepücayu'iyaritüaca 'uxa'a miemecü. 'Uxa'a puxuaveni 'iyaritüarica yücümana. Tita 'axa müti'ane 'ari pütünaquixü hicü miemecü xemüyu'iyaritüacacü.

**Hipame vahesie xepücate'uhüpani,  
que mutayü**

(Rucaxi 6:37-38, 41-42)

**7** Hipame vahesie xepücate'uhüpani, xehesie capa rahüivanicü. <sup>2</sup>Hipame vahesie que xemüte'uhüpa, yaxeicüa xeme xehesie pürahüivani. Que xemüteva'inüasirie hipame, yaxeicüa xepüte'inüasiyarieni. <sup>3</sup>Titayari cui petixeiya xasi 'a'iva

hüxita meutavivi, pecahe'erivatü queuruvi mana meutave 'ecü 'ahüxita. <sup>4</sup>Que petitahüaveni 'a'iva, Tamüsü nepümasivaye'itirieni xasi 'ahüxita meutavivi, queuruvi heutavecacu cuxi 'ecü 'ahüxita. <sup>5</sup>Yacü peputaine xeicüa. 'Ahüxita meri quenivayehüva queuruvi, 'arique 'aixüa peheunieretü pecanayeimücü pemivaye'itirienicü xasi 'a'iva hüxita meutavivi.

<sup>6</sup>Tita Cacaiyarisie mieme mütüpasie xepücatevamücuani süicüri. Cuca cuini müraye'atüca xepüca'acaxürüvani tuixuri vahüxie, capa me'itiquesinanicü, capa ta'aurie me'axürieme mexe'utisanacü süicüri.

**Xüca xeteta'ivauni, xüca  
xetecuvautüveni, 'itupari xüca  
xe'uyuitüani, 'aixüa püyüni**

(Rucaxi 11:9-13; 6:31)

<sup>7</sup>Xecatehayevatü xüca xeteta'ivauni, yaxepütemiqüieni. Xüca xetecuvautüveni xecatehayevatü, yaxepüte'itaxeiya. 'Itupari xüca xe'uyuitüani xecatehayevatü, xepüteheuyepiyarieni. <sup>8</sup>Que mü'ane mita'ivau pitanaqui'erieni yu'ivaurica, que mü'ane mivaune pitaxeiyani, que mü'ane 'itupari mücuyuitüva püreuyepiyarüva.

<sup>9</sup>Xevitü xeme xüca nu'aya 'itavavirieni pa, tete que timini pa xatatü. <sup>10</sup>Xüca quesü 'itavavirieni, cu que timini quesü xatatü. <sup>11</sup>Xemesietü sepa 'axa xemü'anene, xüca 'aixüa 'anemecü xetevamicuani yutüriyama, masi vaücavamecü xe'luquiyari taheima macave 'aixüa

'aneme catinivamimücü müme  
yamemüte'itavavirieni.

<sup>12</sup>Ayumieme nai que  
mütixenaque teüteri  
memüxeyurienicü xeme,  
mücü canixe'inüariticämücü,  
yaxeicüa xemüvayurienicü  
müme meri. Müpaü tiyurienetü  
canitaxeviriyamücü 'inüari  
niuquiyari texaxatamete  
vanuquiyari naime.

### Quitenie 'esimayeve

(Rucaxi 13:24)

<sup>13</sup>Quitenie 'esimayevasie  
xequeneutahaxüa. 'Epayeva  
quitenie, 'epatayeve huye  
meucayune haque memeuyexürüve.  
Mepüyümüire mana memeutahaque.  
<sup>14</sup>'Esipayeva quitenie, püyusaipüna  
huye tucarisiepai meutiyune.  
Hipatü xeicüa mepicaxexeiya.

### Cüye que mütimasicü yu'icuaxisie

(Rucaxi 6:43-44)

<sup>15</sup>Xequeneyucuerivayurieca  
texaxatamete memüte'itava  
vahepaüsita. Xehesüa  
mepatahaque muxasi vahepaü  
meteyuxexeyatü, masi tetüata  
mepü'üravesixi püta memütenavaya.  
<sup>16</sup>Que memüte'utixuxuavere  
xepüvaretimani que memü'anene.  
Caxie que tica'inüiva xuyasie.  
Pini que tica'inüiva visexasie.  
<sup>17</sup>Naitü cüye münararani  
'aixüa pütüitixuxuavere. Naitü  
cüye mütixainirüme 'axa  
pütüitixuxuavere. <sup>18</sup>Cüye münarani  
pücayüve 'axa mütüitixuxuavereni.  
Cüye mütixainirüme pücayüve  
'aixüa mütüitixuxuavereni. <sup>19</sup>Naitü  
cüye 'aixüa mücatiutixuxuavere

canavitequiemücü, taipa  
caneuxüriyamücü. <sup>20</sup>'Ayumieme  
que memüte'utixuxuavereni  
xepüvaretimani que memü'anene.

### Yunaitü muyuavisie mepüca'aye'axüani que mutayü

(Rucaxi 13:25-27)

<sup>21</sup>Müme müpaü  
memünetecühüave, Ti'aitame 'acu,  
Ti'aitame me'utiuyatü, yunaitü  
müme mepücaheutahaxüani  
haque mütü'aita que mü'ane  
taheima macave. Müme xeicüa  
yamemütecahu que mütinaque  
ne'uquiyari taheima macave, müme  
mecaneutahaxüacuni. <sup>22</sup>Mücü  
tucarisie yumüiretü müpaü  
mepünetetahüave, Ti'aitame  
'acu, Ti'aitame, neuxei tame  
temasixatatü tetenicuxatacaitüni,  
temasixatatü cacäiyarixi 'axa  
memü'anene tepüvareutanü'axüa,  
temasixatatü marivemecü  
tepüteyuriecai. <sup>23</sup>'Anari ne  
müpaü nepütivatahüave, Hasuacu  
nepücaxematecai. Nehesüa  
xepücamiemete, xequeneutayeixüa.  
Cari yaxepüteyurie que  
mücatiheiserie.

### Simiyenitu 'aixüa mü'ane 'axa mü'ane

(Rucaxi 6:47-49; Maricuxi 1:22)

<sup>24</sup>'Ayumieme nepaine, que  
mü'ane mi'enie 'icü nenuqui que  
nemutayü, yamüticatüa, mücü tevi  
mütümaivepaü cani'aneni. Mücü  
niyutaquitüani tetesie. <sup>25</sup>'Ucaviyecu,  
hatuxame vayenecu, 'ucu'ecacu,  
mücü quisie 'uquexüacu 'eca,  
cacanativeni, tetesie mutaquicaicü  
simiyenituyari. <sup>26</sup>Masi que mü'ane

mi'enie 'icü neniucui, yacaticamietü, mücü tevi 'asimücatimatepaü cani'aneni. Mücü niyutaquitüani xiecaripa. <sup>27</sup> 'Ucaviyecu, hatuxame vayenecu, 'ucu'ecacu, mücü quisie 'uquexüacu, niucaveni. Carima niutayuanı 'ativeximetü.

<sup>28</sup> Hicüsüari Qesusi quepaucua minü 'icü xasica, teüteri mecaniuhüxiyani 'üquisicayacü. <sup>29</sup> Que mü'ane heiserie mexeiypaü tiniva'üquitüacaitüni. Müme 'iniüaricü memüteva'üquitüvacai vahepaü pücati'üquitacai Qesusi.

**Qesusi que mürenayehüa tevi  
cuiniyacü müca'itiyacai**

(*Maricuxi 1:40-45; Rucaxi 5:12-16*)

**8** Mericüsü quepaucua yemurisie macane, teüteri yumüiretü mecaniveiyacaitüni. <sup>2</sup> Hicü tevi cuiniyacü müca'itiyacai hesüana nuaca nenevieri canipitüani ya'utaitü, Ti'aitame xüca pe'avaüriyani pepüyüve pemünesi'itienicü. <sup>3</sup> Mücüri yumama 'utaseraca nimayüani ya'utaitü, Nepünevaüriya. Pecaniu'itiyani. Cuiniyaya yapaücua neunuani, 'itiyatü nayani. <sup>4</sup> Hicü Qesusi müpaü tinitahüave, Neuxei, xeimetüme pepücaraxaxatüvani. Mara'acamesia quenemie püta quene'ahecüata masixeiycü. 'Imiquieri quenanutimava que mütiu'aitaxü Muisexi yapemütivatahecüatüanicü.

**Qesusi que mürenayehüa cuya  
nu'aya**

(*Rucaxi 7:1-10*)

<sup>5</sup> Mericüsü Caperünaumesie heutahacu cuya hesüana

caninuani xei sienituyari cuyaxi tiva'aitüvame. Mücü vaüriyarica nipitüani <sup>6</sup> müpaü 'utaitü, Ti'aitame 'acu, nenive muva nequita pacaca hurietü cui yüanetü cuiniyacü. <sup>7</sup> Mücü rehüave, Ne netiyemie nemenayehüanicü. <sup>8</sup> Cuya rehüave, Ti'aitame, 'aixüa nepüca'ane nequita pemeutahanicü. Niuqui xeiçüa queneutayüqui. Mücücu panayehüiyani nenive. <sup>9</sup> Nesiere necatini'aitüarica necuyatütü, cuyaxita nepütiva'aitüvame. Xüca müpaü netitahüave xeime, Quenemie ne'utaitü, mücü püyemie. Xeimeta müpaü xüca netiutahüave, Quenaye'a ne'utaitü, mücü canayeimücü. Xüca müpaü netitahüave neheshüa mieme ti'uximayatame, 'Ipaü quetineyurieneni, müpaü pütüyurieneni. <sup>10</sup> Qesusi 'i'enieca nihüxiyacaitüni. Müpaü tinivarutahüave müme memiveiyacai, 'Icü niuqui caniseüyeni que nemütixecühüave, ni xeime 'Ixaherisixi vasata 'icüpaü 'aneme nepücahetaxeiycave yuri ti'eriecame. <sup>11</sup> Müpaü nepütixecühüave, yumüiretü meni'axüacuni tau matineicasis miemete macayuyuiquesie miemete. Mexa 'aurie mecanayaxicuni 'Apurahamimatü 'Isahaquimatü Cacuvumatü haque müre'aita que mü'ane taheima macave. <sup>12</sup> Peru müme mana memeutahaxüaniquecai müpaü me'anenetü memutinuiyaxücü, müme püta mecanayeveiyariexüacuni tacua, yüvipa yemecü memu'üvanicü. Mana meniutisuanacuni

meniyutaquevecuni. <sup>13</sup>Hicü Quesusi müpaü tinitahüave cuyaxi tiva'aitüvame, Quenemie. Yuri que pemütiuta'eri, yapeque'itüarieni. 'Anatütü nanayahüiyani nu'aya.

**Quesusi que mürenayahüa Pecuru varücaüya**

*(Maricuxi 1:29-31; Rucaxi 4:38-39)*

<sup>14</sup>Merücüsü Quesusi Pecuru que nuaca, nixeyi varücaüya 'ucacaima hüiyacame. <sup>15</sup>Mamayasio nimaüyani. Hüiya nihayeva. 'Anucuqueca tinivarumini.

**Yümüireme que mütivaranaxexüri**

*(Maricuxi 1:32-34; Rucaxi 4:40-41)*

<sup>16</sup>Hicü 'ucutaicarecu mecani'atüirieni yumüireme teüteri, cacaiyarixi 'axa memü'anene memüvaviyacai. Cacaüyarixi nivanaruyenü'axüani niuquicü, yunaime püvaranaxexüri memütecucuyecai. <sup>17</sup>Müpaü tiuyuriecu, paye'a Cacaüyari que mutayü, tixaxatame Quisariyaxi ya'utainecacu, Mücütütü cataniunavairieni taveranariya, peitü tacuiniya.

**Teüteri Qesusisie memüteviyaquecai**

*(Rucaxi 9:57-62)*

<sup>18</sup>Merücüsü Quesusi vaxeyatü teüteri que memüteyuxeüriecai 'auriena yumüiretü, tinivaruta'aitüani yuteüterima 'anutaüyepai memenuyevitünicü. <sup>19</sup>Hicü xevitü 'inüaricü müti'üquitametücai hesüana nuaca, müpaü tinitahüave, Ti'üquitame 'acu, 'ahesie necatiniviyamücü. Haque pemeyemie, neta

necaniyemieni 'a'utüma. <sup>20</sup>Qesusi rehüave, Cauxaisi yuterü mepexeyi, viquixi taheima miemete yu'itua mepexeyata, peru ne, Yuri Tevi que nemütiteva, haquevasü nepücarexeyi haque nemünetamuritaritüani. <sup>21</sup>Xevitüa tiyü'üquitüvame müpaü tinitahüave, Ti'aitame, queneneupitüa merie nemüyemiecü, nemicateucü ne'uquiyari 'umüyu. <sup>22</sup>Qesusi rehüave, Nehesie quetinevianisü. Müquite quenivaruhayeva, müme püta memüvacateucü yuhesüa miemete müquite.

**Quesusi que müreinütüa 'eca hamevari**

*(Maricuxi 4:35-41; Rucaxi 8:22-25)*

<sup>23</sup>Merücüsü canuvasio 'acayerüca neyani Qesusi, hesüana miemete teyü'üquitüvamete yunaitü me'acayaxeca 'üaritü mepecü. <sup>24</sup>Hicü haracuna nenutivayacaitüni, Canuva pücahahecüiacai hamevarisata. Qesusi masi canicusucaitüni. <sup>25</sup>Hicü teyü'üquitüvamete 'auriena me'uyuxeürieca menenutahütüani müpaü me'utiyuatü, Ti'aitame quetaneutavicuesitüa tepeuyevexime. <sup>26</sup>Mücü müpaü tinivarutahüave, Titayari xeteheumama. Cari haveri mieme xecüa yuri xepüte'erie. Hicü 'anucuqueca nitatieni 'eca haracuna. Cui cayuvatü caniutamare. <sup>27</sup>Teüteri menihüxiyacaitüni müpaü me'utiyuatü, Queri 'ane 'icü. Cari 'asita 'eca yapüticamie que maine, haracuna meta.

**Cacaüyarixi que memütevaviyacai Catarenatari**

*(Maricuxi 5:1-20; Rucaxi 8:26-39)*

<sup>28</sup>Merücüsü 'anutaüyepai meheta'axüacu Catarenatari

vacuiepapai yuhutatü  
menenucunaque tequiyapa  
meheyecüneca, cacaiyarixi 'axa  
memü'anene memüvaviyacai. Cuini  
mieme metenayu'eririyacaitüni.  
Hipatü mepücayüvavecäi mana  
memu'uvanicü mücü huyeta, müme  
vacümana. <sup>29</sup>Merücüsü müpäü  
metenihiva, Que petasiyurieni  
'ecü, Cacaüyari pemünu'aya. 'Uva  
petinua petasi'uximatüanique  
tucari ca'aye'vecacu cuxi.

<sup>30</sup>Merücüsü memanu'uvacaisie  
tevapai metenicuacaitüni tuixuri  
yumüiretü. <sup>31</sup>Cacaüyarixi 'axa  
memü'anene menitavavirieni  
müpäü me'utiyuatü, Xüca  
petasi'anuyenü'axüani, mana  
püta quetananunü'a cuerietü  
tuixuri temüvaviyacü. <sup>32</sup>Müpäü  
tinivarutahüave, Xequenehu  
manapaitü. Mana mehecüneca  
menivarutiviyaxüani tuixuri.  
Yunaitü tuixuri meniutinausa. 'Axa  
'anecüa meneucanausaxüaximieni  
haracunapa. Hapa meniucüni.

<sup>33</sup>Hicü vahüvemete  
meniyuta'unaxüani. Quiecarisie  
meheta'axüaca metenicuxatacaaitüni  
naimeteüteri cacaiyarixi 'axa  
memü'anene memüvaviyacai  
vahepaüsita. <sup>34</sup>Hicü quiecatari  
yunaitü mecanivayecüne  
meheinaquiyuca Quesusi.  
Me'ixeyatü vaüriyarica  
menipitüacaitüni müyemiecü  
vacuiepa mücayuhayevanicü.

**Quesusi que mürenayahüa  
huriecame**

(*Maricuxi 2:1-12; Rucaxi 5:17-26*)

**9** Merücüsü canuvásie  
'acayerüca 'anutaiyepai

neyani. Yuquiecarisie ninuani.  
<sup>2</sup>Hicü huriecame meni'atüirieni  
'itarisie yecaime. Quesusi  
vaxeyatü yuri que memüte'eriecai  
müpäü tinitahüave huriecame,  
'A'iyari que neucayesa nenive.  
'Ari pepüreyehüviyari 'axa  
pemütiuyuricü. <sup>3</sup>Hicü hipatü  
'inüaricü memüte'üiquitametetücai  
müpäü meteniyücühüavecaitüni  
yu'iyarisie, Cari 'icü pisevixima  
Cacaüyari 'axa 'utaitü. <sup>4</sup>Quesusi  
va'iyaritüarica maitü, müpäü  
niutayüni, Titayariri 'axa  
xeteyu'iyaritüatüve yu'iyarisie.  
<sup>5</sup>Tita masi caticuanive. Que  
ticuanive müpäü mütayünicü,  
pepüreyehüviyari 'axa  
pemütiuyuricü 'utaitü. Caticuanive  
masi müpäü püta mütayünicü,  
quenancuquexi quenecuyeicani  
'utaitü. <sup>6</sup>Para yaxemütemaicacü  
quename heiserie nehexeyia  
cuiepa nemütivareuyehüviriencü  
'axa memüte'uyuricü, Yuri  
Tevi nehücütütü, hicü müpäü  
tinitahüave huriecame,  
Quenanucuquexi, 'a'itari  
quenacuetü, 'aquie quenemie. <sup>7</sup>Hicü  
'anucuqueca yuquie neyani. <sup>8</sup>Teüteri  
me'ixeyica menimamacaitüni.  
'Aixüa meniutiyuanecaitüni  
Cacaüyari hepaüsita, heiserie  
müvarupitüacü teüteri müpäü  
memüteyurienicü.

**Que mütitä'ini Mateu hesiena  
mütivianicü**

(*Maricuxi 2:13-17; Rucaxi 5:27-32*)

<sup>9</sup>Hicü Quesusi 'uma  
'uyemietü nixeyia tevi Mateu  
titevacame mana 'acaime  
memüte'ayutituayasie. Müpäü

tinitahüave, Nehesie quetineviyani.  
'Anucuqueca hesiena tiniuviya.

<sup>10</sup>Mericsü Quesusi mana  
catinicuacaitüni quita.  
Yümüiretü cuviyexunusie  
mieme memüteyetuiriyari,  
'axa teyuruvamete meta  
me'u'axüaca Qesusimatü  
teyü'üquitüvametemama vahamatü  
metenicuacaitüni 'axeicüa.

<sup>11</sup>Pareseusixi mevaruxeiyaca  
müme, müpaü metenivarutahüave  
teyü'üquitüvametemama,  
Titayarcutaxi müme cuviyexunusie  
mieme memüteyetuiriyari  
vahamatü 'axa teyuruvamete  
vahamatü ticua'a mücü  
tixe'üquitüvame. <sup>12</sup>'Iya varu'enieca  
müpaü niutayüni, 'Aixüa  
memütheu'erie mepücaheiyehüva  
tiyu'uhayemavame. Müme  
memütecucuye püta  
mecaneiyehüaca. <sup>13</sup>Peuyevese  
cuxi yaxemüteyü'üquitüanicü  
que maine mücü niuqui müpaü  
manuyüne, Nepünaqui'a xüca  
xeteyucanenimayaca, peru  
mavari xeicüa pücanesinaque,  
manuyüne. Ne que nemütinua,  
nepücanua nevata'inienique müme  
heiseriemecü yamemütecahu.  
Müme 'axa memüteyurie püta  
nevata'inienique nepunua,  
memütehayanicü que  
memüteyuriecäi.

**Que mütiuta'ivaviyarie haquiya  
hepaüsita**

(*Maricuxi 2:18-22; Rucaxi 5:33-39*)

<sup>14</sup>Hicüsüari Vani  
teyü'üquitüvametemama  
Qesusisüa meniu'axüani müpaü  
me'utiuyatü, Tame, Pareseusixi

meta, titayari tete'utatihauiva,  
'ahesüa miemete teyü'üquitüvamete  
mecayutihauivacacu. <sup>15</sup>Quesusi  
müpaü tinivarutahüave,  
Neüquiyapa que meteyüvave  
'ixüaramete memüyuheieveriecäi  
mexi neneüqueme vahamatü 'a'uca.  
Tucari canaye'amücü quepaucua  
neneüqueme müthanieni vasata.  
'Anari meniyyuhaquicuni. <sup>16</sup>Tevi  
'ixuriqui mücayutatutuvücü  
püca'imatesiquitüani 'ixuriqui  
müye'i. Manesiquiyari müpaü  
mü'ane 'ixuriqui pütahana,  
sanimeyari masi 'axa 'anetü  
payeica. <sup>17</sup>Yaxeicüa sixai  
müyeyel'isie pücatuariva  
caxie vinuyari mücuanacü. Me  
xüca müpaü tiuyurienique,  
sixai nitisaniqueniqueyu. Vinu  
nitayeuriveniqueyu, sixai  
neuyeveniqueyu. Masi sixai  
mühehecuasie pücatuariva caxie  
vinuyari mücuanacü. Mücücü naitü  
püyuhayevani.

**Cairu nu'aya que**

**müranucuquetüarie, 'uca ticuicame**

**Quesusi 'ücarieya 'umayüacu**

(*Maricuxi 5:21-43; Rucaxi 8:40-56*)

<sup>18</sup>Müya tivacuxaxatüvacacu,  
teüteri va'uquiyari xevitü nuaca  
nenevieri canipitüani ya'utaitü,  
Nenive nemüni xique 'uca.  
Masi quenemie queneutime'i  
hesiena, nanutanierimücü.  
<sup>19</sup>Quesusi 'anucuqueca neiveiya,  
teyü'üquitüvameteteta 'üaritü.  
<sup>20</sup>Hicü 'uca 'aura caniuyani  
müticuyecäi, tamamata heimana  
huta viyari müyuriecäi xuriyaya  
caheunuavecacu. Varitana  
'uyemietü nimayüani 'ücarieya

putuniyarisie. <sup>21</sup>Yu'iyarisie müpaü tiniyücühüavecaitüni, Xüca ne'imayüani siqueresü 'ücarieya xeicüa, nepanayeveni. <sup>22</sup>Quesusi ta'aurie 'aveca 'ixeyaca müpaü niutayüni, 'A'iyari queneucayesa nenive. Yuri pemüti'eriecü pepanayehüiyari. 'Anatütü nanayeveni 'uca.

<sup>23</sup>Hicü Quesusi va'uquiyari quie henuaca, cürautavivamete varuxeyaca teüteri meyuxamuriecame meta, <sup>24</sup>müpaü tinivarutahüave, Xequenanuyecüni. 'Üimari pücamüqui. Pucusu masi. Meninanaimacaitüni. <sup>25</sup>Peru varanuyenü'axüacu teüteri, mana heutahacu, 'iviyacu mamayasie, nanucuqueni 'üimari. <sup>26</sup>Müpaü pütütamarivaxü mücü cuiepa naisarie.

**Yuhutatü memacücepai  
meheunenieretü que  
memüte'ayeitüarie**

<sup>27</sup>Mericiüsü mana 'anuyeyacu, yuhutatü meniveiyacaitüni Quesusi memacücepai, meniutihivacaitüni müpaü me'utiyyatü, Raviri pemünu'aya, quetanenenimayaca. <sup>28</sup>Quita heutahacu müme memacücepai 'aura menacüne. Quesusi müpaü tinivarutahüave, Yuri xete'erie quename müpaü neyüve. Müpaü mete'icühüave, Hü Ti'aitame. <sup>29</sup>Hicü nivaramayüaxüani vahüxita müpaü 'utaitü, Yuri que xemüte'erie yaxequ'e'itüarieni. <sup>30</sup>Meheunenieretü menacüne. Hicü Quesusi cuini mieme nivarupitüani yuhaxüama ya'utaitü, Neuxei, xevitü tüma pücaretimani.

<sup>31</sup>Müme masi mehecüneca metenicuxatacaitüni mücü cuiepa naisarie.

**Nenurietü niuvetü que  
mürayeitüarie**

<sup>32</sup>Hicü mehecüneca müme hesüana caniu'atüarieni tevi münenureicai cacaiyari 'axa mü'ane miviyacacü. <sup>33</sup>'Enuyenü'acu cacaiyari 'axa mü'ane, nenurie niutaniuni. Teüteri menihüxiyacaitüni müpaü me'utiyyatü, Hasuacu müpaü 'anetü pücamarivacai haitüarie 'Ixaheri cuieyarisie. <sup>34</sup>Perusü Pareseusixi müpaü meniutiyuanecaitüni, Cacaüyarixi 'axa memü'anene tiva'aitüvame miparevicü, 'ayumieme nivananuyenü'axüani cacaiyarixi 'axa memü'anene.

**Quesusi que mütivanenimayacai  
teüteri**

<sup>35</sup>Mericiüsü Quesusi naime quiecaritesie 'emacuyeyeusie 'esimüyeyeusie canicuyecacaitüni ticu'üquit Janetü vatuquiteta, ticuxatatü niuqui 'aixüa manuyüncü, que müti'ane Cacaüyari ti'aitametücacu ticuxatatü, varanayexürivatü müme naime cuiniyacü naime veranariyacü memütececuyecai. <sup>36</sup>Teüteri yumüireme vaxeyatü, nivarutinenimayata, memü'uximatüariecaicü mematixürüvecaicü, muxasi memücaheixeyia yühüveme vahepaü. <sup>37</sup>Hicü müpaü tinivarutahüave yuhesüa miemete teyü'üquitüvamete, 'Isanari püvaücava, 'isanamete

mepücayumüire. <sup>38</sup>'Ayumieme xequeneutavaviri 'isanari cusiyari, 'isanamete müvatanü'axüanicü yu'isanarita.

**Tamamata heimana yuhutame que mütivarayanexei nü'arisixi**

(*Maricuxi 3:13-19; Rucaxi 6:12-16*)

**10** Mericüsü teyü'üquitüvamete varuta'inieca yu'aurie tamamata heimana yuhutame hesüana memümiemetetücai, heiserie nivarupitüani cacaiyarixi memüca'itiatüca vahepaüsita memüvaranuyenü'axüanicü, memüvaranayexürüvanicü müme naime cuiniyacü naime veranariyacü memütecucuyecai.

<sup>2</sup>Nü'arisixi tamamata heimana yuhutatü müpaü mecatenitetevaca. Simuni meri Pecuru mütitetevacai, 'Atürexitari mü'ivayatücai, Cacuvu Vani meta mü'ivayatücai, Severeu memünivemamatücai, <sup>3</sup>Piripe Parüturume meta, Tumaxi Mateu meta cuviyexunusie mieme mütiyetuiriyarüvacai, Cacuvu 'Aripeu münu'ayatücai Reveu meta Tareu mütitetevacai, <sup>4</sup>Simuni mücananisitatücai Cura meta 'Isicariütitanaca 'arique miyetua Quesusi.

**Tamamata heimana yuhutame que mütivareutanü'axüa**

(*Maricuxi 6:7-13; Rucaxi 9:1-6*)

<sup>5</sup>Mericüsü 'ime Quesusi nivareutanü'axüani tamamata heimana yuhutame müpaü tivaruta'aitüaca, Müme memücatatetüterima vahuyeta xepücaheuhuni. Samariyatari

vaquiecarisie xepücaheutahaxüani.

<sup>6</sup>Masi muxasi memeuyexürüve vahesüa xequeneuhuni, 'Ixaherisixi teüteriyari vahesüa. <sup>7</sup>Xe'uyehutü 'ipaü xequetenecuxatani, Canayehuraniri, cuitü que mü'ane taheima müti'aita 'enata pisutüani ti'aitatü, müpaü xe'utiyuatü.

<sup>8</sup>Xequenivaranayexürüvani tecuicucate, xequenivaranutanieritüvani müquite, xequeniva'itieca müme cuiniyacü memüca'itiatüca, xequenivaranuyenü'axüa cacaiyarixi 'axa memü'anene. 'Asixecatecuetatüarietü xepüte'umiquie, 'asixecateyucuetatüatü xequetenivamicuani.

<sup>9</sup>Xepücahenu'üveni ni huru ni pürata ni cuvüre tuminiyari yuvivurasie. <sup>10</sup>Xerai xepüca'anuhuruvani huyeta mieme. Huta 'ücaiyari ya cacai xepüca'anü'üni. Mumuxi xepüca'anucueni. Ti'ivamesie pütinaque yu'icuai mümiquienicü yu'ivarica.

<sup>11</sup>Quiecarisie quepaucua xemeutahaxüani 'amacuyevasio ya 'esimüyevasio, xequenecuvava que mü'ane mana meca 'aixüa mütiuca'iyari. Hesüana xequenyuhayevani 'asita quepaucua que xemüyehu. <sup>12</sup>Quita xeheutahaxüaximetü vaürisica xequenepittiaca quiecame. <sup>13</sup>Xüca quiecame 'aixüa tiuca'iyarini, xevaürisica queyuhayevani hesiena. Me xüca 'aixüa catiuca'iyarini, xevaürisica que'acunuani xehesie. <sup>14</sup>Que mü'ane mücaxetanaqui'erieni, que mü'ane mücayuvauriya



xeniuqui mü'enienicü, quita xevayenexüaximetü, mücü quiecarisie xevayenexüaximetü, xequeneucasixüa tumuanari yu'ücasie, mana mücayuhayevacü. <sup>15</sup>Icü niuqui caniseüyeni que nemütixecühüave, tucari 'aye'ayu quepaucua 'isücame müvatahüave, Surumatari Cumuxatari 'esiva cuanivemecü meni'itüariecuni, peru mana quiecatari püta cui cuanivemecü mecani'itüariecuni.

**'Arique xepuveiyarieca, que mutayü**

<sup>16</sup>Neri que nemütixehentanü'axüa, muxasi vahepaü xecaniyüacacuni 'üravesixi vasata xe'u'uvatü.

'Ayumieme xequetenemaivaveni cuterixi vahepaü, xepüca'inüca tita 'axa müti'anene cucuruxi vahepaü.

<sup>17</sup>Xequeneyucuerivayurieca teüteri vahepaüsita. Müme mepüxeyetuanu yu'uquiyarima vahesüa.

Mepüxetavayani yutuquiteta.

<sup>18</sup>Cuvexunarurisixi te'aitamete vahüxie xecananuhapaniecuni nehesüa xemümiemetecü.

Müpaü xe'itüarietetü xecanivataheciästüiyacuni müme hipameta memücatateüterima.

<sup>19</sup>Quepaucua memüxeyetuanu, müpaü xepücateyu'iyaritüaca que xemutiyuaneni, quepaü xemütevacühüaveni. 'Anaque yaxecatenipitüariecuni que xemutiyuaneni. <sup>20</sup>Xemesü xepücahümetüni que mü'ane yamütayüni 'ana, masi xe'uquiyari 'Iyarieya canihücütücamücü que mü'ane yamütayüni xecuyuitätü.

<sup>21</sup>Ra'iva pürayetuanu mümierienicü. Ra'uquiyari niyetuamücü yunive. Türi

meniyeha'acuni yu'uquiyarima vahepaüsita, metenita'aitacuni memücüi'ivacü. <sup>22</sup>Yunaitü mecanixe'uxive'eriecacuni nehesüa xemümiemetecü. Que mü'ane tiuca'enivatü 'amuyeicani heutipareyuque, mücü canitavicueisitüariemücü. <sup>23</sup>Quepaucua memüxe'uveyiani xeime quiecariyarisie, 'uma püta xeimesiepaütü xequeneyuta'unaxüa. 'Icü niuqui caniseüyeni que nemütixecühüave, quiecarite 'Ixaheri cuieyarisie miemete xepüca'ayenüvaveni mexi necanuaveni, Yuri Tevi que nemütihücü.

<sup>24</sup>Tiyü'üquitüvame que tiyüve me'ivacü ti'üquitame ve'emetütü. Ti'uximayatame que tiyüve me'ivacü yucusiyari ve'emetütü.

<sup>25</sup>'Aixüa caniyümücü xüca tiyü'üquitüvame ti'üquitamepaü 'anetü 'ayani xEICÜA, xüca ti'uximayatame yucusiyaripaü 'anetü 'ayani xEICÜA. Mericüte, qui cusiari xüca Peheresepuri me'itaterüva masi vaüca yamepütevataterüva hesüana miemete quiecatari.

**Que mü'ane meuyevese mimacarüca**

*(Rucaxi 12:2-9)*

<sup>26</sup>Xepücavamacarüca. Naitü müranucaname, xeyarietü catinayeimücü. Tita mütiu'aviesie, mücüta masiücütü payani.

<sup>27</sup>Que nemütixetahüave tahücüate tetecuxatatü yüvipa, yaxequetenecuxatani hecüta. Tita xemüte'enie yanetixecuxaxatüvacacu xenacata, vapai yunaime vahüxie

xe'uti'utü yaxequeteneuhivani.

<sup>28</sup>Xepücavamacarüca müme memüyüvave vai memümieni xeicüa, mecayüvavetü memimieni ra'iyari. Masi xequenemacarüca que mü'ane müyüve mica'una ra'iyari ravaiyari naime xasi taiyariyarisie.

<sup>29</sup>Tamüsü 'üxaviquixi que memütetuiya, yuhutatü xei senitavuyari mecate'aye'atüca. Ni xevitü müme cuipea pücacaveni, xe'uquiyari yacatimaicacu. <sup>30</sup>Xeme xecüpa xemu'usie mieme xexuitü puti'iniüasie que mütipaüme.

<sup>31</sup>Ayumieme xepücaheumamaca. Yümüretü 'üxaviquixi que memüte'aye'atüca, masi vaüca xepüte'aye'atüca xeme.

**Müme memüyuhecüata Qesusi  
Cürisitusüa memiemetetütü teüteri  
vahüxie**

*(Rucaxi 12:8-9)*

<sup>32</sup>Que mü'ane müyuhecüata teüteri vahüxie quename nehesüa mieme 'utaitü, neta quename hesiena netiviya nepünehecüata ne'uquiyari hüxie taheima macave hüxie. <sup>33</sup>Que mü'ane masi müyuhecüata teüteri vahüxie quename nehesüa camieme 'utaitü, neta quename hesiena necativiya nepünehecüatani ne'uquiyari hüxie taheima macave hüxie.

**Qesusi hixüata que mütivasana**

*(Rucaxi 12:51-53; 14:26-27)*

<sup>34</sup>Que nemütinua, müpaü xepücatecu'erivani quename cuipea memütama 'aixüa meteyuxeiyame nemüvarayeitüanicü nenua. 'Aixüa meteyuxeiyame nemüvarayeitüanicü necapunua,

cusiracü memüyutacucuyaniciü püta necaninuani. <sup>35</sup>Nepunua meta vahixüata nemüvatasanacü, tevi yu'uquiyari maye'uniecacü, 'uca yuvarusi maye'uniecacü, viquivame yumu'e maye'uniecacü. <sup>36</sup>Müme memeye'unieca tevi, quiena quiecatari mecanihümetücacuni.

<sup>37</sup>Que mü'ane vaüca müvanaqui'erie yu'uquiyari yuvarusi 'esiva nesinaqui'rietü ne, 'aixüa püca'ane münesihexeiyanicü. Que mü'ane vaüca müvanaqui'erie yunive 'uqui 'uca 'esiva nesinaqui'rietü ne, mücüta 'aixüa püca'ane münesihexeiyanicü. <sup>38</sup>Que mü'ane yeme mücayuvaüriya 'asita curuxisie mümierieni, sepa nehamatü muyeica nehesie tiviyatü, mücüta 'aixüa püca'ane münesihexeiyanicü. <sup>39</sup>Que mü'ane yutucari mütaxeiyä pitatümaiya. Que mü'anesü mitümaiya yutucari nehesüa mümiemecü, mücü heixeiyatü payani.

**'Ivarica**

*(Maricuxi 9:41)*

<sup>40</sup>Que mü'ane müxetanaqui'erie pünesitanaqui'erie neta. Que mü'ane münesitanaqui'erie canitanaqui'erienita 'iya münesihyenü'a. <sup>41</sup>Que mü'ane mitanaqui'erie tixaxatame, he'erivatü tixaxatame mühücücü xeicüa, mücü tixaxatamepaü pütüpitiarieni. Que mü'ane mitanaqui'erie tevi heiseriemecü yamüticamie, he'erivatü yamüticamiecü xeicüa, mücüta tevi heiseriemecü yamüticamiepaü yapütüpitiarieni. <sup>42</sup>'Ime sepa memücamarivave, que mü'ane

miharitüani müme xeime, sepa  
xei vasuyaricü haütümeçü  
xeicüa miharitüa, he'erivatü  
tiyü'üquitüvame mühücücü, niuqui  
caniseüyeni que nemütixecühüave,  
yemecü yul'ivarica püpütüarieni.

**Vani Ti'üyamesüa miemete niuqui  
tuayamete que memüte'u'axüa**

**Quesusisüa**

*(Rucaxi 7:18-35)*

**11** Mericüsü Quesusi  
quepauca  
mütiutahayevaxü tiva'aitüatü  
yuhesüa miemete  
teyü'üquitüvamete tamamata  
heimana yuhutame, mana  
caneyeyani quiecaritiesie  
müti'üquitanicü müticuxatanicü.  
<sup>2</sup>Mericüsü Vani casariyanata  
'ayecaitü tiniutamarieni  
Cürisitu que mütiyurienecai.  
Nivaretanü'ani yuhesüa miemete  
teyü'üquitüvamete. <sup>3</sup>Vacümana  
Quesusi müpaü tiniutahüave,  
'Ecü petihücü que mü'ane  
'umamieniquecai, nusu xeime cuxi  
tepücuevieca. <sup>4</sup>Quesusi müpaü  
tinivaruta'eiya, Xequeneuhuniri,  
xequetenetaxatüa Vani tita  
xemüte'u'eni tita xemüte'uxei  
hepaüsita, <sup>5</sup>memacücupe que  
memüte'anutaneniene, huriecate  
que memüte'anucu'uve, müme  
memüca'itiyatücatei cuiniyacü  
mete'itiyatü que memüte'acüca,  
memünacatuxietücatei  
meheu'enanatü que  
memüte'acüca, müquite que  
memüte'anucu'uitüariva, puvüresixi  
que memütecuxaxatüariva niuqui  
'aixüa manuyüne hepaüsita.  
<sup>6</sup>Mücü meta, 'aixüa cani'itüarieca

que mü'ane necümana  
müca'ucununuitüariva.

<sup>7</sup>Mericüsü mana  
me'uyehuximecacu, Quesusi  
canisütüani tivacuxaxatüvatü  
teüteri Vani hepaüsita müpaü  
'utaitü, Titayari xeteheçücünixüa  
macumavesie. Haca 'ecacü  
'uyuaneme que xeteheçu'ixüari.  
Tixaü xüari. <sup>8</sup>Mesü tita  
xeteheçu'ixüari. Xicu 'ixuriqui  
müyumeni manacatücü xeteheçuxei.  
Tixaü xüari. Tamüsü müme  
müyumemeni memanacatücü  
masi te'aitamete vaquita  
mepayetei. <sup>9</sup>Mesü titayari  
yemecü xeteheçunenierixü.  
Tixaxatame xexeyiaque püta  
xecateheçücünixüa 'acu. Hü müpaü  
nepütixecühüave, tixaxatame  
xepuxei yemecü mütixaxatame  
hipatü yamemücatehüme. <sup>10</sup>Icü  
canihücütüni 'utüarica mixataca  
müpaü 'anuyütü,

Camü, nenuqui tuayame.

Necanenunü'amücü 'ahüxiepai

Micuha'aritäanicü 'ahuye

Pecanuavecacu cuxi.

<sup>11</sup>Niuqui caniseüyeni que  
nemütixecühüave, teüteri vanivema  
vasata ni xevitü püca'anucuqueve  
Vani Ti'üyamepaü ve'emetütü.  
Perusü que müti'ane mücü taheima  
macave ti'aitametücacu, sepa tevi  
mücade'eme, mücüsie tiviyatü masi  
yemecü püve'eme, Vani hepaüna  
cave'emetücacu.

<sup>12</sup>Vani Ti'üyame munuasie  
hicüque, tita temütehexeyia  
que mü'ane taheima macave  
tati'aitüvametücacu, mücü naitü  
püviyariexime tüma. Me'iviyacütü  
mepüyucütüve memeixeyanicü

yuhesie mieme. <sup>13</sup>Texaxatamete yunaitü, 'inüari niuquiyarita metenicuxatacaitüni 'arique que mütiyüni quecai Vani munuaque. <sup>14</sup>Xüca xeyuvaüriyani xemitanaqui'erienicü 'icü niuqui, mücü Vani canihücütüni 'Eriyaxi 'umamieniquecai. <sup>15</sup>Xaütü netü mu'anaxü.

<sup>16</sup>Titapaü mete'ananeme netivaxatani hicü miemete teüteri. Türi vahepaü mecani'ananeni quiecarari hixüapa memütitei memüvahivi yu'ivama <sup>17</sup>yame'utiyuatü,

Cari yacü xEICÜ  
tepüxecürautaviya,  
Xepücateneitüve.  
Yacü xEICÜ tepütahiveriecai  
xehesie mieme,  
Xepüca'utisuanacai.

<sup>18</sup>Vani caninuani caticua'atü caye'etü. Müme müpaü meputiyuane, Cari cacauyari 'axa mü'ane pinü'ü. <sup>19</sup>Ne püta Yuri Tevi nehücütütü necaninuani neticua'atü necu'ienetü. Müme müpaü meputiyuane, 'E'e, mücü tevi 'icuaicü xEICÜ püyüane, vinücü xEICÜ püyüane, püvanaqui'erie müme cuviyexunusie mieme memüteyeturiyari 'axa teyuruvamete yunaima. Sepanetü mücü, Cacauyari timaivetü que mütiyuriene, mücücü yacatinimasiücünü heiserie que mürexeiya.

**Que memücateyuvaüriyacai  
quiecaritesie quiecatari**

*(Rucaxi 10:13-15)*

<sup>20</sup>Hicü nisütüani varutate'atü teüteri quiecaritesie memayetecai

haque türücaüyemecü mütiyurienecai müiremecü, quiecatari memücatehayevacaicü que memüteyuriecai. <sup>21</sup>Müpaü niutayüni, Xüca 'ui Curasini quiecatari, xüca 'ui Vesaira quiecatari. Tirusie Sirunisie xüca türücaüyemecü tiyüünique que mütiyü xehesüa, vana quiecatari meripai mepütehayevaquyü que memüteyuriecai, mepüyuheveriecaqueyu maixa me'anacatütü heiverica 'inüariyari, naxi meyucavirivatü. <sup>22</sup>Müpaü xEICÜ nepütixecühüave, Tirutari Sirunitari vahesie mieme pücaniveni quepaucua 'isücame müvatahüave, peru xeme xehesie mieme cuini mieme pücaniveni masi. <sup>23</sup>Xemeta Capertünaumetari, que xeteyutituicaniqueyu muyuavisiepai. Müquite vahesüa xepeucaxüriyani püta. Xüca Surumasie türücaüyemecü tiyüünique que mütiyü xehesüa, mücü quiecarari püraniereniqueyu cuxi hicü. <sup>24</sup>Müpaü xEICÜ nepütixecühüave, Suruma cuieyarisie quiecatari vahesie mieme pücaniveni quepaucua 'isücame müvatahüave, peru xeme xehesie mieme cuini mieme pücaniveni masi.

**Nehesüa xequeneu'axüa,  
xequene'uxipieca, que mutayü**

*(Rucaxi 10:21-22)*

<sup>25</sup>Mericüsü 'ana Quesü müpaü niutayüni, Ne'uquiyari taheima pemüti'aita cuiepa meta, pamüpariyusi nepümasipitüa 'ecü, pemütiuti'avietaxücü 'icü naime memücaheitimanicü

müme memüteyü'üquitüavave memütemaivave, türi püta vahesie mieme masiücüme pemayeitüacü.

<sup>26</sup>Hü ne'uquiyari, pepü'avaüriyacai müpaü pemütiyurienenicü.

<sup>27</sup>Nai netiniyetuiriyarieni, ne'uquiyari yanetipitüacacu. Xevitü püca'imaive mücü nu'aya, 'uquiyarieya xEICÜA pimate. Xevitü püca'imateta 'uquiyarieya. Nu'aya xEICÜA pimate mücü, me xüca nu'aya yuvaüriyani masiücüme meyeitüani xEICÜA, peitimani 'uquiyarieya.

<sup>28</sup>Nehesüa xequeneu'axüa xemüte'uximayatatüve xemu'ica yunaitü. Ne nepüxe'uxipitüaca. <sup>29</sup>Neyucu xequenanyetecani, xenesi'enietü xequeteneyü'üquitüaca.

Ne nepüca'ane'eriya, nepücatinecatave'erie ne'iyarisie. 'Uxipiya xecanetaxeiyacuni yu'iyarisie. <sup>30</sup>Neyucu 'aixüa pü'ane, ne'lica pa'exani.

**Teyü'üquitüvamete que memüte'itihurucacai türicu 'uxipiya tucarisie**

(*Maricuxi 2:23-28; Rucaxi 6:1-5*)

**12** Mericüsü 'ana Qesusi türicu ma'iviyanecaisie niuyemiecaitüni 'uxipiya tucarisie, teyü'üquitüvametemamata yunaitü. Hicü mepeuhacacuicacai teyü'üquitüvamete. Menisutüani me'itihurucatü müayari, meteniuticuatücüne. <sup>2</sup>Hicü Pareseusixi mevaxeiyatü müpaü metenitahüave Qesusi, Neuxei, 'ahesüa miemete teyü'üquitüvamete yamepüteyurie que mücatitauniva yamütiyurienenicü 'uxipiya

tucarisie. <sup>3</sup>Mücü müpaü tinivarutahüave, Cari xepüca'iterüvavave que mütiuyuri Raviri quepaucua meuhacamücücai, müme 'utümana memu'uvacaita quepaucua memehacacuicacai.

<sup>4</sup>Cacaüyari quita neutahani, pa Cacaüyari hÜXIE mamananai niucuanü. Heiserie pücahexeiyacai miticuanicü, mümeta 'utümana memu'uvacai heiserie

mepücahexeiyacai memiticuanicü, mara'acate xEICÜA heiserie mepexeyacai. <sup>5</sup>Mücü meta, xüari xepüca'iterüvavave que maine 'inüari niuquiyari, mara'acate que memüte'itisana 'uxipiya tucari 'inüariyari tuquipa me'u'uvatü 'uxipiya tucarisie, peru vahesie pücarahüiva mücücü.

<sup>6</sup>Ne masi müpaü nepütixecühüave, 'ena catinixuaveni tita cui mütive'eme, tuqui 'amüpa cave'emetücacu hepaüna. <sup>7</sup>Icü niuqui müpaü manuyüne, Nepünaqui'a xüca meteyucanenimayaca, peru mavari xEICÜA pücanesinaque, manuyüne, xüca xemaivavenique xepücate'uhüpaniqueyu müme 'asimemücate'uyuri vahesie.

<sup>8</sup>Mericiüte, Yuri Tevi nehücütütü, 'uxipiya tucari hepaüsitata necatini'aitani.

**Tevi mümamavaquicai**

(*Maricuxi 3:1-6; Rucaxi 6:6-11*)

<sup>9</sup>Mericüsü mana heyeyaca vatuquipa nenuani. <sup>10</sup>Hicü tevi mana nayecateitüni mümamavaquicai. Müme müpaü metenita'ivaviya Qesusi, Sipara, titauniva 'uxipiya tucarisie menayehüanicü ticuicame,

mehaitücaitü memitaxanetacü.  
<sup>11</sup>Mücüsü müpaü tinivarutahüave,  
 Que mü'ane xeme xüca muxa  
 hexeyani, muxa xüca 'uxipiya  
 tucarisie xavata heucaveni,  
 cativiyani mivatihanacü. Xüari  
 piviyani. <sup>12</sup>Meriçüte, tevi  
 cuini mieme caraye'axe, muxa  
 mücaraye'axepaü. 'Ayumieme  
 nepaine, canitaunivani 'aixüa  
 mütiyurienenicü 'uxipiya tucarisie.  
<sup>13</sup>Hicü müpaü tinitahüave  
 tevi, 'Amama queneutasera.  
 'Itaseracu, 'aixüa 'anetü nayani  
 yuxevitü tapa miemepaü. <sup>14</sup>Hicü  
 Pareseusixi mevayecüneca  
 meniuyu'enieni hepaüsitana, que  
 memüte'limieniquecai.

**Niuqui matüaripai  
 mixatacai Quesusi**

<sup>15</sup>Quesusi müpaü retimaica xaüsie  
 neyani. Yumüiretü meniveiyacaitüni.  
 Yunaima nivarayanayexürieni.  
<sup>16</sup>Vaüriyarica nivarupitüani capa  
 masiücüme meheyeitüanicü.  
<sup>17</sup>Müpaü catinaye'ani Cacaüyari que  
 mutayü, tixaxatame Quisariyaxi  
 ya'utainecacu,  
<sup>18</sup>Camü nesiparevivame  
 Nepenayexei  
 Nepinaqui'erie  
 Mücücü nepünaqui'a ne'iyarisie.  
 Nenipitüamücü ne'iyari.  
 Hipame nuivarite  
 tinivataxatüamücü  
 Tita mütiheiserie hepaüsita.  
<sup>19</sup>Mücü pücayumieneni  
 Püca'utahivani.  
 Xevitü püca'l'enieni  
 Caye 'utüa 'utaniucame.  
<sup>20</sup>Haca mutapüinarie  
 püca'anumura.

Cüxeme vitayari sepa  
 mücuauniya püca'icutüsani  
 Mexi 'e'ivarüme naime  
 Mücü yatipitüacacu  
 Tita mütiheiserie.  
<sup>21</sup>Müme memücatateüterima  
 Yuri mepüte'erieca  
 Que mü'ane mühücüsie.

**Que memüte'ixanetacai Quesusi,  
 müpaü me'utiyuatü quename  
 cacaüyari 'axa mü'ane 'inücai**

*(Maricuxi 3:19-30; Rucaxi 11:14-23; 12:10)*

<sup>22</sup>Hicüsüari hesüana  
 caniu'atüarieni tevi cacaüyari  
 'axa mü'ane minücai macüpecai  
 mücaniuevcai. Quesusi  
 nenayehüani. Nenuriecame  
 niuvetü nayani, heunieretü  
 ratüa. <sup>23</sup>Memüyümüirecai  
 yunaitü menihüxiyacaitüni.  
 Müpaü meniutiyuanecaitüni,  
 Cari 'icü Raviri Nu'aya  
 catihücü. <sup>24</sup>Pareseusixi masi  
 me'u'enanaca müpaü meniutiyuani,  
 'Icü xüca Peheresepuri  
 cacaüyarixi 'axa memü'anene  
 mütiva'aitüva ca'inücaque  
 pücavaranuyenü'axüaveniqueyu  
 cacaüyarixi. <sup>25</sup>Peru Quesusi  
 va'iyaritüarica maitü müpaü  
 tinivarutahüave, Naime cuiepa  
 xüca quiecatari yuhixüata  
 meyusana, mana pacumavere.  
 Naime quiecarisie, naime quita  
 xüca quiecatari yuhixüata  
 meyusana, quiecarie 'epücareutevini.  
<sup>26</sup>Xücarie Cauyumarie  
 'anuyuyenü'ani yücümana,  
 yuhixüata nisane. Que reutevini  
 ti'aitametütü. <sup>27</sup>Mücü meta, xüca  
 Peheresepurisie xeniu netiviyatü  
 nevaranuyenü'avani cacaüyarixi

'axa memül'anene, que mü'anesie meteviyatü meteverunuyenü'ava xeme xenivema. 'Ayumieme müme xehesie mepüte'ahüpani. <sup>28</sup>Mesü Cacaüyari 'Iyarieya xüca hücütüni que mü'ane münesiparevie nevaranuyenü'avacacu cacaiyarixi 'axa memül'anene, cari Cacaüyari 'ari canisütüani ti'aitatü xehesüa.

<sup>29</sup>Mücü meta, quepaü tiyüve tevi mütürücaüye quita meutahaque mütinavicü piniteya, me xüca ca'lhüani meri mücü mütürücaüye. 'Ihüame pütinavani tita mütixuave quitana.

<sup>30</sup>Que mü'ane nehesisie mücativiya, mücü pünesi'aye'unie. Que mü'ane nehamatü müca'icuxeürie, mücü pitaxürüva.

<sup>31</sup>'Ayumieme müpaü nepütixecühüave, naime 'axa que memüteyurie 'axa que memutiyuane teüteri, mepüyüvave memüteheuyehüviyarienicü. Peru müme memisevixima 'Iyari 'axa me'utiyuatü, müme mepücateheuyehüviyarieni.

<sup>32</sup>Que mü'ane niuqui yamütayüni nehepaüsita, Yuri Tevi que nemütihücü, mücü püyüve müreuyehüviyarienicü, peru que mü'ane 'axa 'utaitü misevixima 'Iyari Mütiyupata, mücü pücareuyehüviyarieni 'ena cuiepa, 'umamiesieta.

### **Cüye yu'icuaxicü pümasiücü**

(*Rucaxi 6:43-45*)

<sup>33</sup>Cüye xüca xemaica quename narani 'icuaxieyata 'aixüa caniyümücü. Me cüye xüca xemaica quename xainive, 'icuaxieyata xaxainitü

canayeimücü. Cüye yu'icuaxicü pümasiücü. <sup>34</sup>Cari xeme terücaxi xepüva'ivama, quepaü xeyüvave 'aixüa xemütecuxatanicü 'axa xete'u'iyaritü. Que müranayuhayeva ra'iyari tihü necacu, yacatinicuxatamücü yutetacü.

<sup>35</sup>Tevi 'aixüa mütiuca'iyari 'icuxeürieme tita 'aixüa müti'anene yuhesie, tita 'aixüa müti'anene canivayehanimücü. Tevi 'axa mütiuca'iyari 'icuxeürieme tita 'axa müti'anene yuhesie, tita 'axa müti'anene canivayehanimücü.

<sup>36</sup>Müpaü nepütixecühüave, naime niuqui yacü xecüa memutiniuca teüteri, mücü hepaüsita mepütiniuni quepaucua 'isücame müvatahüave. <sup>37</sup>Que pemutayücü, mücü heiserie pecanipitüariecämücü, mesü que pemutayücü, mücü pepanutahüiyani.

### **'Ana miemete 'axa mete'u'iyaritü 'inüari que memüte'itavaviri Qesusi**

(*Maricuxi 8:12; Rucaxi 11:29-32*)

<sup>38</sup>Mericiüsü 'ana hipatü 'inüaricü memüte'üquitametetücai, Pareseusixi meta hipatü müpaü metenitahüave, Ti'üquitame 'acu, 'inüari tepüxeiyaqueyu yapetatixeisitüacacu. <sup>39</sup>Mücü müpaü tinivaruta'eiya, Hicü miemete teüteri 'axa xepüte'u'iyari, xepüvacumaüva hipame va'ütama. 'Ayumieme 'inüari xenivautüveni, peru 'inüari xepücapitüarieni. Cunasi 'inüari que müratüa tixaxatametütü, müpaü xecüa xecatenipitüariecuni 'inüari. <sup>40</sup>Cunasi quesü 'amüpasie que mütiyecatei haica tucari haica

tücari, müpaürita yaxeicüa Yuri Tevi que nemütiteva, cuieta nepüyecani haica tucari haica tücari. <sup>41</sup>Ninivesie queecatari 'amepüti'uni metetaheciüataque hicü miemete teüteri vahepaüsita quepaucua 'isücame müvatahüave. Hicü miemete vahesie pürähüiyani 'ana, Ninivetari memüte'uhayevaxücü que memüteyuriecäi, Cunasi tivarutaxatüacu. Camüsü, Cunasi que mücatitürücaüyecäi, que mü'ane cui mütürücaüye püta 'ena puyeica. <sup>42</sup>'Uca taserie mecatei müti'aitametücai yucuiepa, mücü 'apütaqueni titaheciüataque hicü miemete vahepaüsita. Vahesie pürähüiyani 'ana, mücü meyetüacü cuie manunierepaitü, mi'enienicü Sarumuni que mütimaivecai. Camüsü Sarumuni que mücatimaivecai, que mü'ane cui mütimaive püta 'ena puyeica.

**Cacaüyari 'axa mü'ane tavari que mütiviya tevi**

*(Rucaxi 11:24-26)*

<sup>43</sup>Xevitü cacäüyari müyusevixima 'ixüname tevi, macuvaquisie pücuyeicani 'uxipiya cuvaunetü, yutexienetü. <sup>44</sup>'Ana müpäü pütayüni, Nequie nepüyemie nemüvayetüasie. Nuame heutaniereme xüca 'ixeiya 'uyemaveme vaye'itiyacame 'aixüa tiuye'aneme, <sup>45</sup>'ana püyemie, hipame püvata'inieni cacäüyarixi 'atahutame masi cuini mieme 'axa memü'anene. Meheutahaxüame, muva me'ayetetü mepacüne yunaitü. 'Imatürieca mücü tevi masi yemecü 'axa 'itüarienetü

payani, müca'itüarieneцаipäü matüaripai. Müpäüta mecani'itüariecuni 'icü teüteri hicü miemete 'axa memüteyurie.

**Quesusi 'ivamama varusieya**

*(Maricuxi 3:31-35; Rucaxi 8:19-21)*

<sup>46</sup>Tivacuxaxatüvacacu cuxi teüteri yumüireme, varusieya 'ivamama tacua meniti'ucaitüni me'ihüavicütü. <sup>47</sup>Xevitü müpäü tinitahüave, Neuxei, 'avarusi 'a'ivama tacua meniti'uca memasihüavicütü. <sup>48</sup>Quesusi müpäü tinita'eiya niucame, Que hateri nevarusi ne'ivama. <sup>49</sup>Yumama 'utaseratü yuhesüa miemete teyü'üquitüvamete vahepa, müpäü niutayüni, Camü nevarusi ne'ivama. <sup>50</sup>Que mü'ane yamütiyuriene que mütinaque ne'uquiyari taheima macave, mücü canine'ivatüni caninevarusitüni.

**Ti'ivivame 'üxasieya hepaüsita ticuxatatü, que müti'üquitacai**

*(Maricuxi 4:1-9; Rucaxi 8:4-8)*

**13** Mericüsü 'ana Quesusi quita hayeneca, haracuna tesita niutayerüni taniunique. <sup>2</sup>Hicü teüteri yumüiretü meniuyucuxeürieni 'auriena. 'Ayumieme canuvásie püta nicayerüni, mana yecaitü tini'üquitacaitüni, teüteri xiecaripa meti'ucacu. <sup>3</sup>Vaüca tinivaruti'üquitüiani 'üxasi hepaüsita ticuxatatü, ya'utaitü, Mericüsü ti'ivivame neyani, ni'ivienecaitüni. <sup>4</sup>Mericüsü 'imüari 'ivienecacu, hipatü huye tesita niucaxürieni. Viqixi me'ucaxürieca menicuteüxü.



<sup>5</sup>Hipatüta ayeparisie tiucaxüri vaüca müca'acucuieyasie. Cuitüva niutineni cuie 'emücasuicaicü.  
<sup>6</sup>Tau hanecu maxürixü niucuini, niutivani mücahananayatücateicü.  
<sup>7</sup>Hipatüta xuyasata mucaxüri, xuya tupiriyayari 'utiyüraca heimana puyetüa. <sup>8</sup>Masi hipatüta cuie 'aixüa mü'anesie niucaxürieni. Putixuaverixü, hipatü xei sienituyari nayani, hipatü haica teviyari ratüa, hipatü xei teviyari heimana tamamata ratüa. <sup>9</sup>Xaütü netü mu'enaxü.

**Titayari müpaü müti'üquitacai Quesusi, 'üxasi hepaüsita ticuxatatü xeiçüa**

*(Maricuxi 4:10-12; Rucaxi 8:9-10)*

<sup>10</sup>Mericsü teyü'üquitüvamate 'aura me'acüneca müpaü metenita'ivaviya, Titayari 'üxasi hepaüsita peticuxatatü xeiçüa petiva'üquitüa. <sup>11</sup>Mücü müpaü tinivaruta'eiya, Xeme xecaniupitüarieni xemimaicacü tita müti'aviesiecai, xemütemaicacü que müti'ane ti'aitametücacu que mü'ane taheima macave. Müme püta müpaü mepücatepitüarie. <sup>12</sup>Que mü'ane tixaitü mürexeiya tavari cuxi pütimiquieni, manayuhayevanicü. Que mü'ane mümave, sepa que mütitita mürexeiya, pütinavaiyarieni. <sup>13</sup>Ayumieme 'üxasi hepaüsita neticuxatatü nepütiva'üquitüa, memücaheunenierecü sepa cui memütaneniere, memücaheu'enanacü sepa cui memüta'enana, 'asimemücatemaivavecü. <sup>14</sup>Vahesie pütünaquixü tita mütixatacai tixaxatame Quisariyaxi ya'utaitü,

Cui xepüta'enanaca peru xepücatemaivaveni.  
 Cui xepütaneniereni peru tixaitü xepücatexeiyani.  
<sup>15</sup>'Icü teüteri yu'iyarisie mepüyü'üraraxie, Yunacacü haveri mieme xeiçüa mepeu'enana. Vahüxie pü'itutupe. Me xüca müpaü meca'anenique Yühüxicü mepeuneniereniqueyu Yunacacü mepeu'enanacaqueyu Yu'iyarisie mepütemaivaveniqueyu, Ta'aurie mepaxürieneniqueyu, Nepüvaranayexürieneniqueyu ne.

<sup>16</sup>Xeme masi 'aixüa xepu'itüarie xemeunenierecü yühüxicü, 'aixüa xepu'itüarie, xemeu'enanacü yunacacü <sup>17</sup>Niuqui caniseüyeni que nemütixecühüave, yumüiretütü texaxatamete, yumüiretütü teüteri heiseriemecü yamemütecahucai, müme mepixeyacucai tita xemütexeiya xeme, peru mepüca'ixei. Mepi'eniecucai tita xemüte'enie, peru mepüca'i'eni.

**Quesusi que mütihecüatacai yü'üquisica, ti'ivivame 'üxasieya hepaüsita que müti'üquitacai**

*(Maricuxi 4:13-20; Rucaxi 8:11-15)*

<sup>18</sup>Mericüte, xequeneu'enana 'üxasi hepaüsita, ti'ivivamesie que mütimasiücü 'üquisica. <sup>19</sup>Que mü'ane mi'enie 'icü niuqui que müti'ane 'Iya ti'aitametücacu maine, peru 'asimücaretimaive, que mü'ane 'axa mütiyuruva nuame pinavairieni tita 'iyarieyasie mütiuca'iviya. Müpaü cani'itüarieca huye tesita muca'iviyapaü. <sup>20</sup>'Ayeparisie muca'iviya, mücü

canihücütüni que mü'ane mi'enie niuqui, yutemavietü mitanaqu'erie xei mieme. <sup>21</sup>Yücümana pücahananatave, 'apücareutere masi. 'Ayumieme quepaucua mü'uximatüarie, quepaucua muveyarie 'icü niuqui hepaüsita, yapaucua niucunitüarivani. <sup>22</sup>Mücü meta xuyasata muca'iviya, mücü canihücütüni que mü'ane mi'enie niuqui, peru püyu'iyaritüa tita cuiepa mütimieme ra'erivatü, pütüyu'irüviya tuminicü yutemavietü. 'Ayumieme niuqui panunamiyari cacaniutixuavere. <sup>23</sup>'Aixüa mü'anesie muca'iviya, mücü canihücütüni que mü'ane mi'enie niuqui, meitima. Mücü niutixuxuavereni, hipatü xei sienituyari pacü, hipatüta haica teviyari racü, hipatüta xei teviyari heimana tamamata racü.

**Türicu hepaüsita hamürixa  
hepaüsita, ticuxatatü  
que müti'üquitacai**

<sup>24</sup>Mericsü tavarita 'üquisica nivarumini 'üxasi hepaüsita ticuxatatü, müpaü 'utaitü, 'Ipaü catini'aneni, que mü'ane taheima macave ti'aitametücacu. Tevi 'imüari 'aixüa mü'anene puca'ivi yuvasiyata. <sup>25</sup>Perusü mecusucacu xevitü mana caninuani 'eye'unietü. Hamürixa 'uca'ivieca türicusata, neyani. <sup>26</sup>Utinecu sisiüravitü, tixuaverirümecacu, 'anari masiücütü nayani hamürixa. <sup>27</sup>Hicü te'uximayatamete me'u'axüaca yucusiyarisüa, müpaü metenitahüave, Cusiyari 'acu. 'Imüari 'aixüa cati'anenecai pemica'ivi 'avasiyata. Haqueri

pemieme hamürixa. <sup>28</sup>Mücü müpaü pütivaruta'ei, Tevi münesi'aye'unie müpaü pütüyuri. Te'uximayatamete müpaü metenitahüave, Mericüte, pecati'avaüriya temuhu, temicuxeürieni hamürixa. <sup>29</sup>Mücü müpaü niutayüni, Tixaüsü, xücate xe'icuxeürieni hamürixa, 'axeicüa xepivatixünaxüani türicuta yünücame. <sup>30</sup>Xequeneuhayeva 'axeicüa müvaverenicü 'isanaxaque. 'Isanari 'aye'ayu, 'ana müpaü nepütivatahüave 'isanamete, Hamürixa xequeneucuxeüri meri, xequenanahüaxüa xemititaiyacü. Türicu xequeneuti'uta necaxetunisie.

**Musitasa 'imüariyari hepaüsita  
ticuxatatü, que müti'üquitacai**  
*(Maricuxi 4:30-32; Rucaxi 13:18-19)*

<sup>31</sup>Hicü tavari 'üxasi hepaüsita ticuxatatü 'üquisica nivarumini müpaü 'utaitü, 'Ipaü pütü'ane ti'aitametücacu que mü'ane taheima macave. Musitasa 'imüariyaripaü cani'aneni tevi mica'epaü yuvasiyata. <sup>32</sup>'Imüarite pücaxuave hepaüna 'anenetü 'esipepetü, peru quepaucua mütineni, tupiriyate pücaxuave hepaüna 'anenetü 'epapatü. Cüye payeica 'epatü, taheima miemete viquixi mepüyüvave hesiena memü'axüani memüyuti'ituatüani.

**Pa cuxanariyame hepaüsita  
ticuxatatü, que müti'üquitacai**  
*(Rucaxi 13:20-21)*

<sup>33</sup>Tavarita tinivaruta'üquitüani 'üxasi hepaüsita ticuxatatü, müpaü 'utaitü, 'Ipaü

püti'ane ti'aitametücacu que mü'ane taheima macave. Pa cuxanariyamepaü cani'aneni. 'Uca 'ivatituca nenutinüütüani pa mütüxiyarisie haica 'axuvayarisie, 'ariqueque niuticuxanare naitü.

**Que mütiyurienecai Quesusi, 'üxasi hepaüsita ticuxatatü ti'üquitatü**

*(Maricuxi 4:33-34)*

<sup>34</sup>Müpaü naimecü Quesusi tinivacuxaxatüvacaitüni teüteri, 'üxasi hepaüsita ticuxatatü tivati'üquitüanique. 'Üxasi hepaüsita caticuxatatü, 'asipücativacühüavecai. <sup>35</sup>Müpaü püraye'a, Cacaüyari que mutayü, tixaxatame ya'utainecacu,

'Üxasi hepaüsita neticuxatatü nepütaniuni.

Nepütitaxata tita müti'aviesiecai Cuiie munetüariepai hicüique.

**Quesusi que mütihecüatacai yü'üquisica, hamürixa hepaüsita ticuxatatü que müti'üquitacai**

<sup>36</sup>Mericiüsü varenü'aca teüteri quita neutahani. Teyü'üquitüvamete 'auriena meniti'uni müpaü me'utiuyatü, Quetaneutahecüasitüiya mücü 'a'üquisica hamürixa hepaüsita peticuxatatü que pemüti'üquitacai vasiyata mieme. <sup>37</sup>Mücü müpaü tinivaruta'eiya, Que mü'ane mica'ivi 'imüari 'aixüa mü'anene, Yuri Tevi que nemütihücü ne necanihücütüni. <sup>38</sup>Vasiya cuiie canihücütüni naitü. 'Imüari 'aixüa mü'anene, müme mecanihümetüni memeixeiya que mü'ane taheima macave tiva'aitüvametüme. <sup>39</sup>Hamürixa, mücü 'axa mütiyuruvasüa miemete

mecanihümetüni. Tevi meye'uniecai quiecame, hamürixa muca'ivi, mücü Cauyumarie canihücütüni. 'Isanari, mücü tucari canihücütüni quepaucua meutipare. 'Isanamete niuqui tuayamete metehüme.

<sup>40</sup>Hamürixa que mütiucuxeüriya que mütiutitaiyari taipa, müpaürita catiniyümücü quepaucua maye'ani.

<sup>41</sup>Yuri Tevi que nemütihücü, nepüvatanü'axüani nehesüa miemete niuqui tuayamete. Müme mepüvacuxeürieni teüteri memüteyucununuitüva, teüteri yamemüteyurie que mücatiheiserie, mevanücacu müme memünesihexeiya netiva'aitüvametücacu.

<sup>42</sup>Memücuxeüriyani, müme mepüvareucaxürieni huxunuta müvatitatavesie. Muva meputisuanani mepüyutaqueveni. <sup>43</sup>Müme heiseriemecü yamemütecahu püta memamarivavetü mecanacünicuni 'ana haque va'uquiyari müra'aita, tau que mütimerücaüye. Xaütü netü mü'enaxü.

**Tumini mü'aviesiecai**

<sup>44</sup>Mericiüsü 'ipaü catini'aneni que mü'ane taheima macave ti'aitametücacu. Vaücava tuminipaü cani'aneni mü'aviesiecaipaü cuieta. Tevi heitaxeiyaca tavarari niti'avietta. Cui yutemavietü, mana neyani, catinetuani nai mürexeyacai neinaneni mücü cuiie.

**Perüra visi mü'ane cuinie müraye'axe**

<sup>45</sup>Tavarita 'ipaü catini'aneni que mü'ane taheima macave

ti'aitametücacu. Tituayame picuvaunecai perüra visi mü'anene. <sup>46</sup>Xeime perüra hetaxeyaca cuinie müraye'axecai, mana neyani, tinetuani nai mürexeiyacai, mücü tuminiyaricü neinaneni perüra.

### Vipi

<sup>47</sup>Tavarita 'ipaü catini'aneni, que mü'ane taheima macave ti'aitametücacu. Vipipaü cani'aneni haramarasie meucahanivapaü. Mücü ha tesita mepüvaratinetüa quesüte yücü me'aneneme yusata. <sup>48</sup>Quepauca memutahünixü, menenatihana haramara tesita. Mana metitetü 'aixüa memü'anene menivaranuyeteixü, menivareucaxürieni quirivasie, 'axa memü'anene mepüvarexüri. <sup>49</sup>Müpaürita catiniyümücü quepauca meutipare. Niuqui tuayamete menetayeixüani, menivaranuyeteüxicuni 'axa teyuruvamete memüvanü'ü müme heiseriemecü yamemütecahu, <sup>50</sup>mepüvareucaxürieni huxunuta müvatitatavesie. Muva meptisuanani mepüyutaqueveni.

### Rapini xique mütimieme meripai mütimieme

<sup>51</sup>Hicüsüari müpaü tinivarutahüave, 'Icü xetehetima naime. Hü mete'icühüave. <sup>52</sup>'Iya müpaü tinivarutahüave, Mericüte, 'ayumieme nepaine, que mü'ane 'inüaricü müti'üquitame, quepauca yamüretimanicü que müti'ane ti'aitametücacu que mü'ane taheima macave, mücü tevipaü caniyüaneni quicü mühürtüariepaü. Yayüanetü, yupinisata pütivayehapa

tita xique mütimieme tita meripai mütimieme meta naime.

### Quesusi que mütiuyuri Nasaretisie

(*Maricuxi 6:1-6; Rucaxi 4:16-30*)

<sup>53</sup>Mericüsü Quesusi tiuhayevaca müpaü ti'üquitatü 'üxasi hepaüsita ticuxatatü, mana heyeyaca niuyupata. <sup>54</sup>Yuquiecarini nuaca tiniva'üquitüacaitüni vatiquita. Müme 'ayumieme meniüxiyacaitüni. Müpaü meniütiyuancaitüni, 'Icü meixeiya, haque pemieme que mütimaive türücaüyemecü que mütiyuriene. <sup>55</sup>'Icü carüpiniteru catinu'aya. Varusieya Mariya catiteva, 'ivamama meta Cacuvu Cuse Simuni Cura mecateteteva. <sup>56</sup>'Ivamama 'ucari yunaitü 'uva mecatetitei tahesüa. Haquesüari pemieme 'icü naitü que mütiyuriene. <sup>57</sup>Menitixeümani. Hicü Quesusi müpaü tinivarutahüave, Tixaxatame naisarie ve'eme cani'erivani. Yucuepa xeciüa yuquita ve'eme püca'eriva. <sup>58</sup>Mana vaüca pücatiuyuri türücaüyemecü, müme yuri memücate'eriecaicü.

### Ti'üyame Vani que mütiümierie

(*Maricuxi 6:14-29; Rucaxi 9:7-9*)

**14** Mericüsü 'ana Herurexi canihürtüariecaitüni mücü cuiepa müti'aitanicü. Cani'ena Quesusi hepaüsita que müranivacai. <sup>2</sup>Müpaü tinivarutahüave memipareviecai, Cari Vani canihücütüni Ti'üyame. 'Umüca panucque, 'ayumieme türücarिया nicuyuitüvani. <sup>3</sup>Mücü Herurexi yatiuta'aitacu meripai, niuviyarieni Vani,

niuhüiyani, nanutahüiyani casariyanata, müpaü mütinaquecaicü Heruriya. <sup>4</sup>Müpaü tiniuyüni, Vani caviyarievetu cuxi müpaü mütitahüavecaicü Herurexi, Pücatauniva pemevitücünicü, 'utaitü, Heruriya xatatü. Mücü Heruriya, Herurexi canicueyatücaitüni meri, ca'lnavairievecacu cuxi yu'iva Piripe mütitevacai. <sup>5</sup>Herurexi pimiemücücai Vani, peru püvamacarücai teüteri, quename tixaxatametücai memütecuerivacaicü. <sup>6</sup>Mericusü tucarisie quepauca Herurexi mutinuivaxisie, Heruriya nu'aya 'ucatütü tiniutineini vahüxie. Pinaquecai Herurexi. <sup>7</sup>Ayumieme puyühürütüa, quename tita mütitavavirieniqueyu timiniquecai, 'utaitü. <sup>8</sup>Iya varusieya yatitahüavecu müpaü tinitahüave, Vani Ti'üyame mu'uya queneneu'ütüa 'ena pateyusie yecaima. <sup>9</sup>Ti'aitame cui yuhiverietü müyühürütüacaicü teüteri hamatüana memütecuacai vahüxie, tiniuta'aita mütimiqüienicü. <sup>10</sup>Neinü'ani cuya tita'aitüaca Vani mu'uya manuxitenicü casariyanata. <sup>11</sup>Mu'uya 'atüariecu pateyusie yecaitü, 'üimari 'umiquieca, pi'ütüa yuvarusi. <sup>12</sup>Hicü Vani teyü'üquitüvametemama me'u'axüaca meneicueni caxarieya, meneicateucu. Meheycüneca meteneitaxatüani Quesusi.

**Teüteri que mütivarumi 'auxüme miriyari**

*(Maricuxi 6:30-44; Rucaxi 9:10-17; Vani 6:1-14)*

<sup>13</sup>Mericusü Quesusi tiutamarieca, neyani canuvasie cayerüca macumavesiepaütü yuxaüta.

Teüteri mete'utamarieca, yü'ücama menecüne quiecaritiesie meheycüneca hepaüsütana meheta'axüanique. <sup>14</sup>Hicü 'anatiyeiximetü Quesusi, teüteri nivaruxeiya yumüireme. Vanenimayatü, nivanarayexürieni vahesüa miemete tecuicuicate. <sup>15</sup>Hicü 'ucutaicairecu teyü'üquitüvamete 'auriena meniuyucuxeürieni müpaü me'utiyuatü, 'Ena canacumaveni, cananucayaniri memütecuaniquecaicü. Quenivareutanü'axüani teüteri, quiecaritiesie memütayeixüanicü, 'icuai memüteyutinanafricanicü. <sup>16</sup>Quesusi masi müpaü tinivarutahüave, Pücaheuyevese memüyehucü. Xeme püta xequetenivarumicua. <sup>17</sup>Müme müpaü metenita'eiya, Quete 'ena tixatü tepücatehexeiya, 'auxüme payari huta quesüteyari xeicüa tepexeiya. <sup>18</sup>Müpaü tinivarutahüave, 'Uva nehesüa xequenatua. <sup>19</sup>Hicü tivaruta'aitüaca teüteri memücuyaxixüanicü 'üxapa, 'enu'üca 'auxüme payari huta quesüteyari meta, taheima heutinierca niyutanenevieni. 'Ititaraca pa nivaru'ütüani teyü'üquitüvamete, müme menivaruta'ütüani teüteri. <sup>20</sup>Yunaitü meniticuani meniutihuxani. Hicü menicuxeürieni tarimeyari manuyuhayevaxü, menitihüniya tamamata heimana huta quirivayari. <sup>21</sup>'Uquisi memüte'ucuai 'auxüme miriyari yacütütü mecaniyupaümeccaitüni, 'ucari türi meta mepüca'inüaricai.

**Quesusi ha heima que müramiecai***(Maricuxi 6:45-52; Vani 6:16-21)*

<sup>22</sup>Hicüsüari nivarutamexüitüani teyü'üquitüvamete, canuvásie memüçayaxecü memenuçuhaitüiyacü 'anutaüyepaitü, 'arique püvarenü'a teüteri. <sup>23</sup>Varenü'aca, yemurisie neuti yune yuxaüta yutanenevienique. Hicü 'ucuyürecu mana necateitüni yuxaüta. <sup>24</sup>Hicü canuvásie meyetetü ha hixüapa meneutahuçaitüni. Cuie hetevacacu, hamevari picuyuitüvacai canuva, hepana mu'ecacaiçü. <sup>25</sup>Mericüsü 'esivatüçacu tuxacüta, vahepa canamieçaitüni Quesusi haracuna heima 'umietü. <sup>26</sup>Teyü'üquitüvamete me'ixeyatü haracuna heima 'amiecame, meniyumuinacaitüni, müpaü metenyüçühüaveçaitüni, Tietü 'iyari 'uyüximeni. Memamatü meniutihavacaitüni. <sup>27</sup>Hicü Quesusi niutaniuni müpaü tivacühüavetü, Yu'iyari xequeneuçayasa, ne nepühücü. Xepuçamamaca.

<sup>28</sup>Hicü Pecuru müpaü tinita'eiya, Ti'aitame xüca 'ecü pehücütüni, quenetineuta'aitüa mana nemümieçü 'ahesüa, ha heima ne'umietü. <sup>29</sup>Iya rehüave, Quenaye'a. Canuvásie 'anacayaca Pecuru, ha heima namieçaitüni. Mana hura ninuani Quesusi manuveçaisie. <sup>30</sup>Ixeiyaca 'eca que mütiuecakai niütimani. Nicayunirümeçaitüni. Niutahiva müpaü 'utaitü, Ti'aitame queneneutavicueisitüa. <sup>31</sup>Hicü Quesusi yumama 'utaseraca niviya. Müpaü tinitahüave,

'E'e, cari 'ecü 'esiva xeicüa yuri pepüti'erie. Titayari peti'a'iyaritüacai. <sup>32</sup>Canuvásie mecayaxirümeçacu 'eca neunuani. <sup>33</sup>Müme canuvásie memüyetecai nenevieri mecanipitüani müpaü me'utiyaütü, Xasunicü Cacaüyari pecaninu'ayatüni 'ecü.

**Teüteri Quesusi que müti varanayexürüvacai Quenesareti cuieyarisie**

*(Maricuxi 6:53-56)*

<sup>34</sup>Hicü 'anutaüye meheçüneca, Quenesareti cuieyarisie meneta'axüani. <sup>35</sup>Mana quiecatari menimaicaitüni me'ixeyaca, niuqui meneutanü'axüani 'aura yunaime vahesüa. Meni'atüirivacaitüni tecuicucate yunaime. <sup>36</sup>Cuini mieme menivavirieçaitüni me'imayüanique siqueresü 'ixuriquieyasie. Müme memimayüa mepanayexürü yemecü.

**Titacü müti seviximarie tevi***(Maricuxi 7:1-23)*

**15** Mericüsü 'ana Quesusisüa meniu'axüani Pareseusixi, hipatüta 'inüaricü memüte'üquitametetüca, Querusareme memeyecü müpaü me'utiyaütü, <sup>2</sup>Titayaricutaxi 'ahesüa miemete teyü'üquitüvamete mete'itisana yutusima vayeiyari. Cari mepüca'ucamaimava quepaucua memüte'uticua'a. <sup>3</sup>Mücü masi müpaü tinivaruta'eiya, Titayaricutaxi xeme püta yaxecateyurie Cacaüyari que müti'aita, yuyeiyarisie xemüteviyanicü. <sup>4</sup>Cacaüyari meripai müpaü niutayüni,

Quetinareueyhüvirieca 'a'uquiyari  
'avarusi. Tavarita müpaü niutayüni,  
Que mü'ane 'axa mutaineni  
yu'uquiyari yuvarusi hepaüsita,  
que'umierieni xei mieme. <sup>5</sup>Xeme  
püta müpaü xeniutiyuaneni, Que  
mü'ane xeniu müpaü müticühüave  
yu'uquiyari ya yuvarusi, Que  
nematiparevieniquecai, mücü  
'imiquieri püta nepayeitüa,  
haitü, mücücü xeniu  
pücaheuyevese 'uxa'atüni varie  
mütivareueyhüvirienicü yu'uquiyari  
yuvarusi. <sup>6</sup>Xepitürücarıyapi tita  
Cacaıyari mütiutayü, yuyeyarisie  
yaxemütecahunicü. <sup>7</sup>Yacü xEICüa  
xeputiyuane. Quisariyaxi 'aixüa  
putayü ticuxatatü xehepaüsita,  
müpaü 'utaitü,

<sup>8</sup>Icü teüteri yutetacü xEICüa  
Quename meneteheueyhüvirie  
meputiyuane.

Que memüte'u'iyari püta, teva  
mepu'uva.

<sup>9</sup>Yacü xEICüa menenayexeyani  
Tita memüte'üquita, teüteri püta  
va'aisica mühücücü xEICüa.

<sup>10</sup>Mericüsü yu'aurie  
varutahüaveca teüteri, müpaü  
tinivarutahüave, Xequeneu'enana,  
xequetenemaivaveni. <sup>11</sup>Tita tevi  
teta müreutahaque, mücücü  
pücaviximarieni. Masi tita  
tetana müratineica, mücücü püta  
caniseviximariemücü tevi.

<sup>12</sup>Hicü teyü'üquitivamete  
'aura me'acüineca müpaü  
metenitahüave, Müpaü pecatimate,  
Pareseusixi mücü niuqui  
me'u'enieca meniuyeha'ani.

<sup>13</sup>Müpaü tinivaruta'eıya, Naitü  
'iteüri ne'uquiyari taheıma  
macave müca'ıca'e püvatihuna.

<sup>14</sup>Xequenivahayevani.

Me'acücüpetü mepüvarahapana  
hipame memacücüpe. 'Acüpetü  
xeıme macüpe xüca 'ahanani,  
yuhutatü mevatixavasie  
meneucaxüriecuni.

<sup>15</sup>Hicü Pecuru müpaü tinitahüave,  
Quetaneutahecüasıtüıya 'ıciü  
'üquisica. <sup>16</sup>Iya rehüave, Cari  
xemeta 'asixepücatemate. <sup>17</sup>Tietüsü  
müpaü xecatemaıca, naitü  
rateta müreutahaque huriepana  
nicayune, nihüani. <sup>18</sup>Tita  
rateta müratineica 'ıyarıeyasie  
püta patineica. Mücütüü  
nisevixımaca tevi. <sup>19</sup>Va'ıyarısie  
natineıcani tita memüteyurie,  
'axa meteyücühüavetü,  
meteyumemivatü, mevacumaıvatü  
hipame va'üıtama vacünama,  
mevacumaıvatü que mü'ane  
mücaıyü'ıya mücaıyücına,  
metenavayatü, mete'ıtavatü  
quepaucua memütehecüıata, 'axa  
me'utiıyatü hipame vahepaüsita.  
<sup>20</sup>Icücü canisevixımarieca tevi.  
Peru müpaü que memüteca'ıa  
meca'ucamaimavatü, mücücü  
pücaviximarieni tevi.

**Yuri que müti'erıecai 'uca Canani  
quıecame**

(*Marıcxı 7:24-30*)

<sup>21</sup>Mericüsü mana heyeyaca  
Qesusi, Tiru Siruni cuıeyarısie  
neyani. <sup>22</sup>Hicü mana canınuani  
Canani quıecame 'uca  
mücü cuıeyarısie heyeyaca.  
Niutahıvacaitüni müpaü 'utaitü,  
Quenenenimayaca Ti'aitame,  
Ravıri pemünu'aya. Nenıve  
'uca cuı püyüane, cacaıyari  
'axa mü'ane pıni'ü. <sup>23</sup>Qesusi

püca'ita'ei. 'Aura me'acüneca teyü'üquitüvemetemama, müpäü metenitahüave, Quenanunü'a. Tasicuveiyanetü putahiva xeicüa. <sup>24</sup>Mücü müpäü niutayüni, Ne muxasi memeuyexürüve vahesüa xeicüa neneyenü'arieni 'Ixaheri quie quiecatari vahesüa. <sup>25</sup>'Uca 'aura 'ayaca niutihüximaqueni hetüana müpäü tivavirietü, Ti'aitame 'acu, queneneuparevi. <sup>26</sup>Müpäü tinita'eiya, 'Aixüa capü'aneniqueyu xüca tevi türi vapa vanavairienique, sinurixi xüca vaminique. <sup>27</sup>'Uca rehüave, Xasunicü peputaine Ti'aitame, peru 'asita sinurixi mepitica'a temüxiquiyari vacusiyarima vamexasie manacavivive. <sup>28</sup>Hicü Quesusi müpäü tinita'eiya, 'Uca 'acu, cuini mieme yuri pepüti'erie. Que matinaque, yapeque'itüarieni. 'Anatütü cananayehüiyani nu'aya.

**Quesusi que mütivaranayexürüie yumüireme**

<sup>29</sup>Mericsü mana heyeyaca Quesusi, haracuna tesita caninuani Carereya cuieyarisie. Yemurisie 'utiyaca mana nayerüni. <sup>30</sup>Hicü hesüana meniu'axüani yumüiretü teüteri huriecate mevaravitütü, müme meta vamamate mütutunicai memacücepecai memünenurietücatei hipameri yumüireme. Hetüana menivacutuacaitüni, 'iya nivanaranayexürüvacaaitüni. <sup>31</sup>'Ayumieme teüteri menihüxiyani mevaxeyatü nenuriecate que memüteniuvavecai, huriecate que memüte'u'uvacai, memacücepecai que memüteheunenierecai. 'Aixüa

meniutiyuanecaitüni 'Ixaherisixi yucacaiyari hepaüsita.

**Teüteri que mütivarumi nauca miriyari**

(*Maricuxi 8:1-10*)

<sup>32</sup>Hicü Quesusi yu'aurie varutahüaveca yuhesüa miemete teyü'üquitüvamate müpäü tinivarutahüave, Ne teüteri nenivanenimayaca. Haica tucari meniuyurieni hicü nehesüa. 'Icuai mepücahexeiya. Nepücanevaiüriya meyhacacuitüveme nemüvarenü'anicü, capa metiveranaxüame mehecaxürieni huyeta. <sup>33</sup>Hicü teyü'üquitüvamate müpäü metenitahüave, 'Uva macumavesie haque tepeicaxeiya pa yapäumeme temütevaminicü teüteri yayupaümeme. <sup>34</sup>Quesusi müpäü tinivaruta'ivaviya, Quepaümeme xepexeiya pa. Müme müpäü meniutiyuane, 'Atahutame,quesüte meta yapäumeme 'esimepepeme.

<sup>35</sup>Tivaruta'aitüiaca teüteri memücuyaxixüanicü cuiepa, pa cananucü'üni 'atahuta payari, quesüte meta. <sup>36</sup>Pamüpariyusi 'ipitüiaca Cacaüiyari, nititara pa, tivaru'üitüa teyü'üquitüvamate, teyü'üquitüvameteta metevaruta'üitüa teüteri.

<sup>37</sup>Yunaitü mete'ucuaca meniutihuxani. Menicuxeürieni tarimeyari manuyuhayevaxü, 'atahuta quirivayari hüpüneme.

<sup>38</sup>Memüte'ucuai nauca miriyari mecaniyupaümecaitüni 'uquisi xeicüa, 'ucari türi meta mepüca'inüaricai.

<sup>39</sup>Hicü varutanü'axüaca teüteri canuvasie nicayerüni. Macarani cuieyarisie neyani.



**'Inüari que memüte'itavaviri  
Pareseusixi Saruseusixi**

(*Maricuxi 8:11-13; Rucaxi 12:54-56*)

**16** Mericüsü Pareseusixi Saruseusixi menu'axüani. Me'i'inüatatüvetü, menitavavirieni 'inüari memüxeiyacü taheima mieme mupitüarie. <sup>2</sup>Iya müpäü tinivarutahüave, Xeme taicai müpäü xeputyuane, 'Uxa'a xüari sipüreu'aneni, camü haivitüri nixuxureni. <sup>3</sup>Ximerita hicü pücavierüme xeputyuane, camü haivitüri nixuxureni 'aneusuica. Tamüsü xepimate que mütiyuxexeya haivitüri. Cari xepüca'yüvave xemeitimanicü 'inüari hicü muxuave que mütiyuxexeya. <sup>4</sup>Hicü miemete teüteri 'axa mepüteyurie, mepüvacumaüva hipame va'ütama. Müya me'anenetü 'inüari mepücvautüve memixeyacü, peru 'inüari mepücapitüarieni, Cunasi 'inüari que müratüa, müpäü xeicüa mepütepitüarieni. Hicü varucu'eirieca neyani.

**Tiyucuxanariyame Pareseusixi  
vahesüa mümieme**

(*Maricuxi 8:14-21*)

<sup>5</sup>Mericüsü teyü'üquitüvamete hamatüana menecüne 'anutaiyepai, peru metenatümaiya pa memanu'üniquecai. <sup>6</sup>Hicü Quesusi müpäü tinivarutahüave, Yumarima 'aixüa, xequeneyü'üviyani tiyucuxanariyame hepaüsita Pareseusixi Saruseusixi vahesüa mümieme. <sup>7</sup>Mücü müpäü meteniyutahüave, Pa temücaheye'üicü 'ayumieme müya

canaineni. <sup>8</sup>Quesusi retimaica que memüteyücühüavecai, müpäü niutayüni, Titayari niuqui xetexüatüa xeme, pa tepücahexeiyaxeteyücühüavetü. 'Esiva cari yuri xepüte'erie. <sup>9</sup>Cari 'asixepücatemate cuxi. Xepücahe'eriva 'auxüvime payari cümana yu'auxüvime miriyari mememiquie, quepaümeme quirivayari xemucuxeüri, <sup>10</sup>mesü 'atahuta payari cümana nauca miriyari mememiquie, quepaümeme quirivayari xemucuxeüri. <sup>11</sup>Titayari 'asixecatemate, quename pa necaxatatü müpäü netixe'utahüavixü, Xequeneyü'üviyani Pareseusixi Saruseusixi vahesüa mieme tiyucuxanariyame hepaüsita, ne'utaitü. <sup>12</sup>'Anaque yamecatenetimani quename memüyü'üviyanicü tiyucuxanariyame hepaüsita cahainecai, masi Pareseusixi Saruseusixi va'üquisica hepaüsita memüyü'üviyanicü püta hainecai.

**Pecuru que mütiyuhecüataxü,  
Quesusisie tiviyatü**

(*Maricuxi 8:27-30; Rucaxi 9:18-21*)

<sup>13</sup>Mericüsü Quesusi Sesareya Piripusie nuaca, nivacu'ivaviyacaitüni yuhesüa miemete teyü'üquitüvamete müpäü 'utaitü, Teüteri que me'utiyuane ne que nepüpaicü, Yuri Tevi que nemütihücü. <sup>14</sup>Mümesü müpäü metenita'eiya, Hipatü quename vaniu Vani Ti'üyame pehücü, meputiyuane, hipatüta quename vaniu 'Eriyaxi pehücü, hipatüta quename Queremiyaxi,

'ecüsü texaxatamate xevitü  
pepühücü meputiyuane. <sup>15</sup>Müpaü  
tinivarutahüave, Xemeta, que  
xe'utiyuane que nepüpaicü  
ne. <sup>16</sup>Simuni müpaü tinita'eiya  
Pecurutütü, Que mü'ane  
manayexeyarie Cürisitutütü,  
'ecü pecanihücütüni, Cacaiyari  
mayeniere pepünu'aya.

<sup>17</sup>Qesusi müpaü tinitahüaveni,  
'Aixüa pepu'itüarie 'ecü Simuni  
Cunasi pemünu'aya. Tevi  
vai xuriya xeicüa hücütütü,  
yapücamatiu'üquitüa, masi  
ne'uquiyari taheima macave  
yamatinu'üquitüani. <sup>18</sup>Nesü  
müpaü nepümaticühüave, 'ecü  
Pecuru pecanihücütüni, tete  
pemütiteva. 'Icü tetesie  
nepüvaruti'uitüani müme 'arique  
memüyutixexeürivani nehësüa  
miemete. Müme mepüca'a'ivarieni,  
sepa memücüi'iva. <sup>19</sup>Yavi  
nepümasi'üitüani cümana  
müxünarüva haque müre'aita  
que mü'ane taheima macave. Tita  
cuiepa pemücatitauni, müpaü  
pücatitauniyarieni taheimata.  
Tita cuiepa pemütitaunie, müpaü  
pütitauniyarieni taheimata.

<sup>20</sup>'Ana nivaruhüritüani  
teyü'üquitüvamete  
'asimemücatehehüavenicü xeime  
quename Cürisitutücai.

**Qesusi que mütivarutaxatüa que  
mütimierieniquecai**

*(Maricuxi 8:31-9:1; Rucaxi 9:22-27)*

<sup>21</sup>Mericusü 'ana Qesusi  
nisutüani tivahecüatüatü yuhësüa  
miemete teyü'üquitüvamete,  
müpaü 'utaitü, Neuyeveca  
Querusareme nemeutiyunecü

haitü, vaüca nemüticuine  
ta'uquiyarima vahësüa mara'acate  
memühüritüarie vahësüa müme  
meta 'inüaricü memüte'üquitamete  
vahësüa haitü, nepemierieni,  
hairieca tucari nepanucuqueni  
haitü. <sup>22</sup>Hicü Pecuru yateva  
heivitüca nisutüani 'icu'imaïyatü  
müpaü 'utaitü, Tixaü Ti'aitame.  
Müpaü pepüca'itüarieni.  
<sup>23</sup>Qesusi cui 'enutaxeïyatü  
müpaü tinitahüave Pecuru,  
Xaüsie queneuye'a, Cauyumarie  
'acu. Pepünesicunuitüamücü,  
Cacaiyaripaü pemücare'iyaricü,  
teüteri vahepaü püta  
pemüre'iyaricü.

<sup>24</sup>Hicü Qesusi müpaü  
tinivarutahüave yuhësüa  
miemete teyü'üquitüvamete, Tevi  
xüca yuvaüriyani nehamatü  
muyeicanicü, que'uyutatuani  
queyuvaüriyani sepa  
curuxisie mumierie, nehësie  
quetiviyani. <sup>25</sup>Que mü'ane  
müyutavicueisitüamücü  
caniyutatümaïyamücü. Que  
mü'ane püta müyutatümaïya  
nehësie mieme,  
niyutavicueisitüamücü yemecü.  
<sup>26</sup>Tevi nai cuiepa mütixuave xüca  
ti'ivanique, tita ra'ivaqueyu xüca  
yutatümaïyanique. Titacü tiyutüani  
tevi, yutucari mücanavaïyarienicü.  
<sup>27</sup>Yuri Tevi que nemütihücü,  
necaninuamücü ne'uquiyaripaü  
nemarivetü neniucü tuayamete  
vahamatü. 'Ana nepürapica,  
yuxexütü que memütëyuriecai  
'anaque 'amecatenapiniyarieconi.  
<sup>28</sup>Niucü caniseüyeni que  
nemütixecühüave, hipatü 'ena  
memu'uva mepücacuini mexi

mecanesixeyavave Yuri Tevi  
neye'acacu, neti'aitacacu.

**Yücü tiyuxexeyatü que müratüa**

(*Maricuxi 9:2-13; Rucaxi 9:28-36*)

**17** Mericüsü 'ataxeime  
tucari 'anucayacu,  
Qesusi canivarevitüni Pecuru,  
Cacuvu, 'ivaya meta Vani, yemuri  
'emutevisie yühücüame. <sup>2</sup>Hicü  
me'ixeyacacu yücü 'anetü  
nayeitüarieni. Nayexavatüre  
taupaü. 'Ixuriquieya tuxatü  
ratüa hecüariyapaü. <sup>3</sup>Hicü  
mevaxeyacacu memasiücütü  
menacüne Muisexi 'Eriyaxi,  
hamatüana metenicuxatacätüni.  
<sup>4</sup>Hicü Pecuru müpaü tinitahüave  
Qesusi, Ti'aitame, 'aixüa  
cani'aneni, 'uva temu'uvacü tame.  
Xüari pümasinaque 'ena xamaru  
nemütivevieni haicame, 'ahesie  
mieme xeime, Muisexisie mieme  
xeime, 'Eriyaxisie mieme xeime.  
<sup>5</sup>Taniucacacu cuxi, yapaucua  
haivitüri müxavatü nivareutinani.  
Haivitürisie xevitü niutaniuni  
müpaü 'utaitü, 'Icü caninenivetüni  
münaqui'eriva, mücücü  
neninaqui'aca. Xequene'enieca 'iya.  
<sup>6</sup>Me'l'enieca teyü'üquitüvamete,  
meniutihüxima'uni cuini mieme  
memamatü. <sup>7</sup>Qesusi 'aura  
'ayaca, varutimayüaca müpaü  
niutayüni, Xequenanucu'uti  
xepücaheumamaca.  
<sup>8</sup>Mehanenieretücüneca, Qesusi  
xeicüa mepuxei, xeime pücatixaü.  
<sup>9</sup>Hicü yemurisie  
me'acanexüaximecacu, Qesusi  
müpaü tinivaruta'aitüani,  
Tita xemüte'uxej, xeme  
xepücatehaxaxatüvani xeime,

mexi cuxi müquite vasata  
neca'anucuquetüarieve, Yuri Tevi  
que nemütihücü, 'ariqueque xeicüa.  
<sup>10</sup>Hicü teyü'üquitüvamete müpaü  
metenitahüave, Mericüte müme  
'inüaricü memüte'üiquita, titayari  
müpaü mete'utiyuane quename  
heuyevese 'Eriyaxi meri munuanicü.  
<sup>11</sup>Müpaü tinivaruta'eiya, Neuyeveca  
siepüre 'Eriyaxi meri munuanicü,  
'aixüa miyurienicü naime. <sup>12</sup>Ne  
masi müpaü nepütixecühüave,  
'Eriyaxi 'ari caninuani.  
Mepüca'imaicai me'ixeyatü,  
masi que mütivanaquecai  
yamepiyurie. Yaxeicüata Yuri  
Tevi que nemütihücü, nepüticuine  
yamenesiyuriecacu hepätüna.  
<sup>13</sup>Ana müpaü mepüteheta  
teyü'üquitüvamete, Vani Ti'üyame  
müxatacaicü.

**Qesusi que mürenayahüa temaicü  
müquierixiecai**

(*Maricuxi 9:14-29; Rucaxi 9:37-43*)

<sup>14</sup>Mericüsü teüteri yumüiretü  
mana memü'uvacaisie  
meta'axüaximecacu, tevi  
'aura caniyuani hesüana.  
'Utitudumaqueca huxiena  
<sup>15</sup>müpaü niutayüni, Ti'aitame  
'acu, nenive quenenenimayaca.  
Püquierixie, cui püyüane. Heiva  
nativauseni taipa heivata hapa.  
<sup>16</sup>Neniva'atüirieni 'ahesüa miemete  
teyü'üquitüvamete. Mepüyutatexi  
me'enayahüanique. <sup>17</sup>Qesusi  
müpaü niutayüni, 'Acüsü xeme hicü  
xemümüemete yuri xepücate'erie,  
yu'iyarisie xepüxamurie.  
Quepaümexa peuyevese xehamatü  
nemuyeicanicü, quepaümexa  
nepüxenevieca. Xequenavitüqui

'uva nehesüa. <sup>18</sup>Hicü Qesusi 'itatiecu cacaiyari 'axa mü'ane minücai, pixünaxü. 'Anatütüri nanayehüiyani temaicü.

<sup>19</sup>Hicü teyü'üquitüvamete 'aura me'acüneca Qesusisüa yühücüate müpaü meniutyuani, Titayari tete'itatexie tame te'eyenü'anique.

<sup>20</sup>Müpaü tinivarutahüave, 'Esiva xeicüa yuri xemüte'eriecü, 'ayumieme xepitaxie. Niuqui caniseüyeni que nemütixecühüave, musitasa 'imüariyari'paü 'esipemecü xeicüa xüca yuri xete'erieca, xüca müpaü xete'itahüave mücü yemuri mana muve, Queneu'apata 'uma püta, xe'utiyuatü, mücü niyupatamücü. Xeniquemacacuni naime. <sup>21</sup>Peru yunenevietü yuhaquietü xeicüa caniyüveni meyenü'anicü müpaü mü'ane.

**Tavari Qesusi que  
mütivarutahüavixü que  
mütimierieniquecai**

(*Maricuxi 9:30-32; Rucaxi 9:43-45*)

<sup>22</sup>Mericsü qüepaucua memuyucuxeüri Carereyasie, müpaü tinivarutahüave Qesusi, Yuri Tevi que nemütihücü, necaniyetuiyamücü teüteri vahesüa. <sup>23</sup>Müme mecanenimiecuni. Hairieca tucarisie necananuquemücü. Cui mepüyuhiveriecai müme.

**Tumini tuqui 'amüpasie  
mieme, que mütiuyutua**

<sup>24</sup>Mericsü Caperünaume me'u'axüacu, müme tuqui 'amüpasie mieme tumini memücuxexeürivacai menu'axüani Pecurusüa. Müpaü metenitahüave,

'Iya xeniu mütixe'üquitüa tuqui 'amüpasie mieme catiyutua. <sup>25</sup>Hü, pütüyutua, rehüave.

Hicü quita heutahacu 'asicatayüvecacu cuxi, Qesusi müpaü tinitahüave, Que peticu'eriva Simuni. Que hate mepücuatätüarie cuiepa memütama teva'aitüvamete vahesüa memüteyutuanicü 'amemüte'apicacü. Te'aitamete vanivema meteyutua, nusu hipatü mepüteyutua. <sup>26</sup>Pecuru, Xüari hipatü mepüteyutua 'utayücu, Qesusi müpaü tinitahüave, Mericüte, vanivema mepüxüxüni. <sup>27</sup>Peru tepücavahaxüatüani. 'Ayumieme haracuna quenemie, mana queneucavivi cuaisü. Que 'anetü meri manuviere quesü, mücü quenanatihani. Pehenutatetapieme mana tumini pepetaxeyia 'auxüme 'inüariyari tuminiyari. Mücü quenivaye'üi quenivaruta'üitüa nehésie mieme 'ahésie miemeta.

**Que mü'ane masi müve'eme**

(*Maricuxi 9:33-37; Rucaxi 9:46-48*)

**18** Mericsü 'ana Qesusisüa menu'axüani teyü'üquitüvamete müpaü me'utiyuatü, Mericüte, quepaicü masi cuini mieme püve'eme, taheima macave que mütivaxeiyia müme mütiva'aitüa. <sup>2</sup>Qesusi yu'aurie 'itahüaveca nunusi vahüxie nitaqueni. <sup>3</sup>Müpaü niutayüni, Caniseüyeni que nemütixecühüave, ta'aurie xüca xeca'axürieni, türi vahepaü xe'ananetü xüca xeca'acüne yemecü xepücaheutahaxüani haque müre'aita que mü'ane taheima macave. <sup>4</sup>Que mü'ane yuhepaüsita 'asica'utaitü mayuyeitüani 'icü nunusipaü,

mücü canihücütüni que mü'ane masi cuini mieme müve'emetüni, taheima macave que mütvaxeiya müme mütiva'aitüa. <sup>5</sup>Que mü'ane mitanaqui'erieni xeime nunusi 'icüpaü mü'ane nehésüa mümiemecü, mücü pünesitanaqui'erieni neta.

### **Teüteri que memütecununitüariva**

*(Maricuxi 9:42-48; Rucaxi 17:1-2)*

<sup>6</sup>Mesü 'ime mecavavemetetütü yuri memüte'erie nehésie, que mü'ane micunuitüa sepa xeime, 'aixüa caniyüniqueyu masi xüca mata mahete 'acatütüariénique cüüpieyasie, xüca haramarasie heucahüiyanique meucatevasie. <sup>7</sup>Xüa 'ui que me'itüarieni cuiepa memütama memüyucununitüvacü. Neuyeveca teüteri memücunuitüarieni, peru xüa 'ui mücü tevi que mü'ane müvacunuitüani.

<sup>8</sup>Xüca 'amama masihecahüpani ya 'a'üca, quenavitequi quenehüva. 'Aixüa caniyümücü masi pemeutahanicü tucari maxuavesie pemamapurutü pe'ücapurutü, peru 'aixüa püca'yüni huta mamayari huta quetayari pehexeyatü xüca peheucahüiyani tai yuheymecü müta'asie. <sup>9</sup>Xüca 'ahüxi masihecahüpani, quenivayetü'i quenehüva. Masi 'aixüa caniyümücü tapa xeicüa peheunieretü pemeutahanicü tucari maxuavesie, peru 'aixüa püca'yüni naisata peheunieretü xüca peheucahüiyani xasi taiyariyasie.

### **Muxa meuyevecai 'üxasieya hepaüsita ticuxatatü, que müti'üquitacai**

*(Rucaxi 15:3-7)*

<sup>10</sup>Yumarima 'aixüa xepücatave'erieca 'ime

memücavavemete, sepa xeime. Müpaü nepütixecühüave, müme vaniuqui tuayamete yuheymecü 'amecaniu'uvani ne'uquiyari taheima macavesüa, mepicühüave. <sup>11</sup>Yuri Tevi nehücütütü que nemütinua, nevatavicueisitüanique memeuyexüríe, 'ayumieme necaninuani.

<sup>12</sup>Que xetecu'eriva. Tevi xüca xei sienituyari varexeiyani yumuxasi, xüca xevitü müme heuyeveni, hipame cativacu'eirieni hürisie nauca teviyari heimana tamamata heimana 'atanaucame, cativaumie meuyeve. <sup>13</sup>Niuqui caniseüiyeni que nemütixecühüave, xüca 'acu heitaxeiya, mücücü niyutemavieca cuini mieme, que mücatiyutemavie memücaheuyexüríecai vacü nauca teviyari heimana tamamata heimana 'atanaucame vacü.

<sup>14</sup>Müpaü yaxecüa xe'uquiyari taheima macave püca'yuväüriya meuyevenicü sepa xevitü 'icü memücavavemete.

### **Que müreuyevese müreiyehüvirienicü yu'iva**

*(Rucaxi 17:3)*

<sup>15</sup>'A'iva xüca 'axa masi'uyurieni, mana quenemie yaquetineutahüavi yühücüate xeti'tütü 'ecü 'iya. Xüca masi'u'enieni, 'a'ivatütü pühücütüni xeyunaqui'erietü.

<sup>16</sup>Me xüca camasi'u'enieni, xeime quenanuvitüqui ya yuhutame, tehecüatamate vaniuquicü naitü niuqui müseirecü, yuhutame ya yuhaicame vaniuquicü.

<sup>17</sup>Müme xüca cavaru'enieni, yaquetinivarutahüavi memüyutixexüríva. Xücate

cavaru'lenieni memüyutixexeüriva, que mü'ane tanuivarisie mücamiemepäu quetineuxeiya, tiyucuanamepäu.

<sup>18</sup>Caniseüyeni que nemütixecühüave, tita xemücatetaunie 'ena cuiepa, mücü pücatitauniyarieni taheimata, tita xemütetaunie 'ena cuiepa, mücüta pütitauniyarieni taheimata.

<sup>19</sup>Tavari caniseüyeni que nemütixecühüave, yuhutatü xeme xeyu'lenietü xüca yaxeicüa xeteyumaica 'ena cuiepa tita xemütetavauni hepaüsita, sepa que mütitita, ne'uquiyari taheima macave müpäü catinixepitüamücü.

<sup>20</sup>Haque yuhutatü yuhaicatü memeyuxeürrie menesitahüaveque, mana nepuyeicani vasata.

<sup>21</sup>Hicü Pecuru 'aura 'ayaca müpäü tinitahüave, Ti'aitame, quepäümexa nepüreiyehüvirieni ne'iva, 'axa nesiyurieu. 'Atahutamexa va'atü.

<sup>22</sup>Qesusi müpäü tinitahüave, Ne 'atahutamexa nepücahaine, masi haica teviyari heimana tamamata heimana 'atahutamexa püta.

**Tevi mücayuvaüriyacai  
müreiyehüvirienicü xeime**

<sup>23</sup>Ayumieme nepaine, 'ipäu catini'aneni ti'aitametücacu que mü'ane taheima macave. Tevi yucuepa müti'aitametücai müpäü pütiuta'ai, te'uximayatametemama 'amemüte'apicacü tita müreuyevecai.

<sup>24</sup>Mericusü müpäü tisutüacu vavavirietü, xevitü hesüana pü'atüarie, meuyevecai xei miriyari miriyari 'inüariyari 'amürapicacü tumini. <sup>25</sup>Mücaheixeyacacü cümana mütiyutuanicü, mücü

ti'aitame müpäü pütiuta'ai mütuiyacacü tevi, 'üyayata türiyamamata piniteyata, mücü tuminiyaricü 'amürapiniyarienicü. <sup>26</sup>Hicü hetüana niutihüximaqueni ti'uximayatame müpäü 'utaitü, Quenenecuevieca cuerietü, nai nepürapica. <sup>27</sup>Hicü mücü ti'uximayatame cusiyarieya 'inenimayatü nixüna, reiyehüviri tita müreuyevecai. <sup>28</sup>Mericusü ti'uximayatame heyaca neitaxeiya yuhepäü 'aneme ti'uximayatame. Peuyevecai 'iya xei sienituyari 'inüariyari xecüa mi'üitüanicü. Cüipitüana 'iviyaca müpäü tinitahüave, Queneneu'üitüa tita müreuyevese pemürapinecü. <sup>29</sup>Hetüana niutihüximaqueni hepaüna 'anetü ti'uximayatame, müpäü 'utaitü, Quenenecuevieca cueritü, nai nepürapica. <sup>30</sup>Mücü pücayuvaüriyacai, masi tiniuta'aita casariyanata manutahüüyanicü mexi carapivecai tita müreuyevecai. <sup>31</sup>Mericusü hepaüna me'ananetü te'uximayatamete hipatü me'ixeyaca que mütiuyuri, cuini mieme meniyutihiverieni. Mehecüneca, que mütiuyü nai metenitaxatüani yucusiyari. <sup>32</sup>Hicü cusiyarieya 'itahüaveca müpäü tinitahüave, Cari 'axa pepütiuca'iyari. Camü ne nemareuyehüviri tita müreuyevecai pemürapinecü naimecü, yapemutayücü. <sup>33</sup>Caricuta müpäü careuyevecai 'ecütari peminenimayacacü 'iya 'ahepäu müti'uximayatame, yaxeicüa que nemümüatiunenimayataxü ne. <sup>34</sup>Cusiyari ha'atü yemecü niyetuani teyu'uximatüvamete vahesüa mexi

carapivecai tita müreyevcai  
naime.

<sup>35</sup>Yaxeicüata ne'uquiyari  
taheima macave püxeyurieni  
xüca yuxexütü 'aixüa 'iyaricü  
xecatevareuyehüvirivani yu'livama.

**Quesusi que müti'üquitacai,  
memücu'eiriva vaxatatu**

(*Maricuxi 10:1-12; Rucaxi 16:18*)

**19** Mericüsü Quesusi 'inüca  
'icü niuqui, Carereya  
cuieyarisie niuyupata, Cureya  
cuieyarisie neyani Curutani  
hatuxameyari 'anutaiye. <sup>2</sup>Teüteri  
yumüiretü meniveiyacaitüni. Mana  
nivanarayexürüvacaitüni.

<sup>3</sup>Mericüsü Pareseusixi hesüana  
meniu'axüani me'ita'inüataque  
müpaü me'utiyuatü, Titauniva  
yü'üya mücu'eirienicü naimecü.

<sup>4</sup>Mücü müpaü tinivaruta'eiya,  
Müpaü xecate'iterüvavave,  
mücü matüaripai müvarunetüa,  
'uquitüme 'ucatüme müvarutivi.

<sup>5</sup>Müpaü niutayüni, 'Ayumieme  
'uqui niyupatacümücü, yu'uquiyari  
yuvarusi vahesüa niyeyemücü,  
yü'üyasie tiniviyamücü  
püta. Memüyuhutacai xei  
vaiyari mecanacünicuni  
meyuxevitü, cananuyüneni.

<sup>6</sup>'Ayumieme mecaniyuxevini,  
mepücauyhutari, xei vaiyari  
mehümetütü. 'Ayumieme Cacaüyari  
müvarutaxeviriyaxücü, tevi  
pücvataxürüxüani. <sup>7</sup>Peru müme  
müpaü metenitahüave, Mericüte,  
xüca müpaü 'aneni, titayari  
Muisexi müpaü tiu'aitaxü xapa  
'eiriya hepaüsita mihuritüanicü  
micu'eirienicü. <sup>8</sup>Mücü müpaü  
tinivarutahüave, Muisexi yu'iyarisie

xemü'itutupecü canixe'utaunieni  
xemüvacu'eirienicü yü'üitama.  
Peru matüaripaitü müpaü  
cacani'anecaitüni. <sup>9</sup>Ne masi müpaü  
nepütixetahüave, que mü'ane  
micu'eirieni yü'üya, mitivitüni  
xeime, mücü canicumaiüvamücü  
que mü'ane mücayü'üya xeime  
cünaya mühücücü, me xüca 'uca  
mü'üyatücai 'icumayüaveni  
xeime mücayücüna meri xeiçüa,  
picu'eirieni. Que mü'ane meta  
mitivitüni mücu'eiriva, mücüta  
nicumaüvamücü xeime 'üiyaya.

<sup>10</sup>Hicü teyü'üquitüvamete  
müpaü metenicühüaveni, Cari  
xüca müpaü 'aneni 'uqui  
'ucamatü que mütivaiyacü,  
'aixüa cani'aneniqueyu masi  
xüca canequenique. <sup>11</sup>Mücü  
müpaü tinivarutahüave, 'Icü  
niuqui yunaime vahesie  
pücamieme. Müme müpaü  
memütepitüarie, müme vahesie  
xeicüa canimemetüni. <sup>12</sup>Hipatü  
mepücanequivave müpaü  
me'anenetü memutinüivaxücü.  
Hipatüta mepücanequivave  
müpaü me'aneneme teüteri  
memüvarayeitüacü. Hipatüta  
yücümana mepücanequivave,  
yamütiyünicü que müti'ane  
ti'aitametücacu que mü'ane  
taheima macave. Que mü'anesie  
mümieme 'icü, hesiena  
quetinaqueni.

**Quesusi que mutayü türi vahesie  
mieme 'aixüa memü'itüarienicü**

(*Maricuxi 10:13-16; Rucaxi 18:15-17*)

<sup>13</sup>Mericüsü 'ana türi  
meni'atüarieni hesüana, vahesie  
'utimeme müyutanenevienicü,

peru teyü'üquitüvamete  
menivarutate'acaitüni. <sup>14</sup>Hicü  
Quesusi müpäü tinivarutahüave,  
Xequenivapitüaca türi,  
xepücavanenaca nehesüa  
memü'axenicü. Müya memü'anene  
catiniva'aitüvametüni que mü'ane  
taheima macave. <sup>15</sup>Hicü vahesie  
'utimeca neyani.

### 'Uqui müxicutücai

(*Maricuxi 10:17-31; Rucaxi 18:18-30*)

<sup>16</sup>Hicü 'uqui hecuatü hesüana  
ninuani müpäü ticühüavetü,  
Ti'aitame 'acu, tita reuyevese 'aixüa  
nemütüyurienicü, tucari mücaxüve  
nemexeianicü. <sup>17</sup>Müpäü tinita'eiya,  
Titayari peneticu'ivaviya tita 'aixüa  
müti'ane hepaüsita. Que mü'ane  
'aixüa mü'ane yuxevitü 'apuyeica  
Cacaüyaritütü. 'Ayumieme xüca  
peheutahamücü tucari maxuavesie,  
yaquetinecamieni que müti'aita.  
<sup>18</sup>Rehüave, Que mü'ane 'aisica  
'acu. Quesusi rehüave, Müpäü  
manuyüne, pepücati'amemivani  
pepüca'icumaüva xeime  
'üyaya, pepücatinavayani,  
peti'litavatü pepücatihecüatani,  
<sup>19</sup>quetinivareuyehüvirieca  
'a'uquiyari 'avarusi,  
quenenaqui'erieca 'ahepäü tevi  
que pemüti'anaqui'erie manuyüne.  
<sup>20</sup>Hicü 'uqui müpäü tinitahüave,  
'Icü naimesie yanepüticamie  
temaïcüyaripai. Tita cuxi reuyevese.  
<sup>21</sup>Quesusi müpäü tinitahüave,  
Xüca pe'avaüriyani pemaye'anicü,  
quenemie, quetineutua 'apini,  
quetinivarumicua memümamave.  
Müpäü petiyurieme väica  
pepeucaqueni taheima. 'Ana  
pe'ayame nehesie quetineuviya.

<sup>22</sup>Hicü 'uqui 'icü niuqui 'u'enioca  
neyani yuhiverietü, väica  
mürexeiyacaicü.

<sup>23</sup>Hicü Quesusi müpäü  
tinivarutahüave yuhesüa miemete  
teyü'üquitüvamete, Niuqui  
caniseüyeni que nemütixecühüave,  
canicuaniveni xicu maye'anicü  
müti'aitüvametünicü que mü'ane  
taheima macave. <sup>24</sup>Tavari  
müpäü nepütixecühüave, que  
müticuanive xicu maye'anicü  
Cacaüyari müti'aitüvametünicü,  
masi pücacuanive cameyu  
manuyehanicü 'ivipame huxieyasie.  
<sup>25</sup>Me'u'enanaca teyü'üquitüvamete  
yeme meniuhüxiyani. Müpäü  
menituyuanecaitüni, Xüca  
müpäü 'aneni, quepai püyüve  
mütavicueisitüarierenicü. <sup>26</sup>Hicü  
Quesusi vaxeyatü müpäü  
tinivarutahüave, Teüteri  
mepücayüvave, peru Cacaüyari  
naimecü caniyüveni. <sup>27</sup>Hicü  
Pecuru müpäü tinitahüave,  
Camüsü tame tepeicü'eiri naime  
'ahesie tepüteviya. Mericüte, tita  
tetehexeyani tame. <sup>28</sup>Quesusi  
müpäü tinivarutahüave, Niuqui  
caniseüyeni que nemütixecühüave,  
xeme nehesie xemüteviya,  
quepaucua cuie mühecuasie  
temü'axüani, Yuri Tevi nehücütütü  
quepaucua ne'uvenisie nemayerüni  
neti'aitatü visi ne' Janetü, 'ana  
xemeta 'isücate xecanacünicuni.  
Tamamata heimana huta  
'uveniyarisie xe'ayaxeme  
xecateniva'aitüacacuni teüteri  
tamamata heimana yuhutame  
nuivarite 'Ixaherisie memüyecü.  
<sup>29</sup>Que mü'ane micu'eiri yuqui  
yu'ivama 'uquisi 'ucari, yu'uquiyari



yuvarusi yunivema yucue,  
xüca varucu'eirieni nehesüa  
mümiemecü, mücü cuini mieme  
masi varexeiyatü canayeimücü,  
tucari mücaxüve hexeiyatü  
payani. <sup>30</sup>Yümüiretü hicü miemete  
memümexüacate 'imatüremete  
mecanacünicuni, 'imatüremete  
mexüacate mete'acüne.

### Caxie haraverita memüte'uximayacai

**20** 'Ipaü catini'aneni  
ti'aitametücacu que mü'ane  
taheima macave. Tevi quiecame  
ximeri meri neyani vata'inienique  
te'ivamete haraveritana  
memüteta'ivacü caxie hepaüsita.  
<sup>2</sup>Müpaü tivarutahüavecu xei  
tucarisie mieme que mütiyutuacai,  
meniuyuvaüriya, nivarenü'ani  
yuharaverita. <sup>3</sup>Hicü 'anatinecu  
heyaca nivaruxeiya hipame  
quiecarixixüapa memüti'ucai  
mecate'ivatüvetü. <sup>4</sup>Müpaü  
tinivarutahüave, Xemeta haraverita  
xequenehu. Que mütiheiserie  
nepütixepitüiani. Hicü menecüne.  
<sup>5</sup>Mericusü tavari heyaca tuca  
tavarita cüa caviecacu yaxeicüa  
pütüiyuri. <sup>6</sup>Hicü 'acayunirümecacu  
neyani. Hipameta nivarecaxeiya  
mana meti'ucame. Müpaü  
tinivarutahüave, Titayari 'uva  
xeteti'u tucariçü xecate'ivatüvetü.  
<sup>7</sup>Müme müpaü metenitahüave, Tevi  
pücatasita'inieve temüteta'ivacü.  
Müpaü tinivarutahüave, Xemeta  
haraverita xequenehu. Que  
mütiheiserie, yaxepütepitüarieni.  
<sup>8</sup>Mericusü 'ucutaicairecu haraveri  
cusiyari müpaü tinitahüave  
yuparevivame, Te'ivamete  
quenivaretahüavi, quenivare'üitüiani

va'ivarica xique miemetexi meri,  
'ariqueque ximeri miemetexi.

<sup>9</sup>Hicü müme 'acayunirümecacu  
memutahüavarie me'u'axüaca xei  
tucarisie mieme meniuta'üitüarieni  
yuxexuitü. <sup>10</sup>Müme matüari  
memutahüavarie me'u'axüaca,  
müpaü mepütöcucu'erivacai vaücava  
masi memü'üitüarieniquecaicü,  
peru mümeta yaxeicüa xei tucarisie  
mieme meniuta'üitüarieni yuxexuitü.  
<sup>11</sup>Me'itanaqu'erieca yu'ivarica,  
menitiniquimani haravericame  
<sup>12</sup>müpaü me'utiuyatü, Camü 'ime  
'imatüriecaque memü'axüa xei  
hurayari mepuyuri xeiçüa caricuta  
yaxeicüa pepütivarupitüa tahepaü,  
sepa tame temüte'ucacucuinecai  
tucariçü, sepa temücuaxiyatücatei  
xürüpa tame. <sup>13</sup>Mücü 'ita'eiyaca  
xeime müme müpaü niutayüni,  
Nehamicu 'axa nepücamasi'uyuri.  
Pecatiu'avaüri que nemainecai xei  
tucarisie mieme que memütinetuacai.  
<sup>14</sup>Quenanu'üi 'atumini, quenemie.  
Nepünevaüriya nemi'üitüanicü 'icü  
'imatüreme que nemümatiu'üitüa  
'ecü. <sup>15</sup>Catitauniva müpaü  
nemütüiyurienicü nepinicü que  
mütünaque. Nusu 'axa pepünetiuxei  
'ecü 'aixüa nemütüuca'iyariçü.  
<sup>16</sup>Müpaü yaxeicüa müme hicü  
memü'imatüremete, 'ana mexüacate  
mecanacünicuni, mexüacate  
'imatüremete mete'acüne. Yümüiretü  
meputa'inierie, peru hipatü xeiçüa  
mepanayexeiyarie.

### Tavari Qesusi que mutayü que mütimierieniquecai

(*Maricuxi 10:32-34; Rucaxi 18:31-34*)

<sup>17</sup>Mericusü Qesusi Qerusareme  
quepaucua mumiecai, yateva

nivarevitüni Tamamata Heimana Yuhutame yühücüame. Mana huyeta müpäü tinivarutahüave, <sup>18</sup>Neuxeï, Qerusareme tepeuti yune hicü. Yuri Tevi que nemütihücü necaniyetuiyamücü mara'acate memühürütüarie vahesüa, müme 'inüaricü memüte'üquita vahesüa. Va'isücate menesita'ivaviyayu necanimieriemücü. <sup>19</sup>'Ana meneniyetuacuni müme memücatateüterima vahesüa nemünanaimarienicü nemücuveiyaxüanicü curuxisie nemümierienicü. Hairieca tucari 'aye'ayu necananucuquetüariemücü.

**Cacuvu Vanimatü que  
memüte'itavaviri**

*(Maricuxi 10:35-45)*

<sup>20</sup>Mericsü hicü Severeu nivemama vavarusi hesüana ninuani yunivema varavitütü. Niutihüximaqueni hetüana tixaütü titavarienique. <sup>21</sup>Mücü müpäü tinitahüave, Tita pereuyehüva. Rehüave, Müpäü queneutayüqui, 'icü nenivema yuhutatü memayaxecü xevitü 'aserieta xevitü 'a'utata quepaucua peti'aitatü pemayani. <sup>22</sup>Quesusi müpäü tinivarutahüave, 'Asixepücatemate tita xemütecu'ivava. Nehepäü xete'ucacucuineti xeteyüvave xemenu'ienicü tita nemüranu'ieni ne, nehepäü xeteyüvave xema'ivarienicü, tevi que müranucanamiepäü hacü quepaucua muca'üyarie. Tepüyüvave mete'icühüave. <sup>23</sup>Müpäü tinivarutahüave, Yemecü nehepäü xepüte'ucacucuieni xe'l'ietü tita nemüranu'ieni,

xeca'üyarietü nemüca'üyarienipäü. Peru heiserie nepücahexeiya nemüxepitüanicü ni neserietaxeniu ni ne'utata xemuti yaxecü. Masi müme xecüa ne'uquiyari micuha'aritäa vahesie mieme, yamecatenipitüariecacuni müme püta.

<sup>24</sup>Hicü hipatü tamamata me'u'enanaca menivarutixeuimani yuhutame yu'ivamacame. <sup>25</sup>Hicü Quesusi yu'aurie varutahüaveca müpäü niutayüni, Xeme müpäü xepütemate, müme nuivarite vasata memüte'aitamete, müme meteniva'uxitüaca mete'aitatü. Vavemete heiserie mecanexeiyani vahepaüsita que memüteyurieni. <sup>26</sup>Müpäü pücatiyüni xeme xesata. Que mü'ane xeme xesata ve'leme mayaniqueyu, mücü yunaime xeparevivame canayeimücü. <sup>27</sup>Que mü'ane mexüacame mayaniqueyu xesata, yunaime xehesie mieme ti'uximayatü canayeimücü. <sup>28</sup>Yaxeicüa Yuri Tevi nehücütütü que nemütinua, nemüpareviyanicü nepücanua, masi hipame nevaparevienique püta necaninuani, netucari nemüyetuanicü yumüireme vahesie mieme, nevaxünaque.

**Que memüte'anutanenierixü  
yuhutatü me'acücüpetü**

*(Maricuxi 10:46-52; Rucaxi 18:35-43)*

<sup>29</sup>Mericsü Quericusie me'ayecünirümeccacu, yumüiretütü teüteri meniveiyacaitüni. <sup>30</sup>Yuhutatü me'acücüpetü mana menicatecaitüni huye tesita. Hicü me'u'enanaca quename 'anuyeyaniquecai

Qesusi, meniutihivani müpäü me'utiyuatü, Ti'aitame 'acu Raviri pemünü'aya, quetanenenimayaca. <sup>31</sup>Teüteri menivarutitieni cayuvatü memüteticü. Müme masi vaüca meniutihivatücüne müpäü me'utiyuatü, Ti'aitame 'acu, quetanenenimayaca, Raviri pemünü'aya. <sup>32</sup>Hicü Qesusi mana 'utaqueca nivarutahüave. Müpäü niutayüni, Que tixenaque müpäü nemütiyurienicü xehesie mieme. <sup>33</sup>Müpäü metenitahüave, Ti'aitame 'acu, tepanutanenierequeyu. <sup>34</sup>Hicü Qesusi vanenimayatü nivaramayüaxüani vahüxita. Yapaucua menanutaneniere, menenucleveiya mümeta.

#### Querusaremesie que müreutaha

(*Maricuxi 11:1-11; Rucaxi 19:28-40; Vani 12:12-19*)

**21** Mericüsü Querusaremesie meni'axüaximecaitüni. Vetüpaquesie nuaca Huriva Mati'u yemuriyaritüa, Qesusi nivarenü'ani teyü'üquitüvamete yuhutame <sup>2</sup>müpäü tivarutahüaveca, Quiecarari 'anutäiye mucumasie xequenehu. Cuitü xecanivaretaxeyacuini puxu macuvie nu'ayamame. Xevaracuxüname xequenivarahapani nehesüa. <sup>3</sup>Xevitü xüca xeta'ivaviya, müpäü xepüte'itahüave, Ti'aitame püvareuyehüva. Cuitü püvaranü'ani. <sup>4</sup>Müpäü tiniuyüni maye'anicü que mutayü Cacaüyari, tixaxatame müpäü 'utainecacu, <sup>5</sup>Müpäü quetinetahüavi Siyuni müracuseva quiecame, Neuxei, que mü'ane mümatia'aitüa 'ahesüa canamieni

Ca'ayu'eriyatü, puxusie 'acaitü Puxu nunusisie 'anutiyerüme. <sup>6</sup>Hicü teyü'üquitüvamete mehecüneca, müpäü mete'uyurieca que mütivaru'aitüa Qesusi, <sup>7</sup>puxu meneyehana, nu'ayari. Yü'ücarari me'anutiveracu puxusie, nanutiyerüni. <sup>8</sup>Yümüretü teüteri huyeta meni'itüaximecaitüni yü'ücarari, hipatü cüye mamateya meheucuvitequetü meni'itüaximecaitüni huyeta. <sup>9</sup>Teüteri yumüiretü memuhaitütüacai memu'imamatücai meniutihivacaitüni müpäü me'utiyuatü, 'Aixüa cani'aneni Raviri Nu'aya, 'aixüa queticuniuvani que mü'ane mamie Ti'aitamesüa miemetütü hepaüsita, 'aixüa cani'aneni que mü'ane taheima macave.

<sup>10</sup>Hicü Querusareme heutahacu yunaitü quiecatari menanucu'uni müpäü me'utiyuatü, Qesü püpaicü 'icü. <sup>11</sup>Teüteri müpäü meniutiyanecaitüni, 'Icü catinixaxatametüni Qesusitütü, Nasareti quiecame Carereya cuieyarisie.

#### Que müti'iti tuqui 'amüpa

(*Maricuxi 11:15-19; Rucaxi 19:45-48; Vani 2:13-22*)

<sup>12</sup>Mericüsü Qesusi Cacaüyari tuquieya 'amüpata neutahani curaruta. Nivaranuyeveiya yunaime memütetuacai memütenanecai mana curarutapai. Tumini patamete vamexate natixürieni, cucuruxi vatuayamete va'üpari ratixüri. <sup>13</sup>Müpäü tinivarutahüave, 'Ipaü catine'uca, Nequi nenevieri

quiyari canimarivacamüci,  
'anuyütü, xemesü masi terü  
xecanayeitüani haque tenavayamete  
memeyu'avietta.

<sup>14</sup>Hicü tuqui curaruyarita  
'uvecacu, memacücüpecai  
memühurietücatei hesüana  
meniu'axüani, nivanarayexürieni.

<sup>15</sup>Hicü mara'acate  
memühürütüariecai mümeta  
'inüaricü memüte'üquitacai,  
me'ixeyaca marivemecü que  
mütüyurienecai, mevaxeyatü  
türi meta tuqui curaruyarita  
memutihivacai, 'Aixüa cani'aneni  
Raviri Nu'aya me'utiyaatü,  
müme meniuyeha'ani. <sup>16</sup>Müpaü  
metenitahüave, Cari pecati'ena  
que memutiyaane 'icü. Quesusi  
müpaü tinivarutahüave, Hü. Cauca  
hasuacu xeca'literüvavave 'icü,  
Türi memüsiseve vatetasi  
Niuqui 'aixüa mü'ane  
Nepüvayenetüani nehepaüsita,  
maine. <sup>17</sup>Hicü varucu'eirieca,  
quiecarisie nivayeyani Vetaniyapai.  
Muva necateitüni.

**Que mütiuniu, 'axa mü'itüarienicü  
xapa mücatacacai**

*(Maricuxi 11:12-14, 20-26)*

<sup>18</sup>Merücüsü ximeri tavari  
quiecarisie yemieximetü  
neuhacamücücaitüni. <sup>19</sup>Xapa  
cüyeyari 'uxeyaca huye tesita  
'uveme, hepana neyani. Tixaü  
pücatiutaxe'i hesiena, xavari  
xeicüa. Müpaü tinitahüave  
xapa, Tavari pepücatacaca.  
Yapaucua niutavani xapa.  
<sup>20</sup>Me'ixeyaca teyü'üquitüvamete  
menihüxiyacaitüni müpaü  
me'utiyaatü, 'E'e, quetü, yapaucua

putava xapa. <sup>21</sup>Quesusi müpaü  
tivacühüave, Caniseüyeni  
que nemütixecühüave, xüca  
yuri xete'erieca, xüca xe'iyari  
cayuhutani, que mütiuyü xapa  
hepaüsita, müpaü xepüteyurieca  
xemeta. Mücü meta, sepa müpaü  
xemüte'itahüave yemuri mana  
muve, Queneu'apata, haramarasie  
queneu'ahüva, xe'utiyaatü, müpaü  
pütüyüni. <sup>22</sup>Sepa que mütitita, nai  
xemütetavauni xeyunenevietü,  
xüca yuri xete'erieca, xeheixeyatü  
xepacüne.

**Quesusi heiserie que mürexeyacai**

*(Maricuxi 11:27-33; Rucaxi 20:1-8)*

<sup>23</sup>Merücüsü tuquipa heta'acu  
mara'acate memühürütüariecai  
teüteri va'uquiyarima yunaitü  
'aura menacüne ti'üquitacacu.  
Müpaü meniutiyaane, Heiserie  
haque pemieme pemeixeyia 'ipaiü  
pemütüyurienecü. Quepai 'icü  
heiserie masi'upitüa. <sup>24</sup>Quesusi  
müpaü tivaruta'ei, Neta  
tixaütü nepütixeta'ivaviya.  
Xüca xenesita'eiya, neta  
yanepütixetahüave haque  
memieme heiserie nemexeyia  
yanemütüyurienecü. <sup>25</sup>Tamüsü  
Vani quepaucua müti'üyanecai,  
haque pemiemetücai 'üyaricaya.  
Taheima macave pipitüa, teüteri  
nusu mepipitüa. Mümeri niuqui  
menixüatüacaitüni müpaü  
meteyücühüavetü yunaitü, Xüca  
tame müpaü te'utiyaaneneni quename  
taheima macave 'ipitüa, mücü  
müpaü pütaticühüaveni, Mericüte,  
titayari yuri xecate'ita'eriri. <sup>26</sup>Mesü  
xüca müpaü te'utiyaaneneni quename  
teüteri me'ipitüa xeicüa, camü

tepvamacaxe teüteri. Yunaitü Vani tixaxatametüme mepü'erie. <sup>27</sup>Hicü Qesusi müpäü meteniuta'eiya, 'Asitepücatemate. Mücüta müpäü tinivarutahüave, Mericüte, neta 'asinepücatixetahüave haque memieme heiserie nemexeiya yanemütiyuriencü.

**Tevi nivemama yuhutame  
va'üxasi hepaüsita ticuxatätü,  
que müti'üquitacai**

<sup>28</sup>Perusü que xetecu'eriva. Tevi yunivema nivarexeiyacaitüni yuhutame. Xeimesüa nuaca müpäü tinitahüave, Nenive 'acu, hicü quetine'uximayatamie haraverita. <sup>29</sup>'Iya rehüave, Nepücanevaüriya. 'Ariquesietü yücü tiyutihüaveca neyani. <sup>30</sup>Mericüsü 'arique 'ivayasüa nuaca yaxecüa tinitahüave. 'Iya, 'Au ne'uquiyari 'utayüca, pücahetüa. <sup>31</sup>Mericüte, que mü'ane mücü 'icü yapüticatüa 'uquiyarieya que mütinaquecai. Müpäü mete'icühüave, Matüari mitahüavixüsiyetü. Hicü Qesusi müpäü tinivarutahüave, Niuqui caniseüenyi que nemütixecühüave, 'asita müme memüteyetuiriyari cuviyexunu tuminieya, 'ucari meta tuminicü memüyuvitünüa mecanixe'anuhaitüiyacuni memaye'axüanicü Cacaiyari mütiva'aitüvametünicü, xeme pücatixaü. <sup>32</sup>Vani xehesüa ninuani huye xexeisitüanique, tixecuxaxatüvatü heiseriemecü yaxemütecahunicü. Yuri xepücate'uta'eri hesiena, peru 'asita müme memüteyetuiriyari cuviyexunu tuminieya, 'ucari meta tuminicü memüyuvitünüa

müme yuri meteniuta'eriecaxüani hesiena. Xeme masi xete'uxeiyaca que mütiuyü, ni 'ariqueque xepücatehayevacai que xemüteyuriecäi, yuri xepücate'uta'eri hesiena.

**Te'üviyamete 'axa teyuruvamete**  
(*Maricuxi 12:1-12; Rucaxi 20:9-19*)

<sup>33</sup>Xeimeta 'üxasi xequene'enieca xemüteyü'üquitüacacü. Quiecame haraveri niutavevieni. Caxie 'uca'uitüaca nicurarutüiya, caxie püname nivati'inieni, 'e'utevime niutavevieni neniereme, capa caxie 'ucacuaiyanicü.

Te'üviyamete nivaruhürütüani vacuetatütü, teva retüa.

<sup>34</sup>Mericüsü ticuaximecacu, yuhesüa miemete te'uximayatamete nivarenü'ani te'üviyamete vahesüa memenutünicü 'icuaxi cusiyarisie mütinaquequecaicü.

<sup>35</sup>Te'üviyamete masi mevarutiviyaca te'uximayatamete hesüana memeyecü, xeime meniucuvaxüani, xeime mete'umi, xeime mete'utituaixixü. <sup>36</sup>Hicü hipame tavari nivareyenü'axüani te'uximayatamete yumüireme masi. Yaxeicüa mepüvaruyuri.

<sup>37</sup>Imatürieca vahesüa neinü'ani yunive müpäü 'utaitü, Xüari meteneiyehüviriecuni nenive. <sup>38</sup>Hicü te'üviyamete nu'aya me'uxeiyaca müpäü meniutiyuanecaitüni, Camüsü 'icüsie 'ariqueta catininaquimücü cusiyari pinieya. Cümü tepimieni, tepiviya tita hesiena mütinaque 'arique. <sup>39</sup>Me'iviyaca haraveri vari meneicahüani mepimi.

<sup>40</sup>Mericüte, quepaucua munuani haraveri cusiyari, que

vayurieni te'üviyamete müme.  
<sup>41</sup>Müpaü metenitahüave, 'Axa  
 'anemecü nivatixütüamücü 'axa  
 memüte'uyuricü müme, hipame  
 püta nivahürütüamücü te'üviyamete,  
 'icuaxiyari memiyetuirieni cusiyari  
 quepauca tucari maye'ani.

<sup>42</sup>Hicü Qesusi müpaü  
 tinivarutahüave, Hasuacu  
 xecate'ititerüvavave 'utüarica  
 xapayarisie que maine,

Mücü tete memutixani'eri qui  
 vevivamete

Mücü 'isiquina titutuicame  
 nayani.

Ti'aitame müpaü catiniuyurieni.

Canimariveni que temüte'ixeiya,  
 manuyüne. <sup>43</sup>'Ayumieme müpaü  
 nepütixecühüave, xepücapitüarieni  
 xeme xemeixeyanicü Cacaüyari  
 tixe'aitüvametüme. Hipatü püta  
 'icuaxiyari memütixuavitüani  
 yamecatenipitüariecacuni xei  
 nuivariyari. <sup>44</sup>Xüca 'iya tetesie  
 'ucaveni pütimure. Xüca hesiena  
 'ucaveni tete, pitapüna.

<sup>45</sup>Hicü mara'acate  
 memühürütüariecai Pareseusixi  
 vahamatü mel'ienieca 'üxasieya,  
 müpaü metenimaicaitüni  
 müvaxatacaicü müme.

<sup>46</sup>Metenicuvautüvecaitüni  
 que memüte'iviyacü, peru  
 'asimepücate'uyuri mevamacatü  
 teüteri. Müme müpaü  
 mepütecü'erivacai quename  
 tixaxatame hücütücai Qesusi.

**Neüquiya 'ixüarariyari**

**'üxasieya hepaüsita ticuxatatü,  
 que müti'üquitacai**

**22** Mericüsü Qesusi tavari  
 'üxasi hepaüsita ticuxatatü

tinivaruta'üquitüani müpaü 'utaitü,  
 'Ipaü catini'aneni ti'aitametücacu  
 que mü'ane taheima macave.

<sup>2</sup>Tevi yucuepa müti'aitametücai  
 neüquiya 'ixüarariyari niutavevieni  
 yunivesie mieme. <sup>3</sup>Yuhesüa  
 miemete te'uximayatamete  
 nivareutanü'axüani

memüvatahüavecü müme  
 meripai memuta'inierie  
 neüquiycü. Müme memuta'inierie  
 mepücaüyenecai memacüneccü.

<sup>4</sup>Tavari tivareutanü'axüa  
 te'uximayatamete hipame müpaü  
 tivarutahüaveca, Memuta'inierie  
 müpaü xequetenivaretahüavi,  
 Neuxei, ne'icuai 'apürapine,  
 turusixi mete'ucui'ivaxü,  
 vacaisixi meta memüvaiyatüca  
 xemütecuanicü, nai pütiha'arisie.  
 Xequenacüni neüquiypa.

<sup>5</sup>Memuta'inierie mel'tave'erietü  
 masi meneutayeixüani xevitü  
 yuvaxata, xevitüta yutienitapai.

<sup>6</sup>Hipatüta mevarutiviyaca  
 te'uximayatametemama, 'axa  
 mepüvaruyuri mepüvarucui.

<sup>7</sup>Hicü ti'aitame niuyeha'ani.  
 Varenü'acu cuyaxi yuhesüa  
 miemete menivarutixütüani müme  
 teyumemivamete, vaquiecarü  
 mete'utataiyaxü. <sup>8</sup>'Ana müpaü  
 tinivarutahüave yuhesüa miemete  
 te'uximayatamete, Neüquiya  
 pücuha'arisieri peru memuta'inierie  
 'aixüa mepücate'u'iyaricai.

<sup>9</sup>'Ayumieme xequenutayeixüa  
 huye manuyehanesiepai.

Yunaime xemüvaretaxeiya  
 xequenivareta'ini neüquiypa.

<sup>10</sup>Mericüsü te'uximayatamete  
 huyeta meheutayeixüaca  
 menivarucuxeürieni yunaime

memüvaretaxe 'axa teyuruvamete  
'aixüa teyuruvamete yunaime.  
'Ixüaramete mecanihüpünecaitüni  
haque neüquiya meveviya.

<sup>11</sup>Mericsü ti'aitame mana  
heutahaca vaxeiyaque 'ixüaramete,  
tevi niuxeiya mana 'acaime  
neüquiypa mieme 'ixuriqui  
müca'anacatücücai. <sup>12</sup>Müpaü  
tinitahüave, Nehamicu 'acu,  
quepaütütü 'uva pepataha  
neüquiypa mieme 'ixuriqui  
peca'anacatütü. Mücü cayuvatü  
tinicateitüni. <sup>13</sup>Hicü ti'aitame  
müpaü tinivarutahüave  
yuparevivamete, Xequenanahüa  
'ücateyasie mamateyasie,  
xequenanyehüva tacua yüvipa.  
Mana pütasuacani püyutaqueveni.  
<sup>14</sup>Yümüretüsü meputa'inierie, peru  
hipatü xEICÜa mepanayexeyarie.

#### **Cuviyexunu tuminieya**

(*Maricuxi 12:13-17; Rucaxi 20:20-26*)

<sup>15</sup>Mericsü Pareseusixi menecüne.  
Mepuyu'eni que memüte'iviyacı  
niuquieyasie. <sup>16</sup>Hicü yuhesüa  
miemete teyü'üquitivamete  
menivarenü'ani hesüana, hipame  
meta Herurexisie memüteviyacai,  
müpaü memüte'itahüavecü,  
Neuxei ti'üquitame tame müpaü  
tepütemate 'ecü yuri pemutainecü,  
Cacaüyari huyeya hepaüsita  
pemüti'üquitacü que mütvaiyacü,  
pemüca'acuerivayuriecü sepa  
xevitü que mütiyüchüave,  
yücü pemücativaxeiyacı  
teüteri. <sup>17</sup>Hicümüsüari,  
yaquetatineutahüavi que  
pemüticu'eriva. Ti'aitame Sesaxi  
tumini que mütivava cuviyexunusie  
mieme, titauniva mütiyutuanicü,

pücatauniva nusu. <sup>18</sup>Quesusi  
timaitü 'axa que memiyuriecucai  
müpaü niutayüni, Cari yacı  
xeicüa xepüyüa. Titayaricutaxi  
xenete'inüatatüve. <sup>19</sup>Tumini para  
xequeneneuxeisitüa xeime cümana  
mütiuyutua. Müme xei tuminiyari  
meni'üitüani. <sup>20</sup>Hicü müpaü  
tinivarutahüave, Quepai ramu'u  
püra'uxa, quepai püra'utüarica  
'icü. <sup>21</sup>Metel'icühüave, Sesaxi.  
Hicü müpaü tinivarutahüave,  
Mericüte, tita Sesaxisüa mütimieme  
xequetenapinirieca Sesaxi, tita  
Cacaüyarisüa mütimieme,  
xequetenapinirieca Cacaüyari.  
<sup>22</sup>Me'l'enieca menihüxiyani. Hicü  
me'licu'eirieca menecüne.

#### **Que memüte'ita'ivaviyaxü, müquite que memüte'anucu'uni hepaüsita**

(*Maricuxi 12:18-27; Rucaxi 20:27-40*)

<sup>23</sup>Mericsü mücü tucarisie  
Saruseusixi hesüana meniu'axüani.  
Müme müpaü pütivanuquitücai  
quename meca'anutaneniere  
müquite. Hicü müpaü  
metenita'ivaviya, <sup>24</sup>Ti'üquitame,  
Muisexi müpaü niutayüni, tevi  
xüca 'umüni türi cavarexeiyatü,  
'ivaya nitivitümücü yucue, türi  
nivativevimücü 'ivaya mumüpaü  
memütetetevacü. <sup>25</sup>Mericsü  
tahesüa 'amenititecaitüni  
yu'ivamatü 'atahutatü. Vamasi  
'utineüqueca niümüni. Türi  
mücavarexeiyacaicü, yü'üya  
caniucu'eirieni mutaya mitivitünicü.  
<sup>26</sup>Mutaya yaxEICÜa tiniuyurieni,  
'itivitüca niümüni, 'utümana  
mieme meta, 'atahutatü yunaitü.  
<sup>27</sup>Imatürieaque niümüni 'uca.  
<sup>28</sup>Mericüte quepaucua xeniu

memanucu'uni, 'atahutatü memitivitü, que mü'ane ra'üya pürayani.

<sup>29</sup>Qesusi müpaü tinivaruta'eiya, Xepuyuyari xemüca'imatecü 'utüarica xapayari que maine, 'asixemücatematecü Cacaüyari que mütitürücaüye. <sup>30</sup>Quepaucua memanucu'uni mepücaneneüqueni mepücaviquieca, masi Cacaüyari niuquieya tuayamete vahepaü mepü'aneneni taheima. <sup>31</sup>Müquite que memüte'anucu'uni que müre'uxa cauca hasuacu xeca'iterüvavave tita mütixe'utahüavixü Cacaüyari müpaü 'utaitü, <sup>32</sup>Ne 'Apurahami 'Isahaqui Cacuvu necanivacacaüyaritüni, manuyüne. 'Ayumieme müquite pücvaxata, quename vacacaüyari haitü. Memayeyuyuri püta vacacaüyari caniyuxatani, sepa memucui. <sup>33</sup>Me'u'enanaca teüteri, menihüxiyacaitüni 'üquisicayacü.

### 'Aitüarica müve'eme

(*Maricuxi 12:28-34*)

<sup>34</sup>Merücüsü Pareseusixi me'u'enanaca que mütivarunütüa Saruseusixi meniuyucuxeürieni 'axeicüa. <sup>35</sup>Hicü xevitü müme 'inüari niuquiyari mümaicai nita'inüata müpaü ticu'ivaviyatü, <sup>36</sup>Ti'üquitame 'acu, que mü'ane 'aitüarica masi peuyevese 'inüari niuquiyarisie mieme. <sup>37</sup>'Iya rehüave, Quenenaqui'erieca Ti'aitame mü'acacaüyari, nai que pemüticu'iyari, nai que pemütü'amate, nai que pemüticu'eriva, manuyüne. <sup>38</sup>'Icü 'aitüarica masi yemecü caneuyevaca,

cananuhaitüaca. <sup>39</sup>'Utümana mieme hepaüna cananuyüeni, 'Ahepaü tevi quenenaqui'erieca que pemütü'anaqui'erie, 'anuyütü. <sup>40</sup>'Icü niuqui hutatü canenucutuica 'inüari niuquiyari texaxatamete vaniüqui naime.

### Cürisitu quepai püranive, que mütivaruta'ivaviyaxü

(*Maricuxi 12:35-37; Rucaxi 20:41-44*)

<sup>41</sup>Merücüsü Pareseusixi memuyucuxeürie Qesusi nivaruta'ivaviya <sup>42</sup>müpaü 'utaitü, Que xetecu'eriva Cürisitu hepaüsita. Que mü'ane püraxiüyari. Müpaü mete'itahüavixü, Raviri canixiüyarieyatüni. <sup>43</sup>Müpaü tinivarutahüave, Mericüte, Cacaüyari 'Iyarieya 'icuyuitüvacacu, titayari Raviritütü Neti'aitüvame titaterüvaxü müpaü 'utaitü, <sup>44</sup>Ti'aitame müpaü tinitahüave que mü'ane müneti'aitüa, Neserieta quenacani 'Ahetüapai mexi nevarahapani müme memümasi'aca'unie. <sup>45</sup>Mericüte, xüca Cürisitu tita'aitüani Raviri, que timasiücü quename xiüyarieya. <sup>46</sup>Xevitü pücaüvecal mita'eiyacü. Tavari ni xevitü pücaüvaüriyacal tixaitü mütita'ivaviyacü 'arique.

### Qesusi que mütivaruniuquima müme 'inüaricü memüte'üquitametetücai, Pareseusixi meta

(*Maricuxi 12:38-40; Rucaxi 11:37-54; 20:45-47*)

**23** Merücüsü Qesusi tinivacuxaxatüvacaitüni teüteri yuhesüa miemete



teyü'üquitüvameteta <sup>2</sup>müpaü  
 'utaitü, Müme 'inüaricü  
 memüte'üquita Pareseusixita  
 Muisexi 'uvenieyasie me'atetü  
 mepüte'üquita. <sup>3</sup>'Ayumieme  
 nai que memütexecühüave  
 yaxequeteneyurieca  
 yaxequetenecahuni, peru que  
 memüteyurie yaxepücateyurieca  
 xeme. Mepütecuxata peru  
 yamepücateyurie. <sup>4</sup>Ica  
 meniucua'aritüani mahetete  
 mücuanivetüca, teüteri vanaiparisie  
 menivarutitütüvani, peru  
 mepücayuvaüriya ni yu'itüvamecü  
 memüvaporevienicü. <sup>5</sup>Nai que  
 memüteyurie, yamepüteyurie  
 teüteri memüvaxeyiacü xeyüca.  
 'Epatayeyeu cuitaxiyari cümana  
 niuqui xapayari manahüa  
 quepaucua yuyeyari memüvevie,  
 'apünene va'ücarü putuniyari.  
<sup>6</sup>Püvanaque quiecame 'aurie  
 memayaxecü 'ixüararipa,  
 teüteri vahüxie memayaxecü  
 tuquita, <sup>7</sup>püvanaque vaürisica  
 memüpitüarienicü quiecarü hixüapa,  
 teüteri Ti'üquitame me'utiyuatü  
 memüvatahüavecü püvanaque.  
<sup>8</sup>Xemesü Ti'üquitame  
 xepücate'uterüvarüvani. Xevitiüxa  
 catinixe'üquitüiaca, xeme yunaitü  
 xecaniyu'ivamaca. <sup>9</sup>Ne'uquiyari  
 xepücatecühüavarüvani cuiepa,  
 xevitiüxa müxe'uquiyaricü  
 taheima macave. <sup>10</sup>Te'üquitamete  
 xepücate'uterüvarüvani, xevitiüxa  
 tixe'üquitüvame mühücücü  
 Cürisitütütü. <sup>11</sup>Que mü'ane  
 xeme masi mümariva, peuyevese  
 mücü xeparevivame mayanicü.  
<sup>12</sup>Que mü'ane tixautü tihücütütü  
 mayueitüva, mücü tixaü

catihücütütü canayeitüariemücü  
 masi. Que mü'ane tixaü  
 catihücütütü mayueitüva,  
 mücü masi tixautü tihücütütü  
 canayeitüariemücü.

<sup>13</sup>Xüa 'ui xeme 'inüaricü  
 xemüte'üquita, xemeta Pareseusixi,  
 que xe'itüarieni yacü xeyüca  
 xemüyüacü. Xepücaavataunie  
 teüteri memaye'axüanicü  
 mütiva'aitüvametünicü que  
 mü'ane taheima macave. Xeme  
 xepücayuvaüriya müpaü  
 xemüte'aye'axüanicü, müme meta  
 memüyuvaüriya, xepüvanena.

<sup>14</sup>Xüa 'ui xeme 'inüaricü  
 xemüte'üquita, xemeta Pareseusixi,  
 que xe'itüarieni yacü xeyüca  
 xemüyüacü. Xepütevarutixütüiri  
 viyurasixi vapini, 'exeteheutevitü  
 neneviericü, mücamasiücünicü que  
 xemütēyurie. Xehesie masi yemecü  
 tinahüivamücü.

<sup>15</sup>Xüa 'ui xeme 'inüaricü  
 xemüte'üquita, xemeta Pareseusixi,  
 que xe'itüarieni yacü xeyüca  
 xemüyüacü. Naisarie haramarasie  
 cuiepa xepücu'uva, xe'livautüvetü  
 xeime xenücame xemayeitüanicü.  
 Quepaucua xemeitaxeyia,  
 xecanipata, masi yemecü hesiena  
 mütinaquenicü xasi taiyariyarisie  
 meucahüiyanicü, xehesie 'axa  
 mü'ane que mütinaque xeyüca  
 pücatixaü.

<sup>16</sup>Xüa 'ui xeme xe'acücüpetü  
 xemüvarahapana hipame, müpaü  
 xe'utiyuatü, Que mü'ane tuqui  
 'amüpa xatatü müyühürütüa,  
 yacü püyühürütüa. Me xüca  
 yühürütüatü huru tepüayari xatani  
 cümana müquemaritüarie tuqui,  
 peuyevese yamüticamienicü que

mutayü. <sup>17</sup>Cari 'asixepücatemate, xepacücüpe. Que mü'ane masi yemecü peuyevese, huru nusu, tuqui nusu peuyevese tuqui huru müpatacü Cacaüyarisüa mieme mayanicü. <sup>18</sup>Mücü meta, que mü'ane xeniu mürayutimavatüre xatatü müyühürütüa, yacü püyühürütüa. Me xeniu xüca mavari heimana mürapine xatatü yühürütüani, peuyevese yamüticamienicü que mutayü. <sup>19</sup>Xepacücüpe. Que mü'ane masi yemecü peuyevese, mavari nusu, mürayutimavatüre nusu peuyevese, mücü mipatacü mavari Cacaüyarisüa mieme mayanicü. <sup>20</sup>Que mü'ane mürayutimavatürecü xatatü müyühürütüa, mücü xatatü püyühürütüa, nai heimana mürapine xatatü püyühürütüata. <sup>21</sup>Que mü'ane müyühürütüa tuqui 'amüpa xatatü, mücü xatatü püyühürütüa, que mü'ane tuquita mayeca xatatü püyühürütüata. <sup>22</sup>Que mü'ane muyuavi xatatü müyühürütüa Cacaüyari 'uvenieya xatatü püyühürütüa, que mü'ane hesiena macave xatatü püyühürütüata. <sup>23</sup>Xüa 'ui xeme 'inüaricü xemüte'üquita, xemeta Pareseusixi, que xe'itüarieni yacü xEICÜA xemüyüacü. Tamamata taparisie mieme, xe tapari xepüyuavüriya xemixatüanicü Cacaüyari, 'asita yerüvavüena texuxuri cuminu naime. Peru xepihayeva tita masi müreyevese 'inüari niuquiyarisie mieme, heiseriemecü yaxemüteyuriecacü, xemüteyucanenimayacacü, yaxemütecahunicü que

xemutiyuane. Müpaü püta püreyevese müpaü mütiyurienenicü, siepüre catihayevatü xe tapari 'ixatüatü. <sup>24</sup>Xe'acücüpetü xepüvarahapana hipame. Cari yu'isarisie xepenyecase xecüi xemücahexünicü, peru xepexü cameyu 'amünenana.

<sup>25</sup>Xüa 'ui xeme 'inüaricü xemüte'üquita, xemeta Pareseusixi, que xe'itüarieni yacü xEICÜA xemüyüacü. Que mü'ane herie xEICÜA müca'itüa tecüxi xacü, müpaü xepüyüa, peru yutaüta xepühüpüne xetenavacutü xeyutatuatü. <sup>26</sup>Cari Pareseu pehücütütü pepacüpe. Taütana meri quenivacu'itüexüa tecüxi, herieta 'itüyatü mayanicütari.

<sup>27</sup>Xüa 'ui xeme 'inüaricü xemüte'üquita, xemeta Pareseusixi, que xe'itüarieni yacü xEICÜA xemüyüacü. Müqui teucume meunaximapaü xecani'aneneni. Herie visi pütüyxexeiya, peru pühüne müquite va'umeyari naitü müca'itüyatüca. <sup>28</sup>Xemeta yaxEICÜA herie xEICÜA müme heiseriemecü yamemütecahu vahepaü xepüteyuxexeiya, teüteri que memütexexeiya, peru xepühüpüne yacü xEICÜA xeyüatü, yaxecatecacünicutü.

<sup>29</sup>Xüa 'ui xeme 'inüaricü xemüte'üquita, xemeta Pareseusixi, que xe'itüarieni yacü xEICÜA xemüyüacü. Texaxatamete vateucumete xepüvaveviri, müme heiseriemecü yamemütecahucai vateucumete visi xepüte'uquemarütüa. <sup>30</sup>Müpaü xepütüyuane, Tame xüari xüca

'ate'u'uvanique quepaucua  
ta'uquiyarima 'amemu'uvacai,  
tamesüari tepücavapareviecaqueyu  
mütayeurienicü texaxatamete  
vaxuriya. <sup>31</sup>Xemesietü  
xepüyuhecüata, müme  
texaxatamete memüvarucui que  
xemütevanivema. <sup>32</sup>Xe'uquiyarima  
que memüte'isutüa mecuxi  
xequenaye'atüaca vahepaü.

<sup>33</sup>Cari cuterixi  
xepühüme, terücaxi  
xepüva'ivama. Quepaütücacu  
xepüyutavicueisitüani  
xemücaheucaxüriyanicü  
xasi taiyariyarisie, 'isücame  
xeta'ivaviyayu. <sup>34</sup>'Ayumieme  
xehesüa nepüvarenü'avani  
texaxatamete, temaivavemete,  
'inüaricü te'üquitamete. Hipame  
müme xepüvacuini, curuxisie  
xepüvacavütüani, hipame  
müme xepüvativayani yutuquita,  
quiecarisie xepüvaranuyeveveyani  
xeime quiecarisie. <sup>35</sup>'Ayumieme  
xehesie pürähüiyani yunaime  
heiseriemecü yamemütecachu  
vaxuriyacü cuiepa mütayeurivecü,  
Haveri heiseriemecü  
yamüticamiecai xuriyayacü meri,  
'asita Sacariya Verequiyaxi nu'aya  
xuriyayacüque, xemimi tuquita  
caheta'avecacu, mürayutimavatüre  
heyeyacu. <sup>36</sup>Niuqui caniseiyeni  
que nemütixecühüave, 'icü naitü  
pürähüiyani hicü miemete teüteri  
vahesie.

**Quesusi yuhiverietü que mutayü  
Querusareme quiecatari vahepaüsita**

(Rucaxi 13:34-35)

<sup>37</sup>Querusareme 'acu,  
Querusareme, 'ahesüa quiecatari

mecanivatacucuyani texaxatamete,  
mecanivatituaxani Cacaüyari  
nü'arimama 'ahesüa memü'axe.  
Müixa nepünevaüriyacai  
nemüvacuxeürienicü 'atüriyama,  
vacana yunivema que  
mütivacuxexeüriva yu'anatüa.  
Mepücayuvaüri. <sup>38</sup>Camüsü  
xequi 'uyemavetü pücu'eiriva.  
<sup>39</sup>Müpaü nepütixetahüave,  
tavari xepücanesixeiya mexi  
tucari ca'aye'ave quepaucua  
müpaü xemutiyuaneni, 'Aixüa  
queticuniuvani que mü'ane  
Ti'aitamesüa miemetütü mamie  
hepaüsita.

**Quesusi que mutayü, tuqui 'amüpa  
que mütica'unarieniquecai 'arique**

(Maricuxi 13:1-2; Rucaxi 21:5-6)

**24** Mericüsü Quesusi tuqui  
'amüpata vayeayaca  
neyani. Hesüana miemete  
teyü'üquitüvamete 'aura menacüne  
me'lixesitüanique quite tuqui  
curaruyarita miemete. <sup>2</sup>Mücü  
müpaü tinivacühüaveni, Xete'ixeyia  
'icü naima. Niuqui caniseiyeni  
que nemütixecühüave, tete  
pücahayevarieni yuheima 'atetü.  
Naitü masi nica'unariemücü.

**'Inüari que mütimasiücüni  
taparirümecacu**

(Maricuxi 13:3-23; Rucaxi 21:7-24; 17:22-24)

<sup>3</sup>Hicü mana 'ayerücü  
Huriva Mati'u yemuriyarisie  
teyü'üquitüvamete 'auriena  
menacüne yühücüate mecutecacu.  
Müpaü metenitahüave,  
Quetatineutaxatüa quepaucua  
müpaü pütüyüni que pemainecai.  
Tita ti'inüariyaritüni quepaucua

pemunuani, quepaucua mütaparirümeni. <sup>4</sup>Hicü Quesusi müpaü tivacühüave, Xequenyucuerivayurieca capa xevitü tixe'u'irüviyacü. <sup>5</sup>Yümüiretü mepü'axüani müpaü me'utiyuatü quename nehesüa memiemete, Neri Cürisitu nepühücü, me'utiyuatü. Mepüteva'irüviya yumüireme. <sup>6</sup>Xepüva'enieni cuyaxi meyucuitüveme, cuya niuqui xepü'enieni. Yumarima xepücaxamurieca. Peuyevese müpaü mütiyünicü, peru 'acuxi naitü pücatapare mücücü. <sup>7</sup>Nuivarite mecaniyeha'acuni mevacuicutü hipame nuivarite. Xexuime cuieyarisie quiecatari mepüyeha'ani, hipame cuieyarisie miemete mevacuicutü. Naisarie vaüca cuiniya canitixuaverimücü, haca canitavemücü cuie canitayuamücü. <sup>8</sup>Icü naitü müpaü tiyüyu, mücücü cuiniya püsütüarieni xeicüa.

<sup>9</sup>'Anari mecanixeyetuacuni xemü'uximatüariecacü. Mepüxecuinisü, yunaitü nuivarite mepüxe'uxive'erieca nehesüa xemümiemetecü. <sup>10</sup>'Ana yumüiretü mepücunuitüarieni, mepüyuyetüani mepüyuye'uxive'erien.

<sup>11</sup>Yümüiretü texaxatamete mepanucu'uni mete'itavatü. Mepüteva'irüviya yumüireme. <sup>12</sup>Cuini mieme memücayuvaüriyacü yamemütecahunicü, 'ayumieme yumüiretü mepütivaüripiximeni que memüteyucanaqui'erie. <sup>13</sup>Que mü'ane tiuca'enivatü 'amuyeicani tapareyuque, mücü canitavיעisitüariemücü. <sup>14</sup>'Icü niuqui'aixüa

manuyüne que müti'ane 'Iya ti'aitametücacü manuyüne, mücü catinicuxaxasivamücü naisarie memeutitei teüteri, memühecüasitüiyarienicü yunaitü nuivarite. 'Anaque nitaparimücü.

<sup>15</sup>'Uxa'atüni xepixeiya mücü tevi müvaseviximani müracumaveriyani mana 'utiveme haque mevayepasie Cacaüyarisie mieme, Cacaüyari que mutayü Tanieri tixaxatame ya'utainecacu, titerüvame quetimaive tita mütixata. <sup>16</sup>'Anari müme Cureya cuieyarisie meme'uvani hürisiepai meque'uyuta'unaxüani. <sup>17</sup>Que mü'ane caretasie müyeca 'uxipietü, yapaucua que'anacayani. Ni yuquita pücaheutahani yupini tivayepinique, püyuta'una püta.

<sup>18</sup>Que mü'ane yeuta meyeicani yu'utüma pücanuani yü'üicari tivayehurienique. <sup>19</sup>Xüa 'ui müme memuhuca, müme memütesisitüiani mücü tucari 'aye'ayu. <sup>20</sup>Xequenyunenevieca muhäütüsie müca'aye'anicü xemüyuta'unaxüanicü, mesü 'uxipiya tucarisie ca'aye'anicü.

<sup>21</sup>'Ana cuini mieme 'uximatüarica canitixuaverimücü yamemücate'uximatüarievavepaü cuie munetüariepai hicüique, tavari que mücatitixuavere 'ariqueta.

<sup>22</sup>Mücü 'uximatüarica xüca 'esicareuteritüarienique, ni xevitü haquevasü pücatavicueniqueyu. Peru memanuyexeyarie vacü, 'uximatüarica 'esipüreuteritüarieni.

<sup>23</sup>'Anari xüca xevitü müpaü tixecühüaveni, Camü 'ena caniuyeicani Cürisitu, Camü mana, xüca haineni nusu, yuri

xepücate'erieca. <sup>24</sup>Mete'itavatü mepü'axüani Cürisitusixi meyuxatatü texaxatamete meyuxatatü. 'Inüari mepütivevieni mamarivaveme meteva'irüviyaque 'asita müme memanuyexeyarie xüca meyüvavenique. <sup>25</sup>Tamüsü müpaü catiyüvecacu cuxi, müpaü nepütixe'utahüavixü. <sup>26</sup>'Ayumieme xüca müpaü metexecühüaveni, Neuxei, macumavesie neyeicani, mana xepücaheuyeneicani. Xüca müpaü metexecühüaveni, Neuxei, quita peti'aviesie, yuri xepücate'erieca. <sup>27</sup>Merücarिया naisarie que mütimasiücü muyuavisie tahixüata 'umerücatü tasütüapai, müpaüta naisarie catinimasiücücämücü quepaucua munuani Yuri Tevi. <sup>28</sup>Canimasiücüni caxari sepa haque meca, mana meniyucuxeüriecuni virücüxi.

### Yuri Tevi que mütinuanani

(*Maricuxi 13:24-37; Rucaxi 21:25-33; 17:26-30, 34-36*)

<sup>29</sup>'Ana cuitü 'uximatüarica heunuayu, tau niyürimücü, meseri pücahecüarivieni, xuravesixi mepücaxürieni muyuavisie miemete, müme türücarिया memexeyia muyuavisie mepücuyütüarieni. <sup>30</sup>'Ana masiücütü canayeimücü Yuri Tevi 'inüarिया taheima. 'Ana yunaitü nuivarite cuiepa memütama meniyutihveriecuni, mecanixeyacuni Yuri Tevi muyuavisie mieme haisata 'acamiename, türücaüyetü cui xavatütü. <sup>31</sup>Cuxineta hüsiyacacu püvatanü'axüani yutupirisixima, müme mepüvacuxeürieni müme

müvaranuyexei, taserieta ta'utata tahixüata tasütüapai memü'uva, naisarie cuie manuniere muyuavitüa.

<sup>32</sup>Pinicü xequeteneyü'lüquitüaca. Quepaucua xavari mücavivieni xüca yürani, xüca mamateya cuneicani, müpaü xepütemaica tasiüari 'auracacutüca. <sup>33</sup>Xemeta yaxecüca quepaucua xemixeyia 'ipaü tiyüanecacu naitü, müpaü xequetenemaica quename hehura quitenie müta'aximenipaü. <sup>34</sup>Niuqui caniseüyeni que nemütixecühüave, Hicü miemete mepücacuini mexi ca'aye'ave 'icü naitü. <sup>35</sup>Muyuavi cuie pütixüni, peru neniucü pücaxüni.

<sup>36</sup>Tevi 'asipücatimate quepaucua maye'ani mücü tucari. Taheima miemete tupirisixita 'asimepücatemate, Cacaüyari Nu'aya 'asipücatimate, 'uquiyarिया xecüca pütimate.

<sup>37</sup>Que mütüiyü Nuhexi 'amuyeicacaisie, müpaüta catiniyümücü quepaucua Yuri Tevi munuani. <sup>38</sup>'Anapai memücatihavecai cuxi, mepütüecatüvecai mepü'ietüvecai mepüneneüquecai mepüvatavitütüvacai. 'Ariqueque tucari naye'ani quepaucua Nuhexi meutaha canuvacie. <sup>39</sup>'Asimepücatemaicai, 'ariqueque xecüca quepaucua ha mütitüa müvarehausitüa yunaime. Yaxecüca catiniyümücü quepaucua Yuri Tevi munuani. <sup>40</sup>'Anari yuhutatü xüca me'u'uvani vaxata, xevitü panutivitüquieni xevitü pücu'eiriva. <sup>41</sup>Yuhutatü xüca metüxüni yu'aurie, xevitü ranutivitüquieni xevitü ticu'eiriva.

<sup>42</sup>Ayumieme xequenayeneniereni 'asixemücatematecū que mü'ane tucarisie munuani xecusiyari. <sup>43</sup>Ipaüsiere xequetenemaica, quiecame xüca müpaü timaicaque que mü'ane hurayarisie munuaniquecai tinavayame, payeniereniqueyu püca'ipitüaniquyeu meutahanicū quitana. <sup>44</sup>Ayumieme xemeta xequenaha'arisieca. Quepaucua canuaximeme xemul'erieca, 'ana caninuamücü Yuri Tevi.

**Ti'uximayatame yamüticamie  
yamücatcamie**  
(Rucaxi 12:41-48)

<sup>45</sup>Qui cusiyari que mü'ane pühürütüani yuquita miemete te'uximayatamete vacü, mütivaminicü quepaucua memeiyehüva. Que mü'ane yamüticamie, que mü'ane müyumate, mücü canihürütüariemücü. <sup>46</sup>Aixüa pü'litüarieni 'iya ti'uximayatame xüca cusiyarieya nuame 'itaxeiya müpaü tiyurieneme. <sup>47</sup>Niuqui caniseüyeni que nemütixecühüave, pütihürütüani yupini hepaüsita naime. <sup>48</sup>Me xüca 'iya ti'uximayatame 'axa tiuca'iyaritä müpaü tiyücühüaveni yu'iyarisie, Necusiyari 'epüreutevi canuavetü, <sup>49</sup>xüca varutivatüyani yuhepaü te'uximayatamete, xüca ticucuaneni xüca cu'ieneni tarüvecarixi vahamatü, <sup>50</sup>mücü ti'uximayatame cusiyarieya caninuamücü quepaucua müca'icuevie yapaucua quepaucua 'asimücatimate ti'uximayatame. <sup>51</sup>Hixüata piviteni mücü, müme yacü xEICÜA memüyüa

vahepaü pütüpütüani. Manari putasuacani püyutaqueveni.

**Tamamata 'üimarixi va'üxasi  
hepaüsita ticuxatatü, que  
müti'üquitacai**

**25** Mericüsü 'ana 'ipaü catini'anemücü ti'aitameticacu que mü'ane taheima macave. Neüquiyapa, neneüqueme mücueviyasie 'üimarixi tamamata yücüxeme me'a'ütü menecüne me'inaqueque. <sup>2</sup>Yu'auxüvitü müme 'asimepücatemaicai, yu'auxüvitü mepütemaivavecai. <sup>3</sup>Müme 'asimemücatemaicai yücüxeme me'a'ütü haseitiyari mepücaheyeha. <sup>4</sup>Memütemaivavecai haseiti mepahapacai puteyasie yemaneme yücüxeme me'a'ütü. <sup>5</sup>Yunaitü mepeucusicucacai neneüqueme 'ereutevicacu, meneucusu. <sup>6</sup>Tücarixi hixüapa xevitü niutahiva, Neuxei neneüqueme mana pamie, xequenenaquiyu, 'utaitü. <sup>7</sup>Hicü 'üimarixi yunaitü menencu'uni, menicuha'arütüani yücüxeme. <sup>8</sup>Müme 'asimemücatemaicai müpaü metenivarutahüave memütemaivavecai, 'Esiva xequetaneumicua yuhaseiti, tame tacüxeme mütüxüaximecü. <sup>9</sup>Memütemaivavecai müpaü metenivaruta'eiya, Tietüsü catinaquimücü tahesie mieme xehesie miemeta. Mecuxi xequenehu tetuayamete vahesüa, xequenenanai yuhesie mieme. <sup>10</sup>Hicü mexi meheinanetüvecai neneüqueme caninuani. Müme memucuha'arisie 'utümana meneutahaxüani 'ixüararipa. Quitenie neucunare. <sup>11</sup>Arique

mücaque memeicunanani  
mecaniu'axüani 'üimarixi müpäü  
me'utiyuatü, Ti'aitame 'acu,  
Ti'aitame, quetatineuyepiri. <sup>12</sup>Mücü  
müpäü tivacühüave, Yuricü  
nepücaxemate.

<sup>13</sup>Ayumieme nepaine,  
xemeta xequenayeneniereni  
'asixemücatematecü que mü'ane  
tucarisie que mü'ane hurayarisie  
munuani.

**Vaücava tumini 'üxasieya hepaüsita  
ticuxatatü, que müti'üquitacai**

<sup>14</sup>Mücü meta, 'ipaü  
catini'anemücü, tevi teva  
müyemiecai que mütiuyuri.  
Yu'aurie nivarutahüave yuhesüa  
miemete te'uximayatamete. Yupini  
tinivayeturieni.

<sup>15</sup>Xeime niu'üitüani 'auxüme  
quirivayari tumini, xeimeta huta  
quirivayari tiu'üitüa, xeimeta  
xei quirivayari tumini. Que  
memüteyüvavecai yuxexuitü,  
yapaümeme mepu'üitüarie. Hicü  
neyani. <sup>16</sup>Que mü'ane 'auxüme  
quirivayari mu'üitüarie tumini,  
cuitü neyani, mücücü tinituacaitüni.  
Tavari 'auxüme quirivayari  
pana'ivaxü tumini. <sup>17</sup>Yaxeicüa  
'iya hutame mu'üitüarie tavari  
hutame rana'ivaxü. <sup>18</sup>Peru 'iya  
xei quirivayari mu'üitüarie mana  
vayeyaca cuieta nivati'inieni  
titi'avietaxü yucusiyari tuminieya.

<sup>19</sup>Mericusü te'uximayatamete  
vacusiyari 'epüreuterixü,  
'ariqueque caninuani. Cuenita  
nivaruvevirieni. <sup>20</sup>Que mü'ane  
'auxüme quirivayari mu'üitüarie  
nuaca, ni'atüirieni tamamata  
quirivayari müpäü 'utaitü, Cusiyari

'ecü tumini 'auxüme quirivayari  
pepünesi'uyetuiri. Neuxei, mücücü  
tavari 'auxüme quirivayari  
nepana'ivaxü. <sup>21</sup>Cusiyarieya  
müpäü tinitahüave, 'Aixüa puyü,  
ti'uximayatame pecanihücütüni  
'aixüa pemütiuca'iyari  
yapemüticamie. 'Esivacütütü  
yapepüticamiecai, hicü vaüca  
nepümatihürütüani. 'Acusiyaripaü  
pe'atemavietü peque'ayani. <sup>22</sup>Hicü  
'iya huta quirivayari mu'üitüarie  
nuaca müpäü niutayüni, Cusiyari  
'ecü tumini huta quirivayari  
pepünesi'uyetuiri. Neuxei  
mücücü tavari huta quirivayari  
nepana'ivaxü. <sup>23</sup>Cusiyarieya  
müpäü tinitahüave, 'Aixüa  
puyü, ti'uximayatame 'aixüa  
pemütiuca'iyari yapemüticamie  
pecanihücütüni. 'Esivacütütü  
yapepüticamiecai, hicü vaüca  
nepümatihürütüani. 'Acusiyaripaü  
pe'atemavietü peque'ayani.  
<sup>24</sup>Hicü 'iya xei quirivayari  
mutanaqui'erie müpäü niutayüni,  
Cusiyari nepümasimate 'ecü  
pema'a'eriyacü. Pepuca'isana haque  
pemücaheca'e, pepicuxexeüriva  
haque pemücaheicaxüri. <sup>25</sup>Neri  
nematü neneyani netiti'avietaxü  
'atumini cuieta. Camü 'apini.  
<sup>26</sup>Hicü cusiyarieya müpäü  
tinitahüave, Cari ti'uximayatame  
'axa pemütiuca'iyari pemü'a'üraxi  
pecanihücütüni. 'Ecüsietü  
pepünesimate que nemütiuca'isana  
haque nemücaheca'e, que  
nemüticuxexeüriva haque  
nemücaheicaxüri. <sup>27</sup>Ayumieme  
puyevecai 'ecü siqueresü  
netumini pemüyetuanicü tumini  
hüvemete vahesüa, ne nenuame

nepini nemütitanaqui'erienicü  
yapaümeme 'ana'ivayu. <sup>28</sup>Tamüsü  
xequenenavairi 'iya tuminieya,  
xequene'üitüa 'iya tamamata  
quirivayari mexeiya. <sup>29</sup>Que mü'ane  
tixaütü mürexeiya tavari cuxi  
pütimiquieni, manayuhayevanicü.  
Que mü'ane tixaü mücarexeiya,  
sepa que mütitita mürexeiya,  
pütinavaiyarieni. <sup>30</sup>Iya  
ti'uximayatame 'asimücatiuyuri  
xequenanuyehüva tacua yüvipa.  
Mana putasuacani pütüyutaqueveni.

**'Isücame que mütivata'ivaviya  
nuivarite**

<sup>31</sup>Mericsü quepaucua  
munuani Yuri Tevi marivetü,  
yunaitü tupirisiximama  
me'iteütacacu Cacaüyarisie  
mieme memüpasie, 'ana marivetü  
payerüni yu'uvenisie. <sup>32</sup>Yunaitü  
nuivarite menicuxeüriyacuni  
hüxiena. Nivapatamücü, muxasi  
vahüveme que mütivapata  
muxasi sipuri. <sup>33</sup>Muxasi  
nivati'uitüamücü yuserieta sipuri  
yu'utata. <sup>34</sup>'Ana Ti'aitame müpäü  
pütivatahüave müme serietana  
memüti'uni, Xequenaye'axüari  
xeme. Ne'uquiyari 'aixüa paine  
xehepaüsita. Xeheixeyatü  
xequenacüni tixe'aitüvemetüme,  
xehesie mieme que mütiucuha'arisie  
quepaucua cuie munetüarie.  
<sup>35</sup>Ne neheuhacamüccacu  
xepünete'umi, neheuharimüccacu  
xepünesi'uharitüa,  
necuyeicametüme  
xepünesi'utanaqui'eri,  
<sup>36</sup>nemavecacu  
xepünesi'uquemaritüa, neticuyecacu  
xepünesi'üviyacai, ne'anutahüiyacu

nehesüa xepü'axecai. <sup>37</sup>'Anari  
müme heiseriemecü yamemütecahu  
müpäü metenitahüavicuni,  
Ti'aitame quepaucua  
tepümasi'uxei peheuhacamüccime  
temate'umi, peheuharimüccime  
tepümasi'uharitüa. <sup>38</sup>Quepaucuasü  
tepümasi'uxei pecuyeicame  
temasi'utanaqui'eri, pemaveme  
temate'utiquemaritüa. <sup>39</sup>Quepaucua  
tepümasi'uxei peticuyeme  
pe'anutahüiyacu 'ahesüa  
tete'axecai. <sup>40</sup>Hicü Ti'aitame  
müpäü tinivatahüavimücü,  
Niuqui caniseüyeni que  
nemütixecühüave, müpäü que  
xemüvaruyurie 'ime ne'ivama sepa  
memü'imatüremetetücai, müpäü  
xepünesi'uyuri ne.

<sup>41</sup>Hicü müpäü pütivacühüavenita  
müme 'utatana memüti'uni,  
Nehesüa xequeneutayeixüa  
xeme 'axa xemütēcühüavarüva.  
Tai yuheyemecü müta'asie  
Cauyumarisiesie mieme  
tupirisiximama vahesie mieme  
mucuha'arisiesie xequenehu. <sup>42</sup>Neri  
neheuhacamüccacu xepücanete'umi.  
Neheuharimüccacu  
xepücanesi'uharitüa.  
<sup>43</sup>Necuyeicametüme  
xepücanesi'utanaqui'erie,  
nemavecacu  
xepücanesi'utiquemaritüa,  
neticuyecacu ne'anutahüiyacu  
xepücanesi'üviyacai. <sup>44</sup>'Anari  
müme müpäü metenitahüavicuni,  
Ti'aitame quepaucua  
tepümasi'uxei peheuhacamüccime  
peheuharimüccime pecuyeicame  
pemaveme peticuyeme  
pe'anutahüiyacu, temücatavaüriyacai  
temasiparevienicü. <sup>45</sup>Hicü



müpaü tinivatahüavimicü,  
Niuqui caniseüyeni que  
nemütixecühüave, müpaü que  
xemücaruyuri 'ime ne'ivama sepa  
memül'imatüremeteticai, müpaü  
xepücanesi'uyuri ne. <sup>46</sup>Mümesü  
mecaniyehuni yuheyemecü  
memül'uximatüariecacü, müme  
heiseriemecü yamemütecahu tucari  
mücaxüve memexeyacü püta  
mecaniyehuni.

### Que memüte'imieniquecai Quesusi

(*Maricuxi 14:1-2; Rucaxi  
22:1-2; Vani 11:45-53*)

**26** Mericüsü Quesusi 'inüca  
'icü niuqui naime, müpaü  
tinivarutahüave yuhesüa miemete  
teyü'üquitüvamete, <sup>2</sup>Xeme müpaü  
xepütemate, huta tucari 'anucayayu,  
Pasicua 'ixüarari canatinemicü  
quepaucua teme'eriva, Cacaüyari  
que mütivaruhayevaxü tateüterima.  
'Ana Yuri Tevi nehücütütü  
neniyetuiyamücü curuxisie  
nemümierienicü.

<sup>3</sup>Hicü 'ana mara'acate  
memühürütüariecäi  
teüteri va'uquiyarima  
meniuyucuxeürieni mara'acame  
mühürütüariecäisüa Caipasi  
mütitevacäisüa. <sup>4</sup>Meniuyu'enieni,  
me'icüamaname memiviyacü  
Quesusi, memimienicü. <sup>5</sup>Müpaü  
menutiuyanecaitüni, 'Ixüaramete  
vahüxie xEICÜA tepüca'iviya, teüteri  
me'uyuxamurienicü.

### Visi mu'üa que mütiucaviriyari Quesusisie

(*Maricuxi 14:3-9; Vani 12:1-8*)

<sup>6</sup>Mericüsü Quesusi mana  
niucateitüni Vetaniyasie Simunisüa

cuiniyacü meripai müca'itiyacäisüa.

<sup>7</sup>Hicü 'uca mana ninuani tete  
puteyayari visi mü'ane 'ahanatü  
visi mu'üa 'aye'üneme cuini  
mieme müraye'axe. Neitituani  
Quesusi mu'uyasie ticuacacu.

<sup>8</sup>Hicü teyü'üquitüvamete  
me'ixeyatü meniuyeha'ani müpaü  
me'utiuyatü, Titayaricutaxi yacü  
xeicüa reiyehüa. <sup>9</sup>Püyüveniqueyu  
vaücavamecü mütuiyacacü,  
tuminiyari memümüquienicü  
memümamave. <sup>10</sup>Quesusi müpaü  
retimaica, müpaü tinivarutahüave,  
Titayari xete'l'uximatüa 'uca.

'Aixüa tiniuyurieni nehésie  
mieme. <sup>11</sup>Uxa'atüni varie  
'amecaniu'uvacuni memümamave  
xehesüa, nesiere xehesüa  
'anepüca'uyeicani 'uxa'atüni  
varie. <sup>12</sup>Ipaü que müreititua visi  
mu'üa nehésie, nesicuha'aritätü  
nemücateuquienicü müpaü  
pütuiyuri. <sup>13</sup>Niuqui caniseüyeni  
que nemütixecühüave, sepanetü  
haque 'icü niuqui 'aixüa manuyüne  
hepaüsita mecuxaxasivani naisarie  
cuiepa, que mütuiyuri 'icü 'uca  
canitaxasiemücü ma'erivanicü.

### Cura que mütiuyuvaüri miyetuanicü Quesusi

(*Maricuxi 14:10-11; Rucaxi 22:3-6*)

<sup>14</sup>Mericüsü Cura Tamamata  
Heimana Yuhutame müxevitütüca  
'Isicariutitanaca mütitevacäi  
mana neyani mara'acate  
memühürütüariecäi vahesüa.

<sup>15</sup>Müpaü tinivarutahüave, Tita  
xenete'üitüani nemüxeyetuirienicü.  
Müme yuhamatüa me'uyu'enieca  
xei teviyari heimana tamamata  
meni'üitüani pürata tuminiyari.

**16** 'Ana nisutüani ticuvaunetü quepaucua 'aixüa müyüniqeyu müvayetuirienicü.

**Ti'aitame 'Icuaiya que mütiu'aisie  
'inüariyari**

(*Maricuxi 14:12-25; Rucaxi 22:7-23; Vani 13:21-30; 1 Curinitutari 11:23-26*)

**17** Mericüsü 'anatücacu Pa Mücacuxanariyari tucariyari, teyü'üquitüvamete Qesusi 'aurie meniuyucuxeürieni müpäü me'utiuyatü, Haque masihenaque 'aixüa temeiyurienicü, 'ecü 'ixüarari 'icuaiyari pemürecuanicü.

**18** Müpäü tivacühüave, Xeimesüa xequenehu quiecarisie. Müpäü xequetenetahüavi, Ti'üquitame müpäü paine, Netucari caneutihuraniri. 'Aqüta Pasicua 'ixüarari nepütavevieniqueyu nehesüa miemete teyü'üquitüvamete vahamatü. **19** Hicü Qesusi que mütivaruta'aitüa yamepüte'uyurie. 'Aixüa mepiyuri Pasicua 'ixüarari 'icuaiyari, para meme'erivanicü Cacaüyari que mütivaruhayevaxü vateüterima.

**20** Hicü 'ucutaicarecu mexa 'aurie nayerüni Tamamata Heimana Yuhutame vahamatü.

**21** Metecuacacu müpäü niutayüni, Niuqui caniseüyeni que nemütixecühüave, xevitü xeme pünesiyetüani. **22** Cuini mieme meyhiverietü yuxexuitü müpäü metenitihüavetücüne, Ne netihücü Ti'aitame. **23** 'Iya müpäü tinivarutahüave, Xevitü canihücütüni nehamatü pa manati'üve xacüsie, 'iya caneniyetüamücü. **24** Yuri Tevi

que nemütiteva necaniyemieni nemümierienicü que müre'uxa nehepaüsita, peru xüa 'ui 'iya tevi que mü'ane münesiyetüani Yuri Tevi nehücütüme. Masi 'aixüa pü'aneniqueyu xüca ca'utinuivaque 'iya tevi. **25** Hicü miyetuaniquecai Curatütü müpäü niutayüni, Ti'üquitame netihücü ne. Rehüave, 'Ecüsü müpäü pecaniutaineni.

**26** Hicü metecuacacu Qesusi pa nanucu'üni. 'Aixüa 'utayüca Cacaüyari hepaüsita pa hepaüsita, nititara tivarumi teyü'üquitüvamete. Müpäü niutayüni, Xequenanu'üi xequeneuticua'i. 'Icü caninevaiyaritüni. **27** Hicü 'enucuhana ca tecüxi, pamüpariyusi 'ipitüaca Cacaüyari, nivaru'itüani müpäü 'utaitü, Yunaitü xequenanut'iexüa 'icü. **28** 'Icü caninexuriyatüni, türatu müheca caniseiriyamücü. Yümüireme vahesie mieme nitayeuriemücü memüteheuyehüviyarienicü 'axa memüte'uyuricü. **29** Müpäü nepütixecühüave, tavaru havaicü nepüca'enu'ieni 'icü caxie hayari, mexi tucari ca'aye'ave quepaucua hecuamecü nemenu'ieni xehamatü haque ne'uquiyari müre'aita.

**Qesusi que mutayü, Pecuru que  
mütüyucu'imavaniquecai, quename  
ca'imaicai 'utaitü**

(*Maricuxi 14:26-31; Rucaxi 22:31-34; Vani 13:36-38*)

**30** Hicü cuicari Cacaüyari hepaüsita me'uticuicaca menecüne Huriva Mati'u. **31** Hicü Qesusi müpäü tinivarutahüave, Xeme yunaitü xepücunuitüarieni 'icü tücarisie necümana.

Müpaü püre'uxa, Nepimieni muxasi vahüveme, muxasi müva'üviyacai menitaxüriexüacuni. <sup>32</sup>Nemierieme ne'anucuqueme nenixe'anucuhaitüiyamüci Carereyasiepaitü. <sup>33</sup>Hicü Pecuru müpaü tinitahüave, Sepanetü yunaitü memucunuitüarie 'acümana, ne hasuacu nepücacunuani. <sup>34</sup>Qesusi rehüave, Niuqui caniseüyeni que nematicühüave, 'icü tücarisie vacana 'uquiri catahivavecacu cuxi, 'ecü haicacüa pepü'acu'imavani, quename pecanesimate pe'utaitü. <sup>35</sup>Pecuru rehüave, Sepanetü meuyevese 'ahamatü nemumierieni, nepücanecu'imavani quename necamasimate ne'utaitü. Yunaitü teyü'üquitüvamete yaxecüa meniutiyanecaitüni.

**Qesusi que mütiyutanenevie  
Quetisemanisie**

*(Maricuxi 14:32-42; Rucaxi 22:39-46)*

<sup>36</sup>Merücüsü Qesusi Quetisemani mütiyetevasie neta'ani vahamatü. Müpaü tinivarutahüave teyü'üquitüvamete, 'Uva xequenateni, ne mexicuxi 'uma nepünenenevimie. <sup>37</sup>Hicü Pecurumame Severeu nivemama yuhutame nivarevitüni manapai, nisütüani yuhiverietü yu'iyaritüatü. <sup>38</sup>Hicü müpaü tinivarutahüave, Ne'iyarisie cuini mieme neninehieverieca, mücücü nenimüximeni. 'Uva xequeneyuhayeva xequenataneniereni nehamatü. <sup>39</sup>Esiva 'uma 'uyaca niutihüximaqueni. Niyutanenevieni müpaü 'utaitü, Ne'uquiyari xüca

tüma yüvenique müca'aye'anicü, 'icü hivericacü nemüca'itüarienenicü cuerietü. Mesü que münetinaque ne pücatixaü, que matinaque 'ecü püta yaneque'itüarieni. <sup>40</sup>Teyü'üquitüvamete memanatecaisie nuaca, nivaretaxeiya mecusume. Müpaü tinitahüave Pecuru, 'E'e xecateyüvavecai siqueresü xei hurayari xemütanenierenicü nehamatü. <sup>41</sup>Xequenataneniereni, xequeneyunenevieca capa 'axa xete'uyurienenicü xe'uta'inüasieme. Xe'iyari caniyuvairiyani, xevaiyari masi puverani.

<sup>42</sup>Hicü hutarieca heyaca niyutanenevieni müpaü 'utaitü, Ne'uquiyari, xüca cayüveni 'icü manuyeyanicü, xüca heuyeveca yanemü'itüarienenicü, que mümatinaque yaquetiuyüni. <sup>43</sup>Nuaca tavari nivaretaxeiya mecusume, memücusimarietücateicü. <sup>44</sup>Varucu'eirieca tavari heyaca hairieca tiyutanenevi yaxecüia 'utaitü. <sup>45</sup>Hicü teyü'üquitüvamete memanatecaisie nuaca müpaü tinivarutahüave, Xetecusu cuxi xete'uxipie. Camü, canaye'aximeniri, Yuri Tevi que nemütihücü, nemüyetuiyanicü 'axa teyuruvamete vahesüa. <sup>46</sup>Xequenanucu'uti tepüvanaquiyu. Que mü'ane münesiyetuani 'acanamieni.

**Qesusi que mütiuviyarie**

*(Maricuxi 14:43-50; Rucaxi 22:47-53; Vani 18:2-11)*

<sup>47</sup>Merücüsü 'utaniucacacu cuxi Cura mana caninuani Tamamata

Heimana Yuhutame müxevitütücai. Yuvaücavame teüteri yuhamame nivaravitücücaitüni 'ixiparate cüyexi mete'u'ücame, mara'acate memühürütüariecai teüteri va'uquiyarima mevareyenü'acu.

<sup>48</sup>Iya miyetuaniquecai 'inüari püvarupitüa mevayecünirümecacu, müpaü 'utaitü, Que mü'ane nemütavaürütüani ne'l'isetü, mücü canihücütüni. Xequeneuviya.

<sup>49</sup>Hicü Quesusisüa nuaca müpaü niutayüni, Que 'acu Ti'üquitame. Ni'iseni. <sup>50</sup>Hicü Quesusi müpaü tinitahüave, Nehamicu, titacü pemütinua, yaquetineuyuri. Hicü 'auriena me'uyucuxeürieca, Quesusi meniuvia.

<sup>51</sup>Müme Qesusimatü memü'uvacai xevitü nivatihana yu'ixipara. 'Ivaca ti'uximayatame mara'acame mühürütüariecaisüa mieme, nacaya naviteni. <sup>52</sup>Hicü Quesusi müpaü tinitahüave, Painatana queneuca'uta 'a'ixipara. Yunaitü 'ixiparasie memüteviya, 'ixiparacü mepüca'unarieni.

<sup>53</sup>Müpaü pecaticu'eriva nemüyüvecü nemitavavirienicü ne'uquiyari, mücü cuitü müvaranü'anicü yutupirisixima tamamata heimana huta vaxayari meyupaümeme. <sup>54</sup>Peru xüca müpaü netiyurienique, quepaü raye'aniqueyu 'utüarica meuyevese 'ipaü mütiyüni manuyüne. <sup>55</sup>Hicü 'ana Quesusi müpaü tinivarutahüave teüteri, Cari xepeyecü 'ixiparate cüyexi xe'u'ütü xenesiviyaque, que mütiviviyarüva tinavayame. Müixa tuquita nenayecateitüni tucaricü neti'üquitatü. 'Ana xepücanesihevi.

<sup>56</sup>Perusü 'ipaü naitü pütüiyü,

maye'anicü texaxatamete que memutiyua 'utüarica xapayarisie. Hicü teyü'üquitüvamete yunaitü me'icu'eirieca meniuyuta'unaxüani.

**Quesusi que mütiutahüavarie  
'isücate vahüxie**

(*Maricuxi 14:53-65; Rucaxi 22:54-55,  
63-71; Vani 18:12-14, 19-24*)

<sup>57</sup>Müme memiviya Qesusi mecani'atüirieni Caipasi. Mücü mara'acame mühürütüariecai canihücütücaitüni. Hesüana müme 'inüaricü memüte'üquitametetücai meniuyucuxeürieni 'uquiravesixi vahamatü. <sup>58</sup>Pecuru niveiyacaitüni yateva mara'acame mühürütüariecai quitanapaitü. Mana heutahaca tupirisixi va'aurie nayerüni niereque que mü'itüariereniquecai.

<sup>59</sup>Hicü mara'acate memühürütüariecai vahamatü yunaitü 'isücate 'axeicüa menivavautüvecaitüni memunenierixü, Qesusi memütaxanetacü, vaniuquicü mümierienicü. <sup>60</sup>Mepüyutexiecai sepa yumüiretü mete'itavatü memü'axüa metehcüatatu que memüte'unenierixü. 'Imatüriea yuhutatü me'anucu'uca, <sup>61</sup>müpaü meniutiyuani, 'Icü müpaü painecai, Ne necaniyüveni nemica'unacü Cacaüyari tuquieya, tavari hairieca tucari nerenuquitüani. <sup>62</sup>Hicü mara'acame mühürütüariecai 'anucuqueca müpaü tinitahüave, Tixaü pecatitaniuni 'ahepaüsita, 'ipaü que memümatexaneta 'ime. <sup>63</sup>Quesusi 'asipücahainecai. Hicü mara'acame mühürütüariecai müpaü tinitahüave, Nepümasihürütüa Cacaüyari mayeyuri masi'eniecacu

yapemütaticühüavenicü xüca cürisitu pehücütüni Cacaüyari nu'aya. <sup>64</sup>Quesusi cayucu'imavatü müpaü ticühüave, 'Ecü müpaü pecaniutaineneni. Mücü meta, müpaü nepütixecühüave, Yemecü xecanenixeiyacuni Yuri Tevi que nemütihücü, mana ne'acaima Que Mü'ane Mütürücaüye serieta, haisata ne'acaimecame taheima. <sup>65</sup>Hicü mara'acame mühürütüariecai yu'ixuriqui niutasana müpaü 'utaitü, Cari pisevixima Cacaüyari 'axa 'utaitü. Que cuxi tetevareuyehüva memunenierixü. Xemetütü hicüri xepi'eni que mütisevixima Cacaüyari 'axa 'utaitü. <sup>66</sup>Que xetecu'eriva. Müme müpaü metenicühüaveni, Peuyevese mümierienicü. <sup>67</sup>Hicü mericü meniti'aüsicamatüüne hüxitana, menitihusutüüne. Hipatü 'auritapana meneitivani <sup>68</sup>müpaü me'utiyaütü, Cari pepütixaxatame. Mericüte Cürisitu, quetaneutaxatüa que mü'ane pümasiheutiva.

**Pecuru que mütiyucu'imavacai, quename Quesusi camaicai 'utaitü**

(*Maricuxi 14:66-72; Rucaxi 22:56-62; Vani 18:15-18, 25-27*)

<sup>69</sup>Merücüsü Pecuru tacua niucateitüni. Ti'uximayatame hesüana nuaca 'üimaritütü müpaü tinitahüave, 'E'e, 'ecütari Qesusimatü pepuyeicacai Carereya quiecamematü. <sup>70</sup>Iya niyucu'imavacaitüni yunaima vahüxie müpaü 'utaitü, 'Asinepücatimate tita pemütixata. <sup>71</sup>Mana heyacu quitenie xevitü nixeiya 'uca. Müpaü tinivarutahüave müme

mana memütü'ucai, 'Icüri Quesusi Nasaretitanacamatü puyeicacai. <sup>72</sup>Tavari niyuta'imani yühürütüatü müpaü 'utaitü, Cacaüyari nesi'eniecacu nepaine, nepüca'imate mücü tevi. <sup>73</sup>Yareutevicacu vana memütü'ucai me'u'axüaca müpaü metenitahüave Pecuru, Yuricü 'ecü xevitü pecanihücütüni müme. 'Aniuquicü pepümasiicü que pemütüniuca. <sup>74</sup>Hicü 'axa tiniutiniütüyani, müpaü 'utaitü, Cacaüyari xüca 'axa nesiyurienique tüma xüca neti'itavani, yemecü nepaine, nepüca'imate mücü tevi. Yapaucua niutahiva vacana. <sup>75</sup>Pecuru ne'erivacaitüni Quesusi niuquieya que mütitahüavixü, Vacana catahivavecacu cuxi, 'ecü haicacüa pepü'acu'imavani quename pecanesimate pe'utaitü. 'Anuyeyaca niutasuani cui yuhiverietü.

**Quesusi que mütiutahüavarie Piratu hüxie**

(*Maricuxi 15:1; Rucaxi 23:1-2; Vani 18:28-32*)

**27** Merücüsü ximeri yunaitü mara'acate memühürütüariecai teüteri va'uquiyarima vahamatü meniuyucuxeürieni meyu'enienique Quesusi hepaüsita, memimienicü. <sup>2</sup>Meneihana hüacame, Piratu meniyetuirieni cuvexunaruri.

**Cura que mütiumü**

<sup>3</sup>Merücüsü Cura miyetua tiutamarieca quename 'isicate mete'uta'aitaxü mümierienicü, yücü tiniyücühüavecaitüni. Vatumini nivarecu'ütüiani mara'acate

memühürütüariecai 'uquiravesixi, xei teviyari heimana tamamata pürata tuminiyari, <sup>4</sup>müpaü 'utaitü, 'Axa nepütüuyuri nemiyetuacü tevi hesiena mücarahüiya, xuriyaya mütayeurienicü. Müme müpaü metenicühüavecaitüni, Sepasü tame, 'ecü püta pepü'acuerivayurieca. <sup>5</sup>Tuqita heicaxürieca tumini nivayeyani. Heyaca niuyucavieni.

<sup>6</sup>Mara'acate memühürütüariecai meheiti'üca tumini müpaü meniutiyuanecaitüni, Pücatauniva temeicaxürienicü tuqui tuminiyari meucavesie, muyetuyiacü tevi xuriyaya mütayeurienicü. <sup>7</sup>Me'uyu'enieca cuie mecaniunaneni mücü tuminicü xari vevivame cuieya, mana heu'uvacate teva miemete vateuquiyapa mayanicü. <sup>8</sup>'Ayumieme mücü cuie Xuriya Mataxüri catiniuyetevaca hicüque. <sup>9</sup>'Anari naye'ani tita Cacaüyari mütiutayü Queremiyaxi müpaü 'utainecacu tixaxatametütü, Menei'üni xei teviyari heimana tamamata pürata tuminiyari, que müraye'arücai 'iya, 'Ixaherisixi teüteriyari müpaü mete'eye'atüacu, <sup>10</sup>mepi'üitüa xari vevivame meminanairienicü cuie, Ti'aitame que münetiü'aitüa.

**Piratu Quesusi que mütiuta'ivaviyaxü**

*(Maricuxi 15:2-5; Rucaxi 23:3-5; Vani 18:33-38)*

<sup>11</sup>Merücüsü Quesusi niutaquerieni cuvexunaruri hüxie. Mücü müpaü tinita'ivaviya, 'Ecü Huriyusixi teüteriyari tiva'aitüvame petihücü 'ecü. Quesusi cayucu'imavatü rehüave, 'Ecüsü müpaü

pecaniutaineni. <sup>12</sup>Mara'acate memühürütüariecai 'uquiravesixi me'ixanetacacu 'asipücatiuta'a. <sup>13</sup>Hicü Piratu müpaü tinitahüave, Pecativa'enie que müreupaüme memaitüca 'ahepaüsita memunenierixü. <sup>14</sup>'Iya havaicü püca'ita'ei. 'Ayumieme cui ni'iyarixiecaitüni cuvexunaruri.

**Cuvexunaruri que mütiuta'aitaxü.**

**Quesusi mümierienicü**

*(Maricuxi 15:6-20; Rucaxi 23:13-25; Vani 18:38-19.16)*

<sup>15</sup>Merücüsü xexuime 'ixüarapa cuvexunaruri niyuvaüriyacaitüni memanutaxürivacai xevitü müxünarienicü teüteri vahesie mieme, que mü'ane müvanaquecai. <sup>16</sup>'Ana 'anutahüiyacame mecanexeyiacaitüni mümarivacai Vaxavaxi mütittevacai. <sup>17</sup>Me'uyucuxeüriecu Piratu müpaü tinivarutahüave, Que mü'ane püxenaque nemüxexünirieni, Vaxavaxiri, mesü Quesusiri Cürisitu müterüvarüva. <sup>18</sup>Müpaü pütimaicai, me'ütesatü memiyetuacü.

<sup>19</sup>Hicü Piratu mana 'acaicu 'isücame 'uvenieyasie, 'üyaya niuqui neinü'airieni müpaü 'utaitü, Queneuhayeva mücü tevi heiseriemecü yamüticamie. Cümana vaüca nepütücuinixü neheinüsita hicü yüvicüta.

<sup>20</sup>Merücüsü mara'acate memühürütüariecai 'uquiravesixita menivarutahüave teüteri memitavavirienicü Vaxavaxi, memüteta'aitacü Quesusi mümierienicü. <sup>21</sup>Hicü müpaü tinivarutahüave cuvexunaruri, 'Ime yuhutame que mü'ane püxenaque

nemüxexünirienicü. Müme müpaü mepaitücatei, Vaxavaxi queneuxüna. <sup>22</sup>Piratu tivacühüave, Mericüte, queri ne'iyurieni Quesusi 'icü Cürisitu müterüvarüva. Yunaitü mete'icühüave, Curuxisie que'umierieni. <sup>23</sup>Iya tivarahüave, Titayaricuta, queri tiuyuri 'axa tiuyuri. Müme cuini mieme meniutihivatücüne müpaü me'utiyuatü, Curuxisie que'umierieniricü.

<sup>24</sup>Piratu tiuxeiyaca que mütiyutexienecai, masi cuini mieme que memüteyuxamurietüvecai, ha niuta'aita, niucamaimani teüteri vahüxie müpaü 'utaitü, Ne nepü'itiya, nehesie pücarahüivani 'icü xuriyayacü, xeme püta xehesie pürähüiyani. <sup>25</sup>Yunaitü teüteri müpaü metenitahüave, Xuriyayacü tahesie querahüivani, tatüriyama vahesieta. <sup>26</sup>Hicü nivaruxünirieni Vaxavaxi. Tiuta'aitaca Quesusi mücuveyaxüanicü, niyetuani curuxisie mümierienicü.

<sup>27</sup>Mericiüsü cuvexunarurisüa miemete cuyaxi parasiyusie meheivitüca Quesusi cuyaxi vaquita, menivaruta'inieni cuyaxi mana memayetecai yunaime. <sup>28</sup>Me'itiquemaripieca, cuya 'ücarieya mütaüräiye menenacuvirieni. <sup>29</sup>Xuya mumayari me'utasaca mu'uyasie menenutimanirieni, haca 'isüyari menicueitüani serietana. Hüxiena metitunuma'utü meninanimacaitüni müpaü me'utiyuatü, Que 'acu Huriyusixi tiva'aitüvame. <sup>30</sup>Me'i'aüsicavieca, haca meninavairieni, cümana

mu'uyasie menicuvayacaitüni.

<sup>31</sup>Me'inanimaca meninavairieni 'ücarí, menitiquemaritüani 'ixuriquieyacü. Mana meneihana curuxisie mümierienicü.

### Quesusi que mütiümierie curuxisie

(*Maricuxi 15:21-32; Rucaxi*

*23:26-43; Vani 19:17-27*)

<sup>32</sup>Mericiüsü mana me'uyehutü menitaxeiya Sirenetanaca Simuni titevacame. Mecaniviya menütüquirienicü curuxieya.

<sup>33</sup>Curucuta mütiuyetevasio menü'axüani, taniuquicü Müqui Mu'uya Manuca mütiuyetevasio.

<sup>34</sup>Mana meni'itüani vinu masina siürica nücame meuyuyehüacacü. He'inüataca püca'l'imücücai.

<sup>35</sup>Curuxisie me'icavieca cuyaxi meniyuta'iva que memüteheitahuriexüaniquecaicü 'ixuriquieya. <sup>36</sup>Mana mecatetü meni'üviyacaitüni. <sup>37</sup>Mu'uya heima meneivera xapa, que mütiutaxanesie re'ucame, 'ICÜ QUESUSI CANIHÜCÜTÜNI HURIYUSIXI MÜTIVA'AITÜVAME, 'anuyüneme.

<sup>38</sup>Mericiüsü 'auriena menivarutivütüani tenavayamete yuhutame curuxisie, serietana xeime 'utatana xeime. <sup>39</sup>Hicü müme memanuyecücacai 'axa metenicühüavecaitüni yumu'lu me'utisiquetü <sup>40</sup>müpaü me'utiyuatü, Cari 'ecü pepica'unaquecai tuqui, haica tucari 'anayeyayu pepenuquitüaniquecai. Parasü, queneu'atavicueisitüa xüca Cacaüyari penu'ayatüni. Curuxisie quenacaye'a. <sup>41</sup>Müpaüta mara'acate memühürütüariecai mümeta

'inüaricü memüte'üquitametetücai  
 'uquiravesixi vahamatü  
 me'inanaimatü yunaitü müpäü  
 meniutiyuanecaitüni, <sup>42</sup>Hipame  
 niu nivatavicueisitüvacaitüni,  
 pücaýüve müyutavicueisitüanicü  
 yücümana. Cari 'Ixaherisixi  
 catatini'aitüvametüni niu. Mericüte,  
 hicü que'acayani curuxisie, yuri  
 temüteta'erienicü tame hesiena.  
<sup>43</sup>Mücüsietü Cacaüyarisie  
 yuri püti'eriecai, hicü xüca  
 'inaqui'erieca que'itavicueisitüani  
 müpäü mainecaicü, Ne  
 Cacaüyari necaninu'ayatüni.  
<sup>44</sup>Tenavayameteta 'auriena  
 curuxisie memuyevücai yaxecüca  
 'axa metenicühüavecaitüni.

#### Quesusi que mütiyetua yu'iyari

(*Maricuxi 15:33-41; Rucaxi  
 23:44-49; Vani 19:28-30*)

<sup>45</sup>Merücüsü tuca niucuyüre  
 naisarie mana cuiepa cüa  
 caviecacuque niucuhécüare. <sup>46</sup>Hicü  
 cüa caviecacu Quesusi carima  
 niutahiva müpäü 'utaitü, Heri,  
 Heri, rama savacütani, taniuquicü  
 Necacaüyari necacaüyari titayari  
 penetiucu'eiri manuyüne. <sup>47</sup>Hipatü  
 müme muva memüti'ucai  
 me'u'enanaca müpäü meniutiyuani,  
 'Eriyaxi niutahüave. <sup>48</sup>Xevitü  
 müme 'unausarümetü neyani,  
 ha'liseveme 'acuetü nitihüniya  
 vinu masinacü. Hacasie 'iqueca  
 neitiserieni menu'ienicü. <sup>49</sup>Hipatü  
 müpäü meniutiyuani, 'Acuxisü  
 tepütaneniereni, siparasü 'Eriyaxi  
 xüca 'uhamieni 'itavicueisitüanique.  
<sup>50</sup>Quesusi tavarı carima  
 'utahivaca niyetuani yu'iyari.  
<sup>51</sup>Hicü 'ixuriqui 'emayesuicai

meuvücai tuquita hixüata  
 nisane heimana 'acayuaca. Cuie  
 putayua, tetexi tiutitarixü.  
<sup>52</sup>Teuquiya nanutiyepietücani,  
 yumüiretü Cacaüyari teüterimama  
 memecusixüa mepanucu'uitüarie.  
<sup>53</sup>Teuquiyapa meheycüneca  
 Cacaüyari quiecariena  
 meneutahaxüani 'anucuquecu 'iya,  
 yumüiretü mepüvaruxeı.  
<sup>54</sup>Hicü cuya mühürütüariecai  
 hipatü hamatüana memi'üviyacai  
 Qesusi quepaucua cuie  
 memuxeı 'uyuaneme memixeı  
 naitü que mütiuyü, cuini mieme  
 menimamacaitüni müpäü  
 me'utiyuatü, Yuricü 'icü Cacaüyari  
 caninu'ayatücaitüni.

<sup>55</sup>Yumüiretüta 'ucari mana  
 meniti'ucaitüni teva metanenieretü.  
 Müme Qesusimatü meneyecüne  
 Carereyasie metel'iminique.  
<sup>56</sup>Mariya Mararatanaca  
 xevitüta Mariya Cacuvu Cuse  
 müvavarusitücai, Severeu  
 nivemama vavarusi hipatüta mana  
 meniti'ucaitüni.

#### Quesusi que mütiucateuqui

(*Maricuxi 15:42-47; Rucaxi  
 23:50-56; Vani 19:38-42*)

<sup>57</sup>Merücüsü 'acayunirümeccacu,  
 tevi mana ninuani xicutütü  
 'Arimateya quiecametütü Cuse  
 titevatü mütiyü'üquitüvametücai  
 Qesusisüa mieme. <sup>58</sup>Piratusüa  
 nuaca nitavavirieni Qesusi  
 caxarieya. Hicü Piratu müpäü  
 pütü'aitaxü müyetuiriyarienicü.  
<sup>59</sup>Hicü Qesusi caxarieya necueni  
 nita'eima rinu 'ixuriquiyaricü  
 'itiyacamecü. <sup>60</sup>Yuteuquiyapa  
 neitateni mühecuacaisie meripai



mütiuta'aitacai müvaye'inierienicü  
'aitüa. Tete 'amünena 'acacurupaca  
teuquiya heunaca, neyani.

<sup>61</sup>Mana meniucateitüni Mariya  
Mararatanaca xevitü Mariyamatü  
teuquiya hüxie.

**Cuyaxi que memüte'i'üviyacai  
teuquiya**

<sup>62</sup>Mericsü 'uxa'arieca,  
Pienixi 'utaxücu, mara'acate  
memühürütüariecai Pareseusixi  
vahamatü meniuyucuxeürieni  
Piratusüa <sup>63</sup>müpaü me'utiyuatü,  
Ti'aitame tame tepel'eriva 'iya  
tihu'irüviyame que mainecai  
'ayeyuritü cuxi, Haica tucari  
'aye'ayu nepanucuqueni 'utaitü.  
<sup>64</sup>'Ayumieme quetineuta'aita  
teuquiya mü'üviyarienicü  
hairieca tixüyuque, capa  
teyü'üquitüvamete yüvicüta  
me'axüame me'inavanicü, müpaü  
capa meteverutahüavecü teüteri,  
Müquite vasata panucuque. Xüca  
müpaü meteyurienique, 'imatüriecca  
mieme 'irümari pel'ivaniqueyu  
meripai mieme. <sup>65</sup>Piratu müpaü  
tinivacühüaveni, Xemesietü cuyaxi  
xequenivaranuvitüqui. Xequenehu  
xequene'üviyani que xemüteyüvave.  
<sup>66</sup>Müme mehecüneca  
meni'üviyacaitüni teuquiya. Cuyaxi  
menivaruhürütüani, tetesie teuquiya  
meniu'inüaritüani yuseyucü.

**Que müranucuquetüarie 'umieriecu**

*(Maricuxi 16:1-8; Rucaxi  
24:1-12; Vani 20:1-10)*

**28** Mericsü 'uxixipiä  
tucari 'utaxücu semana  
mexüacame tucarisie yuimuana  
Mariya Mararatanaca xevitü

Mariyamatü mana meniu'axüani  
me'ixeiyaque teuquiya. <sup>2</sup>Hicü  
cuie carima niutayuani. Taheima  
nacaneni Ti'aitame tupirieya. Nuaca,  
heicurupaca tete, hesiena nayerüni.  
<sup>3</sup>Merücariyapaü pütüyuxexeyacai,  
'ixuriquiteya pütuxacai 'üvipaü.  
<sup>4</sup>Me'imacatü tehüvemete cuyaxi  
meputiyüüacacai, müquite vahepaü  
me'anenetü menacüne. <sup>5</sup>Hicü niuqui  
tuayame müpaü tinivarutahüave 'ucari,  
Xepücaheumamaca xeme. Ne müpaü  
nepütimate xemicuvautüve Qesusi  
curuxisie memerie. <sup>6</sup>'Uva pücayecä.  
Panucuquetüarie que mainecai.  
Xequenacüni xequeneu'ixüari haque  
matequi. <sup>7</sup>Hicü cuitü xequenehu,  
müpaü xequetenivaretahüavi  
teyü'üquitüvametemama müquite  
vasata manucuquetüariecü,  
müxe'anuhaitüiyacü Carereyasiepai.  
Mana xecaneixeiyacuni. Camü  
yanepütixe'utahüavixüri. <sup>8</sup>Cuitü  
teuquiyapa meheycüneca  
memamatü cui meyutemamavietü  
meniutanausaxüani  
memütevataxatüanicü  
teyü'üquitüvametemama. <sup>9</sup>Hicü mana  
me'uhucacu Qesusi nivananucunaque  
müpaü 'utaitü, 'Aixüa 'acu. Müme  
hetüana me'utihüxima'uca  
menimayüani quetayasie,  
nenevieri menipitüani. <sup>10</sup>Hicü  
müpaü tinivacühüaveni Qesusi,  
Xepücaheumamaca. Xequenehu,  
xequetenivaretaxatüa ne'ivama  
Carereyapai memüyehucü. Mana  
mepünesihexeya.

**Cuyaxi que memütevarutahüavixü  
mara'acate memühürütüariecai**

<sup>11</sup>Mericsü 'ucari me'uhucacu, cuyaxi  
hipatü quiecarisie menecüneta. Naitü

que müreyü metenivarutaxatüani mara'acate memühiritüaricai.  
<sup>12</sup>Hicü 'uquiravesixi vahamatü me'uyucuxeüricea me'uyu'enieca yunaitü, tumini vaüca menivaru'üitüani cuyaxi <sup>13</sup>müpaü me'utiyuatü, Xeme müpaü xequeneutiyuaneni, Teyü'üquitüvametemama meniu'axüani, mepinava mexi tecusucal. <sup>14</sup>Xüca cuvexunaruri tiutamarieni, tame 'aixüa tepiyurieni xehesie mücarahüiyanicü. <sup>15</sup>Müme tumini me'utanaqui'erieca yamepüteyuricai que memüte'utahüavarie. Müpaü pürecuxaxasiva Huriyusixi vasata hicüque.

**Quesusi que mütivaruhiritüa nü'arisixi**

*(Maricuxi 16:14-18; Rucaxi 24:36-49; Vani 20:19-23)*

<sup>16</sup>Hicü teyü'üquitüvamete Tamamata Heimana Xevitü Carereya menecüne mücü

yemurislepai Qesusi que mütivarehüavecai memüyehucü.  
<sup>17</sup>Me'ixeyatü nenevieri mecanipitüacaitüni, hipatüsetü müme 'asimepücatemaicai xüca yuritücaitüni me xüca catixaütüni. <sup>18</sup>Hicü Qesusi 'aura niuyani, tinivarutaxatüani müpaü 'utaitü, Naimecü heiserie nepexeyia taheima cuiepata.  
<sup>19</sup>'Ayumieme xequeneutayeixüa, teyü'üquitüvamete xequenivarayeitüa yunaimenivarite, xevaca'üyatü ta'uquiyarisüa nu'ayasüa 'Iyari Mütiyupatasüa memümiemetetünicü,  
<sup>20</sup>xeteva'üquitüatü yamemütecahunicü nai que nemütixe'u'aitüa. Camüsü, nesietü tucarcü xehamatü nepuyeicani mexi cataparive. Müpaü xEICÜA can'aneni.

# MARICUXI

## Niuqui 'Aixüa Manuyüne Que Mütiu'üxasitacai

---

### Ti'üyame Vani que müticuxatacai

(Mateu 3:1-12; Rucaxi 3:1-9,  
15-17; Vani 1:19-28)

**1** Niuqui 'aixüa manuyüne Quesusi Cürisitu Cacaüyari münu'aya hepaüsita, 'ipaü tiniusutüarieni. <sup>2</sup>Qisariyaxi Cacaüyarisüa mieme mütaxaxatametücai xapayasie, müpaü catine'uca, Camü, nenuqui tuayame necananunü'amücü meri. Mücü 'aixüa caniyuriemücü 'ahuye pecanuavecacu. <sup>3</sup>Macumavesie xevitü nahivani, Xequeneha'arütüaca Ti'aitame huyeya, 'utaitü, Xequeneutixeurariya huyeteya, 'utaitü. <sup>4</sup>Que müre'uxa, Vani macumavesie tine'üyanecaitüni, müpaü ticuxatatü, memütehayevacü 'axa memüteyuriecaicü, mücücü memüteheuyehüviyarienicü, 'arique memüca'üyarienicü. <sup>5</sup>Yunaitü Cureya cuieyarisie quiecatari, yunaitü Qerusareme quiecatarita, meneyecüne me'ixeiyaacutü. Nivareca'üyacaitüni

yunaime Curutani hatuxamesie, meyuhecüatacacu 'axa que memüte'uyuri.

<sup>6</sup>Mücü Vani cameyu huxariyari cananacatüccüaitüni, navi hüyameyaricü nayühüacaitüni. Tüpuxi nivacuacaitüni, yeuta mieme xiete ni'iecaitüni. <sup>7</sup>Que müticuxatacai, müpaü nainecaitüni, Xevitü 'ucanamieni ne'utüma. 'Iya yemecü canive'emetüni, ne pücatixaü. Ne 'aixüa nepüca'ane nehiesie müтинаquenicü ni nemiparevienicü. <sup>8</sup>Nesüari necanixe'üyaneni hacü. Mücü canixeca'üyamücü 'Iyari Mütiyupatacä.

### Quesusi que mütiuca'üyarie

(Mateu 3:13-17; Rucaxi 3:21-22)

<sup>9</sup>Mericüsü, 'ana caninuanu Quesusi, Nasareti heyeyaca Carereya cuieyarisie. Vani canica'üya Curutani hatuxamesie. <sup>10</sup>Hicü Quesusi hapa 'anatiyeiximetü, muyuavi niuxeiya 'anacayepierümeme. Canixeiya 'Iyari 'acamieme para hesiena müyuhayevacü, cucurupaü 'anetü. <sup>11</sup>Xevitüta

niutaniuni taheima, müpaü  
'utaitü, 'Ecü pecaninenivetüni,  
necamaninaqui'erieca. 'Acümana  
neninetemavieca.

**Quesusi que mütiuta'inüasie**

(Mateu 4:1-11; Rucaxi 4:1-13)

<sup>12</sup>Hicü 'Iyari neinü'ani  
macumavesie. <sup>13</sup>Mana  
niuyeicacaitüni huta teviyari tucari.  
Cauyumarie ni'inüatanecaitüni.  
Yeutari memüvaxuave  
niuyeicacaitüni Quesusi. Cacaüyari  
tupirisiximama menipareviecaitüni.

**Quesusi que mütisutüa ti'uximayatü  
Carereya cuieyarisie**

(Mateu 4:12-17; Rucaxi 4:14-15)

<sup>14</sup>Merücüsü, Vani 'anutahüiyacu,  
Quesusi caninuani Carereya  
cuieyarisie, niuqui cuxatatü  
'aixüa manuyüne, que mütiyüni  
Cacaüyari ti'aitametücacu  
ticuxatatü, <sup>15</sup>ya'utaitü, Tucari  
canaye'aniri. Hicürixüa Cacaüyari  
cuitü canisütüamücü 'ena  
ti'aitatü. Xequeteneuhayeva que  
xemüteyuriecäi, niuqui 'aixüa  
manuyünesie yuri xequeteneuta'eri.

**Quesusi que mütiyaruta'ini hesiena  
memüteviyanicü quesüteveyamete  
yunaucame**

(Mateu 4:18-22; Rucaxi 5:1-11)

<sup>16</sup>Merücüsü, haracuna  
tesita 'uyemietü Carereya  
cuieyarisie, canivaruxeiya Simuni  
'Atüreximame yu'ivamacame.  
'Emeneitavivivacaitüni  
vipi haracunasie,  
memüquesüteveyametetücaicü  
müme. <sup>17</sup>Hicü Quesusi müpaü  
tinivarutahüave, Cümü,

nehesie xequeteneviyani.  
Teüteri xevacuxexeürivame  
nenixe'ayeitüamücü, quesüte  
xemütevaruxexeürivapaü hicü.  
<sup>18</sup>Yapaucua yuvipi me'ucu'eirieca,  
hesiena meteniuvia.  
<sup>19</sup>Hicü 'esiva 'umapai 'uyemietü  
nivaruxeiya Cacuvu Vanimame  
yu'ivamacame, Severeu nivemama.  
Müme canuväsie meniyetecaitüni  
yuvipi memanesiquitüatü.  
<sup>20</sup>Iya nivaruta'inieni hesiena  
memüteviyanicü. Yuquemasi  
Severeu me'ucu'eirieca canuväsie  
yecäime, te'ivamete vahamame,  
Qesusisie meteniuvia.

**Cacaüyari müca'itiya que mütinücai  
tevi**

(Rucaxi 4:31-37)

<sup>21</sup>Merücüsü Caperünaume  
meneta'axüani. Hicü  
cuitüva 'uxiipiya tucarisie,  
Huriyusixi vatuquita  
heutahaca, tini'üquitacaitüni.  
<sup>22</sup>Menihüxiyacaitüni tita  
müti'üquitacai hepaüsita. Que  
mü'ane heiserie mexeyapaü  
tinvaru'üquitüvacaitüni, que  
memücate'üquitacai müme  
'inüaricü memüte'üquitametetücai.  
<sup>23</sup>Merücüsü heutahacu, yapaucua  
tevi caneutahani vatuquita  
cacaüyari müca'itiya minücai.  
'Iya niutahiva <sup>24</sup>müpaü 'utaitü,  
'Ai, que petati'uximatüani,  
Quesusi Nasaretitanaca 'acu.  
Petasiheuyehüanique petinua. Ne  
nepümasimate que pemüpaicü.  
Que mü'ane Cacaüyarisie mieme  
mupasie, 'ecü pecanihücütüni,  
tinitahüave. <sup>25</sup>Quesusi  
nita'imaiya, müpaü ticühüavetü,

Cayuvatü 'aixüa, queneuxüna.  
<sup>26</sup>Hicü mücü cacäyari  
 müca'itiya, tevi nütü, carima  
 'utahivatü, nixüna. <sup>27</sup>Yunaitü  
 menihüxyani. 'Ayumieme niuqui  
 meniutixüatüatüücüne müpäü  
 me'utiyuatü, Titari 'icü. Que titita  
 'icü 'üquisica mühecua. Camü  
 heiserie hexeyatü tiniva'aitüaca  
 'asita cacäyarixi memüca'itiatüca,  
 müme meni'enieni. <sup>28</sup>Hicü cuitüva  
 naisarie Carereya cuieyarisie  
 tiniutamariva que mütiuyuri.

**Quesusi que mürenayehüa Pecuru  
 varücaüya**

*(Mateu 8:14-15; Rucaxi 4:38-39)*

<sup>29</sup>Mericsü tuquita  
 me'ayenexüaca, Simuni 'Atürexü  
 vaque menecüne, Vani Cacuvu  
 yunaitü. <sup>30</sup>Simuni varücaüya mana  
 niucateitüni hüiyatü. Cuitüva  
 metenitaxatüani Quesusi que  
 mü'anecai. <sup>31</sup>Hicü 'aura 'ayaca,  
 mamaya 'uviyaca, nenuchana.  
 Yapaucua cahüiyatü nayani 'uca,  
 tinivarumini.

**'Acayunecu, yumüiretü que  
 memüte'anayexüriya**

*(Mateu 8:16-17; Rucaxi 4:40-41)*

<sup>32</sup>Hicü taicai 'acayunecu,  
 meni'atüirieni tecuicuicate  
 yunaime, müme meta cacäyarixi  
 memüvaviyacai. <sup>33</sup>Yunaitü  
 quiecatari meniyucuxeürieni  
 quitenie hüxie. <sup>34</sup>Yumüireme  
 nivaranyexürieni cui  
 memüyüacai müireme cuiniyacü.  
 Cacäyarixita nivarayenü'axüani  
 yuvaücavame. Pücapitüacai  
 cacäyarixi memütiniunicü, müme  
 memimaicaicü.

**Quesusi que müticuyeicacai  
 Carereya cuieyarisie ticuxatatü**

*(Rucaxi 4:42-44)*

<sup>35</sup>Hicü 'uxa'arieca ximeri meri  
 'acuxi yüvicüta nanucuqueni. Quita  
 vayeyaca, neyani macumavesiepai.  
 Mana niuyutanenevieni. <sup>36</sup>Hicü  
 Simuni, hipatüta hamatüana  
 memü'uvacai menenucuyei que  
 Quesusi. <sup>37</sup>Me'itaxeiyaca  
 müpäü metenitahüave, Yunaitü  
 mepümasicuvautüve. <sup>38</sup>Quesusi  
 müpäü tinivarutahüave, Cümüsüari  
 'uma püta tepüyehu. Hipame  
 quiecaritesie tepütayeixüani,  
 nemütivaretaxatüanicü manarita.  
 'Ayumieme necaneyeyani. <sup>39</sup>Hicü  
 mana niuyeicacaitüni, ticuxatatü  
 vatuquiteta naisarie Carereyasie,  
 varayenü'avatü cacäyarixi.

**Quesusi que mürenayehüa tevi  
 cuiniyacü müca'itiyacai**

*(Mateu 8:1-4; Rucaxi 5:12-16)*

<sup>40</sup>Mericsü xevitü cuiniyacü  
 müca'itiyacai caninuani hesüana,  
 cui 'livavirietü. 'Utitunumaveca  
 hüxiena, müpäü tinitahüave,  
 Xüca pe'avaüriyani, 'ecü  
 pecaniyüveni pemünesi'itieni.  
<sup>41</sup>Quesusi 'inenimayatü  
 yumama niutasera. Nimayüani  
 müpäü ticühüavetü, Nesüari  
 nepünevaüriya. Pecaniu'itiyani.  
<sup>42</sup>Müpäü titahüavecu yapaucua  
 peunua cuiniya. Tevi 'itiyatü  
 nayani. <sup>43</sup>Cuini mieme  
 'ihürütatü, Quesusi neinü'ani  
 cuitüva, <sup>44</sup>müpäü ticühüavetü,  
 'Amarima 'aixüa, xeimetüme  
 pemücaraxaxatüvani havaicü.  
 Mara'acamesüa quenemie püta.

Quene'axeianüa. Pemanayevectü, quenanutimava que müre'aitaxü Muisexi yapemütivataheciatüanicü. <sup>45</sup>Mücü masi mana heyaca yatiniutixatatüyani vaücava. Naisarie tinicuxatacaitüni que mütiuyü. 'Ayumieme Quesusi pücayüvecai quiecarisie me'axeni yuhēcūatatü, masi yeuta necateitüni macumavesie. Hesüana meni'axecaitüni naisarie quiecatari.

**Quesusi que mürenayehüa  
huriecame**

(Mateu 9:1-8; Rucaxi 5:17-26)

**2** Mericüsü yapaümexa tucari 'anucayacu, hutarieca caninuani Caperünaumesie. Catiniutamariva quename quita hayecatei. <sup>2</sup>Yümüiretü cuitü meniyucuxeürieni. Memüyümüirecaicü, ni quitenie hüxie mepücatenaquecai. Mücü tinivacüxaxatüvacaitüni niuqui. <sup>3</sup>Hicü hipatü huriecame meni'atüirieni, yunaucatü mehecuetü. <sup>4</sup>Hura me'ecuenique meniyutatexieni teüteri memüyümüirecaicü. 'Ayumieme Quesusi manucatei qui heima püta mecaneitiyepieni. Me'ivati'ineca 'ixumari muva meneicatuani huriecame, 'itarisie 'acaime. <sup>5</sup>Quesusi varuxeiyaca yuri que memüte'eriecai, müpaü tinitahüave huriecame, Nenive, pepüreuyehüvyarie 'axa pemütuyuricü. <sup>6</sup>Hicü hipatü 'inüaricü memüte'üquitametücai muva mecanayetecaitüni. Yu'iyarisie müpaü metenyücühüavecaitüni, <sup>7</sup>Titayaricuta müya ticühüave

icü. Pisevixima Cacaüyari müpaü 'axa 'utaitü. Quepainenü püyüve müreiyehüvirieni tevi 'axa tiuyurieyu. Xevitiüxa xeicüa caniyüveni Cacaüyaritütü.

<sup>8</sup>Quesusi yu'iyarisie timaitü müya memüteyücühüavecaicü, müpaü tinivarutahüave, Titayari müya xeteyücühüave yu'iyarisie.

<sup>9</sup>Tita masi caticuanive. Que ticuanive müpaü mütitahüave muhurie, Pepüreuyehüvyarie 'axa pemütuyuricü. Caticuanive masi müpaü mütitahüave, Quenanucuquexi, 'a'itari quenancucue'li, quenecuyeicani.

<sup>10</sup>Paraque müpaü xemütehethimanicü Yuri Tevi netitevatü heiserie nemexeyiacü cuiepa, nemütivareuyehüvirienicü 'axa meteyurieyu, müpaü tinitahüave huriecame, <sup>11</sup>'Ecü nepümarahüave, quenancucuquexi, 'a'itari quenancucue'li, 'a'ique quenemie. <sup>12</sup>Hicü nanucuqueni. Yu'itari 'anucucueca neyani yunaime vahüxie. 'Ayumieme yunaitü menihüxyiani. 'Aixüa meniutiyuanecaitüni Cacaüyari hepäüsita, müpaü me'utiuyatü, Hasuacu tepücanenierivave 'ipäu tiyüaneme.

**Que mütita'ini Revi hesiena  
mütiviyanicü**

(Mateu 9:9-13; Rucaxi 5:27-32)

<sup>13</sup>Mericüsü tavari haracuna tesita neyani Quesusi. Teüteri yunaitü hesüana meni'axecaitüni. Mücü tiniva'üquitüacaitüni. <sup>14</sup>Hicü mana 'uyemietü nixeiya Revi 'Aripeu münu'ayatücai teüteri memüte'ayutituayasie 'acaime.

Müpaü tinitahüave, Nehesie  
quetineviyani. Revi 'anucuqueca  
hesiena tiniuviya.

<sup>15</sup>Mericusü ticuacacu

Qesusi Revi quita,  
yuvaücavatü cuviyexunusie  
mieme memüteyeturirarie,  
hipatüta 'axa teyuruvamete  
metenicuacaitüni Qesusimatü  
teyü'üquitüvametemama vahamatü.  
Meniyümüirecaitüni memiveiyacai.

<sup>16</sup>Hicüsüari hipatü 'inüaricü  
memüte'üquitametetücai, müme  
Pareseusixi vahesie memüteviyacai,  
müme me'ixeyaca ticuacame  
'axa teyuruvamete vahamame  
müme cuviyexunusie mieme  
memüteyeturiryari vahamame,  
müpaü metenivarutahüave  
teyü'üquitüvametemama,  
Neuxei, püticua'a pütü'ie  
müme cuviyexunusie mieme  
memüteyeturiryari vahamatü,  
'axa teyuruvamete vahamatü.

<sup>17</sup>Qesusi varu'enieca müpaü  
tinivarutahüave, Müme 'aixüa  
memüteheu'erie tiyu'uhayemavame  
mepücaheuyehüva. Müme  
memütecucuye püta mepeiyehüva.  
Nesü que nemütinua, nepücanua  
nemüvata'inienicü müme  
heiseriemecü yamemütecahu.  
Müme 'axa memüteyurie püta  
nevata'inienique nepunua,  
memütehayevacü 'axa  
memüteyuriecaicü.

**Que memüte'ita'ivaviyaxü haquiya  
hepaüsita**

(Mateu 9:14-17; Rucaxi 5:33-39)

<sup>18</sup>Mericusü Vani  
teyü'üquitüvametemama,  
Pareseusixi yunaitü 'icuai

meniyuhaquiecaitüni heiva.  
Hipatü me'u'axüaca, müpaü  
metenita'ivaviya, Titayari  
Vani teyü'üquitüvametemama,  
teyü'üquitüvamete Pareseusixi  
vahesüa memümiemete  
titayari meteyuhaquie, 'ahesüa  
miemete teyü'üquitüvamete  
mecayuhaquiecacu. <sup>19</sup>Qesusi  
müpaü tinivaruta'eiya, Que  
meteyüvave memüyuhaquieca  
neneüqueme cupanierumama,  
neneüqueme mexi vahamatü 'a'uca.  
Mexi neneüqueme vasata 'uca,  
mecapüyüvave memüyuhaquieca.  
<sup>20</sup>Tucari naye'amücü quepaucua  
neneüqueme mütihanieni vasata.  
'Ana meniyuhaquieconi, 'iya tucari  
'aye'ayu.

<sup>21</sup>Tevi 'ixuriqui mücayutatutuvecü  
püca'imatesiquitüani 'ixuriqui  
cui müye'i. Mesü xüca müpaü  
tiyurienique, manesiqui  
hecuametütü müye'i  
pütahanaqueyu, sanimeyari masi  
'axa 'aneti nayaniqueyu. <sup>22</sup>Tevi  
sixai müye'isie püca'icatüani vinu  
mücuanacü, mesü xüca müpaü  
tiyurienique, sixai nitasanequeyu,  
vinu neyeveniqueyu sixaita.  
Vinu masi sixai hecuamesie  
canituarivani mücuanacü.

**Teyü'üquitüvamete que  
memüte'ivatihunaxüa türicu  
'uxipiya tucarisie**

(Mateu 12:1-8; Rucaxi 6:1-5)

<sup>23</sup>Mericusü 'uxipiya  
tucarisie 'esipa niuyeicacaitüni,  
teyü'üquitüvametemamata  
yunaitü. Müme menisütüani  
me'icahurucatu müayeyari, mana  
me'u'uvatü. <sup>24</sup>Hicü Pareseusixi

müpaü metenitahüave, Neuxei, titayaricuta müpaü meteyurie que mücatitauniva 'uxiþiya tucarisie. <sup>25</sup>Quesusi müpaü tinivarutahüave, Hasuacu xecate'ititerüvavave que mütiuyuri Raviri, heiyehüatü heuhacamütü, müme hamatüana memü'uvacaita meheuhacacucucacu. <sup>26</sup>'Iya Cacaüyari quita neutahani quepaucua 'Aviyatari mühiritüariecai mara'acate vahepaüsita. Pa Cacaüyari hüxie mamanari niuticuanu. Mara'acate xeicüa heiserie mepexeiya memiticuanicü mücü pa, hipatü heiserie mepüchexeiya. Müme hamatüana memü'uvacai tinivaruminita Raviri.

<sup>27</sup>Müpaüta tinivarutahüave Quesusi, 'Uxiþiya tucari caniuti'usieni teüteri vahesie mieme. Teüteri que memüte'uveviya, 'uxiþiya tucarisie mieme xeicüa mepüca'utiveviya. <sup>28</sup>'Ayumieme Yuri Tevi que nemütiteva, 'uxiþiya tucari hepaüsitata necatini'aitani.

### Tevi mümamavaquicai

(Mateu 12:9-14; Rucaxi 6:6-11)

**3** Mericüsü tavari tuquita neutahani. Tevi mümamavaquicai muva nayecateitüni. <sup>2</sup>Müme menihupiecaitüni, Capenayehüani 'uxiþiya tucarisie meteyücühüavetü, me'ixanetacutü. <sup>3</sup>Hicü Quesusi müpaü tinitahüave tevi mümamavaquicai, Quenanucuquexi, hixüapa queneutaquexi. <sup>4</sup>Müpaü tinivaruta'ivaviya Quesusi, 'Uxiþiya tucarisie tipitüarie 'aixüa mütiyurienicü, püpitiuarie nusu

'axa mütiyurienicü. Tipitüarie mütiyutavicueisitüanicü, püpitiuarie nusu mütiyumienicü. Mümesü cayuvatü meniumacaitüni.

<sup>5</sup>Hicü yuhaxüama varuxeiyaca, yuhiverietü memüsese'icaicü yu'iyarisie, müpaü tinitahüave tevi, 'Amama queneutasera. 'Iya nitasera, 'aixüa 'anetü nayani. <sup>6</sup>Hicü Pareseusixi mevayecüneca, müme Herurexisie memüteviyacai vahamatü meniuyu'enieni hepaüsitana, que memüte'imieniquecai.

### Teüteri que memüteyucuxeürie haracuna tesita

<sup>7</sup>Hicü Quesusi teyü'üquitüvametemama yunaitü haracunapai menecüne. Yümüiretü teüteri meniveiyacaitüni Carereyatari, Cureyatari, <sup>8</sup>Qerusaremetari, 'Irumeyatari, Curutani 'anutaüyetari, Tiru 'aurie Siruni 'aurie quiecatari. Yuvaücvatü me'u'enanaca nai que mütiyurienecai, hesüana mecaniu'axüani. <sup>9</sup>Hicü nivaruta'aitüani teyü'üquitüvamate hura memehanacü canuva hesiena mieme, capa me'isaipünacü, memüyümüirecaicü teüteri. <sup>10</sup>Yümüireme nivananayexürüvacaitüni. 'Ayumieme yunaitü cuiniya memexeiycacai mesaipünetü hesüana meni'axecaitüni me'imayüanique. 'Ayumieme canuva niuta'aita. <sup>11</sup>Cacaüyarixi memüca'itiyatüca me'ixeiyaüti, hüxiena meniucaxürüvecaitüni, müpaü mete'uhivatü, 'Ecü Cacaüyari pecaninu'ayatüni. <sup>12</sup>'Iya



heiseriemecü nivahüritüacaitüni  
memüca'ihēcüatanicü que  
müpaicütücai.

**Tamamata heimana yuhutame que  
mütivaranuyexei nü'arisixi**

*(Mateu 10:1-4; Rucaxi 6:12-16)*

<sup>13</sup>Hicü neutiyune hürisie. Müme  
müvaranuyexei nivaruta'inieni  
hesiena memüteviyanicü.

Me'ayecüneca teüteri  
vasata, hesiena meteniuvia.

<sup>14</sup>Tamamata heimana yuhutame  
nivananuyeteüxüa. 'Arique  
nivananü'axüaniquēcaitüni  
memütēcuxatanicü, hamatüana  
memu'uvanicü, <sup>15</sup>heiserie  
nivapitüaniquēcaitüni  
memüvaranayexürüvanicü  
tecuicuate,

memüvarayenü'axüanicüta  
cacaüyarixi 'axa memü'anene.

<sup>16</sup>Simuni püxevitütücai,  
Qesusi mitaterüvaxü Pecuru,

<sup>17</sup>hipatüta, Cacuvu Severeu  
nu'aya, Vani Cacuvu 'ivaya,  
Qesusi mütivarutaterüvaxü  
Puhanerüquesi, taniuquicü  
Türarücamete paine, <sup>18</sup>'Atürexixi,  
Piripe, Parüturume, Mateu, Tumaxi,  
Cacuvu 'Aripeu nu'aya, Tareu,  
Simuni mücananisitatücai, <sup>19</sup>Cura  
'Iscariütitanaca 'arique Qesusi  
müyetua.

**Que mü'ane 'axa 'utaitü misevixima  
'Iyari Mütiyupata**

*(Mateu 12:22-32; Rucaxi 11:14-23; 12:10)*

Hicü quita meneutahaxüani.

<sup>20</sup>Tavari yuvaücavatü teüteri  
me'u'axüacu müme mepüyutatexie  
metecuanique. <sup>21</sup>Hicü maremama  
me'u'enanaca, meniu'axüani

memenuhanacü. Müpaü  
meteniyücühüavecaitüni,  
'Asipücatimate que mütiyuriene.

<sup>22</sup>Mücü meta, hipatü 'inüaricü  
memüte'üquitametetücai,  
Querusaremesie memeyecü,  
müpaü meniutiyuanecaitüni,  
Peheresepuri pinü'ü. Cacaüyarixi  
'axa memü'anene va'uquiyarisie  
mütivayacü, 'ayumieme  
püvarayenü'a cacaüyarixi,  
meniutiyuanecaitünita. <sup>23</sup>Hicüsüari  
yu'aurie varutacuevieca, 'üxasicü  
müpaü tinivaruta'üquitüani,  
Cauyumarie que tiyüve  
mayuyenü'anicü yücümana.

<sup>24</sup>Yaxeicüata, xeime cuieyarisie  
quiecatari xüca hixüata meyusana,  
xüca me'ayuca'unieca, mücü  
vacuviyexunu pücaüveni  
'emüreutevinicü. <sup>25</sup>Xeime  
quie miemete hixüata  
xüca meyusana, xüca  
me'ayuca'unieca, mepücaüvaveni  
'ememütheutevinicü.

<sup>26</sup>Cauyumarie xüca  
yuca'unarümenique, türücariyaya  
hixüata xüca yusanaque,  
'emüreutevinicü pücaüveniqueyu.  
Pütaxüximeniqueyu püta.

<sup>27</sup>Tevi pücaüve meutahanicü  
mütürücaüye quita, piniteya  
mütinavanicü, me xüca  
ca'ihüanique mütürücaüye meri.  
'Ihüame, pütinavani tita mütixuave  
quitana.

<sup>28</sup>Icü niuqui caniseüyeni que  
nemütixecühüave, naime 'axa  
memüteyurie teüteri, mepüyüvave  
memütheuyehüvyarienenicü,  
naime 'axa memutiyuane.

<sup>29</sup>Masi que mü'ane 'axa 'utaitü  
misevixima Cacaüyari 'Iyarieya

Mütiyupata, mücü hasuacu pücareuyehüviyarieni mücücü. Hesiena masi catiniuhüivani, yuheyemecü 'emuvecü tita 'axa mütiuyuri. <sup>30</sup>Ipaü niutayüni, müme müpaü memutiyanecaicü, Cacaüyari müca'itiya ninüca.

**Quesusi 'ivamama varusieya**

(*Mateu 12:46-50; Rucaxi 8:19-21*)

<sup>31</sup>Hicü varusieya 'ivamama yunaitü mecani'axüani. Tacua meti'utü metenitanü'airieni yu'aurie me'icuevietü. <sup>32</sup>Teüteri yumüiretü menayetecaitüni hamatüana. Müpaü metenitahüave, Neuxei, 'avarusi 'a'ivama mepümasiha'ivava tacuapaitü. <sup>33</sup>Mücü müpaü tinivarutahüave, Quehateri nevarusi ne'ivama. <sup>34</sup>Varanuxeiyatüyaca 'auriena mematecai, müpaü niutayüni, Camü nevarusi ne'ivama. <sup>35</sup>Que mü'ane yamütiyuriene que mütinaque Cacaüyari, mücü canine'ivatüni caninevarusitüni.

**'Imüari 'ivivame 'üxasi hepaüsita que mütimasiücü**

(*Mateu 13:1-9; Rucaxi 8:4-8*)

**4** Mericüsü tavari haracuna tesita tiniuti'üquita. Hesüana meniycuxexürieni yuvaücavatü teüteri. 'Ayumieme canuvasio nacayerüni hapa yecaimesie. Yunaitü teüteri cuiepa püta meniti'ucaitüni ha tesita. <sup>2</sup>Mana vaüca tiniva'üquitüacaitüni 'üxasi hepaüsita. Hicü ti'üquitatü müpaü tinivarutahüave, <sup>3</sup>Xequene'enanaca. Camüsü, 'ivivame neyani. <sup>4</sup>Mericüsü 'imüari 'ivienecacu, hipatü huyeta niucaxürieni.

Viquixi meniucaxürieni meniticuani. <sup>5</sup>Hipatüta macutetexiyasio niucaxürieni, vaüca müca'acucuiyasio. Cuitüva niutineni, cuie 'emücasuicaicü. <sup>6</sup>Hicü quepaucua tau mane nicuini, niutivani mücahananatücateicü. <sup>7</sup>Hipatüta xuya 'imüariyarisata niucaxürieni. Xuya niutivere, heimana niuyecüne. 'Imüari cacaniutixuavere. <sup>8</sup>Hipatüta cuie 'aixüa müracu'anesie niucaxürieni. 'Utinexüaca 'utivavereca, niutixuavere. Hipatü xei teviyari heimana tamamata nayani, hipatüta haica teviyari ratüa, hipatüta xei sienituyari ratüa. <sup>9</sup>Müpaüta niutayüni, Xaütünetü mu'enaxü que'u'ena.

**Titayari 'üxasi hepaüsita ticuxatatü müti'üquitacai**

(*Mateu 13:10-17; Rucaxi 8:9-10*)

<sup>10</sup>Hicü yühücüate metitetü, müme 'auriena memütitecai, Tamamata Heimana Yuhutame vahamatü menita'ivaviya 'üxasi hepaüsita que müti'üquitacai. <sup>11</sup>Müpaü tinivarutahüave Quesusi, Xeme xecaniupitiarieni tita mütiuti'aviesiecai, xemütemaicacü que müti'ane Cacaüyari ti'aitametücacu. Hipatü tacua memütitei püta, naimecü 'üxasi hepaüsita xeicüa mecaniupitiarieni 'utüarica manuyünepaü, para memüca'ixeyiacü, sepa yemecü memütanenierenique, para 'asimemücatehetimanicü, sepa yemecü memü'enanacaque, <sup>12</sup>capa ta'aurie me'axürienicü Cacaüyarisie meteviyaque, capa metehueyehüviyarienicü.

**Quesusi que mütihecüatacai  
yü'üquisica ti'ivivame hepaüsita**

(Mateu 13:18-23; Rucaxi 8:11-15)

<sup>13</sup>Hicü müpaü tinivacühüaveni, Cari xeme 'icü 'üxasi hepaüsita xepüca'u'enana. Quetütüri xete'enanani naime 'üxasi hepaüsita. <sup>14</sup>Ivivame ni'ivieneni niuqui. <sup>15</sup>Hipatü huyeta miemete mecanihümetüni haque niuqui muca'iviya. Quepaucua memi'enie, cuitüva Cauyumarie ni'axeni. Niuqui netücüni vahesüa muca'iviya. <sup>16</sup>Hipatüta yaxeicüa 'imüari mecanihümetüni macutetexiyasie memuca'iviya. Quepaucua niuqui memi'enie, yapaucua menitanaqui'erieni meyutemamavietü. <sup>17</sup>Yücümana mepücahananatüca, masi 'emepücateheutere. Quepaucua memi'uximatüarie quepaucua memutaveiyarie 'icü niuqui hepaüsita, yapaucua meniucunuitüarieni. <sup>18</sup>Hipatüri 'imüari menihümetüni xuya 'imüariyarisata memuca'iviya. Müme niuqui meniu'enieni, <sup>19</sup>masi mepüyuhiveritüa tita hicü mütimieme meha'erivatü, tuminicü meyutemamavietü mepüteyu'irüviya, hipameta vaücavame menihive'erieca. Mücücü niuqui niupünariexüani naisata. Cacaniutixuavere. <sup>20</sup>Hipatü 'imüari mecanihümetüni cuie 'aixüa müracu'anesie memuca'iviya. Niuqui mecaniu'enieni, meniuyuvaüriya me'inaqui'erietü, mecaniutixuxuavereni. Hipatü xei teviyari heimana tamamata menacüne, hipatüta haica teviyari

menacüne, hipatüta xei sienituyari menacüne.

**Tita müti'avie que mütihecüasieni**

(Rucaxi 8:16-18)

<sup>21</sup>Hicü müpaüta tinivacuxaxatüvacaitüni, Cüxeme que racueiya puticü manunamienicü, 'utatüa mutiquecanicü nusu. Vapai püta caraqueca. <sup>22</sup>Tita müti'avie, masiücütü mayanicü xeciüa 'apuve. Tita müranucaname, mühecüasienicü xeciüa 'apuve. <sup>23</sup>Xaütünetü mu'enaxü que'u'ena. <sup>24</sup>Müpaüta tinivacuxaxatüvacaitüni, Xequeneyucuerivayurieca tita xemüte'enie hepaüsita. Que xemüteva'inüasirie hipame, yaxeicüa xepüte'inüasiyarieni. Hesiena payaxe, xeme xemü'enana xehesie mieme. <sup>25</sup>Que mü'ane tixaütü mürexeyia, tavari cuxi pütimiquieni. Que mü'ane tixaütü mücarexeyia, sepa que mütitita müreixeyia pütinavaiyarieni.

**'Üxasi 'imüari hepaüsita,  
que mütiutineica**

<sup>26</sup>Müpaüta tinivacuxaxatüvacaitüni, 'Ipaü catini'aneni Cacaüyari ti'aitametücacu. Camü tevi 'imüari niuta'ivieni cuiepa. <sup>27</sup>Niucahupuni nanucuquecani tucariçü tücaricü. 'Imüari niutineicani niutivavereni, mücü 'asicatimaicacu que mütimeica que mütiuvavere. <sup>28</sup>Cuie yuxaüta pitinenetüva cüsunuyari meri, 'arique müayeyari, 'arique tacari. <sup>29</sup>Ticuayu, 'ana türicu xicamete nivaranunü'amücü, 'isanari maye'acü.

**'Üxasi musitasa 'imüariyari hepaüsita***(Mateu 13:31-32; Rucaxi 13:18-19)*

<sup>30</sup>Hicü müpaü niutayüni, Que te'utiyaneni, titapaü ti'aneni Cacaüyari ti'aitametüacu. Que mü'ane 'üxasi hepaüsita tepihēcüatani. <sup>31</sup>Musitasa 'imüariyari paü cani'aneni. Cui epa muca'liviva, xevitü 'imüari hepaüna 'anetü pücaxuave cui epa 'esipepetü. <sup>32</sup>'Uca'liviyaca caniutineicani. Tupiriya mutineica, xevitü hepaüna 'anetü pücaxuave 'epapatü. Mamateya neucunexüani 'etütütü. Taheima miemete viquixi mecaniyüvaveni memüyuti'ituatüanicü hesiena 'etüriyarisie.

**Titayari Quesusi müti'üquitacai 'üxasi hepaüsita ticuxatatü***(Mateu 13:34-35)*

<sup>33</sup>Vaüca 'üxasi hepaüsita ticuxatatü 'iyapaü 'aneneme tinivacuxaxatüvacaitüni niuqui, que memüteyüvavecai memi'enienicü. <sup>34</sup>'Üxasi hepaüsita caticuxatatü pücativacuxaxatüvacai. Teyü'üquitüvamete xEICÜa me'ayetetü yühüciate tinivarutahecüatüani naime.

**Quesusi que mütinütüa 'eca vitari***(Mateu 8:23-27; Rucaxi 8:22-25)*

<sup>35</sup>Hicü mücü tucarisie 'ucutaicarecu müpaü tinivarutahüave teyü'üquitüvamete, Hicümüsütari 'anutaiye tepanucüne. <sup>36</sup>Müme mevarucu'eirica teüteri mana memüti'ucai, meneivitüni ca'anatyi vecacu canuvasie

meyetetü. Hipatüta canuvate menecüne hamatüana. <sup>37</sup>Hicü yapaucua niucu'eca vaücava. Hamevari neucayeurivecaitüni canuvasie. Nitihüniyarümeccaitüni. <sup>38</sup>Quesusi canuva cüsapa nacateitüni, muritarisie 'utimu'utü, cusutü. Menenutahütüani müpaü mete'icühüavetü, Ti'üquitame 'acu, pecareu'acuerivayurie temeuyeveximecü. <sup>39</sup>Hicü 'anucuqueca nitatiene 'eca. Müpaü tinitahüave haracuna, Cayuvatü 'aixüa, quetineuhayeva. 'Eca neunuani, niucuharuanare yemecü. <sup>40</sup>Müpaü tinivarutahüave teyü'üquitüvamete, Titayari xetemama. Quepaütütü yuri xecate'erie. <sup>41</sup>Müme masi cuini mieme meniutimamani. Müpaü metenyutahüave, Quepaicüri pühücü 'icü. 'Asita 'ecatütü haracunatütü meni'enieca que mütiva'aitüa.

**Cacaüyarixi 'axa memü'anene que memüte'inücai Cataratanaca***(Mateu 8:28-34; Rucaxi 8:26-39)*

**5** Mericüsü haracuna 'anutaiye meneta'axüani Cataratari vacuiepa. <sup>2</sup>Canuvasie 'anatiyacu, yapaucua tevi cacaüyari müca'itiya minücai nenucunaque müquite vateuquiyapa 'ayeneca. <sup>3</sup>Mücü tevi vateuquiyapa necateitüni. Teüteri menitexiecaitüni me'ihüanique tepüacü. <sup>4</sup>Müixa nicuhüivacaitüni tepüacü yumamatesie yü'ücasie, peru yumamacü tepüa nanutequecaitüni, yü'ücasie mieme nanuyequesinacaitüni. Xevitü hepaüna pücatürücaüyecai mimaxiutacü. <sup>5</sup>Tucaricü tücaricü

teuquiyapa nicuyeicacaitüni  
 ya hürisie, cuhivanetü, tetecü  
 yucuxitequetü. <sup>6</sup>Hicü Quesusi  
 'uxeiyaca teva 'uyeicame,  
 hepana niutanausa. Hüxiena  
 niutitunumaqueni <sup>7</sup>carima  
 'utahivatü, müpäü 'utaitü, Que  
 peneti'uximatüani, Quesusi  
 'acu Cacaüyari yunaime  
 vaheima macave pemünu'aya.  
 Nepümasivaviri yaneti'hüritüatü  
 Cacaüyari, penücahürixüa 'axa  
 nesi'uyurieni. Müpäü niutayüni  
<sup>8</sup>Quesusi müpäü mütitahüavixücü,  
 'Ecü cacaüyari pemüca'itiya,  
 queneuxüna. <sup>9</sup>Hicü müpäü  
 tinita'ivaviya, Que petiteva. Mücü  
 müpäü tinitahüave, Cuyaxi  
 Xei Vaxayari netinitevaca,  
 temütamüirecü. <sup>10</sup>Vaücava  
 vaüriyarica neyevaviriecaitüni  
 Quesusi mücavaranuyenü'anicü  
 mücü cuiepa. <sup>11</sup>Mericüsü  
 yemuritüa tuixuri metenicuacaitüni  
 yuvaücavatü. <sup>12</sup>Cacaüyarixi  
 vaüriyarica meneyevaviriecaitüni  
 yamete'icühüavetü, Tuixuri  
 vahesüa quetananunü'a  
 temüvanünicü müme. <sup>13</sup>Hicü  
 Quesusi nivarupitüani. Cacaüyarixi  
 memüca'itiyatüca me'ixünaca  
 tevi menivarutiviya tuixuri,  
 'esivatücacu huta miriyari  
 meyupaümeme. Tuixuri yapaucua  
 meniutanausa 'aita meneucayune.  
 Hapa meneuxürieni, meniucuini  
 haracunasie.

<sup>14</sup>Hicü tuixuri  
 vahüvemete meniyuta'una.  
 Yametenicuxatacaitüni quiecar  
 'amüyevasie 'esimüyeyeusie. Teüteri  
 menecüne mecunieretüvetü  
 que mütiuyü. <sup>15</sup>Quesusisüa

me'u'axüaca menixeiya tevi  
 cacaüyarixi meminücai, Xei  
 Vaxayari memiviyacai. Menixeiya  
 mana 'acaime, heuquemarimacame,  
 'aixüa re'iyarime. Meniutimamani.  
<sup>16</sup>Hicü müme memunenierixü  
 metenivacuxaxatüvacaitüni que  
 mu'itüarie tevi, que mütiuyü tuixuri  
 vahepaüsita. <sup>17</sup>Teüteri menisütüani  
 vaüriyarica me'ipitüatü vacuiepa  
 müyemiecü.

<sup>18</sup>Hicü canuvacie cayerüximecacu  
 Quesusi, 'iya tevi cacaüyarixi  
 meminücai vaüriyarica canipitüani  
 hamatüana muyeicanicü.

<sup>19</sup>Quesusiri püca'ipitüa. Müpäü  
 püta tinitahüave, 'Aque  
 quenemie 'amarema vahesüa.  
 Yaquetinivaretaxatüa vaüca  
 que mütiuyuri Ti'aitame 'ahesie  
 mieme, que matiunenimayataxü.  
<sup>20</sup>Mücü neyani. Tamamata  
 Quiecarite müracutevasie nisütüani  
 ticuxatatü vaüca que mütiuyuri  
 Quesusi hesiena mieme. Yunaitü  
 menihüxiyacaitüni.

**Cairu nu'aya que müranayehüiya,  
 'uca müticuyecai 'imayüacu Quesusi  
 'ixuriqueiya**

(Mateu 9:18-26; Rucaxi 8:40-56)

<sup>21</sup>Mericüsü hutarieca 'anutaiye  
 'anuyacu canuvacie, yuvaücavatü  
 teüteri meniyucuxeürieni  
 'auriena haracuna tesita 'uvecacu.  
<sup>22</sup>Mericüsü tuqui va'ü xevitü, Cairu  
 titevatü, mana caninuani. Quesusi  
 'uxeiyaca niutihüximaqueni hüxiena.  
<sup>23</sup>Vaüriyarica canipitüani müpäü  
 'utaitü, Nenive pemüxime 'ucatütü.  
 Quenemayüamie manayevenicü,  
 'ayenieretü mayanicü. <sup>24</sup>Quesusi  
 'ütümana neyani.

Mericusü meniveiyacaitüni teüteri yumüiretü me'isaipünatü. <sup>25</sup>Hicü 'uca 'aniuyeicacaitüni vasata tamamata heimana huta viyari müyuriecai ticuyetü xuriya 'uhanisitüatü. <sup>26</sup>Vaüca tini'uxitüariecaitüni yumüireme teyu'uhayemavamete vahesüa 'axetü. Tita mürexeiyacai nai tiniutixütüani tiyutuatü. Yutatexieca, cui niyüanecaitüni masi. <sup>27</sup>'U'enaca que müticuxaxasivacai Qesusi hepaüsita, 'utümana 'umietü teüteri vasata, Qesusi 'ixuriquieya niumayüani, <sup>28</sup>müpaü tiyücühüavetü, 'Ixuriquieya xüca ne'umayüani xeicüa, nenanayevemücü. <sup>29</sup>Mericusü yapaucua xuriya peunua maneicacai. Yuvaiyarisie müpaü tiniuyumani mücü cuiniya meunuacü. <sup>30</sup>Hicü Qesusi yu'iyarisie retimaica yütürücariyacü mi'axixücü xeime, yapaucua ta'aurie 'aveca teüteri vasata müpaü niutayüni, Quepai ne'ixuriqui pumayüa. <sup>31</sup>Teyü'üquitüvemetemama müpaü metenitahüave, Cari pevaxeyatü teüteri naisata memasisaipünacacu, müya peraine, quepai pünesi'umayüa peraine. <sup>32</sup>'Iya nanieretüyani, que mü'ane miyuri xeiyaque. <sup>33</sup>'Uca 'uyüyüacatü maricacü, timaitü que mütiuyü yuhesie, hüxiena ninuani. Mana 'utihüximaqueca, naimetü tiniutahecüata que mütiuyü, que mütvaiyacü. <sup>34</sup>Hicü müpaü tinitahüave, Nenive, yuri pemütiuta'ericü pepanayeve. 'A'iyarisie

peca'uximatüarietü quenemie, 'aixüa pereu'erietü 'uxa'atüni varie yapecatiucacucuetü.

<sup>35</sup>Hicü müpaü 'utainecacu cuxi, va'üsüa miemete meniu'axüani müpaü mete'icühüavetü, 'Aniveri pemü. Titayari peti'uximatüa cuxi ti'üquitame. <sup>36</sup>Qesusi varu'enieca müpaü mete'icühüaveme, müpaü tinitahüave va'ü, Pepücaheumaca, yuri quetine'erieca xeicüa. <sup>37</sup>Hicü teüteri pücarupitüa memenuveiyacü. Pecuru Cacuvu yu'livamacame Vanimame xeicüa nivarupitüani. <sup>38</sup>Hicü va'ü quie heta'aca meyuxamurietüveme nivaruxeiya me'utisuaname me'utihivame yumüireme. <sup>39</sup>Muva heutahaca müpaü tinivarutahüave, Titayari xeteyuxamurie xete'utisuaana. Nunusi pücamüqui. Pucusu xeicüa. <sup>40</sup>Müme mecaninanaimacaitüni. Hicü yunaimetü varayenü'aca, nunusi muyecasio nivareutavitüni cuesieya varusieya mümeta hamatüana memü'uvacai. <sup>41</sup>Hicü mamayasie tiviereca, müpaü tinitahüave yuniuquicü, Tarita cumi, taniuquicü, 'Üimari 'acu, quenanucuquexi nematinahüaveni. <sup>42</sup>Yapaucua nanucuqueni nunusi, niuyeicacaitüni. Tamamata heimana huta viyari nexeyacaitüni. Cuitüva meniu'hüxiyani yemecü. <sup>43</sup>Qesusi heiseriemecü yatinarutahüave xevitü tüma mücuretimanicü que mütiuyü. Müpaüta tinivarutahüave, memüte'iminicü.

**Nasareti quiecarisie que mütiuyeicacai Qesusi**

(Mateu 13:53-58; Rucaxi 4:16-30)

**6** Mericusü mana neyani, yuquiecar

ninuani. Teyü'üquitüvamete  
 meniveiyacaitüni. <sup>2</sup>Hicü 'uxipiya  
 tucari 'aye'acu, tuquita nisutüani  
 ti'üquitatü. Müme memi'eniecai  
 meyumüiretü menihüxiyacaitüni  
 müpäü me'utiyuatü, 'Icü meixeiya,  
 haque pemieme. 'Icü que tiupitüarie  
 mütimaivenicü. Que tiupitüarie  
 'inüari mütürücavi mütiyuriencü.  
<sup>3</sup>'Icü caticaripiniteru, Mariya  
 münu'aya. Cacuvu Cuse Cura  
 Simuni va'iva catihücü. 'Uva  
 tahesüa mecetetitei 'ivamama  
 'ucari. Hicü menitixani'erieni.  
<sup>4</sup>Qesusi müpäü tinivarutahüave,  
 Tixaxatame ve'eme cani'erivani  
 naisarie, masi yuquiecarisie xeicüa  
 yumarema vasata yuquita ve'eme  
 püca'eriva. <sup>5</sup>Mana püca'yüvecai  
 xeime 'inüari mütürücaüye  
 mütiyurienicü. Hipame tecuicucate  
 xeicüa yuxexuime vahesie  
 'utimeca nivanarayexürieni.  
<sup>6</sup>Yuri memücate'eriecaicü,  
 ni'iyarixiecaitäni. Hicü quiecarite  
 'esimüyeyesie tini'üqitanecaitüni.

**Tamamata Heimana Yuhutame  
 que mütivareutanü'axüa  
 teyü'üquitüvamete**

*(Mateu 10:5-15; Rucaxi 9:1-6)*

<sup>7</sup>Mericiüsü Tamamata Heimana  
 Yuhutame varutacuevieca yu'aurie,  
 nivareutanü'axüani yuhutatame.  
 Heiserie nivarupitüani cacaiyarixi  
 memüca'itiyatüca vahepaüsita.  
<sup>8</sup>Müpäü tinivaruta'aitüani,  
 tixaütü memücate'upiximenicü  
 huyeta, mumuxi xeicüa, 'inüa  
 pücatixaü, cüsürita pücatixaü,  
 tumini vivurasie yemaneme  
 pücatixaü, <sup>9</sup>memeu'ixüanicü  
 cacai xeicüa, peru huta camixayari

memüca'anacatütücanicü  
 tinivaruta'aitüani. <sup>10</sup>Müpäüta  
 tinivarutahüave, Haque  
 xeme'axüani quita, muva  
 xequeneyuhayevani 'asita  
 quepaucua xemüyehuque.  
<sup>11</sup>Quiecarisie quiecatari xüca  
 mecaxetanaquil'erieni, xüca  
 mecayuvaüriyani memüxe'enenicü,  
 mana xequenanyecüni, tumuanari  
 xequeneucasixüa yucacaisie, müpäü  
 xeteyurietü xemütetahecüatanicü  
 vahesie que mürahüiva. 'Icü niuqui  
 caniseüyeni que nemütixecühüave,  
 Surumatari Cumuxatari cuini  
 mieme mepücatatacuritüarieni  
 müme vahepaü quepaucua  
 'isücame müvatacuevieni,  
 mücü quiecarisie quiecatari  
 que memütetatacuritüarieni.  
<sup>12</sup>Hicüsüari teyü'üquitüvamete  
 meneutayeixüani, müpäü  
 metecuxatatü, teüteri  
 memütehayevacü 'axa  
 memüteyuriecü. <sup>13</sup>Yuvaücavame  
 cacaiyarixi menivarayenü'axüani.  
 Tecuicucate yuvaücavame  
 haseiti mevarucavirivatü  
 menivanarayexürivacaitüni.

**Ti'üyame Vani que mütiumerie**

*(Mateu 14.1-12; Rucaxi 9. 7-9)*

<sup>14</sup>Hicü Herurexi müti'aitametücai  
 mana cuiepa niu'ena que mütiuyü.  
 Naisarie tiniutamariva que  
 mü'ane mühücütücai Qesusi.  
 Müpäü meniutiyanecaitüni,  
 Ti'üyame Vani caniyüaneneni.  
 Nanucuquetüarieni 'umüca,  
 'ayumieme mücü türücariya  
 nicuyuitüvani. <sup>15</sup>Hipatüta  
 müpäü meniutiyanecatüni,  
 'Eriyaxi canihücütüni, hipatüta,

tixaxatame caniyüaneni meripai miemetexi texaxatamete vahepaü 'anetü. <sup>16</sup>Herurexi masi 'u'enaca müpaü niutayüni, Süricü Vani canihücütüni nemi'aitaxü mu'uya manutivitequienicü. Mücü nanucuquetüarieni, rainecai.

<sup>17</sup>Mücü Herurexi meripai nivarutanü'ani memiviyacü Vani. Casariyanata nenutahüani, müpaü mütinaquecaicü Heruriya. Müpaü tiniuyüni Herurexi mitivitücü yu'iva 'üyaya, Heruriya mütitevacai, Herurexi 'ivaya Piriipe titevacacu. <sup>18</sup>Vani caviyarievētü cuxi müpaü tinicühüavecaitüni Herurexi, Pepücapitüarie pemevitücünicü 'a'iva 'üyaya.

<sup>19</sup>Heruriya ni'uxive'eriecaitüni. Niyutexienecaitüni 'imiemütü Vani. <sup>20</sup>Herurexi nimacarücaitüni Vani, 'imaitü tevi mühücütücaicü heiseriemecü yamüticamiecaicü, mupasiecaicü Cacaüyarisie mieme. Ni'üviyacaitüni. 'I'enietü 'asipücatimaicai que mütiyuriemücücai. Siepüre ninaquecaitüni mi'enienicü. <sup>21</sup>Merücüsü tucari naye'ani Heruriya Vani ma'ivacü, quepaucua Herurexi 'ixüarari mutavevi matinuivaxü yutucarisie. Te'aitamete, cuyaxi teva'aitüvamete, Carereyatari va'uquiyarima nivaruta'inieni. <sup>22</sup>Heruriya nu'aya 'uca vatahaca, tiutineica, nivanaquecaitüni Herurexi mümeta hamatüana memütecucacai yunaitü. Cuiepa ti'aitame müpaü tinitahüave 'üimari, Tita mümatinaque queneneutavaviri, nemümasiminicü. <sup>23</sup>Niyühürütüani yarehüavetü, Tita pemünetitavavirieni

nepümasimini, sepa cuiepa nemütü'aita hixüata 'arücame pemünetiutavaviri. <sup>24</sup>Hicü mana neyani 'üimari. Müpaü tinitahüave yuvarusi, Tita netitavavirieni. Mücü müpaü tinita'eiya, Vani Ti'üyame mu'uya quenetavavirie. <sup>25</sup>Mexüiva heutahaca cuiepa ti'aitamesüa, nitavavirieni müpaü 'utaitü, 'Ipaü canetininaqueni ne, hicü cuitü pemünesimini Vani Ti'üyame mu'uya, pateyusie yecaimé. <sup>26</sup>Cuiepa ti'aitame cui niyuhiveriecaitüni. Muyühürütüacü, teüteri hamatüana memütecucacai vacü, 'ayumieme pücayuvaüriyacai mita'imaiyacü. <sup>27</sup>Cuiepa ti'aitame cuya niutanü'ani cuitü, 'ita'aitüaca Vani mu'uya mütuimiecü. <sup>28</sup>Mücü heyaca, mu'uya nanutiviteni casariyanata. Pateyusie yecaimé ni'atüani. 'Üimari niyetuirieni, 'üimarita yuvarusi niyetuirieni. <sup>29</sup>Hicü mete'utamariéca, Vani teyü'üquitüvametemama menecüne, caxariéya menecueni. Teuquiyapa meneiteni.

### Teüteri que mütivarumi 'auxüme miriyari

(Mateu 14:13-21; Rucaxi 9:10-17; Vani 6:1-14)

<sup>30</sup>Merücüsü nü'arisixi Quesusisüa meniycuxeürieni, que memüte'uyuri que memüte'üiquitacai mete'itaxatüanique. <sup>31</sup>Iya müpaü tinivarutahüave, Cümüsü taxaüta tepuhu macumavesie, xequene'uxipieca 'esiva. Hipatü yuvaücatü meni'axecaitüni menecücacaitüni, 'ayumieme tucari mepücahücai ni memütecucanicü müme. <sup>32</sup>Hicü canuvásie menecüne



macumavesiepai yühücüate.  
<sup>33</sup>Yuvaücavatü menivaruxeiya memecü, menimaicaitüni Quesusi. Naime quiecarisie quiecatari yuvaücavatü yül'ucama menecüne me'unausaxüaximetü. Me'uhaitütüatü meneta'axüani müme meri. <sup>34</sup>Hicü 'anatiyeiximetü Quesusi, teüteri nivaruxeiya yumüireme. Nivarutinenimayata, muxasi yühüveme memücahexeiya vahepaü memü'anenecaicü. Mana nisütüani tiva'üquitüatü müremecü. <sup>35</sup>Hicüsüari ya'atevacacu tau, teyü'üquitüvametemama hesüana meniyucuxeürieni müpaü me'utiyaütü, 'Ena canacumaveni, yacanatevani tau. <sup>36</sup>Quenivareutanü'axüa 'aurava memütayeixüanicü quiecarite 'esimüyeyeusie 'emüyeyeusie, memütayutinanaïrienicü 'icuai. <sup>37</sup>Mücü masi müpaü tinivaruta'eïya, Xeme püta xequetenivarumicua. Müme müpaü metenitahüave, Tame tete'inanaiyu pa huta sienituyarisie 'arücame, tetevamini. <sup>38</sup>Mücü müpaü tinivarutahüave, Quepaümeme xepexeiya pa. Xequeneuxeiya. Yametetimaica, 'Auxüme payari, huta quesüteyarita, metenitahüave. <sup>39</sup>Hicü nivaruta'aitüani yunaime, memücuyaxixüanicü 'üxa macuyürasie yayupapaümetü. <sup>40</sup>Mana menicuyaxixüani, xei sienituyari ya huta teviyari heimana tamamata yameyupapaümetü. <sup>41</sup>Hicü 'auxüme payari 'anu'üca, huta quesüteyari meta, yuheima heutiniereca, pamüpariyusi 'ipitüaca Cacaüyari, pa niutitara. Nivaru'üitüani

teyü'üquitüvamete memüvaminicü. Huta quesüteyari niutimura yunaime vahesie mieme. <sup>42</sup>Yunaitü mete'ucuaca meniutihuxani. <sup>43</sup>Hicü menicuxeürieni pa yuhayevameyari tamamata heimana huta quirivayari hüpüneme, quesüteyarita 'üarime yuhayevame. <sup>44</sup>Müme memüte'ucuai 'uquisi xeicüa 'auxüme miriyari mecaniyupaümecaitüni.

### Quesusi ha heima que mütiyueicacai

(Mateu 14:22-27; Vani 6:16-21)

<sup>45</sup>Hicü nivarutamexüitüani teyü'üquitüvamete memacayaxecü canuvasie, memenuyehaitüiyacü Vesairapai haracuna 'anutaiye, mexi varateütüvacai teüteri. <sup>46</sup>Vareutanü'axüaca, hürisie neutiyune yutanenevienique. <sup>47</sup>Hicü 'ucutaicairecu, canuva haracuna hixüapa niuyemiecaitüni. Quesusi cuiepa püta niyueicacaitüni yuxaütame. <sup>48</sup>Mana me'uximatüaricame nivaruxeiya me'ivequeme, vahepa maye'ecacaicü. Hicü 'esivatücacu tuxacüta, Quesusi vahepa canamiecaitüni haracuna heima 'umietü. Niuyeyaniquecaitüni. <sup>49</sup>Müme me'ixeyaca haracuna heima 'umiecame, müqui me'erietü, meniutihiva. <sup>50</sup>Yunaitü menixeiya, meniyumuïnacaitüni. Mücü cuitü nivarutahüave. Müpaü niutayüni, Yu'iyari xequeneucayasa, ne nepüyüane. Xepücaheumamaca. <sup>51</sup>Hicü vahesüa ye'acu, canuvasie 'acayerücu, 'eca neunuani. Müme cuini mieme menihüxiyacaitüni meni'iyarixiecaitüni. <sup>52</sup>Pa hepaüsita que mütiyüü

'asimepücatehetimaivavecai, masi  
yu'iyarisie meniupupurucaitüni.

**Quesusi que mütivaranayexürüvacaï  
Quenesareti cuieyarisie**

(Mateu 14:34-36)

<sup>53</sup>Hicü 'anutaïye  
me'anucüneca Quenesareti  
cuieyarisie meneta'axüani.  
Mana menecuvieni canuva.  
<sup>54</sup>Canuvasio me'anaticüneca,  
yapaucua meneitimani quiecatari.  
<sup>55</sup>Naisarie miemete vahesüa  
meniutanausaxüani. Menisutüani  
tecuicucate meva'atüvatü 'itarisie  
me'aheime haque meme'enana  
quename mana nua. <sup>56</sup>Naisarie  
que müticuyeicacai, quiecarite  
'esimüyeyeusie, 'emüyeyeusie, yeuta,  
tecuicucate menicutuarivacaitüni  
quiecarï hixüapa, väüriyarica  
me'ipitüatü 'ixuriquieya xeicüa  
memümayüanicü. Yunaitü  
memicumaïvacaï menanayexürüve  
caitüni.

**Tita ca'itiyacame meyeitüa tevi**

(Mateu 15:1-20)

**7** Mericüsü 'auriena  
meniyucuxeürieni  
Pareseusixi, hipatüta 'inüaricü  
memüte'üquitametetücai  
Querusareme memeyecü.  
<sup>2</sup>Menivaruxeiya  
teyü'üquitüvametemama  
hipame metecuacame vamama  
ca'itiyacacu mecamaimatücaitü  
Huriyusixi vayeiyari que müti'ane.  
Meniniuquixiecaitüni müme.  
<sup>3</sup>Pareseusixi, hipatüta Huriyusixi  
teüteriyari yunaitü, xüca cuini  
mieme meca'utimaimani, tixaü  
mepücatecuaca, yutusima

vayeiyarisie yametecahütü.

<sup>4</sup>Quiecarï hixüapa me'ayecücatü  
xüca mecayüvenani hacü,  
mepücatecuaca. Väücava cuxi  
müireme yeiyari canixuaveni  
yamemütecahu, tecüxite xarite  
casute que memüte'itie. <sup>5</sup>Hicü  
Pareseusixi te'üquitameteta müpaü  
metenita'ivaviya, Titayari yutusima  
vayeiyarisie yamecatecahu 'ahesüa  
miemete teyü'üquitüvamete. Mesü  
vamama ca'itiyacacu mepütecu'a.  
<sup>6</sup>Mücü müpaü tinivaruta'eiya, Cari  
Quisariyaxi 'aixüa painecaï meripai,  
xexatatü xeme, 'aixüa yuhesie 'axa  
mü'ane xemü'avietacü. Müpaü  
catina'luca,

'Icü teüteri yutetacü ve'eme  
mepünesixata,

Que memüte'u'iyari püta teva  
mepu'uva.

<sup>7</sup>Xüanacüa xeicüa  
menenayexeiyani

Tita memüte'üqिता, teüteri  
va'aisica mühücücü xeicüa.

<sup>8</sup>Tita müti'aitacai Cacaüyari  
xete'uhayevaca, teüteri vayeiyarisie  
xeteniviyanï, tecüxite harevemete  
que xemütehaxina, tavari hepaüna  
müireme que xemüteyurie.

<sup>9</sup>Müpaüta tinivarutahüave, Visi  
xepüteyurie xeme, xe'ihayevaca  
tita Cacaüyari müti'aitacai  
yaxemütecahunicü yuyeiyarisie.

<sup>10</sup>Muisexi müpaü naineni,  
Quetivareuyehüvirieca  
'a'uquiyari 'avarusi. Tavari müpaü  
canaineni, Que mü'ane 'axa  
mutaineni yu'uquiyari yuvarusi  
hepaüsita, que'umierieni xei  
mieme. <sup>11</sup>Xemesü püta müpaü  
xeniutiyuaneni, Tevi xüca  
müpaü ticühüaveni yu'uquiyari

yuvarusi, nepini naime cūmana  
 pemūpareviyaniqueyu, mūcū  
 Curuvani canihūcūtūni, taniuquicū,  
 nepimini Cacaūyari, que maine,  
<sup>12</sup>mūcūcū xepūca'ipitūaca  
 'uxa'atūni varie 'asimūtiyurienenicū  
 yu'uquiyari yuvarusi vahesie  
 mieme. <sup>13</sup>Xecaneyeitūani tita  
 Cacaūyari mūtiutayū, yaxetecahutū  
 yuyeyarisie, que xemūtevaretuiri  
 yunivema. Vaūcavamecū  
 xepūteyurie 'icūpaū.

<sup>14</sup>Tavari yu'aurie varutacuevieca  
 teūteri, mūpaū tinivarutahūave,  
 Xequenene'enieca yunaitū,  
 xequetenemaivaveni. <sup>15</sup>Tevi  
 'aurie tixaūtū pūcatixuave  
 hesiena heutahame mūyūveni  
 ca'itiyacame meyeitūanicū. Tita  
 taūtana mūratineica, mūcū pūta  
 canihūcūtūni tita ca'itiyacame  
 mūreyeitūva tevi. <sup>16</sup>Xaūtū netū  
 mu'enaxū que'u'ena.

<sup>17</sup>Hicū teūteri varucu'eiriecu,  
 quita heutahacu,  
 teyū'ūquitūvametemama  
 menita'ivaviya 'ūxasi hepaūsita  
 que mūti'ūquitacai. <sup>18</sup>Mūcū mūpaū  
 tinivarutahūave, Cari xemeta  
 'asixepūcatemaivave vahepaū.  
 Xeme mūpaū xecatehetimaive,  
 naitū tevi 'aurie mūtixuave  
 hesiena heutahame pūcayūveni  
 ca'itiyacame meyeitūanicū  
<sup>19</sup>'iyarieyasie mūcaheutahaquecū.  
 Huriepana pūta neutahaqueni,  
 nihūani. Mūpaū 'utaitū, naime  
 'icuai 'itiyacame nixatacaitūni.  
<sup>20</sup>Tita tevi taūta mūratineica,  
 mūcū pūta canihūcūtūni tita  
 ca'itiyacame meyeitūa. <sup>21</sup>Teūteri  
 va'iyarisie catinimiemetūni 'axa  
 que memūteyūcūhūave, que

memūtevacumaūva que mū'ane  
 mūcayū'ūya mūcayūcūna,  
<sup>22</sup>que memūtenavaya, que  
 memūteyumemiva, que  
 memūte'icumaūva xeime  
 'ūyaya, que memūte'ihive'erie  
 tita mūcativapini, 'axa que  
 memūte'u'iyari, que memūte'irūma,  
 que memūteyucahive'erie  
 merucuyatūvetū, que  
 memūteyucuasiri, que  
 memūteyusevixima  
 'axa me'utiyaūtū, que  
 memūteyucatave'erie yacū xeicūa  
 que memūteyūcūhūave. <sup>23</sup>Mūcū  
 naitū 'axa que memūteyurie,  
 vataūta catinimiemetūni. Mūcū  
 ca'itiyacame caneyeitūvani tevi.

#### Yuri que mūti'eriecai 'uca Sirupenisiatanaca

(Mateu 15:21-28)

<sup>24</sup>Hicū mana heyaca, Tiru  
 cuieyarisie ninuani, Siruni  
 cuieyarisie. Quita heta'acu,  
 pūca'inaquecai Quesusi xevitū  
 mūtimariecacū, peru pūcayūvecai  
 mana mūyuhayevacū camarivatū.  
<sup>25</sup>Mericūsū, 'uca niu'ena  
 hepaūsitana. Cacaūyari mūca'itiya  
 ninūcaitūni 'iya nu'aya 'ucatūme.  
 'Uca cuitū hesiāna nuaca, hūxiāna  
 niutihūximaqueni. <sup>26</sup>Cūriyecusixi  
 vaniūqui caniniūquieyatūcaitūni,  
 Sirupenisiasie ninuivametūcaitūni.  
 Vaūriyarica nipitūcaitūni  
 meyenū'anicū cacayari 'axa  
 mū'ane, mixūnacū niveya.  
<sup>27</sup>Quesusi mūpaū tinitahūave,  
 Neuyeveca meri tūri  
 memūtihūxanicū. 'Aixūa pūca'ane  
 tūri vapa mūvanavairienicū,  
 sinurixi mūvaminicū. <sup>28</sup>Mūcū

müpaü tinita'eiya, Xasunicü peputaine 'uqui, peru 'asita sinurixi mepiticua'a türi vapa mexatüa mücavivive temüxiqiyari. <sup>29</sup>Quesusi müpaü tinitahüave, 'Aixüa pemutayücü, quenemie. Camü cacaiyari 'axa mü'ane 'ari nixüna 'anive. <sup>30</sup>Hicü yuquie heta'aca canitaxeiya yunive 'utasie cacaimé, cacaiyari 'axa mü'ane 'ixünacu.

**Quesusi que mürenayahüa tevi mücaheu'encai münenuriecai**

<sup>31</sup>Hicü Tiru cuieyarisie heyeyaca Siruni cuieyarisie niuyeyune. Tamamata Quiecarite müracutevasie 'uyeyaca, Carereya haracunayarise neta'ani. <sup>32</sup>Mana meni'atüirieni tevi mücaheu'encai münenuriecai. Vaüriyarica menipitüani hesiena mutimenicü. <sup>33</sup>Yateva heivitüca hücüame teüteri memüca'anu'uva, nacatana neica'uitüani yu'itüvame. 'Uta'aüsicavieca nimayüani nenieya. <sup>34</sup>Yuheima heutiniereca na'aivani Quesusi. Yuniuquicü müpaü tinitahüave tevi, Hepata, taniuquicü quevatiepietücani paine. <sup>35</sup>Yapaucua nacateya nivatuepiexüani nenieya niuxünarieni, heiseriemecü 'utaniutü nayani. <sup>36</sup>Hicüsüari nivaruhürütüani xeime memücatehecuxaxatüvanicü, peru que mütiवारuhürütüa, müme masi yemecü metenicuxatacütüni naisarie. <sup>37</sup>Vaicavamecü menihüxiyacütüni teüteri yame'utiyuatü, Naime 'aixüa catiniuyurieni. Müme memücaheu'encacai

meheu'enanacame nivarayeitüvani, müme memücaniuvavecai meniuvaveme nivarayeitüvani.

**Teüteri que mütiवारuni nauca miriyari**

(Mateu 15:32-39)

**8** Mericüsü 'anapaitütü tavari yumüiretü teüteri meyucuxeüriecu, 'icuai mecahexeiyacacu, teyü'üquitüvamete nivarutacuevieni yu'aurie. Müpaü tinivarutahüave, <sup>2</sup>Ne teüteri nepüvanenimaya. Haica tucari mepuyuri nehamatü. 'Icuai mepücahexeiya. <sup>3</sup>Meyehacacuitüveme xüca nevareutanü'axüani vaquie, huyeta mepe'amüxüani, hipatü tevapai mecaniquiecataritüni. <sup>4</sup>Teyü'üquitüvametemama müpaü metenita'eiya, Haque mieme peyüve pa mütiवारuminicü 'ime 'ena macumavesie. <sup>5</sup>Mücü müpaü tinivaruta'ivaviya, Quepaümeme xepexeiya pa. 'Atahutame, meniutiyuani. <sup>6</sup>Hicü nivaruta'aitüani teüteri cuiepa memücuyaxecü. 'Atahuta payari 'uti'üca, pamüpariyusi 'ipitüaca Cacaüyari, nititara. Teyü'üquitüvamete nivaru'ütüani memüvaminicü. Müme mecanivarumini teüteri. <sup>7</sup>Yapaümeme quesüte menivarexeiyacaitüni 'esimemüpepe. Pamüpariyusi 'ipitüaca Cacaüyari, tiniuta'aita quesüte memümiqüenicüta. <sup>8</sup>Mete'ucuaca meniutihuxani. Yuhayevameyari tarimeyari meniucuxeürieni teyü'üquitüvamete, 'atahuta quirivayari nayani.

<sup>9</sup>Eсиватүcacu nauca miriyari mecaniyupaümeccaitüni teüteri. Hicü nivareutanü'axüani.

<sup>10</sup>Teyü'üquitüvamete vahamatü yunaitü canuvasio menacayaxe, Rarümanuta müracutevasie menecüne.

**'Inüari que memüte'itavaviri  
Pareseusixi**

*(Mateu 16:1-4; Rucaxi 12:54-56)*

<sup>11</sup>Hicü Pareseusixi meniu'axüani. Menisütüani niuqui mexüatüatü hamatüana, me'livavirietü 'inüari memüxeiyacü muyuavisie mieme mupitüarie, memi'inüatanicü.

<sup>12</sup>Mücü yu'iyarisie ha'aivatü müpäü niutayüni, Titayari 'inüari metevava hicü miemetexi. Niuqui caniseüyeni que nemütixecühüave, yemecü 'inüari mepücapitüarieni hicü miemetexi. <sup>13</sup>Varucu'eirieca hutarieca nacayerüni canuvasio, 'anutaüyepai neyani.

**Tiyucuxanariyame Pareseusixi  
vahesüa mümieme**

*(Mateu 16:5-12)*

<sup>14</sup>Mericüsü teyü'üquitüvamete metenatümaiya pa mema'üniquecai. Xeime hücüa mepexeyacai pa canuvasio. <sup>15</sup>Hicü müpäü tinivaruta'limaiya, Yumarima 'aixüa xequeneyucuerivayurieca tiyucuxanariyame hepaüsita Pareseusixi vahesüa mümieme, Herurexisüa mümieme. <sup>16</sup>Müme müpäü meteniyutahüave, Pa temücaheye'üicü müya naineni. <sup>17</sup>Quesusi tiutimaica que memüteyücühüavecai müpäü tinivarutahüave, Titayari niuqui

xetexüatüa pa xemücahexeiyacü. Xecate'enana, xecatemaivave cuxi. Xe'iyari cuxi tisesel'i.

<sup>18</sup>Xe'uhüxitü xecateheuneniere, xe'unacatü xecateheu'enana, tixaü xecateha'eriva. <sup>19</sup>Auxüme payari ne'utitaracu 'auxüme miriyari vahesie mieme, quepäüme quirivayari hüpüneme xepucuxeürie muyuhayevaxü. Müme müpäü meniutiyuani, Tamamata heimana hutame. <sup>20</sup>Mücü tivarahüave, 'Atahuta payari nauca miriyari vahesie mieme ne'utitaracu, quepäüme quirivayari xepucuxeürie muyuhayevaxü. Müme meniutiyuani, 'Atahutame. <sup>21</sup>Müpäü tinivarutahüave, Queri xecatemaivave cuxi.

**Macüpecai que müranayehüiya  
Vesairasie**

<sup>22</sup>Hicü mecaneta'axüani Vesairapai. Teüteri meni'atüirieni 'uqui macüpecai, vaüriyarica me'ipitüatü mimayüanicü. <sup>23</sup>Hicü macüpecai mamayasie tiviereca, quiecaris tesitapai neihana. He'aüsicamaxüaca hüxitana, hesiena 'utimeca, müpäü tinita'ivaviya, Tixaü pecatixeiya. <sup>24</sup>Hicü 'anutanierica müpäü niutayüni, Teüteri cüyexi nepüvaxeiya yaxecüa me'ananeme, peru teüteri meneu'uvani. <sup>25</sup>Hicü hutarieca hüxitana niutimeni. Tevi nanutanieri, heunieretü nayani. Naime tiniuxeiya que mütvayacü. <sup>26</sup>Hicü Quesusi nitanü'ani quiena müpäü titahüaveca, Quiecarisie pepücaheumieni, xeime pepücaraxaxatüvani.

**Pecuru que mütiyutahecüataxü***(Mateu 16:13-20; Rucaxi 9:18-21)***27** Hicü Qesusi

teyü'üquitüvamete vahamatü  
yunaitü menecüne. Quiecarite  
'esimüyeyeusie meniu'uvacaitüni  
Sesareya Piripu 'aurie.

Mana huyeta me'uyehutü,  
müpaü tinivaruta'livaviya  
teyü'üquitüvamete, Teüteri que  
me'utiyuane que nemüpaicü ne.

**28** Mümeri müpaü metenita'eiya,  
Hipatü müpaü meniutiyuane, Vani  
Ti'üiyame pemühücücü, hipatüta  
'Eriyaxi pemühücücü, hipatüta  
texaxatamete pemüxevitü. **29** Hicü  
müpaü tinivaruta'livaviya, Xemeté  
que xe'utiyuane que nepüpaicü.

Pecuru müpaü tinita'eiya, Que  
mü'ane heiserie mupitüarie  
Cürisitütütü, 'ecü pecanihücütüni.

**30** Hicü nivaruhürütüani  
'asimemücatehehüavenicü xeime  
hepaüsitana.

**Qesusi que mütihecüatacai que  
mütimierieniquecai***(Mateu 16:21-28; Rucaxi 9:22-27)***31** Hicüsüari nisütüani

tiva'üquitüatü, müpaü 'utaitü,  
Neuveyeca cuxi ne Yuri Tevi que  
nemütiteva vaüca nemüticuinecü.

Ta'uquiyarima, mara'acate  
memühürütüarie, mümeta  
'inüaricü memüte'üquitamete  
mecanenitixani'erieconi.

Necanimieriemücü,  
necananutanierimücü hairieca  
tucarisie. **32** Icü niuquieya  
canihecüacaitüni que mutayü.

Hicü Pecuru yateva heivitüca  
nisütüani 'icu'imaiyatü. **33** Qesusi

ta'aurie 'aveca, hipame varuxeiyaca  
teyü'üquitüvamete, nicu'imaiyani  
Pecuru müpaü 'utaitü, Xaüsie  
queneuye'a Cauyumarie Nehüxie  
pepüca'aveni. 'Ecü Cacaüyaripaü  
pepücare'iyari, teüteri vahepaü  
xeicüa pepüre'iyari.

**34** Hicü yu'aurie varutacuevieca  
teüteri, teyü'üquitüvamete  
vahamame müpaü tinivarutahüave,  
Tevi xüca yuvaüriyani nehamatü  
muyeicanicü, queyuxani'erieca,  
queyuvaüriyani sepa  
curuxisie mümierieni, nehiesie  
quetiviyani. **35** Que mü'ane  
müyutavicueisitüamücü  
caniyutatümaiymücü. Que mü'ane  
müyutatümaiya nehiesie mieme,  
niuqui 'aixüa manuyünesie mieme,  
mücü niyutavicueisitüamücü  
yemecü. **36** Tevi nai cuiepa  
mütixuave xüca ra'ivanique, tita  
ra'ivaqueyu xüca yutatümaiyanique.

**37** Tevi titacü tiyutuani yutucari  
mücanavaiyarienicü. **38** Hicü  
miemetexi hipame va'üitama  
memüvacumaüva 'axa  
memütëyuruva vasata 'uyeicatü,  
que mü'ane münesiteviya miteviya  
neniuqui, neta Yuri Tevi que  
nemütiteva necaniteviyacamücü  
'iya quepaucua nemunuan  
ne'uquiyaripaü nemarivetü,  
netupirisixima memüpasie  
Cacaüyarisie mieme vahamatü.

**9** Hicü müpaü tinivarutahüave,  
Niuqui caniseüyeni que  
nemütixecühüave, hipatü 'uva  
memu'uva mepücacuini mexi  
mecanenierivave que mütiyüni  
quepaucua Cacaüyari munuan  
türücaüyemecü ti'aitatü. 'Arique  
mücaque mecanicuicüni.

**Quesusi yücü 'anetü que müratüa***(Mateu 17:1-13; Rucaxi 9:28-36)*

<sup>2</sup>Hicü 'ataxeime tucari  
 'anucayacu Quesusi nivarevitüni  
 Pecuru Cacuvu Vani yemuri  
 'amanutitevisie yuhücüame.  
 Mana yücü 'anetü nayeitüarieni  
 vahüxie. <sup>3</sup>Quemarieya xavatütü  
 nayani, cui tuxatü 'üvipaü. Cuipepa  
 mütama turiyame müya 'aneneme  
 püca'yüve mitiyeitüani. <sup>4</sup>Mana  
 'Eriyaxi Muiseximatü memasiücütü  
 menacüne, Quesusimatü  
 metenicuxatacaitüni. <sup>5</sup>Hicü  
 Pecuru müpaü tinitahüave Quesusi,  
 Ti'üquitame 'acu, 'aixüa cani'aneni  
 'uva temu'uvacü. Camüsü xamaru  
 tepütivevieni haicame, 'ahesie  
 mieme xeime, Muisexisie mieme  
 xeime, 'Eriyaxisie mieme xeime.  
<sup>6</sup>Pecuru 'asipücatimaicai que  
 mütayüniquecai, teyü'üquitüvamete  
 cui memeumamacaicü. 'Ayumieme  
 müpaü putayü. <sup>7</sup>Hicü haivitüri  
 nuaca nivaru'etüriviya. Xevitü  
 niutaniuni haivitürisie ya'utaitü,  
 'Icü caninenivetüni neninaqui'erieca,  
 xequene'enieca. <sup>8</sup>Yapaucua  
 mehanieretücüneca naisarie, xeime  
 mepüca'uxei yu'aurie 'uveme,  
 Quesusi xeicüa meniuxeiya.  
<sup>9</sup>Hicü yemurisie  
 me'acanexüaximecacu,  
 Quesusi nivaruta'aitüani  
 'asimemücatehehüavenicü xeime  
 tita memüte'uxei, mexi Yuri Tevi  
 müquite vasata ca'anucuquevecai  
 cuxi, 'ariqueque xeicüa. <sup>10</sup>Que  
 mainecai yamecatenichaucaitüni,  
 peru yusata niuqui  
 menixüatüacaitüni tita mütixatacai,  
 manucuqueni müquite vasata

que mainecai. <sup>11</sup>Hicü müpaü  
 metenita'ivaviya, Müme 'inüaricü  
 memüte'üquitamete, titayari  
 müpaü mete'utiyuane quename  
 heuyevese 'Eriyaxi meri munuani.  
<sup>12</sup>Mücü müpaü tinivaruta'eiya,  
 Neuyeveca 'Eriyaxi meri munuani  
 'aixüa miyurieni naime. Masi que  
 re'uxa Yuri Tevi hepaüsita, que  
 müreuyevese vaüca müticuinecü  
 müxani'erivanicü. <sup>13</sup>Masi ne  
 müpaü netinixecühüaveni, 'Eriyaxi  
 caninuaniri. Yamepiyuri que  
 mütivanaquecai, müpaü que  
 müre'uxa hepaüsitana.

**Quesusi que mürenayahüa temaicü,  
 cacaiyari 'axa mü'ane 'iviyacacu***(Mateu 17:14-21; Rucaxi 9:37-43)*

<sup>14</sup>Hicü mevaranucu'axirümeccacu  
 hipame teyü'üquitüvamete,  
 yumüireme teüteri menivaruxeiya  
 teyü'üquitüvamete va'aurie, mümeta  
 'inüaricü memüte'üquitametetücai  
 menivaruxeiya niuqui  
 mexüatüacame vahamame.  
<sup>15</sup>Hicü teüteri me'ixeiya  
 Quesusi, meniuhüxiyani,  
 hepana meniutanausaxüani  
 menitavaürütüani. <sup>16</sup>Mücü müpaü  
 tinivaruta'ivaviya müme 'inüaricü  
 memüte'üquitametetücai, Titacü  
 niuqui xetexüatüa vahamatü. <sup>17</sup>Tevi  
 xevitü müpaü tinita'eiya, Neuxei  
 ti'üquitame, nenive 'uquitüme  
 nepümasi'atüiri, cacaiyari 'axa  
 mü'ane minü'ücü ca'itaunietü  
 mütaniunicü. <sup>18</sup>Sepa haque  
 meita'axiya peiyehüpa, caaimuxari  
 püvayeneica, yutametecü  
 pütütaqueve putanaranare.  
 Ne nenivarutavavirieni  
 teyü'üquitüvamete 'ahesüa

miemete memenayehüanicü, peru mepüyutatexie. <sup>19</sup>Mücü müpaü tinivaruta'eiya, Cari hicü miemete yuri xepücate'erie. Quepaümexa peuyevese xehamatü nemucani. Quepaümexa nepüxenevieca. Xequenavitüqui. <sup>20</sup>Hicüsüari meni'atüirieni. Mücü cacäyari 'ixeyaca Quesusi, yapaucua nitanüni temaicü. Cuiepa 'ucaveca 'iya, nicurupenecaitüni, cuaimuxari 'anativietü. <sup>21</sup>Quesusi müpaü tinita'ivaviya quemasieya, Quepaümexa pi'axiia. Mücü müpaü niutayüni, Nunusiyaripai. <sup>22</sup>Müixa taipa hapa neihüpani 'imienique. 'Ecü xüca peyüveni 'asipemütüyurieni, quetanenenimayaca quetaneparevieca. <sup>23</sup>Quesusi müpaü tinitahüave, Titasü peraine, xüca neyüveni pemaine. Que mü'ane yuri müti'erie naimecü püyüve. <sup>24</sup>Hicü temaicü quemasieya müpaü tiniuhiva, Yuri nepüti'erie 'acu, queneneuparevi yuri xüca necati'erieca. <sup>25</sup>Quesusi yumüireme varuxeyaca me'anausaxüaximeme hepana meyucuxeürienique, nitatieni cacäyari 'axa mü'ane müpaü ticühüavetü, Neuxei 'ecü cacäyari pemüca'litaunie mütanianicü mü'enanicü, ne nematini'aitüaca pemixünacü, tavari pemüca'iviyanicü. <sup>26</sup>Iya cacäyari 'utahivaca 'itacasetü carima, nixüna. Müquipaü 'anetü nayani temaicü. 'Ayumieme 'esivatücacu yunaitü müpaü meniutiyuani, Caniumüniri. <sup>27</sup>Perusü Quesusi temaicü mamaya 'uviyaca nenucuhana. 'Iya nanucuqueni. <sup>28</sup>Hicü quita heutahacu, teyü'üquitüvemetemama müpaü

menita'ivaviya yuhüciate me'ayetetü, Titayari tetetatatexie tame temayenü'anicü. <sup>29</sup>Mücü müpaü tinivarutahüave, Yunenevietü yuhaquietü xeicüa caniyüveni meyenü'anicü 'ipaü 'aneneme.

**Quesusi tavari que mutayü que mütimierieniquecai**

(Mateu 17:22-23; Rucaxi 9:43-45)

<sup>30</sup>Hicü mana menecüne. Carereya cuieyarisie meniuyecüne. Püca'inaquecai xevitü mütitamarienicü. <sup>31</sup>Teyü'üquitüvemetetü tiniva'üquitüacaitüni. Müpaü tinivarutahüave, Ne Yuri Tevi nehücütütü nepüyetüiya teüteri vamamasie. Menenimiecuni. Nemierieme, hairieca tucari 'anucayayu nenanucuquemüci. <sup>32</sup>Müme 'icü niuqui mepücahetimaivavecai. Menimamacaitüni me'ita'ivaviyaque.

**Que mü'ane masi müve'eme**

(Mateu 18:1-5; Rucaxi 9:46-48)

<sup>33</sup>Mericüsü Caperünaume meneta'axüani. Quita meheutahaxüacu müpaü tinivaruta'ivaviya, Titacü niuqui xetexüatüacai huyeta. <sup>34</sup>Müme cayuvatü xeicüa meniumacaitüni, niuqui memüxüatüacaicü huyeta que mü'ane müme masi müve'emetücaicü. <sup>35</sup>Hicü 'ayerüca, Tamamata Heimana Yuhutame varutacuevieca yu'aurie, müpaü tinivacühüaveni, Xevitü xüca ve'eme 'ayeimücüni, neuyeveca yunaime vaparevivame



mayuyetitüanicü 'imatüreme  
mayuyetitüanicü. <sup>36</sup>Hicü nunusi  
'ahanaca vahixüapa nitaqueni.  
'Itituca müpaü tinivarutahüave,  
<sup>37</sup>Que mü'ane xeime  
mütanaqui'erieni 'ipaü me'aneneme  
türi nehesüa mümiemecü, mücü  
canenitanaqui'erimücü ne. Que  
mü'ane münesitanaqui'erieni ne  
xeicüa pücanesitanaqui'erieni,  
masi que mü'ane münesihyenü'a  
canitanaqui'erimücüta.

**Que mü'ane mücatasi'aye'uni, mücü  
tahesie tiniviyani**

(Rucaxi 9:49-50; Mateu 10:42)

<sup>38</sup>Vani müpaü tinitahüave,  
Ti'üquitame, xeime tahesie  
mücativiya tecaniuxeiya  
varayenü'avame cacaiyarixi  
'axa memü'anene, 'ahesüa  
niu miemetütü. Mücü tahesie  
mücativiyacü, 'ayumieme tepinena.  
<sup>39</sup>Quesusi müpaü niutayüni,  
Xepüca'inenaca. Tevi xüca  
türücaüyemecü 'inüari tiyurieneni,  
müpaü 'utaitü quename nehesüa  
mieme, quetiyüveni cuitüva  
nehapaüsita 'axa mutaineni. <sup>40</sup>Que  
mü'ane mücatasi'aye'uni, tahesie  
catiniviyani. <sup>41</sup>Que mü'ane  
xei tecüxiyari müxeharütiani  
Cürisitusüa miemete xemühümeccü,  
yemecü peixeyani tita müra'ivaxü.

**Titacü mütitiquetamüre**

(Mateu 18:6-9; Rucaxi 17:1-2)

<sup>42</sup>Que mü'ane mitiquetamüra  
xeime 'icü türi yuri memüte'erie,  
masi 'aixüa püyüniqeyu mata  
mahete xüca 'ecatütüanique  
cüpieyasie, haramarasie xüca  
heucahüiyanique meripai.

<sup>43</sup>'Amama xüca masihecähüpani,  
quenavitequi. Masi 'aixüa  
püyüniqeyu pemamapurütü xüca  
peheutahanique tucari maxuavesie,  
hutame pe'ucamamatü xasi  
taiyariyarisie pemücaheutahanicü  
mücatüvesie. <sup>44</sup>Mana cuisü  
müvacüme pücamüni tai  
pücatüveni. <sup>45</sup>'A'üca xüca  
masihecähüpani, quenavitequi.  
Masi 'aixüa püyüniqeyu xüca  
pe'ücapurütü peheutahanique  
tucari maxuavesie, hutame  
pe'uca'ücatü xasi taiyariyarisie  
pemücahüiyanicü mücatüvesie.  
<sup>46</sup>Mana cuisü müvacüme pücamüni  
tai pücatüveni. <sup>47</sup>'Ahüxi xüca  
masihecähüpani, quenivatitu'i.  
Masi 'aixüa püyüniqeyu xüca  
peheutahanique haque Cacaüyari  
müra'aita tapa pe'acüpetü, xasi  
taiyariyarisie pemücahüiyanicü  
hutame pe'ucahüxitü. <sup>48</sup>Mana  
cuisü müvacüme pücamüni, tai  
pücatüveni.

<sup>49</sup>Yunaitü meni'itiyacuni taicü,  
naitü mavari que müti'itüva 'unacü.  
<sup>50</sup>'Una 'aixüa cani'aneni, peru  
xüca hamuritü 'ayanique, titacü  
ha'usivime xeteheyeitüaniqueyu  
'una. 'Una xequenexeyani yuhesie  
'aixüa xeteyuxexeyatü.

**Quesusi que müti'üquitacai, 'uqui  
yü'üya mücu'eirie hepaüsita**

(Mateu 19:1-12; Rucaxi 16:18)

**10** Mericüsü mana heyeyaca,  
Cureya cuieyarisie 'uyeyaca,  
Curutani hatuxame 'anutaiye  
ninuani. Mana tavari teüteri  
hesüana meniuxeuëriecaitüni.  
Que mütiyurienecai, tavari  
tiniva'üquitüacaitüni. <sup>2</sup>Hicü

Pareseusixi meniu'axüani,  
 müpaü mete'icu'ivaviyatü  
 me'l'inüatatüvetü, Titauniva 'uqui  
 yül'üya mücu'eirienicü me'utiyaatü.  
<sup>3</sup>Mücu müpaü tinivaruta'eiya, Que  
 tixe'u'aitüa Muisexi. <sup>4</sup>Müme müpaü  
 metenitahüave, Muisexi nipitüani  
 tevi xapa mütavevienicü 'eiriya  
 hepaüsita, 'arique micu'eirienicü.  
<sup>5</sup>Quesusi müpaü tinivaruta'eiya,  
 Xe'iyari müsese'icü 'ayumieme  
 'icü 'aitüarica tinixe'uta'utüirieni.  
<sup>6</sup>Peru matüaripai naitü  
 mütiunetüariepai, Cacaüyari  
 nivarutivevienü 'uquitüme  
 'ucatueme. <sup>7</sup>'Ayumieme 'uqui  
 niyupatamücü, yuquemasi yuvarusi  
 vahesüa niyeyeimücü, yu'üyasi  
 tiniviyamücü. <sup>8</sup>Memüyuhutacai  
 xei vaiyari mecanacünicuni  
 meyuxevitü, cananuyüneni.  
 'Ayumieme mecaniyuxeveni,  
 mepücauyhutari. <sup>9</sup>Merücüsü  
 Cacaüyari que mütivaruxeviriyaxü,  
 tevi pücavataxüriexüani.  
<sup>10</sup>Hicü quita me'ayetetü,  
 teyü'üquitüvamete tavari  
 menita'ivaviya mücü hepaüsita  
 que mutayü. <sup>11</sup>Quesusi müpaü  
 tinivarutahüave, Que mü'ane  
 'icu'eirieme yül'üya, xeime püta  
 mütivitüni, mücü nicumaüvani que  
 mü'ane müca'yü'üya. <sup>12</sup>'Ucata xüca  
 'icu'eirieni yücüna, xeime püta xüca  
 'uticünata, mücü nicumaüvani que  
 mü'ane müca'yücüna.

**Quesusi que mütiuniu, türi 'aixüa  
 memü'itüarienenicü**

*(Mateu 19:13-15; Rucaxi 18:15-17)*

<sup>13</sup>Hicü hesüana  
 mecaniva'atüvacaitüni  
 türi vahesie mutimenicü,

peru teyü'üquitüvamete  
 menivarutate'acaitüni. <sup>14</sup>Quesusi  
 varuxeiyaca teyü'üquitüvamete  
 que memüteyuriecäi niuyeha'ani.  
 Müpaü tinivarutahüave,  
 Xequenivapitüaca türi  
 nehesüa memü'axenicü.  
 Xepücavanenasitüiyani.  
 Cacaüyari müya me'ananeme  
 catiniva'aitüvametüni. <sup>15</sup>Niuqui  
 caniseüyeni que nemütixecühüave,  
 que mü'ane nunusipaü  
 müca'yuvaüriya Cacaüyari  
 mütita'aitüanicü yapücatipitüarieni.  
<sup>16</sup>Hicü yumamasie varutitücütü  
 yacaniutainecaitüni para 'aixüa  
 memü'itüarienenicü vaheima 'utimeca.

**'Uqui müxicütücai**

*(Mateu 19:16-30; Rucaxi 18:18-30)*

<sup>17</sup>Merücüsü Quesusi  
 niyemieximecaitüni. Hicü tevi  
 'unausarümetü hesüana ninuani.  
 Hüxiena niutitunumaqueni müpaü  
 ticu'ivaviyatü, Ti'üquitame 'aixüa  
 pemütüuca'iyari 'acu, tita reuyevese  
 nemütüyurienicü tucari mücaxüve  
 nehesie mütinaquenicü. <sup>18</sup>Quesusi  
 müpaü tinita'eiya, Titayari 'aixüa  
 netiuca'iyarime penetixata.  
 Tevi 'aixüa mütiuca'iyari  
 'apüca'uyeica, Cacaüyari  
 yuxevitü 'aixüa pütüuca'iyari püta.  
<sup>19</sup>'Ecüsü 'aitüarica pepümate,  
 pepücati'amieni, xeime 'üyaya  
 cünaya pepücacumaüvani,  
 pepücatinavayani, xeimesie  
 pepücarahüpani peti'itavatü,  
 pepücati'acuamanani, 'aquemasi  
 'avarusi quetinivareuyehüvirieca,  
 que manuyüne. <sup>20</sup>'Iya müpaü  
 tinitahüave, Ti'üquitame, 'icü  
 naimesie yanepüticamie

temaicüyaripai. <sup>21</sup>Quesusi 'ixeyatü ninaqui'eriecaitäni. Müpäü tinitahüave, Xevitiüxa xeicüa peuyevese yapemütiyurieni. Quenemie, tita pemürexeyia quetinetua, tuminiyari quenivarumicua puvüresixi. Mücücü muyuavisie vaüca pepeucaqueni. Pevare'üitüame quenaye'a, nehiesie quetiniyiani, sepa curuxisie pemumierienique. <sup>22</sup>Icü niuquicü panutixünetüya. Yuhiverietü caneyani vaüca mürexeyacaicü.

<sup>23</sup>Hicü Quesusi yu'aurie hanieretüyaca müpäü tinivarutahüave teyü'üquitüvamete, Canicuaniveni xicusixi memaye'axüanicü Cacaüyari mütiva'aitüvametünicü.

<sup>24</sup>Teyü'üquitüvamete menihüxiyacaitüni niuquieyacü. Quesusi hutarieca müpäü tinivarutahüave teyü'üquitüvamete, Nenivema, canicuaniveni müme yuri memüte'erie tuminisie memaye'axüanicü Cacaüyari mütiva'aitüvametünicü. <sup>25</sup>Sepa mücacuanivenique cameyu manuyehani 'ivipame hüxieyasie, peru siepüre yeme pücuaneve xicu maye'anicü Cacaüyari müti'aitüvametünicü. <sup>26</sup>Müme masi vaüca menihüxiyacaitüni. Müpäü metenyücühüavecaitäni, Mericüte, xüca müpäü 'aneni, quepai püyüve mütavicueisitüarienicü.

<sup>27</sup>Hicü Quesusi vaxeyatü müpäü niutayüni, Teüteri mepücaývave memüyutavicueisitüanicü, masi Cacaüyari caniyüveni müvatavicueisitüanicü. Cacaüyari naimecü caniyüveni. <sup>28</sup>Hicüsüari

Pecuru nisütüani müpäü ticühüavetü, Camüsü tame naime tete'ucu'eirieca 'ahesie tepüteviya. <sup>29</sup>Quesusi müpäü niutayüni, Niuqui caniseüyeni que nemütixecühüave, que mü'ane micu'eirie yuqui yu'ivama yuvarusima yuquemasima yü'üitama yunivema yucuie, xüca varucu'eirieni necümana, niuqui 'aixüa manuyenesie mieme, <sup>30</sup>xei sienituyari masi varexeyatü canayeimücü hicü quite, 'ivamarixi, yuvarusima, yunivema, cuie. 'Uximatüarrietü varexeyatü canayeimücü. Tucari 'umamiesie 'aye'ame, tucari mücaxüve hexeyatü canayeimücü. <sup>31</sup>Peru yuvaücatü hicü memüve'emete, 'imatüremete mecanacünicuni, 'imatüremete ve'emete mecanacünicunita.

### **Tavari Quesusi que mutayü que mütimierieniquecai**

(Mateu 20:17-19; Rucaxi 18:31-34)

<sup>32</sup>Mericüsü huyeta menihucaitäni Querusareme meutiylene 'utüa, Quesusi nanuhaitüacaitüni. Teyü'üquitüvamete menihüxiyacaitüni. Hipatü memiveiyacai menimamacaitüni. Hicü tavari yateva canivarevitüni Tamamata Heimana Yuhutame. Nisütüani tivacuxaxatüvatü que mü'itüarieniquecai, <sup>33</sup>müpäü 'utaitü, Neuxei, Querusareme teneta'axüacuni. Ne Yuri Tevi que nemütiteva necaniyetuiyamücü mara'acate memühüritüarie vahesüa, müme 'inüaricü memüte'üquitamete vahesüa. Va'isücate menesitahüaveyu,

necanimieriemücü, menesiyetuayu teüteri memücahuriyusixi vahesüa. <sup>34</sup>Müme mecanenitananaimacuni, yuhaxüama nehiesie meniuta'aüsicaviecuni menenicuvaxüacuni, mecanenimiecuni. Peru hairieca tucari 'aye'ayu, necananucuquemücü.

**Cacuvu Vanimatü que memüte'itavavirie**

*(Mateu 20:20-28)*

<sup>35</sup>Hicü Severeu nivemama Cacuvu Vani yuhutatü 'aura me'acüneca, müpaü metenitahüave, Ti'üquitame, pütasinaque tahesie mieme yapemütiyurienicü, que temümatetavavirieni. <sup>36</sup>Mücü müpaü tinivaruta'eiya, Que tixenaque yanemütiyurienicü xehesie mieme. <sup>37</sup>Müpaü metenita'eiya, Quetaneupitüa 'atemutiyahecü xevitü 'aserieta xevitüta 'a'utata, quepaucua visi pe'anetü pemayani. <sup>38</sup>Hicü Qesusi müpaü tinivarutahüave, 'Asixepücatemate tita xemütecu'ivava. Nehepaü xete'ucacucuinetü xeteyüvave xemenu'ienicü tita nemüranu'ieni ne, nehepaü xeteyüvave xema'ivarienicü tevi que müranucanamiepaü hacü quepaucua muca'üyarie. <sup>39</sup>Müme müpaü meniutiyuani, Tecaniyüvaveni. Qesusi müpaü tinivarutahüave, Yemecü tita nemüranu'ieni xecanau'iecuni, nemüca'üyarienipäu xecanica'üyariecuni. <sup>40</sup>Peru heiserie nepücahexeiya nemüxepitüanicü ni neserietä ni ne'utata

'axemutiyahecü. Masi müme vahesie mieme mucuha'arisie xEICÜA, müme yametenipitüariecuni.

<sup>41</sup>Hipatü Tamamata me'u'enanaca que memutiyaanecai, menisütüani mevaxeümatü Cacuvu Vani. <sup>42</sup>Qesusi yu'aurie varutacuevieca yunaime, müpaü tinivarutahüave, Xeme müpaü xepütemate, müme nuivarite vasata memümariva mete'aitametetütü meteniva'uxitüaca mete'aitatü. Vavemete heiserie mecanexeiyani vahepaüsita que memüteyurieni. <sup>43</sup>Müpaü pücatiyüni xeme xesata. Que mü'ane ve'eme mayaniqueyu xesata, yunaime xeparevivame canayeimücü. <sup>44</sup>Que mü'ane mexüacame mayaniqueyu xesata yunaime xehesie mieme vaüriyarica ti'uximayatü canayeimücü. <sup>45</sup>Yuri Tevi que nemütiteva, que nemütinua, nemüpareviyanicü nepücanua, masi nevaparevienique püta necaninuani, netucari nemütatuanicü yumüireme vahesie mieme, nevaxünaque.

**Que müranutanierixü Varütimeyu macüpecai**

*(Mateu 20:29-34; Rucaxi 18:35-43)*

<sup>46</sup>Mericusü Quericu meneta'axüani. Mana meheyehuximecacu 'iya Qesusi, teyü'üquitüvametemama yunaitü, yumüiretü teüteri vahamatü, tevi macüpecai mana niucateitüni huye tesita tivautü, Varütimeyu titevatü, Timeyu nu'ayatütü. <sup>47</sup>Icü 'u'enaca quename Qesusi Nasaretitanaca 'uyüximecai, nisütüani müpaü tiuhivatü, Qesusi 'acu Raviri pemünü'aya,

quenenenenimayaca cuerietü.  
<sup>48</sup>Yümüretü menitate'acaitüni  
 cayuvatü müticanicü.  
 Mücüsü masi carima müpaü  
 tiniuhivacaitüni, Raviri nu'aya  
 'acu, quenenenenimayaca cuerietü.  
<sup>49</sup>Qesusi mana 'utaqueca, müpaü  
 niutayüni, 'Aura xequenehüaviyu.  
 Müme mehecüneca 'aura  
 menitahüave macüpecai,  
 müpaü me'utiyuatü, 'Aiyari  
 queneucayesa quenanucuquexi,  
 'aura pümasitahüave. <sup>50</sup>Mücü  
 yü'ücarari heviveca, 'anucuqueca,  
 Qesusisüa neyani. <sup>51</sup>Qesusi  
 müpaü tinitahüave, Que matinaque  
 nemümasiyurienicü. Macüpecai  
 müpaü niutayüni, Ti'üquitame  
 nepayeniereniqueyu. <sup>52</sup>Qesusi  
 müpaü tinitahüave, Quenemie,  
 yuri pemütiuta'ericü pepanayeve.  
 Yapaucua nanutaniere, huyeta  
 neiveiya Qesusi.

### Querusaremesie que müreutaha

(Mateu 21:1-11; Rucaxi  
 19:28-40; Vani 12:12-19)

**11** Mericüsüari  
 Querusaremesie  
 me'axüaximecacu Vetüpaquesie  
 Vetaniyasie, yemuritüa me'u'axüacu  
 Huriva Macu'u müracutevasie,  
 yuhutame nivarutanü'ani  
 teyü'üquitivamete. <sup>2</sup>Müpaü  
 tinivarutahüave, Quiecarari 'anutaiye  
 mucumasie xequenehu. Mana  
 xe'anutahaxüaximetü puxu nunusi  
 xecanetaxeiyacuni hacuviecame,  
 tevi hesiena müca'anutiyerüve  
 cuxi. Xequenacuxüna  
 xequenahani. <sup>3</sup>Xevitü xüca  
 müpaü tixecu'ivaviyani, Titayari  
 müya xeteyurie 'utaitü xeme

müpaü xequenetiyyua, Ti'aitame  
 neiyehüaca, cuitüva canenü'amücü.  
<sup>4</sup>Mericüsü mehecüneca caye  
 'utüa meneitaxeiya puxu  
 nunusi 'acuviecame quitenie  
 'aurie. Menecuxüna. <sup>5</sup>Teüteri  
 mana memüti'ucahi hipatü  
 müpaü metenivaruta'ivaviya,  
 Que xeteyurie puxu nunusi  
 xe'acuxünatü. <sup>6</sup>Hicü  
 yametenivarutahüave que  
 mütivarutahüavixü Qesusi,  
 teüteri yametenivarupitüani.  
<sup>7</sup>Puxu meneyehana Qesusisüa.  
 Hicü yü'ücarari me'enutiveriecu,  
 hesiena nanutiyerüni. <sup>8</sup>Yümüretü  
 me'ivaüritüatü yü'ücarari  
 meni'itüaximecaitüni huyeta.  
 Hipatüta cüye xavari me'uhapatü  
 meniyetuaximecaitüni.

<sup>9</sup>Memuhaitütüacai,  
 memul'imamatücahi müpaü  
 metenihivacaitüni,  
 Quetaneutavicueisitüa 'aixüa,  
 'aixüa queticuxaxasivani 'iya hepaüsita,  
 que mü'ane Ti'aitamesüa miemetütü  
 'amamie hepaüsita, <sup>10</sup>que mü'ane  
 Ti'aitametütü maye'ani tatevari  
 Raviri müti'aitacaipai, mücü  
 hepaüsita. 'Aixüa cani'aneni que  
 mü'ane taheima macave.

<sup>11</sup>Mericüsü Qesusi Querusaremesie  
 neutahani, tuqui 'amüpata neutahani.  
 Hanieretüyaca naisarie nivayeyani  
 'acayunirümecacu. Tamamata  
 Heimana Yuhutame vahamatü  
 yunaitü menecüne Vetaniyapai.

### Que mütiuniu 'axa mü'itüarienicü xapa mücatacacai

(Mateu 21:18-19)

<sup>12</sup>Mericüsü 'uxa'arieca  
 Vetaniya meheyecüneca Qesusi

neuhacamücücaitüni. <sup>13</sup>Xapa  
'uxeiyaca tevapai xavacame,  
hepana neyani 'ixeiyaque, siparasü  
xüca tixaü ticaxeiyaqueyu  
hesiena. Mana nuaca tixaütü  
cacatiniucaxeiya, xavari xeicüa,  
maxuxuavere müca'aye'avecaicü.  
<sup>14</sup>Qesusi hicü müpaü tinitahüave  
xapa, Hasuacu xevitü tüma  
'a'icuaxi pücaticuani. Meni'enieni  
teyü'üquitüvemetemama.

**Que müti'iti tuqui 'amüpa**

*(Mateu 21:12-17; Rucaxi  
19:45-48; Vani 2:13-22)*

<sup>15</sup>Hicü Querusareme  
meneta'axüani. Qesusi tuqui  
'amüpa curaruyarita heutahaca,  
nisütüani varanuyeveveyatü müme  
tuqui curaruyarita memütetuacai  
memütenanecai. Tumini  
patamete vamexate natixürieni,  
cucuruxi vatuayamete va'üparite  
natixürieni. <sup>16</sup>Pücapapitüacai tixaü  
mete'apitü memanuyecücanicü  
tuquita. <sup>17</sup>Mana tini'üquitacaitüni  
müpaü tivacühüavetü, 'Ipaüri  
care'uxa, Nequie nenevieri  
quiyari canimarivacamücü  
yunaima nuivarite vahesie  
mieme. Xemesü püta terü  
xecanayeitüaca haque tenavayamete  
memüyu'avieta. <sup>18</sup>Hicü mara'acate  
memühürütüariecai, müme  
'inüaricü memüte'üquitametetücai  
vahamatü yunaitü meni'enieni,  
menimacarücaitüni, teüteri  
yunaitü memühüxiyacaicü  
tita müti'üquitacai hepaüsita.  
'Ayumieme mara'acate  
metenicuvautüvecaitüni que  
memüte'imienique. <sup>19</sup>Hicü  
'ucutaicarecu quiecarisie nivayeyani.

**Xapa que mütiuva, tiutaniucu para  
'axa mü'itüarienicü**

*(Mateu 21:20-22)*

<sup>20</sup>Merücüsü ximeri  
'ame'uyehuximetü, xapa meniuxeiya  
vaquime naitü nanayaripaitü.  
<sup>21</sup>Pecuru heye'erieca que mütiuyü  
müpaü tinitahüave Qesusi,  
Neuxei Ti'üquitame, 'iya xapa  
pemaxaxatacai 'axa mü'itüarienicü,  
mücü caniutavaniri. <sup>22</sup>Qesusi  
müpaü tinivacühüaveni, Cacaiyarisie  
yuri xequetene'erieca. <sup>23</sup>Niuqui  
caniseüyeni que nemütixecühüave,  
que mü'ane müpaü mütitahüave 'icü  
yemuri, 'Ena quene'apata, haramarasie  
queneu'ahüva 'utaitü, xüca yu'iyarisie  
cayuxamurieca, masi xüca yuri  
ti'erieca quename müpaü tiyüni que  
maine, müpaü catiniyümücü hesiena  
mieme. <sup>24</sup>'Ayumieme nepütixecühüave,  
naime xemütetavauni xeyunenevietü,  
yuri xequetene'erieca quename  
xe'itanaqu'eri. Müpaü yuri  
xete'eriecacu, yacatiniyümücü  
xehesie mieme. <sup>25</sup>Quepaucua  
xemüyunenevie, xüca xeimesie  
xetehüacuni xequeteneuyehüvirieca,  
mütixehueyehüvirienicüta xeme  
xe'uquiyari muyuavisie macave,  
ta'aurie que xemüte'axürüve. <sup>26</sup>Me  
xüca xecatevareuyehüvirieni teüteri,  
xe'uquiyari muyuavisie macave  
pücatixehueyehüvirieni xeme ta'aurie  
que xemüte'axürüve.

**Qesusi heiserie que mürexeyacai**

*(Mateu 21:23-27; Rucaxi 20:1-8)*

<sup>27</sup>Merücüsü tavari meneta'axüani  
Querusaremesie. Tuqui curaruyarita  
yeyeicacacu, mara'acate  
memühürütüariecai, mümeta

'inüaricü memüte'üquitametetücai,  
'uquiravesixi vahamatü yunaitü  
'aura meniu'axüani. <sup>28</sup>Müpaü  
metenita'ivaviya, Haque pemieme  
heiserie pemexeiya 'ipaü  
pemütiyuriencü. Quepaicü  
heiserie masipitüa 'ipaü  
pemütiyuriencü. <sup>29</sup>Hicü  
Quesusi müpaü tinivaruta'eiya,  
Neta nepüxeta'ivaviya xeimecü  
xeicüa. Xüca xenesita'eiya,  
neta nepütixetahüave haque  
memieme heiserie nemexeiya  
'ipaü nemütiyuriencü. <sup>30</sup>Vani  
quepaucua müti'üyanecai, taheima  
timiemetücai 'üyarica, teüteri  
vahesüa pümiemetücai nusu.  
Xequeneneuta'eiya.

<sup>31</sup>Hicü müme niuqui  
menixüatüacaitüni müpaü  
me'utiyuatü, Xüca tame müpaü  
te'utiyuani quename taheima  
miemetücai, mücü müpaü  
nitayümücü, Titayari yuri  
xecate'li'erri. <sup>32</sup>Masi xüca müpaü  
te'utiyuani quename teüteri  
vahesüa miemetücai, quesü yüni.  
Müpaü metenyücühüavecaitüni  
memüvamacarücaicü teüteri. Müme  
yunaitü müpaü meniutiyuanecaitüni  
Vani hepaüsita, quename yuricü  
tixaxatametücai. <sup>33</sup>Ayumieme  
müpaü metenita'eiya Quesusi,  
'Asitepücatemate. Quesusita  
müpaü tinivaruta'eiya, Mericüte,  
neta 'asinepücatixetahüave haque  
memieme heiserie nemexeiya 'ipaü  
nemütiyuriencü.

**Te'üviyamete 'axa teyuruvamete**

(Mateu 21:33-46; Rucaxi 20:9-19)

**12** Hicüsüari nisütüani  
tivacuxaxatüvatü,

'ixasi hepaüsita ti'üquitatü.  
Müpaü niutayüni, Tevi  
haraveri caniutavevieni. Caxie  
'uca'uitüaca, 'utatesaca, vati'ineca  
caxie püname, 'e'utevime  
'utavevieca neniereme capa caxie  
'ucacuaiyanicü, te'üviyamete  
nivaruhürütüani vacuetatüatü,  
tevpai caneyani. <sup>2</sup>Hicü tucari  
'aye'acu muticuacuaxesie,  
ti'uximayatame niutanü'ani  
te'üviyamete vahesüa, haraverita  
mieme 'icuaxi yapaümeme  
mütanaqui'erienicü cusiyarisie  
mieme. <sup>3</sup>Müme masi me'iviyaca,  
me'licuvaxüaca, yacü xeicüa  
maveme meneinü'ani. <sup>4</sup>Hutariecata  
xeime niutanü'ani ti'uximayatame  
vahesüa. Mücü menituaxa  
mu'uyasie, meninanaimacaitüni.  
<sup>5</sup>Xeimeta 'utanü'acu, menimieni.  
Yuvaücavame cuxi nivanü'acaitüni.  
Hipame menivarutivani, hipame  
menivarucui.

<sup>6</sup>Xeime cuxi canexeyacaitüni  
yunivetüme münaqui'eriecai.  
'Imatürieca nitani'ani vahesüa, müpaü  
tiyücühüavetü, Meteneiyehüviriecuni  
nenive. <sup>7</sup>Te'üviyamete masi  
müpaü metenyücühüavecaitüni,  
Camüsü, 'icüsie catininaquimücü  
cusiyari piniteya. Cümü tepimieni,  
tahesie püta mütinaquenicü. <sup>8</sup>Hicü  
me'iviyaca menimieni, haraveri varie  
meneicahüani.

<sup>9</sup>Meriçüte, que tiyurieni  
haraveri cusiyari. Caninuamücü,  
te'üviyamete nivatixütüamücü,  
hipame nivahürütüamücü püta  
yuharaveri. <sup>10</sup>Cari ni 'icü 'utüarica  
xecatetiterüvavave,

Mücü tete memutaxani'eri qui  
vevivamete,

Mücü 'isiquina titutuicame  
nayani.

<sup>11</sup> Ti'aitame müpaü catiniuyurieni,  
Canimariveni que temüte'ixeiya.

<sup>12</sup> Müpaü mepütemaicai  
müvaxatacaicü 'üxasi hepaüsita  
ti'üquitatü. 'Ayumieme  
metenicuvautüvecaitüni  
que memüte'iviyacü, peru  
menivamacarücaitüni teüteri. Hicü  
meheicu'eirieca menecüne.

### Cuviyexunu tuminieya

(Mateu 22:15-22; Rucaxi 20:20-26)

<sup>13</sup> Hicüsüari hesüana  
menivarutanü'ani Pareseusixi  
hipame, mümeta Herurexisie  
memüteviyacai hipame,  
niuquieyasie memiviyacü.  
<sup>14</sup> Mana me'u'axüaca müpaü  
metenitahüave, Neuxei  
ti'üquitame, tame tepümasimate  
'ecü yuri pemutainecü,  
pemüca'acuerivayuriecü sepa  
xevitü que mütiyücühüave, yücü  
pemücativaxeyiacü teüteri, masi  
Cacaüyari huyeya hepaüsita  
pepüti'üquita que mütiva iyacü.  
Tamüsü, titauniva mütiyutuanicü  
Sesaxi cuviyexunuyasüa mieme,  
pücatauniva nusu. <sup>15</sup> Tepi'üitüani,  
tepüca'i'üitüani nusu. Mücü  
yatimaitü yuhesie 'axa mü'ane  
que memüte'avietacai, müpaü  
tinivarutahüave, Titayari  
xenete'inüatatüve. Tuminiyari  
xequena'üi nemixeyiacü xeime.  
<sup>16</sup> Müme meni'atüirieni xeime.  
Müpaü tinivarutahüave, Quepai  
ramu'u püra'uxa, quepai  
püra'utüarica 'icü. Sesaxi mu'uya  
canihücütüni, 'utüaricayata,  
metenita'eiya. <sup>17</sup> Qesusi

müpaü tinivarutahüave, Tita  
Sesaxisüa mütimieme, Sesaxi  
xequetenapinirieca. Tita  
Cacaüyarisüa mütimieme,  
Cacaüyari xequetenapinirieca.  
Menihüxiyani que mutayü.

### Que memüte'ita'ivaviyaxü, müquite que memüte'anucu'uni hepaüsita

(Mateu 22:23-33; Rucaxi 20:27-40)

<sup>18</sup> Hicü hesüana meniu'axüani  
Saruseusixi. Müme  
yameniutiyanecaitüni quename  
müquite meca'anutaneniereni.  
<sup>19</sup> Hicü müpaü metenita'ivaviya,  
Neuxei ti'üquitame, Muisexi 'ipäu  
catiniu'utüani tahesie mieme, tevi  
xüca masicaya 'umüni, xüca cueya  
'uyuhayeva türi cavarexeiyatü,  
mücü tevi canitivitümücü yucue,  
türi nivativevimücü masicaya  
nivemama memütaterüvarienicü.  
<sup>20</sup> Mericüsü 'atahutatü  
'amenititecaitüni 'ivamarixi.  
Vamasi 'uca niutivitüni, niümüni  
türi cavaruhayevaca. <sup>21</sup> Mutaya  
nitivitüni, mücütü tiumü türi  
cavaruhayevaca. 'Iyata mutaya  
yunaitüta yaxeicüa menitivitüni.  
<sup>22</sup> 'Atahutatü yunaitü 'ivamarixi  
türi mepücavaruhayevaxü.  
Yunaitü me'ucuicu, 'ucata  
tiumü. <sup>23</sup> Mericüte, quepaucua  
xeniu memanucu'uni, 'atahutatü  
memitivitü quepai ra'üya pürayani.  
<sup>24</sup> Hicü Qesusi müpaü  
tinivaruta'eiya, Camü, 'ayumieme  
xecaniyuyarieca, 'utüaricayari  
xemücamatecü, que mütitürücäyue  
Cacaüyari 'asixemücatematecü.  
<sup>25</sup> Quepaucua müquite  
memanucu'uni, mepücaneneüqueni  
mepücaquiueca. Cacaüyari



tupirisiximama taheima miemete vahepaü mecaniyüacacuni püta. <sup>26</sup>Müquite vahepaüsita que müre'uxa que memüte'anucu'uni, cari xecate'ititerüvavave Muisexi xapayasie haque tupiriya mexata, Cacaüyari que mütitahüavixü, 'Apurahami, 'Isahaqui, Cacuvu necanivacacaüyariütüni ne, cananuyüeni. <sup>27</sup>'Ayumieme müquite pücavaxata quename vacacaüyari haitü. Memayeyuyuri püta vacacaüyari caniyuxatani, sepa memucui. Cuini mieme xepüyuyari.

**'Aitüarica müve'eme**

*(Mateu 22:34-40)*

<sup>28</sup>Hicü xevitü 'inüaricü müti'üquitametücai 'aura 'ayaca, varu'enieca niuqui mexüatüacame, tinimaicaitüni 'aixüa mütivata'eiyacü, müpaü tinita'ivaviya Quesusi, Que mü'ane 'aitüarica masi püve'eme naime 'aitüaricasie mieme. <sup>29</sup>Quesusi müpaü tinita'eiya, 'Ipaü cananuyüeni 'aitüarica müve'eme, Xequeneu'enana 'Ixaherisixi. Ti'aitame mütacacaüyari, 'Iya Ti'aitame caniyuxevini. <sup>30</sup>Peninaqui'eriecamücü Ti'aitame mü'acacaüyari naime que pemüre'iyaricü, naime que pemüti'amatecü, naime que pemüticu'erivacü, naime 'atürüariyacü. 'Icü 'aitüarica masi canive'emetüni. <sup>31</sup>'Esivatücacu hepaüna müve'emecü 'ipaü cananuyüeni, Peninaqui'eriecamücü 'ahepaü tevi que pemüti'anaqui'eriepaü. Xevitü 'aitüarica pücaxuave

masi ve'emetütü, 'icü hutatü xeicüa. <sup>32</sup>Hicü 'iya ti'üquitame müpaü tinitahüave, 'Aixüa pü'ane ti'üquitame. Yuri pecaniutaineni, Cacaüyari caniyuxevini, xevitüxa 'apüca'uyeica hepaüna 'anetü, que pemaine. <sup>33</sup>Xüca tevi 'inaqui'erieca naime que müre'iyaricü, naime que mütimaivecü naime yutürüariyacü, xüca yuhepaü tevi naqu'erieca que mütiyunaqui'eriepaü, yemecü 'aixüa caniyümücü, que mücatiyüni naitü mavari mütaiya mücui'iva. <sup>34</sup>Hicü Quesusi 'l'enieca timaivemepaü que mütita'ei müpaü tinitahüave, Teva pepüca'uyeica pemaye'anicü, Cacaüyari mati'aitüvametütü mayanicü. Hipatü tavari mepücayuvaüriyacai tixaütü memüte'ita'ivaviyacü.

**Cürisitu quepai püranive, que mütivaruta'ivaviyaxü**

*(Mateu 22:41-46; Rucaxi 20:41-44)*

<sup>35</sup>Quesusi müpaü niutayüni tuquita ti'üquitatü, Titayari müpaü mete'utiyuane müme 'inüaricü memüte'üquitamete, quename vaniu Cürisitu Raviri xiüyarieya hücütüni. <sup>36</sup>Mücü Raviritütü müpaü niutayüni 'Iyari Mütiyupata 'icuyuitüvacacu,

Ti'aitame müpaü tinitahüave que mü'ane müneti'aitüva, Neserietta quenacani

'Aquetatüa mexi nevarahapani müme memümasi'aca'unie.

<sup>37</sup>Tamüsü Raviri Neti'aitüvame tinitaterüva. Mericüte, xüca Cürisitu tita'aitüani Raviri, que timasiücüni quename xiüyarieyatüni. Teüteri meyutemamavietü meni'eniecaitüni yuvaücatü.

**Quesusi que mütivaxanetacai  
sicürivanusixi**

(Mateu 23:1-36; Rucaxi 11:37-54; 20:45-47)

<sup>38</sup>Ti'üquitatü müpäü  
tinivarutahüave,  
Xequeneyucuerivayurieca müme  
'inüaricü memüte'üquitamete  
vahepaüsita, müme müvanaque  
memeu'uvanicü 'letütüme  
me'anacatütü, quiecari hixüapa  
vaürisica memüpitüarienicü,  
<sup>39</sup>teüteri vahüxie memayaxecü  
tuquita, quiecame 'aurie  
memayaxecü 'ixüararipa, müme  
vahepaüsita. <sup>40</sup>Viyurasixi  
vapini mepütevarutixütüiri,  
'emetehutevitü neneviericü  
mücamasiücünicü que  
memüteyurie. Vahesie masi yemecü  
tinahüivani.

**Viyura tumini que müti'atüiri  
Cacaüyari**

(Rucaxi 21:1-4)

<sup>41</sup>Hicü tumini macaxürüiva  
cacuniyari hüxie niutayerüni  
Quesusi. Teüteri nivaxeyacaitüni  
tumini me'acaxürüvame cacunisie.  
Xicusixi yumüiretü vaüca  
meneicaxürüvacaütüni. <sup>42</sup>Mericusü  
xevitü viyura caninuani tuminicü  
mavetü, hutame neucaxürieni xei  
senitavuyari müraye'atüca 'axeicüa.  
<sup>43</sup>Hicü yu'aurie varutacuevieca  
teyü'üquitüvamate, müpäü  
tinivarutahüave Quesusi, Niuqui  
caniseüyeni que nemütixecühüave,  
'icü viyura tumini mavetü  
cacunisie neicaxürieni vaücava,  
müme yunaitü memeicaxürüiva  
'esiva xEICÜA meneicaxürieni.  
<sup>44</sup>Yunaitü müme meneicaxürieni

tita müranuyuhayeva, peru 'iya  
yuhaveri mieme neucaxürieni,  
naime cümana mütiyumicuacai.

**Quesusi que mutayü, tuqui 'amüpa  
que mütica'unarieniquecaicü 'arique**

(Mateu 24:1-2; Rucaxi 21:5-6)

**13** Hicü tuquita 'ayenecacu,  
teyü'üquitüvamatemama  
xevitü müpäü tinitahüave,  
Neuxei, ti'üquitame, tetexi que  
timamarivave quite. <sup>2</sup>Quesusi  
müpäü tinitahüave, 'Icü qui  
petixeiya 'amüpapa. Tete  
pücahayevarieni yuheima 'atetü.  
Naitü canica'unariemücü.

**'Inüarite que mütimasiücüni  
taparirümecacu**

(Mateu 24:3-28; Rucaxi 21:7-24; 17:22-24)

<sup>3</sup>Hicü Huriva Macu'u yemurisie  
'ucaicu tuqui 'amüpa hüxie,  
Pecuru Cacuvu Vani 'Atürexixi  
yühücüate müpäü metenita'ivaviya,  
<sup>4</sup>Quetatineutaxatüa quepaucua  
müpäü pütüyüni que pemaine.  
Tita ti'inüariyaritüni quepaucua  
maye'aximeni 'icü naitü.  
<sup>5</sup>Quesusi nisütüani müpäü  
tivacuxaxatüvatü, Yumarima  
'aixüa, xevitü catixe'u'irüviya.  
<sup>6</sup>Yumüiretü mecani'axüacuni  
müpäü me'utiyuatü quename  
nehesüa memiemete, Ne Cürisitu  
necanihücütüni, me'utiyuatü.  
Yumüireme menivacuamanacuni.  
<sup>7</sup>Xeme quepaucua xemüva'enieni  
cuyaxi meyucuitüveme, quepaucua  
xemi'enieni cuya niuqui,  
xepücauyuxamurieca. Neuyeveca  
müpäü mütiyünicü, peru 'acuxi  
naitü pücatapare mücücü.  
<sup>8</sup>Nuivarite mecaniyeha'acuni

mevacuicutü hipame nuivarite,  
xexuime cuiesie quiecatari  
mecaniyeha'acuni hipame cuiesie  
miemete mevacuicutü. Naisarie  
cuie canitayuamücü, haca  
canitavemücü. Peru que mütiyüni,  
mücücü canisutüariemücü xeiçüa  
cuiniya.

<sup>9</sup>Xemesü

xequeneyucuerivayurieca.

Mecanixeyetuacuni

'isücate vahesüa. Tuquiteta

xecanitiveiyacuni.

Cuvexunarurisixi te'aitamete

vahüxie xecaniti'ivaviyariecuni

nehesüa xemümiemetecü,

xemüvaheçüatüacacü que

xemüte'unenierixü. <sup>10</sup>Neuyeveca

'icü niuqui 'aixüa manuyüne

memütaxatüarienicü yunaitü

nuivarite meri. <sup>11</sup>Quepaucua

memüxetiviya memüxe'anuhapani

'isücate vahüxie, xeta'icuevatü

xepücayu'iyaritüaca que

xemutiyaneni. Masi que

xemütepitüarieni 'ana, müpäü

xeputiyaneni. Xeme xepücahüme

que mü'ane yamütayüni, 'Iyari

Mütiyupata püta canihücütüni

que mü'ane yamütayüni. <sup>12</sup>Ra'iva

pürayetuani mümierienicü,

quemasiya yunive niyetuamücü,

türi meniyeha'acuni yu'uquiyarima

vahepaüsita, metenita'aitacuni

memücüi'ivanicü. <sup>13</sup>Yunaitü

menixe'uxive'eriecacuni nehesüa

xemümiemetecü. Que mü'ane

tiuca'enivatü 'amuyeicani

quepaucua mümünique, mücü

nitavicueisitüariemücü.

<sup>14</sup>Xeme 'uxa'atüni xenixeyiacuni

mücü tevi müvaseviximani

müracumaveriyani mana

'utiveme haque 'aixüa müca'ane

mutivenicü, que mainecai

tixaxatame Tanieri. Titerüvame

quetimaiveni tita mütixata. 'Ana

hürisie mequeyuta'una müme

Cureya cuieyarisie meme'uvani.

<sup>15</sup>Que mü'ane caxetunisie macaca

'uxipietü, mücü 'anacayame yuquita

pücaheutahani yupini tivayepinique.

<sup>16</sup>Que mü'ane yeuta meyeicani,

yu'utüma pücanuani yu'ücar

tivayehurienique. <sup>17</sup>Xüa 'ui müme

memuhuca müme memütésisitüa

'ana. <sup>18</sup>Xequeneyunenevieca

müpäü catiuyünicü muhäütüsie.

<sup>19</sup>Iya tucarisie 'uximatüarica

canitixuaverimücü cuini mieme,

matüaripai quepaucua Cacaüyari

nai mütiunetüa hicüque que

mücatixuavecai, tavari que

mücatixuavenita. <sup>20</sup>Ti'aitame xüca

'esicareiteritüanique 'uximatüarica,

ni xevitü tevi pücatavicueniqueyu.

Mesü müme müvaranuyexei vacü

'esipüreiteritüa.

<sup>21</sup>'Anari xevitü xüca müpäü

tixecühüaveni, Camü, 'ena

caniuyeicani Cürisitu, Camü

mana, xüca haineni nusu, yuri

xepücate'l'erierieca que mü'ane müya

mutaineni. <sup>22</sup>Yacü Cürisitusixi, yacü

texaxatamete mecani'axüacuni.

'Inüari mecanitiveiecuni

mamarivaveme mevacuamanaque

'asita müme memanuyexeyarie

xüca meyüvavenique. <sup>23</sup>Xemesü

xequeneuyü'üviya. Nai

nepütixe'utaxatüa yacatüyüvecacu cuxi.

#### Yuri Tevi que mütinuani

(Mateu 24:29-35, 42-44; Rucaxi 21:25-36)

<sup>24</sup>'Ana 'iya 'uximatüarica  
heunuayu, tau caniyürimücü,

mesa cacanihecüarivimücü,  
<sup>25</sup>xuravesixi mecanicaxüricuni  
 muyuavisie miemete, müme  
 türücarıya memexeyıa muyuavisie  
 mecaniyuitüariecuni. <sup>26</sup>'Ana  
 Yuri Tevi que nemütiteva  
 mecanenixeıyacuni haisata  
 ne'acamiece, cui  
 netürücaüyetü, nexavatütü.

<sup>27</sup>'Anarita netupirisixima  
 nenivatanü'axüamücü,  
 müme nemüvaranuyexei  
 nenivacuxeirimücü, taserieta  
 ta'utata tahixüata tasutüapa  
 memeu'ıva, naisarie cuie  
 manunıere muyuavitüa.

<sup>28</sup>Narıca xeha'erivatü müpaü  
 xequetenemaıca, quepaucua xavari  
 mücavivieni xücarı yürani, xüca  
 mamateya cuneıcanı, tasüari  
 'auracacutüca. <sup>29</sup>Xemeta yaxeıcüa,  
 quepaucua xemixeyıa 'ıpaü  
 tiyüaneme, yaxequetenemaıca  
 quename hehurari, quitenie  
 müta'axımenıpaü. <sup>30</sup>Nıuqui  
 canıseüyeni que nemütıxecühüave,  
 hicü miemetexi mepücıtıxüni,  
 mexi 'ıcü naitü ca'aye'ave. <sup>31</sup>Cuie  
 muyuavi naitü canıtıxümücü, peru  
 ne nenuqui pücaxüni.

<sup>32</sup>Tevi 'asıpücıtimate  
 quepaucua maye'anı 'ıya tucarı,  
 taheıma miemete tupırisixıta  
 'asımepücıtimate, neta  
 'asınepücıtimate Cacaüyari Nu'aya  
 nehücütütü. Ne'uquıyari xecıca  
 catınımaıca.

<sup>33</sup>Yumarıma, xequenayenenıerenı  
 xequeneyunenevıca,  
 'asıxemücatematecü quepaucua  
 maye'anı. <sup>34</sup>Müpaü canı'anenı  
 que mütiuyü, tevi tevapai metüa,  
 yuqui mucu'eiri. Te'uxımayatamete

nıvaruhürıtüanı yuxexuıme,  
 vamayüıtarıcü vahürıtüatü.  
 Qıtenı tıhüveme tiıta'aitüanı  
 mayenıerenıcü. <sup>35</sup>Xemeta  
 'ayumieme xequenayenenıerenı,  
 'asıxemücatematecü quepaucua  
 munuani qui cusıyari, ya  
 taıcaı ya tücarı hıxüapa, ya  
 vacana tahıvayu, ya yuımuana.  
<sup>36</sup>Xequenayenenıerenı capa  
 xecusume xe'utaxeyıacı yapaucua  
 nuame. <sup>37</sup>Que nemütıxecühüave  
 xeme, yunıme netınıvacühüavenı  
 vahesie mütınaquecü, xequenayene  
 nıerenı.

#### Que memüte'ıvıyaquecai Qesusı

(Mateu 26:1-5; Rucaxı 22:1-2; Vanı 11:45-53)

**14** Merıcüsü huta tucarı  
 neıvevecıtüni  
 'ıxüararı maye'anıcü quepaucua  
 mema'erıvacı Cacaüyari que  
 mütıvaruhayevaxü vateüterıma,  
 quepaucua pa cacuxaxanıme  
 memücuacı. Mara'acate  
 memühürıtüarıecı müme 'ınüarıcü  
 memüte'üquitametetücaı vahamatü  
 metenıcvautıvecaıtüni que  
 memüte'ıvıyacı me'ıcuamanatü,  
 que memüte'ımıenıcü. <sup>2</sup>Müpaü  
 metenıyücühüavecaıtüni,  
 Mecuxı 'ıxüaramete vahüxie  
 'asıtemücateyurıenı, teüteri capa  
 meıyutaxamurıenıcü.

#### Visı mu'üa que mütıucavırıyari Qesusısıe

(Mateu 26:6-13; Vanı 12:1-8)

<sup>3</sup>Merıcüsü Vetanıyasıe 'ıyeıcatü  
 tınıucuanı Sımınısüa que mü'ane  
 cıınıyacı müca'ıtıyacaısüa.  
 Hıcü 'ıca mana canınuanı  
 tete vısi mü'ane pıteıyari

'ahanatü, visi mu'üa 'aye'üneme nariuru titevacame canücame cui müraye'arücai. Puteya cüüpieya 'anumuraca, Qesusi mu'uyasie neitiyurieni visi mu'üa. <sup>4</sup>Hipatü meha'atü müpaü metenyücüühüavecaitüni, Titayaricuta yacü xeicüa reiyehüa 'icü visi mu'üa. <sup>5</sup>Püyüveniqueyu mituanicü 'icü visi mu'üa haica sienituyari 'inüariyari' heimana yapaümecü, tuminiyari memüiquienicü puvüresixi. Menitiecucaitüni 'uca.

<sup>6</sup>Peru Qesusi müpaü niutayüni, Xequeneuhayeva, titayari xete'l'uximatüa. 'Aixüa catiniuyurieni nehesie mieme. <sup>7</sup>'Uxa'atüni varie 'amecaniu'uvacuni puvüresixi xehesüa. Quepaucua xemüyuvaüriya xecaniyüvaveni 'aixüa xemüvayurienicü, nesiere xehesüa 'anepüca'uyeicani 'uxa'atüni varie. <sup>8</sup>'Icü que mütiyüvecal, müpaü catiniuyurieni. Ne'ayeyuricacu cuxi, caneniucavirieni nemücateuquienicü. <sup>9</sup>Niuqui caniseüyeni que nemütixecühüave, sepanetü haque mecuxaxasivani 'icü niuqui 'aixüa manuyüne hepaüsita naisarie cuiepa, 'icü 'uca que mütiuyuri canita'üxasisiemücü ma'erivanicü.

**Cura que mütiyuvaüriya miyetuanicü Qesusi**

(*Mateu 26:14-16; Rucaxi 22:3-6*)

<sup>10</sup>Hicü Cura 'Isicariutitanaca, Tamamata Heimana Yuhutame müxevitütücai, caneyani mara'acate memühürütüari'ecai vahesüa 'iyetuanique. <sup>11</sup>Müme me'l'enieca

meniyutemamaviecaitüni. Müpaü metenitahüave tumini memi'ütüaniquecaicü. Mücü tinicuvaunecaitüni quepaucua 'aixüa mütiyüni'quecal miyetuanicü.

**Ti'aitame 'Icuaiya que mütiu'aisie 'inüariyari**

(*Mateu 26:17-29; Rucaxi 22:7-23, Vani 13:21-30; 1 Curinitutari 11:23-26*)

<sup>12</sup>Mericüsü Pa Mücacuxaxani 'ixüarariyari sutüari'ecacu, quepaucua memüvacuicai muxasi türixi meteha'erivatü Cacaüyari que müti'varuhayevaxü vateüterima, teyü'üquitüvametemama müpaü metenitahüave, Haque masihenaque temuhucü 'aixüa temeiyurienicü, 'ixüarari 'icuaiyari pemürecuanicü. <sup>13</sup>Hicü yuhutame teyü'üquitüvamete nivarutanü'ani müpaü tivarutahüaveca, Quiecarisie xequenehu. 'Uqui mana püxe'anucunaque ye'lü 'ahanatü hecuanüca. Mücü xequenanuveiya. <sup>14</sup>Haque meuhani, müpaü xequeteneta'hüavi quiecame, Ti'üquitame müpaü paine, Hipatüte haqueva qui müme nemütiva'lüquitüa nehamatü 'ixüarari 'icuaiyari temücanicü. <sup>15</sup>Mücü qui taüta xe'utivitüme püxexeisitüani hipame qui 'emüyeva naitü 'ureyepicame 'aixüa tiha'arütüari'ecame. Muva 'aixüa xequeteneyuri tahesie mieme. <sup>16</sup>Hicü mana menecüne teyü'üquitüvamete. Quiecarisie meneta'axüani. Que müti'varutahüavixü meteniutaxeiya. Muva 'ixüarari 'icuaiyari 'aixüa meteniuyurieni para memüteha'erivanicü Cacaüyari que müti'varuhayevaxü vateüterima.

<sup>17</sup>Mericusü 'ucutaicarecu, Quesusi, Tamamata Heimana Yuhutame vahamatü yunaitü mecani'axüani.

<sup>18</sup>'Ame'atecacu metecuacacu, Quesusi müpäü niutayüni, Niuqui caniseiyeni que nemütixecühüave, xevitü xeme nehamatü müticua'a pünesiyetüani.

<sup>19</sup>Hicü meniyuhiverietücateitüni. Müpäü metenita'ivaviya yuxexuitü, Ne netihücü. <sup>20</sup>Mücü müpäü tinivaruta'eiya, Xeme Tamamata Heimana Yuhutatü, xevitü canihücütüni que mü'ane pa manati'üve nehamatü 'licü xacüsie.

<sup>21</sup>Yuri Tevi que nemütiteva, nepüyemie nemümierienicü que müre'uxa nehepäüsita, perusü xüa 'ui que mü'ane munesiyetüani Yuri Tevi nehücütüme. 'Aixüa cani'aneniqueyu masi xüca ca'utinuiwaque 'iya.

<sup>22</sup>Hicü metecuacacu, Quesusi pa 'anucü'üca 'aixüa 'utayüca Cacaüyari hepäüsita pa hepäüsita, 'litaraca pa, nivarumini, müpäü 'utaitü, Xequenanu'üi, 'licü caninevaiyaritüni.

<sup>23</sup>Tecüxi 'anucuhanaca pamüpariyusi 'ipitüca Cacaüyari nivaru'itüani. Yunaitü menenuti'ixüani mücüsie.

<sup>24</sup>Müpäü tinivarutahüave, 'Icü caninexuriyatüni, türatu mühecua caniseiriyamücü. Yümüireme vahesie mieme nityeuriyamücü. <sup>25</sup>Niuqui caniseiyeni que nemütixecühüave, tavarixaxie hayari nepüca'anu'ieni mexi ca'aye'ave quepaucua hecuamecü nemenu'ieni haque Cacaüyari müra'aita.

**Quesusi que mutayü, Pecuru que mütiyucu'imavaniquecai, quename ca'imaicai 'utaitü**

*(Mateu 26:30-35; Rucaxi 22:31-34; Vani 13:36-38)*

<sup>26</sup>Hicü cuicari Cacaüyari hepäüsita me'utacuicaca,

menecüne Huriva Macu'lu yemurisie. <sup>27</sup>Quesusi müpäü tinivarutahüave, Xeme yunaitü hicü tücaricü xenicunuitüaricuni necümana, que müre'uxa, Muxasi vahüveme necanimiemücü, muxasi menitaxüriexüacuni. <sup>28</sup>Nesü nemierieme ne'anutaniereme necanixe'anucuhaitüiyamücü Carereyasiepai. <sup>29</sup>Hicü Pecuru müpäü tinitahüave, Ne sepanetü yunaitü memücunuitüaricuni, nepücacunuani ne. <sup>30</sup>Quesusi müpäü tinitahüave, Niuqui caniseiyeni que nematicühüave, hicü yüvicüta vacana hutacüa catahivavecacu cuxi, 'ecü haicacüa pepü'acu'imavani, quename pecanesimate pe'utaitü. <sup>31</sup>Mücü cuini mieme masi müpäü putayü, Sepanetü 'ahamatü nemumierienique, yanepücatinecu'imavani. Yunaitü yaxaicüa meniutiyuanecaitüni.

**Quesusi que mütiyutanenevie Quetisemanisie**

*(Mateu 26:36-46; Rucaxi 22:39-46)*

<sup>32</sup>Hicü Quetisemani müracusevasie menecüne. Müpäü tinivarutahüave teyü'üquitüvamete, 'Uva xequenateni mexi nenenevie. <sup>33</sup>Pecuru, Vani, Cacuvu nivarevitüni yateva. Mana cuini mieme 'uta'aivatü yuhiverietü nayani. <sup>34</sup>Müpäü tinivarutahüave, Ne'iyarisie cuini mieme neninehieverieca, mücücü nemüximetü tüma. 'Uva xequeneyuhayeva xequenetaneniereni. <sup>35</sup>Hicü 'esiva yateva niuyani. 'Utihüximaqueca cuiepa, niyutanenevieneni xüca tüma

xüa tiyüvenique müca'aye'aniqueyu que mütiyüniuecai. <sup>36</sup>Müpaü niutayüni, Ne'uquiyari 'acu, naimecü pepiyüve 'ecü. 'Icü tecüxi quenanhani cuerietü hivericacü yanemüca'itüarienicü, mesü que münetinaque ne pücatixaü, 'ecüsü que mümatinaque püta quetiuyüni. <sup>37</sup>Hicü muva ninuani, nivarutaxeiya mecusume. Müpaü tinitahüave Pecuru, Simuni 'acu, peticusu. Pecatiyüvecai pemütanierenicü xei hurayari. <sup>38</sup>Xequenetaneniereni, xequeneyunenevieca capa 'axa xete'uyurienicü xe'uta'inüasieme. Xe'iyari püyuväuriya, xevaiyari püta puverarani. <sup>39</sup>Hicü hutarieca heyaca niyutanenevieni yaxeciüa 'utaitü. <sup>40</sup>Hutarieca muva nuaca nivarutaxeiya tavari mecusume memücusimarietücateicü. 'Asimepücatematecai que memüte'ita'eiyaquecai. <sup>41</sup>Hicü hairieca muva nuaca müpaü tinivarutahüave, Hicürixüa xequenecusuni xequene'uxipieca. 'Ariri cümütücarü, canaye'ani. Camüsü, Yuri Tevi nehücütütü, 'axa teyuruvamete vamamasie nepüyetuiyani. <sup>42</sup>Xequenanucu'uti, tepüvanaquiyu. Neuxei, que mü'ane münesiyetuani 'acanamiene.

#### **Quesusi que mütiuviyarie**

*(Mateu 26:47-56; Rucaxi 22:47-53; Vani 18:2-11)*

<sup>43</sup>Mericusü yapaucua müpaü tivacühüavecacu cuxi, Cura caninuani, Tamamata Heimana Yuhutame müxevitütücai. Yuvaücavame teüteri yuhamame nivaravitücaitäni cusirate cüyexi mete'u'ucame. Mara'acate

memühürütüariecai, mümeta 'inüaricü memüte'üquitametetücai 'uquiravesixita menivareyenü'ani. <sup>44</sup>Mericusü que mü'ane miyetuaniquecai 'inüari nivarupitüani teüteri mevayecünirümeccacu ya'utaitü, Que mü'ane memütavaürütüani ne'l'isetü, mücü canihücütüni. Xequeneuviya 'iya, xequenanuhani 'aixüa xe'ihütü. <sup>45</sup>Hicü Cura nuaca, 'aura niuyani cuitü. 'Aixüa 'acu Ti'üquitame titahüaveca, ni'iseni. <sup>46</sup>Hicü müme meniviya. <sup>47</sup>Müme 'aura memütü'ucal, xevitü yucusira vatihanaca, nivani ti'uximayatame mara'acame mühürütüariecaisüa mümiemetücai. Nacaya naviteni. <sup>48</sup>Quesusi müpaü tinivarutahüave, Xeme cari xepeyecü cusirate cüyexi xe'u'ütü xenesiviyaque, tinavayamepaü que mütiyiviyaüva. <sup>49</sup>Müixa xesata neniuyeicacaitüni tucarcü tuquita neti'üquitatü, xepücanesihevi. Peru que'aye'ani 'utüarica que maine. <sup>50</sup>Hicü yunaitü me'icü'eirieca meniyyuta'unaxüani.

#### **Temaicü que mütiyu'unaxü**

<sup>51</sup>Xevitü temaicü niveiyacaitüni rinu savanayaricü yu'eimatü mümavecaicü. Meniviya temaicü, <sup>52</sup>peru mücü yusavana 'ucu'eirieca niyyuta'una mavetü.

#### **Quesusi que mütiutahüavarie 'isücate vahüxie**

*(Mateu 26:57-68; Rucaxi 22:54-55, 63-71; Vani 18:12-14, 19-24)*

<sup>53</sup>Hicü mara'acame mühürütüariecaisüa meneihana Quesusi. Mana meniyyucuxeürieni

mara'acate memühiritüariecai  
'uquiravesixi, müme 'inüaricü  
memüte'üquitametetücai yunaitü.  
<sup>54</sup>Pecuru tevapai niveiyacaitüni,  
mara'acame mühiritüariecai qui  
'aurie ninuani. Tacua tupirisixi  
vahamatü niutivecaitüni tai 'aurie  
cüxetü.

<sup>55</sup>Hicü mara'acate  
memühiritüariecai yunaitü  
'isücate menivavautüvecaitüni  
tehecüatamete, memixanetacü  
Quesusi, vaniucicü memimienicü.  
Haquevasü mepücavarutaxei.

<sup>56</sup>Yümüiretü mete'itavatü  
menihecüatacaitüni que  
vanü memüte'unenierixü  
peru vaniucü pücauyexevicai.

<sup>57</sup>Hipatü me'anucu'uca  
menitahecüata mete'itavatü que  
memüte'unenierixü vanü, müpäü  
me'utiuyatü, <sup>58</sup>Tame teni'enieni  
'ipäu haineme, 'Icü tuqui mamacü  
muveviya nenita'unamücü, haica  
tucari 'anucayayu xeimeta  
nenitavevimücü mamacü  
caveviyacame. <sup>59</sup>Ni müpäü que  
memütehecüatacai, vaniucü  
pücataxevirivecai.

<sup>60</sup>Merücüsü mara'acame  
mühiritüariecai vahixüapa  
'utaqueca, Quesusi niuta'ivaviya  
müpäü 'utaitü, 'Asipecatita'ani.  
Que tita 'icü memütehecüata  
'ahepaüsita. <sup>61</sup>Mücü masi cayuvatü  
mana niuvecaitüni, tixäu püca'uta'a.  
Mara'acame hutarieca müpäü  
tinita'ivaviya, 'Ecü peticürisitu.  
Que mü'ane 'aixüa müticuxaxasiva,  
'ecü petinu'aya. <sup>62</sup>Quesusi müpäü  
tinita'eiya, Ne necanihücütüni.  
Yuri Tevi que nemütiteva, xeme  
xecanenixeiyacuni, Que Mü'ane

Mütürücaüye serieta ne'acaime.  
Ne'acamieme taheima mieme  
haisata xecanenixeiyacuni.

<sup>63</sup>Hicü mara'acame yu'ixuriqui  
'utisanaxüaca müpäü niutayüni,  
Que cuxi tetevareyehüva  
tehecüatamete. <sup>64</sup>Xeme  
xecani'enieni que mütisevixima  
Cacaiyari 'axa 'utaitü. Que  
xeteyücühüave. Müme yunaitü  
müpäü meniutiyuanecaitüni  
quename müpäü reuyevecai  
mümierienicü.

<sup>65</sup>Hipatü menisütüani  
hesiena me'uti'aüsicavivatü  
me'inanaimatü. Meheitinaca  
hüxiena, menitihusutücüne müpäü  
mete'icühüavetü, Quetinehecüatani  
quepai müyüane. Tupirisixita  
me'iviycaca menicusunacaitüni.

**Pecuru que mütiyucu'imavacai,  
Nepüca'imate Quesusi 'utaitü**

*(Mateu 26:69-75; Rucaxi 22:56-62;  
Vani 18:15-18, 25-29)*

<sup>66</sup>Merücüsüari Pecuru vatipai  
'uvecacu qui 'aurie tacua, 'uca  
caninuani müti'uximayatametücai  
mara'acame mühiritüariecaisüa  
mieme. <sup>67</sup>Pecuru 'uxeiyaca  
cüxecame, heutaniereca,  
müpäü niutayüni, 'Ecüta  
'iya Nasaretitanacamatü  
pecaniuyeicacaitüni Quesusimatü.  
<sup>68</sup>Mücü niyucu'imavacaitüni,  
müpäü 'utaitü, Ne havaicü  
nepüca'imate, 'asinepücatimate  
que pemaine. Müpäü 'utayüca  
quitenie nanuyeyani. Vacana  
niutahiva. <sup>69</sup>Hicü 'iya 'uca  
hutarieca 'ixeiyaca nisütüani  
müpäü tivacühüavetü müme  
mana memüti'ucacai, 'Icü xevitü



canihücütüni müme. <sup>70</sup>Mücü tavari niyucu'imavacaitüni. Yareutevitüta müme mana memüti'ucai tavari müpaü metenitahüave Pecuru, Yuricü 'ecü xevitü müme pecanihücütüni. Camüsü Carereya pecaniquiecametüni, vahepaü pemütiuniucacü. <sup>71</sup>Hicü nisutüani müpaü 'utaitü, Cacaüyari 'axa xüca nesiurienique tüma xüca neti'itavani, yemecü nepaine, tixaü 'icü tevi nepücamate xemixata. <sup>72</sup>Cuitüva hutarieca vacana niutahiva. Pecuru Quesusi niuquieya na'erivani que mütitahüavixü, Vacana hutarieca catahivavecacu cuxi, 'ecü haicacüa pecani'acu'imavamücü quename pecanesimate pe'utaitü.'Icü nai ra'erivatü niutasuani.

**Quesusi que mütiutahüavarie Piratu hüxie**

*(Mateu 27:1-2, 11-14; Rucaxi 23:1-5; Vani 18:28-38)*

**15** Hicüsüari 'ucatarecu cuitü mara'acate memühürütüariecai, 'uquiravesixi, mümeta 'inüaricü memüte'üquitametetücai, hipatüta 'isücate yunaitü meyucuxeürieca meyu'enieca, Quesusi menehana hüacame, Piratu meniyeüirieni. <sup>2</sup>Piratu müpaü tinita'ivaviya, 'Ecü Huriyusixi teüteriyari tiva'aitüvame petihücü. Mücü cayucu'imavatü müpaü tinita'eiya, 'Ecüsü müpaü pecanaineni. <sup>3</sup>Mara'acate memühürütüariecai menixanetacaitüni vaücava. <sup>4</sup>Tavari müpaü tinita'ivaviya Piratu, Tixaü pecatita'ani. Camü que müreupaüme memümasixaneta.

<sup>5</sup>Quesusi tavari tixaü cacaniuta'ani. 'Ayumieme Piratu niuhüxiyani.

**Cuvexunaruri que mütiuta'aitaxü, Quesusi mümierenicü**

*(Mateu 27:15-31; Rucaxi 23:13-25; Vani 18:38-19.16)*

<sup>6</sup>Mericüsü xexuime visie mücü 'ixüararipa vahesie mieme nenayexünacaitüni 'anutahüivacame, que mü'ane memivaviriecai. <sup>7</sup>Xevitü nanutahüivacaitüni 'ana Vaxavaxi titevatü. 'Iya cuviyexunu 'unamete vahamatü nanutahüivacaitüni. Müme cuviyexunusixi mevaca'unarümetü meteniyucüni. <sup>8</sup>Hicü yumüiretü teüteri me'u'axüaca menitavavirieni, yamütiyurienicü yaxecüa que mütiyurienecai xexuime visie vahesie mieme. <sup>9</sup>Piratu müpaü tinivarutahüave, Xeme tixenaque nemüxe'anayexünirienicü Huriyusixi tixe'aitüvame. <sup>10</sup>Mücü müpaü catinimaicaitüni memiyetuacü me'ütesatü mara'acate memühürütüariecai. <sup>11</sup>Mara'acate memühürütüariecai menivarucuyütüani teüteri memitavaunicü Vaxavaxi püta manayexünarierenicü. <sup>12</sup>Piratu müpaü tinivarutahüave tavari, Mericüte, queri ne'iyurieni 'icü Huriyusixi tixe'aitüvame que xemüte'iterüva. <sup>13</sup>Müme me'ita'eiyatü müpaü metenihüiva, Curuxisie quenemi'a. <sup>14</sup>Piratu müpaü tinivarutahüave, Titayaricuta, tita 'axa tiuyuri. Müme masi cuini mieme meniutihvacaitüni, Curuxisie quenemi'a, me'utiuyatü. <sup>15</sup>Hicü

Piratu vanaqui'aritiüamütü teüteri,  
Vaxavaxi nivaranaxexünirieni.  
Tiuta'aitaca Qesusi  
mücuveyaxüanicü niyetuani  
curuxisie mücaviyanicü.

<sup>16</sup>Hicü cuyaxi xaüsie meneivitüni  
mana quita parasiyu 'amüpata,  
parasiyu Püreturiu mütiuyetevasio.  
Yunaime cuyaxi mana memayetecai  
menivaruta'inieni. <sup>17</sup>'Ixuriqui  
mütaüräüye menenacatütüani,  
xuya mumayari me'utasaca  
menenutimanirieni. <sup>18</sup>Menisütüani  
me'ivaüritüatü müpaü me'utiyuatü,  
Que 'acu tüma Huriyusixi  
tiva'aitüvame. <sup>19</sup>Hacacü  
menitivaxüani mu'uyasio.  
Menicu'aüsicamavacaitüni.  
Me'utitunuma'uca yacü nenevieri  
menipitüacaitüni. <sup>20</sup>Me'inanaimaca  
'ixuriqui mütaüräüye  
menenutihünirieni, 'ixuriquieya  
menenacatütüani.

### Qesusi que mütiümierie curuxisie

(Mateu 27:32-44; Rucaxi  
23:26-43; Vani 19:17-27)

Mericusü meneivitüni curuxisie  
me'imienique. <sup>21</sup>Cuyeicame  
me'uviyaca mecanita'aitüani  
curuxieya menucue'irienicü.  
Cuyeicame Simuni Sirenetanaca  
catinitevacaitüni, Herecanituru  
Xupu niva'uquiyaritücaitüni.  
Xaüsie heyeyaca, quiecarisie  
ni'aximecaitüni.

<sup>22</sup>Mericusü Curucutapai  
meneivitüni Qesusi, taniuquicü  
Müqui Mu'uya Manuca  
mütiuyetevasio. <sup>23</sup>Hicü vinu masivi  
nücame menenu'itüaniquecaitüni  
meuyuyehüacacü, peru  
Qesusi püca'enu'i. <sup>24</sup>Mericusü

curuxisie menicavieni.

'Ixuriquiteya meniyutahuritüani,  
meyu'ivatüvetü memütetimanicü  
tita memüte'anhurieniquecai  
yuxexuitü.

<sup>25</sup>Mericusü 'utaxürecu  
curuxisie menicavieni. <sup>26</sup>Que  
mütiuxanesie yatiniu'utüarieni,  
Huriyusixi Tiva'aitüvame 'anuyütü.  
<sup>27</sup>Tenavayamete menivarutivütüani  
yuhutame curuxitesie hamatüana  
serietana xeime 'utatanata xeime.  
<sup>28</sup>'Ana naye'ani 'utüaricayari müpaü  
müre'uxa, Müme memitiana 'inüari  
niuquiyari, xevitü cani'erivacaitüni.

<sup>29</sup>Müme menanuyecücacai  
meninanaimacaitüni, yumu'u  
me'utisiquetü, müpaü  
me'utiyuatü, 'E'e, cari 'ecü tuqui  
pepüta'unaquecai, haica tucari  
'anuyeyayu pepenuvevieniquecai.  
<sup>30</sup>Parasü, queneu'atavicueisitüa,  
curuxisie pe'acayeicatü.  
<sup>31</sup>Yaxeicüata mara'acate  
memühüritüariecai müme  
'inüaricü memüte'üquitametetücai  
vahamatü meninanaimacaitüni  
müpaü meteyücühüavetü,  
Nivarutavicueisitüani hipame,  
pücaüve müyutavicueisitüanicü  
yücümana. <sup>32</sup>Cürisitütütü,  
'Ixaherisixi niu mütatü'aitüvame,  
curuxisie que'acayani, temixeyacü,  
yuri temüteta'eriexüanicü. Müme  
'auriena memutivütüarie curuxisie  
mümeta 'axa meniutiyuanecaitüni  
hepaüsitanu.

### Qesusi que mütiyetua yu'iyari

(Mateu 27:45-56; Rucaxi  
23:44-49; Vani 19:28-30)

<sup>33</sup>Mericusü tuca 'ayacu, naisarie  
niucüyüre, cüa caviecacuque

niucuhecüare. <sup>34</sup>Anari Qesusi carima müpaü tiniuhiva vaniuquicü, 'Eruhi, 'Eruhi, rama savacütani, taniuquicü necacaüyari, necacaüyari titayari penetiucu'eiri, maine. <sup>35</sup>Hipatu mana memüti'ucai me'l'enieca müpaü meniutiyuani, Neuxei, 'Eriyaxi niutahüave. <sup>36</sup>Xevitü 'unausarümetü neyani, ha'iseveme niutahüniya vinu masinacü. Haciasie 'iqueca neitiserieni müpaü 'utaitü, 'Acuxisü tecanitaneniericuni, xüca 'uhamieni 'Eriyaxi 'ecaxünaque. <sup>37</sup>Hicü Qesusi carima 'utahivaca, yu'iyari niyetuani. <sup>38</sup>Hicü 'ixuriqui meuviecai tuquita hixüata nisane heimana 'acayuaca. <sup>39</sup>Xei sienituyari cuyaxi tiva'aitüvame Qesusi hüxie muvecai, 'ixeyaca yu'iyari que mütiyetua müpaü niutayüni, 'Icü yuricü Cacaüyari caninu'ayatücaitüni.

<sup>40</sup>Mericsü 'ucari meninenierecaitüni yateva meti'utü, Mariya Mararatanaca, Mariya Cacuvu 'Esimutevi Cuse müvavarusitücai, Sarumeri, hipatüta mana meniti'ucaitüni. <sup>41</sup>Müme meniveiyacaitüni quepauca Carereyasie muyeicacai, metenimicuacaitüni. Hipatüta yuvaücavatü 'ucari 'utümana memu'axüa Querusaremesie mana meniti'ucaitüni.

#### Qesusi que mütiuteuqui

(Mateu 27:57-61; Rucaxi 23:50-56; Vani 19:38-42)

<sup>42</sup>Mericsü 'acayunirümeccacu, tucari memüyucuha'aritüvacaisie, 'uxa'arieca 'uxipiya tucari maye'aniquecaicü, <sup>43</sup>Cuse

'Arimateyatanaca caninuani. 'Iya 'isücate canixevitütücaitüni 'aixüa mümarivacai, müta'icuevacai Cacaüyari ti'aitametütü mayanicü. Yu'iyari heucayeca Piratusüa ninuani, Qesusi caxarieya nitavavirieni. <sup>44</sup>Piratu niuhüxyani 'ari mumücü. Xei sienituyari cuyaxi tiva'aitüvame niutacuevieni yu'aurie. Nuacu, Piratu nita'ivaviya que müreutevicaí Qesusi hemüquitü. <sup>45</sup>Cuyaxi tiva'aitüvame yatitahüavecu Piratu, quename hemü, caxari niyetuirieni Cuse. <sup>46</sup>Mücü rinu savanayari hecunaneca, 'ecacueca caxari, savanacü nita'eima, teuquiyapa neitateni 'aita müvaye'linieriecaisie. Neicurupa tete quiteniesie, neicunani. <sup>47</sup>Mariya Mararatanaca, Mariya Cuse müvarusieyatücaimatü menixeiya haque meutatequie.

#### Que müranutanierixü 'umierieca

(Mateu 28:1-10; Rucaxi 24:1-12; Vani 20:1-10)

**16** Mericsü 'uxipiya tucari 'utixücu, Mariya Mararatanacari, Mariya Cacuvu müvarusieyatücaimatü, Sarumematü, 'uhaye visi mu'tia menecunaneni, memüyehücü meheitavirienique caxari. <sup>2</sup>Ximeri cuitü 'atinecu tau semana mexüacame tucarisie, teuquiyapa meneta'axüani. <sup>3</sup>Müpaü meteniyucu'livaviyacaitüni, Quepai tete pütasiheuhüvirieni teuquiya quitenie meuca. <sup>4</sup>Mana me'utaneniereca mecanixeiya tete heuhüiyacame, 'amünecai. <sup>5</sup>Hicü teuquiyapa meneutahxüani. Vaserieta 'acaime temaicü meniuxeiya, mutuxa 'amütevi 'anacatücime. Meniutimamani. <sup>6</sup>Mücü müpaü

tinivarutahüave, Xepücamamaca.  
 Quesusi xepücvautüve  
 Nasaretitanaca curuxisie  
 mucaviya. Cananucuquetüarieniri,  
 'uva pücayecca. Neuxei 'uva  
 meniteni. <sup>7</sup>Hicüri xequenehu.  
 Müpaü xequetenivaretahüavi  
 teyü'üquitüvemetemama  
 Pecurumame, quename niu  
 xe'anuyehaitüiyaxü, Carereyapai  
 hetüa, quename mana xeheixeiya,  
 que mütixe'utahüavixü. <sup>8</sup>Hicü  
 teuquiyapa mevayecüneca  
 meni'yuta'una. Me'uti'yüüacatü  
 me'umamatü menacüne. Xeime  
 tüma 'asimepücate'utahüavixü  
 memümamacaicü.

**Quesusi masiücütü que mürayuyeitüa,  
 Mariya Mararatanaca 'ixei'yacacu**

(Vani 20:11-18)

<sup>9</sup>Hicü semana mexüacame  
 tucarisie 'anutaniereca Quesusi  
 ximeri, masiücütü nayuyeitüani meri  
 Mariya Mararatanaca 'ixei'yacacu.  
 Que mü'ane meripai memiviyacai  
 cacaiyarixi 'axa memü'anene  
 'atahutatü, Quesusi müvarayenü'a,  
 mücü Mariya canihücütücaitüni mixei.  
<sup>10</sup>Mücü heyaca, yatinivarutaxatüani  
 müme hamatüana mem'u'vacai,  
 meyhiveriecacu me'utisuanacacu.  
<sup>11</sup>Müme me'u'enanaca quename  
 'ayeyuricai, quename mücü 'ixei, yuri  
 mepücate'uta'eri.

**Quesusi masiücütü  
 que mürayuyeitüa,  
 teyü'üquitüvemetemama  
 me'ixei'yacacu yuhutatü**

(Rucaxi 24:13-25)

<sup>12</sup>Arique masiücütü nayuyeitüani  
 yücü 'anetü, yuhutatü müme

yeutapai memuhucui me'ixei'yacacu.  
<sup>13</sup>Müme yu'utüma menecüne,  
 hipame teyü'üquitüvemetemama  
 yametenivaretahüave que  
 mütiyü. Mümeta 'acuxi yuri  
 mepücatevaruta'eri.

**Quesusi que mütivaruhürütüa  
 nü'arisixi**

(Mateu 28:16-20; Rucaxi

24:36-49; Vani 20:19-23)

<sup>14</sup>Imatüriecata masiücütü  
 nayuyeitüani Tamamata Heimana  
 Xevitü teyü'üquitüvemetemama  
 me'ixei'yacacu metecuacacu.  
 Nivarutatieni yuri memücate'eriecaicü,  
 yu'iyarisie memüsesel'caicü, yuri  
 memücatevaruta'ericü müme  
 memixei 'anucuquecu. <sup>15</sup>Hicü müpaü  
 tinivarutahüave, Naisarie cuiepa  
 xequeneutayeixüa. Niuqui 'aixüa  
 manuyüne xequetenivacuxaxatüvani  
 yunaime queyupaümetü  
 memunetüarie. <sup>16</sup>Que mü'ane yuri  
 mütita'erieni müca'iyarieni, mücü  
 nitavicueisitüariemücü. Que mü'ane  
 yuri mücati'erie, 'isücame ninenamücü  
 hesiena mürahüivacü. <sup>17</sup>Ipaü 'anenetü  
 'inüiarite canitixuaverimücü haque  
 meme'uva müme yuri memüte'erie.  
 Nehesüa memümiemetecü  
 menivarayenü'axüacuni cacaiyarixi  
 'axa memü'anene. Menitiniucuni  
 niuqui mühehecuacü. <sup>18</sup>Cuterixi  
 xüca mevaranucu'üni, müümüya xüca  
 me'anu'ieni, tixaü 'asipücvayurieni.  
 Tecuicucate vahesie xüca me'utimeni  
 müme mepanayexürieni.

**Que müranutitüa**

(Rucaxi 24:50-53)

<sup>19</sup>Mericusü Ti'aitame Quesusi  
 müpaü tivarutahüaveca, taheima

nanutivitüquiëni, Cacaüyari  
 serieta nayerüni. <sup>20</sup>Naisarie  
 meneutayeixüani müme  
 metecuxatatü, Tl'aitame

vapareviecacu vaüca tiyuriëncacu  
 vaniuqui seiriyacacu 'inüari que  
 mütivapitüacai. Müpaü xeciüa  
 cani'aneni.

# RUCAXI

## Niuqui 'Aixüa Manuyüne Que Mütiu'üxasitacai

---

### Teuquiru que mütiutavaürütüa

**1** Yümüiretü meniuyuvaüriya memüteri'utüanicü naime hepaüsita tasata que mütiuyü. <sup>2</sup>Müme sutüapai memunenierixü, tupirisixi memacü niuqui 'aixüa manuyüne metecuxatatü, müme metateniyetuirieni mücü niuqui. <sup>3</sup>Neta nai que mütiuyü matüaripai hicüque heiseriemecü netinicuvaunecaitüni. 'Ayumieme nemareuyehüviritü, Teuquiru 'acu, nepünevauüriya xexuime naime nemaraca'utüirienicü <sup>4</sup>yapemütimaicacü 'icü niuqui pemu'eni hepaüsita que müti'se'i.

### Que mütiutahüavarie, Vani

#### 'ariqueque que mütinuivaquecai

<sup>5</sup>Mericsü quepaucua Herurexi müti'aitametücai Cureya cuieyarisie, mara'acame 'aniuyeicacaitüni Huriyusixi teüteriyari vamara'acate xevitü hücütütü, Sacariya titevatü, 'Aviyaxi teüterimama metenitetevacaitüni mara'acate vahamatü müti'uximayacai. Yü'üya canexeyacaitüni 'Erisaveti titevacame,

mara'acame nu'ayatüme.

<sup>6</sup>Yü'üitatü heiseriemecü yameteniyuriecaitüni Cacaüyari hüxie. Yametenicahucaitüni Ti'aitame que müti'aitacai naime, vahesie carahüivacacu.

<sup>7</sup>Nunusi mepücahexeyacai 'Erisaveti mücayüvecaicü. Mecani'uquiravesixitücaitüniri.

<sup>8</sup>Mericsü Sacariya mara'acametütü tini'uximayacaitüni Cacaüyari hüxie quepaucua 'Aviyaxi teüterimama vahesie mütiunaquixü.

<sup>9</sup>Mara'acate que mütivayeiyaritücai, hesiena tiniunaque heiva Ti'aitame tuquitana meutahanicü, müticüsinaiyanicü. <sup>10</sup>Quepaucua maye'a mütitacüsinaiyacü, yunaitü teüteri tacua meniyneneviecaitüni.

<sup>11</sup>Hicü nixeyia niuqui tuayame Ti'aitamesüa mieme mana 'utiveme müracüsinaiyasie serieta.

<sup>12</sup>Sacariya 'ixeyiatü niuyuitüarieni yu'iyarisie, niutimani. <sup>13</sup>Hicü niuqui tuayame müpäü tinitahüave, Pepücaheumaca, Sacariya 'acu. 'A'ivaurica pü'enierie. 'A'üya 'Erisaveti xenive canitnuivitüamücü. Vani petiniterüvamücü.

Peni'atemaviecamücü vaüca,  
 'A'iyari cuini mieme  
 ninaqui'acamücü  
<sup>14</sup> Yümüiretü  
 mecaniyutemamaviecacuni  
 Quepaucua mütinuiva.  
<sup>15</sup> Canimarivemücü Cacaüyari  
 hüxie.  
 Caxie vinuyari,  
 Xeime vinuta pücaye'eni.  
 'Iyari Mütiyupata  
 Caniviyamücü püta tinuivayu.  
<sup>16</sup> 'Ixaherisixi teüteriyari  
 yumüireme  
 Ta'aurie canivaraxüriemücü,  
 Ti'aitame memayexeyanicü  
 Yucacaüyaritüme.  
<sup>17</sup> Canenucuhaitüiyamücü  
 Ti'aitame  
 'Eriyaxipaü tiuca'iyaritü,  
 Türücariyaya hexeyiatü.  
 Va'uquiyarima ta'aurie  
 nivaraxüriemücü,  
 Yütüriyama  
 memüvara'erivanicü,  
 Müme yuri memücate'erie  
 Ta'aurie nivaraxüriemücü,  
 Müme heiseriemecü  
 yamemütecahu vahepaü  
 memüteyücühüavenicü.  
 Nivacuha'aritäamücü teüteri,  
 Ti'aitame memücueviecacü.  
<sup>18</sup> Hicü Sacariya müpaü  
 tinicühüaveni niuqui tuayame,  
 Que 'aneme 'inüariyariçü  
 yanepütimaica. Necani'uquirasitüni,  
 ne'üyata tucarieya ranütütüa.  
<sup>19</sup> Hicü niuqui tuayame müpaü  
 tinicühüaveni, Ne Cüravieri  
 necanihücütüni. Cacaüyari hüxie  
 neniiveni. Yanemümatitahüavecü  
 necaneyenü'arieni,  
 nematitaxatüanicü 'icü niuqui

'aixüa manuyüne. <sup>20</sup> Hicü camü,  
 cayuvatü pepütüyerüni, pecaniuvetü  
 pecanayeimücü mexi ca'aye'aveni,  
 'ecü yuri pemücatiuta'ericü  
 neniunquise. Peru neniunqui  
 canaye'amücü quepaucua tucari  
 maye'ani.

<sup>21</sup> Mericüsü teüteri  
 menicueviecaitüni Sacariya.  
 Meni'iyarixiecaitüni  
 'emüreutevicaicü tuquita. <sup>22</sup> Hicü  
 vayeyaca niyutatexieni varahüavetü.  
 Müme yametenetimani quename  
 tixaütü tiuxei tuquita. 'Iya  
 yumamacü nivacu'inüaritüvacaitüni.  
 'Aniucateitüni caniuvetü.

<sup>23</sup> Hicü heutiparecu  
 'uximayasicaya, yuquie  
 caneyani. <sup>24</sup> Hicü 'ana 'üyaya  
 'ayehucatü nayani 'Erisaveti.  
 Niyu'avietacaitüni 'auxüme meseri  
 müpaü 'utaitü, <sup>25</sup> Camü, 'ipaü  
 tiniuyurieni Ti'aitame, yuvaüriyatü  
 'aixüa münesiyurienicü, teüteri  
 memücanesinanaimacacü.

**Mariya que mütiutahüavarie,  
 Quesusi 'ariqueque que  
 mütinuivaquecai**

<sup>26</sup> Mericüsü 'ataxevirieca  
 meserisie Cacaüyari nitanü'ani  
 yuniuqui tuayame Cüravieri,  
 Carereya cuieyarisie quiecarisie  
 Nasareti müracusevasie.  
<sup>27</sup> 'Üimari mücaxuriquicaisüa  
 nitanü'ani Mariya mütittevacaissä.  
 Nitiviquiximecaitüni, 'uqui Cuse  
 titevatü nitivitüni quecaitüni. Cuse  
 Raviri caninunuiyariyatücaitüni.  
<sup>28</sup> Hicü Mariyasüa heutahaca  
 niuqui tuayame, müpaü niutayüni,  
 'Aixüa 'acu. Ti'aitame 'aixüa  
 catiniuca'iyarini 'ahesie mieme,

'ahamatü puyeica. <sup>29</sup>Mücü yu'iyarisie niuyütüarieni, yatinicu'erivacaitüni titayari müpaü mütivaüritüa. <sup>30</sup>Niuqui tuayame müpaü tinitahüave, Pepücaheumaca, Mariya 'acu. Cacaüyari 'aixüa pütüuca'iyari 'ahesie mieme. <sup>31</sup>Hicüri pe'ayehucatü pecanayeimücü, pecanitinivemücü. Quesusi pecatiniterüvamücü.

<sup>32</sup>Canimarivemücü,  
 Que mü'ane taheima macave  
 nu'aya canimarivacamücü.  
 Ravirisie caniyeyeimücü,  
 Ti'aitame Cacaüyaritütü  
 canipitüamücü  
 Raviri 'uvenieyasie mayerünicü  
 Que müti'aitacai 'iya.

<sup>33</sup>'Ixaherisixi teüteriyari  
 Catinivata'aitüamücü  
 yuheyemecü.  
 Que müti'aita  
 Pücatipare hasuacu.

<sup>34</sup>Hicü Mariya müpaü tinitahüave  
 niuqui tuayame, Mericüte,  
 quepaütütü 'ipaü pütüyüni. 'Uqui  
 nepücamate. <sup>35</sup>Niuqui tuayame  
 müpaü tinitahüave,  
 'Iyari Mütiyupata 'ahesie  
 caninuamücü.  
 Que mü'ane taheima macave  
 Yutürücariyacü  
 camani'etüriviyamücü.  
 'Ayumieme nunusi mütinuiva  
 canipasiemücü  
 Cacaüyarisie mieme,  
 Müpaü catinimarivacamücü  
 Cacaüyari nu'ayatütü.

<sup>36</sup>Camü, 'a'iva yateva 'Erisaveti  
 'ayehucatü nayani 'ucarasitütü.  
 'Ataxeime meseri niyurieca  
 'iya caniveveme memüxatacai.

<sup>37</sup>Cacaüyari pücajutatexieni,  
 naimecü püyüveni püta.

<sup>38</sup>Mariya müpaü tinitahüave,  
 Mericüte, ne Ti'aitame  
 necatini'uximayatameyatüni. Que  
 pemaine yaquetiuyüni. Hicü niuqui  
 tuayame caneyani.

**Mariya que mürecu'ivataxü  
 'Erisavetisüa**

<sup>39</sup>Hicüsüari yucuha'aritüaca  
 caneyani Mariya. Yumexüitüatü  
 quiecarisie neta'ani hürü mananiere  
 Cureya cuieyarisie. <sup>40</sup>Sacariya quita  
 heutahaca, nitavaüritüani 'Erisaveti.  
<sup>41</sup>Mericüsü 'Erisaveti quepaucua  
 mi'eni Mariya 'ivaüritüacacu,  
 nunusi neucuyuaxüani huriepana.  
 Hicü 'Iyari Mütiyupata niyiya  
 'Erisaveti. <sup>42</sup>Müpaü niutayüni  
 carima, Vaüca 'aixüa pepu'itüarie,  
 hipatü 'ucari temüca'itüariepaü.  
 'Aixüa cani'itüariemücü que mü'ane  
 pemütinuivitüani. <sup>43</sup>Nehesie  
 que tinaque neti'aitivame  
 varusieya münesi'ivatamiecü.

<sup>44</sup>Camü, 'avaürisica  
 ne'u'eniecu, nunusi yutemavietü  
 neucuyuaxüani nehuriepa.

<sup>45</sup>'Aixüa pecani'itüariemücü yuri  
 pemütiuta'ericü quename 'aye'ani  
 naitü que pemütütahüavarie,  
 Ti'aitame que mümaretahüavixü.

<sup>46</sup>Hicü Mariya müpaü niutayüni,  
 Ne'iyari müpaü paine, Ti'aitame  
 canitürücaüyeni.

<sup>47</sup>Ne'iyari niyutemavieca  
 nehe'erivatü  
 Cacaüyari  
 münesi'utavicueisitüacü.

<sup>48</sup>Caneniuxeiya ti'uximayatame  
 que nemütihücü hesiena  
 mieme,



Sepa tixaü nemücatihücü.  
 Camü, 'uxa'a varie yunaitü  
 nuivarite  
 'Aixüa ne'itüaricame  
 mecanen'eriecacuni.  
<sup>49</sup> Que mü'ane mütürücaüye  
 Marivemecü caneniuyurieni.  
 Mücü Pasiecame canixasivani.  
<sup>50</sup> Canivanenimayaca yunaime  
 memüteheyehüvirie,  
 Vanivemata nivanenimayaca.  
<sup>51</sup> Yücümana que mütüyurienne  
 Canimasiücüni que  
 mütitürücaüye.  
 Nivareutaveiyaxüani müme  
 memüteyucatave'erie  
 Yu'iyarisie que memütecü'eriva,  
<sup>52</sup> Cuiepa te'aitamete  
 nivarunavairieni  
 Tita memüte'aita,  
 Müme tixaü memücatehüme  
 püta  
 Nivaruhiritüani vaüca.  
<sup>53</sup> Memeuhacacuicuai  
 nivarutihüniya 'aixüa  
 mü'anecü.  
 Memeuca'ucai  
 nivareutanü'axüani  
 memamaveme.  
<sup>54-55</sup> Nisütüani tasiparevietü  
 'Ixaherisixi teüteriyari  
 Hesüana mieme  
 temüte'uximayatamete,  
 He'erivatü que  
 mütivarutahüavixü  
 ta'uquiyarima.  
 Caninenimayaca 'Aurahami  
 yuheyemecü,  
 Cataninenimayaca tame hesiena  
 temüyecü.  
<sup>56</sup> Mericüsü Mariya 'Erisavetisüa  
 niucateitüni 'esivatücacu haica  
 meseri. 'Arique yuquie neyani.

**Vani Ti'üyame que mütiutinuivaxü**  
<sup>57</sup> Mericüsü tucari naye'ani  
 'Erisaveti mütinivenicü.  
 'Uquitüme niutiniveni. <sup>58</sup> Hicü  
 'auravatari maremama  
 yunaitü mete'utamariECA  
 Ti'aitame vaüca que  
 mütitanenimayataxü, hamatüana  
 mecaniyutemamaviecaitüni.  
<sup>59</sup> Hicü 'atahairieca tucarisie  
 mecaniu'axüani me'l'inüaritüanique  
 nu'esi Huriyusixi vaxitequiyacü.  
 Sacariya mecateniterüvaquecaitüni  
 'uquiyarieyapaü. <sup>60</sup> Ana varusieya  
 müpaü niutayüni, Tixaüsietü.  
 Vani catinitevacamücü püta.  
<sup>61</sup> Müme müpaü metenitahüave,  
 Haquevasü 'amare pumave  
 müpaü titevatü. <sup>62</sup> Yumamacü  
 menitahüave quemasieya, que  
 mütinaque mütiterüvarienicü.  
<sup>63</sup> Xapa 'uta'ivaüca, müpaü  
 'utaineme canaca'utüani, Vani  
 catinitevacamücü püta. Yunaitü  
 menihüxiyani. <sup>64</sup> Hicü yapaucua  
 nenieya niuxünarieni. Niutaniuni  
 'aixüa 'utaitü Cacaüyari  
 hepaüsita. <sup>65</sup> Auravatari yunaitü  
 mecanimamacaitüni. Naisarie  
 Cureya hüriyarisie que mütüyü  
 catinixaxasivacaitüni.  
<sup>66</sup> Yunaitü memü'enanacai  
 meniyu'iyaritüacaitüni müpaü  
 meteyücühüavetü, Que 'anetü  
 payani 'icü nunusi. Mücü  
 meta, Ti'aitame yütürücariyacü  
 nipareviecaitüni.

**Sacariya que mutayü, Cacaüyarisie  
 mieme ticuxatätü**

<sup>67</sup> Ana Cacaüyari 'Iyarieya  
 Mütüyupata caniviyani nunusi

'uquiyarieya. Sacariya niutaniuni  
Cacaüyarisie mieme müpaü 'utaitü,

<sup>68</sup> 'Aixüa queticühüavarüvani

Ti'aitame,

Que mü'ane 'Ixaherisixi  
mütacacaüyari.

Nisutüani yuteüterima  
va'üviyatü,

'Aixüa 'iyurienetü  
memüünarienicü.

<sup>69</sup> Que mü'ane mütürücaüye  
niuquerieni,  
mütasitavicueisitüanicü,

Raviri que mieme,  
Raviri müti'uximayacaicü  
Cacaüyarisie mieme

<sup>70</sup> Meripaitü que mainecai que  
mütiyurieniquecai.

Yametenicuxatacaitüni  
texaxatametemama  
Memupasie hesiena mieme,  
Memutiniucacaicü hesiena mieme.  
Müpaü meniutiyuanecaitüni

<sup>71</sup> Mütasi'utavicueisitüaniquecaicü  
Müme memütasi'aye'uni  
memücatasi'a'ivacü,  
Müme memütasi'uxive'erie  
memücatasi'a'ivacü.

<sup>72</sup> Müpaüta meniutiyuanecaitüni  
Müvanenimayataquecaicü  
ta'uquiyarima  
He'erivatü türatu mutavevi  
yücümana,

<sup>73</sup> Que mütiyuhürütüa  
yaticühüavetü ta'uquiyari  
'Apurahami

Quename tasipitüaniquecai  
<sup>74</sup> tecamamatü

Temütavicueisitüarienicü  
Müme memütasi'aye'uni  
memücatasi'a'ivacü,  
Temeyexeianicü 'iya que  
mütinaque,

<sup>75</sup> Hesiena mieme tepasietü,  
Heiseriemecü yatetecahutü,  
Hüxiena te'u'uvatü mexi  
te'ayeneniere.

<sup>76</sup> 'Ecü meta nunusi 'acu,  
Que mü'ane taheima macavesüa  
mieme tixaxatame  
Pecatiniuterüvarüvamücü.  
Ti'aitame pepanucuhaitüiya  
Huyeya 'aixüa pemüyurienicü.

<sup>77</sup> Teüterimama  
petinivatahecüatüamücü  
Que mütivatavicueisitüani  
pehaitü,  
Que mütivareuyehüvirieni müme  
'axa memüte'uyuri pehaitü.

<sup>78</sup> Müpaü catiniyurienicü  
Tacacaüyari  
mütiyucanenimayacü.  
'Ayumieme que mü'ane taheima  
mümieme caninuamücü.

<sup>79</sup> Nivahecüariviyamücü müme  
yüvipa memütitei,  
Müme meta mecui'ivarümetü  
memüüriyarie  
Nivahecüariviyamücü.  
Ta'ücate cataniseiriyamücü,  
Temeu'uvanicü haque 'aixüa  
temütetaxeianicü  
Cacaüyarimatü.

<sup>80</sup> Mericüsü nunusi  
caniverecaitüni. 'Iyarieya  
türücaüyetü nayani. Macumavesie  
neyeicacaitüni mexi tucarieya  
ca'aye'avecai cuxi masiücütü  
mayanicü 'Ixaherisixi vahüxie.

### Quesusi que mütiutinüivaxü

(Mateu 1:18-25)

**2** Mericüsü 'ana 'aisica  
neutanü'ariexüani  
Sesaxi 'Acusitusüa mieme,  
müpaü 'utaitü, yunaitü cuipea

memütama memayucayasacü.

<sup>2</sup>Mücü 'inüari matüaripai mieme puyü quepaucua Sireniyu mehürütüariecai Siriya cuieyarisie.

<sup>3</sup>Yunaitü mecaneutayeixüani memayucayasacü yuxexuitü yuquiecarisie. <sup>4</sup>Hicü Cuse Carereya cuieyarisie Nasareti müracutevasie neyeyani. Cureya cuieyarisie

ninuani Raviri quiecariena Vereni müracutevasie. Raviri quie canimiemetücaitüni, Raviri nunuiyarieya canihücütücaitüni.

<sup>5</sup>Macayerienicü neyeyani Mariya 'avitütü mücü mayehucacaicü.

'Üyaya nayaniquecaitüni. <sup>6</sup>Mana mexi me'u'uvacai, tucarieya naye'ani mütinivenicü. <sup>7</sup>Hicü yumatüari niutiniveni. Tuvaxatecü nicu'eima, vacaisixi vacanuvasio nicate ni mücaxuavecaicü vahesie mieme memüva'axüaniquecaisie.

**Taheima miemete niuqui tuayamete  
que memütevarutahüavixü  
muxasi vahüvemete**

<sup>8</sup>Mericsü 'ana muxasi vahüvemete mana meniu'uvacaitüni. Yeuta menivahütüvecaitüni yumuxasi yüvicüta. <sup>9</sup>Hicü vahüxie niutaqueni niuqui tuayame Ti'aitamesüa mieme. Va'aurie nacuxavatücaitüni Ti'aitame hecüariyacü. Vaüca menimamacaitüni. <sup>10</sup>Hicü niuqui tuayame müpaü tinivarutahüave, Xepücamamaca. Hicü nenixetaxatüamücü niuqui 'aixüa manuyüne. Vaüca canixuavecamücü temavierica yunaime teüteri vahesie mieme. <sup>11</sup>'Icü tücarisie tiyuvicueisitüvame canetinuiva xehesie mieme.

Raviri quiecariena tineyüni. Que mü'ane heiserie mupitüarie Cürisitütütü canihücütüni, Ti'aitame canihücütüni. <sup>12</sup>'Icü 'inüaricü xecaneitimaicuni. Nunusi xecanexeyacuni tuvaxatecü 'eimeme, vacaisixi vacanuvasio heyecaime.

<sup>13</sup>Hicü yapaucua niuqui tuayame 'aurie meniuti'uni muyuavisie miemete yumüretü, 'aixüa me'utiyuatü Cacaüyari hepaüsita, müpaü me'utiyuatü,

<sup>14</sup>Taheima visi  
catinicühüavarüvani  
Cacaüyari.  
Cuiepa 'aixüa  
mecatenixeyariecuni teüteri  
Müme vacümana münaqui'a.

<sup>15</sup>Mericsü niuqui tuayamete muyuavisie meheutiyunixüacu, müpaü metenyühüavecaitüni muxasi vahüvemete, Hicümüsüari tepüyehu Verenipaitü. Tepi'ixüariyu que mainecai, Ti'aitame que mütatiutahüavixü. <sup>16</sup>Meyumexüitiatü menecüne. Mevaruta'ivauca Mariyamame menivarutaxeyia Cuse, nunusi meta vacaisixi vacanuvasio yecaime. <sup>17</sup>Mevaruxeyaca metenicuxatacaitüni que memüte'utahüavarie nunusi hepaüsita. <sup>18</sup>Yunaitü memü'enanacai menihüxiyacaitüni que memütevarutahüavixücü muxasi vahüvemete. <sup>19</sup>Masi Mariya ni'üviyacaitüni yu'iyarisie 'icü naima, yu'iyaritüatü hepaüsitana. <sup>20</sup>Hicü menecüne muxasi vahüvemete 'aixüa metecuxatatü Cacaüyari hepaüsita nai que memüte'uxeicü nai que

memüte'u'enicü. Naitü catiniuyüni que memüte'utahüavarie.

### Tuqita que müti'atüarie Qesusi

<sup>21</sup>Mericusü 'atahairieca tucari meni'inüaritüani Huriyusixi teüteriyari vaxitequiyacü. 'Ana Qesusi tiniuterüvarieni, niuqui tuayame que mütiterüvaxü yuvarusisie ca'ayecaicu cuxi.

<sup>22</sup>Mericusü Muisexi 'inüaricü catini'aitacaitüni nivecame hepaüsita. Tucari 'aye'acu memüyu'itienicü, Querusareme menecüne nunusi meheyetuanique Ti'aitamesüa. <sup>23</sup>Müpaü catine'uca 'inüari xapayarisie, Ti'aitame meripaitü que mainecai, Yunaitü 'uquisi matüarixi memütinunuiva, müme mecanipasiecacuni Ti'aitamesie mieme. <sup>24</sup>Menecüne memütemavanicü Ti'aitame que mainecai,xüa 'inüari xapayarisie que müre'ucal, Cucuruxi xei parisi, mesü veuraixi türixi yuhutame mecanivaremavacacuni, 'utaitü.

<sup>25</sup>Hicü tevi Querusareme necateitüni Simiyuni titevatü. 'Iya heiseriemecü yaticamietü Cacaüyari nayexeyacaitüni. Nicueviecaitüni 'Ixaherisixi teüteriyari vanütüvame. 'Iyari Mütiyupatacü nihünecaitüni. <sup>26</sup>Müpaü tiniupitüarieni, 'Iyari Mütiyupata que mütitahüavixü, quename cuitü camüniquecai. 'Ixeiyame que mü'ane Ti'aitame micayeniquecai Cürisitutüme xEICÜA, 'anarique canimüniquecaitüni. <sup>27</sup>Hicü 'Iyari 'inücu, Huriyusixi vatuquipa ninuani. 'Arique Qesusi 'uquiyarimama meneutahaxüani yame'iyurienique nunusi,

Huriyusixi que mütivayeiyari, 'inüari niuquiyarisie que müre'uxa.

<sup>28</sup>'Ana Simiyuni nenutuni. 'Aixüa niutayüni Cacaüyari hepaüsita, müpaü 'utaitü,

<sup>29</sup>Hicürixüa necusiyari 'acu, Pepeye'atüa 'aniuqui. Pepünesi'uxünaxü Ne'iyarisie

neca'uximatüariecacu.

'Ahesie mieme nepüti'uximaya.

<sup>30</sup>Hicürixüa necümana nepütiuxei Que pemütivavicueisitüani teüteri.

<sup>31</sup>Nepixei tita pemütiha'aritüa Yunaimeteüteri vahüxie.

<sup>32</sup>Canivahecüariviyamücü hipame nuivarite,

Visi te'aneneme

catanayeitüamücü

'Ateüterima 'Ixaherisixi

<sup>33</sup>Hicü 'uquiyarieya varusieya meniyu'iyaritüacaitüni müpaü mainecaicü hepaüsitana. <sup>34</sup>'Aixüa xepü'itüarieca, niutayünita Simiyuni. Müpaü Mariya tiniutahüave nunusi varusieya,

Camü 'icü nunusi

Yümüretü 'Ixaherisixi

Mematixürienicü,

Yümüretüta

Memanucu'unicü

Cani'ayumiemetüni.

'Inüari caniyümücü,

Caniniuquimariecamücü.

<sup>35</sup>'Ecüta 'a'iyarisie

Pecanisequiemücü hivericacü,

Cumu 'ixipara que mütiyuseve.

Mücü que mütiyurieneni,

Yümüretü memasiücütü

mecanacünicuni

Que memüteyücühüave

yu'iyarisie.

<sup>36</sup>Xevitüta 'acaniuyeicacaitüni 'ucarasitütü, Hana titevatü. Mücü Cacaüyari niuquieya canicuxatacaitüni. Panuheri caninu'ayatücaitüni, 'Aseri nunuivarieyatütü. Caniseüyecaitüni, nauca teviyari heimana nauca viyari canihücaitüni. 'Utiviquieca 'atahuta viyari piteütacai yücüna, <sup>37</sup>'umücu yuxaüta 'eniucateitüni. Tuqui curaruyarita pücvayeyeicacai masi yuhaquetü yunenevietü pü'ayumiemetücai tucaricü tucaricü. <sup>38</sup>Hicü 'aura 'uyaca pamüpariyusi nipitüani Cacaüyari. Quesusi hepaüsita tinivacuxaxatüvacaütüni Querusaremetari memüta'icuevacai memütaxünarienicü yunaitü.

#### Nasreti que memütehecü

<sup>39</sup>Hicü meheye'atüiaca naime que müre'uxa 'inüari xapayarisie, Ti'aitame que mainecai meripaitü, Carereyasie menecüne. Yuquiecarı meneta'axüani Nasreti müracusevasie. <sup>40</sup>Mericüsü nunusi niverecaitüni türücaüyetü timaivetü nayeiximecaitüni, Cacaüyari 'aixüa pütüca'iyaricai hesiena mieme.

#### Temaicüyari Quesusi tuquita que mütiyeyeicacai

<sup>41</sup>Mericüsü xexuime visie 'uquiyarımama Querusareme meneta'axecaitüni 'ixüararipa quepauca mem'e'rivacai, Cacaüyari que mütivaruhayevaxü vateüterima. <sup>42</sup>Hicü quepauca tamamata heimana huta viyari mühücai, mana meneutiunixüani, teüteri que mütiyaveiyaritücai

'ixüararipa. <sup>43</sup>Hicü heutiparecu, yu'utüma mehahuximecacu, Quesusi Querusareme neyuhayeva, 'asimecatemaicacu 'uquiyarımama. <sup>44</sup>Teüteri vasata 'uyeicame me'erietü, xei tucari meniu'uvacaitüni. 'Ana yu'ivama yumarema vahesüa menitivautücüne. <sup>45</sup>Meca'itaxeiyavavetü, Querusareme menacunuaxüani me'icuvautüvetü.

<sup>46</sup>Hicü hairieca tucari meneitaxeiya tuqui curaruyarita 'ayecaima, tel'üquitamete vahixüapa 'ucaime. Niva'eniecaitüni nivacu'ivaviyacaitüni. <sup>47</sup>Yunaitü memi'eniecai menihüxiyacaitüni timaitü que müti vacu'eiyacai. <sup>48</sup>Hicü 'uquiyarımama me'ixeyiatü meni'iyarixiecaitüni. Varusieya müpaü tinitahüave, Nenive, titayari müya petatiuyuri. Tepümasicuvautüve tetahiverietü 'a'uquiyarimatü. <sup>49</sup>Müpaü tinivarutahüave, 'E'e, cari xepünesicuvautüvecai. Tamü, 'asixecatemaicai, meuyevesecü ne'uquiyari quiya hepaüsita nemü'ayumiemetünicü. <sup>50</sup>Müme 'asimepücateheitima niuquieyasie que mainecai.

<sup>51</sup>Hicü vahamatü neyani, Nasreti meneta'axüani. Que memaitücatei yacatinicamiecaitüni. Varusieya yu'iyarisie ni'üviyacaitüni 'icü naime. <sup>52</sup>Quesusi timaivetü canayeiximecaitüni, caniverecaitüni. Cacaüyari, teüterita masi vaüca simetenixeiya caitüni.

### Vani Ti'üyame que müticuxatacai

(Mateu 3:1-12; Maricuxi 1:1-8; Vani 1:19-28)

**3** Mericüsü 'ana Tiveriyu  
 Sesaxi tamamata heimana  
 'auxüme viyari niuyurieni ti'aitatü,  
 Punisiyu Piratu niucayerieni  
 'isücametütü Cureya cuieyarisie,  
 Herurexi nihüritüariecaitüni  
 Carereya cuieyarisie müti'aitanicü,  
 Piripe Herurexi mü'ivayatücai  
 catini'aitacaitüni 'Itureya  
 cuieyarisie Türacuniti cuieyarisie,  
 Risaniyaxi catini'aitacaitüni  
 'Aviriniyasie, <sup>2</sup>'Anasi Caipasi  
 mecanihüritüariecaitüni  
 mara'acate. 'Ana Cacaüyari  
 yuniuqui nipitüani Vani Sacariya  
 nu'aya, macumavesie 'uyeicame.  
<sup>3</sup>Naisarie Curutani hatuxameyari  
 tesie niuyeicacaitüni müpaü  
 tivacuxaxatüvatü, memütehayevecü  
 que memüteyuriecai para  
 Cacaüyari mütivareuyehüvirienicü  
 'axa que memüte'uyuri,  
 mücücü memüca'üyarienicü.  
<sup>4</sup>Yacatiniyurienecaitüni que  
 müre'uxa Quisariyaxi xapayasie,  
 Cacaüyari niuquieyacü que  
 müticuxatacai,  
 Xevitü mahiva macumavesie  
 'üvetü,  
 Xequeneucuha'aritia Ti'aitame  
 huyeya, haitü,  
 Xexeuravime xequeneutivevi  
 huyeya, haitü.  
<sup>5</sup>Naitü 'aqui  
 cananuparecutüariexüamücü,  
 Naitü yemuri 'emutütü  
 'esimutütü 'acuveritü  
 canayeitüariemücü  
 Tita mütitutune xexeuravitü  
 nayeimücü

Tita müracutetexiya

'acuharuanitü canayeimücü

<sup>6</sup>Yunaitü teüteri mepixeiya que  
 mütiyuvicueisitüva Cacaüyari.

<sup>7</sup>Vani müpaü

tinivacuxaxatüvacaitüni teüteri  
 memü'axecai müvaca'üyacü, Cari  
 xeme terücaxi xepüva'ivama.  
 Quepaicü pütixehécüatüa  
 xemüyuta'unacü capa 'uxa'a  
 varie xehecariecacü. <sup>8</sup>Müme  
 memüte'uhayevaxü que  
 memüteyuriecai, vahepaü  
 püta xequeteneyurieca, que  
 müreuyevese. Xepüca'isütüaca  
 yu'iyarisie müpaü xeteyücühüavetü,  
 Tepünaqui'eriva ta'uquiyari  
 temexeyiacü 'Apurahami. Müpaü  
 nepütixecühüave, Cacaüyari  
 caniyüveni 'icü tetexi teüteri  
 müvarayeitüani 'Apurahami  
 nivemama. <sup>9</sup>'Ari hasa  
 caniucaha'aritärieni cüyexi  
 maxürienicü. 'Ayumieme naitü cüye  
 'aixüa 'anenetü müca'utixuxuavere  
 canaxüriyamücü, taipa  
 caneuxüriyamücü.

<sup>10</sup>Teüteri müpaü

metenicu'ivaviyacaitüni, Mericüte,  
 quesü teteyurieca tame. <sup>11</sup>'Iya müpaü  
 tinivacühüavecaitüni, Que mü'ane  
 huta camixayari mexeiya, que'imini  
 que mü'ane mücaheixeiya. Que  
 mü'ane 'icuai mexeiya yaxecüa  
 quetiurieneni. <sup>12</sup>Memüteyeturiyari  
 cuviyexunusie mieme meni'axecaitüni,  
 memüca'üyarienicü. Müpaü  
 metenicühüavecaitüni, Ti'üquitame  
 'acu, que teteyurieca tame. <sup>13</sup>'Iya  
 müpaü tinivacühüavecaitüni,  
 Que xemüte'u'aitüarie, heimana  
 mieme xepücatevaucä. <sup>14</sup>Cuyaxita  
 müpaü metenicu'ivaviyacaitüni,

Qesü teteyurieca tame. 'Iya müpaü tinivacühüavecaitäni, Xepücatenavayani, 'itaricacü xepücatavaviviyani. Xequenenaqui'aca yu'ivaricacü.

<sup>15</sup>Merücüsü 'ana teüteri menita'icuevacaitüni yu'iyarisie meyu'iyaritüatü yunaitü Vani hepaüsita, xüca mücü Cürisitu hücütüni me xüca catixaütüni, me'utiyuatü. <sup>16</sup>Peru Vani müpaü tinivarutahüave yunaime, Neri hacü nepüxe'uca'üya. 'Ucanamieni que mü'ane cui mütürücaüye, necatürücaüyecacu ne. 'Aixüa nepüca'ane nehiesie mütinaquenicü nemipareviecacü ni nemenacuveñirienicü cacaiya cuitaxiyari. Mücü püta que mütixe'uca'üyani, 'Iyari Mütiyupata canixepitüamücü, canixe'itimücü tai que mütiyu'itiva. <sup>17</sup>Cuxari 'itivame pacue'e, cuini mieme pütiveque yutürücu. Niti'utamücü yu'icuxi caxetunisie, cuxariyari püta pütataiyani tai mücatüvesie.

<sup>18</sup>Masi väica nivatuicacaitüni teüteri, niuqui 'aixüa manuyüne nivacuxaxatüivacaitüni.

<sup>19</sup>Hicü Herurexi mücü cuieya nihürütüaricacaitüni müti'aitanicü. Yu'liva niu'üyapieni, Heruriya titevacame niutivitüni. Väicava catiniyuriencacaitüni Herurexi 'axa tiyurienetü. 'Ayumieme Vani nitate'acaitüni. <sup>20</sup>Hicü Herurexi nayuye'atüani 'axa que mütiyuriencacai, Vani manutahüacü casariyanata.

### **Qesusi que mütiuca'üyarie**

*(Mateu 3:13-17; Maricuxi 1:9-11)*

<sup>21</sup>Merücüsü quepaucua yunaitü teüteri memuca'üyarie,

Qesusita caniuca'üyarieni. Mexi yuneneviecai, taheima nanacatenire. <sup>22</sup>'Iyari Mütiyupata heimana nacaneni, que mütiyuxexeyiacai cucurupaü 'anetü. Xevitü taheima müpaü netayüni, 'Ecü pecaninenivetüni pemünaqui'eriva. 'Acümana necaninaqui'aca.

### **Qesusi teucarimama**

*(Mateu 1:1-17)*

<sup>23</sup>Merücüsü Qesusi xei teviyari heimana tamamata viyari yacütütü nihücaitäni quepaucua misütüa müpaü tiyurienetü. Cuse caninu'ayatücaitäni, que memütecu'erivacai. 'Iya 'Erie caninu'ayatücaitäni, <sup>24</sup>'iyata Matati caninu'ayatücaitäni, 'iyata Revi caninu'ayatücaitäni, 'iyata Merüqui caninu'ayatücaitäni, 'iyata Cana caninu'ayatücaitäni, 'iyata Cuse caninu'ayatücaitäni, <sup>25</sup>'iyata Matatixi caninu'ayatücaitäni, 'iyata 'Amuni caninu'ayatücaitäni, 'iyata Nahumi caninu'ayatücaitäni, 'iyata 'Esürrie caninu'ayatücaitäni, <sup>26</sup>'iyata Nacahi caninu'ayatücaitäni, 'iyata Mahati caninu'ayatücaitäni, 'iyata Matatixi caninu'ayatücaitäni, 'iyata Semei caninu'ayatücaitäni, 'iyata Cuse caninu'ayatücaitäni, 'iyata Cura caninu'ayatücaitäni, <sup>27</sup>'iyata Cuhana caninu'ayatücaitäni, 'iyata Xesa caninu'ayatücaitäni, 'iyata Suruvaveri caninu'ayatücaitäni, 'iyata Saratieri caninu'ayatücaitäni, <sup>28</sup>'iyata Nerie caninu'ayatücaitäni, 'iyata Merüqui caninu'ayatücaitäni, 'iyata 'Arie caninu'ayatücaitäni, 'iyata Cusami caninu'ayatücaitäni,

'iyata 'Erimurami  
 caninu'ayatücaitüni, 'iyata 'Eri  
 caninu'ayatücaitüni, <sup>29</sup>'iyata  
 Cusue caninu'ayatücaitüni, 'iyata  
 'Eriyeleri caninu'ayatücaitüni, 'iyata  
 Curimi caninu'ayatücaitüni, 'iyata  
 Matati caninu'ayatücaitüni, <sup>30</sup>'iyata  
 Revi caninu'ayatücaitüni, 'iyata  
 Simiyuni caninu'ayatücaitüni, 'iyata  
 Cura caninu'ayatücaitüni, 'iyata  
 Cuse caninu'ayatücaitüni, 'iyata  
 Cunani caninu'ayatücaitüni, 'iyata  
 'Eriyaquimi caninu'ayatücaitüni,  
<sup>31</sup>'iyata Mereya caninu'ayatücaitüni,  
 'iyata Mainani caninu'ayatücaitüni,  
 'iyata Matata caninu'ayatücaitüni,  
 'iyata Natani caninu'ayatücaitüni,  
<sup>32</sup>'iyata Raviri caninu'ayatücaitüni,  
 'iyata Quisahi caninu'ayatücaitüni,  
 'iyata Huveri caninu'ayatücaitüni,  
 'iyata Puhuxi caninu'ayatücaitüni,  
 'iyata Sarumuni caninu'ayatücaitüni,  
 'iyata Nahasuni caninu'ayatücaitüni,  
<sup>33</sup>'iyata 'Aminaravi  
 caninu'ayatücaitüni, 'iyata 'Arami  
 caninu'ayatücaitüni, 'iyata  
 Hesirumi caninu'ayatücaitüni,  
 'iyata Parexi caninu'ayatücaitüni,  
<sup>34</sup>'iyata Cura caninu'ayatücaitüni,  
 'iyata Cacuvu caninu'ayatücaitüni,  
 'iyata 'Isahaqui caninu'ayatücaitüni,  
 'iyata 'Aporahami  
 caninu'ayatücaitüni, 'iyata Tare  
 caninu'ayatücaitüni, 'iyata Nacuri  
 caninu'ayatücaitüni, <sup>35</sup>'iyata  
 Seruqui caninu'ayatücaitüni, 'iyata  
 Racau caninu'ayatücaitüni, 'iyata  
 Perequi caninu'ayatücaitüni, 'iyata  
 Heveri caninu'ayatücaitüni, <sup>36</sup>'iyata  
 Sara caninu'ayatücaitüni, 'iyata  
 Cainani caninu'ayatücaitüni, 'iyata  
 'Arüpasari caninu'ayatücaitüni,  
 'iyata Semi caninu'ayatücaitüni,

'iyata Nuhexi caninu'ayatücaitüni,  
 'iyata Ramequi caninu'ayatücaitüni,  
<sup>37</sup>'iyata Matusareni  
 caninu'ayatücaitüni, 'iyata  
 'Enuqui caninu'ayatücaitüni,  
 'iyata Careri caninu'ayatücaitüni,  
 'iyata Maharareri  
 caninu'ayatücaitüni, <sup>38</sup>'iyata  
 Cainani caninu'ayatücaitüni, 'iyata  
 'Enuxi caninu'ayatücaitüni, 'iyata  
 Seti caninu'ayatücaitüni, 'iyata  
 'Arani caninu'ayatücaitüni, 'iyata  
 Cacaüyari caninu'ayatücaitüniri.

#### Quesusi que mütiuta'inüasie

(Mateu 4:1-11; Maricuxi 1:12-13)

**4** Mericüsü, Quesusi 'Iyari  
 Mütiyupatacü hünetaü  
 mana neyeyani Curutani  
 hatuxameyarisie. 'Iyari Mütiyupata  
 nivitüximecatüni macumavesie  
 'uyeicacacu <sup>2</sup>huta teviyari tucari.  
 Cauyumarie ni'inüatanecatüni,  
 siparasü xüca 'axa tiuyurienique  
 tüma, 'utaitü. Tixaü caticuaivetü  
 yapäumexa tucari, cuini mieme  
 catineuhacamücücaitüni. <sup>3</sup>Hicü  
 Cauyumarie müpäü tinitahüave,  
 Tamüsü, 'ecü xüca Cacaüyari  
 penu'ayatüni, 'icü tete müpäü  
 quetineutahüavi, pa payuyeitüani.  
<sup>4</sup>Quesusi müpäü tinita'eiya,  
 'Utüarica müpäü paine, Tevi  
 xüca pa cuaca xeiçüa, mücücü  
 püca'ayeyurini. Cacaüyari  
 que mutayü, niuquieya naitü  
 peuyeveseta.

<sup>5</sup>Hicü Cauyumarie vapai  
 heivitüca, cuiepa memütama vacuie  
 nai nixeisitüani xei nieriyaricü.  
<sup>6</sup>Cauyumarie müpäü tinitahüave,  
 Heiserie nepümasipitüaca 'icü  
 naime hepäüsita, yunaitü



visi memümatecühüavenicü  
nepümasipitüaca. 'Icü nai  
necaniyetuiriyarieni, heiserie  
nepexeyia nemiminicü que mü'ane  
münesinaque. <sup>7</sup>'Ecü 'ayumieme  
nenevieri xüca penesi'upitüani, 'icü  
naitü 'apini pürayani. <sup>8</sup>Hicü Qesusi  
müpaü tinitahüave, Quenemie  
Cauyumarie. 'Utüarica müpaü paine,  
Nenevieri pepipitüani Ti'aitame  
'acacaüyari,  
Mücü hücüame pepayexeyani.

<sup>9</sup>Hicü Cauyumarie neivitüni  
Querusareme. Vatuqui yecürita  
nenutivitüni. Müpaü tinitahüave,  
'Ecü Cacaüyari xüca penu'ayatüni,  
vatipai queneucasuna. <sup>10</sup>'Utüarica  
müpaü paine,  
Yuhesüa miemete  
Niuqui tuayamete  
Pütiva'aitüaca  
'Ahepaüsita,  
Memümasi'üviyacı.

<sup>11</sup>Müpaü paineta 'utüarica,  
Yumamacü mepümasituicani,  
Capa tetesie pe'uti'ücamürecü.

<sup>12</sup>Qesusi müpaü tinitahüave,  
Müpaü paineta, Pepüca'l'isipaneni  
Ti'aitame mü'acacaüyari.

<sup>13</sup>Hicü Cauyumarie naimecü  
'ita'inüataca neyani 'ariqueta  
'ita'inüataque.

**Qesusi que mütsisütüa  
yu'uximayasica Carereyasie**  
(*Mateu 4:12-17; Maricuxi 1:14-15*)

<sup>14</sup>Mericsü Qesusi yu'utüma  
neyeyani Carereyapaitü, 'Iyari  
'itürücariyacacu. Naisarie  
caniutamariva hepaüsitana.  
<sup>15</sup>Tinicu'üquitaneaitüni  
vatuquiteta. Yunaitü 'aixüa  
metenicuxatacaitüni hepaüsitana.

**Qesusi que mütiuyuri Nasaretisie**  
(*Mateu 13:53-58; Maricuxi 6:1-6*)

<sup>16</sup>Hicü Nasaretita ninuani  
mataverixüsie. Yuyeyari cu'erivatü,  
tuquita neutahani 'uxipiya tucarisie.  
Nanucuqueni tititerüvaque. <sup>17</sup>Hicü  
xapa niuhuritüarieni Cacaüyari  
niuquieya maye'uxa, Quisariyaxi  
que müraca'utüa. 'Itaveraca  
nitaxeiya niuqui haque müpaü  
maine,

<sup>18</sup>Ti'aitame 'Iyarieya caneniuyiya  
Canenihuritüani  
Niuqui 'aixüa manuyüne  
Nemüvacuxaxatüvanicü  
Memümamave.  
Caneneyenü'ani  
Nemüvaranayexürienicü  
Müme memüyuhiverie  
Yu'Iyarisie,  
Yanemütivatahüavecü  
Müme memanutaxüriya,  
Quename me'utixünarie.  
Yanemütivatahüavecüta  
Müme memacücüpe,  
Quename me'anutaneniere,  
Nemüvaxünacü  
Müme memüviyarietüca,  
<sup>19</sup>Nemüticuxatanicü,  
Tucari 'aye'a  
Ti'aitame müyuvaüriya  
Vahesie mieme, ne'utaitü.

<sup>20</sup>Hicü 'itacuicüieca xapa,  
'iyetuirieca tiyuparevivame, mana  
nayerüni ti'üquitame 'uvenieyasie.  
Yunaitü tuquita memayetecai cui  
menixeyacaitüni. <sup>21</sup>Hicü nisütüani  
müpaü tivacuxaxatüvatü, 'Icü  
tucarisie naye'ani 'icü 'utüarica  
que maine, xe'l'eniecacu xeme.  
<sup>22</sup>Yunaitü metenihecüatacaitüni  
me'l'enieca. Menihüxiyacaitüni

niuqui visi manuyüne tetana mayeneicacaicü. Müpaü meniutiyanecaitüni, Camüsü, 'icü Cuse catinu'aya. <sup>23</sup>'Ana müpaü tinivacühüaveni, Xüari 'icü niuquiyaricü xepünetecühüave, Tiyu'uhayemavame 'acu, sipasü 'acümana quena'anayehüva. Que temüte'u'enana Caperünaume que müreyü, 'enata 'aquiecarisie yaxecüa quetineyurieneni, xepünetecühüaveni va'atü. <sup>24</sup>Müpaü niutayüni, Niuqui caniseüyeni que nemütixecühüave, tixaxatame pücanaqui'eriva yuquiecarisie. <sup>25</sup>Yuri nepaine, 'Ixaheri cuieyarisie yumüiretü viyurasixi meniu'uvacaitüni quepaucua 'Eriyaxi 'amuyeicacai, quepaucua muyuavisie müreunami haica viyari heimana 'ataxeime meseri, quepaucua haca mutave naisarie cuiepa. <sup>26</sup>Müme vahesüa püca'utanü'arie 'Eriyaxi ni xeimesüa, Siruni cuieyarisie püta niutanü'arieni Sarepüta müracusevasie viyurasüa. <sup>27</sup>Mücü meta, yumüiretü 'ameniu'uvacaitüni 'Ixaheri cuieyarisie cuiniyacü meca'itiyatücaitü quepaucua 'Eriseu 'amuyeicacai tixaxatametütü. Ni xevitü tüma püca'u'itiya mana quiecatari, Siriyatanaca püta caniu'itiyani Nahamani titevatü. <sup>28</sup>Hicü me'l'enieca que müticuxatacai, meniuyeha'ani yunaitü tuquita memayetecai. <sup>29</sup>Me'anucu'uca, vaquiecarie yemurisie manierecü quiecarie yeta 'ai heima meneihana mana meheicahüanique. <sup>30</sup>'Iya vahixüata heutayuneca caneyani.

**Cacaüyari müca'itiya que mütiyiacai tevi**

(*Maricuxi 1:21-28*)

<sup>31</sup>Merücüsü quiecarisie ninuani Caperünaume müracusevasie Carereya cuieyarisie. Mana 'uxipiya tucarisie tiniva'üquitüacaitüni. <sup>32</sup>Müme menihüxiyacaitüni 'üquisicayacü, heiserie hexeyatü mütaniucacaicü. <sup>33</sup>Hicü tuquita nayecateitüni tevi cacaüyari müca'itiya 'iviyacacu. <sup>34</sup>Carima niutahiva müpaü 'utaitü, 'Ai, que petati'uximatüa Quesusi Nasaretitanaca. Petasica'unaque cari pepunua. Ne nepümasimate que pemüpaicü. Cari 'ecü pepühücü Cacaüyarisie mieme pemupasie. <sup>35</sup>Hicü Quesusi nitatieni müpaü 'utaitü, Hicü cayuvatü, queneuxüna. 'Iya cacaüyari 'ita'uimüraca tevi vahixüapa, nixüna caticuinitüaca. <sup>36</sup>Yunaitü meniutimamani. Meteyucuxaxatüvatü müpaü meniutiyanecaitüni, Que 'aneme niuqui pexeyia. Heiserie hexeyatü nivarutate'ani cacaüyarixi memüca'itiyatüca türücarixa hexeyatü, menivatixünani. <sup>37</sup>Naisarie quiecarie 'aurie canicuxaxasivacaitüni, Quesusi que mütiyurienecai.

**Quesusi que mürenayahüa Pecuru varücaüya**

(*Mateu 8.14-15; Maricuxi 1.29-31*)

<sup>38</sup>Merücüsü tuquita vayeyaca Simuni quie ninuani. Hicü hüiya yeme niviyacaitüni Simuni varücaüya. Menitavavirieni miparevienicü. <sup>39</sup>'Auriena 'utaqueca, nitatieni hüiya. Hicü

hüiya nihayeva. Yapaucua  
'anucuqueca nivarutiparevietüyani.

**Que müdivaranayexüri 'acayunecu**

(*Mateu 8:16-17; Maricuxi 1:32-34*)

<sup>40</sup>Hicü tau 'acayunecu, yunaitü memüvarexeiyacai tecuicucate müireme cuiniyacü memütecucuyecai hesüana mecaniva'atüani. Yuxexuime vahesie 'utimeca nivanarayexürieni.

<sup>41</sup>Cacaüyarixi 'axa memü'anene canivaruta'aitüani memüvatixünacü yumüireme memütevacuinitüacai. Müme meniutihvacaitüni müpäü me'utiuyatü, 'Ecü Cacaüyari pecaninu'ayatüni. Quesusi varutate'aca cacaüyarixi, pücvapitüacai memütiniunicü memimaicaicü quename Cürisitu hücütücai heiserie mupitüarie.

**Quesusi que müticuyeicacai  
Carereya cuieyarisie, ticuxatatü**

(*Maricuxi 1:35-39*)

<sup>42</sup>Hicü 'ucatarecu neyani macumavesie. Teüteri yumüiretü menicuvautüvecaitüni. Me'itaxeiyaca väiriyarica menipitüacaitüni mücavacu'eirienicü. <sup>43</sup>Mücü masi müpäü tinivarutahüave, Neuyeveca hipame quiecaritesie niuqui 'aixüa manuyüne nemücuxatanicü, que mütiyüni Cacaüyari ti'aitacacu, peuyevese nemüticuxatanicü. 'Ayumieme nepeyenü'arie. <sup>44</sup>Cureya cuieyarisie tuquiteta catinixatanec aitüni.

**Qesüte que memütevaratixüri**

**Quesusi niuquieyacü**

(*Mateu 4:18-22; Maricuxi 1:16-20*)

**5** Mericüsü Quesusi  
Quenesareti haracunayari

tesita niuvecaitüni ticuxatatü. Yumüiretü menisaipünacaitüni, me'leniecutü Cacaüyari niuquieya. <sup>2</sup>Hicü canuva niuxeiya hutame ha tesita 'aheicame quesüteveyiamete vacanuva. Qesüteveyiamete me'anaticüneca yuvipi meni'ecuacaitüni. <sup>3</sup>Hicü xeimesie cayerüca Simuni canuvayasie, nitavavirieni haracunasie 'esiva meutahanicü. Canuvacie yecaitü tiniva'üquitüacaitüni teüteri. <sup>4</sup>Hicü yuxasica 'unüca, müpäü tinitahüave Simuni, 'Emeucatevasie queneuyeye'a, 'avipi mana queneucavivi quesüte pemüvaratixürienicü. <sup>5</sup>Hicü Simuni müpäü tinitahüave, Ti'üquitame 'acu, tücacüta nai tepayequexi, tepüte'uta'uxitüa yacü xEICÜA, tixäu tepücate'umi. Masi müya pemainecü, neneicaviviemücü vipi. <sup>6</sup>Yamete'uyurica menivaratixürieni quesüte cuini mieme meyupäumeme. Vipi nitasanirümecaitüni. <sup>7</sup>Hicü yucupaniyeruma xeime canuvacie memüyetecai yumamacü menivarumaviya memacüneccü memüvarevienicü. Meniu'axüani, yucanuvate meniutihüniyaxüani hutame. 'Esivatücacu meniucayunüani. <sup>8</sup>Hicü nai tiuxeiyaca Simuni, Pecuru mütittevacai, niutitunumaqueni Quesusi hüxie müpäü 'utaitü, Ti'aitame, queneneuhayeva. Ne 'axa nepütüyuriene. <sup>9</sup>Niutimani 'iya, yunaitü hamatüana memü'uvacai meniutimamani müya yupäumeme memüvaratixüricü quesüte. <sup>10</sup>Yaxeicüata Severeu nivemama meniutimamani Cacuvu Vani Simunimatü memüte'uximayacai.

Hicü Qesusi müpaü tinitahüave Simuni, Pepücamaca. Hicüsü 'uxa'atünita teüteri püta pecanivacuxeürimücü. <sup>11</sup>Hicü canuva me'anatihapaca cuiepa, naime meteniucu'eirieni Qesusisie meteviyaque.

**Qesusi que mürenayahüa tevi  
cuiniyacü müca'itiyacai**

*(Mateu 8:1-4; Maricuxi 1:40-45)*

<sup>12</sup>Mericsü xeime quiecarisie niuyeicacaitüni Qesusi. Ticuicame mana niucateitüni müca'itiyacai naitü heupünitü. Hicü Qesusi 'uxeiyaca, niutihüximaqueni, müpaü titavavirienique, Ti'aitame xüca pe'avaüriyani, pepüyüve pemünesi'itienicü. <sup>13</sup>Iya yumama 'utaseraca nimayüani müpaü 'utaitü, Nepünevaüriya, pequeheu'itiyani. Yapaucua cuiniya nihayeva. <sup>14</sup>Hicü Qesusi müpaü tinita'aitüani 'asimücatitahüavecü xeime. Müpaü tinitahüave, Quenemie mara'acame masixeyacü. Pemü'itiyacü quetineutimava cumu Muisexi que mütiu'aitaxü pemütivatahecüatüanicü. <sup>15</sup>Perusü masi cuini mieme catinixaxasivacaitüni hepaüsitana. Teüteri yumüretü meniyutixexeürivacaitüni memi'enienicü memanayexürüvenicü cuiniya que memütehxeiyacai. <sup>16</sup>Qesusi masi macumavesie neyeicacaitüni yutanenevienique.

**Qesusi que mürenayahüa  
huriecame**

*(Mateu 9:1-8; Maricuxi 2:1-12)*

<sup>17</sup>Mericsü xeime tuclarisie tini'üquitacaitüni. Mana

menayetecaitüni Huriyusixi teüteriyari yuyeyaricü memüpasiecai Pareseusixi memüteyuterüvacai, hipatüta Huriyusixi va'inüaricü memüte'üquitametetücai. Naime quiecaritesie Carereya cuieyarisie Cureya cuieyarisie meneyecüne Querusaremesieta. Cacaüyari türücariyaya canixuavecaitüni Qesusi müvaranayexürüvanicü. <sup>18</sup>Hicü teüteri meniu'axüani me'ehanatü huriecame 'itarisie yecaime. Qesusi müvacateisie meni'atüaniqueacaitüni hüxiena me'itenique. <sup>19</sup>Meniyutatexieni meheutahaxüanique teüteri memüyümürecaicü, 'ayumieme qui heima meneutimamaque. Racüriyuyari mevati'unaca, Qesusi hüxie meneicatuani tevi 'itari naime teüteri vahixüapapai. <sup>20</sup>Hicü varuxeiyaca yuri que memüte'eriecai, müpaü niutayüni, 'Axa que pemütüyuri pecatineuyehüviyarieni.

<sup>21</sup>Hicü Pareseusixi, müme meta 'inüaricü memüte'üquitametetücai, müme menisütüani müpaü meteyücühüavetü, Que püpaicü 'icü 'axa mutaine Cacaüyari hepaüsita. Quepaicü püyüve mütivareuyehüvirienicü 'axa mete'uyurieyu, Cacaüyari xeicüa püyüve. <sup>22</sup>Qesusi retimaica que memüteyücühüavecai müpaü tinivarutahüave, Titaryarisü müya xeteyücühüave yu'iyarisie. <sup>23</sup>Tita masi caticuanive. Que ticuanive müpaü mütayünicü, 'Axa que pemütüyuri pepüreuyehüviyarie, caticuanive masi müpaü mütayünicü, Quenanucuquexi

quenecuyeicani. <sup>24</sup>Peuyevese müpäü xemütemaicacü, Yuri Tevi que nemütiteva, heiserie nemexeyacü cuiepa nemütivareuyehüvirienicü müme 'axa memüte'uyuri, 'ana müpäü tinitahüave huriecame, 'Ecü 'acu nemarähüave, quenanucuquexi, 'a'itari quenanucue'i, 'aquié quenemie. <sup>25</sup>Yapaucua nanucuqueni vahüxie, titasie müracatei neicueni, yuquie neyani 'aixüa 'utaitü Cacaüyari hepaüsita. <sup>26</sup>Hicü yunaitü menihüxyacaitüni. 'Aixüa meniutiyuanecaitüni Cacaüyari hepaüsita. Cuini mieme metenimamacaitüni müpäü me'utiyaütü, Mamarivaveme tepuxe hicü.

**Que mütitä'ini Revi, hesiena mütiyianicü**

(Mateu 9:9-13; Maricuxi 2:13-17)

<sup>27</sup>Mericsü neyani. Tevi cuviyexunusie mieme mütiyetuiriari niuxeiya Revi titevacame memüte'ayutituaya 'acaime. Müpäü tinitahüave, Nehesie quetiniviyani. <sup>28</sup>Nai tiucu'eirica, 'anucuqueca, hesiena tiniuviya.

<sup>29</sup>'Ana Revi 'icuai niuvevieni yuquita Quesusisie mieme. Yümüretü memüteyeturiyari cuviyexunusie mieme, hipatüta teüteri metenicuacaitüni hamatüana. <sup>30</sup>Hicü Pareseusixi, mümeta 'inüaricü memüte'üquitametetücai Pareseusixi vahesie memüteyiyacai, müme meniniuquixiecaütüni müpäü metevacühüavetü hesüana miemete teyü'üquitüvamete, Titayaricutaxi

müme cuviyexunusie mieme memüteyeturiyari vahamatü 'axa teyuruvamete vahamatü xetecua'a xete'ie. <sup>31</sup>Hicü Qesusi müpäü tinivarutahüave, Müme 'aixüa memüteheu'erie mepücaheiyehüva tiyu'uhayemavame, müme memütecucuye püta mecaneiyehüaca. <sup>32</sup>Ne que nemütinua, nepücanua nemüvata'inienicü müme heiseriemecü yamemütecahu. Müme 'axa memüteyurie püta nevata'inienique necaninuani, memüthayevacü 'axa que memüteyuriecai.

**Que mütiuta'ivaviyarie haquiya hepaüsita**

(Mateu 9:14-17; Maricuxi 2:18-22)

<sup>33</sup>Mericsü müpäü metenitahüave, Vanisüa miemetexi teyü'üquitüvamete müixa mepüyühaqui mepeyevaviri Cacaüyari. Pareseusixi vahesüa miemetexita yaxecüca mepüteyurie. 'Ahesüa miemetexi masi titacutaxi metecua'a mete'ie. <sup>34</sup>Hicü Qesusi müpäü tinivarutahüave, Que tiyüve müvahaquisitüani 'ixüaramete neüquiyapa mexi neneüqueme vasata 'uyeica. <sup>35</sup>Tucari paye'ani quepaucua vasata manuhanieni neneüqueme. 'Anaque mepüyühaquieni.

<sup>36</sup>Hicü 'üxasi hepaüsita ticuxatatü tinivaruti'üquitüatüyani müpäü 'utaitü, Tevi capitasana 'ixuriqui hecuame, mimanesiquitüanicü ye'ime. Me xüca müpäü tiuyurienique, hecuame pütasanequeyu, mühecuaamatü müye'i 'axa

pütüyuxexeiyaniqueyu. <sup>37</sup>Mücü meta, caxie vinuyari pücatuariva sixai müyeye'isie mücuanacü. Me xüca müpäü tiuyurienique cuanatü pitasanaqueyu sixai, pütayeuriniqueyu, sixaita peuyeveniqueyu. <sup>38</sup>Masi caxie vinuyari sixai mühehecuasie püta canituarivani mücuanacü. <sup>39</sup>Tevi meripai mieme 'aniecu 'anuti'ieme, cuaname pücaheu'imücüni. Müpäü paineni, Meripai mieme 'aixüa cana'aneni.

**'Uxipiya tucarisie türicu que memüte'uticuai teyü'üquitüvamete**

*(Mateu 12:1-8; Maricuxi 2:23-28)*

**6** Mericüsü 'uxipiya tucarisie mana türicu mal'iviyasie niuyemiecaitüni. Teyü'üquitüvamete müyari menivatihunatücüne. Yumamasie me'itüminatü menicuacaitüni. <sup>2</sup>Hicü Pareseusixi hipatü müpäü meniutiyuane, Titayari müpäü xeteyurie que mücatitauniva yamütiyurienenicü 'uxipiya tucarisie. <sup>3</sup>Quesusi müpäü tinivarutahüave, Cari hasuacu xepüca'ititerüvavave que mütiuyuri Raviri quepaucua meuhacamücücai, müme 'utümana memeu'uvacaita quepaucua memeuahacacuicuai. <sup>4</sup>Cacaüyari quita caneutahani. Pa muva Cacaüyari hüxie mamanecai 'anaca'üca, nitacuani, nivaruminita müme 'utümana memeu'uvacai. Heiserie pücahexeiyacai miticuanicü, mara'acate xeciüa heiserie mepexeyacai. <sup>5</sup>Müpäüta tinivarutahüave, Heiserie necanexeiyani 'uxipiya tucari hepäüsitata Yuri Tevi nehücütütü.

**Tevi mämamavaquicai**

*(Mateu 12:9-14; Maricuxi 3:1-6)*

<sup>6</sup>Mericüsü tavari 'uxipiya tucarisie tuquita heutahaca tini'üquitacaitüni. Tevi muva nayecateitüni mämamavaquicai yuserieta. <sup>7</sup>Müme 'inüaricü memüte'üquitametetücai, Pareseusixita menihupiecaitüni, siparasü xüca 'uxipiya tucarisie 'enayehüanique tüma, me'utiyuatü, mücücü memitaxanetacü. <sup>8</sup>Timaitü que memüteyücühüavecai, müpäü tinitahüave tevi mämamavaquicai, Quenanucuquexi, tahixüata queneutaquexi. 'Anucuqueca mana niutaqueni. <sup>9</sup>Hicü Qesusi müpäü tinivarutahüave, 'Ipaü nepütixecu'ivaviya. 'Uxipiya tucarisie titaunivani para 'aixüa mütiyurienenicü, nusu 'axa mütiyurienenicü püta pütaunivani. Titaunivani para tevi mütavicueisitüanicü, nusu mica'unacü püta pütaunivani. <sup>10</sup>Yunaima varanuxeiyatüyaca, müpäü tinitahüave tevi, 'Amama queneutasera. Müpäü tiuyuriecu mamaya 'aixüa 'anetü nayani. <sup>11</sup>Müme cuini mieme meteniuyeha'ani. Menisütüani metecuxatätü queri memiyurieniquecai Qesusi.

**Que mütiwaranuyeteüxixü nü'arisixi Tamamata Heimana Yuhutame**

*(Mateu 10:1-4; Maricuxi 3:13-19)*

<sup>12</sup>Mericüsü 'ana hürisie neutiyune yutanenevienique. Xei tücari nenevieri nipitüacaitüni yucacäuari. <sup>13</sup>Hicü 'ucatarecu, yu'aurie nivarutahüave yuhesüa

miemete teyü'üquitüvamete.  
 Vasata nivaranuyeteüxü tamamata  
 heimana yuhutame. Nü'arisixi  
 tinivaruterüva müme <sup>14</sup>Simuni  
 'arique Pecuru mütiterüvaxü,  
 'Atürexixi Simuni 'ivaya, Cacuvu,  
 Vani, Piripe, Parüturume, <sup>15</sup>Mateu,  
 Tumaxi, Cacuvu 'Aripeu nu'aya,  
 Simuni serutisita mütitevacai,  
<sup>16</sup>Cura Cacuvu nu'aya, Cura  
 'Iscariutitanaca 'ariqueque miyetua.

**Quesusi que mütivaruparevi  
 yumüireme**

(Mateu 4:23-25)

<sup>17</sup>Hicü vahamatü 'anacayaca,  
 macuveresie niutaqueni.  
 Yumüiretü hesüana miemete  
 teyü'üquitüvamete, cuini mieme  
 yumüiretü teüterita naisarie  
 Cureyasie Querusaremesie  
 memeyecü, hipatü racusita  
 memeyecü Tiru 'aurie Siruni 'aurie,  
 mana meniu'axüani memi'enienicü,  
 memanayexürüyanicü cuiniya  
 que memütehhexeyacai.  
<sup>18</sup>Müme cacaiyarixi 'axa  
 memü'anene memüvanücai  
 mepanayexürüya. <sup>19</sup>Teüteri yunaitü  
 menimayüacucaitüni türücarüya  
 müvayeneicacaicü hesiena  
 varanayexürüvatü yunaime.

**Müme 'aixüa memü'itüarie, müme  
 'axa memü'itüarie meta**

(Mateu 5:1-12)

<sup>20</sup>Mericüsü yuhesüa miemete  
 teyü'üquitüvamete vaxeyatü  
 müpaü niutayüni,  
 'Aixüa xecani'itüarieca xeme  
 xemümamave  
 Cacaüyari xecanexeyani  
 tixe'aitüvametüme.

<sup>21</sup>'Aixüa xecani'itüarieca xeme  
 hicü xemeuhacacuicu.  
 Xecanitiuhacacuni.

'Aixüa xecani'itüarieca xeme  
 hicü xemutisuana.  
 Xecaniutinavecuni.

<sup>22</sup>'Aixüa xecani'itüarieca  
 quepaucua teüteri  
 memüxe'uxive'erie, quepaucua  
 memücaxenaqui'erie yuhesüa,  
 quepaucua 'axa memutiyuane  
 xehepaüsita, quepaucua  
 memüxexani'erie 'axa  
 xemü'anene me'utiyaatü,  
 Yuri Tevisie xemüteviyacü.

<sup>23</sup>Xequeneyutemamavieca vaüca  
 'iya tucarisie, xequeteneuye'ani.  
 Vaüca taheima mieme  
 xecana'ivacuni. Va'uquiyarima  
 yaxecüa mepüvaruyuri  
 texaxatamete Cacaüyari niuquieya  
 memücuxataca.

<sup>24</sup>Masi xüa 'ui, xeme xemüxicusixi.  
 'Ariri yunaqui'eriya  
 xecanaye'atüani.

<sup>25</sup>Xüa 'ui xeme hicü xemühuxa.  
 Xepeuhacacucuni.  
 Xüa 'ui xeme hicü xemutinave.  
 Xepüuhiverieca xeputisuanani.

<sup>26</sup>Xüa 'ui xeme quepaucua  
 yunaitü teüteri visi memutiyuane  
 xehepaüsita. Va'uquiyarima  
 yaxecüa mepüvaruyuri  
 texaxatamete memüte'itavacai.

**Que müreuyevese  
 müvanaqui'eriecacü müme  
 memeye'unie, Quesusi 'inüarieya  
 que maine**

(Mateu 5:38-48; 7:12)

<sup>27</sup>Masi müpaü nepütixecühüave  
 xeme xemü'enana,  
 xequenivanaqui'erieca

müme memüxe'aye'unie.  
 'Aixüa xequenivayurieca  
 müme memüxe'uxive'erie.  
<sup>28</sup>Müme 'axa memutiyuane  
 xehepaüsita, vahepaüsita  
 'aixüa xequeneutiyuaneni  
 xeme. Xequeneyunenevieca  
 müme memüxesevixima  
 vahesie mieme. <sup>29</sup>Que mü'ane  
 'a'aurita mümasiheutivani,  
 ta'aurie quenaniere tapata  
 mümasiheutivanicü. Que mü'ane  
 mümasinavairieni 'a'ücari,  
 pepüca'inenaca 'acamixata  
 mümasinavairienicü. <sup>30</sup>Que  
 mü'ane tixaütü mümatitutavaviri,  
 quetineupitüa, que mü'ane 'apini  
 mümatinavairieni, pepüca'iviyani.  
<sup>31</sup>Que tixenaque, teüteri müya  
 memüxeyurie xeme. Que  
 mütixenaque xeme, mücü  
 canixe'inüaritücamücü, müya  
 xemüvayurienicü hipame meri.  
<sup>32</sup>Xücate xevanaqui'erieca  
 müme memüxenaqui'erie, titacü  
 'aixüa xetecuxaxasivani. 'Axa  
 teyuruvamete mecanivanaqui'erieca  
 müme memüvanaqui'erie.  
<sup>33</sup>Xücatari 'aixüa xevayurieca  
 müme 'aixüa memüxeyurie,  
 titacü 'aixüa xetecuxaxasivani.  
 'Axa teyuruvamete yaxeciä  
 mepüteyurie. <sup>34</sup>Xücatari  
 xetevaruniütüani müme  
 mete'apicame xemü'erie, titacü  
 'aixüa xetecuxaxasivani. 'Axa  
 teyuruvamete mepüuniütüva  
 tavari memüte'apiniyariyecacü.  
<sup>35</sup>Masisü xequenivanaqui'erieca  
 müme memüxe'aye'unie,  
 'aixüa xequeteneyurieca,  
 xequeneyuniütüaca  
 'asixecateyu'iyaritüatü. Müpaü

xeteyurietü cuini mieme  
 xecatenavacuni, que mü'ane  
 taheima macave nivemama  
 xecanihümetücacuni. Mücü  
 'aixüa pütüuca'iyari müme  
 pamüpariyusi memücateyupitüva  
 vahesie mieme, müme 'axa  
 memüteyurie vahesie miemeta.  
<sup>36</sup>Xequeteneyucanenimayaca,  
 xe'uquiyari que mütiyucanenimaya.

**Hipame vahesie xepücate'ahüpani,  
 que mutayü**

*(Mateu 7:1-5)*

<sup>37</sup>Hipame vahesie xüca  
 xecate'ahüpani, xehesietari  
 pücarahüivani. Xüca  
 xecateyuxanetani xemetari  
 xepücaxanesieca. Xüca  
 xecavaranutaxürüvani, xemetari  
 xepüca'anutaxürüvani. Xüca  
 xetevareuyehüvirieca, xemetari  
 xepüteheuyehüviyarieni.  
<sup>38</sup>Xüca xevamicuani, xemetari  
 xepümüquieni. 'Aixüa  
 ti'inüasiecame 'anucapünariecame  
 'anutacasiecame 'anacaxürüveme  
 xepümüquieni. Que xemüte'u'inüata,  
 müpaüta xepüte'inüasiyarieni.  
<sup>39</sup>Mericüsü 'icü 'üxasi hepaüsita  
 ticuxatatü tinivaruta'üquitüani  
 müpaü 'utaitü, Macüpe que tiyüve  
 menuhana xeime macüpe. Yuhutatü  
 mecateheucaxürürieni mevatixavasie.  
<sup>40</sup>Que tiyüve ti'üquitame ma'iva  
 müti'üquitüarie. 'Aye'atüarieme,  
 que mü'ane müti'üquitüapaü  
 timaivetü canayeimücü.  
<sup>41</sup>Titayari petixeiya xasi 'a'iva  
 hüxita meutavivi, pecahe'erivatü  
 queuruvi 'ahüxita meutave.  
<sup>42</sup>Quepaütütü petiyüve müpaü  
 pemütitahüavecü 'a'iva, Neuxei



ne'iva, nepivaye'itieni xasi 'ahüxita meutavivi, pe'utaitü, peca'ixeyatü queuruvi 'ahüxita meutave. Yacüsü peputaine xeicüa. Quenivaye'itie merie mücü queuruvi 'ahüxita meutave, 'ana 'aixüa 'anemecü peheunieretü pecanayeimücü pemivaye'itirienicü xasi 'a'iva hüxita meutavivi.

**Cüye que mütimasücü yu'icuaxicü**

(Mateu 7:17-20; 12:34-35)

<sup>43</sup>Cüeyari pücanarani, xüca 'icuaixiyari cüxaisietücani. Mücü meta, cüeyari pücacüxaisie xüca 'icuaixiyari 'aixüa 'anenedi. <sup>44</sup>Xexuitü cüye yu'icuaxicü canimasiücünü. Xuya püca'inüive narüca. Tupiriya müxuyatücasie püca'itixexeüriva caxie. <sup>45</sup>Tevi 'iti'utame tita 'aixüa müti'anene yu'iyarisie, nivayehanimücü tita 'aixüa müti'anene. Tevi 'axa mütiyuriene püta 'iti'utame tita 'axa müti'anene, nivayehanimücü tita 'axa müti'anene. Que müranayuhayeva ra'iyari tihüneccacu, müpäü tinicuxatamücü yutetacü.

**Simiyenitu 'aixüa mü'ane 'axa mü'ane**

(Mateu 7:24-27)

<sup>46</sup>Titayaricutaxi Ti'aitame, Ti'aitame 'acu xenetecühüave, 'asixecatayurietü que nemütixecühüave. <sup>47</sup>Yunaitü nehësüa memü'axe, neniucü memü'enie yametecahutü, que memü'anene nepütixetaxatüani. <sup>48</sup>Tevi qui mutavevipäu mecani'anenedi. Heucatevame vati'ineca, tetesiepai neitivevieni

simiyenituyari. 'Ana ha nivayenedi, quisie niuquexüani, peru niuyutatexieni 'ivatayuitüanique. 'Aixüa 'anemecü müveviyacaicü pücatavayua. <sup>49</sup>Perusü que mü'ane münesi'enie yacaticamietü, mücü xeime tevi qui mutavevipäu cani'anenedi. Cuiepa 'acaime niutavevieni xeicüa, simiyenituyari püca'utavevi. 'Ana hesiena niuquexüani ha, xei mieme necaina. Carima niucaveni qui.

**Quesusi ti'uximayatame que müranayehüa cuyasüa mieme**

(Mateu 8:5-13)

**7** Hicü 'inüca 'icü niuqui naime teüteri me'l'eniecu, Caperünaume neyani. <sup>2</sup>Mericusü cuya 'aniuyeicacaitüni xei sienituyari cuyaxi müvaravitücücai, ti'uximayatame nexeyacaitüni minaquieriecai. 'Iya tincuyecaitüni canemüximecaitüni. <sup>3</sup>Hicü cuya, 'u'enaca Quesusi hepaüsita, nivarenü'ani Huriyusixi teüteriyari va'uquiyarima memeita'inienicü 'umamiecü menayehüanicü ti'uximayatame. <sup>4</sup>Müme Quesusisüa me'u'axüaca cuini mieme mecateni'iniecaitüni müpäü me'utiyuatü, 'Aixüa caniyümücü pemeiparevieni, hesiena catininaqueni. <sup>5</sup>Cataninaquierieca tanaimetame, tuqui cataniutavevirieni yücümana. <sup>6</sup>Hicü Quesusi va'utüma neyani. Yateva 'umieccacu, cuya yuhamicuma nivarutanü'ani yamemüte'itahüavecü, Ti'aitame pepücati'a'uxitüaca. Ne 'aixüa nepüca'ane 'ecü pematahanicü nequita. <sup>7</sup>'Ayumieme 'ahësüa

nepücahetüa, 'aixüa neca'aneme ne'erietü 'ahesüa nemümiecü. 'Ecü müpaü xeicüa queneta'yüqui, panayehüiyani ti'uximayatame. <sup>8</sup>Nesü necatini'aitüarieca necuyatütü cuyaxita nepütiva'aitüvame. Xüca müpaü netitahüave xeime, Quenemie, mücü püyemieni, xeimeta xüca müpaü netitahüave, Quenaye'a, mücü canayeimücü, xüca müpaü netitahüave nehesüa mieme ti'uximayatame, 'Ipaü quetineyurieneni, müpaü pütüyurieneni. <sup>9</sup>Hicü Quesusi 'i'enieca niuquieya, niuhüixiyani. Ta'aurie 'aveca müpaü tinivarutahüave teüteri memeveyacai, Müpaü nepütixecühüave, ni 'Ixaherisixi vasata 'icüpaü 'aneme nepücahetaxeyave yuri ti'eriecame. <sup>10</sup>Hicü müme memeyenü'arie yu'utüma mehecüneca, quitana me'u'axüaca, meneitaxeyia ti'uximayatame 'aixüa reu'eriecame.

**Viyura nu'aya que  
müranucuquetüa Quesusi**

<sup>11</sup>Mericsü 'arique neyani quiecarí Naini müracutevasiepaütü. Hesüana miemete teyü'üquitüvamate meniteütacaitüni, hipatüta teüteri yumüiretü. <sup>12</sup>Quiecarí quitenie heutahaximecacu, müqui nivayecueiyani. Müqui varusieya hücüame nexeyacaitüni 'iya yunivetüme, cünaya meripai 'umücu. Quiecatari yumüiretü meniteütacaitüni. <sup>13</sup>Hicü Ti'aitame 'ixeyatü nitinenimayata. Müpaü tinitahüave, Pepüca'utasuacani.

<sup>14</sup>Mana 'uyacu, 'imayüacu müqui cacunieya, müqui cuecuevemetete meniti'uni. 'Iya müpaü niutayüni, Temaicü 'acu, quenanucuquexi nepaine. <sup>15</sup>Tevi mümüquicai nanucuyerüni niutiniütüyani. Quesusi niyetuani varusieyasüa. <sup>16</sup>Hicü yunaitü meniutimamani. 'Aixüa meniutiyanecaitüni Cacaüyari hepaüsita müpaü me'utiyaütü, Tixaxatame mütürücaüye tasata caninuani. Cacaüyari canisütüani tasi'üviyatü yuteüterima. <sup>17</sup>Hicü que mütiuyuri canicuxaxasivacaitüni naisarie Cureya cuieyarisie 'aurienata.

**Vani Ti'üyamesüa miemete niuqui  
tuayamete que memüte'u'axüa**

*(Mateu 11:2-19)*

<sup>18</sup>Mericsü Vanisüa miemete teyü'üquitüvamate metenitaxatüani Vani nai que mütiuyü hepaüsita. 'Ana Vani yu'aurie varutahüaveca yuhutame yuhesüa miemete teyü'üquitüvamate, <sup>19</sup>Ti'aitamesüa nivarenü'ani müpaü memutiyanenicü, 'Ecü petihücü 'upemamiecai xeniü, nusu xeime püta tepücuevieca. <sup>20</sup>Hesüana me'u'axüaca müme, müpaü metenitahüave, Vani Ti'üyame 'ahesüa cataneyenü'ani müpaü 'utaitü, 'Ecü petihücü 'upemamiecai xeniü, nusu xeime püta tepücuevieca. <sup>21</sup>Anatütü Quesusi yumüireme nivaranyexürieni, müme cacäuyarixi 'axa me'aneneme memüvarexeyacai, hipame meta müireme cuiniyacü memü'uximatüariecai. Memacücepecai yumüireme nivarupitüani

memanutanenierenicü. <sup>22</sup>Hicü müpaü tinivarutahüave niuqui tuayamete, Xequeneuhuni, xequenetaxatüa Vani tita xemüte'uxei tita xemüte'u'eni hepaüsita mieme, memacücöpe que memüte'anutaneniere, huriecate que memüte'anucu'uve, müme memüca'itiyatücatei cuiniyacü memecupüpünicai müme que memüte'u'itiya, memücaheu'enanacai hicü que memüteheu'enana, müquite que memüte'anucu'uitüariva, memümamave niuqui 'aixüa manuyüncü que memütécuxaxatüariva. <sup>23</sup>Mücü meta, 'aixüa cani'itüarieca que mü'ane müca'ucunuitüarieve necümana.

<sup>24</sup>Hicü Vanisüa miemete niuqui tuayamete mehecüncü, nisütüani Vani hepaüsita tivacuxaxatüatü teüteri, müpaü 'utaitü, Tita xetehecu'ixüari macumavesie. Haca 'ecapa mücuyuitüarieximecai xepuxei va'atü. Tixaü xüari.

<sup>25</sup>Peru tita xetehecu'ixüari. Tevi 'ixuriqui müyumeni manacatücücäi xepuxei va'atü. Tixaüsü, müme visi mü'anene memanacatücü xicusixi vahepaü memüyüa, müme te'aitamete vaquita mepayetei püta. <sup>26</sup>Titasüari xetehecu'ixüari. Tixaxatame xepuxei va'atü. Hü, müpaü nepütixecühüave, tixaxatame xepuxei, texaxatamete que mü'ane masi cuini mieme mütiyüve, que mü'ane müvara'iva hipame texaxatamete xepuxei.

<sup>27</sup>Icü canihücütüni 'utüarica mixata müpaü 'utaitü, Camü nenuqui tuayame.

Nepenunü'ani 'ahüxiepai. Micuha'arütüanicü 'ahuye Pecanuavecacu cuxi.

<sup>28</sup>Ipaü nepütixecühüave, Müme 'ucari vahesie memütinunuiva ni xevitü pücave'eme Vanipaü. Perusü que mü'ane masi yemecü mücave'eme müme Cacaüyari mütiva'aitüa vasata, mücü pe'iva Vani ve'emetütü.

<sup>29</sup>Ipaü nepaine, teüteri, mümeta cuviyexunusie mieme memüteyeturiyari yunaitü Vani me'u'enieca metenihecüatacaitüni Cacaüyari hepaüsita heiserie que mürexeiya, quepaucua memuca'üyarie Vanisüa. <sup>30</sup>Peru Pareseusixi, hipatüta 'inüari niuquiyari memümate, mücü menitixani'erieni Cacaüyari que mütiyurieniquecai vahesie mieme. Vanisüa mepüca'uca'üyarie. <sup>31</sup>Ayumieme nepaine, hicü miemete titapaü mete'ananemete netivaxata. <sup>32</sup>Türi vahepaü mecani'aneneni quiecarü hixüapa memütitei me'uyutihivivatü müpaü me'utiyuatü,

Cari yacü xeciä  
 tepüxecüravirieceai,  
 Xepücaneitüvecai.  
 Tepütahiverieceai xehesie mieme,  
 Xepüca'utisuanacai.

<sup>33</sup>Vani Ti'üyame caninuani pa cacua'atü caxie vinuyari caye'etü, xeme 'ayumieme müpaü xeputiyuane, Cacaüyari 'axa mü'ane pinü'ü. <sup>34</sup>Ne Yuri Tevi nehücütütü necaninuani neticua'atü necu'ienetü, xeme 'ayumieme müpaü xeputiyuane, 'E'e, 'iya tevi 'icuaicü xeciä püyüane, vinucü xeciä püyüane, püvanaqu'erie

müme cuviyexunusie mieme memüteyeturiyari 'axa teyuruvamete yunaime. <sup>35</sup>Perusü yunaitü yuricü memütemaivave que memüteyurie canimasiücüni heiserie que mürexeiya Cacaiyari timaivetü.

### Quesusi que mütiuyuri Simuni quita

<sup>36</sup>Mericsü Pareseusixi xevitü nita'inieni hesüana müticuanicü. Pareseu quita heutahaca mana nayerüni. <sup>37</sup>Hicü 'uca mana mequiecametücai 'axa mütiyuruvametücai, tiutamariECA Pareseu quita mayecateicü Quesusi, caninuani tete puteyayari 'ahanatü visi mu'üacü hüneme. <sup>38</sup>Quetateya 'aurie niutaqueni 'utasuatü. 'Ucayia nicaxürüvecaitüni quetateyasie, yücüpacü nitivasiüxa. Niti'iseni quetateyasie, visi mu'üa nitivirieni. <sup>39</sup>Hicü 'iya Pareseu mita'ini müpaü tiniyücühüavecaitüni yu'iyarisie, Cari 'icü xüca yuricü tixaxatametünique, pimaicaqueyu 'icü 'uca micumayüaxime, que mütiyuriene pütimaicaqueyu, 'axa tiyuruvame que mütihücü. <sup>40</sup>Hicü Quesusi müpaü tinitahüave, Simuni 'acu, 'esiva nepümasitahüavequeyu. 'Iya tita'ei, 'Au, Ti'üiquitame. <sup>41</sup>Müpaü niutayüni, Mericsü heiva neuyevecaitüni yuhutatü memüte'ipitüanicü xeime, meripai que mütivaruniütüa. Xevitü 'auxüme sienituyari 'inüariyari ni'üitüaniquecaitüni, xevitüta huta teviyari heimana tamamata 'inüariyari ni'üitüaniquecaitüni. <sup>42</sup>Tixaü memücatehexeiyacaicü memüte'ipitüanicü, 'iya tinivareuyehüvirieni yuhutame. Mericüte, que mü'ane müme masi

pinaqui'erie tevi mütivareuyehüviri. <sup>43</sup>Simuni müpaü tinita'eiya, Xüari que mü'ane masi vaicavamecü müreuyehüviyari, mücü masi vaica ninaqui'eriecamücü. Quesusi müpaü rehüave, Heiseriemecü pepüti'acühüave. <sup>44</sup>Hicü ta'aurie 'aveca, 'uca 'uxeiyaca, müpaü tinitahüave Simuni, Queneuxeiya 'icü 'uca. Ne 'ahesüa nenuacu 'aquita, 'ecü ha pepücanesi'uhanitüa nequetate nemütihauxinicü. 'Iya püta yu'ucaicü nitihaviyatüyani nequetate, yücüpacü nitivasiüxa. <sup>45</sup>'Ecü penesitapatü pepücanesi'utavaüritüa. 'Iya püta ne'atahacu hicüque pücatihayeve nesicu'isevetü nequetatesie. <sup>46</sup>'Ecü pepücanesi'ucaviri nemu'usie. 'Iya püta visi mu'üa pünesi'utiviri nequetatesie. <sup>47</sup>'Ayumieme nepümaticühüave, vaica que mütiyucanaqui'erie canimasiücüni que müreuyehüviyarie 'axa tiuyurieca vaücava. Que mü'ane 'esiva xeicüa müreuyehüviyari, mücü 'esiva xeicüa tiniyucanaqui'erieca. <sup>48</sup>Hicü müpaü tinitahüave 'uca, 'Axa que pemütiuyuri pepüreuyehüviyarieri. <sup>49</sup>Hicü hipatü 'auriena mematecai müpaü metenyutihüavetüüne yu'iyarisie, Que püpaicü 'icü mütivareuyehüviri 'axa que memüte'uyuri. <sup>50</sup>Masi 'iya müpaü tinitahüave, Yuri pemütiuta'ericü peputavicueisituarie. 'A'iyarisie peca'uximatüarietü quenemie.

### 'Ucari que memüte'ipareviecai Quesusi

**8** Mericsü 'arique canicuyeicacaitüni quiecarü 'emüyeyeusie 'esimüyeyeusie. Nicuxatacaitüni niuqui 'aixüa

manuyüne, tivacuxaxatüvatü que müti'ane Cacaüyari ti'aitametücacu. Tamamata heimana yuhutatü hamatüana meniu'uvacaitüni, <sup>2</sup>hipatüta 'ucari memanayexüriya cacäyarixi 'axa memüteyurie mevarunücu, metecucuyecu. Xevitü müme Mariya Mararatanaca catinitevacaitüni, meripai muxünarie cacäyarixi 'axa memü'anene me'inücacu 'atahutatü, <sup>3</sup>xevitüta Vana catinitevacaitüni Susa mü'üyayatücai, mücü Susa mühürütüariecai Herurexi mütimicuanicü, xevitüta Susana, hipatüta yumüiretü. Menivapareviecaitüni müme yupinitecü.

**Ti'ivivame 'uxasieya hepaüsita ticuxatatü que müti'üquitacai**

*(Mateu 13:1-9; Maricuxi 4:1-9)*

<sup>4</sup>Merücüsü yumüiretü teüteri hesüana meniyuxeüriecaitüni, müireme quiecaritesie meheyecüneca. Hicü 'üxasi hepaüsita ticuxatatü tinivaruti'üquitüatüyani müpaü 'utaitü, <sup>5</sup>Ti'ivivame neyani 'imüari ca'ivienique. Merücüsü 'imüari 'ivienecacu, hipatü huye tesita niucaxürieni niutiquesinire. Viquixi taheima memü'uva menicucuanü. <sup>6</sup>Hipatüta niucaxürieni 'ayeparisie. 'Utineca niutivani müca'acuhavirecaicü. <sup>7</sup>Hipatüta niucaxürieni xuyasata. Hamatüana 'utinexüaca xuya, nenucanani. <sup>8</sup>Hipatüta niucaxürieni 'aixüa müracu'anesie. 'Utineca niutixuavere xei

sienituyari payeixüa. Müpaü 'utayüca carima müpaü niutayüni, Xaütü netü mu'enaxü que'u'ena.

**Titayari müpaü müti'üquitacai Quesusi, 'üxasi hepaüsita ticuxatatü xeicüa**

*(Mateu 13:10-17; Maricuxi 4:10-12)*

<sup>9</sup>Hicü hesüana miemete teyü'üquitüvamete menicu'ivaviyacaitüni queri haine mücü 'üxasi. <sup>10</sup>Müpaü niutayüni, Xeme xecanipitüarieca xemimaicacü tita mütiuti'aviesiecai, xemütemaicacü que müti'ane Cacaüyari ti'aitametücacu. Hipatü püta 'üxasicü xeicüa mecanipitüarieca, para meheunenieretü memüca'ixeyacü, meheu'enanatü memüca'i'enienicü.

**Quesusi que mütihecüatacai yü'üquisica, ti'ivivame 'üxasieya hepaüsita que müti'üquitacai**

*(Mateu 13:18-23; Maricuxi 4:13-20)*

<sup>11</sup>'Üxasicü 'ipaü catinimasiücünü. 'Imüari, Cacaüyari niuquieya canihücütüni. <sup>12</sup>Huye tesita miemete, müme mecanihümetüni memü'enana, peru cuitü cania'axeni Cauyumarie, va'iyarisie ninavani niuqui capa me'utavicieisitüarienicü yuri mete'uta'eriecaxüame. <sup>13</sup>'Ayeparisie miemete, müme mecanihümetüni memitanaqui'erie niuqui meyutemamavietü me'u'enanaca, peru müme mepücahananatüca. Yareutevitü yuri meteni'erieca, peru quepaucua memüta'inüasieni mecanicunuitüariacunü. <sup>14</sup>Xuyasata mucaxüri, müme mecanihümetüni memü'enana,

peru 'iyaritüaricacü tuminicü hicü mieme tucari naqui'eriyayacü meyüatü mecananucanaca mepüca'aye'axüani. <sup>15</sup>'Aixüa müracu'anesie miemete, müme mecanihümetüni niuquisie memüteviya 'aixüa 'iyaricü meyuvairiyatü me'u'enanaca. Müme meniutixuxuavereni mete'uca'enivatü.

### Cüxeme

(*Maricuxi 4:21-25*)

<sup>16</sup>Cüxeme 'utaiyame püca'iti'avieta, xarita pücaheicayeni, 'utatüa pücaheitayeni, masi vapaitü neitiyemücü, müme memataxüaxime hecüariyaya memüxeiyacü. <sup>17</sup>Naitü mütiuti'aviesie masiücütü nayeimücü, naitü müranucanami nitamarivamücü, masiücütü nayeitüariemücü. <sup>18</sup>'Ayumieme xequeneyucuerivayurieca que xemüte'enana. Que mü'ane tixaütü mürexeyia canimiquieca. Que mü'ane tixaü mücarexeyia, tita rexeiyame mütiyu'erie catininavaiariemücü.

### Quesusi 'ivamama varusieya

(*Mateu 12:46-50; Maricuxi 3:31-35*)

<sup>19</sup>Merücüsü varusieya 'ivamama meniu'axüani hesüana. Meniyutatexieni me'itahüaveque, teüteri yuvaüavatü memayetecaicü. <sup>20</sup>Hicü müpäü tiniutahüavarieni, 'Avarusi 'a'ivama tacua meniti'uni memasixeiyacütü. <sup>21</sup>Mücü müpäü tinivacühüaveni, 'Ime Cacaüyari niuquieya memü'enie yamemütecahu, 'ime mecanihümetüni nevarusi ne'ivama.

### Quesusi 'eca que müreunuitüa

(*Mateu 8:23-27; Maricuxi 4:35-41*)

<sup>22</sup>Merücüsü heiva canuvasie nicayerüni, hesüana miemete teyü'üquitüvamete vahamatü. Müpäü tinivarutahüave, Haracuna 'anutaüye tepanucüne. Mana menecüne. <sup>23</sup>Hapa me'uhucacu 'iya neucuni. Hicü 'eca cüsütuiyari muva carima nacaneni, haracunasie niuquexüani. Canuva tahünirümeccacu mepucuerivayüa. <sup>24</sup>Hicü menenutahütüani müpäü me'utiyyatü, Ti'üquitame, Ti'üquitame, tepeuyevexime. Quesusi 'anucuqueca nitatieni 'eca hamevari meta. Neunuani, cayuvatü niutamare. <sup>25</sup>Hicü müpäü tinivarutahüave, Queri yuri xete'erie. Meheumamatü menihüxyiacaitüni müpäü meteyücühüavetü, Qesü püpaicü 'icü. Ni'aitüaca hamevari ha, yapüticamie que maine.

### Cacaüyarixi que memüte'iviyacai Catarenatanaca

(*Mateu 8:28-34; Maricuxi 5:1-20*)

<sup>26</sup>Hicü Catarenasixi vacuieyarisie meneta'axüani canuvasie meyetetü, Carereya 'anutaüyesie. <sup>27</sup>Heucaqueximeccacu cuiepa, tevi nenucunaque mana müquiecametücai, cacaüyarixi 'axa memü'anene meminücai müixa. 'Ayumieme mücü 'ixuriquite püca'anacatücücai, quita püca'ayecatei, masi teuquiyasata niuyeicacaitüni. <sup>28</sup>Quesusi 'uxeyaca, 'utahivaca nativeni hetüana müpäü tiuhivatü, Que peneti'uximatüa Quesusi, Cacaüyari

taheima macave pemünu'aya.  
 Nepümasivaviri cuerietü,  
 penücahürixüa nesi'luximatüaca.  
<sup>29</sup>Müpaü niutayüni mücü, Quesusi  
 tita'aitüacu cacäyari müca'itiya,  
 mixünacü tevi. Müixa viyari  
 niviyacaitüni cacäyari 'axa mü'ane.  
 Tevi nanutahüivacaitüni tepüacü  
 'acuvietü yumamasie yül'ucasie.  
 'Ititequetü tepüa carenayari  
 nivayeyeicaitüni macumavesiepaitü  
 cacäyari 'axa mü'ane 'inücacu.  
<sup>30</sup>Mericusü Quesusi müpaü  
 tinita'ivaviya, Que petiteva  
 'ecü. 'Iya yumüiretü cacäyarixi  
 meminücaicü müpaü niutayüni,  
 Xei Vaxayari netinitevaca.  
<sup>31</sup>Mümeri cuerietü vaücavamecü  
 menivaviriecäitüni Quesusi  
 mücavatanü'anicü meucatevasie  
 memüyehücü. <sup>32</sup>Mericusü  
 mana hura yumüiretü tuixuri  
 metenicuatüveicaitüni yemurittia.  
 Menitavavirieni cacäyarixi müpaü  
 mütipavitüanicü memüvativiyacü  
 tuixuri. Yacatinivarupitüani. <sup>33</sup>Hicü  
 cacäyarixi 'axa memü'anene  
 me'ixünaca tevi, menivarutiviya  
 tuixuri. Hicü tuixuri yunaitü  
 meniutinausa. 'Axa 'anecüa  
 meneucanausaxüaximecäitüni,  
 haracunapa meneuxürieni.  
<sup>34</sup>Hicü tuixuri vahüvemete  
 me'uneniereca que mütiuyü  
 meniyuta'unaxüani. Quiecarisie  
 metenicuxatacäitüni quiecarü  
 'aurie meta. <sup>35</sup>Mana meneyecüne  
 me'ixeyaque que mütiuyü.  
 Quesusüa me'u'axüaca tevi  
 meniutaxeyi cacäyarixi  
 memixünaxü. 'Aixüa reuquemaritü  
 Quesusitüa nacateitüni  
 heuyumarietü. Meniutimamani.

<sup>36</sup>Hicü memunenierixü  
 metenivarutaxatüani que  
 mütiutavicueisitüarie tevi  
 cacäyarixi meminücai. <sup>37</sup>Hicü  
 yunaitü Catarenasixi vacuie  
 memütamacai meyumüiretü  
 menitavavirieni vahesüa  
 müyemiecü. Cuini mieme  
 mecatenimamacäitüni. Quesusi  
 canuvasie cayerüca caneyani  
 yu'utüma. <sup>38</sup>Hicü 'iya tevi  
 cacäyarixi memixünaxü  
 nitavavirieni hamatüana  
 mücuyeicanicü. Masi Quesusi  
 neiyenü'ani müpaü 'utaitü, <sup>39</sup>'Aque  
 quenemie. Mana quetinivaretaxatüa  
 nai Cacäyari que masi'uyuri.  
 Neyani naisarie quiecarisie  
 ticuxatätü que mütitavicueisitüa  
 Quesusi.

**Cairu nu'aya que  
 müranucuquetüarie, 'uca ticuicame  
 Quesusi 'ücarieya 'umayüacu**  
*(Mateu 9:18-26; Maricuxi 5:21-43)*

<sup>40</sup>Mericusü Quesusi 'anutäiye  
 heta'acu, yumüiretü teüteri  
 menitavaürütüani me'icuevietü.  
<sup>41</sup>Hicü tevi mana caninuanü  
 Cairu titevatü. 'Iya tuqui va'üya  
 canihücütüicaitüni. Quesusitüa  
 'ativeca vaüriyarica nitavavirieni  
 quitana müyemiecü. <sup>42</sup>Xeüciame  
 neixeyacäitüni yunive  
 'ucatüme, tamamata heimana  
 huta viyari yacütütü hücame.  
 Nemüximecäitüni.  
 Mericusü muva 'uyemiecacu  
 yumüiretü teüteri  
 menisäipünacäitüni. <sup>43</sup>Hicü 'uca  
 mana niuyeicacäitüni. Tamamata  
 heimana huta viyari niyurieacäitüni,  
 xuriyaya cacaneunuavecäitüni.

Teyu'uhayemavamete vahesüa yupini tiniutixütüacaitüni naime, ni xevitü püca'yüvecai menayehüanicü.

<sup>44</sup>Hicü Quesusi varita 'uyemietü 'ücarieya niumayüani. Yapaucua neunuani xuriyaya mi'axiyacai.

<sup>45</sup>Hicü Quesusi müpaü niutayüni, Quepaicü pünesi'umayüa. Yunaitü meyucu'imavacacu, müpaü niutayüni Pecuru, Ti'üquitame, yunaitü teüteri 'a'aurie mepüyucuxeüri mepümasisaipüna, quepai pünesi'umayüa, peraine.

<sup>46</sup>Quesusi müpaü niutayüni, Xevitü pünesi'umayüa. Türücarिया nehesie vayeneicacacu yanepütimaicai.

<sup>47</sup>Hicü 'uca yatimaitü 'avie müca'yüanecaicü, 'utayüyüacatü ninuani. Hetüana 'ativeca yunaime teüteri vahürüpa nitaxatüani que mütimayüa, yapaucua que müranayehüiia.

<sup>48</sup>Quesusi müpaü tinitahüave, Nenive yuri pemütiuta'ericü pecaniutavicueisitüarieni.

'A'iyarisie peca'uximatüarietü quenemie.

<sup>49</sup>Mericsü müpaü 'utainecacu cuxi, xevitü va'ü quie meyetüa mana caninuani müpaü titahüaveque va'ü, 'Ari 'anive canemüni yemecü. Ti'üquitame pepücati'uxitüaca. <sup>50</sup>Hicü Quesusi 'u'enaca müpaü tinitahüave, Pepücaheumaca. Yuri quetineuta'eri xEICÜA, nitavicueisitüariemüci.

<sup>51</sup>Hicü Quesusi heutahaca quita, hipame pücavarupitüa hamatüana memeutahaxüanicü müvayecateisie, Pecuru Vani Cacuvu xEICÜA nunusi 'uquiyarieya varusieya xEICÜA nivarupitüani.

<sup>52</sup>Yunaitü meniutisuanacaitüni

mene'erivacaitüni meyhiverietü.

Quesusi müpaü niutayüni, Xepüca'utisuanani. Pücamüqui, pucusu masi. <sup>53</sup>Müme

meninanaimacaitüni metemaitü yeme mümüquicaicü. <sup>54</sup>Hicü

mamaya 'uviyaca müpaü tinitahüave, Nunusi 'acu, quenanucuquexi. <sup>55</sup>Hicü 'iyarieya

ninuani. Yapaucua nanucuqueni. Quesusi müpaü tiniuta'aita

mütimiquienicü. <sup>56</sup>Hicü

'uquiyarimama meniuhüxiyani. 'Iya müpaü tinivarutahüave, Ni xeime tüma xepücatehaxaxatüvani que mütiuyü hepaüsita.

**Tamamata heimana yuhutame  
que mütivareutanü'axüa  
teyü'üquitüvamete**

(Mateu 10:5-15; Maricuxi 6:7-13)

**9** Mericsü varucuxeürieca tamamata heimana yuhutame, türücarिया nivarupitüani heiserie memexeiyanicü cacaiyarixi 'axa memü'anene yunaime vahepaüsita, cuiniya hepaüsitata memüvaranayexürüvanicü.

<sup>2</sup>Nivareutanü'axüani memütecuxatanicü que müti'ane Cacaiyari ti'aitametücacu, memüvaranayexürüvanicü teüteri.

<sup>3</sup>Müpaü tinivarutahüave, Tixaü xepücatehetücüni huyeta mieme, mumuxi xerai 'inüa tumini, huta camixayari xepüca'anacatücüni

meta. <sup>4</sup>Haqueva quita xemetanaqui'erivani muva xequeneyuhayevani 'asita

quepaucua xemüyehuque. <sup>5</sup>Haque xemücahetanaqui'eriva, quiecarisie yaxequeteneuhuni, 'inüaricü yucacaisie mieme tumuanari



xequeneucasixüa, müpäü xeteyurietü xemüthehecüatanicü vahesie que mürahüivanicü. <sup>6</sup>Müme meheutayeixüaca quiecaritesie menicu'uvacaitüni metecuxatatü mevaranayexürivatü tecuicucate naisarie.

**Herurexi que mütiyu'iyaritüacai  
Qesusi hepaüsita, Vani Ti'üyame  
'umieriecu**

*(Mateu 14:1-12; Maricuxi 6:14-29)*

<sup>7</sup>Hicü Herurexi mühürütüariecai mücü cuiepa müti'aitanicü, mücü tiniutamarieni que mütiyurienecai Qesusi naimé. 'Asipücatimaicai que mütiyurieniquecai hipatü müpäü memaitücateicü quename vaniu Vani müquite vasata 'anucuquetüarie, <sup>8</sup>hipatüta quename 'Eriyaxi masiücütü 'atüa, hipatüta quename xevitü 'anucuque meripai miemete texaxatamete. <sup>9</sup>Perusü Herurexi müpäü canainecaitüni, Vani mu'uya nanutivitequiéni yanetiuta'aitacu ne. Peru que püpaicü 'icü hepaüsitana müya 'anuyüneme nemü'enie. Nixeyamücücaitüni Qesusi.

**'Auxüme miriyari que mütvarami**

*(Mateu 14:13-21; Maricuxi  
6:30-44; Vani 6:1-14)*

<sup>10</sup>Mericsü nü'arisixi me'u'axüaca, nai Qesusi meteniutaxatüani que memüte'uyuri. Mücüri varavitütü neyani yühücüame quiecarí Vesaira müracuseva 'aurie macumavesie. <sup>11</sup>Teüteri yamete'utamarieca meniveiyacaitüni. Varutanaqui'erieca tinivacuxaxatüvacaitüni que müti'ane Cacaüyari ti'aitametüacu.

Müme müpäü memüteheuyehüacai nivararayexürieni.

<sup>12</sup>Mericsü tau nacayunirümeccaitüni. Hicü tamamata heimana yuhutatü hesüana meyucuxeüerieca müpäü metenitahüave, Teüteri quenivareutanü'axüa 'aurava memüyehücü quiecarite 'emüyeyeu 'esimüyeyesie memüyehenicü 'icuai memecaxeiyacü. 'Ena macumavesie teniu'uvani. <sup>13</sup>Iya müpäü tinivarutahüave, Xeme püta xequetenivarumicua. Müpäü meniutiyuane, Vaüca 'icuai tepücahexeiyá, 'auxüme payari huta quesüteyari xeixüa. Me xüca 'icuai tenanaiyuni 'lime teüteri yunaime vahesie mieme. <sup>14</sup>Uquisi 'auxüme miriyari yacütütü mecaniyupaümecaitüni. Hicü müpäü tinivarutahüave yuhesüa miemete teyü'üquitüvamete, Yaxequetenivarutahüavi memücyaxixüanicü huta teviyari heimana tamamata yacütütü meyupapäumetü. <sup>15</sup>Müme müpäü mepüte'uyuri, yunaime mepüvareucuyasaxüa. <sup>16</sup>Hicü 'enu'üca nitaneneviya 'auxüme payari huta quesüteyari meta, taheima heutiniereca. 'Ititaratü nivata'üütüvacaitüni teyü'üquitüvamete memüvamücuanicü teüteri. <sup>17</sup>Yunaitü meniticuani meniutihuxani. Tarimeyari niucuxeüriyani manuyuhayevaxü, tamamata heimana huta quirivayari päümetü nayani.

**Pecuru que mütiuyutahecüataxü  
Qesusisie tiviyatü**

*(Mateu 16:13-19; Maricuxi 8:27-29)*

<sup>18</sup>Mericsü Qesusi niyunenevieccaitüni yuxaüta,

teyü'üquitüvamete mana  
me'u'uvacacu. Müpäü  
tinivaruta'ivaviya, Teüteri que  
metecuxata que mü'ane nepühücü  
ne. <sup>19</sup>Müme müpäü metenita'eiya,  
Hipatü müpäü meniutiyuani,  
quename Vani Ti'üyame pehücü,  
hipatüta quename 'Eriyaxi pehücü,  
hipatüta quename petixaxatame,  
meripai miemete texaxatamete  
quename pehücü pemanucuque.  
<sup>20</sup>Hicü müpäü tinivacühüaveni,  
Xemete que xe'utiyuane que  
nepüpaicü. Pecuru müpäü  
tinita'eiya, Que mü'ane Cacaüyari  
heiserie mipitüa Cürisitütüme, 'ecü  
pecanihücütüni.

**Qesusi que mütvartahüavixü que  
mütimierieniquecai**

(Mateu 16:20-28; Maricuxi 8:30-9.1)

<sup>21</sup>Qesusi cuinie  
tinivaruhürütüani,  
müpäü tiva'aitüatü  
'asimemücatehehüavenicü  
xeime 'icü hepaüsita. <sup>22</sup>Müpäü  
niutayüni, Yuri Tevi que  
nemütiteva, neuyeveca  
cuxi vaüca nemüticuinecü.  
Ta'uquiyarima, mara'acate  
memühürütüarie, mümeta  
'inüaricü memüte'üquitamete  
yunaitü mecanenitixani'ericuni,  
necanimieriemücü,  
hairieca tucarisie  
necananucuquetüariemücü.  
<sup>23</sup>Müpäüta  
tinivacuxaxatüvacaitüni yunaima,  
Tevi xüca yuvaüriyani nehamatü  
muyeicanicü, queyutatuaca,  
queyuvaüriyani tucaricü sepa  
curuxisie mumerie, nehesisie  
quetiviyani. <sup>24</sup>Que mü'ane

müyutavicueisitüamücü  
caniyutatümaiymücü. Que  
mü'ane müyutatümaiya necümana,  
mücü niyutavicueisitüamücü  
yemecü. <sup>25</sup>Tevi nai cuiepa  
mütixuave xüca ra'ivaque, tita  
ra'ivaqueyu xüca heuyuehüanique  
xüca yutatümaiyanique. Tixaü  
pücara'ivaqueyu. <sup>26</sup>Que mü'ane  
münesiteviya miteviya neniüqui,  
neta Yuri Tevi que nemütiteva  
nepiteviyani 'iya quepaucua  
nemunuani nemarivetü,  
ne'uquiyaripaü visi ne'anetü,  
netupirisixima memüpasie  
Cacaüyarisie mieme vahamatüa.  
<sup>27</sup>Xasunicü nepütixecühüave,  
hipatü 'uva memü'uva mepücacuini  
mexi mecanenierivave que  
müti'ane Cacaüyari ti'aitametücacu.  
'Ariqueque mecanicuicuni.

**Yücü tiyuxexeyatü que müratüa**

(Mateu 17:1-8; Maricuxi 9:2-8)

<sup>28</sup>Merücüsü 'inüca 'icü niuqui,  
'atahaica tucari yacütütü  
'anucayacu, yemurisie neutiyune  
yutanenevienique, Pecuru Vani  
Cacuvu varavitütü. <sup>29</sup>Hicü  
yuneneviecacu niericaya  
yücü tiyuxexeyatü nayani,  
'ixuriquiteya tuxatü xavavatütü  
nayani. <sup>30</sup>Hicü 'uquisi yuhutatü  
hamatüana meteniutixatatüüne.  
Müme Muisexi 'Eriyaxi  
mecanihümetücaitüni, <sup>31</sup>visi  
meteyuxexeyatü Qesusipaü  
metenicuxatacaitüni  
que mütiyemiecai, que  
müraye'aniquecai Querusaresiesie.  
<sup>32</sup>Merücüsü Pecuru hipatü  
hamatüana memü'uvacai yunaitü  
mecanicusucaitüni. Cuini

mieme mecateneucusicucaitüni.  
 Me'anutaneniereca menixeiya  
 visi 'aneme, 'uquisi menivaruxeiya  
 yuhutame 'auriena meti'ucame.  
<sup>33</sup>Müme meyhuximecacu  
 Quesusisüa, Pecuru müpäü  
 tinitahüave, Ti'üquitame 'aixüa  
 cani'aneni 'uva temu'uvacü.  
 Hicümü haica xamaruyari  
 tepütivevieni, 'ahesie mieme  
 xeime, Muisexisie mieme xeime,  
 'Eriyaxisie mieme xeime. Müpäü  
 niutayüni 'asicatimaitü que  
 mainecai. <sup>34</sup>Yaticuxatacacu  
 haivitüri nanutateni nivareutinani.  
 Vareutinaximecacu meniutimamani.  
<sup>35</sup>Hicü haivitürisata xevitü müpäü  
 niutayüni, 'Icü caninenivetüni,  
 yemecü nemenuyexei.  
 Xequene'enieca. <sup>36</sup>'Utaniucu,  
 Quesusi yuxaüta niuyuhayeva.  
 Müme cayuvatü meniutamare. 'Ana  
 xeime mepücatehaxaxatüvacai tita  
 memüte'uxei hepäüsita.

**Quesusi que mürenayehüa nunusi  
 cacaiyari 'axa mü'ane miviyacai**

(Mateu 17:14-21; Maricuxi 9:14-29)

<sup>37</sup>Mericiüsü 'uxa'arieca yemurisie  
 me'acahucacu yumüiretü  
 menivaranucunaque teüteri.  
<sup>38</sup>Hicü 'uqui teüteri vasata 'uvetü  
 müpäü tiniuhiva. Ti'üquitame  
 'acu, nenive queneuxeiya cuerietü  
 xüa. Xei hücüa necanexeiyani.  
<sup>39</sup>Cacaiyari 'axa mü'ane picuviviya.  
 Yapaucua picunünive 'utahivacacu  
 cuaimuxari vayeneicacacu.  
 Haveri mieme picuhayeicava  
 'esivatücacu 'imieximetü xeicüa.  
<sup>40</sup>Nevarutavaviriecü 'ahesüa  
 miemete teyü'üquitüvamete  
 memenunü'aniciü

mecaniuyutatexieni. <sup>41</sup>Hicü  
 Quesusi müpäü niutayüni, Cari  
 hicü miemete yuri xepücate'erie,  
 yu'iyarisie xepüyuxamurie.  
 Quepäümexa peuyevese xehamatü  
 nemuyeicani, quepäümexa  
 nepüxenevieca. 'Ena quenatu'li  
 'anive. <sup>42</sup>'Amieximecacu cacaiyari  
 'axa mü'ane nenucahüani  
 'ixamurietü. Hicü Quesusi  
 cacaiyari müca'itiya 'utatiecü  
 nanayeveni nunusi, 'uquiyarieya  
 niyetuirieni. <sup>43</sup>Yunaitü  
 meni'iyarixiecaitüni Cacaiyari  
 müya mütitürücaüyeacai.

**Tavari Quesusi que  
 mütivarutahüavixü que  
 mütimierieniquecai**

(Mateu 17:22-23; Maricuxi 9:30-32)

Hicü yunaitü mehüxiyacacu  
 nai que mütiyurieneacaiçü,  
 müpäü tinivarutahüave yuhesüa  
 miemete teyü'üquitüvamete,  
<sup>44</sup>Xeme 'icü niuqui yu'iyarisie  
 xequeneucayesa. Yuri Tevi  
 netitevatü nenyetuiyamüçü  
 teüteri vamamasie. <sup>45</sup>Müme  
 mepücaheitimavavecai 'icü  
 niuqui. Vahesie mieme  
 ni'aviecaitüni, ya'ayumieme  
 yamepücatehetimaivavecai.  
 Memamatü mepücauyavaiyiacai  
 memita'ivaviyaquecai 'icü niuqui  
 hepäüsita.

**Que mü'ane müve'eme, que mutayü**

(Mateu 18:1-5; Maricuxi 9:33-37)

<sup>46</sup>Mericiüsü niuqui  
 meniutixüatüatüçüne, que  
 mü'ane müme masi ve'emetütü  
 mayaniquecai. <sup>47</sup>Quesusi timaitü  
 que memüteyüçühüavecai

yu'iyarisie, nunusi yu'aurie niutaqueni. <sup>48</sup>Müpaü tinivarutahüave, 'Icü nunusi matetü quename nehësüa mieme, mücü 'ayumiemeyaricü xüca 'itanaqui'erieni, neta canenitanaqui'erimücü. Que mü'ane münesitanaqui'erieni ne, 'iyata canitanaqui'erimücü münesiheyenü'a. Que mü'ane yunaime xesata masi vaüca tixaü mücatihücü, mücü canive'emetüni.

**Que mü'ane mücatasi'aye'unie  
cataniparevieca, que mutayü**

*(Maricuxi 9:38-40)*

<sup>49</sup>Hicü Vani müpaü tinitahüave, Ti'üquitame, xeime tepuxeü 'ahesüa niu miemetütü mütiva'aitüacai cacaiyarixi 'axa memü'anene memüvaxünacü teüteri. Peru tenitanenani 'ahesie mücativiyacü tahepaü. <sup>50</sup>Quesusi müpaü tinicühüaveni, Xepüca'inenaca. Xüca catasi'aye'unieca cataniparevieca.

**Quesusi que mütivarutati  
Cacuvu Vanimame**

<sup>51</sup>Mericsü tü cari 'aye'aximecacu manutivitüquienicü, 'ana neutiyune Querusareme cayucunütianüatü.

<sup>52</sup>Niuqui tuayamete nivananucuhaisitüiya. Müme mana me'uyehütü Samariyatari vaquiecarisie meniu'axüani tixaütü memütecuh'aritüanicü hesiena mieme. <sup>53</sup>Quiecatari mepücaheitanaqui'erie yemecü Querusareme müyemiecaicü.

<sup>54</sup>Teyü'üquitüvamete Cacuvu Vanimatü mete'utamariECA müpaü metenitahüave, Ti'aitame,

camatinaque temutiniucanicü 'Eriyaxi que mütiuyuri, tai taheima macanenicü müvatitaiyacü müme.

<sup>55</sup>Peru Quesusi ta'aurie 'aveca nivarutatieni müpaü 'utaitü, Cari xeme 'asixepücatemate que mü'ane 'iyarisie xemüteviya.

<sup>56</sup>Yuri Tevi netitevatü, que nemütinua, teüteri va'iyari neheuyexürienique nepücanua, masi nevatavicueisitüanique püta necaninuani. Hicü xeime quiecarisie püta menecüne.

**Teüteri Quesusisie memüteviyacuai**

*(Mateu 8:19-22)*

<sup>57</sup>Mericsü huyeta me'uyehucacu, xevitü müpaü tinitahüave, Ti'aitame, 'ahesie necatiniviyamücü. Haque pememie, neta necanimieni.

<sup>58</sup>Hicü Quesusi müpaü tinitahüave, Cauxaisi yuterü mecanexeyani, viquixi taheima miemete yu'itua metehexeyata, perusü ne Yuri Tevi netitevatü tixaü nepücarexeiya haque nemünetamuritaritüani.

<sup>59</sup>Hicü xeimeta müpaü tiniutahüave, Nehesie quetineviyani. 'Iya müpaü tinitahüave, Queneneupitüa merie nemüyemiecü, ne'uquiyari nemücateucucü hemüyuque. <sup>60</sup>Müpaü tinita'eiya, Müquite quenivaruhayeva müme püta memüvacateucucü yuhesüa miemete müquite. 'Ecü pütasü quenemie, quetynecuxatani que müti'ane Cacaiyari ti'aitametücacu.

<sup>61</sup>Hicü xevitüta müpaü tinitahüave, 'Ahesie necatiniviyamücü Ti'aitame. Queneneupitüa xEICÜa ne'ivama nemüvatateütianicü merie.

<sup>62</sup>Quesusi müpaü tinitahüave,

'Icumayüame hararu, xüca  
yu'utüma 'utaniereni, 'aixüa  
püca'yüni. Caca'yari yacü xeicüa  
canexeyamücü ti'aitüvametüme.

**Que mütivareutanü'axüa haica  
teviyari heimana tamamata**

**10** Mericüsü 'arique  
Ti'aitame hipameta  
varuhüritüaca haica teviyari  
heimana tamamata meyupaümeme,  
yuhutatame nivareutanü'axüani  
memanucuhaitütüanicü naime  
quiecarisie naime quiepa haque  
mücü meta'aniquecai. <sup>2</sup>Müpaü  
tinivarutahüave, 'Isanari püvaücava,  
'isanamete mepüca'yümüire.  
'Ayumieme xequeneutavaviri  
'isanari cusiyari, 'isanamete  
müvatanü'anicü yu'isanarita.  
<sup>3</sup>Xequeneuhuniri. Camü que  
nemütixetanü'axüani, muxasi türixi  
vahepaü xecaniyüacacuni 'üravesixi  
vasata xe'u'uvatü. <sup>4</sup>Xepücaheitücinü  
vipura xerai cacai. Huyeta xeime  
xepüca'vairitüaca. <sup>5</sup>Haque  
xeme'axüani quita, müpaü  
meri xequeneutiyuaneni, 'Uva  
quiecatari 'aixüa xequetexeyarieca.  
<sup>6</sup>Xüca mana 'ayecani que  
mü'ane müyuvairiya 'aixüa  
mütixeyarienicü, hesiena tinaquetü  
canayeimücü xevairisica. Me  
xüca müpaü 'anetü ca'ayecani,  
xevairisica caninuamücü  
xehesie. <sup>7</sup>Manatütü mücü quita  
xequeneuyahayevani xetecuatü  
xete'ietü tita memütexemicuani.  
Ti'ivamesie catinaqueni  
'ivaricaya. Xepüca'yupatatüveni  
hipame vaquita. <sup>8</sup>Haque  
quiecarisie xeme'axüani,  
haque memüxetanaqui'erieni,

xequetenecuaca tita  
xemütemiquireca.

<sup>9</sup>Xequenivaranayexüri  
tecuicicate mana miemete.  
Müpaü xequetenivacuxaxatüvani,  
Hicürixüa naye'aniri, Caca'yari  
canisütüani 'ena ti'aitatü. <sup>10</sup>Haque  
quiecarisie memücaxetanaqui'erieni  
xehe'axüayu, vacaye 'utüa  
xe'uyehütü müpaü xequeneutiyua,  
<sup>11</sup>Asita tumuanari xequiecarisie  
mieme mütasiciuema tacacaisie,  
tepiticase texeheciätatü.  
Sepanetü xemücatasi'utanaqui'eri,  
ipaü xequetenemaica, tucari  
maye'acü Caca'yari misütüacü  
ti'aitatü. <sup>12</sup>Ipaü nepütixecühüave,  
tucariyari 'aye'ayu cuanivemecü  
mecani'itüariecuni vana quiecatari  
Suruma quiecatari cacuanivemecü  
me'itüariecacu masi.

**Que memücateyuvairiyacai  
quiecaritesie**

*(Mateu 11:20-24)*

<sup>13</sup>Xüa 'ui xeme Curasini  
quiecatari, xüa 'ui Vesaira quiecatari.  
Türüca'yemecü xüca tiuyünique  
Tirusie Sirunisie que mütiuyü  
xehesüa, meripai mepütéhayeva'queyu  
que memütëyuriecäi,  
mepüyuhiverieca'queyu maixa  
me'anacatütücaitü hiverica  
'inüariyari, naxi meyucavirivatü.  
<sup>14</sup>Masi Tiru quiecatari Siruni  
quiecatari cacuanivemecü masi  
mecani'itüariecuni quepaucua  
'isücame müvata'ivaviya, xeme püta  
cui cuanivemecü xe'itüariecacu.  
<sup>15</sup>Xemeta Caperünaumetari, que  
xeteyutituca'queyu muyuavisiepai.  
Müquite vahesüa püta  
xecaneucaxüriyacuani.

<sup>16</sup>Que mü'ane müxe'enie pünesi'enie. Que mü'ane müxexani'eri pünesixani'eri. Que mü'ane münesixani'eri pixani'eri que mü'ane münesiheyenü'a.

**Hutarieca que memüte'u'axüa haica teviyari heimana tamamata**

<sup>17</sup>Mericsü haica teviyari heimana tamamata hutarieca meniu'axüani meyutemamavietü, müpaü me'utiyuatü, Ti'aitame 'acu, 'asita cacaiyarixi 'axa memü'anene yamepütecahu que temüteva'aitüa 'ahesüa temümiemetecü.

<sup>18</sup>Müpaü tinivacühüaveni, Nesü necanixeiya Cauyumarie muyuavisie 'anacahüiyacu merücariyapaü. <sup>19</sup>Tamüsü heiserie nenixe'upitüani cuterixi terücaxi xemüvatiquesinacü, 'iya mütasi'aye'unie türücariyaya naime xema'ivacü heiserie necanixe'upitüani. Tixaü 'axa pücatixeyurieni. <sup>20</sup>Mücücü xepücayutemamavieca, cacaiyarixi yamemütecahucü que xemüteva'aitüa xeicüa. Xequeneyutemamavieca masi xemacayasariecü taheima.

**Quesusi que mütiyutemaviecai**

*(Mateu 11:25-27; 13:16-17)*

<sup>21</sup>Mericsü 'ana niyutemaviecaitüni 'Iyari Mütiyupata yatipitüacacu. Müpaü niutayüni, Ne'uquiyari pemüti'aita taheima cuiepa meta, pamüpariyusi nepümasipitüa 'icü pemütiuti'avietaxücü, müme memütüyü'üquitüavave müme memütemaivave memücaheitimanicü, türi püta

vahesie mieme masihücüme pemayeitüacü. Hü ne'uquiyari, 'aixüa 'ane pepü'eriecai müpaü pemütiyurienecaicü.

<sup>22</sup>Nai netiniyetuiriyarieni ne'uquiyari yanetipitüacacu. Xevitü 'asipücatimate que müpaicü nu'aya, 'uquiyarieya xeicüa müpaü catinimaica. Xevitü 'asipücatimate que müpaicü 'uquiyarieya, nu'aya xeicüa müpaü catinimaica, me nu'aya xüca yuvaüriyani mixeisitüanicü xeime, mücüta müpaü catinimaica.

<sup>23</sup>Hicü ta'aurie 'aveca müpaü tinivarutahüave teyü'üquitüavamete yühücüate metitecacu, Müme memunenierixü que xemüte'unenierixü xeme, 'aixüa mecani'itüarieca müme. <sup>24</sup>Müpaü nepütixecühüave, yumüretü texaxatamete te'aitamete meta mepixeyiacucai tita xemüte'uxei xeme, peru mepüca'ixei. Mepi'eniecucai tita xemüte'u'eni, peru mepüca'ieni.

**Samariyatanaca 'aixüa mütiuca'iyaricai**

<sup>25</sup>Mericsü xevitü 'inüaricü müti'üquitametücai nanucuqueni 'i'isipanique. Müpaü niutayüni, Ti'üquitame, tita reuyevese müpaü nemütiyurienicü, tucari mücaxüve nehiesie mütinaquenicü. <sup>26</sup>Iya müpaü rehüave, 'Inüari niuquiyarisie que re'uxa. Que peticuterüva. <sup>27</sup>Mücü müpaü tinicühüaveni, Müpaü cananuyüneni, Peninaqui'eriecamücü Ti'aitame mü'acacaiyarari naime que pemüre'iyaricü naime que

pemüti'amatecü, naime  
'atürücarıyacü, naime que  
pemüticu'erıvacü. Mücü meta,  
pecanınaqui'erıcamücü 'ahepaü  
tevi que pemüti'anaqui'erie.  
<sup>28</sup>Quesusi müpaü tinita'eıya,  
Heiseriemecü peputa'a. Müpaü xüca  
petıyurıeneni, pecanayeyurıcamücü.

<sup>29</sup>Peru mücü heiseriemecü  
yaticamıecatü yuhecüatamütü  
müpaü tınıcühüaveni Quesusi,  
Merıcüte, que püpaıcü nehepaü  
tevi. <sup>30</sup>Hicü 'ita'eıyaca, Quesusi  
müpaü niıtayüni, Heıva tevi  
Qerusareme heyeyaca Querıcu  
neucamıecaitüni. Merıcüsü  
tenavayamete menenucunaque.  
Me'ıtıquemarıpieca me'ıcuvoxüaca  
menecüne müximeme  
me'ucu'eırıeca. <sup>31</sup>Merıcüsü  
'asıcatımaitü que mütiuyü mana  
neucamıecaitüni mara'acame  
mücü huyeta. 'Ixeıyaca mana  
niuyeyanı yateva. <sup>32</sup>Yaxeıciıtari  
Revi nuıvarıeyasıe mıeme xevıtü  
tuqıta mütıparevıvımetücai  
muva 'uyemıetü yateva  
niuyeyanı. <sup>33</sup>Perüsü xevıtıüxa  
Samarıyatanacatütü mana  
'uyemıetü hesüana canınuanı.  
'Ixeıyaca nıtınenımayata. <sup>34</sup>'Ara  
'uyaca 'ıxurıqı neıverıenı xurıya  
manıecacasıe, haseıtıcı vınucü  
'ı'uhayemaca. 'Enutı'ıcataca  
yupuxusıe mesunıpai canı'atüanı.  
Mana nı'üvıyacıtüni. <sup>35</sup>Hicü  
'uxa'arıeca xeı tevıyarı 'ınüarıyarı  
vatı'üca nı'üıtıanı mesunı  
cusıyarı müpaü tıcühüavetü,  
Quene'üvıyanı. Hesıena mıeme  
xüca tıxautü petınanımücü, xüca  
'acuxı heuyeveca, nepütınetuanı  
quepaucua nımayeneni. <sup>36</sup>Hicü

Quesusi müpaü tınıtahüave xevıtü  
mı'ısıpanecayı, Merıcüte que  
petıcu'erıva. 'Ime yuhaıcatü que  
mü'ane yuhepaü tevıpaü pıxeı,  
tenavayamete me'enucunaquecu  
mücü tevi. <sup>37</sup>'ıya müpaü rehüave,  
Que mü'ane mıtınenımayataxü,  
mücü pühücütücai. Hıcü  
Quesusi müpaü tınıtahüave,  
'Ecıtarı quenemıe, hepaüna  
quetıneyurıeneni.

**Quesusi que mürecu'ıvıtaxü  
Marıya Marıta vahesüa**

<sup>38</sup>Merıcüsü mana  
menıu'uvacıtüni. Hıcü Quesusi  
xeıme quıecarısie neutahanı. 'Uca  
Marıta tıtevatü nıtal'ınıenı yuqıta.  
<sup>39</sup>Yu'ıva 'ucatüme pexıyacayı  
Marıya tıtevacame. Mücü  
Quesusıtüa 'acıtü nı'enıecıtüni  
nıuquıeya. <sup>40</sup>Merıcüsü Marıta  
püyuxamurıecayı vaüca tıcumıavıtü  
mütıvıamıncıü. Mana 'utaqueca  
müpaü niıtayüni, Tı'ıtame,  
yapecara'erıva ne'ıva nexıtüa  
münesı'ucu'eırıcü nımütıxemıncıü.  
Yaquetıneutahüavı pünesıparevıenı.  
<sup>41</sup>Quesusi müpaü tınıcühüavenı,  
Neuxeı Marıta, vaücavacı  
pepü'a'ıyarıtüa pepü'amuına.  
<sup>42</sup>'Esıva peuyevese xeıcüa, xevıtü  
xeıcüa. Marıya canınuyexıya  
tıta ması 'aıxüa müti'ane.  
Pücanavıyarıenı.

**Nenevıerı hepaüsıta que  
müti'üqıtıacayı Quesusi**

(Mateu 6:9-15; 7:7-11)

**11** Merıcüsü heıva  
'anıucateıtüni yunenevıetü.  
Yunenevıerı 'unücu, hesüana  
mıemete teyü'üqıtıvıamete

xevitü müpaü tinitahüave,  
 Ti'aitame, quetatine'üquitüaca  
 temütanenevecacü, Vani que  
 mütaru'üquitüa yuhesüa  
 miemete teyü'üquitüvamate.  
<sup>2</sup>Mücü müpaü tinivacühüaveni,  
 Quepaucua xemüyunenevie 'ipaü  
 xequeneutiyua,  
     Ta'uquiyari taheima pemacave,  
     Quememateheuyehüvirieca que  
     pemütipasie.  
 'Enata queneusutüa pe'ti'aitatü.  
 Cuiepa yamequeteyurieca que  
     matinaque,  
 Taheima que memüteyurie.  
<sup>3</sup>'Icuai tucarcü que  
     temüteheiyehüva,  
 Tucarcü yaquetatinemicuani.  
<sup>4</sup>'Axa que temüte'uyuri  
     quetatineuyehüvirieca,  
 Tameta tetevareuyehüviriecacu  
 Müme 'axa memütasiyurie  
     yunaitü.  
 Pepücatasipitüaca  
     temü'inüasienicü,  
 Masi quetaneutavicueisitüa  
 'Axa temüca'itüarienicü.  
<sup>5</sup>Müpaüta tinivarutahüave,  
 Xüca xevitü xeme yuhamicu  
 hexeyani, mücü xüca hesüana  
 nuani tücari hixüapa müpaü  
 rehüavetü, Nehamicu 'acu, haica  
 payari queneneuniütüa. <sup>6</sup>Tamüsü  
 xevitü nehamicu nehesüa caninuanu  
 cuyeicame, tixaü necarexeiyacacu  
 nemütimini. <sup>7</sup>Quita mayeca müpaü  
 que 'utayüni, Quetineuhayeva.  
 Quitenie püreuname, netüriyama  
 tanaitü tepuhe. Nepücaiyüve  
 nemanucuqueni nemümasiniütüani.  
<sup>8</sup>Müpaü nepütixecühüave,  
 canihamicuyatüni, peru  
 mücü 'ayumiemeyaricü

xEICÜA püca'anucuqueni  
 püca'iniütüani. Siqueresü 'iya  
 munua mücaiyuteviyacü püta  
 quiecame panucuqueni piniütüani  
 tita müreuyehüva. <sup>9</sup>Müpaü  
 nepütixecühüave ne, xüca  
 xe'ita'ivauni xecatehayevatü  
 xecanimiquieconi. Xüca  
 xe'icuvauni xepitaxeiya.  
 'Itupari xüca xe'uyuitüani  
 xepüteheuyepiyarieni. <sup>10</sup>Yunaitü  
 memita'ivau mepitanaqui'erie  
 yu'ivaurica, yunaitü  
 memicuvautüve mepitaxeiya  
 yunaitü, 'itupari memücuuyitüva  
 mepüteheuyepiyarüva.  
<sup>11</sup>Que mü'ane xeme yunive  
 mexeiya, xüca nu'aya pa  
 'itavavirieni, que 'imini tete pa  
 xatatü. Me xüca quesü 'itavavirieni,  
 que 'imini cu quesü xatatü. <sup>12</sup>Me  
 xüca 'itavavirieni tavari, que 'imini  
 terüca. <sup>13</sup>Xeme 'axa xemüte'u'yari  
 xüca 'aixüa 'anemecü  
 xetevamicuani yütüriyama,  
 xe'uquiyari taheima macave masi  
 yemecü 'Iyari Mütiyupata taheima  
 mümieme canivamimücü müme  
 memitavaviri.

**Que memüte'ixanetacai Qesusi,  
 müpaü me'utiyuatü quename  
 cacaiyari 'axa mü'ane 'inücai**  
*(Mateu 12:22-30; Maricuxi 3:19-27)*

<sup>14</sup>Mericüsü nitahüave cacaiyari 'axa  
 mü'ane mixünacü tevi. 'Iya cacaiyari  
 'iviyacacu tevi pünenuriecai.  
 Hicü cacaiyari 'ixünacu, tevi  
 tiniutixatatüyani münenuriecai.  
 Teüteri menihüxiyacaitüni.  
<sup>15</sup>Peru hipatü müme müpaü  
 meniutiyuanecaitüni, Cacaiyarixi  
 'axa memü'anene va'uquiyarisie



mütiviyaçü Pehereseipurisie,  
 'ayumieme nivananuyenü'avani  
 cacaiyarixi 'axa memü'anene.  
<sup>16</sup>Hipatuä me'l'isipatü 'inüari  
 menitavavirieni taheima mieme.  
<sup>17</sup>Mücü va'iyaritüarica maitü müpaü  
 tinivarutahüave, Naime cuiepa,  
 xüca quiecatari hixüata meyusana,  
 mana pacumavere. Xeime quie  
 quiecatari xüca hixüata meyusana  
 menita'unicuni. <sup>18</sup>Cayumarie  
 xüca hixüata yusana, que reuterive  
 ti'aitametütü. Xemesü xeputiyuane  
 quename Pehereseipurisie  
 netiviyatü nevaranuyenü'ava  
 cacaiyarixi 'axa memü'anene.  
<sup>19</sup>Ne mericü xüca Pehereseipurisie  
 netiviyatü nevaranuyenü'avani  
 cacaiyarixi 'axa memü'anene,  
 xenivema que mü'ane rahesie  
 meteviyatü mepüvaranuyenü'ava.  
 Müme 'ayumieme xehesie  
 mecatenahüpacuni. <sup>20</sup>Mesü xüca  
 Cacaüyari türücarivyayacü püta  
 nevaranuyenü'avani cacaiyarixi 'axa  
 memü'anene, xehesüa canisutüani  
 Cacaüyari ti'aitatü.

<sup>21</sup>Tevi mütürücaüye cuya tepüaya  
 mal'ü mexi 'l'üviya quie, cayuvatü  
 puma piniteya. <sup>22</sup>Que mü'ane masi  
 yemecü mütürücaüye nuame 'e'ivame,  
 pinavairieni cuya tepüaya hesiena  
 yuri müti'eriecai, yucupaniyeruma  
 püvamini tepüateya.

<sup>23</sup>Que mü'ane nehiesie mücativiya  
 pünesi'aye'uni. Que mü'ane nehamati  
 müca'icuxexeüriva pitaxürüva.

**Cacaüyari 'axa mü'ane tavari que  
 mütiviya tevi**

*(Mateu 12:43-45)*

<sup>24</sup>Cacaüyari 'axa mü'ane  
 'ixüname tevi, macuvaquisä

puyeicani 'uxipiya cuvaunetü.  
 Yutexienetü müpaü paineni,  
 Nepüyemie nequita nemüvayetüasie.  
<sup>25</sup>Nuame pitaxeiya vaye'itivyacame  
 'aixüa tiuye'aneme. <sup>26</sup>Ana püyemie  
 püvata'inieni hipame cacaiyarixi  
 masi cuini mieme 'axa memü'anene  
 'atahutame. Meheutahaxüame,  
 muva me'ayetetü mepacüne.  
 'Imatürieca mücü tevi masi  
 yemecü 'axa 'itüarietü payani, que  
 müca'itüariecai matüaripai.

**Müme yuricü 'aixüa memü'itüarie**

<sup>27</sup>Mericüsü müpaü ticuxatacacu,  
 'uca teüteri vasata muyeicacai  
 niutahiva müpaü 'utaitü, 'Aixüa  
 que 'itüariecaitüni que mü'anesie  
 pemüyecatei que mü'ane  
 mümasisisitüacai. <sup>28</sup>Mücü  
 müpaü niutayüni, Masisü püta,  
 'aixüa que me'itüarieca müme  
 Cacaüyari niuquieya memü'lenie  
 yamemütecahu.

**'Ana miemete 'axa mete'u'iyaritü  
 'inüari que memüte'itavaviri**

*(Mateu 12:38-42; Maricuxi 8:12)*

<sup>29</sup>Hicü teüteri  
 meyucuxeüririximecacu müpaü  
 tiniutixatatüyani, Hicü miemete  
 teüteri 'axa teyuruvamete  
 mecanihümetüni. Menicuvautüveni  
 'inüari, peru 'inüari mepücapitüarieni.  
 Cunasi 'inüarieya xeciüa  
 mecanipitüariecuni. <sup>30</sup>Cunasi 'inüari  
 que müratüa Ninivetari vahesie  
 mieme, neta Yuri Tevi que nemütiteva  
 'inüari necanayeimücü hicü miemete  
 teüteri vahesie mieme. <sup>31</sup>'Uca  
 taserieta müti'aitametücai cuiepa  
 cananucuquemücü titahecüataque  
 hicü miemete teüteri vahepaüsita

quepaucua 'isücame müvata'ivaviya, vahesie pürähüivani mücü meyetüacı cuie manunieresie mi'enienicü Sarumuni que mütimaivecai. Tamüsü que mü'ane mütimaive Sarumuni que mücatimaivecaipaü 'uva puyeica. <sup>32</sup>Ninivesie quiecatari mepanucu'uni metetahecüataque hicü miemete vahepaüsita. Vahesie pürähüivani, Ninivetari memüte'uhayevaxücü que memüteyuriecäi Cunasi tivarutaxatüacu. Tamüsü que mü'ane mütürücaüye Cunasi mücatitürücaüyeipaü 'uva puyeica.

### **Tavaiyari cüxemeya**

*(Mateu 5:15; 6:22-23)*

<sup>33</sup>Cüxeme 'utaiyame püca'iti'avieta, cacunicü püca'enucanani. Vapai püta pecayeni, teüteri me'atahaxüaximetü memixeyacı hecüariyaya. <sup>34</sup>Merücüte, tahüxie tavaiyari cüxemeya canihücütüni. Xüca 'ahüxi 'aixüa reu'erieca, 'aixüa 'iyaricü xüca peti'amicuani, pecanihecüariviyarieca 'avaiyarisie naime. Me xüca 'axa 'aneni 'ahüxi, pecati'amimütü 'avaiyarisie pecaniyüriyarieca. <sup>35</sup>Ayumieme quene'acuerivayurieca, 'ahesüa mieme cüxeme capa 'uyürecü. <sup>36</sup>Xüca 'avaiyarisie pehecüariviyarieca naimesie, tixaü catiyürivercacu, naitü canihücüacamücü, cüxeme que matihecüariviyä xavatütü.

**Quesusi que mütivaniuquimacai  
Pareseusixi, müme 'inüaricü  
memüte'üquitametetücai vahamame**

*(Mateu 23:1-36; Maricuxi  
12:38-40; Rucaxi 20:45-47)*

<sup>37</sup>Merücüsü tiuhayevacu, Pareseütütü nita'inieni hesüana

müticuanicü. Muva heutahaca mana nayerüni. <sup>38</sup>Pareseu 'ixeiyaça niuhüxiyani müca'ucamaimacü meri caticuaivetü cuxi. <sup>39</sup>Hicü Ti'aitame müpaü tinitahüave, Hicümüsüari xeme Pareseusixi tecüxi xacü herie xepüca'itiva, peru yutaüta xepühüpüne xetenavacutü 'axa xeteyurietü. <sup>40</sup>'Asixepücatemate. Que mü'ane mitavevi herie taütanata catitavevi. <sup>41</sup>Masi taütana miemecü xequeteneyumicuanu xeteyucanenimayatü, mücücü naitü 'itiyatü nayeimücü xehesie mieme.

<sup>42</sup>Perüsü xüa 'ui xeme Pareseusixi. Tamamata taparisie mieme, xei tapari xepüyuvauüriya xemixatüanicü Cacaüyari yerüvavuena xura naime tupiriyasie mieme peru xepücauyuvauüriya heiseriemecü yaxemütecahunicü, xepücauyuvauüriya xeminaqui'eriecacü Cacaüyari. Müpaü püta püreuyevese müpaü xemüteyuriecacü, siepüre xecatehayevatü xei tapari xe'ixatüatü.

<sup>43</sup>Xüa 'ui xeme Pareseusixi. Püxenaque yunaime vahüxie xemayeyaxecü tuquita, xemüvauritüariecacü quiecaru hixüapa. <sup>44</sup>Xüa 'ui xeme. Teuquiya müca'aviesiepaü xecani'aneneni. Teüteri teuquiya mecaniquesinani 'asimecatemaitü.

<sup>45</sup>Merücüsü xevitü 'inüaricü müti'üquitametücai müpaü tinitahüave, Ti'üquitame, müya pe'utaitü pepütasinuquima tameta. <sup>46</sup>'Iya müpaü tinicühüaveni, Xüa 'ui xemetari 'inüaricü xemüte'üquita. Teüteri xepüvaruti'icatüva

'icate mücuanivecü. Va'icate  
xemücumaüvani ni yu'itüvamecü  
xepücayuväüriya xevaparevienique.

<sup>47</sup>Xüa 'ui xeme. Texaxatamete  
vateuquiya 'inüariyari  
xecanivevieca, xe'uquiyarima  
mevarucuicu. <sup>48</sup>'Ayumieme  
xepüyuhecüata, xe'iyari  
yacani'aneneni xe'uquiyarima que  
memüte'uyuri. Müme mepüvarucui,  
xeme va'inüari xepüvevi.

<sup>49</sup>Cacaüiyari timaivetü  
'ayumieme müpäü  
niutayüni, Texaxatamete  
nepüvatanü'airiexüani nü'arisixi  
meta. Hipame müme mepüvacuini  
mepüvaruveiyani. <sup>50</sup>'Ayumieme  
hicü miemete teüteri vahesie  
catinahüivamücü yunaime  
texaxatamete vaxuriyacü  
cuie munetüariesie hicüque  
mütayeurivecü, <sup>51</sup>Haveri  
xuriyayacü meri 'asita Sacariya  
xuriyayacüque mumierie  
mürayutimavatüre heyeyaca  
tuquita caheta'avetü. Hü,  
yanepütixecühüave, hicü miemete  
teüteri vahesie catinahüivamücü.

<sup>52</sup>Xüa 'ui xeme 'inüaricü  
xemüte'üquitamete. Xepinava  
quitenie yaviyari cümana  
teüteri metemaivavemete  
memacünequecai. Xemetütü  
xepüca'aye'axüavave, xepüvanena  
hipame memaye'axüaniquecai.

<sup>53</sup>Mericusü vayeyacu müme  
'inüaricü memüte'üquitametetticai  
Pareseusixi yunaitü  
menitixeuimatücüne cuini  
mieme. Meniti'ivaviyatücüne  
müticuxatanicü vaücava hepaüsita  
<sup>54</sup>me'ihupietü memiviniyanicü  
niuquieyacü.

### Tiyucuxanariyame Pareseusixi vahesüa mieme

**12** Mericusü 'ana teüteri vaüca  
miriyari meyupaümetü  
meyucuxeüriecu yuquetasie  
me'a'uvecacu, nisütüani müpäü  
tivacuxaxatüvatü yuhesüa  
miemete teyü'üquitüvamete,  
Xequeneyucuerivayurieca masi  
Pareseusixi vahesüa mieme  
tiyucuxanariyame hepaüsita, yacü  
xeicüa que memüteyurie 'avie,  
xemeta capa xe'useviximarienicü.  
<sup>2</sup>Peru naitü müranucuname  
xeiyarietü nayeimücü, naitü  
mütiuti'aviesie masiücütü  
canayeimücü. <sup>3</sup>'Ayumieme  
müpäü nepaine, nai que  
xemütecuxata yüvipa, hecüaripa  
cani'enieriecamücü. Cayuvatü  
xemutiyuane quita, qui heima  
meti'utü yamecateniuhivacuni.

### Que mü'ane xepümacaxe

(Mateu 10:28-31)

<sup>4</sup>Müpäü nepütixecühüave  
xeme necupaniyeruma,  
xepücavamacarüca müme  
memüyüvave tavaiyari  
memümieni xeicüa peru 'arique  
memücayüvave 'asimemüteyurieni  
masi vaüca. <sup>5</sup>Nepütixetaxatüani  
que mü'ane xemümacarüca.  
Xequenemacarüca que mü'ane  
'imieme tevi heiserie mexeiya  
meicahüanicüta xasi taiyariyarisie.  
Hü, müpäü nepütixecühüave, 'iya  
xequenemacarüca.

<sup>6</sup>Tamüsü 'üxaviquixi que  
memütetuiya yu'auxüvitü huta  
senitavuyari mecate'aye'axe. Peru  
ni xevitü müme pücatümaiyyarie

Cacaüyari huxie. <sup>7</sup>Mücü meta, xecüpa xemu'usie mieme naitü püti'inüasieve. Xepücaheumamaca. Yümüretü 'üxaviquixi que memüte'aye'atüca, xeme masi vaüca xepüte'aye'atüca.

**Que mü'ane müyutahecüata teüteri vahüxie, quename nehesüa mieme**

*(Mateu 10:32-33; 12:32; 10:19-20)*

<sup>8</sup>Müpaü nepütixecühüave, yunaitü memüyuhecüata teüteri vahüxie quename nehesüa memiemete, neta Yuri Tevi que nemütiteva necaninehecüatamücü quename vahesie netiviya Cacaüyarisüa miemete niuqui tuayamete vahüxie. <sup>9</sup>Que mü'ane müyucu'imava teüteri vahüxie quename nehesie camieme 'utaitü, mücüta pücamarivani Cacaüyarisüa miemete niuqui tuayamete vahüxie.

<sup>10</sup>Yunaitü memüniuquixi Yuri Tevi hepaüsita, mecaniyüvaveni memüteheuyehüviyarienicü. Perusü que mü'ane 'axa mütayüni 'Iyari Mütiyupata hepaüsita, mücü pücaýiveni müreyehüviyarienicü.

<sup>11</sup>Quepaucua xemanuhapanieni tuquipa miemete vahüxie te'aitamete heiserie memexeiya vahüxie, xepücayu'iyaritüaca quepaü xemütetiniuni yuhesie mieme, que xemutiyuane.

<sup>12</sup>Anatütü 'Iyari Mütiyupata müpaü pütixe'üquitüaca que müreyeveve müpaü xemutiyuanenicü.

**Tevi müxicutücai 'asimücatimaicai**

<sup>13</sup>Hicü teüteri vasata 'uветü xevitü müpaü tinitahüave, Ti'üquitame, yaquetineutahüavi ne'iva münesi'ütüanicü tita

nehesie müтинаque taquemasi tita mütatiucu'eiriri. <sup>14</sup>Qesusi müpaü tinitahüave, Neuxei, que mü'ane xe'isücame pünesi'ayeitüa xepini nemütisananicü. <sup>15</sup>Hicü müpaü tinivarutahüave, Xequeneyucuerivayurieca naimecü, xequeneyü'üviyani capa xeteyucahive'eriecacü 'axa müti'anecü. Piniteya ranuyuhayevacacu pücatucari. <sup>16</sup>Hicü 'üxasi hepaüsita ticuxatatü tinivaruti'üquitüatüyani müpaü 'utaitü, Tevi müxicutücai cuie nexeyacaitüni cuini mieme mütiutixuxuavitüvacai. <sup>17</sup>Hicü müpaü tiniyücühüavecaitüni yu'iyarisie, Qesü netiyurieni. Tixaü nepücarexeiya haque nemeiti'uta netüricu. <sup>18</sup>Hicü müpaü niutayüni, Tamüsü 'ipaü nepütiyurieni. Nepica'una necaxetunite, 'epapame masi nepütivevieni. Mana nepeiti'uta netüricu nepinite. <sup>19</sup>Anari ne'iyarisie müpaü nepütinecühüaveni, Ne'iyari 'acu, vaüca pinite pecatiniuti'uta müixa viyarisie mieme. Quene'uxipieca quetinecuaca quetine'ieca pe'atemavietü. <sup>20</sup>Perusü Cacaüyari müpaü tinitahüave, Cari 'asipepücatimate. Hicü tücacüta 'a'iyari pepütavaviyarieni. Tita pemütüti'utaxü, que mü'ane piniteya pürayani 'ana. <sup>21</sup>Yaxeicüa cani'aneni que mü'ane yuhesie mieme müyuti'usiri vaüca, peru mücaxicu Cacaüyari que mütxeiya.

**Que mücareuyeveve müyu'iyaritüacacü müyumuinanicü**

*(Mateu 6:25-34)*

<sup>22</sup>Hicü müpaü tinivarutahüave yuhesüa miemete teyü'üquitüvamete,

'Ayumieme müpaü nepütixecühüave, xepücayuliyaritiüaca yutucari hepaüsita que xemütecuanı, yuvaiyari hepaüsita que xemüteyutiquemaritüani. <sup>23</sup>Icuai xeciüa pücatucari, 'ixuriqui xeciüa pücaravaiyari. <sup>24</sup>Xequenivara'erivani cuasari. Mepüca'uca'e mepüca'isana. Caxetuni 'iqui mepücahexeiya. Cacaüyaritütü catinivamicuani. Viquixi que memüte'aye'axe, xeme cuini mieme masi xecate'aye'axe. <sup>25</sup>Que mü'ane xeme yuliyaritiütü püyüve 'e'utevitü mayuyeyitüani xüca 'esi'utevini. <sup>26</sup>Mericiü 'esiva xeciüa xüca xecayüvaveni, titayari xeteyuliyaritiüa naimecü.

<sup>27</sup>Tuturi xequena'erivani, que mücativita que mücatisa'a. Peru 'ipaü nepütixecühüave, Sarumuni cuini mieme visi que mü'anecai, visi pücaranacatüücüai vahepaü ni xeimepaü 'icü tuturi. <sup>28</sup>Mericiü xüca Cacaüyari müpaü tiquemaritiüaca 'üxa 'üsita mieme hicü muxuave 'uxa'a huxunuta meucaxüriyani, masi yemecü catixequemaritiüaca xeme. Cari 'esiva xeciüa yuri xepüte'erie. <sup>29</sup>Tita xemütecua'acü xepüca'ayumiemetetüni, tita xemüte'iecü meta, xepücamuinarieca. <sup>30</sup>Teüteri naisarie cuiepa miemete 'ipaü 'aneneme nai mepücvautüve. Xeme xe'uquiyari masi müpaü pütimate xemeiyehüvacü 'icü. <sup>31</sup>Xemesü xequeneyuvaüriyani Cacaüyari tixe'aitüvame mühücütünicü. Müpaü xeteyurietü, 'icü nai xepümüqienitari.

### Que mütiti'uta taheima mieme

(Mateu 6:19-21)

<sup>32</sup>Nemuxasima  
sepa xemücayumüire,

xepücaheumamaca.  
Xe'uquiyari caniyuvaüriyani mütixepitüanicü tita mürexeiya ti'aitametütü. <sup>33</sup>Xequetenetuaca yupinite, xeteyuparevietü xequeteneyumicuanı. Xequenanuhuri tumini maname mücaye'irive. Taheima xequeneuti'uta tita mücatixüve, haque tinavayame 'aura mücaheyeica haque cuişi mücareticuitamava. <sup>34</sup>Haqueva xemeiti'uta, manata miemecü xe'iyari yacani'anemücü.

### Ti'uximayatame mücaha'arisie

<sup>35</sup>Xequeneyuha'aritiüaca xe'ayühüatücaicitü xecüxeme tacacu. <sup>36</sup>Xemeta teüteri vahepaü xequeneyüaca yucusiyari memücuevie. 'Asimecatemaitü quepaucua neüquiya 'ixüararipa mayeyani, mecanicuevieca cuitüva memüteheuyepienicü nuayu 'itupari heyuitüayu. <sup>37</sup>'Aixüa mecani'itüariecacuni müme te'uximayatamete xüca vacusiyari nuame varetaxeiya me'ayeneniereme. Yuriciü nepütixecühüave, panuyühüani, mexa 'aurie püvacuyasaxüani, mana 'uyeicatü pütivamini. <sup>38</sup>Sepa tücari hixüapa sepa yuimuana munua, müya meteyuriecacu xüca varetaxeiya, 'aixüa mecani'itüariecacuni müme. <sup>39</sup>'Ipaüsü xequetenemaica, xüca quiecame müpaü timaicaque quepaucua tinavayame munuaniquecai, püca'ipitüaniqueyu neutahanicü quitana. <sup>40</sup>Xemeta xequeneha'arisieca. Quepaucua necanuaximeme xemünesi'erieca,

Yuri Tevi que nemütiteva, 'ana necaninuamüci.

**Ti'uximayatame yamücatcamie**

*(Mateu 24:45-51)*

<sup>41</sup>Hicü Pecuru müpaü niutayüni, Ti'aitame, 'icü 'üxasi hepaüsita peti'üquitatü tame petatixata, nusu pepüvaxata yunaime. <sup>42</sup>Ti'aitame müpaü rehüave, Qui cusiyari que mü'ane pühürütüani yuquie quiecatari vacü, tucari 'aye'ayu müvati'inüasirienicü va'icuai. Que mü'ane yamüticamie, que mü'ane mütiyumate, mücü canihürütüariecämüci. <sup>43</sup>Mücü ti'uximayatame 'aixüa cani'itüariecämüci xüca cusiyarieya nuame 'itaxeiya müpaü tiyurieneme. <sup>44</sup>Yuricü nepütixecühüave, yupini nai hepaüsita pütihürütüani. <sup>45</sup>Me xüca mücü ti'uximayatame müpaü tiyücühüaveni yu'iyarisie, Necusiyari 'epüreutevi canuavetü, xüca varutivatüyani te'uximayatamete 'uquisi 'ucari, xüca ticucuaneni xüca cu'ieneni xüca taveneni, <sup>46</sup>mücü ti'uximayatame cusiyarieya caninuamüci quepaucua müca'licuevie, yapaucua quepaucua 'asimücatimate ti'uximayatame. Hixüata piviteni, pipitüani yamemücatecahu vahepaü. <sup>47</sup>Mücü ti'uximayatame yamütimaicai que mütinaquecai cusiyarieya, peru mücayucuha'aritüa 'asimücatiuyuri que mütinaquecai, mücü cuini mieme canicuveiyaxüamüci. <sup>48</sup>Que mü'ane püta 'asicatimaitü yamütüiyuri para mücuveiyaxüanicü, 'ayüveca xeicüa

pücuveiyaxüani. Que mü'ane vaüca mütiümüquie, mücü vaüca pütitavaviyarieni. Que mü'ane vaüca mühürütüarie, vaüca masi pütitavaviyarieni.

**Quesusi hixüata que mütivasana**

*(Mateu 10:34-36)*

<sup>49</sup>Ne necaninuani tai nemeucahüanicü cuiepa. Xücate 'utinaisienique tüma. <sup>50</sup>Peuyevese nema'ivarienicü nemümierienicü, tevi que müranucanamiepaü hacü quepaucua muca'üyarie. Haveri mieme nepütüca'eniva mexi ca'aye'ave. <sup>51</sup>Que xetecu'eriva nemunuacü nevapitüanique cuiepa memütama 'aixüa memüteyuxeiyanicü. Tixaüsietü, 'ipaü nepütixecühüave, hixüata nemüvasanacü püta nepunua. <sup>52</sup>Hicü 'uxa'atüni yu'auxüvitü xei quiyarita miemete hixüata mepüyusanani yuhaicatü yuhutame mevaraye'unietü, yuhutatü yuhaicame mevaraye'unietü. <sup>53</sup>Hixüata mepüyusanani 'uquiyarieya 'eye'uniecacu yunive, nu'aya 'eye'uniecacu yu'uquiyari, varusieya 'eye'uniecacu yunive 'uca, nu'aya 'eye'uniecacu yuvarusi, yumu'e'ema me'ayuye'uniecacu.

**Titayari xecate'i'inüata 'icü tucarisie mieme, que mutayü**

*(Mateu 16:1-4; Maricuxi 8:11-13)*

<sup>54</sup>Hicü müpaü tinivarutahüave teüteri, Quepaucua xemixeiya haivitüri 'e'a'enirümeme tau macayuyuiquesie, cuitü xeputiyuane quename caviyerüme. Müpaü pütüyünitütü. <sup>55</sup>Quepaucua taserieta mu'eca, müpaü

xeputiyuane quename 'uxüca. Müpäü pütüüni. <sup>56</sup>Xeme yacü xeciüa xecaniyüaca, xepi'inüata cuie que mütiyuxexeiya muyuavi meta. Titayari xecate'l'inüata 'icü tucarisie mieme.

**Queneunütüa masixaneta, que mutayü**

(Mateu 5:25-26)

<sup>57</sup>Titayarita yücümana xecateheitimaivave tita mütiheiserie. <sup>58</sup>Quepaucua 'isücamesüa pemanuhanieni, huyeta xe'uhutü queneunütüa 'axanetame masixünacü, capa 'isücame hüxie masihe'atüanicü, 'isücame capa masiyetuanicü tupirisüa, tupiri capa masi'anutahüanicü casariyanata. <sup>59</sup>Müpäü nepümaticühüave, muva pepücavayeyeicani mexi pecati'atuave naimecü.

**Xüca xecate'uhayeva que xemüteyurie, xecanicuicuni, que mutayü**

**13** Mericüsü hipatü 'ana me'u'axüaca metenitaxatüani Carereyatari vahepaüsita, Piratu mütiuta'aitaxü memücüi'ivacü mexi metemavatüivecai. <sup>2</sup>Iya müpäü tinivacühüaveni, Que xetecu'eriva. Müya memüte'ucuinixücü que metemasiücü, quename mümetütü masi yemecü 'axa meteyuriecai, hipatü Carereyatari yunaitü 'axa que memücate'uyuri. <sup>3</sup>Pücatixaü. Masi müpäü nepütixecühüave, xüca xecate'uhayeva que xemüteyurie xeme, vahepaü xecanicui'ivacuni yunaitü. <sup>4</sup>Müme meta tamamata heimana 'atahaicatü

memüyupaümecai vahesie mucave mücü tuxi Siruhesie müvarucui, que xetecu'eriva müme vahepaüsita. Que metemasiücü quename masi cuini mieme vahesie rahüivacai, hipatü teüteri Querusareme memütama yunaimie vahesie que mücarahüivacai. <sup>5</sup>Pücatixaü. Masi müpäü nepütixecühüave, xüca xecate'uhayeva que xemüteyurie, yaxeciüa xecanicui'ivacuni yunaitü.

**Cüye müca'utixuaverixü hepaüsita ticuxatatü, que müti'üquitacai**

<sup>6</sup>Mericüsü 'icü 'üxasi hepaüsita ticuxatatü tini'üquitacaitüni. Tevi 'aniucateitüni cüye muca'iteüritaxü yuharaverita. Mana ni'axecaitüni 'icuaxi cuvaunetü cüyesie mieme. Cacanitaxexeyacaitüni. <sup>7</sup>Hicü haraverita mühürütüariecai müpäü tiniutahüave, Camüsü haica viyari nepeucuyeixüa 'icuaxi necuvaunetü 'icü cüyesie mieme. Nepüca'itaxeyave. Quenahüva, titayari cuie tisevixima xeciüa. <sup>8</sup>Peru tihüveme müpäü tinicühüaveni, Cusiyari 'icü visie queneuhayeva xeciüa, mexi hetüana nehecuevivyatüyani mexi havunu nehavivietüyani. <sup>9</sup>Xüca 'utixuavere 'aixüa püüni. Me xüca catixaütüni, tepehüani que pemaine.

**Quesusi que mürenayehüa 'uca 'uxiپیya tucariyarisie**

<sup>10</sup>Mericüsü 'uxiپیya tucarisie tini'üquitacaitüni heiva xeime tuquita. <sup>11</sup>'Uca mana nayecateitüni cacaiyari 'axa mü'ane miviyacai tamamata heimana 'atahaica viyari 'iveranariyatü.

Nanacatusicaitüni, püca'yüvecai müytaseiriyacü naime. <sup>12</sup>Hicü Quesusi 'ixeiyaça yu'aurie 'itahüaveca müpaü tinitahüave, 'Uca pepuxüinarie que pemütiveranica. <sup>13</sup>Hesiena 'utimecu yapaucua niutaseire. 'Aixüa nainecaitüni Caca'yari hepaüsita. <sup>14</sup>Hicü tuqui va'üya ha'atü Quesusi menayehüacü 'uxipiya tucarisie, müpaü tinivarutahüave teüteri, 'Ataxevitü tucari puxuave quepaucua meuyevese yamüti'uximayacacü. Mücü tucarisie 'ayumieme xequene'axeni xequenanaxexürivani, peru 'uxipiya tucarisie pücatixaüsietü. <sup>15</sup>Hicü Ti'aitame müpaü tinita'eiya, Cari xeme yacü xeicüa xepüyüa. Yuxexuitü xeme 'uxipiya tucariyarisie xecatevaxüna yupuixisixi yupuxuri haque memacuvü, xecatevarehapana xecatevaharitäva. <sup>16</sup>Icü 'uca 'Apurahami caninu'ayatüni, peru Cayumarie necuviecaitüni tamamata heimana 'atahaica viyari. Careuyevese 'uxipiya tucarisie müxünarienicü 'acuvietü. <sup>17</sup>Müpaü 'utayücu meniuyutiteteviya yunaitü memeye'uniecai, hipatü teüteri yunaitü meyutemamaviecacu nai que mütiyurienecaicü marivemecü.

**Musitasa 'imüariyari hepaüsita ticuxatatü, que müti'üquitacai**

*(Mateu 13:31-32; Maricuxi 4:30-32)*

<sup>18</sup>Hicü müpaü niutayüni, Qeri ti'ane Caca'yari ti'aitametücacu. Que 'aneme 'üquisicayari nexatatü nepihecüatani. <sup>19</sup>Musitasa 'imüariyari paü cani'aneni. Tevi 'enutücüca yuharaverita

neicaxürieni. 'Utavereca cüye nayani. Viquixi taheima miemete meniyuti'ituatüvacaitüni mamateyasie.

**Pa cuxanariyame hepaüsita ticuxatatü, que müti'üquitacai**

*(Mateu 13:33)*

<sup>20</sup>Hicü tavari müpaü niutayüni, Que müti'ane Caca'yari ti'aitametücacu, que 'aneme 'üquisicayari nepihecüatani. <sup>21</sup>Pa cuxanariyame paü cani'aneni. 'Uca 'enu'üca nitimuina pa mütxiyarisie haica 'axuvayarisie, 'ariqueque naitü niuticuxanare.

**Quitenie 'esimayevea**

*(Mateu 7:13-14, 21-23)*

<sup>22</sup>Hicü quiecarite 'emacuyeyeusie 'esimüyeyeusie caniyueicacaitüni ti'üquitatü, Qerusareme 'uyemietü. <sup>23</sup>Mericsüsi xevitü müpaü tinita'ivaviya, Ti'aitame, hipatü xeicüa metetavicueisitüariexime. 'Iya müpaü tinivarutahüave, <sup>24</sup>Xequeneyumexütüüaca xemeutahaxüanicü quitenie 'esimayevasie. Müpaü nepütixecühüave, 'arique yumüiretü meneutahaxüiacucacuni peru meniuyutatexicuni. <sup>25</sup>Quiecame 'anucuqueme quepaucua müreunani quitenie, 'ana xeme tacua xeniyuhayevacuni 'itupari xeyuitiatüvetü müpaü xe'utiuyatü, Ti'aitame 'acu, quetatineuyepiri. Peru mücü müpaü tinixetahüavimücü, Ne nepücaxemate haque xememiemete. <sup>26</sup>'Ana xenisutüacuni müpaü xe'utiuyatü, Tame 'ahesüa tepütecuacai tepüte'iecai, 'ecüta



tacaye 'utüa pepüti'üquitacai.  
<sup>27</sup>'Ana müpaü tinixetahüavimücü,  
 Nepücaxemate haque xememietete.  
 Nehesüa xepücamiemete,  
 xequeneutayeixüa. Cari yunaitü  
 yaxepüteyurie que mücatiheiserie.  
<sup>28</sup>Mana xeniutisuanacuni  
 xecaniyutaquevecuni, quepaucua  
 xemüvaxeiya 'Apurahami  
 'Isahaqui Cacuvu texaxatamete  
 yunaime mana me'u'uvame  
 haque Cacaüyari müre'aita,  
 xeme püta xe'anuyexüriyayu.  
<sup>29</sup>Tau matineicasie miemete  
 macayuyuiquesie miemete  
 mecani'axüacuni, taserieta miemete  
 ta'utata miemete mete'axüani meta.  
 Mexa 'aurie menayaxicuni haque  
 Cacaüyari müre'aita. <sup>30</sup>Camüsü,  
 hicü miemete 'imatüremete,  
 hipatü müme 'ana mexüacate  
 mecanacünicuni, hicü miemete  
 mexüacate meta, hipatü müme  
 'imatüremete mecanacünicuni.

**Quesusi yuhiverietü que mutayü  
 Querusareme quiecatari vahepaüsita**  
 (Mateu 23:37-39)

<sup>31</sup>Mericsü 'ana Pareseusixi  
 hipatü hesüana meniu'axüani  
 müpaü mete'icühüavetü,  
 'Uma quenemie, Herurexi  
 pümasimiemücü. <sup>32</sup>'Iya  
 müpaü tinivarutahüave,  
 Müpaü xequetenehüaviyu  
 nesimariutame, Neuxei, ne hicü  
 'uxa'a nepüvaranuyenü'avani  
 cacayüarixi 'axa memü'anene  
 memüvatixünacü teüteri,  
 nepüvaranayexürieni tecuicuicate.  
 'Ayeimana nepaye'atüarientütü.  
<sup>33</sup>Mücü xEICÜa, neuyeveca  
 hicü'uxa'a nemücuycanicü

varie meta. Vaüriyarica  
 pueyevese yunaitü texaxatamete  
 memücü'ivacü Querusareme,  
 xaüsie pücatixaü. <sup>34</sup>Querusareme,  
 Querusareme, 'ahesie quiecatari  
 mecanivacuica texaxatamete,  
 mecanivatituaxani müme  
 'ahesüa memeyenü'ariva. Müixa  
 que nemütivacuxeürimücücai  
 'anivema, vacana yupixüxiisi que  
 mütivacuxexeürivapaü yu'اناتüa.  
 Mepücayuvaüriyacai. <sup>35</sup>Camü  
 xequi pücu'eiriva 'uyemavetü.  
 'Ipaü nepütixetahüave, tavari  
 xepücanesixeiya mexi tucari  
 ca'aye'ave quepaucua müpaü  
 xemutiyuaneni, 'Aixüa que  
 ticühüavarüvani que mü'ane  
 Ti'aitamesüa miemetütü munua.

**Quesusi que mürenayehüa  
 tevi meuhaticatei**

**14** Mericsü Quesusi xeimesüa  
 ninuani 'uxipiya tucarisie  
 ticuanique. Mita'ini teüteri  
 va'uquiyarima canixevitütücaitüni  
 Pareseütütü. Müme menihupiecaitüni.  
<sup>2</sup>Hicü tevi meuhaticatei hüxiena  
 nacateitüni. <sup>3</sup>Quesusi müpaü  
 tinivaruta'ivaviya müme 'inüaricü  
 memüte'üquitametetücai Pareseusixi  
 meta, Catitauniva 'uxipiya  
 tucarisie menayehüanicü tevi,  
 pücatauniva nusu. <sup>4</sup>Müme cayuvatü  
 meniumacaitüni. Hicü ticuicame  
 'umayüaca nenayehüani neinü'ani.  
<sup>5</sup>Hicü müpaü tinivacühüaveni,  
 Xevitü xeme xüca puxuya heucaveni  
 müvatixavasie, ya puixieya xüca  
 heucaveni, cuitü cativatihana  
 'uxipiya tucarisie. <sup>6</sup>Mepücayüvavecai  
 tixaü memutiyuanenicü 'icü  
 hepaüsita.

**Neüquiya 'ixüaramete**

<sup>7</sup>Hicü varuxeyaca que memütehenuyexeyacai haque masi 'aixüa mü'anenecai memayaxecü, 'ixasi hepaüsita ticuxatatü tinivaruti'üquitüatüyani müme memuta'inierie. Müpäü tinivarutahüave, <sup>8</sup>Quepaucua tevi müxeta'inieni neüquiya 'ixüararipa, haque masi 'aixüa mü'ane, mana xepüca'ayaxiqueni. Cauca xeime masi ve'eme 'uta'inie, 'ecü 'esiva peve'emetücacu xeicüa. <sup>9</sup>'Ahesüa nuame que mü'ane müxe'uta'ini müpäü pümaticühüaveni, Queneupitüa 'icü püta 'ena mayerünicü. 'Ana 'ecü pe'ateviyatü 'imatüreme 'üparieyasie pe'acaitü pepayani. <sup>10</sup>Masi quepaucua pemüta'inierieni, mana quenayexi 'imatüreme 'üparisie. Quepaucua munuani que mü'ane mümasi'uta'ini, müpäü pümatitahüave, Nehamicu, 'uma püta quenayexi 'aurava 'ura. 'Ana visi püraniuvani 'ahepaüsita yunaime 'ahamatü memuta'inierie vahüxie. <sup>11</sup>Yunaitü tixaütü metehümetüme memayuyetitüva, tixaü mecatehümetütü mecanayeitüariēcuni, peru que mü'ane tixaü catihücütüme mayuyetitüva, mücü tixaütü tihücütütü canayeitüariēmücü. <sup>12</sup>Hicü müpäü tinitahüave que mü'ane mita'ini, Quepaucua 'icuai pemüveieca ya tuca ya taicai, pepücava'inieca 'ahamicuma 'a'ivama 'amarema 'auravari memeuca'u xeicüa, tavari capa müme memasi'uta'inienicü, capa perapiniyariecacü. <sup>13</sup>Masi

quepaucua 'icuai pemüveieca, queniva'inieca müme memümamave memümamavavaqui memühurietüca memacücüpe püta. <sup>14</sup>Müme tixaü mepücatehexeieya cümana tavari memümate'apiniriecacü. Müpäü petiyurienetü 'aixüa pecani'itüariēcāmücü, tavari pepürapiniyarieca quepaucua memanucu'uni müme heiseriemecü yamemütecahu.

**'Icuai mariveme hepaüsita ticuxatatü, que müti'üquitacai**

<sup>15</sup>Hicü memuta'inierie xevitü, 'icü 'u'enieca, müpäü tinitahüave, 'Aixüa cani'itüarieca que mü'ane mürecuani haque Cacaüyari müre'aita. <sup>16</sup>Peru Qesusi müpäü tinicühüaveni, Xevitü tevi 'icuai niuvevieni mariveme. Yümüireme nivaruta'inieni. <sup>17</sup>Hicü tucari 'aye'acu memütecuanicü, neinü'ani yuhesüa mieme ti'uximayatame müpäü tivatahüaveque memuta'inierie, Xequenacüni, hicürixüa pücuha'arisie. <sup>18</sup>Hicü yuxexütü yunaitü meniuyuti'imatücüne. Xevitü meri müpäü tinitahüave, Cuie nepenanaí, peuyevese nemixeiyamiecü. Nepücayüve nemümiēcü, quenereuyehüviri. <sup>19</sup>Xevitüta müpäü titahüavixü, Puixisixi neptüvarenanaí 'auxüme yutayari. Nevareta'inüataque nepümie. Nepücayüve nemümiēcü, quenereuyehüviri. <sup>20</sup>Xevitüta müpäü titahüavixü, 'Uca nepuvitütüarie, 'ayumieme nepücayüve nemümiēcü. <sup>21</sup>Hicü ti'uximayatame nuaca müpäü

tinitahüave yucusiyari. Hicü quiecame 'uyeha'aca müpaü tinitahüave yuhesüa mieme ti'uximayatame, Cuitü quiecarisie quenemie caye 'utüa huyeta. Memümamave memümamavavaqui memacücpe memühurietüca quenivaravitüqui 'uva. <sup>22</sup>'Arique müpaü niutayüni ti'uximayatame, Cusiyari, que pemütiuta'aitaxü yanepütuyuri. Mepücähüpüne cuxi. <sup>23</sup>Hicü cusiyarieya müpaü tinicühüaveni yuhesüa mieme ti'uximayatame, Huyeta quenemie tesariya que mütiucumane, vaüriyarica quenivarepitüa memahucü nequita memütahü necü. <sup>24</sup>Ipaü nepütixecühüave, müme memuta'inierie, ni xevitü müme pücahe'inüata ne'icuai.

**Que müraye'axe xüca  
Cürisitusie tiviyani**

<sup>25</sup>Mericsü yumüiretü teüteri 'utümana meniuhucaitüni. Ta'aurie 'aveca müpaü tinivarutahüave, <sup>26</sup>Xüca nehesüa nuani, xüca cava'uxive'erieca yu'uquiyari yuvarusi yülüya yütüriyama yu'ivama, xücate ca'l'uxive'erieca yutucari meta, pücayüve nehesüa mieme tiyü'üquitüvame mayuyeitüvanicü. <sup>27</sup>Que mü'ane mücayuvaüriya curuxisie mümierieni, que mü'ane nehamati müca'uyeica, mücü pücayüve nehesüa mieme tiyü'üquitüvame mayuyeitüvanicü. <sup>28</sup>Xevitü xeme xüca tuxi tavevimücüni, mana carayerüni merie titi'inüataque que müraye'aca, xüca heixeiyani cümana minüni, me xüca catixaütüni. <sup>29</sup>Simiyenituyari

taveviyu, yutatexieyu minünicü 'aixüa pücayüni, yunaitü mecanitinanaimatücüne memüneniere <sup>30</sup>müpaü me'utiyuatü, 'Icü tevi qui caniusutüani, püyutatexie püca'inü. <sup>31</sup>Xeime cuiepa ti'aitame xüca yemieximeni xeime ti'aitamematü memüyutacuinicü, mana meri carayerüni, müpaü tiyücühüavetü tamamata miriyari varavitütü xüca 'acu yüveni menucunaquecü 'iya xei teviyari miriyari varavitütü hepana mamie. <sup>32</sup>Me xüca catixaütüni, teva heyeicacacu cuxi neüquixivieya, nü'arisixi penunü'airieni, pitavavirieni 'aixüa memüteyuxeianicü. <sup>33</sup>Yaxeicüatari yunaitü xeme xüca yupinite nai xecate'ucu'eirieni, xepücayüvave nehesüa miemete teyü'üquitüvamate xemayuyeitüvanicü.

**'Una hamuritü que mürayuyeitüa**

*(Mateu 5:13; Maricuxi 9:50)*

<sup>34</sup>'Una 'aixüa cani'aneni. Xücate 'una hamuritü 'ayanique, titacü ra'usiürequeyu 'unatütü. <sup>35</sup>Aixüa cacani'aneniqueyu cuiepa meviviyanicü ni xasipa. Nanuyehüiyamücü xecüa. Xaütü netü mu'enaxü que'u'ena.

**Muxa meuyevecai hepaüsita  
ticuxatatü, que müti'üquitacai**

*(Mateu 18:10-14)*

**15** Mericsü müme cuviyexunusie mieme memüteyetuririyari 'axa teyuruvamete meta hesüana meni'axecaitüni yunaitü me'l'enienique que müticuxatacaicü.

<sup>2</sup>Hicü Pareseusixi, müme  
'inüaricü memüte'üquitametetücai  
meta, meniniuquixiecaitüni  
müpaü me'utiyuatü, 'Icü 'axa  
teyuruvamete canivanaqui'erieca,  
vahamatü tinecuaca.

<sup>3</sup>Hicü 'icü 'üxasi hepaüsita  
ticuxatatü tinivaruta'üquitüani  
müpaü 'utaitü, <sup>4</sup>Xevitü xeme  
xüca xei sienituyari varexeiyani  
yumuxasi, xevitü xüca heuyeveni,  
mana 'üxapa cativacu'eirieni  
hipame nauca teviyari  
heimana tamamata heimana  
'atanaucame, cativaumie meuyeve,  
'itaxeiyameque xeicüa pütihayeva.  
<sup>5</sup>Yuteva hetaxeiyame, yunaiparie  
heicuyeme niyemieni yutemavietü.  
<sup>6</sup>Yuquie nuame nivacuxeürimücü  
yumarema 'auravatari yunaime  
müpaü tivacühüavetü, Xemeta  
xequeneyutemamavieca nehepaü,  
nemeitaxeicü nemuxa meuyevecai.  
<sup>7</sup>Müpaü nepütixecühüave,  
hepaüna meyüatü, cuini mieme  
mecaniyutemamavieca taheima  
quepaucua xevitü mütihayeva 'axa  
tiyurienetü. Nauca teviyari heimana  
tamamata heimana 'atanaucatü  
heiseriemecü yamemütecahu  
tixaü memücateheuyehüva  
memütehayevecü 'axa meteyurietü,  
müme vahepaüsita 'esiva xeicüa  
mepüyutemavie.

**Tumini meuyevecai hepaüsita  
ticuxatatü, que müti'üquitacai**

<sup>8</sup>'Uca xüca tamamata tuminiyari  
hexeiyani pürata tuminiyari, xei  
tuminiyari xüca heuyehüani,  
catitaiya cüxeme, caracu'itieni  
yuquita, 'aixüa 'anemecü  
caticuvauni. 'Itaxeiyameque

pütihayeva. <sup>9</sup>'Itaxeiyame  
nivacuxeürimücü yumarema  
'auravatari yunaime müpaü 'utaitü,  
Xemeta xequeneyutemamavieca  
nehepaü, netumini nemutaxeicü  
nemeiyehüacai. <sup>10</sup>Müpaü  
nepütixecühüave, yaxeicüa  
Cacaiyarisüa miemete niuqui  
tuayamete temavierica  
mecnaxeiyani, quepaucua xevitü  
mütihayeva 'axa tiyurienetü.

**'Uquirasi nu'aya meuyevecai  
hepaüsita ticuxatatü, que  
müti'üquitacai**

<sup>11</sup>Müpaü niutayünita, Tevi  
yuhutame nivarexeiyacaitüni  
yunivema. <sup>12</sup>Hicü mutaya  
müpaü tinitahüave yu'uquiyari,  
Ne'uquiyari, 'apinisie mieme  
mücü quenetineyeturiri nehesie  
mieme mayanicü quepaümetü  
nehesie mütinaque 'apinitücai.  
<sup>13</sup>'Ana yupini tinivayetuirieni  
yuhutame yunivema. Hicü  
yapaümexa 'anucayacu mutaya nai  
tiucuxeürieca teva caneyani xeime  
cuieyarisie. Yupini catineuyehüani  
mana yacü xeicüa. <sup>14</sup>Mericsü  
nai tiutixütüacu, haca niutaveni  
cuini mieme mücü cuieyarisie.  
Reuyehüatü nayani. <sup>15</sup>Hicü mana  
quiecomesüa nuaca hesiena  
tiniuviya. Mücü neinü'ani tuixuri  
mütivaremicuanicü cuiepana.  
<sup>16</sup>Huxaimütü nihive'eriecaitüni tita  
memütecauai tuixuri vapinuripaü  
'aneneme, peru ni xevitü pücatimi.  
<sup>17</sup>Mericsü 'uca'iyaritü nayani.  
Müpaü niutayüni, Ne'uquiyarisüa  
miemete te'ivamete pa mepexeyia  
'anuyuhayevecame, ne masi 'uva  
nepümüxime hacacü. <sup>18</sup>Nepüyemie

mecuxi ne'uquiyarisüa. Müpäü nepüreitahüave, Ne'uquiyari, 'axa nepütiuyuri. Taheima macave yamücahainesie, 'ecüta yapemücahainesie nepütiuyuri. <sup>19</sup>'Aixüa nepücatiucal'yari, heiserie nepücahexeiyä para hutarieca 'anive nemayanicü. 'Ahesüa miemete te'ivamete vahepäü xeicüa quenetinepitüaca nemünehayevacü. <sup>20</sup>Hicü yucuha'aritüaca yu'uquiyarisüa neyani. 'Eteva cuxi 'amiecacu 'uquiyarieya nixeiya, nitinenimayata. 'Utanausaca 'enucunaqueca 'enacaviyatücaitü ni'iseni. <sup>21</sup>Hicü nu'aya müpäü tinitahüave, Ne'uquiyari, 'axa nepütiuyuri. Taheima macave yamücahainesie, 'ecüta yapemücahainesie nepütiuyuri. 'Aixüa nepücatiucal'yari, heiserie nepücahexeiyä para hutarieca 'anive nemayanicü. <sup>22</sup>'Uquiyarieya masi müpäü tinivarutahüave te'uximayatamete, Xeiya 'aixüa, 'ixuriqui masi 'aixüa mü'ane herie mieme xequenayehuri xequenacatütüa, hanira xequeneucamaniri mamayasie, cacai meta 'ücayasie. <sup>23</sup>Xequenehaniyu siqueru müvaiya 'aixüa mü'ane, xequeneumi'a. Tetecuatü tepütatemamavieca. <sup>24</sup>'Icü nenive 'umüme nene'eriecaitüni peru nanutanriere, neuyevacaitüni peru niutaxeyarieni. 'Ana meyutemamavietü menacüne yunaitü.

<sup>25</sup>Mericsü masicaya xaüsie neyeicacaitüni. 'Amietü, qui 'aurie 'uyeicatü, niva'eniecaitüni xavererusixi vainarurisixi.

<sup>26</sup>Yu'aurie 'itahüaveca ti'uximayatame xeime, nita'ivaviya que reyüane. <sup>27</sup>Mücü müpäü tinicühüaveni, 'A'iva caninuani. 'A'uquiyari canimieni siqueru müvaiya 'aixüa mü'ane mitanaqui'ericü 'aixüa reu'eriecame. <sup>28</sup>Hicü masicaya niuyeha'ani, pücayuvaüriyacai meutahanicü. 'Uquiyarieya vayeyaca nicunütüvacaitüni. <sup>29</sup>Müpäü tinitahüave yu'uquiyari, Neuxei, müixa viyari netini'uximayacaitüni 'ahesüa, hicü cuxi netini'uximayaca. Ne hasuacu nepücamasicu'imaiyacai, yanepüticamiecai. Peru ne hasuacu capüra nunusi pepücanesimive, nemarema vahamatü nemünetemaviecacü. <sup>30</sup>Hicüri 'icü 'anive ninuani 'atumini nai hetixütüaca 'ucaravesixi vahesie. Cari siqueru müvaiya pepumi hesiena mieme. <sup>31</sup>Hicü 'uquiyarieya müpäü tinitahüave, Nenive, 'aheyemecü nehesüa peniucani. Nepini naitü catini'apinitüni. <sup>32</sup>Neuyevacaitüni temütatemamaviecacü. Camüsü 'icü 'a'iva 'umüme neni'eriecaitüni, peruri panutanierixü punua. Meuyevacai niutaxeyarieni.

**Ti'uximayatame yamücatiecamiecai  
hepäüsita ticuxatatü, que  
müti'üquitacai**

**16** Müpäüta tinivarutahüave teyü'üquitüvamete, Tevi müxicutücai caneixeyacaitüni ti'uximayatame mühüritüariecai quiyacü. Müpäü tiniutahüavarieni quename ti'uximayatame pini reuyehüaximecai. <sup>2</sup>Hicü yu'aurie

'itahüaveca müpaü tinitahüave,  
Titayari niuqui neti'enie 'ahepaüsita.  
'Inüari queneneutaveviri  
'ahüritüaricacü. Nepücamasipitüani  
tavari pemühüritüariecacü.

<sup>3</sup>Hicü yu'iyarisie müpaü  
tiniyücühüavecaitüni  
ti'uximayatame, Que netiyurieneni.  
Necusiyari nehüritüarica  
pünesinavairieni. Nepücatürücaüye  
para nemüti'ivanenicü ne'inetü,  
nepüneteviya 'icuevaricü.

<sup>4</sup>Hicürixüa nepüretima que  
nemütiyurieneni quepaucua  
nemüpasieni quepaucua  
nemücatihüritüarica para hipame  
vaquita nemünaqui'erivanicü. <sup>5</sup>Hicü  
yuxexuime varahüavixüaca  
müme memüte'apicaquecai  
cusiyarieyasüa, müpaü tinitahüave  
meri munua, Quepaümetü  
peuyevese para pemürapicacü  
necusiyarisüa. <sup>6</sup>Iya müpaü  
tinitahüave, Xei sienituyari  
tamüpuhari haseiti. Müpaü  
tinicühüaveni, 'I, 'axapa  
quenanhuri quepaümecü  
pema'acaye. Cuitü mana quenayexi,  
xeime püta quenaca'utüa huta  
teviyari heimana tamamata maine.

<sup>7</sup>Müpaüta tinitahüave xeime,  
'Ecüsü quepaümetü peuyevese  
pemürapicacü. 'Iya rehüave,  
Xei sienituyari necayari türicu.  
Müpaü tinicühüaveni, 'I, 'axapa  
quenanhuri quepaümecü  
pemü'acaye maine. Xeime püta  
quenaca'utüa nauca teviyari  
maine. <sup>8</sup>Hicü cusiyarieya 'aixüa  
nainecaitüni ti'uximayatame  
hepaüsita sepa heiseriemecü  
mücaýüanecai, timaitü  
müyüanecaicü. Hicü miemete

masi metemaitü mecaniyüaca  
yuteüterima vahepaüsita, hecüaripa  
miemete yamecaýüacacu vahepaü.

<sup>9</sup>Neta müpaü netinixe'utahüave  
xeme, teüteri yupinicü  
yamecateniyurica que  
mücatiheiserie. Peru xeme yupinicü  
hipame xequenivatemavieritüaca.  
Müpaü xeteyurietü, quepaucua  
pini müreutipare, xemeta  
xecanitanaqui'erivacuni haque qui  
mücahexüvesie.

<sup>10</sup>Que mü'ane yamüticamie  
'esitipaümeme tihüritüarietü,  
mücü yacatinicamiemücü xüca  
vaücava hüritüarica. Que mü'ane  
heiseriemecü yamücaticamie  
'esitipaümeme tihüritüarietü,  
mücüta yapücaticamieni xüca  
vaücava tihüritüarica. <sup>11</sup>Hipatü  
pinicü yamecateniyurica que  
mücatiheiserie. Xeme xüca  
yaxecatecahuni müpaü 'aneme  
pini hepaüsita xetehüritüarietü,  
quepaicü pütixehüritüani tita  
yuricü mütipini hepaüsita,  
yaxetecahume 'erietü. Haquevasü.

<sup>12</sup>Xüca yaxecatecahuni xeime  
piniteya hepaüsita xetehüritüarietü,  
que mü'ane tita mütxepini  
pütixemini. Haquevasü.

<sup>13</sup>Ti'uximayatame pücaýüve  
yuhutame vahesie mieme  
müti'uximayacacü yucusiyarima.  
Xeime cani'uxive'eriecamücü  
xeime püta naqu'erietü, ya  
xeimesie tiniviyamücü xeime  
püta xani'erietü. Xepcaýüvave  
xemüte'uximayacacü Cacaýiarisie  
mieme yupinisie mieme 'axeicüa.

<sup>14</sup>Merücüsü Pareseusixi 'icü  
nai meteniu'eni. Müme  
tumini memühive'eriecaicü

menitave'eriecaitüni. <sup>15</sup>Hicü Qesusi müpäü tinivarutahüave, Xeme yuri xecateniva'eritüaca teüteri quename heiserie xeyüa xe'utiyuatü, peru Cacaüyari pimate xe'iyari. Tita teüteri mamarivaveme memütexeiya, mücü pütixani'eriva, Cacaüyari que mütixeiya.

**Que müti'ane 'inüari niuquiyari  
hexeiyacacu, que müti'ane  
Cacaüyari ti'aitametücacu**

<sup>16</sup>Inüari niuquiyari, texaxatamete vaniüqui mecani'eniecaitüni teüteri Vani canuavecacu cuxi. Nuacuque hicüque niuqui 'aixüa manuyüne püta canicuxaxasivani, que müti'ane Cacaüyari ti'aitametücacu, yunaitü cuini mieme mecaniyuvaüriyani hesiena memüteviyanicü. <sup>17</sup>Masi pücucuaniveniqueyu muyuavi cuie neutiparecü, peru cuini mieme pücucuaniveniqueyu xe'i 'utüaricayari xe'i hüxiyari müca'aye'anicü 'inüari niuquiyari que maine.

**Qesusi que müti'üquitacai,  
memücu'eiriva vaxatatü**

*(Mateu 19:1-12; Maricuxi 10:1-12)*

<sup>18</sup>Que mü'ane 'licu'eirieme yü'üya, xeime püta mütivitüni, mücü xeime püta canicumaiüvani xeime cünaya hücutütü. Que mü'ane mitivitüni 'uca mucu'eiriva, mücüta nicumaiüvani xeime 'üyaya.

**Xicu Rasarumatü**

<sup>19</sup>Mericüsü tevi 'aniuyeicacaitüni xicutütü. Tataüravime nanacatücücaütüni, rinu 'ixuriquiyari meta. Tucaricü visi tinicuacaitüni. <sup>20</sup>Xevitü

mavetü Rasaru titevatü mana ni'atüarivacaitüni xicu quitenie. Caneu'esacaitüni. <sup>21</sup>Nihuxaimücücaütüni, ticuaimütü tita müranacavivivecai xicu mexayasie. 'Asita süicüri me'acüneca menisenacaitüni 'esaya. <sup>22</sup>Mericüsü mümave niümüni. Cacaüyarisüa miemete niuqui tuayamete menenutivitüni 'Apurahami 'aurie. Hicütari xicu tiumü tiucateuquie. <sup>23</sup>Müquite vasata 'ucaütü neutiniere 'uximatüarietü. Tevapai nixeiya 'Apurahami, Rasaruta tiuxei 'auriena 'uticaime. <sup>24</sup>Müpäü: tiniuhiva, Ne'uquiyari 'Apurahami, quenenenenimayaca, Rasaru quenenanü'a hapa meiquenicü yu'itüvame cüsie münesixeriyacü nenenisie, cui nemüyüanecü 'ena taipa. <sup>25</sup>Hicü 'Apurahami müpäü niutayüni, Nenive, quena'erivani 'aixüa 'aneneme pehexeyatü pematüacü quepaucua pemayeyuricai, Rasaruta yaxecüa 'axa 'aneneme hexeyatü matüacü. Mücü 'uva niunütüarieni hicü, 'ecü püta pepü'uximatüarie. <sup>26</sup>Mücü meta, xeme tame tahixüata 'aqui 'emeucateva puseiriyarie, para müme memüca'yüvavenicü sepa memanucünicu xehesüapaitü, para vanata tahesüapaitü memüca'ananecü. <sup>27</sup>Hicü müpäü tinitahüave 'iya, Ne'uquiyari, nepümasivaviri Rasaru pemanunü'anicü nequemasisüa. <sup>28</sup>Yu'auxüvime nepüvarexeiya ne'ivama. Tinivahecüatüacamücü müme, capa 'uva me'u'axüanicü mürayuti'uximatüatüre mümetari. <sup>29</sup>Hicü 'Apurahami müpäü

tinicühüaveni, Muisexi xapaya mecanexeiyani, texaxatamete vaxapa. Mequeva'eniaca müme que memutiyuane. <sup>30</sup>Iya re'eiya, Tixaü ne'uquiyari 'Apurahami. Masi xüca xevitü müquite vasata mieme vahesüa nuani, mepütehayeve que memüteyurie. <sup>31</sup>Mücü müpäü tinicühüaveni, Xüca mecava'eniaca Muisexi texaxatamete, sepa xevitü manucuquenieque müquite vasata, mepücayuvaüriyaniqueyu.

### Teüteri que memütecunuitüarieni

(Mateu 18:6-7, 21-22; Maricuxi 9:42)

**17** Müpäüta tinivarutahüave yuhesüa miemete teyül'üquitüvamete, Peuyevese teüteri memütcunuitüarienicü, peru xüa 'ui que mü'ane müvacunuitüani. <sup>2</sup>Hesiena mieme masi 'aixüa püyüniyari xüca mata 'acatütüarienieque cüipitüana, xüca haramarasie heucahüiyaniyari, capa 'icunuitüanicü ni xeime 'ime sepa vaüca memücamariva. <sup>3</sup>Xequeneyü'üviyani xeme. Xüca 'a'iva 'axa masi'uyurieni, queneunütüa. Xüca tihayevamücüni que mütiyurienecai, quetineuyehüviri. <sup>4</sup>Sepa xei tucarisie müixa 'axa masi'uyurienieque 'atahutamexa, tavari xüca 'atahutamexata 'ucunuanique 'ahesüa, Nepütihayeve que nemütiyuri, utaitü, quetineuyehüviri 'ecü.

Quetanepitüaca masi vaüca yuri temüte'eriecacü, que memutiyanecai

<sup>5</sup>Hicü nü'arisixi müpäü metenitahüave Ti'aitame,

Quetanepitüaca masi vaüca yuri temüte'eriecacü. <sup>6</sup>Ti'aitame müpäü niutayüni, Xüca musitasa 'imüariyaripäü 'esipemecü yuri xete'eriecaque, müpäü xepüte'itahüavequeyu xapa mana muve, Quenivatixünarieni, haramarasie queneuca'iteüsie. Yapüticamieniqueyu que xemutiyuane.

### Que müreyeveve

yamütiyurienicü ti'uximayatame

<sup>7</sup>Xevitü xeme xüca ti'uximayatame hexeiyani mucuiesanane ya muxasi müvahüne, xüca nuani ti'uximayatame retahayevame, müpäü quetitahüave, Quenaye'a xeiya, quetinecuaca. <sup>8</sup>Pücatixaü, müpäü masi cusiyari catitahüave, 'Aixüa quetineuyuri para nemüticanicü ne, quene'atiquemaritüa quena'ahüa quenetineumicua mexi neticua'a mexi neti'ie. 'Arique mücaque pepüticuanu pepütü'ieni 'ecütari. <sup>9</sup>Pamüpariyusi que 'ipitüani ti'uximayatame yatiyurienecacu que mütiu'aitüarie. Tixaü xüari. <sup>10</sup>Xemetari yaxaicüa, quepaucua yaxemüteyurica nai que xemüte'u'aitüarie, müpäü xequeneutiyaneni, Te'uximayatamete tecanihümetüni xEICÜA, tixaütü tahesie pücatinaque. Que müreyevecai xEICÜA tepüte'uyuri.

Tamamata que memüte'u'itiya, cuiniya müvaviyacai

<sup>11</sup>Mericusü Querusareme 'uyemietü Samariya cuieyari Carereya cuieyari mayunaquecaisie



niuyemiecaitüni. <sup>12</sup>Xeime quiecarisie ta'aximecacu tamamata 'uqisi menenucunaque cuiniyacü memüca'itiyatücatei. Teva meti'utü <sup>13</sup>meniutihivacaitüni müpaü me'utiyuatü, Qesusi 'acu, Ti'üquitame 'acu, quetanenenimayaca. <sup>14</sup>Varuxeiyaca müpaü tinivarutahüave, Xequenehu mara'acate memüxexeyacü. Hicü me'uyehutü me'itiyatücaitü mecanacüne. <sup>15</sup>Hicü xevitü müme 'unierca que müranayehüiya, pucunua 'aixüa 'utaitü Cacaüyari hepaüsita, carima 'utaniutü. <sup>16</sup>Niutihüximaqueni Qesusitüa pamüpariyusi 'ipitüatü. Mücü Samariya caniquiecametücaitüni. <sup>17</sup>Hicü Qesusi müpaü niutayüni, Tamamata mecate'u'itiya. 'Atanaucatü que metehuyunixü. <sup>18</sup>Hipatü mecatexuave memüyuvaüriya memucunuaxüanicü para 'aixüa memutiyuanenicü Cacaüyari hepaüsita, 'icü xaüsie quiecame xeicüa punua. <sup>19</sup>Hicü müpaü tinitahüave, Quenanucuquexi quenemie. Yuri pemütüta'erericü, 'ayumieme peputavicueisitüarie.

**Quepaucua tucari maye'aniquecai para Cacaüyari misütüanicü ti'aitatü**

*(Mateu 24:23-28, 36-41)*

<sup>20</sup>Mericusü Pareseuxixi menicu'ivaviyacaitüni quepaucua maye'aniquecai tucari para Cacaüyari misütüanicü ti'aitatü. Müpaü tinivarutahüave, Tanieretü xeicüa 'asipücaretimani quepaucua misütüani ti'aitatü Cacaüyari. <sup>21</sup>Pücayüveni müpaü mütayüni, Camü 'ena, camü 'uma. Que

mütü'ane Cacaüyari ti'aitametücacu, 'ari xesata canisütüani ti'aitatü.

<sup>22</sup>Hicü müpaü tinivarutahüave teyü'lüquitüvamete, Tucari canaye'amücü quepaucua müpaü xemutiyuaneni, Xüca tüma 'aye'anique Yuri Tevi tucarieya siquere xevitü, peru xepüca'ixeyia mücü tucari. <sup>23</sup>Müpaü mepütetahüave, Camü 'uma peyeica, camü 'ena. Xepücatayeixüani, xepücavaranuveiya. <sup>24</sup>Merücariya naisarie que mütihecüarivie muyuavi 'umerücatü taserieta ta'utatapaitü, yaxecüa neta müpaü nepütimasücüre naisarie netucari 'aye'ayu Yuri Tevi que nemütiteva. <sup>25</sup>Perusü neyueveca meri vaüca nemütücinecü, memünesitixani'erienicü hicü miemete teüteri neyuevecata. <sup>26</sup>Que mütiuyü quepaucua Nuhexi 'amuyeicacai, yaxecüa catiniyümücü quepaucua netucari maye'ani. <sup>27</sup>'Ana mepütücuatüvecai mepü'ietüvecai mepüneneüquecai mepüvatavitütüvacai. 'Ariqueque tucari naye'ani quepaucua Nuhexi canuvasie meutaha. 'Ana ha tiyaca nivaruca'una yunaimie meniutihauini. <sup>28</sup>Müpaürita que mütiuyü quepaucua Ruti 'amuyeicacai yapütüyüni. 'Ana mepütücuatüvecai mepü'ietüvecai mepütenanecai mepütetüacai mepuca'esacai mepüquitüvecai. <sup>29</sup>Tucari 'aye'acu quepaucua Ruti meyetüa Surumasie, 'ana tai niucaviye 'asupüre nütü, nivareuyehüani yunaimie. <sup>30</sup>Müpaü catiniyümücü mücü tucarisie quepaucua nemasiücütü nemayani, Yuri Tevi que nemütiteva.

<sup>31</sup>Iya tucarisie que mü'ane caxetunisie macaca 'uxipietü, piniteya quita tiyepicacu, mücü 'anacayame pücativayepini. Yaxeicüata que mü'ane yuvaxata meyeica yu'utüma pücanuani.

<sup>32</sup>Xequena'erivani Ruti 'üyaya que mu'itüarie. <sup>33</sup>Que mü'ane müyutavicueisitüamücü niyutatümaiyamücü. Que mü'ane müyutatümaiya, mücü niyutavicueisitüamücü yemecü.

<sup>34</sup>Yanepütixecühüave, 'iya tucarisie yuhutatü mepücahini xei 'utayarisie. Xevitü nanutivitüquiemücü, xevitü pücu'eiriva. <sup>35</sup>Yuhutatü mepütüxüni 'axeicüa. Xevitü panutivitüquieni xevitü pücu'eiriva.

<sup>36</sup>Yuhutatü vaxata mepe'uvani. Xevitü panutivitüquieni, xevitü pücu'eiriva.

<sup>37</sup>Müpaü metenicühüaveni, Ti'aitame haque müpaü püreyüni. Müpaü tinivacühüaveni, Haque caxari meca, mana virücüxi mepüyucuxeürieni.

**Viyura 'isücame vahepaüsita ticuxatatü, que müti'üquitacai**

**18** Mericüsü 'icü 'üxasi hepaüsita ticuxatatü müpaü tinivaruta'üquitüani quename heuyevese yuheyemecü müyuneneviecacü, cavaüripietü. <sup>2</sup>Müpaü niutayüni, 'Isücame xeime quiecarisie necateitüni. Cacaüyari pücamacarücai 'iya, pücava'eniecai teüteri. <sup>3</sup>Mericüsü 'uca cünaya mumü mana necateitüni mücü quiecarisie. 'Isücomesüa ni'axecaitüni müpaü 'utaitü, Heiserie

queneneupitüa münesi'aye'unie yamücatiyurienenicü. <sup>4</sup>Müixa pücayuvaüriyacai 'isücame. Peru 'arique müpaü tiniyücühüavecaitüni, Sepa nemüca'imacarüca Cacaüyari, sepa nemücava'enie teüteri, <sup>5</sup>'icü 'ucarasi cünaya mumü canetini'uxitüaca. Mecuxi heiserie necanipitüamücü, capa 'uta'axetü nesi'utaxütüanicü.

<sup>6</sup>Mericüsü Ti'aitame müpaü niutayüni, Xecani'enieni niuquieya que mutayü mücü 'isücame heiseriemecü yamücatiyurienecai. <sup>7</sup>Cacaüyari masi heiserie cativapitüani müme müvaranuyexei tucarcü tucarcü memitihivie. Que reutevini vaparevietü.

<sup>8</sup>Yanepütixecühüave, cuitü heiserie canivapitüamücü. Masicutatü, quepaucua nemunuani Yuri Tevi nehücütütü, yuri mete'eriecame netivataxeiya cuiepa 'acu.

**Pareseu tivavavirivame vahepaüsita ticuxatatü, que müti'üquitacai**

<sup>9</sup>Ipaüta tini'üquitacaitüni 'üxasi hepaüsita ticuxatatü, hipatü yuhesie yuri memüte'eriecaicü quename heiseriemecü yametecahucai, mevaxani'erietü hipame. Müme müpaü tinivarutahüave, <sup>10</sup>Teüteri tuquipa meneutiyunüxiani meyutanenevienique yuhutatü. Xevitüri Pareseu pühücütücai, xevitüta tevi cuviyexunusie mieme mütiyetuiriyari pühücütücai. <sup>11</sup>Mericüsü Pareseu mana 'utaqueca nenevieri niyupitüacaitüni müpaü 'utaitü, Cacaüyari, pamüpariyusi nemanipitüaca hipame teüteri vahepaü nemüca'anecü ne. Müme

mepütenavaya, heiseriemecü yamepücatecahu, hipame va'üitama mepüvacumaüva, mesü 'icü tivavamepaü mepü'anene. <sup>12</sup>Ne masi hutacüa nepünehaquiva xexuime semanasie, ne'ivarica naime xei tapari nepütinetua tuquita mieme, tamamata taparisie mieme. <sup>13</sup>Hicü tivavame yateva 'uветü pücayuvaüriyacai siquere yuheima meutinierecü. Masi yutavisie yucusunatü hivericacü müpaü niutayüni, Cacaüyari 'acu, quene'avaüriya 'aixüa pemünetixeyacü, 'axa netiyuruvametüme. <sup>14</sup>Müpaü nepütixecühüave, mücü masi yuquie neucayune heiserie hexeyatü, Pareseu pücatixaü. Yunaitü tixaütü metehümetüme memayuyeyitüva, tixaü mecatehümetütü mecanayeitüariecuni, peru que mü'ane tixaü catihücütüme mayuyeyitüva, mücü tixaü tihücütütü canayeitüariemücü.

**Quesusi que mütiuyuri türi vahesie  
'aixüa memü'itüarienicü**

*(Mateu 19:13-15; Maricuxi 10:13-16)*

<sup>15</sup>Mericsü 'asita türi mecaniva'atüvacaitüni hesüana vahesie mutimenicü. Teyü'üquitüvamete mevaruxeyaca menivarutate'acaitüni. <sup>16</sup>Hicü Quesusi yu'aurie nivarutahüave türi müpaü 'utaitü, Xequenivapitüaca türi nehüsü memü'axenicü. Xepücavanenaca. Cacaüyari müya me'ananeme catiniva'aitüvametüni. <sup>17</sup>Niuqui caniseüyeni que nemütixecühüave, nunusi 'aixüa 'iyaricü que mütiyuvaüriya, que

mü'ane hepaüna mücayuvaüriya Cacaüyari müti'aitüacacü, mücü pücatipitüarieni meixeyanicü müti'aitüacacü.

**'Uqui müxicutücai**

*(Mateu 19:16-30; Maricuxi 10:17-31)*

<sup>18</sup>Mericsü te'aitamete xevitü müpaü tinita'ivaviya, Ti'üquitame 'aixüa pemütiuca'iyari, que netiyurieyu nehiesie pütinaque tucari mücaxüve. <sup>19</sup>Quesusi müpaü tinita'eiya, Titayari 'aixüa netiucal'iyarime penetixata. Tevi 'aixüa mütiuca'iyari 'apüca'uyeica. Cacaüyari yuxevitü 'aixüa pütüuca'iyari püta. <sup>20</sup>'Ecü 'aisica pepümate, xeime 'üyaya pepücacumaüvani ya xeime cünaya, pepücati'amemivani, pepücatinavayani, xeimesie pepücarahüpani peti'itavatü, 'aquemasi 'avarusi quetinivareuyehüvirieca, que manuyüne. <sup>21</sup>Iya rehüave, 'Icü naimesie yanepüticamie temaicüyaripai. <sup>22</sup>Quesusi 'u'enaca müpaü tinitahüave, Xei mieme xeciüa peuyevese yapemütiyurieni. Nai pemürexeyia quetineutua, quetinivarumicua memümamave. Müpaü petiyurieme muyuavisie vaüca pepeucaqueni. 'Arique quenayaca, nehiesie quetineviyani. <sup>23</sup>Hicü mücü niuqui 'u'enieca niyuhiveriecaitüni vaüca mürexeyacacü. <sup>24</sup>Hicü Quesusi 'ixeyatü yuhiveriecame, müpaü niutayüni, Canicuaniveni xicusixi memaye'axüanicü Cacaüyari müti'aitüvametünicü. <sup>25</sup>Sepa mücucuaniveniqueyu cameyu manuyehanicü 'ivipame

hüxieyasie, peru siepüre masi yeme pücanive xicu maye'anicü Cacaüyari müti'aitüvametünicü. <sup>26</sup>Memü'enanacai müpaü meniutiyuani, Mericüte, xüca müpaü 'aneni, quepai püyüve mütaviceisitüarienicü. <sup>27</sup>'Iya müpaü tiutayü, Tita teüteri memütetexie, Cacaüyari caniyüveni. <sup>28</sup>Hicü Pecuru müpaü niutayüni, Camü, tame tapini nai tete'ucu'eirieca 'ahesie tepüteviya. <sup>29</sup>Müpaü tinivarutahüave, Niuqui caniseüyeni que nemütixecühüave, que mü'ane micu'eirie yuqui yu'uquiyarima yü'lüya yu'ivama yumarema yütüriyama, yamütüyünicü que müti'ane Cacaüyari ti'aitametücacu, <sup>30</sup>mücü cuini mieme masi vaüca varexeiyatü canayeimücü hicü, tucari 'umamiesie 'aye'ame, tucari mücaxüve hexeiyatü canayeimücüta.

**Tavari Quesusi que mutayü que mütimierieniquecai**

(Mateu 20:17-19; Maricuxi 10:32-34)

<sup>31</sup>Hicü Tamamata Heimana Yuhutame yateva varevitüca müpaü tinivarutahüave, Neuxei, Querusareme teneta'axüacuni. Naitü que müre'uxa texaxatamete vaxapasie Yuri Tevi hepaüsita, naitü catinaye'amücü. <sup>32</sup>Necaniyetuiyamücü müme memücatateüterima vahesüa, necaninanaimariemücü 'axa netinitahüavariemücü, <sup>33</sup>mecaneni'aüsicamacuni meha'atü. Menesicuvaxüame mecananimiecuni. Peru hairieca tucarisie necananucuquemücü.

<sup>34</sup>Müme 'asimepücatemaicai tita mütixatacai. Niuquieya masi pü'aviesiecai vahesie mieme. 'Asimepücatehetima que müticuxatacai.

**Macüpecai que müranutanierixü Quericutanaca**

(Mateu 20:29-34; Maricuxi 10:46-52)

<sup>35</sup>Mericüsü Quericu quiecarisie 'aye'aximecacu Quesusi, xevitü 'acüpetü mana huye tesita niucateitüni tivautü. <sup>36</sup>Hicü varu'enieca yumüireme teüteri me'anuyecücame nivacu'livaviyacaitüni que mütüyüniqecai. <sup>37</sup>Müpaü metenitahüave quename Quesusi 'uyüximecai Nasaretitanaca. <sup>38</sup>Hicü macüpe carima niutahiva müpaü 'utaitü, Quesusi 'acu Raviri pemünu'aya, quenenenimayaca cuerietü. <sup>39</sup>Mexüacate menitatie ni cayuvatü müticanicü. 'Iya masi carima niutahiva müpaü 'utaitü, Raviri nu'aya 'acu, quenenenimayaca cuerietü. <sup>40</sup>Hicü Quesusi mana 'utaqueca nita'aita mahanienicü hesüana. Nuacu 'auriena müpaü tinitahüave, <sup>41</sup>Que matinaque nemümasiyurienicü. Rehüave, Ti'aitame, nepayeniereniqueyu. <sup>42</sup>Hicü Quesusi müpaü tinitahüave, Quenanutanierisü. Yuri pemütiuta'ericü pepanayeve. <sup>43</sup>Yapaucua nanutaniere. Neiveiya 'aixüa 'utaitü Cacaüyari hepaüsita. Yunaitü teüteri me'ixeyaca visi meniutiyuanecaitüni Cacaüyari hepaüsita.

**Quesusi Saqueumatü que memütécuxatacai**

**19** Hicü heutahaca Quericusie hixüata niuyemiecaitüni.

<sup>2</sup>Mericusü tevi mana niucateitüni Saqueu titevatü. Mücü tevavamete catiniva'aitüvametücaitüni cuviyexunusie mieme, püxicutücai.

<sup>3</sup>Nixeyamücücaitüni Quesusi que müpaicütücai, peru 'esimutevicaicü puyutatexie teüteri memüyumüirecaicü.

<sup>4</sup>Vahüxie 'utanausaca nitimaque xapasio mixeyacı, mana muyeyaniquecaicü. <sup>5</sup>Hicü Quesusi mana 'uyemietü neutinieri. Müpaü tinitahüave, Saqueu, quenacamaqui xeiya. Peuyevese 'aquita nemenuanicü hicü.

<sup>6</sup>Cuitü nacamaque, yutemavietü nitanaqui'erieni. <sup>7</sup>Me'ixeyaca yunaitü meniniuquixiecaitüni hepaüsitana müpaü me'utiyaütü, Cari tevi 'axa mütiyuruvasüa punua.

<sup>8</sup>Peru Saqueu mana 'uvetü müpaü tinitahüave Ti'aitame, Neuxei Ti'aitame, nepini hixüata 'arücame nepütivamini memümamave.

<sup>9</sup>Itaricacü que nemütivacuamanacai hipame, naucamecü nepürapica.

<sup>9</sup>Hicü Quesusi müpaü tinicühüaveni, Camü, 'icü quiecatari meputavicueisitüarie hicü. Senecatü 'icütari

'Apurahami canixiüyarieyatüni.

<sup>10</sup>Yuri Tevi que nemütiteva, necaninuani nemüvacuvauneniciü müme memeyexürie nemüvatavicueisitüanicü.

**Tamamata tumini müvaru'üitüa hepaüsita ticuxatatü, que müti'üquitacai**

<sup>11</sup>Mericusü 'icü me'eniecacu tafari 'üxasi hepaüsita ticuxatatü tinivaruta'üquitüani, Querusareme 'aurie meyeicacaicü, mümeta

müpaü memütecuerivacaicü quename cuitü 'isutüaniquecai ti'aitatü Cacaüyari masiücütü 'ayame. <sup>12</sup>Müpaü niutayüni, Tevi ve'eme münu'ayatücai teva caniyemiecaitüni xeime cuieyarisie. Mana cayerieme para yucuiepa ti'aitametütü mayanicü, 'ariqueque ninuaniquecaitüni.

<sup>13</sup>Hicü tamamata yu'aurie varutahüaveca yuhesüa miemete te'uximayatamete, tumini nivaru'üitüani xei sienituyari yuxexuime. Müpaü tinivarutahüave, Xequetenetuaca mexi necanuave.

<sup>14</sup>Mericusü hesüana miemete quiecatari meni'uxive'eriecaitüni.

Niucamete menivarenü'ani 'utümana müpaü me'utiyaütü, Tame tepüca'inaqui'erie 'icü mütati'aitüacacü. <sup>15</sup>Mericusü

'anucayerieca 'ayeneca ti'aitametütü, tiniuta'aita hesüana memütahüavarienicü te'uximayatamete tumini

müvaru'üitüa yamüretimanicü que memüte'uyuri yuxexütü metetuatü. <sup>16</sup>Mericusü mexüacame caninuani müpaü 'utaitü, Cusiyari,

'atuminicü xei sienituyaricü tamamata sienituyari nepana'ivaxü.

<sup>17</sup>Müpaü tinitahüave, 'Aixüa puyü, ti'uximayatame 'aixüa pemütiuca'iyari pecanihücütüni.

'Esipaümemeücü yapetihüritüarieca yapeticamietü pepatüa. Camü, heiserie nemanipitüaca, tamamata quiecariyari petiva'aitüvame pemayanicü. <sup>18</sup>Hicü xevitü ninuani

müpaü 'utaitü, Cusiyari, 'atuminicü xei sienituyaricü, 'auxüme sienituyari nepana'ivaxü. <sup>19</sup>Müpaü tinitahüave 'iyata, Mericüte,

'ecü pepühürítuarie 'auxüme quiecariyari petiva'aitüvame pemayanicü. <sup>20</sup>Hicüta xevitü ninuani müpaü 'utaitü, Cusiyari camü 'atumini xei sienituyari. Nepiti'avietaxü paniyucü 'eimeme, <sup>21</sup>nemasimacatü pema'a'eriyacü 'ecü, pemenu'üvecü tita pemücatiucaye, pemica'isanacü tita pemücatiuca'e. <sup>22</sup>Müpaü tinita'eiya, 'Ahesie pepürähüpa 'acümana que pemutayü, ti'uximayatame 'aixüa pemücatiuca'iyari pemühücücü. 'Ecüsü müpaü pepütimaicai neman'e'riyacü, nemenu'üvecü tita nemücatiucaye, ne'ica'isanatü tita nemücatiuca'e. <sup>23</sup>Titayari siquere netumini pecatietua tumini hüvemesüa, para nenuame nemüvaye'ünicü yapaümeme 'ana'ivame. <sup>24</sup>Hicü müpaü tinivarutahüave yutupirisixima, Mücü tuminieya xequenenavairi, xequene'üitüa 'iya tamamata sienituyari mexeiya. <sup>25</sup>Müpaü metenitahüave, Ti'aitame, tamamata canexeyaniri. <sup>26</sup>Müpaü nepütixecühüave, yunaitü tixaütü memütehexeiya mepütemiqieni, peru que mü'ane tixaü mücarexeiya, sepa que mütitita mürexeiya pütinavaiyarieni. <sup>27</sup>Müme meta memünesi'aye'uniecai memücanesinaqui'eriecai netiva'aitüvame nemayanicü, 'uva xequenivarahapaca, nehüxie xequenivarucuya.

### Querusaremesie que müreutaha

(Mateu 21:1-11; Maricuxi  
11:1-11; Vani 12:12-19)

<sup>28</sup>Mericsü müpaü 'utayüca neyani Querusareme heutiyleneque.

<sup>29</sup>Hicü Vetüpaque Vetaniya quiecaritiesie heta'aximetü, Huriva Macu'u müracusevasie yemuri hetüa nuaca, yuhutame nivarutanü'ani teyü'üquitüvamete <sup>30</sup>müpaü haitü, Quiecarí 'anutaiüye mucumasie xequenehu. Mana xeheutahaxüame xepeitaxeiya puxu nunusi hacuviecame, tevi müca'anutiyeüve cuxi hesiena. Xehecuxüname xequenahani. <sup>31</sup>Xevitü xüca müpaü tixe'utahüave, Titayari xete'ecuxüna, müpaü xepüte'itahüave, Ti'aitame peiyehüva.

<sup>32</sup>Hicü memutanü'arie menecüne. Meneitaxeiya que mütivarutahüavixü. <sup>33</sup>Puxu nunusi mecuxünacacu, cusiyarimama müpaü metenivarutahüave, Titayari xete'ecuxüna puxu nunusi. <sup>34</sup>Müme müpaü metenivarutahüave, Ti'aitame peiyehüva. <sup>35</sup>Hicü Quesusisüa meneihana. Yü'ücarite me'enütitüaca puxu nunusisie menenutiyeeni Qesusi. <sup>36</sup>Hicü 'uyemiecacu yü'ücarite meni'itüaximecaitüni huyeta. <sup>37</sup>Hicü Huriva Macu'u yemuriyaritüa viyeta me'ucahütü, yunaitü teyü'üquitüvamete meyümüiretü meyutemamavietü menisütüani carima 'aixüa me'utiyuatü Cacaüyari hepaüsita, nai que memüte'uxei türücaüyemecü que mütiuyü hepaüsita <sup>38</sup>müpaü me'utiyuatü, 'Aixüa queticühüavarüvani que mü'ane ti'aitametütü 'umamie, que mü'ane Tati'aitüvamesüa miemetütü 'umamie. Taheima 'aixüa mequeteyuxeiyani, vapaitü visi meque'utiyaneni. <sup>39</sup>Hicü Pareseusixi hipatü memü'uvacai

teüteri vasata müpäü metenitahüave,  
Ti'üquitame, 'ahesüa miemete  
quenivarutati'a teyü'üquitüvamete.

<sup>40</sup>Müpaü tinivarutahüave,  
Yanepütixehahüave, 'ime xüca  
cayuvatü me'umacaque, tetexi püta  
mepütihivaqueyu.

<sup>41</sup>Merücüsü 'aura 'umietü 'ixeyaca  
quiecarí, niutasuani he'erivatü,

<sup>42</sup>müpaü 'utaitü, 'Ecütütü  
siquere 'icü tucarisie xüca tüma  
peheitimanique tita müreyeveese

para 'aixüa pemütixeyariecacü.  
Masi niuti'aviesieni hicü 'ahüxicü  
pemüca'ixeyacü. <sup>43</sup>Tucari

canaye'amücü, 'ana müme  
memümasi'aye'unie cuya  
tesariyayari meniti'uitüacuni  
'a'aurie, 'ana 'a'aurie meniti'uicuni,  
para teüteri memücvayecü necü.

<sup>44</sup>Mecamanatihüacuni cuiepa 'ecü,  
'ateüterimata 'ahesüa memüyetei  
mepatixüriyani cuiepa. 'Ahesie  
tete xevitü pücacu'eiriva yuheima  
'atetü. Müpaü catiniyümücü 'ecü  
pemüca'imaicaicü tucari quepauca  
Cacaüyari müyuvauriyacai 'ahesie  
mieme.

#### Que müti'iti tuqui 'amüpa

(Mateu 21:12-17; Maricuxi  
11:15-19; Vani 2:13-22)

<sup>45</sup>Hicü tuqui 'amüpa  
curaruyarita heutahaca nisütüani  
varanuyeveveyatü tetuayamete  
<sup>46</sup>müpaü tivacühüavetü, 'Ipaü  
püre'uxa, Nequi nenevieri  
caniquiyaritüni. Xeme püta terü  
xecanayeitüani haque tenavayamete  
memeyu'avieta.

<sup>47</sup>Merücüsü tucari  
tini'üquitacaitüni tuqui  
curaruyarita. Mara'acate

memühürütüariecai, müme meta  
'inüaricü memüte'üquitametetücai,  
teüteri va'uquiyarima yunaitü  
menicuvautüvecaitüni  
me'imienique. <sup>48</sup>Peru müme  
mecaniyutatexieni müpaü  
meteyurienique, yunaitü teüteri  
memi'eniecaicü me'ihive'erietü  
niuquieya.

#### Quesusi heiserie que mürexeiyacai

(Mateu 21:23-27; Maricuxi 11:27-33)

**20** Merücüsü heiva teüteri  
tiniva'üquitüacaitüni  
tuqui 'amüpa curaruyarita  
'aye vetü, niuqui 'aixüa manuyüne  
vacuxaxatüvatü. Hicü mara'acate  
memühürütüariecai mümeta  
'inüaricü memüte'üquitametetücai  
vahamatü 'uquiravesixi  
vahamatü meniu'axüani.

<sup>2</sup>Müpaü metenitahüave,  
Quetatineutahecüatüa haque  
memieme heiserie pemexeyia  
'ipäü pemütüyurieneccü. Que  
mü'ane 'icü heiserie masipitüa  
'iya pemütüyurieneccü. <sup>3</sup>Müpaü  
tinivarutahüave, Mericüte neta  
xei niuquiyari nepüxeta'ivaviya.  
Yaxequeneteneutahüavi ne.

<sup>4</sup>Vani quepauca müti'üyanecai,  
taheima mieme yatipitüariecai,  
teüteri xecüa yamepüte'ipitüa  
nusu. <sup>5</sup>Mümeri müpaü  
meteniyücühüavecaitüni, Xüca  
tame müpaü te'uti yuani quename  
taheima mieme pitüariecai mücü  
müpaü canitayümücü, Mericüte,  
titayari yuri xecate'ita'ereri. <sup>6</sup>Masi  
xüca müpaü te'uti yuani quename  
teüteri me'ipitüacai, yunaitü  
teüteri tetcü mepütasitüaxa,  
yuri memüte'erieccü quename Vani

tixaxatame hücütücai Cacaüyarisüa mieme. <sup>7</sup>Hicü müpaü metenita'eiya quename 'asimecatemaicai haque mepitüariecai. <sup>8</sup>Quesusita müpaü tinivaruta'eiya, Mericüte neta 'asinepücatixetahüave haque memieme heiserie nemexeiya 'iya nemütiyurienecü.

**Te'üviyamete 'axa teyuruvamete**

(Mateu 21:33-44; Maricuxi 12:1-11)

<sup>9</sup>Mericsü 'icü 'üxasi hepaüsita ticuxatatü nisutüani tiva'üquitatü teüteri müpaü 'utaitü, Tevi haraveri putavevi. Te'üviyamete nivaruhiritüani vacuetatütü. Tevapai caneyani müixa. <sup>10</sup>Hicü tucari canaye'ani maticuacuaxesie. Ti'uximayatame niutanü'ani te'üviyamete vahesüa memiyetuirienicü haraverita mieme yapäueme cusiyarisie mieme. Peru te'üviyamete me'icuvaxüaca yacü xeicüa maveme meneinü'ani. <sup>11</sup>Hicü tavari ti'uximayatame niutanü'ani. Müme me'icuvaxüaca 'iyata, me'inanaimaca, meneinü'ani yacü xeicüa maveme. <sup>12</sup>Tavari hairieca xeime niutanü'ani. Meheicuvitexüaca menenuyehüani.

<sup>13</sup>Hicü haraveri cusiyari müpaü niutayüni, Queri netiyurieni. Nenive nepanunü'ani neminaqui'erie. Tietü metehieyhüvirieconi. <sup>14</sup>Hicü te'üviyamete me'ixeiya, niuqui meniutixüatütüacüne müpaü me'utiyaütü, Camüsü, 'icüsie catininaquimücü cusiyari pinieya. Tepimieni tahesie püta mütinaquenicü pinieya. <sup>15</sup>Hicü haraveri vari meneicahüani, menimieni. Mericüte, que

vayurieni haraveri cusiyari.

<sup>16</sup>Caninuamücü, nivatixütüamücü müme te'üviyamete. Hipame püta nivahuritüamücü yuharaveri. Müme memü'enanacai müpaü meniutiyaane, Xüca müpaü catiuyünique tüma. <sup>17</sup>'Iya vaxeiyaütü müpaü niutayüni, Mericüte, xüca müpaü catiyüni, titayari 'ipaü raine 'ütüarica 'aumü,

Mücü tete memutixani'erie qui vevivamete,

Mücü 'isiquina titutuicame nayani.

<sup>18</sup>Yunaitü mücü tetesie memacaxürieni mepütimurixüani. Que mü'anesie mücaveni, pitaviviexüani.

**Cuviyexunu tuminieya**

(Mateu 21:45-46; 22:15-22;

Maricuxi 12:12-17)

<sup>19</sup>Mericsü 'anatütü müme 'inüaricü memüte'üquitametetücai mara'acate memühiritüariecai yunaitü metenicuvautüvecaitüni que memüte'iviyacü, peru menivamacarücaitüni teüteri müpaü metemaitü, müme müvaxatacaicü mücü 'üxasi hepaüsita ti'üquitatü. <sup>20</sup>Hicü me'itihupienique menivarutanü'ani 'avie nenieremete teüteri heiseriemecü yamemütecahu vahepaü memüyüacai yacü xeicüa. Me'iviyame niuquieyacü meniyeuaniquecaitüni, cuvexunaruri mita'ivaviyacü 'isücametütü. <sup>21</sup>Hicü menicu'ivaviyacaitüni müpaü me'utiyaütü, Ti'üquitame, tame tepütemate 'ecü heiseriemecü pemüticuxatacü, heiseriemecü



pemüti'üquitacü. Yücü pepücativaxeiya teüteri, masi Cacaüyari hueyeya hepaüsita pepüti'üquita que mütivaiyacü. <sup>22</sup>Tamüsü, titauniva temütetatuanicü Sesaxi cuviyexunuyasüa mieme, pücatauniva nusu. <sup>23</sup>Timaitü que memüte'l'irüviyacai, müpäü tinivarutahüave, Titayari xenete'inüatatüve. <sup>24</sup>Tuminiyari xequeneneuxeisitüa. Quepai ramu'u püra'uxa, quepai püra'utüarica. Müme müpäü metenitahüave, Sesaxi mu'uya canihücütüni, 'utüaricaya meta. <sup>25</sup>Müpäü tinivarutahüave, Mericüte tita Sesaxisüa mütimieme, Sesaxi xequetenapinirieca, tita Cacaüyarisüa mütimieme, Cacaüyari xequetenapinirieca. <sup>26</sup>Mepüyutatexi niuquieyasie me'iviyacutü teüteri vahüxie. Mehüxiyatü müya mütivarutahüavixücü cayuvatü meniumacaitüni.

**Que memüte'ita'ivaviyaxü, müquite que memüte'anucu'uni hepaüsita**

(Mateu 22:23-33; Maricuxi 12:18-27)

<sup>27</sup>Mericusü Saruseusixi hipatü meniu'axüani müpäü memutiyuanecai quename müquite meca'anucu'uni. Hicü müme menita'ivaviya, <sup>28</sup>müpäü me'utiyyatü, Ti'üquitame, Muisexi müpäü catiniu'utüani tahesie mieme, tevi xüca masicaya 'umüni neüquetü, xüca türi cavarexeiyani, mücü tevi mutaya canitivitümücü yucue, türi nivativevimücü yumasica nivemama. <sup>29</sup>Mericusü 'atahutatü 'amenititecaütüni

'ivamarixi. Vamasica 'itivitüca 'uca niümüni, türi cavaruhayevaca. <sup>30</sup>Mutaya yaxeicüa tiniuyurieni, tiumü türi cavaruhayevaca. <sup>31</sup>Iyata mutaya hairieca nitivitüni niümüni. Yaxeicüa 'atahutatü yunaitü türi mecavaruhayevaca meniucüni. <sup>32</sup>'Imatüriecata niümüni 'uca. <sup>33</sup>Mericüte, quepaucua xeniu memanucu'uni, 'atahutatü memitivitü, quepai ra'üya pürayani. <sup>34</sup>Hicü Qesusi müpäü tinivarutahüave, Hicü miemete teüteri mepüneneüque mepüviquie. <sup>35</sup>Müme vahesie mütinaque mücü cuie mühecuasie memaye'axüanicü, vahesie mütinaque memanucu'unicü müquite vasata, müme mepücaneneüqueni mepücaviquieca. <sup>36</sup>Mücü meta, 'ana mepücayüvaveni tavari memücinicü, Cacaüyarisüa miemete niuqui tuayamete vahepäü me'anenetü. Masi Cacaüyari nivemama mecanihümetüni, müme memanucu'uni. <sup>37</sup>Müquite que memüte'anucu'uni, müpäüta Muisexi tiniu'üquita, yuxapasie haque tupiriya mexata. Müpäü cananuyüneni, 'Apurahami 'Isahaqui Cacuvu vacacaüyari canihücütüni Ti'aitametütü. <sup>38</sup>'Ayumieme müquite pücaavaxata quename vacacaüyari haitü. Memayeneniere püta vacacaüyari caniyuxatani, sepa memucü. Yunaitü mepayeneniere que mütivaxeiya. <sup>39</sup>Hicü müme 'inüaricü memüte'üquitametetücai hipatü müpäü metenicühüaveni, Ti'üquitame, 'aixüa pepaine. <sup>40</sup>Tavari mepücayuvaüriyacai memita'ivaviyacü.

**Cürisitu quepai püraxiüyari, que  
mütivaruta'ivaviyaxü**

(Mateu 22:41-46; Maricuxi 12:35-37)

<sup>41</sup>Hicü müpäü tinivarutahüave Quesusi, Titayari müpäü mete'utiyuane quename Cürisitu Raviri xiüyarieya hücü. <sup>42</sup>Mücü Raviritütü cuicari xapayarisie müpäü paine,

Ti'aitame müpäü tinitahüave que mü'ane müneti'aitüa, Niserieta quenacani.

<sup>43</sup>'Ahetüapai mexi nevarahapani müme memümasi'aca'unie.

<sup>44</sup>Hicümü Raviritütü Neti'aitüvame tinitaterüva. Mericüte, xüca Cürisitu tita'aitüani Raviri, que timasiücü quename xiüyarieya.

**Quesusi que mütivaxanetacai müme  
'inüaricü memüte'üquitametetücai**

(Mateu 23:1-36; Maricuxi  
12:38-40; Rucaxi 11:37-54)

<sup>45</sup>Mericüsü yunaitü teüteri me'l'eniecacu müpäü tinivarutahüave teyü'üquitüvamate, <sup>46</sup>Xequenyucuerivayurieca müme 'inüaricü memüte'üquitamete vahepäüsita, müme müvanaque 'etütüme me'anacatütü memeu'uvanicü, müme memeunaqui'a vaürisica memüpitiüarienicü quiecarí hixüapa, teüteri vahüxie memüyeyaxecü tuquita, quiecame 'aurie memayaxecü 'ixüararipa, müme vahepäüsita. <sup>47</sup>Müme viyurasixi vapini mepütevarutixütüiri, 'emetehutevitü neneviericü para mücamasiücünicü que memüteyurie. Müme vahesie masi yemecü tinahüivani.

**Viyura tumini que müti'atüiri  
Cacaüyari**

(Maricuxi 12:41-44)

**21** Mericüsü heutaniereca nivaruxeiya xicusixi yu'imiquieri meheucaxürüvame tumini cacuniarisie tuqita. <sup>2</sup>Hicü 'uca tiuxei cünaya mümü tuminicü mümavecai mana heicaxürüvame huta senitavuyari. <sup>3</sup>Müpäü niutayüni, Niuqui caniseüyeni que nemütixecühüave, 'icü viyura tuminicü mavetü cacunisie neicaxürieni vaücava, müme yunaitü 'esiva xeicüa meneicaxürieni. <sup>4</sup>Müme yunaitü yuhayevame meneucaxürieni Cacaüyarisie mieme 'imiquieri. 'Icü 'uca yuhaveri mieme püta neucaxürieni cümana mütiyumicuacai naime.

**Quesusi que mutayü, tuqui 'amüpa  
que mütica'unarieniequecai 'arique**

(Mateu 24:1-2; Maricuxi 13:1-2)

<sup>5</sup>Mericüsü hipatü tuqui 'amüpa hepäüsita metenicuxatacaitüni, que mütiquemaritiüariecai tete visi 'anenemecü mavari visi 'anenemecü. Müpäü niutayüni Quesusi, <sup>6</sup>Xepixeiya 'icü. Tucari canaye'amücü quepaucua tete pücacu'eiriva yuheima 'atetü. Naitü püca'unarieni.

**'Inüarite que mütimasiücüni  
taparirümecacu**

(Mateu 24:3-28; Maricuxi 13:3-23)

<sup>7</sup>Müme müpäü metenita'ivaviya, Ti'üquitame, quepaucua müpäü pütüyüni que pemaine. Tita ti'inüaritüni

quepaucua maye'aximeni.

<sup>8</sup>Hicü müpaü niutayüni,  
Xequeneyucuerivayurica capa  
xeheuyexüriyanicü. Yümüretü  
mecani'axüacuni, quename  
nehesüa memiemete me'utiyuatü,  
Ne necanihücütüni me'utiyuatü,  
Tucari canaye'aniri me'utiyuatü.  
Va'utüma xepücahecüani.

<sup>9</sup>Quepaucua cuyaxi  
xemüva'enieni meyucuitüveme,  
quepaucua xemütetamarieni  
memanucu'uiximecü cuyacü,  
xepüca'atixürüveni maricacü.  
Neuyeveca müpaü mütiyünicü meri,  
peru 'acuxi cuitü pücatapare.

<sup>10</sup>Ana müpaü tinivarutahüave,  
Nuivarite mecaniyeha'acuni  
mevacuicutü hipame nuivarite.  
Xexuime cuieyarisie quiecatari  
mepüyeha'ani hipame cuieyarisie  
miemete mevacuicutü. <sup>11</sup>Cuie  
carima canitayüamücü, xexuime  
quiecariyarisie haca canitavemücü  
vaüca cuiniyata. 'Inüari  
mamarivaveme muyuavisie  
mexeyatü, mecanimariusiecacuni.

<sup>12</sup>Yacatiyüvecacu  
cuxi, mepüxetiviya  
xeme, mepüxe'anuyeveiya.  
Mepüxeyetüani tuquiteta,  
casariyanata xemanutaxüriyanicü.  
Xepanuhapanieüani te'aitamete  
vahüxie 'isücate vahüxie nehesüa  
xemümiemetecü. <sup>13</sup>Müpaü  
xe'itüarieme xecaniyüvavecuni  
xemüthecüatanicü. <sup>14</sup>'Ayumieme  
yu'iyari xequeneseiriyani,  
xetiviyarieme xepücayu'iyaritüaca  
que xemutiyuaneni. <sup>15</sup>Ne  
püta temaivavemete  
necanixe'ayeitüamücü,  
xemütiniunicü. 'Ayumieme

yunaitü memüxe'aye'unie  
mecaniyutatexicuni mexe'a'ivacutü  
mexeniuquimacutü. <sup>16</sup>'Asita  
xe'uquiyarima xe'ivama  
xemarema xehamicuma  
mecanixeyetüacuni. Hipame  
xeme mepüxecuini. <sup>17</sup>Yunaitü  
mecanixe'uxive'eriecacuni nehesüa  
xemümiemetecü. <sup>18</sup>Peru ni xei  
cüpayari pücaheuyeveni xemu'usie  
mieme. <sup>19</sup>Xete'uca'enivatü tucari  
xecaniyupitüacacuni.

<sup>20</sup>Quepaucua xemüvaxeiya  
cuyaxi Querusareme 'aurie  
meyucuxeürieximecacu, 'ana  
müpaü xecatenimaicacuni  
maye'aximecü quepaucua  
'acumavetü mayani. <sup>21</sup>'Ana müme  
Cureya cuieyarisie meme'uvani  
meque'uyuta'unaxüani hürisie.  
Müme quiecarisie memütiteni  
mequevayecüni. Müme yeuta  
meme'uvani mepücaheutahaxüani  
quiecarisie. <sup>22</sup>Mücü tucarisie  
heiseriemecü mepüte'apiniyarieni  
quiecatari, 'ana catinaye'amücü  
naitü que müre'uxa. <sup>23</sup>Xüa  
'ui müme memuhuca müme  
memütesisitüani mücü tucarisie.  
'Uximatüarica canitavemücü  
cuiepa, haxüa canitixuaverimücüta  
'icü teüteri vahepaüsita.  
<sup>24</sup>'Ixiparacü menitacu'ivacuni,  
yunaimme nuivarite vahesüa  
mecananuhapanieacuni vaüriyarica.  
Nuivarite memücatateüterima  
mepütetürücariya Querusaresie  
mexi vatucari cataparive.

#### Yuri Tevi que mütinuani

(Mateu 24:29-35, 42-44; Maricuxi 13:24-37)

<sup>25</sup>'Inüarite pütixuavere tausie  
mesasie xuravesixi vahesie. Cuiepa

meta nuivarite mepü'iyarixitüarieca meyhiverietü, 'asimecatemaitü que memüteyurieni, haramara hamevari que mütiyuane, müpaü meteyumaitü. <sup>26</sup>Maricacü teüteri mepü'amüxüani mehe'erivatü cuipepa memütama que memü'itüarieni. Taheima miemete türüavimete mepütayuitüarienita. <sup>27</sup>'Ana Yuri Tevi que nemütiteva mecanenixeiyacuni haisata ne'acamieme netürücaiyetü cui nexavatütü. <sup>28</sup>Yatisutüarieximecacu xequeneutineniereni 'aixüa xequeteneyumaica. 'Ana paye'aximeni quepaucua xemütixünarieni.

<sup>29</sup>Hicü 'üxasi hepaüsita ticuxatätü tinivaruta'üquitüani müpaü 'utaitü, Xequeneu'ixüari pini ya naime cüyexi. <sup>30</sup>Quepaucua mütixavata, xe'l'ixüarietü yücümana xepütemaica tasüari 'auracacutüca. <sup>31</sup>Xemeta yaxeciüa, quepaucua xemixeiya 'lipäü yüneme, xequetenemaica maye'aximecü Cacaüyari misutüanicü ti'aitatü.

<sup>32</sup>Niuqui caniseüyeni que nemütixecühüave, hicü miemete mepücatixüni mexi ca'aye'ave naitü. <sup>33</sup>Muyuavi cui naitü canitixümücü, peru nenuiqui pücaxüni.

<sup>34</sup>Xequeneyü'üviyani capa xe'iyari 'u'itutuperecü xecu'ixüaratüvecacu xetarüvecacu cuipepa mieme tucaricü xeyu'iyaritüiacacu. Xüca müpaü xeteyuriecaque, 'iya tucari yapaucua püxe'axe <sup>35</sup>viniyaripaü. Mücü tucarisie menita'axiyariecuni yunaitü cuipepa memütama naisarie. <sup>36</sup>Xequenayeneniereni 'aixüa, yuheyemecü xeyunenevietü para xemüyüvavenicü, Yuri Tevi hüxie

xemaye'axüanicü xetavicueme 'uximatüaricasata 'umüramie.

<sup>37</sup>Mericiüsü tucaricü tuqui 'amüpa curaruyarita niuyeicacaitüni ti'üquitatü. Tücaricü vayeyeicatü Huriva Macu'u yemuriyarisie nehupucaitüni. <sup>38</sup>Yunaitü teüteri yuimuana meni'axecaitüni hesüana me'l'enienique tuquipa.

### Que memüte'imieniquecai Quesusi

(Mateu 26:1-5, 14-16; Maricuxi

14:1-2, 10-11; Vani 11:45-53)

**22** Mericiüsü 'ixüarari canahurare quepaucua pa mücacuxanariyarie memücuacai mehe'erivatü Cacaüyari que mütivaruhayevaxü vateüterima. <sup>2</sup>Hicü mara'acate memühüritüariecai müme 'inüaricü memüte'üquitametetücai metenicuvautüvecaitüni que memüte'imieniquecai memüvamacarücaicü teüteri.

<sup>3</sup>Hicü Cauyumarie nivüya Cura 'Isicariütitanaca. Mücü Tamamata Heimana Yuhutame canixevitütücaitüni. <sup>4</sup>Heyaca mara'acate memühüritüariecai vahesüa vacuyaxima vahesüa, metenicuxatacaitüni que mütivayetuirieniquecai. <sup>5</sup>Müme meniyutemamaviecaitüni. Mepuyu'enie müpaü me'utiuyatü quename tumini me'l'üitüaniquecai. <sup>6</sup>Mücü 'iyarieya ya'anecacu tinicuvaunecaitüni quepaucua 'aixüa müyüniqecai müvayetuirienicü teüteri 'ameca'u'uvacacu.

### Ti'aitame 'Icuaia que mütü'aisie 'inüariyari

(Mateu 26:17-29; Maricuxi 14:12-25;

Vani 13:21-30; 1 Curinitutari 11:23-26)

<sup>7</sup>Mericiüsü Pa Mücacuxanariyari tucariyari naye'ani. 'Ana

peuyevcai memüvacuinicü muxasi türixi 'ixüararicü. <sup>8</sup>Hicü Qesusi nivarutanü'ani Pecuru Vanimame müpaü haitü, Xequenehu 'aixüa xequeneyuri 'ixüarari 'icuaiyari, temütecuanicü. <sup>9</sup>Müme müpaü metenitahüave, Haque masihenaque 'aixüa temeiyurienicü. <sup>10</sup>Müpaü tinivarutahüave, Camüsü xeheutahaxüaximecacu quiecarisie 'uqui nixe'anucunaquimücü ye'ü 'ahanatü hecuhanüca. Mücü xequenanuveiya quita haque meuhani. <sup>11</sup>Müpaü xepüteheitaüave muva quiecame, Ti'üquitame müpaü pümarahüave, Hipatüte haqueva qui müme nemütiva'üquitüa nehamatü 'ixüarari 'icuaiyari temücuanicü. <sup>12</sup>Mücü qui taüta xeheutivitüme canixexeisitüamücü hipame qui 'amüyeva naitü 'ureyepicame. Muva 'aixüa xequeteneiyuri. <sup>13</sup>Hicü menecüne, meneitaxeiya que mütivarutahüavixü. Muva 'ixüarari 'icuaiyari 'aixüa meniuyurieni para meme'erivanicü Cacaüyari que mütivaruhayevaxü vateüterima. <sup>14</sup>Hicü 'aye'acu mexa 'aurie nayerüni, nü'arisixi yunaitü. <sup>15</sup>Hicü müpaü tinivarutahüave, Cuini mieme nepihive'ericeai xehamatü 'icü 'ixüarari 'icuaiyari nemücuanicü necaticuinivetü cuxi. <sup>16</sup>Yanepütixecühüave, tavari 'icü nepücacuan mexi ca'aye'ave tita 'ixüarari müti'inüariyari Cacaüyari ti'aitametücacu. <sup>17</sup>Hicü tecüxi 'anuhanaca pamüpariyusi 'ipitüaca Cacaüyari müpaü niutayüni, Xequenanuhani 'icü, yuxexuitü xequenanuti'inüataxüa. <sup>18</sup>Yanepütixecühüave, ni hicü

ni 'uxa'atüni varie tavari nepüca'enu'ieni caxie hayari mexi ca'aye'ave Cacaüyari misütüanicü ti'aitatü. <sup>19</sup>Hicü pa 'anu'üca pamüpariyusi 'ipitüaca Cacaüyari 'ititaraca nivarumini müpaü 'utaitü, 'Icü caninevaiyaritüni xehesie mieme müyetuiyani. 'Ipaü xequeteneiyurieca xemünesi'a'erivanicü. <sup>20</sup>Yaxeicüa tiniuyurieni tecüxi hepaüsita mete'ucuacu müpaü 'utaitü, 'Icü tecüxita mieme türatu hecume canihücütüni nexuriyacü, müseiriyarieni xehesie mieme que mütitayeyuriani.

<sup>21</sup>Perusü que mü'ane munesiyetüani 'ena paca, mamaya mexasie pama haque nemaca. <sup>22</sup>Yuri Tevi que nemütiteva, necaniyemieni nemümierienicü, que müti'aisie yamütüyünicü, perusü xüa 'ui que mü'ane munesiyetüani.

<sup>23</sup>Müme menisütüani niuqui mexüatüatü que mü'ane müme müxatacai quename müya tiyurieniquecai 'utaitü.

**Ti'uximayatü hipame vahesie mieme, ve'eme que mürayani**

<sup>24</sup>Anata müme me'ütesatü menayu'iva que mü'ane müme masi müve'emetücai. <sup>25</sup>'Iya müpaü tinivarutahüave, Nuivarite teva'aitüvamate meteniva'uxitüaca mete'aitatü, müme heiserie memexeiya vahepaüsita quename 'aixüa meteyuruvamate meteniyuterüvani. <sup>26</sup>Xeme püta müpaü xepücayüaca. Masi que mü'ane xeme müve'eme, mücü que mü'ane masi mühecuapaü

queyüaneni. Que mü'ane mütixe'aitüa, mücü que mü'ane xehesie mieme müti'uximayapaü queyüaneni. <sup>27</sup>Que xetecu'eriva, que mü'ane masi püve'eme, que mü'ane quiecametütü müticua'a, que mü'ane miparevie timicuatü, mücü nusu püve'eme. Xiäri quiecame masi püve'eme. Perusü ne xesata nepuyeica xehesie mieme neti'uximayatü püta.

<sup>28</sup>Xeme nehesisie xecateniviyacaitüni xecatehayevatü ne'inüasienecacu. <sup>29</sup>Ne'luquiyari que münetiucaye ti'aitame nemayanicü, neta yaxecüa te'aitamete necanixecayasamücü. <sup>30</sup>Nehamatü xecatenicuaicuni xeteni'iecuni mexa 'aurie ne'acaime neti'aitametüacu. 'Isücate xecanacünicuni, 'uvenisie xe'ayaheme xecateniva'aitüacacuni teüteri tamamata heimana yuhutame nuivarite 'Ixaherisie memüyecü.

**Quesusi que mutayü, Pecuru que mütiyucu'imavaniquecai, quename ca'imaicai 'utaitü**

(*Mateu 26:31-35; Maricuxi 14:27-31; Vani 13:36-38*)

<sup>31</sup>Neuxei Simuni, yumarima 'aixüa. Cauyumarie püxevaucái, püxeta'iniäta, püxeticase türicupaü. <sup>32</sup>Ne masi nepünetanenevie 'ahesie mieme pemücatihayevacü yuri peti'erietü. 'Ecüta quepaucua pemüthayeva peheuyevasetü quenivatuicani 'a'ivama. <sup>33</sup>Mücü müpaü tinitahüave, Ti'aitame, nepünevauriya 'ahesie nemütiviyanicü sepa nemanutahüiyani sepa nemumierieni. <sup>34</sup>Rehüave, Pecuru

'acu, müpaü nepümaticühüave, vacana catahivavecacu cuxi hicü, 'ecü haicacüa pecani'acu'imavamücü, quename pecanesimate pe'utaitü.

**Que mutayü 'aye'aximecacu**

<sup>35</sup>Hicü müpaü tinivarutahüave, Quepaucua nemüxeheutanü'axüa cüsüri xerai cacai xecate'upicame, tixaü xeteheuyehüacai 'acu. Müme Tixaüsü meniutiyuani. <sup>36</sup>Müpaü tinivarutahüave, Hicüsü püta müpaü pücatiyüni. Que mü'ane cüsüri mexeiya queheihurieni, xerai meta yaxecüa. Que mü'ane mücaheixeiya cuya cusiraya yü'ücarí que'utuani que'inaneni. <sup>37</sup>Yanepütixecühüave, peuyevese nehesisie maye'atüarienicü müpaü que müre'uxa, 'Inüari niuquiyari sanamete vahepaü niu'itüarieni que müranuyüne. Naitü nehapaüsita que müre'uxa canaye'atüarieximeni. <sup>38</sup>Hicü müme müpaü meniutiyuani, Ti'aitame, neuxei cusirate 'uva hutatü. 'Ariri, tinivacühüaveni.

**Quesusi que mütiyutanenevie Quetisemanisie**

(*Mateu 26:36-46; Maricuxi 14:32-42*)

<sup>39</sup>Mericüsü vayeyaca neyani haque me'axecai Huriva Macu'u yemuriyarisie. Teyü'üquitüvamete meniveiyacaitüni. <sup>40</sup>Hicü muva heta'aca müpaü tinivarutahüave, Xequeneyunenevieca, capa xe'uta'isiparienicü. <sup>41</sup>Hicü yuxaüta yerümütü yateva niuyani memanucateisie tete que mürehüiva yacütütü. 'Utitunumaqueca niyutanenevieneni <sup>42</sup>müpaü 'utaitü, Ne'luquiyari, xüca pe'avaüriyani,

'icü tecüxi quenanhani cuerietü yanemüca'itüarienicü. Masi que münetinaque ne pücatixaü, que matinaque 'ecü püta yaquetiuyüni. <sup>43</sup>Hicü niuqui tuayame masiücütü nayuyeitüani taheima mieme 'itürüariyatü, nixeiya. <sup>44</sup>Hicü cui yüanetü hivericacü, masi cuini mieme yutatuatü niyuneneviecaitüni. Cuaxiyaya xuriya suniriyaripaü cani'anenecaitüni cuiepa caxürüvetü.

<sup>45</sup>Merücüsü yutanenevieca 'anucuqueca teyü'üquitüvamate vahesüa nuaca mana nivarutaxeiya mecusume hivericacü. <sup>46</sup>Müpaü tinivarutahüave, Titayari xetecusu. Xequenanucu'uti xequeneyunenevieca capa xe'uta'isiparienicü.

#### **Quesusi que mütiuyiyarie**

*(Mateu 26:47-56; Maricuxi 14:43-50; Vani 18:2-11)*

<sup>47</sup>Merücüsü 'utaniucacacu cuxi yumüiretü teüteri meniu'axüani. Xevitü nivaravitücücaitüni Tamamata Heimana Yuhutame vahesie miemetütü Cura titevatü. Quesusi 'aurie niutaqueni 'i'isenique. <sup>48</sup>Peru Quesusi müpaü tinitahüave, Cura, penesi'iseme penetiyetüani Yuri Tevi que nemütiteva. <sup>49</sup>Teüterimama metemarietü que mütiyüni quecaitü müpaü meniutiyuani, Ti'aitame, tacusiracü tetetacuini. <sup>50</sup>Xevitü müme nicuva tevi mara'acame mühürütüariyecaisüa mieme müti'uximayatametücai. Nacaya naviteni serietana mieme. <sup>51</sup>Peru Quesusi müpaü niutayüni, 'Ari

xequeteneuhayeva. 'Imayüaca nacaya nenayehüani. <sup>52</sup>Hicü Quesusi müpaü tinivarutahüave mara'acate memühürütüariyecai cuyaxi tuquipa miemete 'uquiravesixi memeyecü me'iviyaque, Cari xepeyecü cusirate cüyexi xe'u'ütü xenesiviyaque, tinavayamepaü que mütiviviyarüva. <sup>53</sup>Tucaricü xehesüa ne'uyeicacacu tuquipa xepücanesi'umayüa. Peru 'icü xetucari canihücütüni yamütüyünicü, Yüvicame heiserie pexeiya hicü.

#### **Pecuru que mütiyucu'imavacai, Nepüca'imate Quesusi 'utaitü**

*(Mateu 26:57-58, 69-75; Maricuxi 14:53-54, 66-72; Vani 18:12-18, 25-27)*

<sup>54</sup>Merücüsü me'iviyaca meneivitüni. Mara'acame mühürütüariyecai quita meni'atüani. Pecuru yateva niveiyacaitüni. <sup>55</sup>Tacua hixüapa me'utinaicu me'utiyaxecu Pecuruta niutayerüni va'aurie. <sup>56</sup>Hicü xevitü 'üimari mana müti'uximayacai 'ixeiya hecüaripa 'ucaime 'ixeiyatü müpaü niutayüni, Cari 'icüta hamatüana niuyeicacaitüni. <sup>57</sup>Mücü niyucu'imavacaitüni müpaü 'utaitü, 'Uca 'acu, nepüca'imate. <sup>58</sup>Yareutevitüta xevitü 'ixeiya müpaü tiutayü, 'Ecüsü xevitü müme pecanihücütüni. Pecuru müpaü tiutayü, Que cüxipa ne nepücahücü. <sup>59</sup>Hicü xei hurayari 'aye'acu yacütüniquetü xevitüta heiseriemecü müpaü niutayüni, Masi 'icü hamatüana niuyeicacaitüni, pücarereyatanaca. <sup>60</sup>Pecuru raine, Quetütüri, ne 'asinepücatimate que pemaine.

Yapaucua haniucacacu cuxi vacana niutahiva. <sup>61</sup>Ti'aitame ta'aurie 'aveca neutaniere Pecuru xeiyatü. Hicü Pecuru Ti'aitame niuquieya na'erivacaitüni que mütitahüavixü, Vacana catahivavecacu cuxi hicü, 'ecü haicaciä pepü'acu'imavani quename pecanesimate pe'utaitü. <sup>62</sup>Vayeyaca niutasuani cui yuhiverietü.

**Quesusi que mütinanaimariecai que müticuveivacai**

*(Mateu 26:67-68; Maricuxi 14:65)*

<sup>63</sup>Hicü 'uquisi

Quesusi memü'üviyacai meninanaimacaitüni. Menicuvayacaitüni. <sup>64</sup>Meheitinaca menicu'ivaviyacaitüni yame'utiyuatü, Cari Cacaüyarisüa mieme pepütixaxatame. Quetaneutaxatüa, quepaicü masicuvaya. <sup>65</sup>Vaüca masi metenicühüavecaitüni 'axa me'utiyuatü.

**Quesusi que mütiutahüavarie 'isücate vahüxie**

*(Mateu 26:59-66; Maricuxi 14:55-64; Vani 18:19-24)*

<sup>66</sup>Mericsü 'ucatarecu

teüteri va'uquiyarima meniyucuxeürieni mara'acate memühürütüariecai mümeta 'inüaricü memüte'üquitametetücai. Meni'atüani memayuxeüriecaisie. <sup>67</sup>Müpaü metenitahüave, Que mü'ane heiserie mupitüarie xüca pehücütüni 'ecü pecürisitütütü, yaquetatineutahüavi. Müpaü tinivaruta'eiya, Xüca yanetixehahüavenique yuri xepücaneteta'eririeniqueyu.

<sup>68</sup>Xüca nexecu'ivaviyanique xepücanesiha'eiyaniqueyu, xepücanesixünaqueyu. <sup>69</sup>Peru hicüri 'uxa'atünita Yuri Tevi que nemütiteva Cacaüyari mütürücaüye serieta nepacani. <sup>70</sup>Yunaitü müpaü metenicühüaveni, 'A, 'ecü xeniu Cacaüyari petinu'aya. Tivarahüave, Xeme müpaü xeputiyua, ne nepühücü. <sup>71</sup>Müpaü meniutiyuani, Que cuxi tetevareuyehüva tehecüatamete. Tamesietü tepi'eni tetana mieme.

**Quesusi que mütiutahüavarie Piratu hüxie**

*(Mateu 27:1-2, 11-14; Maricuxi 15:1-5; Vani 18:28-38)*

**23** Hicü yunaitü mepanucu'ui meneihana müta'ivaviyarienicü Piratusüa. <sup>2</sup>'Ana menisütüani me'ixanetatü müpaü me'utiyuatü, Te'licu'ivaviyatü 'ipäu tecatenimaica, cuamanarica vevietü tiniva'üquitüaca tateüterima, nivanenaca memücateyutuanicü Sesaxi cuviyexunuya tuminieya, müpaü canaineni quename heiserie 'upitüarie Cürisitütütü, ti'aitame yuxatatü. <sup>3</sup>Hicü Piratu müpaü tinita'ivaviya, 'Ecü Huriyusixi teüteriyari tiva'aitüvame petihücü. Tita'ei, 'Ecüsü müpaü pecanaineni. <sup>4</sup>Hicü Piratu müpaü tinivarutahüave mara'acate memühürütüariecai, teüteri memüyucuxeürie, Que nemütimate, tixaü pücareuyevese 'icü tevi müxanesiecacü. <sup>5</sup>Müme masi cuini mieme menicu'imagacaitüni yame'utiyuatü, Canivaxamurienei teüteri, ti'üquitatü naisarie Cureya



cuieyarisie, Carereya cuieyarisie  
heisütüaca 'uvapaita.

**Quesusi que mütiutahüavarie  
Herurexi hüxie**

<sup>6</sup>Mericsü Piratu 'u'enaca  
nicu'ivavacaitüni xüca  
Carereyatanaca hücütücaitüni  
tevi. <sup>7</sup>TiutamariECA  
Herurexi mehürütüaricEcaisE  
müquiecametücaicü,  
hesüana neinü'ani, Herurexi  
Querusaresie muyeicacaicü  
'ana. <sup>8</sup>Mericsü Herurexi Qesusi  
xeiyatü niyutemaviecaitüni  
vaüca. Müixa nixeyamücücaitüni  
mü'enacaicü hepaüsitana. Müpäü  
tinicu'erivacaitüni, Qesusi  
tixaütü mütiyurieniquecaicü  
'inüari, 'ixeyamütü. <sup>9</sup>Vaüca  
niuqui nicu'ivaviyacaitüni, 'iya  
'asicare'eiyacacu. <sup>10</sup>Peru mara'acate  
memühürütüaricEca müme  
'inüaricü memüte'üquitametetücai  
yunaitü mecaniu'axüani,  
carima menixanetacaitüni.  
<sup>11</sup>'Ana Herurexi yucuyaxima  
vahamatü menitave'eriecaitüni  
me'inanaimatü. 'Ixuriqui visi  
mü'anicü me'itiquemaritüaca  
tavari meneinü'ani Piratusüa.  
<sup>12</sup>Mücü tucarisie Herurexi  
Piratu meniyutemaviecaitüni.  
Mepayuca'uniecai müixa, 'anaque  
'aixüa mepüteyuxeyacai.

**'Isücame que mütiuta'aitaxü, Qesusi  
mümierenicü**

*(Mateu 27:15-26; Maricuxi  
15:6-15; Vani 18:39-19:16)*

<sup>13</sup>Hicü Piratu varucuxeüricea  
mara'acate memühürütüaricEca  
'isücate teüteri yunaime, <sup>14</sup>müpäü

tinivarutahüave, Nehesüa xepi'atüa  
'icü tevi, quename cuamanarica  
vevietü tiva'üquitüa teüteri  
xe'utiyuatü. Camü, xehüxie  
ne'ita'ivaviyaca ne, que nemütimate,  
tixaü pücareuyevese 'icü tevisie  
mürahüiyanicü que xemüte'ixaneta.  
<sup>15</sup>Herurexita yaxecüa niutayüni,  
nexe'utanü'acu hesüana tavari  
nehesüa caneyenü'aniri.  
'Asipücatiyuri hesiena  
mütinaquenicü mümierenicü.  
<sup>16</sup>'Ayumieme nepütita'aita  
mücuveyaxüanicü, 'arique  
nepixüna.

<sup>17</sup>Mericsü 'ixüararipa  
neuyevecaitüni xeime  
müvaxünirienicü 'anutahüiyacame.  
<sup>18</sup>'Ana yunaitü 'axeicüa  
meniutihiva müpäü me'utiyuatü,  
Quenemi'a 'icü, quetaneuxüniri  
Vaxavaxi püta. <sup>19</sup>Mücü  
müyumienecaicü quiecarisie,  
xeime mumericü, casariyanata  
nanutahüiyacaitüni. <sup>20</sup>Piratu tavari  
nivarutahüave, Qesusi xünamütü.  
<sup>21</sup>Müme masi meniutihivacaitüni  
müpäü me'utiyuatü, Curuxisie  
quenecavi, quenemi'a. <sup>22</sup>Hairieca  
müpäü tinivarutahüave,  
Titayaricutaxi, quecuta tiuyuri  
'icü. Que nemütimate ne, tixaü  
pücareuyevese mümierenicü.  
'Ayumieme cuveyaxüayu  
nepixüna. <sup>23</sup>Müme masi carima  
menivaviricaitüni curuxisie  
mümierenicü. Teüteri, mara'acate  
memühürütüaricEca hivaricü  
mene'iva. <sup>24</sup>Hicü Piratu müpäü  
tiniuta'aita yamütiyünicü que  
memüte'ivautüvecEca müme.  
<sup>25</sup>Nixüna que mü'ane memüvaucEca,  
que mü'ane manutahüiyacai

casariyanata müyumienecaicü  
xeime mumicü, Quesusi püta  
neyetuanı yamüranayeyanicü que  
mütivanaquecai.

**Quesusi que mütiucaviya curuxisie,  
que mütiümierie**

*(Mateu 27:32-44; Maricuxi  
15:21-32; Vani 19:17-27)*

<sup>26</sup>Mericsü mehevitütü  
me'ımienique, meniviya xeime  
Simuni titevacame Sirenetanaca.  
Mücü xaısie heyeyaca, quiecarisie  
ni'aximecaıtüni. Menititütüani  
curuxi Quesusi 'utüma menütünicü.

<sup>27</sup>'Ana yumüretü teüteri  
meniveiyacıtüni, 'ucari meta  
me'utisuatü me'isuariviyatü.

<sup>28</sup>Hicü ta'aurie 'aveca müpaü  
Quesusi tinivarutahüave,  
Xeme 'ucari Querusaremetari  
xepüca'utisuanani nehepaüsita.  
Yuhepaüsita püta yunivema  
vahepaüsita xequeneutisuanani.

<sup>29</sup>Tucari canaye'amücü quepaucua  
müpaü memutiyaneni,  
müme memücayüvave türi  
memüvarexeıyanicü, müme  
'aixüa mepü'itüarie, müme  
memücatınivevave müme  
memücatesisitüavave, 'aixüa  
mepü'itüarie müme. <sup>30</sup>'Anari  
menisütüacuni müpaü  
mete'icühüavetü hürı, Taheıma  
quenacaxürı, müpaüta  
metenivatahüavicuni yemurite,  
Xequetaneuti'avıeta. <sup>31</sup>Hicüpaü  
xüca meteyurieni cüye yurıcacu,  
quesü tiyüni tavayü.

<sup>32</sup>Hıpatüta yuhutatü mepehapanie  
'axa teyuruvamete memücüi'ıvacü  
hepaüna. <sup>33</sup>Mericsü quepaucua  
memu'axüa Müqı Mu'uya Manuve

müracutevasie, mana curuxisie  
menitivieni. 'Axa teyuruvameteta  
menıvarutıvütüanı, serietana xeime  
'utatanata xeime. <sup>34</sup>Hicü Quesusi  
müpaü niıtayüni, Ne'lquiyari,  
quetınıvareuyehüvirieca.

'Asımeıpücatemate que memüteyurie.

'Ana cuyaxi meniyuta'ıva  
'ıxurıquıteya meyutahurıtüanıque.

<sup>35</sup>Teüteri mana meniti'ucıtüni  
metanenıeretü. 'İsücate  
menıtave'eriecaıtüni müpaü  
me'utiıyatü, Hıpame niu  
püvavıcueısıtüacai, yücümana  
queyutavıcueısıtüanı xüca 'acu  
hücütüni que mü'ane Cacaıyari  
heıserie mıpitüa Cürısıtutüme,  
que mü'ane manayexeıyarıe xüca  
hücütüni 'icü.

<sup>36</sup>Cuyaxıta yaxıeıcüa  
meninanaımacıtüni me'axetü  
masına me'l'ıtıatü <sup>37</sup>müpaü  
me'utiıyatü, 'Ecü Hurıyusıxı  
tıva'ıtıvame xüca pehücütüni,  
quene'atavıcueısıtüa. <sup>38</sup>Mücü  
meta, xapa mu'uya heıma  
meneımanı, 'ICÜ HURıYUSıXı  
TıVA'AITÜVAME CANıHÜCÜTÜNı  
'anıyüneme Cürıyecusıxı  
Xumatari Hepürayusıxı teüterıyarı  
vanıuquıcü 'aye'uxame.

<sup>39</sup>Hicü 'axa teyuruvamete  
mana memütıvıcaı xevıtü 'axa  
tınicühüavecaıtüni, müpaü  
'utaitü, Cari 'ecü pecatıcürısıtü.  
Merıcüte, quene'atavıcueısıtüa,  
tameta quetaneutavıcueısıtüa,  
tıcühüavetü. <sup>40</sup>Xevıtü püta tapa  
mutıvıecai nitatıeni müpaü 'utaitü,  
Cari 'ecü Cacaıyari pecatımacaxe  
sepa hepaüna pemü'ıtıarıene  
yaxıeıcüa petıutahüavarıeıca. <sup>41</sup>Peru  
canıheıserıetüni tahesıe que

mütiunaquixü, que müreyevese  
xeicüa tepü'itüarietüve  
yatemüteyuriecaicü. 'Icü masi  
tixaü 'asipücatiyurieve. <sup>42</sup>Müpaü  
niutayüni, Quesusi 'acu,  
quenena'erivani quepauca  
pemunuani ti'aitame pehücütütü.  
<sup>43</sup>Hicü Quesusi müpaü tinitahüave,  
Niuqui caniseüeni que  
nematicühüave, hicütütü nehesüa  
pepeyeicani visi müracu'anesie.

#### Quesusi que mütiyetua yu'iyari

(Mateu 27:45-56; Maricuxi  
15:33-41; Vani 19:28-30)

<sup>44</sup>Mericsü tuca naye'ani. Mana  
cuiepa nacuyüre naisarie cüa  
caviecaque. <sup>45</sup>Tau 'uyürecu  
'ixuriqui meuviecai tuqui 'amüpata  
hixüata nisane. <sup>46</sup>Hicü Quesusi  
carima 'utahivaca müpaü niutayüni,  
Ne'uquiyari, ne'iyari nepümasihüritüa.  
Müpaü 'utayüca yu'iyari niyetuani.

<sup>47</sup>Hicü cüya mühüritüariecai  
'unierca que mütiuyü 'aixüa  
niutayüni Cacaüyari hepaüsita  
müpaü 'utaitü, Xüari 'icü tevi  
heiserie pexeyacai. <sup>48</sup>Yunaitü  
teüteri menenierenique  
memüyucuxeürie, me'unenierca  
que mütiuyü, yu'utüma menecüne  
yutavisie meyucusunatü hivericacü.  
<sup>49</sup>Peru yunaitü memimaicai mana  
meniti'ucaitüni yateva. 'Ucari meta  
hamatüana memeyecü Carereyasie,  
müme mana meniti'ucaitüni  
menenieretü.

#### Quesusi que mütiuteuqui

(Mateu 27:57-61; Maricuxi  
15:42-47; Vani 19:38-42)

<sup>50-51</sup>Mericsü tevi  
'aniyeicacaitüni Cuse titevatü.

'Isücate canixevitütücaitüni, 'aixüa  
pütiuca'iyaricai heiseriemecü  
yapüticamiecai. Mücü  
yapüca'anecai que memüteyu'eni  
que memüte'uyuri. 'Arimateya  
caniquiecametücaitüni Cureya  
cuieyarisie, yuri tini'eriecaitüni  
ta'licuevatü Cacaüyari misutüanicü  
ti'aitatü. <sup>52</sup>Hicü Piratusüa nuaca  
nitavavirieni Quesusi caxarieya.  
<sup>53</sup>Hecacueca nicu'eima rinu  
'ixuriquiyaricü, neicuteucu  
teuquiyapa 'aitüa müvaye'inieriesie  
haque tevi hasuacu  
mücaheutatequievesie. <sup>54</sup>Mericsü  
püpienixitücai 'ana, 'uxiüya tucari  
püsütüariximecai.

<sup>55</sup>Meneiveiya 'ucari Carereyasie  
memeyecü 'utümana. Menixeiya  
teuquiya, caxarieya mete'uxei  
que mütiuteque. <sup>56</sup>Yu'utüma  
mehecüneca 'aixüa meniyurieni visi  
mu'üa mixaxi nücame 'uhaye.

Mericsü 'uxiüya tucarisie  
mecani'uxiüpiecaitüni 'aisica que  
maine.

#### Que müranutanierixü 'umierieca

(Mateu 28:1-10; Maricuxi  
16:1-8; Vani 20:1-10)

**24** Perusü ximeri cuitü,  
teuquiyapa meniu'axüani  
semana mexüacame tucarisie visi  
mu'üa me'ahapatü memicuxeüri.  
<sup>2</sup>Hicü tete meniutaxeiya  
heuhüiyacame quitenie meucatei.  
<sup>3</sup>Umeheutahaxüaca teuquiyapa,  
mepüca'itaxe'i Ti'aitame Quesusi  
caxarieya. <sup>4</sup>Asimepücatemaicai  
que memüteyurieniquecai müpaü  
mütiuyücü. Hicü 'uquisi yuhutatü  
va'aurie meniuti'uni merücavime  
me'anacatütü. <sup>5</sup>Memamacacu

cuiepa metihüxima'ucacu müpaü metenivarutahüave, Titayari müquite vasata xete'ivautüve mücü mayeyuri. <sup>6</sup>'Uva pücayecä, cananucuquetüarieni püta. Xequena'erivani que mütxe'utahüavixü Carereyasie 'uyeicatü cuxi, <sup>7</sup>que xemüte'utahüavarie Yuri Tevi hepaüsita, que müreyevecai müyetuiyanicü 'axa teyuruvamete memiviyacü, curuxisie mümierenicü, hairieca tucarisie manucquenicü que müreyevecai. <sup>8</sup>'Ana mene'erivani niuquieya. <sup>9</sup>Hicü teuquiyapa mevayecüneca menecüne. 'Icü naime metenivarutaxatüani Tamamata Heimana Xeime, hipameta yunaime. <sup>10</sup>'Ucari Mariya Mararatanaca, Vana, Mariya Cacuvu müvarusieyatücai metenitetevacaitüni. Hipatüta vahamatü memü'uvacai 'ucari yunaitü yametenivarutaxatüani nü'arisixi. <sup>11</sup>Peru müme yacü me'utiuyaneme meni'eriecaitüni metecuxatacacu, yuri mepücatevaruta'eriri.

<sup>12</sup>Perusü Pecuru caneyani teuquiyapa 'unausarümetü. 'Anahuca nixeiya 'ixuriqui mana 'acateme 'uyemaveme. Yuquie neyani vaüca 'iyarixietü que mütiunierixü hepaüsita.

**Que memüte'ixei, 'Emau huyeyari  
'utüa me'uyehutü**

*(Maricuxi 16:12-13)*

<sup>13</sup>Mericsü mücü tucarisie yuhutatü müme huyeta menecüne, quiecarisie meneta'axüaniquecaitüni 'Emau

müracutevasie. Querusareme nehuracaitüni, yanetevacaitüni tamamata heimana huta quirumeturuyari xeciä. <sup>14</sup>Metenicuxatacaitüni naitü que mütiuyü hepaüsita. <sup>15</sup>Mericsü metecuxatacacu niuqui mexüatüacacu Qesusitütü nivaranucu'axe me'uhucacu. Vahamatü niemiecaitüni. <sup>16</sup>Mepücapitüariecai memeitimanicü. <sup>17</sup>Müpaü tinivarutahüave, Que titita 'icü niuqui xemüxatüa xe'uhutü. Titayari xeteyuhiverie. Müme mana meniuti'uni me'ayexüxünitü yühüxie. <sup>18</sup>Xevitü müme Cüreupaxi mütitevacai müpaü tinitahüave, Cari 'ecü 'asipepücatimate Querusareme que müreyü tacai 'atu. 'Asita cücamete müpaü mepütemate. <sup>19</sup>Iya müpaü tinivacühüaveni, Que reyücuta. Müme müpaü mete'itahüavixü, Qesusi Nasaretitanaca, que müranayetüa pecatimate. Mücü 'uqui Cacaüyarisie mieme catinixaxatametücaitüni. Que mütiyurienecai que müticuxatacai, canitürücaüyecaitüni Cacaüyari hüxie yunaime teüteri vahüxie. <sup>20</sup>Tamara'acate memühüritüarie ta'isücateta meniyetuani hesiena mürahüiyanicü mümierenicü, 'arique curuxisie mepeimie. <sup>21</sup>Tamesietü tecanita'icuevacaitüni yuri tete'erietü 'iya mühücütücaicü que mü'ane mütasitixünaquecai 'Ixaherisixi teüteriyari. Mücü meta, haica tucari caniyuriecari hicü, müya reyücu. <sup>22</sup>Süricüte, 'ucari tasata miemete mepütasihüxiyatüa hicü.

Ximeri vaniu menecucünixüani teuquiyapa, <sup>23</sup>peru caxarieya mepücahexei. Meniu'axüani müpäü me'utiyuatü quename niuqui tuayamete mevarexei meteheinüme meyu'erietü. Müme vaniu quename Quesusi 'ayeyuri metenivaretahüave. <sup>24</sup>'Ana hipatüta tahamatü memü'uva teuquiyapa menecüne. 'Ucari que memaitücatei, müpäü 'aneme mepetaxei, peru Quesusi mepücahexei. <sup>25</sup>Hicü Quesusi müpäü tinivarutahüave, Cari 'asixepücatemate, yu'iyarisie xepu'itutupe, 'acuxi yuri xepücateta'erivave texaxatamete que memütecuxatacaisie naime. <sup>26</sup>Careyuevecai Cürisitu müpäü müticuinecü, 'arique mücaque visi 'anetü carayaniquecai. <sup>27</sup>'Ana Muisexi xapaya xatatü meri yunaimete texaxatamete vaxapa xatatü, nisütüani tivahecüasitüiyatü que müre'ucai hepaüsitanana naime 'utüaricasie.

<sup>28</sup>Mericiüsü quiecarri haque memeta'axüaniquecai meneta'axüani. 'Iya masi teva niumiecaitüni. <sup>29</sup>Müme cuini mieme meni'iniecaitüni müpäü me'utiyuatü, Tahamatü quene'ahayeva, 'esivatücacu putaicai pacayunirüme. Hicü muva neutahani vahamatü müyuhayevacü. <sup>30</sup>Hicü vahamatü 'ayerüca mexa 'aurie, 'enu'üca pa, 'aixüa niutayüni Cacaüyari hepaüsita pa hepaüsita. 'Ititaraca nivarumini. <sup>31</sup>'Ana vahüxie canenarietü nayani, meneitimani. 'Iya masi camasiücütü nayuyeyitüani tavarri memüca'ixeyiacü. <sup>32</sup>Hicü müpäü metenyücühüavecaitüni,

'E'e, 'ayumieme ta'iyarisie cuini mieme tepütayetuacai mexi taticuxaxatüvacai huyeta te'uhucacu, mexi tasihecüasitüiyacai 'utüarica que maine.

<sup>33</sup>Hicü me'anucu'uca cuitü, Querusareme menecüne yu'utüma. Tamamata Heimana Xeime hipameta menivaretaxeyia meyuxeüriecame. <sup>34</sup>Müme müpäü meniutiyuanecaitüni, Caniyuritüni, Ti'aitame panucuque. Masiücütü nayuyeyitüani Simuni 'ixeyiacacu. <sup>35</sup>Mümeta metenivarutaxatüani huyeta que müreyü, que memüteheitima pa 'utitaracu.

**Quesusi masiücütü que  
mürayuyeyitüa teyü'üquitüvamete  
memixeyiacü**

*(Mateu 28:16-20; Maricuxi  
16:14-18; Vani 20:19-23)*

<sup>36</sup>Mericiüsü metecuxatacacu cuxi, 'iya vahixüata niutaqueni. Müpäü niutayüni, 'Aixüa 'acu. <sup>37</sup>Müme meniutimamani, müqui mexeyiame meyu'erietü. <sup>38</sup>Mücüsü müpäü tinivarutahüave, Titayari xeteyuxamurie. Titayari xete'isütüa niuqui xexüatüatü yu'iyarisie. <sup>39</sup>Xequeneu'ixüari nemamate ne'ücate, ne necanihücütüni. Xequeneneumayüa xequeneneuxeyia. 'Iyari 'ume pücahexeyia vai pücahexeyia nehapäü. <sup>40</sup>Müpäü 'utayüca yumamate yü'ücate nivaruxeisitüani. <sup>41</sup>Meyutemamavietü mehüxiyatü, cayuri mepü'eriecai cuxi. Hicü müpäü tinivarutahüave, Tixaü xecatehexeyia 'uva ticuavame.

<sup>42</sup>Qesü vaiyari menimini variquime texicamame. <sup>43</sup>'Enu'üca nitacuani vahüxie. <sup>44</sup>Mericsü müpaü tinivarutahüave, 'Icü niuqui necanixecuxaxatüvacaitüni xehamatü ne'uyeicatü cuxi, müpaü ne'utaitü quename heuyevecai maye'atüarienicü naitü nehepaüsita que müre'uxa Muisexi 'iniüarieya niuquiyarisie texaxatamete vaxapasie cuicari xapayarisie ne'utaitü. <sup>45</sup>'Ana va'iyari nivatiyepieni memeitimanicü tita 'utüarica xapayari mütixatacai. <sup>46</sup>Müpaüta tinivarutahüave, Müpaü püre'uxa, que müreuyevecai Cürisitu nehücütütü müya netinicuinequecaitüni, hairieca tucarisie nenanucuqueniequecaitüni müquite vasata. <sup>47</sup>Mücü meta, yunaitü nuivarite müpaü mecatenitahüavariyecuni, xüca xetehayeva que xemüteyuriecäi, xenesihahüavetü que mü'ane nemühücü, xepüteheuyehüviyarieni 'axa xemüte'uyuricü. Querusareme meri, 'ariqueta

xaüsie yacatinicuxaxasivamücü. <sup>48</sup>Xeme xecanihümetüni xemunenierixü xemihecüata 'icü que mütiuyü hepaüsita. <sup>49</sup>Ne meta nepütixehanü'airieni tita ne'uquiyari mürainecai mütixeminiquecaicü. Xeme quiecarisie xequeneyuhayevani tucari 'aye'ayuque quepaucua türücariya xemüpitüarieni taheima mieme, 'anaque xepüvayecüne.

#### Que müranutitüa

(*Maricuxi 16:19-20*)

<sup>50</sup>Hicü nivarayevitüni Vetaniya 'aurie. Yumama teicü heseratü niutaniuni 'aixüa memü'itüarienicü. <sup>51</sup>Mexi müpaü 'utaniucacai vahesüa nayeyani, muyuavisie nanutivitüquieni. <sup>52</sup>Müme nenevieri me'ipitüaca Querusareme menecüne cuini mieme meyutemamavietü. <sup>53</sup>Tucaricü tuqui curaruyarita meniu'uvacaitüni 'aixüa me'utiyuatü Cacaüyari hepaüsita. Müpaü xeicüa cani'aneni.

# VANI

## Niuqui 'Aixüa Manuyüne Que Mütiu'üxasitacai

---

### Niuqui tevi que müratüa

**1** Sutüapai niuqui caniyüanecaitüni. Niuqui niteütacaitüni Cacaüyari. Canicacaüyaritücaitüni niuquitütü. <sup>2</sup>Mücütütü niuqui sutüapai Cacaüyari niteütacaitüni. <sup>3</sup>Naitü tiniuneni mücü 'inetüacu. Xüca mücü ca'inetüanique, pücaneniqueyu ni xevitü. <sup>4</sup>Mücüsüa tucari canixuavecaitüni. Tucari teüteri vahecüariviyame canihücütücaitüni. <sup>5</sup>Hecüariya yüvipa nihecüariyani, yüriya pücahe'ivave. <sup>6</sup>Mericüsü tevi Cacaüyari meiyenü'a 'anicateitüni Vani titevatü. <sup>7</sup>Mücü titahecüataque caninuani, hecüariya hepaüsita mütitahecüatacä, yunaitü yuri memüteta'erienicü tiutahecüatacacu 'iya. <sup>8</sup>Iya hecüariya pücahücütüca. Titahecüataque hecüariya hepaüsita xEICÜa caninuani. <sup>9</sup>Tita yuricü mütihecüariya, tita müti vahecüatüa yunaime teüteri, mücü cuiepa caninuaximecaitüni. <sup>10</sup>Cuiepa caniyueicacaitüni, cuie niuneni 'iya 'inetüacu, masi

cuiepa memütama mepücaheitima.

<sup>11</sup>Yuque caninuani, teüterimama mepücaheitanaqui'eri.

<sup>12</sup>Queyupaümetü memitanaqui'eri, müme yuri memüte'erie que mü'ane mühücüsie, müme heiserie nivarupitüani Cacaüyari nivemama memacü necü. <sup>13</sup>Teüteri que memüte'ununuivasio mepücayecü, va'uquiyarima meyhive'eriecacu teüteri que memüteyurie, mana mepücayecü, 'uqui türi vavevimücücacu, mana mepücayecü. Cacaüyarisie püta mepüyecü.

<sup>14</sup>Mericüsü mücü niuquitütü tevi canayani, tasata 'ucaitü ratüa. Tame tecanixeiya visi que mü'anecai, 'uquiyarieya visi que mütipitüa yunive muyuxevi. Canaye'ani 'aixüa tiuca'iyaritü yuri ticuxatatü. <sup>15</sup>Vani tinihecüatacaitüni hepaüsitana. Canahivacaitüni müpaü 'utaitü, 'Icü canihücütücaitüni nemixatacai yane'utaitü, 'Iya ne'utüa 'umamie nesi'anuhaitüiyatü nayani meripai mümiemecü, ne meripai necamiemetücacu.

<sup>16</sup>Iya que müraye'ave, yacatatinipitüaca hepaüna

te'anenetü temacüñecü tanaitü.  
 'Aixüa tiuca'iyaritü pütasiyuriene,  
 pütasimüiriyarüme. <sup>17</sup> 'Inüari  
 niuquiyari tecaniupitüarieni  
 Muisexi tasi'upitüacu. Tepupitüarie  
 mücü 'aixüa mütiuca'iyarinicü  
 tahepaüsita, tita yuri müraine  
 temütehexeiyanicü, Quesusi  
 Cürisitu yatatiupitüacu. <sup>18</sup> Xevitü  
 hasuacua püca'ixeyave Cacaüyari.  
 Cacaüyari muyuxevi, que mü'ane  
 yu'uquiyarisie mütiviya, mücü  
 canihecüatani yu'uquiyari.

### Vani ti'üyame que mütiutahecüataxü

*(Mateu 3:11-12; Maricuxi*

*1:7-8; Rucaxi 3:15-17)*

<sup>19</sup> Mericüsü müpaü tiniutahecüata  
 Vani quepaucua Huriyusixi hesüana  
 memüvareyenü'a mara'acate  
 Revitasixi vahamame Querusareme  
 memeyecü memita'ivaviyacü,  
 'Ecüri que pepüpaicü.  
<sup>20</sup> Mücü puyutahecüataxü,  
 pücayucu'imavacai. Masi  
 puyutahecüataxü müpaü 'utaitü,  
 Neri Cürisitu nepücahücü.  
<sup>21</sup> Müme mete'ita'ivaviya, Qesü  
 'ane. 'Eriyaxi pecatihücü. Mücü  
 tiutayü, Ne pücatixaü. 'Ecü  
 pecatihücü mücü tixaxatame,  
 mete'icühüave. Mücü tivaruta'ei,  
 Havaicü. <sup>22</sup> Müme 'ayumieme  
 mete'itahüaveri, Que pepüpaicüte,  
 xasuni temütevaretahüavecü  
 müme memütasiheyenü'a. Que  
 pe'utaine 'ahepaüsita. <sup>23</sup> Mücü  
 tiutayü, Nesü necanihücütüni  
 que mü'ane mücuxaxasivacai  
 haque müpaü mainecai, Xevitü  
 mahiva macumavesie, Xeuraiyeme  
 xequeneutavevi Ti'aitame  
 huyeya 'utaitü, Quisariyaxi

tixaxatame mainecaipaü. <sup>24</sup> Müme  
 memeyenü'ari Pareseusixi  
 vahesüa mecanimiemetetücaitüni.  
<sup>25</sup> Hicü menita'ivaviya müpaü  
 mete'icühüavetü, Mericüte, titayari  
 peti'üyane xüca pecacürisitutüni  
 xüca 'Eriyaxi pecahücütüni xüca  
 mücü tixaxatame pecahücütüni.  
<sup>26</sup> Vani nivaruta'eiya ya'utaitü,  
 Nericü necatini'üyaneni hacü.  
 Xesata 'acaniiveni xevitü,  
 xemüca'imate xeme. <sup>27</sup> 'Iya  
 ne'utüma 'ucanameniri. Ne  
 'aixüa nepücatiuca'iyari nehiesie  
 mütinaquenicü ni nemiparevienicü  
 nemixünirienicü cacaiya  
 cuitaxiyari. <sup>28</sup> Müpaü tiniuyüni  
 Vetavarasie Curutani hatuxame  
 'anutaüye. Mana catini'üyanecaitüni  
 Vani.

### Muxa Nunusi Cacaüyarisüa mümieme

<sup>29</sup> Mericüsü 'uxa'arieca Vani  
 canixeiya Quesusi 'a'amiecame.  
 Müpaü niutayüni, Camü muxa  
 nunusi Cacaüyarisüa mieme. Cuiepa  
 memütama tita 'axa memüteyurie  
 canivacunavairivani mücü. <sup>30</sup> Mücü  
 canihücütüni que mü'ane hepaüsita  
 nemainecai, Ne'uttüma 'ucanamieni  
 'uqui nesi'anuhaitüiyatü matüa,  
 meripai mümiemecü, ne meripai  
 necamiemetüacu. <sup>31</sup> Nesüari  
 nepücaheitimaitüyeicacai, peru  
 mümasiücünicü 'Ixaherisixi  
 vahüxie, 'ayumieme necaninuani  
 hacü netiuca'üyatü. <sup>32</sup> Hicü Vani  
 tiniutahecüata müpaü 'utaitü,  
 Ne necanixeiya 'Iyari taheima  
 'acamieme cucuru 'amacamiepaü.  
 Hesiena niyuhayeva. <sup>33</sup> Ne  
 nepüca'imaicai cuxi, masi



que mü'ane münesiheyenü'a  
nemütiuca'üyanicü hacü, mücütütü  
müpaü pünetiutahüavixü, Que  
mü'ane heima pemixeiya 'Iyari  
'acamieme hesiena yuhayevame,  
'i'ya canihücütüni que mü'ane  
mütiuca'üya 'Iyari Mütiyupata  
rapitüatü. <sup>34</sup>Nesü necaniuniere,  
necatiniutahecüata 'icü Cacaüyari  
Nu'aya mühücü.

#### **Matüari teyü'üquitüvamete memacü**

<sup>35</sup>Hicü 'uxa'arieca tavari  
mana niutivecaütüni Vani,  
teyü'üquitüvametemama yuhutatü  
mana meteti'ucaita. <sup>36</sup>Ixeiyaca  
Quesusi 'uyeicacacu, müpaü  
niutayüni, Camü muxa nunusi  
Cacaüyarisüa mieme. <sup>37</sup>Yuhutatü  
teyü'üquitüvametemama  
mecani'enieni müpaü haineme,  
mecaneiveiya Quesusi. <sup>38</sup>Hicü  
Quesusi ta'aurie 'aveca,  
varuxeyaca me'liveiyame,  
müpaü tinivarutahüave,  
Tita xetecuvautüve. Müme  
metenitahüave, Xavi, haque pepeca.  
Xavi taniuquicü Ti'üquitame paine.  
<sup>39</sup>Mücü tivaruta'ei, Xequenacüni  
xepüneniere. Hicü mana  
meniu'axüani, meniuneniere haque  
mecatei. 'Iya tucarisie me'iteütatü  
meniyuhayeva, memenuveyacü tau  
ya'atevacacu.

<sup>40</sup>Mericusü yuhutatü memu'enaxü  
Vani que mainecai, memeiveiya  
Quesusi, xevitü 'Atürexü  
catinitevacaitüni Simuni Pecuru  
mü'ivayatücai. <sup>41</sup>'Iya yu'iva Simuni  
netaxeiya meri. Müpaü tinitahüave,  
Tecaneitaxeiya Mesiya, taniuquicü  
Cürisitu heiserie mupitüarie  
maine. <sup>42</sup>Quesusisüa caneivitüni.

Quesusi 'ixeyaca müpaü niutayüni,  
'Ecü Simuni pecanihücütüni,  
Vani pemünu'aya. Sepaxi  
pepütitaterüvarieni, taniuquicü  
Pecuru maine, Tete maine.

#### **Quesusi que mütivaruta'inie Piripe Natanaheri**

<sup>43</sup>Hicü Quesusi 'uxa'arieca  
Carereyapai niyeimücücaütüni.  
Canitaxeiya Piripe, müpaü  
tinitahüave, Quenenanuveyiya.  
<sup>44</sup>'Iya Piripe Vesaira  
caniquiecametücaütüni 'Atürexü  
Pecuru vaquiecarü. <sup>45</sup>Hicü Piripe  
neitaxeiya Natanaheri. Müpaü  
tinitahüave, Que mü'ane raxatatü  
Muisexi mütiuta'utüa 'linüari  
niuquiyarisie, texaxatameteta  
mete'uti'utüa metexatatü, mücü  
tenetaxeiya. Quesusi canihücütüni  
Cuse nu'aya Nasaretitanaca.  
<sup>46</sup>Natanaheri müpaü tinitahüave,  
Nasaretisie que tiyüve 'aixüa  
müti'ane mürayeneica. Piripesü  
müpaü titahüave, Quenenierimie.  
<sup>47</sup>Hicü Quesusi Natanaheri niuxeiya  
'a'amiecame. Müpaü niutayüni  
hepaüsitana, Camü yuricü  
'Ixaheri tevyari canihücütüni 'icü,  
püca'irümari. <sup>48</sup>Natanaheri müpaü  
tinitahüave, Haque pepünesihetima  
'ecü. Quesusi müpaü tinitahüave,  
Piripe camatitahüavivecacu cuxi,  
quepaucua pinitüa pemucatei,  
nepümasi'uxei. <sup>49</sup>Natanaheri  
müpaü tita'ei, Ti'üquitame, 'ecü  
Cacaüyari pecaninu'ayatüni,  
'Ixaherisixi tati'aitüvame  
pecanihücütüni. <sup>50</sup>Quesusi müpaü  
tita'ei, Nemutainecü pinitüa  
pe'ucaime nepümasi'uxei, yuri  
petiuta'eri. 'Ipaü 'aneneme

masi vaücava pecanixeyamücü.

<sup>51</sup>Müpaü tinitahüaveta, Niuqui caniseüyeni que nemütixecühüave, xecanixeyacuni muyuavisie reuyepiyacame, Cacaüyarisüa miemete niuqui tuayamete xetevaxeyia me'anuticücame me'acaneicame Yuri Tevisüa.

### Neüquiya quememüte'uvevi Canasie

**2** Mericüsü hairieca tucari 'aye'acu meneitineüquitüani xeime. 'Ixüarari mepeveviecai Canasie Carereya cuieyarisie. Quesusi varusieya mana niuyeicacaitüni. <sup>2</sup>Quesusi niuta'inierieni, teyü'üquitüvameteta mete'uta'inieri 'ixüararipa.

<sup>3</sup>Hicü vinu 'ayexücu Quesusi varusieya müpaü tinitahüave, Vinu mepücahexeyia. <sup>4</sup>Quesusi müpaü tinitahüave, 'Uca titasü tetehexeyia 'ecü ne 'axeicüa. Netucari cuxi püca'aye'ave. <sup>5</sup>Hicü varusieya müpaü tinivarutahüave teparevivamete, Sepa que mütixehahüave, yaxequetenecahuni.

<sup>6</sup>Mericüsü mana meniyetecaitüni tete ye'üyari 'auxivitü Huriyusixi que memüte'l'itiva yupini. Xexuimesie müpaü paümetü tinacananaqueacaitüni nauca tevyari ya xei sienituyari ritüruyari yacütüniquetü. <sup>7</sup>Hicü Quesusi müpaü tinivarutahüave, Ha xequeneutihüniya ye'ürütesie. Cüsitanapai mecanithüniya.

<sup>8</sup>Müpaü tinivarutahüave, Xequenivatihapaniri, 'ixüarari mühürütüariesüa xequenanuhapani. Müme mecaneihapanirieni.

<sup>9</sup>Mühürütüarie quepaucua menu'tinüataxü 'iya ha vinu

matüa, 'asicatimaitü haque memiemetücai, teparevivamete memüvatihapa yametemaicacusüari, 'iya 'ixüarari mühürütüariecai nitahüave neneüqueme. <sup>10</sup>Müpaü tinitahüave, Cari yunaitü teüteri vinu 'aixüa ma'ane mecaniva'itüaca meri. Quepaucua memütitarüveni 'axa mü'ane mepüva'itüa. 'Ecüsü püta pecaniticuerieni vinu 'aixüa ma'ane hicüque. <sup>11</sup>Ipaü tiniuyurieni Quesusi Canasie Carereya cuieyarisie 'isutüatü 'inüari que mütüyurienecai. Masiücütü nayuyeitüani que mütimarivecai. Teyü'üquitüvamete yuri mecateniuta'erieni hesiena.

<sup>12</sup>Mericüsü 'arique Caperünaume neuyeyune mücüri, varusieyari, 'ivamamari, teyü'üquitüvametemamari. Mana müixa mepüca'uyuhayevaxü.

### Quesusi que mütivaranuyeveiya tuquita

*(Mateu 21:12-13; Maricuxi 11:15-18; Rucaxi 19:45-46)*

<sup>13</sup>Mericüsü Huriyusixi va'ixüarari Pasicua mütiteva canahuracaitüni. Quesusi Querusareme neutiyune. <sup>14</sup>Mana tuqui curaruyarita nivaretaxeyia memüvareutatuyacai puixisixi muxasi cucuruxi. Tumini patamete tivaretaxei mana me'ayeteme. <sup>15</sup>Caunari tiyuvayame 'utavevieca yunaime nivaranuyeveiya tuqui curaruyarita, muxasi puixisixi vahamame. Tumini patamete vatumini nanacaxürieni, vamexate natixürieni. <sup>16</sup>Memüvareutatuyacai cucuruxi müpaü tinivarutahüave,

'Icū xequenanyue'üi tacuapai. Ne'uquiyari quiya xepūca'ayeitūvani tetuayamete vaquie. <sup>17</sup>Teyū'ūquitūvamete mene'erivani niuqui mūpaū mūre'uxa, 'Aqui yemecū nemūcueriecū neputa'unari. <sup>18</sup>Hicū Huriyusixi mūpaū metenita'eiya, Tita petatixeisitūani 'inūari mūya pemūtiyurieneći. <sup>19</sup>Quesusi mūpaū tivaruta'ei, 'Icū tuqui xequeneuca'una, ne hairieca tucari 'anucayayu necanenucuquetūamūcū hutarieca. <sup>20</sup>Ayumieme Huriyusixi mūpaū meniutiyuani, 'Icū tuqui veyiyari huta teviyari heimana 'ataxevime viyari caniyurieni. Cari 'ecū haica tucari perenucuquetūani. <sup>21</sup>Masi mūcū yuvaiyari canixatacaitūni tuquitūme. <sup>22</sup>Quepaucuari mūquite vasata manucuquetūarie, teyū'ūquitūvametemama mene'erivacaitūni mūpaū mutayūcū. 'Ana yuri metenita'eririeni 'utūarica, yuri mete'ita'eririta niuqui Quesusi mutayūcū.

**Quesusi que mütivamaicai  
yunaimeteūteri**

<sup>23</sup>Mericiūsū Querusareme 'uyeicacacu Pasicua 'ixūararipa, yumūiretū yuri meteniuta'eriecaxūani que mū'ane mūhūcūtūcaisie me'ixeyaca 'inūariteya mūcū que mūtiyurienećai. <sup>24</sup>Masi Quesusitūtū pūcayuyetuacai xeimesie, 'iya mūvamaicacū yunaimete, <sup>25</sup>tixaxū mūcareuyehūacacū xevitū mūtitahećūatacū tevi hepaūsita. 'Iyasietū yūcūmana tinimaicaitūni tita tevi 'iyarieyasie mūtiyeca.

**Quesusi Nicuremumatū  
que memūtecuxataca**

**3** Mericiūsū tevi 'eniuyeicacaitūni mūpareseutūcai Nicuremu titevatū, Huriyusixi teva'aitūvamete mūxevitūtūcai. <sup>2</sup>'Iya Quesusisūa caninuanani yūvicūta. Mūpaū tinitahūave, Ti'ūquitame, tame mūpaū tecatenimaica, 'ecū Cacaūyarisūa pemiemetūtū pemunuacū peti'ūquitametūtū. Xevitū pūcayūveni queyu 'icū 'inūari mūtiyurieneći pemūtiyurienećai, me xūca Cacaūyari hamatūana ca'uyeicanique. <sup>3</sup>Quesusi nita'eiya, Caniseūyeni que nematicūhūave, xūca hutarieca ca'utinuiva tevi, pūcayūve mixeiya tita Cacaūyari mūra'aita. <sup>4</sup>Nicuremu rehūave, Tevi quepaū tiyūve mutinuiva 'uquirasitūtū. Tiyūve hutarieca yuvarusisie meutahani mutinuiva. <sup>5</sup>Quesusi tita'ei, Niuqui caniseūyeni que nematicūhūave, hasie 'iyarisie xūca ca'utinuiva, pūcayūve meutahani Cacaūyari mūra'aitasie. <sup>6</sup>Tita tevisie mūtiyenuiva canitevitūni. Tita 'iyarisie mūtiyenuiva cani'iyaritūni. <sup>7</sup>Pemūcahūxiyaca nemūtixecūhūavecū quename heuyevese xeme hutarieca xemūtinunuiva. <sup>8</sup>Que mūtinaque canie'ecani. Pecani'enieca yuariyaya, perusū 'asipepūcatimate que mūraneica que mūreumie. Mūpaū mecani'aneneni yunaitū 'iyarisie memūyenuiva. <sup>9</sup>Nicuremu mūpaū tita'ei, Qesū quepaūtūtū 'icū. <sup>10</sup>Quesusi mūpaū tinita'eiya, 'Ecū 'Ixaherisixi

pecatiniva'üquitüvemetüni.  
Cari 'icü pecatimate. <sup>11</sup>Niuqui  
caniseüyeni que nematicühüave,  
tecatenicuxatani tita temütemate  
hepaüsita, teteniheciütani  
tita temüte'uxei hepaüsita.  
Xemesü xepüca'itanaqui'eri tita  
temütetaheciüataquecai. <sup>12</sup>Xüca yuri  
xecate'erieca tita cuiepa mütimieme  
nexecuxaxatüvacacu, quepaütütü  
yuri xeteta'erieniqueyu xüca  
nexecuxaxatüvani que tita taheima  
mütimieme.

<sup>13</sup>Xevitü taheima püca'anutiyeive,  
'iya taheima macane Yuri Tevitütü  
xeicüa pemari. <sup>14</sup>Muisexi  
macumavesie 'uyeicatü  
cu muyetepaü, müpaürita  
caneuyevecani Yuri Tevi  
muyetequieni <sup>15</sup>yunaitü yuri  
memüte'erie hesiena tucari  
müxaxüve memexeyanicü.

**Cacaüyari que mütivanaqui'erie  
cuiepa memütama**

<sup>16</sup>Cacaüyari 'ipaü  
tinivanaqui'erieca cuiepa  
memütama. Yunive  
muyuxevi caniyetuanı  
memücatatümaiyarienicü yunaitü  
yuri memüte'erie hesiena, tucari  
müxaxüve memexeyanicü püta.  
<sup>17</sup>Cacaüyari cuiepa que müreyenü'a  
yunive, müpaü pücatiuyuri  
müvaranutaxürıenicü cuiepa  
memütama. Masi cuiepa memütama  
memütavicueisitüarienicü cümana,  
'ayumieme püta neiyenü'ani.

<sup>18</sup>Que mü'ane yuri müti'erie  
hesiena, püca'anutahüiyani.  
Que mü'ane yuri mücati'erie  
'ari nanutahüiyani, yuri  
mücatiuta'erievecü que

mü'ane Cacaüyari Nu'aya  
muyuxevi mühücüsie. <sup>19</sup>'Ipaü  
tinivaranutaxürıvani  
'isücame. Hecüariya cuiepa  
caninuaniri. Teüteri yüriya  
mecaninaqui'eriecaitüni,  
hecüariya mecanaqui'erietü, 'axa  
memüteyuriecaicü. <sup>20</sup>Yunaitü  
'axa memüteyurie mecani'uxieca  
hecüariya, hecüaripa mepücacünicu  
capa me'utatierivanicü que  
memüteyurie. <sup>21</sup>Que mü'ane  
yamütiyuriene tita yuri  
müraine, hecüaripa püyeimücü  
mümasiücünicü que mütiyuriene  
Cacaüyarisie tiviyatü.

**Neneüqueme teütameya  
que mütiyutemavie**

<sup>22</sup>Merıcüsü 'arique Quesusi  
teyü'üquitüvametemamata  
menecüne Cureya cuieyarisie. Mana  
vahamatü 'etineutere ti'üyanetü.  
<sup>23</sup>Vanita tini'üyanecaitüni 'Enunisie  
Sarimi 'aurie, ha mana vaüca  
muhanecaicü. Meniu'axecaitüni  
menuca'üyarüvacaitüni. <sup>24</sup>Vani  
casariyanata püca'anutahüiyavecai  
cuxi.

<sup>25</sup>'Ayumieme Vanisüa miemete  
teyü'üquitüvamate hipatü  
Huriyusixi vahamatü niuqui  
menixüatüacaitüni 'itiya hepaüsita.  
<sup>26</sup>Vanisüa me'u'axüaca müpaü  
metenitahüave, Ti'üquitame,  
'iya 'ahamatü meyeicacai  
hatuxame Curutani müracuteva  
'anutaüye, que mü'ane hepaüsita  
pemütiheciütacai, titayari  
re'üyane hicü. Yunaitü hesüana  
meni'axeni. <sup>27</sup>Vani müpaü  
tinivarutahüave, Tevi pücaüve  
tixaütü mütiütanaqui'erienı,

me xüca taheima mieme  
yatipitüarieca püyüve. <sup>28</sup>Xemetütü  
xecateniheciütani nehepäüsita  
müpaü que nemainecai, Ne  
Cürisitu nepücahücü, masi  
hüxiena nemetanü'arie. <sup>29</sup>Que  
mü'ane 'uca viquivame  
mexeiya, 'uqui neneüqueme  
canihücütüni. Neneüqueme  
teütameya mana mutive  
mi'enie, mücü caniyutemavieca  
mi'eniecü neneüqueme.  
'Ayumieme 'icü netemavierica  
naye'aniri. <sup>30</sup>Neuveveca 'iya  
ve'eme mücuxaxasivarümeni  
marivatü mayeiximeni, ne püta  
nemütaparirümeni reuyevese.

#### Que mü'ane taheima macane

<sup>31</sup>Que mü'ane taheima  
macane nai catinita'aitüani.  
Que mü'ane cuiepa mutine  
cuiepa canimiemetüni,  
catinicuxatani cuiepa mieme.  
Que mü'ane muyuavisie  
macane nai catinita'aitüani.  
<sup>32</sup>Tita mütiuxei, tita mütiü'eni,  
mücü hepäüsita tiniheciütani.  
Xevitü püca'itanaqui'eri tita  
mütiutaheciüataxü. <sup>33</sup>Que  
mü'ane mitanaqui'eri tita  
mütiutaheciüataxü, mücüri  
niyu'inüaritüani müpaü 'utaitü  
quename Cacaüyari yuri haine.  
<sup>34</sup>Que mü'ane Cacaüyari meiyenü'a,  
mücü Cacaüyari niuquieyacı  
catinicuxatani. Cacaüyari nipitüani  
yu'iyari, que müreupaüme  
cati'inüatatü. <sup>35</sup>'Uquiyarieya  
yunive ninaqui'erieca. Nai  
tiniyetuirieni mamayasie. <sup>36</sup>Que  
mü'ane nu'ayasie yuri müti'eri  
tucari mücaxüve canexeyani. Que

mü'ane yamüaticamie nu'aya que  
maine, pücaheitimani tucari, masi  
Cacaüyari 'ihecacacu püyuhayeva.

#### Qesusiri 'uca Samariyatanacamati que memütecuxatacai

**4** Mericüsü Ti'aitame  
tiniutamarieni  
Pareseusixi memü'enanacı  
quename Qesusi yumüireme  
teyü'üquitüvamete varayeitüvacai  
va'üyanecai, Vani hipame  
xeicüa va'üyanecacu. <sup>2</sup>Qesusi  
yücümana pücavaruca'üyacai,  
teyü'üquitüvametemama püta  
mepüvaruca'üyacai. <sup>3</sup>Müpaü  
tiutamariECA Cureya neyeyani,  
hutarieca Carereya ninuani.

<sup>4</sup>Neuvevecaitüni Samariya  
cuieyarisie meutayunecü. <sup>5</sup>Hicü  
quiecarisie ninuani Samariya  
cuieyarisie Sicari mütiuyetevasio.  
Mana canehurani cuie Cacuvu  
yunive mumi Cuse. <sup>6</sup>Pusu Cacuvu  
müvat'inixü mana nitiniereni.  
Mericüsü Qesusi 'uxetü yeyacı  
ya'aretü mana nacateitüni pusu  
tesie tuca. <sup>7</sup>Mericüsü 'uca mana  
caninuani Samariya quiecame  
cuhanünetü. Qesusi müpaü  
tinitahüave, Queneneuharitüa.  
<sup>8</sup>Teyü'üquitüvametemama  
quiecarı hixüapa mene'uvacaitüni  
'icuai meheunanaiyuca. <sup>9</sup>Hicü  
'uca Samariyatanaca müpaü  
tinitahüave, Quepaütütü 'ecü  
pemühuriyu ha penetivaviri  
ne nemüsamariyatanaca  
nemü'uca. Hurıyusixi tıxäu  
xepücatehexeiya Samariyatari  
tahamatü. <sup>10</sup>Qesusi tita'ei, Xüca  
pe'imaicaque tita Cacaüyari  
matimicua, xüca pe'imaicaque

quepai ha mümasivaviri,  
 Queneneuharitüa ne'utaitü, 'ecüsü  
 püta pepünesitavavirieniqueyu,  
 nepümasiharitüaniqueyu ha  
 muhanesie mieme. <sup>11</sup>Mücü  
 rehüave, Neuxei, hanüveme  
 pepücahexeiya. Pusu peucateva.  
 Haque pepeixeiya mücü ha  
 muhanesie mümieme. <sup>12</sup>Ta'uquiyari  
 Cacuvu nive'emetücaitüni 'icü pusu  
 mütas'i'umi. 'Ena nitiharevecaitüni  
 'iya, nivemamata tevamamata.  
 'Ecü masi que petive'eme que  
 mücü. <sup>13</sup>Qesusi nita'eiya,  
 Yunaitü 'icü ha memüthareve  
 tavari mepeuharicuni. <sup>14</sup>Que  
 mü'ane manuhareni ne  
 ne'iharitüayu tavari hasuacua  
 pücaheuharimücüni. Masisü mücü  
 ha nemiharitüani, mücü haixa  
 canayeimücü hesiena 'atineicatü  
 tucari mücaxüve 'ipitüatü. <sup>15</sup>'Uca  
 müpäü tita'eiyaxü, Neuxei, 'icü  
 ha queneneuharitüa tavari  
 nemücaheuharimücünicü, 'uvapai  
 nemücahanünenicü. <sup>16</sup>Tita'ei,  
 Mericüte, 'acüna quene'iniemie,  
 'uvapai xequenacüne. <sup>17</sup>'Uca müpäü  
 tita'ei, Nepücarecacüna. Qesusi  
 müpäü tinitahüave, 'Erite, 'aixüa  
 pecanaineni nepücarecacüna  
 pehaitü. <sup>18</sup>Yu'auxüme  
 pepüvarexeiyacai 'acünama.  
 Mücü meta, hicü pemeixeiya,  
 mücü püca'acüna. 'Ayumieme  
 xasunicü peputaine. <sup>19</sup>'Uca müpäü  
 tita'ei, Camü, nemanetimani 'ecü,  
 tixaxatame pecanühücütüni. <sup>20</sup>Tame  
 ta'uquiyarima 'icü yemurisie  
 mecaniyutinenevivacaitüni. Xeme  
 xeniutiyaneni quename heuyevese  
 Querusareme memüytineneviani.  
<sup>21</sup>Qesusi tita'ei, Neuxei 'uca,

yuri quenetine'erierieca. Tucari  
 canaye'amücü quepaucua nenevieri  
 xemüca'ipitüaca yu'uquiyari 'icü  
 yemurisie ni Querusareme. <sup>22</sup>Xeme  
 nenevieri xepipitüa que mü'ane  
 xemücamate. Tame püta nenevieri  
 tenipitüaca que mü'ane temümate,  
 vicueisitüarica mayeneicacü  
 Huriyusixi tahesie. <sup>23</sup>Masi tucari  
 canaye'amücü, hicü canaye'aniri,  
 quepaucua müme yuricü  
 memüytineneviva nenevieri  
 memipitüani yu'uquiyari yu'iyaricü  
 yuri me'utiyaatü. Mücü meta,  
 ne'uquiyari müya me'aneneme  
 nivacuvauneni nenevieri  
 memipitüanicü. <sup>24</sup>Cacaüyari  
 cani'iyaritüni. Neuyevaca müme  
 nenevieri memipitüa yu'iyaricü  
 memipitüanicü yuri me'utiyaatü.  
<sup>25</sup>'Uca tita'ei, Ne necatinimaica  
 quename 'uhamie Mesiya Cürisitu  
 heiserie mupitüarie müтитеva.  
 Quepaucua munuani 'iya, nai  
 catatinitahecüatüamücü. <sup>26</sup>Qesusi  
 tita'ei, Nesü necanühücütüni  
 'ahamatü nemüticuxata.

<sup>27</sup>Hicü teyü'üquitivamete  
 mecaniu'axüani. Meniuhüxyani  
 'ucamatü müticuxatacaicü. Siepüre  
 xevitü 'asipüca'utayü, Tita  
 peticuvaune, titayari hamatüana  
 peticuxata nusu. <sup>28</sup>Hicü 'uca  
 yuye'ü 'ucu'eirieca quiecarisie  
 neyani. Müpäü tinivaretahüave  
 'uquisi, <sup>29</sup>Camü xequene'ixüariyu  
 tevi müneretahecüatüa nai que  
 nemütüuyuri. Caticürisitu 'icü.  
<sup>30</sup>Quiecarisie mecanayecüne,  
 hepana menahucaitüni.  
<sup>31</sup>Mericüsü mexi 'ame'ahucai,  
 teyü'üquitivamete menita'inieni  
 müpäü me'utiyaatü, Ti'üquitame,

quetineucucari. <sup>32</sup>Iya müpaü tinivarutahüave, Ne 'icuai necanexeiyani xemüca'imate xeme. <sup>33</sup>Ayumieme müpaü meteniyücühüavecaitüni teyü'üquitüvamate, Xevitü cati'atüiri catimi. <sup>34</sup>Quesusi tivarutahüave, Que nemüticamie tita mütinaque 'iya munesihyenü'a, 'uximayasicaya que nemütinüxime, mücü canine'icuaitüni. <sup>35</sup>Xeme müpaü xecate'utiyuane, Nauca meseri tixüyu 'isanari naye'amücü. Camü müpaü nepütixecühüave, Xequenetanerieneni, vaxa xequenexeiyani. 'Aixüa nivavaquiniri xemüca'isanacü. Hicü <sup>36</sup>'isaname catini'ivaneni. Nicuxeürieni tita mütiutixuaverixü, tucari mücaxüve memexeiyanicü, 'esame 'isanamematü yaxeicüa memüyutemamaviecacü. <sup>37</sup>Icü hepäüsita niuqui yuri paine, Xevitü cani'esametüni, xevitüta ti'isaname maine. <sup>38</sup>Ne nepüxeheutanü'axüa xemüca'isanacü xemücateha'uximayacaisie. Hipatü mecateni'uximayacaitüni. Va'uximayasica xehesie tiniunaque.

<sup>39</sup>Merücüsü yumüiretü mana quiecatari Samariyatari yuri mecateniuta'erieni hesiena 'uca tiutahecüatacu yuniuquicü ya'utaitü, Nai que nemütiuyuri canetiniutahecüatüani. <sup>40</sup>'Ayumieme Samariyatari hesüana me'u'axüaca mecanita'inieni vahesüa müyuhayevacü. Mana huta tucari niyuhayeva. <sup>41</sup>Hipatüta yumüiretü yuri mecateniuta'erieni niuquieyacü. <sup>42</sup>Müpaü metenitahüave 'uca, Hicürixüa 'aniuquicü xeicüa yuri tepücate'erie.

Tameri tecani'enieni, tecatenimaica 'icü yuricü cuiepa memütama vavicueisitüvame mühücücü.

**Quesusi que mürenayehüa ti'aitame parevivameya nu'aya**

<sup>43</sup>Merücüsü huta tucari 'anucayacu mana neyani. Carereya caninuani. <sup>44</sup>Quesusi yücümana tiniutahecüata quename tixaxatame yucuepa 'aye'aveme ca'eriva. <sup>45</sup>Peru quepaucua Carereya munua Carereyatari mecanitanaqui'erieni nai mete'uxeiyaca que müreyurienecai Querusareme 'ixüararipa. Mümeta mecanecu'ixüara.

<sup>46</sup>Merücüsü hutarieca Canasie ninuani Carereya cuieyarisie ha vinu mayeitüasie. Xevitü cuiepa ti'aitame müparevivameyatücai mana niuyeicacaitüni. Nu'aya tinecuyecaitüni Caperünaumesie. <sup>47</sup>Tiutamarieca 'iya quename Quesusi Cureya heyetüa Carereya nua, hesüana caneyani. Nitavavirieni mana müyemiecü, menayehüanicü nu'aya. Mücü nemüximecaitüni. <sup>48</sup>Quesusi 'ayumieme müpaü tinitahüave, Cari xüca 'inüarite xecaxeiyani, mamarivavemeta, yuri xepücateta'erienicuta. <sup>49</sup>Mücü ti'aitame parevivameya müpaü tinitahüave, Neuxei, mana quenemie nenive camüvecacu cuerietü. <sup>50</sup>Quesusi titahüave, Quenemie. 'Anive nayeyuriniri. Hicü mücü tevi yuri tiniuta'erieni niuquieyasie Quesusi que mütitahüavixü. Neyani. <sup>51</sup>Mana heutamiecacu te'uximayatametemama

menenucunaque metehühüavetü niveya mayeyuricüri. <sup>52</sup>Iya niuta'ivauni ya'utaitü que 'upaucuacacu manayeve. Müme müpäü metenitahüave, Tacai 'esiva cüa caviecacu cahüiyatü nayani. <sup>53</sup>Hicü quemasieya tinetimani 'ana maye'acaicü quepaucua Quesusi mütitahüavixü, 'Anive nayeyuriniri. Mücüri yuri tiniuta'erieni, yunaitü hesüana quiecatarita. <sup>54</sup>Ipäü hutarieca 'inüari tiniuyurieni Quesusi Cureya heyeyaca Carereya nuaca.

#### Ticuicame Vetesita mayecatei

**5** Mericüsü 'arique Huriyusixi va'ixüarari naye'ani. Quesusi Qerusareme neutiyune. <sup>2</sup>Qerusareme ha mana niyemacaitüni Muxasi Vaquitenie hura. Hepürayusixi vaniüquicü Vetesita tiniuyetevacaitüni ha muyemacai. 'Etüpivari niye'ucaitüni 'auriena 'auxüvitü. <sup>3</sup>Mücütüa mecanayetecaitüni yumüiretë tecuicuicate, memacücüpe, memühurietüca, memümamavavaqui, meta'icuevatü ha mücuyuitüarienicü. <sup>4</sup>Heiva mana niuta'axecaitüni niuqui tuayame. Ha nicuyuitüvacaitüni. Que mü'ane meri mana munua ha 'ucuyuitüariecu nanayeveni sepa que müticuyecai. <sup>5</sup>Mericüsü xevitü tevi mana nayecateitüni xei teviyari heimana tamamata heimana 'atahaica viyari müticuyecai. <sup>6</sup>Quesusi 'ixeyaca mana 'ucaime, heitimaica müixa müyuriecaicü, müpäü tinitahüave, Peti'avaüriya pemanayeveni. <sup>7</sup>Ticuicame müpäü tinita'eiya, Neuxei 'uqui, havaicü

tevi münesiheucahüani hapa quepaucua ha mucuyuitüarie. Mana ne'ucamiecacu xevitü meri mana caninuani. <sup>8</sup>Qesusi tinitahüave, Quenanucuquexi, 'a'itari quenanucucue'li, quenecuyeicani. <sup>9</sup>Cuitüva 'aixüa reu'erietü nayani tevi. Yu'itari nanucucueni, nicuyeicacaitüni.

Mericüsü mücü tucari 'uxipiya tucari canihücütücaitüni. <sup>10</sup>'Ayumieme Huriyusixi müpäü metenitahüave 'iya manayehüiya, Hicü 'uxipiya tucari canihücütüni. Heiserie pepücahexeiya 'a'itari pemanucucuenicü. <sup>11</sup>Mücü müpäü tivaruta'ei, Que mü'ane 'aixüa nereu'eriecame münesi'ayeitüa, mücü canetiniutahüave, 'A'itari quenanucucue'li quenecuyeicani. <sup>12</sup>Müme müpäü metenita'livaviya, Que püpaicü mücü tevi müya mümatiutahüavixü, Quenenucucue'li quenecuyeicani. <sup>13</sup>Manayehüiya 'asipücatimaicai que müpaicütüca, metüacü Quesusi yumüiretë me'u'uvacacu mana. <sup>14</sup>Hicü 'ariquemüca Quesusi nitaxeyia tuqui curaruyarita. Müpäü tinitahüave, Camüsü 'aixüa pereu'erietü pecanayani. Tavari 'axa pepücareyurieneni capa vaüca pe'u'itüarienicü masi. <sup>15</sup>Tevi neyani. Müpäü tinivarutahüave Huriyusixi quename Quesusi hücütüca que mü'ane 'aixüa reu'eriecame meyeitüa. <sup>16</sup>'Ayumieme Huriyusixi meniveiyacaitüni Quesusi müpäü mütiyurienecaicü 'uxipiya tucarisie. <sup>17</sup>Qesusisü müpäü tinivaruta'eiya, Ne'uquiyari müya tiniu'uximayatani hicüque, neta müya netiu'uximayata.



<sup>18</sup>'Ayumieme masi cuini mieme menicuvautüvecaitüni Huriyusixi me'imienique, 'uxipiya tucari 'inüariyari mayeyetitüaximecaicü, masisü cuxi Cacaüyari müxatacaicü yu'uquiyaritüme, Cacaüyaripaü 'anetü 'ayuyetitüvatü.

**Cacaüyari Nu'aya heiserie  
que mürexeiya**

<sup>19</sup>Hicü 'ayumieme Qesusi müpaü tinivaruta'eiya, Niuqui caniseüyeni que nemütixecühüave, nu'aya 'asipücayüve yücümana, que mütixeyia yu'uquiyari yatiyurieneme xeixüa püyüve. Tita mütiyuriene 'iya, müpaüta yaxeixüa tiniyurieneni nu'aya. <sup>20</sup>Ne'uquiyari yunive pünaqui'erie. Naime catinixeisitüani que mütiyuriene 'iya. 'Icü que mütiyuriene 'esiva marivemecü xeixüa, yemecü nixeisitüamücü mamarivavemecü, xemühüxiyanicü xeme. <sup>21</sup>Ne'uquiyari mütivaranucu'uitüvapaü müquite, tucari mütivarupitüvapaü nu'ayata müpaü catinivaru'uitüvani müme müyuvauriya müvaranucu'uitüanicü. <sup>22</sup>Mücü meta, ne'uquiyari xeime püca'inüata 'isücamepaü, masi heiserie nipitüani yunive 'isücamepaü mita'inüatacü naime, <sup>23</sup>yunaitü ve'eme memü'eriecacü nu'aya, yaxeixüa ve'eme memü'eriepaü 'uquiyarieya yunive meiyenü'a. Que mü'ane ve'eme müca'erie nu'aya, ve'eme püca'erie 'uquiyarieyata meiyenü'a.

<sup>24</sup>Niuqui caniseüyeni que nemütixecühüave, que mü'ane nenuqui mü'enie, yuri ti'eririetü

'iya münesiheyenü'a, mücü tucari mücaxüve canexeiyani. 'Isücame huxie pücatacueviyani, masi niyupata, camüquitüri, 'ayeyuritü püta hicü. <sup>25</sup>Niuqui caniseüyeni que nemütixecühüave, tucari naye'amücü, hicüri naye'aniri, quepaucua müquite memi'enieni Cacaüyari Nu'aya 'utaniucame. Müme memü'enanani mecanayeyuyuricacuni. <sup>26</sup>Ne'uquiyari yücümana tucari que mürexeiya, müpaü yaxeixüa tinipitüani yunive tucari mexeyanicü yücümana. <sup>27</sup>Heiserie tipitüata 'isücamepaü müva'inüatacü Yuri Tevi mühücücü. <sup>28</sup>Tixaü xepücahüxiyaca 'icücü. Tucari naye'amücü quepaucua yunaitü memucateuqui memi'enieni 'iya 'utaniucame. <sup>29</sup>Mepüvaticüneta. Müme 'aixüa memüteyuriecai menanucu'uicuni tucari memüpitüarienicü, 'axa memüteyuriecai mete'anucu'uni memanutaxüriyanicü.

**Que memüte'ihecüata Cürisitu**

<sup>30</sup>Ne necümana 'asinepücatiyüve. Que nemütü'ena, müpaü nepütiva'inüata 'isücamepaü neyüanetü. Que mütiheiserie nepüva'inüata nemüca'icuvaunecü tita münetaque ne, tita mütinaque 'iya münesiheyenü'a püta nemücuvaunecü. <sup>31</sup>Ne xüca nehepaüsita netihecüatanique, yuricü nepücatihēcüataniqueyu. <sup>32</sup>Xevitü 'ecaniyueicani mütihecüata nehepaüsita. Necatinimaica 'iya yuri mütihecüatacü nehepaüsita que mütihecüata. <sup>33</sup>Xeme Vanisüa

xecanivarenü'ani. Mücü tita yuri müraine hepaüsita tiniutahecüata.  
<sup>34</sup>Ne masi nepüca'itanaqui'eri tita teüteri memütehecüata nehepaüsita, perusü 'ipaü necaniutaineni xemütavicueisitüarienicü xeme.  
<sup>35</sup>'Iya cüxeme canihücütücaitüni tatü hecüarivietü. Xeme xeniyuvaüriyacaitüni xemüyutemamaviecacü 'iya yatixehecüariviyacacu yareutevitü.  
<sup>36</sup>Mücü nehepaüsita mütihecüata, mücü masi türücaüyemecü catinihecüatani, tita mütihecüatacai Vani 'esiva xecüa tihecüatacacu. Tita nemütiyuriene, ne'uquiyari que münetiupitüa nemeye'atüanicü, 'icü 'uximayasica que nemütiyuriene, 'icü nehepaüsita tinihecüatani quename ne'uquiyari nesiheyenü'a.  
<sup>37</sup>Mücürita ne'uquiyari münesiheyenü'a, mücütütü nehepaüsita tinihecüatani. Xeme hasuacua xepüca'l'enievave 'utaniucame, xepüca'l'ixeyavave que mütiyuxexeyia. <sup>38</sup>Niuquieya xepücahexeyia xehesie yuhayevame yuri xemücate'l'eririecü que mü'ane 'Iya meiyenü'a. <sup>39</sup>'Utüaricasie xequetenecuvava, müpäü xemütecü'erivacü quename mücücü tucari mücaxüve xehexeyia. Mücütütü canihücütüni tita nehepaüsita mütihecüata.  
<sup>40</sup>Xepücayuvaüriya nehepa xemahuni tucari xemexeyanicü.  
<sup>41</sup>Tita teüteri memütexata visi menetexeyatü, mücü nepüca'utanaqui'eri. <sup>42</sup>Siepüre nepüxehetima xeme, xemücayuhayevacü xe'inaqui'erietü Cacaüyari. <sup>43</sup>Ne necaninuani ne'uquiyarisüa nemiemetütü.

Xemeri xepücanesi'utanaqui'eri. Xüca xevitü nuani yuhesüa miemetütü püta, xecanitanaqui'ericuni 'iya. <sup>44</sup>Que xeteyüvave yuri xemüteta'erienicü xüca xe'itanaqui'erieni tita xemütexata visi xeteyuxeiyatü, xücarita xecatecuvautüveni 'iya muyuxevi Cacaüyaritütü visi mütiexexeyanicü xeme. <sup>45</sup>Müpäü xepücatecu'erivani quename nexetaxaneta ne'uquiyari hüxie. Xevitü 'acaniuyeicani müxexaneta. Muisexi canihücütüni. Hesiena xeniü yuri xepüte'erie. <sup>46</sup>Xücasü yuri xete'eriecaque Muisexisie, nehiesitari yuri xepüte'eriecaqueyu. 'Iya nehepaüsita tiniuti'utüani. <sup>47</sup>Xüca 'iya 'utüaricayasie yuri xecate'erieca, queri yuri xeteta'erieni tita nemüticuxatasie.

#### Que mütiivarumi 'auxüme miriyari

(Mateu 14:13-21; Maricuxi 6:30-44; Rucaxi 9:10-17)

**6** Mericüsü 'arique caneyani Qesusi. Carereya haracunayarisie Tiveriya müracutevasie 'anutaüye neta'ani. <sup>2</sup>Yümüiretü mecanicuveiyatüvecaitüni teüteri 'inüari memüxeyiacaicü que mütiyuriencai tecuicuicate vahesie. <sup>3</sup>Hicü hürisie neutiyune Qesusi. Mana necateitüni, teyü'üquitüvametemamata metehetitecai hamatüana. <sup>4</sup>Mericüsü Huriyusixi va'ixüarari Pasicua mütiteve nahuracaitüni. <sup>5</sup>Hicü Qesusi heutaniereca, yumüireme varuxeyaca hepana me'atihume, müpäü tinitahüave Piripe, Haque tepeinanaiyu pa 'ime

memütecuanicü. <sup>6</sup>Müpaü tiutayü 'l'isipatü. Mücüsietü tinimaicaitüni que mütiyurieniquecai. <sup>7</sup>Hicü Piripe nita'eiya, Pa huta sienituyari 'inüariyarisie 'atü capütinaque vahesie mieme yuxexuitü 'esiva xEICÜA memita'üixüanicü. <sup>8</sup>Xevitü teyü'üquitüvametemama 'Atürexü mütitevacai Simuni Pecuru 'ivaya müpaü tinitahüave, <sup>9</sup>'Ena puyeica temaicü sevara payari 'auxüvime huta quesüteyari vara'ütü. Perusü 'icü que tipaüme yumüireme vahesie mieme. <sup>10</sup>Qesusisü müpaü tiutayü, Xequenivaranucayasa teüteri. Mana vaüca nacu'üxayacaitüni. Hicü 'uquisi menanucayaxe 'auxüme miriyari meyupaümetü yacütüniquetü. <sup>11</sup>Hicü Qesusi nenu'üni pa. Pamüpariyusi 'ipitüaca Cacaüyari tinivarumini mana memütitecai. Yaxeicüa tinivarumini quesüteta quepaü memüteucuaicuai. <sup>12</sup>Hicü me'utihxacu müpaü tinivarutahüave teyü'üquitüvamete, Xequeneucuxeüri tarimeyari manuyuhayevaxü capa reuyevenicü. <sup>13</sup>'Ayumieme mecanicuxeürieni. Tamamata heimana huta quirivayari meniutihüniya tarimeyari tecua'amete memicu'eirie 'auxüme sevara payarisie mieme. <sup>14</sup>Mericiüsü teüteri me'l'ixeyaca 'inüari mütiuyuri müpaü meniutiyuanecaitüni, Cari yuricü 'icü canihücütüni 'iya tixaxatame cuiepa 'umamie. <sup>15</sup>Hicü retimaica Qesusi quename me'axüaniquecai me'iviyaquecai tiva'aitüvame memayeitüanicü, tavari yuxaüta mana neutiyune hürisie.

### Qesusi que mütiuyeicacai haracunasie

(Mateu 14:22-27; Maricuxi 6:45-52)

<sup>16</sup>Mericiüsü quepaucua tau macayunixü teyü'üquitüvamete mana meniucanexüani haracunapai. <sup>17</sup>Canuvasio mecayaxeca haracuna 'anutaüye menecüne Caperünaumepai. Hicü niucuyüleri. Qesusi vahesüa pücanuavecai cuxi. <sup>18</sup>Carima 'u'ecacacu haracuna niuyuanecaitüni. <sup>19</sup>Hicü yateva 'auxüme 'ataxeime quirumetüruyari me'uhutü mecanixeiya Qesusi haracunasie 'uyeicame canuva hepa 'amiecame. Meniutimamani. <sup>20</sup>'Iya müpaü tinivarutahüave, Ne nepühücü. Xepücaheumamaca. <sup>21</sup>Hicü meniyuvaüriya memitanaqui'erienicü canuvasio. Yapaucua canuva nivataneni cuiepa haque memecüinecai.

### Teüteri que memüte'icuvautüvecai Qesusi

<sup>22</sup>Mericiüsü 'uxa'arieca teüteri haracuna 'anutaüye memüti'ucai mecaniuneniere mana mucateicü xevitü canuva xEICÜA, hipatü pücatixaü. Mepunenierixü Qesusi müca'acayerüvecai mücü canuvasio teyü'üquitüvamete vahamatü, masi teyü'üquitüvamete memecü yuhücüate. <sup>23</sup>Hipatüta canuvate menyecüne Tiveriya. Mana hura meniu'axüani haque pa memeticuai Ti'aitame pamüpariyusi 'ipitüacu Cacaüyari. <sup>24</sup>Me'uneniererca teüteri Qesusi mana müca'uyeicacai, teyü'üquitüvametemamata memüca'u'uvacaicü, mümetari canuvasio mecayaxeca menecüne

Caperünaumepai me'icuvautüvetü  
Quesusi.

**Quesusi pa tucari  
tiyupitüvame mühücü**

<sup>25</sup>Haracuna 'anutaiye  
meheitaxeyaca müpaü  
metenitahüave, Ti'üquitame,  
quepaucua pepunua 'uvapai.  
<sup>26</sup>Quesusi müpaü tivaruta'ei, Niuqui  
caniseüyeni que nemütixecühüave,  
xepücanesicuvautüve  
'inüarite xemüxeicü. Pa  
xemeticuaicü xemetihuxaicü  
püta xepünesicuvautüve.  
<sup>27</sup>Xepücate'uximayaca 'icuai  
mütüpünive xema'livacü xeicüa.  
Xequetene'uximayaca püta  
xeme'livacü 'icuai 'amütiterive  
tucari mücaxüve müxepitüa Yuri  
Tevi mütixemini. 'Uquiyarieya  
Cacaüyaritütü ni'inüaritäni 'iya.  
<sup>28</sup>'Ayumieme müpaü metenitahüave,  
Queri teteyurica Cacaüyari  
'uximayasicaya temüte'uximayacacü.  
<sup>29</sup>Quesusi müpaü tivaruta'ei.  
'Icü canihücütüni Cacaüyari  
'uximayasicaya, yuri  
xemüte'eriecacü 'iya meiyenü'asie.  
<sup>30</sup>Müme mete'icühüave, Mericüte,  
tita petiyurienne 'inüari, temixeiyacü,  
yuri temümateta'eririenicü.  
Que petiu'uximayata. <sup>31</sup>Tame  
tatevarima manana payari  
metenicuacaitüni macumavesie,  
que müre'uxa, Taheima mieme pa  
tinivamicuacaitüni. <sup>32</sup>Hicü Quesusi  
müpaü tivarutahüave, Niuqui  
caniseüyeni que nemütixecühüave,  
Muisexi capühücütücai que mü'ane  
müxe'umi mücü pa taheima mieme.  
Ne'uquiyari püta tinixemicuani  
tita yuricü mütüpa taheima mieme.

<sup>33</sup>Que mü'ane taheima macaneica,  
tucari müvamicua cuiepa  
memütama, mücütütü canihücütüni  
Cacaüyarisüa mieme pa. <sup>34</sup>Müme  
metehehüave, Ti'aitame,  
'aheyemecü quetatineumicua 'icü  
pa. <sup>35</sup>Quesusi müpaü tivarutahüave,  
Ne necanihücütüni pa tucari  
tiyupitüvame. Que mü'ane nehesüa  
müye'ani pücaheuhacamücüni. Que  
mü'ane nehesie yuri müti'erie havai  
pücaheuharimücüni hasuacua.  
<sup>36</sup>Masi yanepütixecühüavecai,  
xepünesixeiya peru yuri  
xepücate'erie. <sup>37</sup>Naime ne'uquiyari  
münetipitüa nehesüa püye'ani. Que  
mü'ane nehesüa müye'ani, tacua  
nepüca'anuyehüani. <sup>38</sup>Ne taheima  
nepüca'acane tita münetinaque  
yanemütüyurienenicü. Tita  
mütinaque 'iya munesiheyenü'a  
püta yanemütüyurienenicü  
nepacane. <sup>39</sup>'Ipaü catininaqueni 'iya  
munesiheyenü'a, nai münetiupitüa  
nemücaheiyehüanicü ni xeime,  
masi nemenucuquetüanicü tucari  
'aye'ayu quepaucua mütüpare.  
<sup>40</sup>'Ipaürita catininaqueni  
ne'uquiyari, yunaitü memixeiya  
nu'aya, yuri memüte'erie hesiena,  
tucari mücaxüve memexeiyanicü.  
Ne nepüvaranucu'uitüani tucari  
'aye'ayu quepaucua mütüpare.  
<sup>41</sup>Hicü Huriyusixi  
meniniuquixiecaitüni hepaüsitana  
müpaü mutayücü, Ne pa  
necanihücütüni taheima macane.  
<sup>42</sup>Müpaü menitüyanecaitüni,  
'Icü catiquesusi Cuse münu'aya.  
Tame quemasiyaya varusiyaya  
tepüvamate. Quetütü paine hicü  
taheima macane. <sup>43</sup>Quesusi müpaü  
tivaruta'ei, Xepücaniuquixieca

yusata. <sup>44</sup>Xevitü püca'yüve nehesüa müye'ani, me xüca ne'uquiyari munesiheyenü'a 'enucuhana xeicüa püyüve. Ne tucari 'aye'ayu quepaucua mütapare necanenucuquetüamücü.

<sup>45</sup>Texaxatamete vaxapasio müpaü catine'uca, Caca'yari tiniva'üquitüaca yunaima. Yunaitü memü'lenana ne'uquiyari que maine, memüteyü'üquitüa, müme nehesüa mecaniye'axüacuni.

<sup>46</sup>Perusü xevitü püca'ixeyave ne'uquiyari. Que mü'ane Caca'yarisüa miemetütü 'amuyeica, mücü xeicüa canixeyaveni ne'uquiyari. <sup>47</sup>Niuqui caniseyüeni que nemütixecühüave, que mü'ane nehesie yuri müti'erie, tucari mücaxüve canexeyani.

<sup>48</sup>Ne pa tucari tiyupitüvame necanihücütüni. <sup>49</sup>Xetevarima manana payari metenecuacaitüni macumavesie. Müme menecuini.

<sup>50</sup>Icü canihücütüni pa mayeyuri taheima macaneica tevi miticuanicü mücamünicü. <sup>51</sup>Ne necanihücütüni pa mayeyuri taheima macane. Xüca tevi 'icü pa 'uticuan, yuheyemecü payeyurini. 'Icü pa nemüyetuani ne, nevaiyari canihücütüni, cuiepa memütama vatucari cani'ayumiemetüni.

<sup>52</sup>Hicü Huriyusixi meniyuxamurietüvecaitüni yametyücühüavetü, Quetütü püyüve 'icü yuvaiyari mütasimicua temiticuanicü.

<sup>53</sup>Quesusi 'ayumieme müpaü tinivarutahüave, Niuqui caniseyüeni que nemütixecühüave, xüca xeca'iticuani Yuri Tevi vaiyarieya, xüca xuriyaya

xeca'anu'ieni, tucari xepücahexeiya yuhesie. <sup>54</sup>Que mü'ane nevaiyari mücüa'a nexuriya mü'ie, tucari mücaxüve canexeyani. Tucari 'aye'ayu quepaucua mütapare, necanenucuquetüamücü. <sup>55</sup>Ne nevaiyari yuricü canicüaitüni, nexuriya yuricü cananu'ivani.

<sup>56</sup>Que mü'ane nevaiyari mücüa'a nexuriya mü'ie, mücü nehesie tiviyatü niyuhayevamücü, neta hesiena netiviyatü netinehayeva.

<sup>57</sup>Ne'uquiyari mayeyuri cuiepa que münerenü'apaü, ne que nemürayeyuri ne'uquiyaricü, müpaürita yaxecüa que mü'ane munesicua'a, mücüta canayeyuricamücü necümana.

<sup>58</sup>Icü canihücütüni pa taheima macane. Xetevarima que memüte'ucuai que memüte'ucui, müpaü püca'ane. Que mü'ane 'icü pa mücüa'a yuheyemecü canayeyuricamücü. <sup>59</sup>Müpaü niutayüni Caperünaumesie ti'üquitatü tuquita.

#### **Niuqui tucari mücaxüve hepaüsita**

<sup>60</sup>Hicü 'ayumieme teyü'üquitüvametemama yumüiretü me'u'enanaca müpaü meniutiyuani, 'Icü niuqui canicuaniveni. Quepai püyüve mi'enieni. <sup>61</sup>Quesusi yu'iyarisie retimaica memüniuquixiecaicü teyü'üquitüvametemama 'icü hepaüsita, müpaü tinivarutahüave, 'Icücü xetetiquetamürique 'acu. <sup>62</sup>Qesü yüniqueyu xüca xe'ixeyanique Yuri Tevi mana 'utimiecame haque meripai mecatei. <sup>63</sup>'Iyari canihücütüni tucari tiyupitüvame. Vaiyari 'asipüca'yüni.

Tita nemütixecuxaxatüva ne, mücü cani'iyaritüni canitucaritüni.

<sup>64</sup>Peru hipatü xeme yuri xepücate'erie. Qesusi matüaripai nivamaicaitüni quehate müme yuri memücate'eriecai, timaicaita que mü'ane miyetuaniquecai. <sup>65</sup>Müpaü tinicuxatacaitüni, 'Ayumieme nepütixecühüave, xevitü mücayüve nehesüa müye'ani xüca ne'uquiyari müpaü catipitüaca.

<sup>66</sup>Mücü yumüiretü teyü'üquitüvemetemama yucutama menitacüni, hamatüana mepüca'u'uvacairi. <sup>67</sup>'Ayumieme Qesusi müpaü tinivarutahüave tamamata heimana yuhutame, Xemerita xeteyuvaüriya xemüyehu.

<sup>68</sup>Simuni Pecuru müpaü ninita'eiya yucu'imavatü, Ti'aitame, quepai rahesüa tepüteyehu. 'Ecüsü niuqui tucari mücaxüve hepaüsita pecanexeyani. <sup>69</sup>Hicürixüa yuri tecateniuta'erieni, tecamanetimani 'ecü que mü'ane Cacaüyarisüa mümieme müpasie pemühücücü.

<sup>70</sup>Qesusi müpaü tivaruta'ei, Camü necatixe'anayexei tamamata heimana yuhutame xeme. Xevitü xeme Cauyumariepaü cani'aneni. <sup>71</sup>Mücü Cura Simuni nu'aya 'Isicariutitanaca nixatacaitüni. Mücü niyetuaniquecaitüni xevitü mühücütücai tamamata heimana yuhutatü.

**Qesusi 'ivamama yuri que memücate'eriecai hesiena cuxi**

**7** Mericüsü 'arique Qesusi Carereya niuyeicacaitüni. Pücayuvaüriyacai Cureya müyeicani Huriyusixi memicuvautüvecaicü me'imienique.

<sup>2</sup>Hicü Huriyusixi va'ixüarari nahuracaitüni quepaucua xamaru memutiveviva. <sup>3</sup>'Ivamama 'ayumieme müpaü metenitahüave, 'Uva peyeyame Cureya quenemie, 'ahesüa miemete teyü'üquitüvamate memixeyacü tita pemütüyuriene.

<sup>4</sup>Tevi 'avie capütüyuriene, ticuvaunetü yunaime vahürüpa mümarivanicü. Xüca müpaü petiyurieneni, pemasiücüme quena'ayeitüa cuipea memütama vahüxie. <sup>5</sup>Ivamamata yuri mepücate'eriecai hesiena. <sup>6</sup>Hicü Qesusi müpaü tinivarutahüave, Ne netucari püca'aye'ave cuxi. Xeme tixaü xepücatetacuevi.

<sup>7</sup>Cuipea memütama mepücaüvave memüxe'uxive'erieca. Ne püta mecaneni'uxive'erieca vahepaüsita nemütihecüatacü, tita memüteyurie 'axa mü'anene nemutainecü.

<sup>8</sup>Xemeri xequene'ixüarayü. Ne cuxi nepüca'ixüaramie 'icüsie, netucari müca'aye'avecü cuxi.

<sup>9</sup>Müpaü tivarutahüaveca Carereya niyuhayeva.

**Qesusi que mütiuyuri 'ixüararipa quepaucua xamaru memutiveviva**

<sup>10</sup>Hicü 'ivamama meheu'ixüarayucacu 'iyata neyani 'arique, 'avie xeicüa cayuhecüatatü. <sup>11</sup>Hicü Huriyusixi meneicuvautüvecaitüni 'ixüararipa müpaü me'utiuyatü, Haque peyeica 'iya. <sup>12</sup>Teüteri vaüca mepütecuxatacai hepaüsitana, 'avie xeicüa. Hipatü müpaü meniutiyanecaitüni, Masi 'aixüa pütüca'iyari. Hipatüri mete'utiyanecai, Tixaüsietü püvareuyexürüva teüteri.

<sup>13</sup>Masi xevitü teüteri vahürüpa pücatixatacai hepaüsitana yunaitü memüvamacarücaicü Huriyusixi.

<sup>14</sup>Hicü 'ixüarari hixüapariecari Qesusi neutiyune tuqupa. Mana tini'üquitacaitüni.

<sup>15</sup>Huriyusixi menihüxiyacaitüni yame'utiyuatü, Queri timaive 'icü 'utüarica. Pücatiyuti'üquitäve.

<sup>16</sup>Qesusiri 'ayumieme müpäü tinivarutahüave, Tita nemüti'üquita nehesüa pücamieme. Que mü'ane munesihyenü'asüa püta canimiemetüni. <sup>17</sup>Xüca tevi yuvaüriyani yamüticamienicü tita mütinaque 'iya, catinimaicamücü tita nemüti'üquita hepaüsita, xüca Cacaüyarisüa miemetüni, me xüca necümana ne'utaineni nusu. <sup>18</sup>Que mü'ane yücümana mutaine catinicuvauneni visi müticühüavarüvanicü. Que mü'ane müticuvauneni visi müticühüavarüvanicü 'iya meiyenü'a püta, mücü yuri paine, tita mücatiheiserie pumave heisiena.

<sup>19</sup>Camü Muisexi catixe'upitüa 'inüari niuquiyari xemeixeyanicü. Perusü ni xevitü xeme yapücaticamie 'inüari niuquiyarisie. Titayari xenetecuvautüve xenesimienique. <sup>20</sup>Teüteri müpäü mete'lita'ei, Cari cacäiyari 'axa mü'ane pümasinü'ü. Quepai masicuvaune masimienique.

<sup>21</sup>Qesusi müpäü tivaruta'ei, Ne 'uxipiya tucarisie heiva xecüa tixaütü nepütiuyuri, peru yunaitü xecanihüxiyaca. <sup>22</sup>'Ayumieme meta Muisexi nixe'upitüani xitequiya 'inüariyari. Muisexisüa pücamieme, tatevarima vahesüa

püta canimiemetüni. Peru 'uxipiya tucarisie xepi'inüaritüa 'uqui nunusi. <sup>23</sup>Xüca 'uqui 'uxitequieni 'uxipiya tucarisie Muisexisüa mieme 'inüari niuquiyari müca'ayeitüarienenicü, que xeneteheca ne nai 'aixüa reu'eriecame nemayeitüacü xeime tevi 'uxipiya tucarisie. <sup>24</sup>Que mütüyuxexeiya xecüa niuqui xepücavevieca, que mütitheiserie püta xequenevevieca niuqui.

#### Caticürisitu 'icü, que memutiyanecai

<sup>25</sup>Hicü Querusaremetari hipatü 'ayumieme müpäü meniutiyanecaitüni, 'Icü catihücü memicuvautüve me'limienique. <sup>26</sup>Camü yunaime vahürüpa catinicuxatani, 'asimepücatehehüave. Ta'uquiyarima xüari yuricü mepücaheitima 'icü mücürisitu heiserie mupitüarie. <sup>27</sup>Perusü tame tecanimaica 'icü haque memieme. Quepaucua munuani Cürisitu, xevitü 'asipücatimaica haque memieme.

<sup>28</sup>Hicü Qesusi müpäü tiniuhiva tuqui curaruyarita ti'üquitatü, Xeme xenetemate 'acu, haque nememieme xetemate. Ne necümana nepücanua. Masi yuri canaineni 'iya munesihyenü'a. Xeme xepüca'imate. <sup>29</sup>Nesü necanimaica hesüana nemümiemecü, munesihyenü'acü.

<sup>30</sup>Hicü mecanicuvautüvecaitüni me'iviyaque. Xevitü püca'ivi tucarieya müca'aye'avecaicü cuxi. <sup>31</sup>Teüteri yumüiretü yuri mecateniuta'erieni hesiena. Müpäü meniutiyanecaitüni, Quepaucua

munuani Cürisitu, masi vaüca  
catiyurieneni 'inüarite, 'e'ivatü 'icü  
que mütiyuriene.

**Pareseusixi que memütevaretanü'a  
tupirisixi memiviyacü Qesusi**

<sup>32</sup>Hicü Pareseusixi

meniva'eniecaitüni teüteri  
hepaüsitana vaüca metecuxatame.  
Mara'acate memühürütüariecai  
Pareseusixi vahamatü  
mecanivaretanü'ani tupirisixi  
memiviyacü. <sup>33</sup>Hicü müpaü  
niutayüni Qesusi, Yareutevitü  
cuxi xehamatü neniuyeicamücü.  
'Arique 'iya münesihyenü'asüa  
nepüyemie. <sup>34</sup>Xepünesicuvautüveni  
peru xepücanesitaxeiya. Mücü meta,  
haque nemeyeicani xepücaüyivave  
xemeta'axüani. <sup>35</sup>Huriyusixi  
müpaü metenyücühüavecaitüni,  
Que tiyune 'icü temüca'itaxeiyacü.  
Cüriyecusixi vasata memeutayeixüa  
vahesüa catiyemie, Cüriyecusixi  
tivareti'üquitüanique. <sup>36</sup>Qesusi  
'icü titita niuqui müya  
mutaine, Xepünesicuvautüveni,  
xepücanesitaxeiya, haque  
nemeyeicani xepücaüyivave  
xemeta'axüani, haitü.

**Hatüapaü mü'anene ha  
muhanesie miemepäü**

<sup>37</sup>Hicü ve'eme tucarisie  
'ixüarari heutiparirümecacu,  
mana niuvecaitüni Qesusi.  
Nahivacaitüni müpaü 'utaitü, Xüca  
tevi heuharimücüni, nehësüa  
quenuani, que'anuhareni. <sup>38</sup>Que  
mü'ane nehësie yuri müti'erie,  
'utüarica manuyünepaü, hatüapaü  
'anetü canihancamücü taitana  
ha muhanesie miemepäü 'anenetü.

<sup>39</sup>Müpaü niutayüni 'Iyari xatätü  
memitanaqui'erieniquecai müme  
yuri memüteta'erieniquecai  
hesiena. Mücü 'Iyari  
mepücatanaqui'erivavecai  
cuxi Qesusi cuyi visi 'anetü  
müca'ayeitüarievecaicü.

**Teüteri hixüata que  
memüte'uyusanaxü**

<sup>40</sup>Hicü teüteri hipatü 'icü  
niuquite me'u'enieca müpaü  
menütüyuaneaitüni, Yuricü  
mücü tixaxatame canihücütüni  
'icü. <sup>41</sup>Hipatüta mete'utiyuanecai,  
Cari 'icü Cürisitu canihücütüni.  
Hipatüta mete'utiyuanecai, Masi  
Cürisitu Carereya pücamiemetüni.  
<sup>42</sup>Camü 'utüarica müpaü  
caranuyüne, Cürisitu Raviri  
püxiüyariyatüni, quiecarisie Raviri  
mecateisie pümiemetüni Verenisie.  
<sup>43</sup>'Ayumieme teüteri hixüata  
meniyusana cümana. <sup>44</sup>Hipatüta  
müme meniviyacuaitüni, perusü  
xevitü püca'livi.

**Tevi hasuacu pücatixatacai 'icü  
müticuxatapaü, que memutiyuanecai**

<sup>45</sup>Hicü tupirisixi meniu'axüani  
mara'acate memühürütüariecai  
vahesüa Pareseusixi vahesüa.  
Mümeri müpaü metenivarutahüave,  
Titayari xecate'i'atüa. <sup>46</sup>Tupirisixi  
müpaü metevaruta'ei. Tevi  
hasuacuari pücatixatacai 'icü  
tevi müticuxatapaü. <sup>47</sup>Hicü  
Pareseusixi müpaü metevaruta'ei,  
Cari xemeta xepeuyexüriya.  
<sup>48</sup>Camü te'aitamete Pareseusixi  
que mü'ane müme hesiena yuri  
pütiuta'eri. <sup>49</sup>Peru 'icü teüteri  
'inüari niuquiyari memücamate



'axa mepütecühüavarüva.

<sup>50</sup>Hicü 'iya meripai Qesusisüa munua yüvicüta Nicuremu

müpaü tinivarutahüave, xevitü mühücütücaicü müme,

<sup>51</sup>Camüsü ta'inüari niuquiyaricü tepüca'enutahüani tevi xüca meri teca'l'enieni que mutaine, xüca teca'imaica que mütiyuriene.

<sup>52</sup>Mümeri müpaü metenita'eiya, Qesü 'ecütari Carereya petimieme. Quetinecuvava, quetinexeyani Carereyasie müca'ayenevecü tixaxatame havaicü.

**'Uca muviyari xeime cünayamame  
meyucumaüvacacu**

<sup>53</sup>Yuxexuitü yuquie mepeutayeixüa.

**8** Qesusisü yemurisie neyani Huriva Mati'lu müracusevasie. <sup>2</sup>Ximeri tavari tuquipa ninuani. Yunaitü teüteri hesüana meni'axecaitüni. Mana 'ayerüca tiniva'üquitüacaitüni.

<sup>3</sup>Hicü te'ütüvamete Paresexixi vahamatü mecani'atüirieni 'uca muviyarie xeime cünayamame meyucumaüvacacu. Hixüapa me'itaqueca <sup>4</sup>müpaü metenitahüave, Ti'üquitame,

'icü 'uca caniuviyarieni xeime cünayamatü meyucumaüvame.

<sup>51</sup>Inüari niuquiyarisie Muisexi müpaü catatiniü'aitüani tetexicü temüvatituaxanicü müya memüyüa. Camüsü que petayüni 'ecü. <sup>6</sup>Müpaü meniutiyuani me'l'isipatüvetü me'itaxanetaque. Qesusisü 'anacatusireca, cuiépa tiniuta'utüani yu'itüvamecü. <sup>7</sup>Müme 'ameteheuterecu meheicu'ivaviyatü, 'iya nanucuqueni. Müpaü

tinivarutahüave, Que mü'ane xeme 'axa mücatiyurieve, mücü meri pitatuaxa tetcü. <sup>8</sup>Tavari 'anacatusireca, cuiépa tiuta'utüa.

<sup>9</sup>Mümeri memü'enana, va'iyari vatate'acacu, meneutayeixüani yuxexuitü me'ayecücatü, 'uquiravesixi meri. Qesusi yuxaüta niyuhayeva, 'uca hixüapa muvecai tiyuhayevaxüta. <sup>10</sup>Hicü 'anucuqueca Qesusi, hipame cavaxeiyatü, 'uca xeicüa, müpaü tinitahüave, Neuxei, 'uca, haquevari müme masixanetamete. Xevitü 'ahesie carahüa. <sup>11</sup>Iya tiutayü, Ti'aitame, haquevasü. Qesusi titahüavixü, Neta 'ahesie nepücatihüani. Quenemie, tavari 'axa pepücareyurieni.

**Qesusi cuiépa memütama  
vahecüarivivame mühücü**

<sup>12</sup>Mericüsü Qesusi tavari tinivarutixatüani müpaü 'utaitü, Ne cuiépa memütama vahecüarivivame necanihücütüni. Que mü'ane munesi'anuveiya yüvipa püca'uyeicani, masi hecüariya canexeyacamücü tucaritüme.

<sup>13</sup>Paresexixi 'ayumieme müpaü metenicühüaveni, 'Ecü 'ahepaüsita xeicüa pecatinihecüatani. Tita pemütihecüata püca'yuri. <sup>14</sup>Qesusi müpaü tinivaruta'eiya, Sepasü nehepaüsita nemütihecüata, tita nemütihecüata puyuri nemütimatecü haque nememieme que nemütimie. Xeme 'asixepücatemate haque nememieme que nemütimie. <sup>15</sup>Xeme teüteri vahepaü xepüteyu'inüata. Ne püta tevi nepüca'inüata.

<sup>16</sup>Masisü xüca ne'ita'inüataque,

nepihēcüatüaniqueyu tita yuricü müti'inüari nehexeyatü, nexaüta nemüca'uyeicacü, 'iya munesihyenü'a nehamatü muyeicacü. <sup>17</sup>Mücü meta, xe'inüari niuquiyarisie müpaü catine'uxani, Yuhutatü teüteri tita memütetahecüata puyuri. <sup>18</sup>Mericüte, ne necanihücütüni que mü'ane nehepaüsita mütihecüata, ne'uquiyari munesihyenü'a nehepaüsita tinihecüatanita. <sup>19</sup>Müme müpaü metenitahüave, Haqueri 'a'uquiyari. Quesusi müpaü tivaruta'ei, Xeme xepücanesimate ne, ne'uquiyarita xepücamate. Xüca xenesimaicaque ne, ne'uquiyarita xepümaicaqueyu. <sup>20</sup>Icü niuquicü catinixatacaitüni tumini mahüriesie tuqui curaruyarita ti'üquitatü. Xevitü püca'ivi tucarieya müca'aye'avecaicü cuxi.

**Que nemüreumie xepüca'yüvave  
xemeta'axüani, que mainecai**

<sup>21</sup>Hicü tavari müpaü tinivarutahüave, Nesü nepüyemie. Xepünesicuvautüveni, tita 'axa xemüteyuriesie xeteviyatü xecanicuicuni. Que nemüreumie xepüca'yüvave xemeta'axüani. <sup>22</sup>Huriyusixi 'ayumieme müpaü metenixatacaitüni, Yücümana catiyumieni müpaü mutayücü, Que nemütümie xepüca'yüvave xemeta'axüani. <sup>23</sup>'Iya müpaü tinivarutahüave, Xeme 'ena xepümiemete. Ne püta taheima necaniamiemetüni. Xeme 'ena cuiepa xepümiemete. Ne püta 'ena cuiepa nepücamieme. <sup>24</sup>'Ayumieme yanepütix'e'utahüavixü xemücuini tita 'axa xemüteyuriesie xeteviyatü.

Xüca yuri xecate'uta'erieni quename ne nehücü, xecanicuicuni tita 'axa xemüteyuriesie xeteviyatü. <sup>25</sup>Müme müpaü metenicühüavecaitüni, 'Ecü que pepüpaicüte. Quesusi tivarahüave, Yemecü nepühücü tita nemütixecuxaxatüva. <sup>26</sup>Vaüca necaneixeyiani xehepaüsita nemütixaxatanicü, xehebie nemütihüpanicü. 'Iya munesihyenü'a masi yuri canaineni. Tita nemütü'eni 'iya yahainecacu, mücü nepütivataxatüani cuiepa memütama. <sup>27</sup>Müme 'asimepücatehetima yu'uquiyari müvacuxaxatüvacaicü. <sup>28</sup>Hicü Quesusi müpaü niutayüni, Quepaucua xemenutihana Yuri Tevi, 'anari xepütehetimani ne nemühücücü, necümana 'asinemücatiyuriencü. Ne'uquiyari münetiü'üquitüapaü, müpaü xeicüa nepütixaxata. <sup>29</sup>Mücü meta, 'iya munesihyenü'a nehamatü caniyueicani. Pücanesi'ucu'eiri nexaüta, neheyemecü yanemütüyuriencü tita mütinaque. <sup>30</sup>Ipaü ticuxatacacu yumüiretü yuri mecateniuta'erieni hesiena.

**Tita yuri maine canixetixünamücü,  
que mainecai**

<sup>31</sup>Quesusi 'ayumieme müpaü tinivarutahüave müme yuri memüte'ita'eriri Huriyusixi, Xeme nenuquisie xeteviyatü xüca xeyuhayevani, yuricü nehësüa miemete teyü'üquitüvamete xecanihümetüni. <sup>32</sup>Tita yuri müraine xecanetimaicuni. Mücü yuri maine canixetixünamücü.

<sup>33</sup>Müme müpaü metenita'eiya, Tame 'Apurahami tecanixüyarimamatüni. Xeimesie mieme vaüriyarica tepücate'uti'uximayataxü hasuacua. Que pehaine, xexüxünitü xemacüne pemaine. <sup>34</sup>Quesusi müpaü tivaruta'ei, Niuqui caniseüyeni que nemütixecühüave, yunaitü 'axa memüteyurie vaüriyarica meteni'uximayaca tita 'axa müti'anesie mieme. <sup>35</sup>Meriçüte, vaüriyarica müti'uximaya yuheyemecü 'apüca'uca quiecamepaü. Quiecame nu'aya püta 'apuca yuheyemecü. <sup>36</sup>Xüca nu'aya xetixünamücü, panasi xexüxünitü xecanacünicuni. <sup>37</sup>Ne nepütimate 'Apurahami xemüxiüyarimama. Siepüre xecanenicuvautüveni xenesimienique neniüqui müyutexiecü xehesüa. <sup>38</sup>Tita nemütiuxei ne'uquiyarisüa yanepüticuxata. Xemesüari tita xemüte'u'eni yu'uquiyarisüa yaxepütecahu.

<sup>39</sup>Müme müpaü mete'ita'ei, Tame ta'uquiyari 'Apurahami canihücütüni. Quesusi müpaü tivarutahüave, 'Apurahami xüca xexüyarimamatüni, 'Apurahami que mütiyurienecai yaxequeteneyurieca. <sup>40</sup>Masi hicü xepünesicuvautüve xenesimienique. Ne necanitevitüni nemütixecuxaxatüva tita yuri müraïne que nemüti'u'enaxü Cacaüyarisüa. Xehepaü capütüyuri 'Apurahami. <sup>41</sup>Xeme xe'uquiyari que mütiyuriene yaxetenicahuni. Mete'itahüave, Tametütü tavarusi que mü'ane mücacünayatücai, mücü

pücatasi'utivevi. Xei 'uquiyariyari tecanexeiyani Cacaüyaritüme. <sup>42</sup>Quesusi müpaü tivarutahüave, Xüca Cacaüyari xe'uquiyaritünique, xecaneninaqui'eriecaqueyu ne. Ne Cacaüyarisüa necaneyeyani necaninuaniri. Mücü meta, necümana nepücanua. 'Iya püta caneneyenü'ani. <sup>43</sup>Titayari xecateheitimaivave tita nemütixata. Xemüca'yüvavecü neniüqui xemü'enieni, 'ayumieme xepüca'iquema. <sup>44</sup>Xeme yu'uquiyarisüa xecanimiemetetüni Cauyumariesüa. Xecaniyuvaüriyani yaxemüteyuriecacü tita mütihive'erie xe'uquiyari. 'Iya meripai catiniyumemivani. Tita yuri müraïnesie tiviyatü 'apüca'uvecai, tita yuri müraïne mumavecü hesiena. Quepaucua 'itaricacü müticuxata, yücümana tinicuxatani müti'itavacü, memüte'itava müva'uquiyaricü. <sup>45</sup>Ne püta yuri nemainecü, yuri xepücanete'ereri. <sup>46</sup>Que mü'ane xeme nehesie pürähüani, 'axa nemütiuyuri 'utaitü. Me xüca yuri nehaineni, titayari yuri xecanete'ereri. <sup>47</sup>Que mü'ane Cacaüyarisüa mümieme cani'enieca tita Cacaüyari müticuxata. 'Ayumieme xepücaheu'enan, Cacaüyarisüa xemücamiemetecü.

#### Cürisitu que 'amütiuyeicacai sutüapai

<sup>48</sup>Huriyusixi müpaü metenita'eiya, Cari 'aixüa tenitüyuaneni quename 'ecü pesamariyatanaca, quename cacaüyari 'axa mü'ane masinü'ü. <sup>49</sup>Quesusi tivaruta'ei, Neri cacaüyari 'axa mü'ane pücanesinü'ü.

Masi 'aye'ame ne'erietü nepixata ne'uquiyari, xeme püta ne'aye'ame xecanesi'erietü xepünesixata.

<sup>50</sup>Ne tixaü nepüaticuvaune visi nemüticühüavarüvanicü. Que mü'ane müticuvaune visi nemüticühüavarüvanicü, que mü'ane 'isücamepaü müva'inüata, mücü 'acaniuyeicani. <sup>51</sup>Niuqui caniseüyeni que nemütixecühüave, xüca tevi nenuquisie yaticamieni, hasuacua pücahetimani müya.

<sup>52</sup>Huriyusixi müpaü mete'itahüave, Hicürixüa tepütehetima cacaiyari 'axa mü'ane mümasinü'ü.

Camü 'Apurahami caniumüni, texaxatameteta mete'ucui. 'Ecüsü müpaü pecanaineni, xüca tevi nenuquisie yaticamieni, müya pücameaica hasuacua. <sup>53</sup>Ecü que petive'eme ta'uquiyari 'Apurahami 'asicayüvecacu. Mücü caniumüni, texaxatameteta mete'ucui. Titari pera'ayeitüaxime.

<sup>54</sup>Qesusi tivaruta'ei, Xüca ne visi nehainenique nehapaüsita, tixaü pücatihücütüniqeyu visi que nemüticühüavarüvaniqueyu.

Ne'uquiyari canihücütüni que mü'ane visi maine nehapaüsita. Xeme yaxeputiyuane quename xecacaiyari 'iya. <sup>55</sup>Masi xepücaheitimavave. Nesü püta necanimaica. Xüca nehainenique quename neca'imate, xehepaü neti'itavatü nenayaniqueyu.

Masiri necanimaica, niuquieyasie yanepüticamie. <sup>56</sup>Xe'uquiyari 'Apurahami cuini mieme tiniyutemavieca netucari ha'erivatü mixeiyacü. Nixeiya, tinaqui'acai.

<sup>57</sup>Huriyusixi 'ayumieme müpaü metenitahüave, 'Ecü huta teviyari

heimana tamamata viyari pepücahü. Que petixei 'Apurahami.

<sup>58</sup>Qesusi tivarutahüave, Niuqui caniseüyeni que nemütixecühüave, 'Apurahami 'aca'uyeicacacu cuxi, 'aneniuyeicani ne. <sup>59</sup>Hicü 'ayumieme tetexi mecaniutitücü me'ituaxaque. Qesusi niyuti'avieta, tuqui curaruyarita nivayeyani vasata 'umietü.

### Qesusi que mürenayehüa tevi 'acüpetü mutinuivaxü

**9** Hicü mana 'uyemietü  
tevi niuxeiya

'acüpetü mutinuivaxü.

<sup>2</sup>Teyü'üquitüvametemama müpaü metenita'ivaviya, Ti'üquitame 'acu, quepai 'axa pütüuyuri, 'icü 'axa tüuyuri, 'uquiyarimama nusu 'axa mepüte'uyuri, 'acüpetü mutinuivaxücü. <sup>3</sup>Qesusi müpaü niutayüni, 'Icü müpaü püca'ane 'axa mütiuyuricü, ni 'uquiyarimamata 'asimemüte'uyuricü müpaü püca'ane.

Mümasiücürecü Cacaüyari que mütiyuriene hesiena püta cani'aneni. <sup>4</sup>Caneuyeveca 'iya münesiheyenü'a que müti'uximaya, yanemütiyurienenicü ne 'uhecüacacu cuxi. Yüriya 'acanamieni quepauca mücayüve müti'uximayaca.

<sup>5</sup>Quepauca cuiepa nemuyeica, necanihecüariyatüni cuiepa memütama vahesie mieme. <sup>6</sup>Müpaü 'utayüca niuta'aüsicavieni cuiepa. Haxu 'uhaviyaca yu'aüsicacü, hüxitana haxu nevirixüani.

<sup>7</sup>Müpaü tinitahüave, Quenemie, mana quenehütaimami ha mayema Siruhe müracusevasie, taniuquicü Mutanü'arie müracusevasie.

Hicü neyani, nanacahütaiama,  
 heunieretü 'ayaca, nacunuani.  
<sup>8</sup>Hicü 'auravatariri, mümeri  
 meripai memixeyacai  
 rimusnavieneme, müpaü  
 meniutiyuanecaitüni, 'Icü catihücü  
 mana mutiyeixacai müticu'ivavacai.  
<sup>9</sup>Hipatü mete'utiyuanecai, 'Eri, 'iya  
 pühücü. Hipatüta mete'utiyuanecai,  
 Tixaüsüari, hepaüna pütüyuxexeya  
 xecüa. 'Iyasü müpaü nainecaitüni,  
 Ne nepühücü. <sup>10</sup>Hicüsü müpaü  
 metenitahüave, Mericüte, que  
 petiunieritüarie. <sup>11</sup>'Iya müpaü  
 tivaruta'ei, Mücü tevi Qesusi  
 mütiteva haxu 'uhaviyaca  
 nehüxita canenavirixüani.  
 Müpaü netiutahüavixü, Siruhe  
 quenemie quenhütaimamie.  
 Neheyaca ne'anacahütaimaca  
 nepanutanierixü. <sup>12</sup>Müme  
 metehühüave, Haqueri mücü.  
 Hauqui, tiutayü.

**Pareseusixi que  
 memüte'ita'ivaviyaxü  
 macüpecai manayehüiya**

<sup>13</sup>Mericusü Pareseusixi vahesüa  
 mecaneivitüni macüpecai.  
<sup>14</sup>'Uxipiya tucari nihücütücaitüni  
 quepaucua Qesusi haxu  
 muhaviyaxü menutanieritüa.  
<sup>15</sup>'Ayumieme tavori menita'ivaviya  
 Pareseusixi que tiunierixü. 'Iya  
 müpaü tivarutahüave, Haxu  
 pünesi'avirixüa nehüxita,  
 nepanacahütaimaxü, hicü  
 nepeuniere. <sup>16</sup>Pareseusixi  
 hipatü 'ayumieme müpaü  
 meniutiyuanecaitüni, Xüari 'iya tevi  
 Cacaüyarisüa pücamieme, 'uxipiya  
 'inüariyarisie yamücaticamecü.  
 Hipatü mete'utiyuanecai, Quepaü

tiyüve tevi 'axa mütiyuriene 'inüari  
 'ipaü 'aneneme mütiyuriene. Hixüata  
 mepuyusanaxüa. <sup>17</sup>'Ayumieme  
 tavori müpaü metenitahüave  
 macüpecai, Que pe'utaine 'ecü 'iya  
 hepaüsita. Pümasi'anutanieritüa.  
 'Iya rainecai, Catinixaxatametüni.  
<sup>18</sup>Hicü Huriyusixi yuri  
 mepücate'uta'eri quename 'acüpecai  
 'anutanierixü, 'arique xecüa yuri  
 mepüte'uta'eri mevarutahüaveca  
 manutanierixü 'uquiyarimama.  
<sup>19</sup>mevaruta'ivaviyaca müpaü  
 me'utiyuatü, 'Icü tixenive,  
 hepaüsitana xemutiyuane  
 quename 'acüpetü 'utinuiyaxü.  
 Que yüanetü hicü peuniere.  
<sup>20</sup>'Uquiyarimama menivaruta'eiya  
 yame'utiyuatü, Tame tepütemate  
 'icü tanive mühücü 'acüpetü  
 mutinuivaxü. <sup>21</sup>Masi hicü que  
 yüanetü meuniere 'asitepücatemate.  
 Quepai menutanieritüa  
 'asitepücatemate. Mücü  
 xequeneuta'ivaviya. 'Ecaniuteviniri,  
 yücümana caniyutaxatamücüri.  
<sup>22</sup>'Uquiyarimama müpaü  
 meniutiyuanecaitüni Huriyusixi  
 memüvamacarücaicü.  
 Huriyusixi meyu'enieca müpaü  
 meteniyücühüavecaitüni, quename  
 xüca xevitü yutahecüatanique  
 Cürisitusie tiviyatü, tuqita  
 capitüarieniqueyu. <sup>23</sup>'Ayumieme  
 'uquiyarimama meniutiyuani,  
 'Ecaniuteviniri, xequeneuta'ivaviya  
 mücü. <sup>24</sup>Hicü hutarieca  
 menitahüave tevi macüpecai.  
 Müpaü metenitahüave, 'Aixüa  
 queneutayüqui Cacaüyari hepaüsita.  
 Tame tepütemate 'icü tevi 'axa  
 mütiyuriene. <sup>25</sup>Mücü müpaü  
 tivaruta'ei, Me 'asinepücatimate

xüca 'axa tiyurieneni. 'Icü xeicüa necatinimaica ne. 'Ana nepacüpecai, hicürixüa nepeuniere. <sup>26</sup>Hicü müpaü metenitahüave, Que masi'uyuri. Que matiunieritüa. <sup>27</sup>Müpaü tinivaruta'eiya, Meripai yanepütixe'utahüavixü, xepücaheu'enana. Que cuxi xete'enacu tavarı. Xemeta teyü'üquitüvame temama xecate'acünicu. <sup>28</sup>Müme 'axa mepüte'itahüavixü müpaü mete'icühüavetü, 'Ecüsü hesüana mieme tiyü'üquitüvame pepühücü. Tame Muisexisüa miemete teyü'üquitüvamate tepühüme. <sup>29</sup>Tame tecatenimaica Cacaüyari mütitahüavixü Muisexi. 'Icü püta 'asitepücatemate haque memieme. <sup>30</sup>Tevi müpaü tivaruta'ei, Camüte, 'icü pümarive. Xeme 'asixepücatemate haque memieme, peru pünesi'anutanieritüa ne. <sup>31</sup>Tepütamate Cacaüyari mücava'enie 'axa memüteyurie. Masi xüca tevi Cacaüyari 'ayexeyani, xüca yaticamiene tita mütinaque Cacaüyari, cani'eniecamücü 'iya. <sup>32</sup>Sütüapai hicüque pücaxasiva quename tevi 'enutanieritüa que mü'ane 'acüpetü mutinuivaxü. <sup>33</sup>Xüca 'icü Cacaüyarisüa camiemetünique, pücaüveniqueyu 'asimütiyurieni. <sup>34</sup>Müme mete'ita'ei, Cari 'ecü 'axa petiyurienetü peputinuivaxü yemecü. 'Ecü que petati'üquitüa tame. Tacua mecanenuyehüani.

**Yu'iyarisie que  
memüte'acücüpe teüteri**

<sup>35</sup>Mericusü caniu'ena Qesusi quename tacua mehenuyehüa.

'Itaxeyaca müpaü niutayüni, 'Ecü yuri peti'erie que mü'ane Yuri Tevi mühücüsie. <sup>36</sup>Iya tita'ei, Ti'aitame, que püpaicü yuri nemütita'erienicü hesiena. <sup>37</sup>Qesusi titahüave, Pepixei. Que mü'ane 'ahamatü müticuxata, mücü necanihücütüni. <sup>38</sup>Iya tiutayü, Yuri nepüti'erie, Ti'aitame 'acu. Nenevieri nipitüaniri. <sup>39</sup>Qesusi müpaü niutayüni, Ne necaninuani 'ena cuiepa nemüvapatacü, memücaheuneniere memanutanenierenicü, memeuneniere me'acücüpetü memacünecü. <sup>40</sup>Mericusü Pareseusixi hipatü hamatüana memü'uvacai 'icü meniu'enieni. Müpaü metenitahüave, Tamerita tete'acücüpe. <sup>41</sup>Qesusi müpaü tivarahüave, Xüca xe'acücüpenique, mücücü xehesie pücarahüivaniqueyu. Masi hicü müpaü xeputiyuane quename xeheuneniere. 'Ayumieme 'apuve xehesie que mürahüiva.

**Muxasi vacurarü hepaüsita  
ticuxatatü, que müti'üquitacai**

**10** Niuqui canisetüeni que nemütixecühüave, que mü'ane quitenie mücaheutahani muxasi vacuraruta, huteicü püta meutimaque, mücü tinavayame canihücütüni catininavamücü. <sup>2</sup>Que mü'ane quitenie meutahani, muxasi canivahüvemetüni. <sup>3</sup>Iparevivame quitenie catineuyepivani hesiena mieme. Muxasi mecanimaica niuquieyasie. Yuxexuime püvarahüave yumuxasi que memüteteteva,

nivaranuyevitüni. <sup>4</sup>Quepaucua yumuxasi yunaime müvaranuyevitü, mücü varanuhaitüiyatü caniumieni. Muxasi 'utümana mecaniveiyani niuquieyasie memimatecü.

<sup>5</sup>Cuyeicame mepüca'anucuveiya, meniuta'unacuni püta cu'uvamete vanuquisie memücavamatecü.

<sup>6</sup>Quesusi 'icü 'üquisica xatatü müpaü tinivacuxaxatüvacaitüni. Müme 'asimepücatehetima tita mütihücütücai mütivacuxaxatüvacai.

**Quesusi muxasi vahüveme  
'aixüa mütiuca'iyari mühücü**

<sup>7</sup>'Ayumieme tavari müpaü niutayüni Quesusi, Niuqui caniseüyeni que nemütixecühüave, ne muxasi necanivaquitenietüni.

<sup>8</sup>Yunaitü memu'axüa necanuavecacu cuxi ne, tenavayamete mecanihümetüni, menivanavatüveni. Muxasi mepücavaru'eni masi. <sup>9</sup>Ne necaniquitenietüni. Necümana xüca tevi heutahani, nitavicueisitüariemücü. Neutahamücü nivayeyeicamücü, macusiüräyü netamariecaxüamücü.

<sup>10</sup>Tinavayame vanavamütü vacuimütü vata'unamütü xeicüa cani'axeni. Ne püta necaninuani tucari memexeiyanicü, 'anuyuhayevame memexeiyanicü.

<sup>11</sup>Ne ti'üviyame 'aixüa nemütiuca'iyari necanihücütüni. Ti'üviyame 'aixüa mütiuca'iyari yutucari niyetuani muxasi vahesie mieme. <sup>12</sup>Ti'ivame, que mü'ane mücavahüveme, muxasi mücavacusi-yari, mücü canixei-yani 'ürave 'a'amieme. Mücü muxasi

nivacu'e'eirivani niyuta'unani.

'Ürave nivativiyamücü nivataxüriexüamücü. <sup>13</sup>'Iya müti'ivamecü xeicüa püca-yucuerivayurie muxasi vahepaüsita.

<sup>14</sup>Ne necatini'üviyametüni 'aixüa nemütiuca'iyari. Nemuxasima nepüvamate, mümeta menetemate nemuxasi, <sup>15</sup>yaxeicüa ne'uquiyari münetimepaü, ne nemimatepaü ne'uquiyari. Netucari necaniyetüani muxasi vahesie mieme. <sup>16</sup>Hipameta muxasi nepüvarexeiya 'icü xei curaruyarita memücamiemete. Neuyevaca nemüva'atüani mümeta. Neniuqui mecani'eniecuni. Xeime mehexeiyatü ti'üviyame, xei curaruyari mehexeiyatü mecanacünicuni.

<sup>17</sup>'Ayumieme ne'uquiyari caneninaqui'erieca netucari nemüyetuacü tavari nemitanaqui'erienicü. <sup>18</sup>Xevitü pücanesinavairieni, necümana püta necaniyetuamücü. Heiserie necanexei-yani nemiyetuanicü, heiserie nerexei-yata tavari nemitanaqui'erienicü. 'İpaü ne'uquiyari canetiniu'aitüani.

<sup>19</sup>Mericiüsü tavari hixüata meniyusana Huriyusixi 'icü niuquieyacü. <sup>20</sup>Yümüiretü müme müpaü meniuti-yuanecaitüni, Cari cacai-yari 'axa mü'ane caninüca 'iya, püca-yumate. Titayari xete'İlenie. <sup>21</sup>Hipatüta mete'uti-yuanecai, 'Icü niuquieya, cacai-yari 'axa mü'ane minü'ü capüniuquieya. Cacai-yari 'axa mü'ane que ti-yüve müvaranutanieritüani memacüçipe.

**Huriyusixi que  
memüte'ixani'eri Quesusi**

<sup>22</sup>Mericsü 'ana 'ixüarari naye'ani quepaucua hehecuaame memayeitüvacai Querusaresiesie. Niuhaütücaitüni. <sup>23</sup>Quesusi tuqui curaruyarita niyeyecacaitüni Sarumuni 'etüpivarieyatüa. <sup>24</sup>Hicü Huriyusixi 'auriena meniycuxeürieni. Müpäü metenitahüave, Quepaümexa pepütasi'iyaritüaca. 'Ecü xüca pecürisitutüni, heiseriemecü quetatineutaxatüa. <sup>25</sup>Quesusi tivaruta'ei, Yanepütixe'utahüavixüri, haquevasü yuri xepücate'erie. 'Icü tita nemütiyuriene ne'uquiyarisüa nemiemetütü, mücü nehepaüsita catinihecüatani. <sup>26</sup>Masi yuri xepücate'erie, nemuxasi vahesie xemücamiemetecü, que nemütixecuxaxatüvacai. <sup>27</sup>Nemuxasi mepünesi'enie, neta nepüvamate, mecaneniuveiyani. <sup>28</sup>Tucari mücaxüve nenivapitüaca. Hasuacuari mepücata'unarieni. Xevitü pücavativiya nesinavairienique nemamasie. <sup>29</sup>Ne'uquiyari müme münesiyetüri, mücü yemecü canitürücaüyeni, hipatü yunaitü mecatürücavicacu. Xevitü pücaývü müvativiya 'inavairienique ne'uquiyari mamayasie. <sup>30</sup>Ne ne'uquiyarimatü tenitaxevini. <sup>31</sup>Hicü Huriyusixi tavari tetexi meniütitücü me'ituaxaque. <sup>32</sup>Quesusi müpäü tinivarutahüave, Camü vaüca nepüxe'uxeisitüa 'uximayasica 'aixüa mü'anene ne'uquiyarisüa

mümieme. Que 'aneme 'uximayasicacü xepünesituaxa. <sup>33</sup>Huriyusixi müpäü mete'ita'ei, 'Uximayasica 'aixüa mü'anecü tepücamasituaxa, 'axa pemutainecü püta tepümasituaxa. 'Ecü tevi pehücütütü cacaiyari pena'ayeitüvani. <sup>34</sup>Quesusi müpäü tivaruta'ei, Camü 'ipäu care'uxa xe'inüari niuquiyarisie, Ne xemücacaiyarixi neputayü. <sup>35</sup>Xücarü cacaiyarixi varutaterüva müme vahesüa munua Cacaiyari niuqueiya, xücarü 'utüarica cayüveni mayeyetitüarieni, <sup>36</sup>'iya ne'uquiyari mipataxü yuhesie mieme, cuiepa meiyenü'a, quename 'axa 'utaine queri xe'utiyuane hepaüsitanu, müpäü nemutayücü, Cacaiyari necaninu'ayatüni. <sup>37</sup>Xüca yanecatiyuriene ne'uquiyari que mütiyuriene, yuri xepücaneteta'eririeni. <sup>38</sup>Me xüca yanetiuriene, sepa yuri xemücanete'eririe ne, tita nemütiyurienesie püta yuri xequetene'erieca müpäü xemütetimanicü quename ne'uquiyari nehiesie tiviya, neta ne'uquiyarisie netiviya. <sup>39</sup>Hicü tavari menicuvautüvecaitüni me'iviyaque. Mücü neyani meca'iviyavecacu. <sup>40</sup>Mericsü mana neyani tavari Curutani 'anutaüye haque Vani meripai müti'üyanecai. Mana niyuhayeva. <sup>41</sup>Yümüiretü hesüana meni'axecaitüni. Müpäü meniütiyuanecaitüni, Vani 'inüari pücatiuyuri. Naime que müticuxatacai Vani 'icü tevi hepaüsita, yuri canainecaitüni.



<sup>42</sup>Mana yumüiretü yuri meteniuta'erieni hesiena.

### Rasaru que mütiümü

**11** Mericüsü tevi catinecuycaitüni Rasaru titevatü, Vetaniya mecatei, Mariya quiecariena Maritata Mariya mü'ivayatücai quiecariena quiecametütü. <sup>2</sup>'Iya Mariya canihücütücaitüni que mü'ane Ti'aitame mucaviri visi mu'üacü, quetateya mucavasiüxaxü yücüpacü. 'Iya 'ivaya Rasaru recuyecai. <sup>3</sup>Hicü 'ivamama 'ucari niuqui mecaneitanü'airieni Qesusi yame'utiuyatü, Ti'aitame neuxei, 'iya que mü'ane peminaqui'leri tinicuyeni. <sup>4</sup>Qesusi 'u'enaca müpaü niutayüni, 'Icü cuiniya mümünicü püca'ayumieme. Masi Cacaüyari visi 'anetü mayeitüarienenicü pühücü, Cacaüyari Nu'aya visi 'anetü mayeitüarienenicü mücü cuiniyacü. <sup>5</sup>Qesusi nivanaqui'eriecaitüni Marita 'ivayata Rasaruta. <sup>6</sup>'Ayumieme quepauca mu'enaxü quename recuyecai, mana niyuhayeva huta tucari haque meyeicacai. <sup>7</sup>'Ana müpaü tinivarutahüave teyü'üquitüvamete 'ariquemüca, Cümü tavari Cureya tepuhu. <sup>8</sup>Teyü'üquitüvamete müpaü mete'licühüave, Ti'üquitame, xique Huriyusixi mepümasicuvautüvecai memasituaxaque. Tavari petimie 'uma. <sup>9</sup>Qesusi müpaü tivaruta'ei, Camü tamamata heimana huta hurayari carexeiya xei tucari. Xüca hecüaripa 'uyeicani tevi, püca'uti'ücamüre, 'ena cuiepa mieme hecüariya

müxeiyacü. <sup>10</sup>Xüca yüvipa 'uyeicani pütiquetamüre hecüariya mümavecü hesiena. <sup>11</sup>Müpaü niutayüni. 'Arique müpaü tinivarutahüave, 'Iya teminaqui'leri Rasaru canecusuni. Ne nepümie nemenutahütüanicü. <sup>12</sup>Teyü'üquitüvamete müpaü mete'itahüave, Ti'aitame, camü xüca hecusuni pütavicueisitüarieni. <sup>13</sup>Qesusi müpaü putayü memücü. Mümü cusutü me'uxipi haineme mepü'eriecai. <sup>14</sup>Hicü 'ayumieme Qesusi müpaü tinivarutahüave heiseriemecü, Pemü Rasaru. <sup>15</sup>Mana nemücaheyeicacaicü ne'iyari 'aixüa puyü xehesie mieme, yuri xemüteta'erienicü. Masi tepuhu hesüana. <sup>16</sup>Hicü Tumaxi Vavari mütitevacai müpaü tinivarutahüave hipame teyü'üquitüvamete, Cümüri tepuhu hamatüana temecuinicü tametari.

### Qesusi va'uitüvame mühücü tucari mühücü

<sup>17</sup>Mericüsü Qesusi henuaca müpaü tiniutimarieni quename Rasaru nauca tucari yuriecari teuquiyapa yecaitü. <sup>18</sup>Vetaniya Qerusareme nehuracaitüni, haica quirumeturuyari xeiçüa petevacai. <sup>19</sup>Huriyusixi yumüiretü meniu'axüani Marita Mariya vahesüa memüvanütüanicü va'iva hepaüsita. <sup>20</sup>Hicü Marita quepauca mütiutamari quename Qesusi nuaximecai, neicunaque. Mariyari quita nayecateitüni. <sup>21</sup>Hicü Marita müpaü tinitahüave Qesusi, Ti'aitame, xüca 'ena pe'uyeicanique, ne'iva pücamüniqeyu. <sup>22</sup>Hicürita nepütimate nai pemütitavavirieni

Cacaüyari, Cacaüyari pümasipitüani.  
<sup>23</sup>Qesusi müpaü titahüave,  
 'A'iva nanucuquemücü. <sup>24</sup>Marita  
 müpaü titahüave, Ne nepütimate  
 manucuqueni tucari 'aye'ayu  
 quepauca mütapare, quepauca  
 memanucu'uni. <sup>25</sup>Qesusi müpaü  
 titahüave, Ne necanihücütüni  
 va'uitövame, tucari netihücüta.  
 Que mü'ane nehésie yuri müti'erie,  
 sepa mümüqui, canayeyuricamücü.  
<sup>26</sup>Yunaitü memayeyuyuri, nehésie  
 yuri memüte'erie, hasuacuari  
 mepücacuini. 'Ipaü yuri peti'erie  
 'ecü. <sup>27</sup>Müpaü titahüave, Hü  
 Ti'aitame. Ne yuri necatini'erieca  
 'ecü pemücürisitu, 'ecü Cacaüyari  
 Nu'aya cuiepa 'umamie pemühücü.

**Qesusi que mütiutasua haque  
 memeiccateuquixü Rasaru**

<sup>28</sup>Müpaü 'utayüca neyani.  
 Yühücüate me'ayetecacu  
 nitahüave yu'iva Mariya, müpaü  
 tinitahüave 'avie, Ti'üquitame  
 caninuani. Pümasitahüave. <sup>29</sup>Mücü  
 'u'enaca cuitüva nanucuqueni,  
 hesüana neyani. <sup>30</sup>Qesusi  
 quiecarisie pücanuavecai.  
 Manari cuxi niutivecaitüni  
 Marita menucunaquixüsie.  
<sup>31</sup>Hicü Huriyusixi Mariyamätü  
 memayetecai quita, meminütüacai,  
 me'ixeyaca Mariya cuitüva  
 'anucuquecu heyacu, mecaneiveiya,  
 teuquiyapa metüa mana tasuanique  
 metecu'erivatü.  
<sup>32</sup>Hicü Mariya quepauca munua  
 Qesusi manutivecaisie, 'ixeyaca,  
 hetüana niutitunumaqueni  
 müpaü ticühüavetü, Ti'aitame  
 xüca 'ena pe'uyeicanique ne'iva  
 pücamüniqeyu. <sup>33</sup>Qesusi

quepauca mixei 'iya 'utasuacame  
 Huriyusixi hamatüana  
 memu'axüa me'utisuaname,  
 yu'iyarisie niyumuinanecaitüni,  
 niyu'uximatüacaitüni. <sup>34</sup>Müpaü  
 niutayüni, Haque xepeicateuquixü.  
 Müpaü mete'itahüave, Ti'aitame  
 quenaye'a queneuxeiya. <sup>35</sup>Qesusi  
 niutasuani. <sup>36</sup>Huriyusixi 'ayumieme  
 müpaü meniutiyuanecaitüni,  
 Neuxei que tinaqui'eriecai.  
<sup>37</sup>Hipatü müme mete'utiyuane,  
 'Icü menutanieritüa macüpe,  
 catiyüveniqueyu mipitüanicü 'icüta  
 mücamünicü.

**Rasaru que müranucuquetüari**

<sup>38</sup>Hicü Qesusiri tavari  
 yumuinatü yu'iyarisie teuquiyapa  
 ninuani. Mücü caniterütücaitüni,  
 tetecü tineunacaitüni quitenie.  
<sup>39</sup>Qesusi müpaü niutayüni,  
 Xequeneuhüva tete. Müqui  
 'ivaya Marita müpaü titahüave,  
 Ti'aitame, pucuri'üari. <sup>40</sup>Qesusi  
 müpaü titahüave, Müpaü  
 necamatiutahüavixü, xüca yuri  
 petita'erienie pecanixeyamücü  
 que müttimarive Cacaüyari. <sup>41</sup>Hicü  
 tete mecaneuhüani. Qesusi  
 heutiniereca müpaü niutayüni,  
 Ne'uquiyari, pamüpariyusi  
 necamanipitüaca pemünesi'u'enicü.  
<sup>42</sup>Nesü nepütimaicai 'aheyemecü  
 pemünesi'enie, masi teüteri  
 ne'aurie memüti'u vahésie  
 mieme, müpaü neputayü, yuri  
 memüteta'erienicü quename  
 penesiheyenü'a 'ecü. <sup>43</sup>Müpaü  
 'utayüca carima niutahiva, Rasaru,  
 quenevayeye'a haitü. <sup>44</sup>Mümüquicai  
 nivayeyani 'ixuriquitecü 'eimetü  
 quetateyasie mamateyasie.

Hüxiena panucuhüacai tuvaxacü.  
Quesusi müpäü tinivarutahüave,  
Xequeneuxüna. Xequeneupitüa  
müyemiecü.

**Que memüte'imieniquecai Quesusi**

*(Mateu 26:1-5; Maricuxi*

*14:1-2; Rucaxi 22:1-2)*

<sup>45</sup>Hicü Huriyusixi yumüiretü  
Mariyasüa memu'axüa  
memunenierixü que mütiuyuri,  
yuri mecateniuta'erieni  
hesiena. <sup>46</sup>Masi hipatü müme  
Pareseusixi vahesüa menecüne.  
Metenivaretaxatüani que mütiuyuri  
Quesusi. <sup>47</sup>'Ayumieme mara'acate  
memühürütüariecai Pareseusixi  
vahamatü meniyucuxeürieni  
meyu'enienique. Müpäü  
meteniyutahüave, Qesü  
teteyurieni. 'Icü tevi vaüca 'inüari  
tiniyurieneni. <sup>48</sup>Xüca tel'ipitüaca  
müpäü mütiyurieneni, yunaitü  
yuri mecatenita'ericuni hesiena.  
'Anari Xumatari meni'axüacuni,  
mepütasinavairieni 'icü 'ena,  
tateüterima mepütasinavairienita.  
<sup>49</sup>Xevitü müme Caipasi  
mütitevacai, mara'acametütü  
mühürütüariecai mücü viyarisie,  
müpäü tinivarutahüave, Xeme  
'asixepücatemate. <sup>50</sup>Müpäü  
xepücatehetimaivave masi  
'aixüa müyünicü tahesie  
mieme, xevitü tevi mümünicü  
teüteri vahesie mieme, capa  
meheuyevenicü tateüterima.  
<sup>51</sup>Müpäü püca'utayü yücümana.  
'Iya viyarisie mara'acame  
mühürütüarie mühücütücaicü  
yacatinicuxatacaitüni quename  
Quesusi vateüterima vahesie  
mieme müniquecai. <sup>52</sup>'Iya

vateüterima vahesie mieme  
xeicüa pücamüniquecai,  
masi pümüniquecai  
müvacuxeürienicü Cacaiyari  
nivemama memeutaxüriexüa  
memüyutaxevirecü. <sup>53</sup>Hicü 'iya  
tucarisie menisütüani meyu'enietü  
memimienicü.

<sup>54</sup>Hicürita Quesusi teüteri  
vahürüpa püca'uyeicacairi  
Huriyusixi vasata. 'Iya  
cuieyarisie püta macumave  
'aurie neyani, quiecarü 'Epüraini  
müracutevasie. Mana niyuhayeva  
teyü'üquitüvamate vahamatü.

<sup>55</sup>Merücüsü Huriyusixi va'ixüarari  
Pasicua mütiteva nahuracaitüni.  
Yumüiretü 'esimüyeyeusie  
quiecatari menecüne Querusareme  
'ixüarari casutüarievecacu  
cuxi memüyü'itienicü.

<sup>56</sup>Menicuvautüvecaitüni Quesusi.  
Tuqui curaruyarita me'aye'utü  
müpäü meteniyücühüavecaitüni,  
Que xetecu'eriva, xüca  
ha'ixüaramieni 'iya. <sup>57</sup>Mara'acate  
memühürütüariecai Pareseusixi  
vahamatü müpäü mecateniua'aita,  
xüca tevi retimanique haque  
meyecacai, mitaheciätaniquecai  
memiviyacü.

**Vetaniyasie 'uca visi mu'üa que  
müticavirie Quesusisie**

*(Mateu 26:6-13; Maricuxi 14:3-9)*

**12** Hicü 'ataxeime tucari  
heuyevacacu Pasicua  
maye'anicü, Quesusi Vetaniya  
ninuani haque Rasaru manucatei,  
Quesusi menucuquetüa  
müquite vasata. <sup>2</sup>Hicü mana  
menivarucuxeürieni hamatüana  
memütecuanicü. Marita

nivapareviecaitüni. Hamatüana mematecai, xevitü Rasaru canihücütücaitüni. <sup>3</sup>Hicü Mariya naru visi mu'üa canücame vaüca müraye'axe ne'üni, merie quiruyaripaü paümeme. Qesusi quetayasie nicavirieni. Quetaya niucavasiüxa yücüpacü. Naisari quita visi tiniuye'üacaitüni narucü. <sup>4</sup>Hicü teyü'üquitüvametemama xevitü, Cura 'Isicariutitanaca, miyetuaniquecai, müpaü niutayüni, <sup>5</sup>Titayariri catiutuyi 'icü visi mu'üa haica sienituyari 'inüariyaricü, müva'üitüanicü memümamave. <sup>6</sup>Müpaü niutayüni memümamave müvara'erivacaicü pücatixaü, masi mütinavayametücaicü püta müpaü tiutayü. 'Iya vatumini maname 'ahanatü, tita hesiena mütiucaxüri nivati'üvecaitüni. <sup>7</sup>Qesusi müpaü niutayüni, Quetineuhayeva. 'Ipaü catiniuyurieni neteuquiya tucarisie mieme maye'aximecü. <sup>8</sup>Yuheyemecü yuhesüa xecanivarexeiyani memümamave. Ne püta xepücanesihexeyi yuheyemecü.

#### Que memüte'imieniquecai Rasaru

<sup>9</sup>Hicü Huriyusixi yumüiretü meteniutamarieni quename muva hayecatei. Qesusicü xeicüa mepüca'axecai, Rasaruta mexeiyaque müquite vasata menucuquetüaciü meni'axecaitüni. <sup>10</sup>Hicü mara'acate memühürütüaricai meyu'enieca 'axeicüa meniutiyuani quename Rasaruta memieniquecai <sup>11</sup>yumüiretü Huriyusixi cümana memecücü, Qesusisie yuri memüte'uta'ericiü.

#### Que müreutaha Querusaremesie

(Mateu 21:1-11; Maricuxi

11:1-11; Rucaxi 19:28-40)

<sup>12</sup>Mericüsü 'uxa'arieca yumüiretü teüteri 'ixüaramete menü'enanani quename Qesusi 'uhamiecai Querusareme. <sup>13</sup>Parapa mamateya me'uhapatü menecüne meheinaquiyuca. Müpaü meteniuhivacaitüni, Quetaneutavicueisitüa 'aixüa. 'Aixüa queticühüavarüvani Que mü'ane Ti'aitamesüa miemetütü 'umamie hepaüsita 'Ixaherisixi tati'aitüvame hepaüsita. <sup>14</sup>Hicü Qesusi puxu 'utaxeyaca hesiena nanutiyerüni, que müre'uxa, <sup>15</sup>Siyuni quiecame nu'aya, pepücaheumaca. Camü 'iya mümati'aitüa 'ucanamieni Puxu nunusisie 'acaitü. <sup>16</sup>Teyü'üquitüvametemama 'icü mepücahetimaivavecai meripai. Quepaucuari visi 'anetü matüa Qesusi, 'anaque mecanaye'erieni müpaü müre'uxa hepaüsitana, müpaü memiyuri. <sup>17</sup>Mücü teüteri hamatüana meme'uvacai quepaucua mitahüavixü Rasaru müvayeyanicü teuquiyata, quepaucua menucuquetüa müquite vasata, mümerita mecaniheciatücaitüni. <sup>18</sup>Ayumieme teüteri meneinaquiyuni memü'enanacü quename 'icü 'inüari tiuyuri. <sup>19</sup>Hicü Pareseusixi müpaü meteniyücühüavecaitüni, Xepüneniere 'asixemücaüyave.

Camü yunaitü cuiepa memütama  
'utümana menecüne.

**Cüriyecusixi que  
memüte'icuvautüvecai Quesusi**

<sup>20</sup>Mericüsü teüteri  
memu'axüa 'ixüararipa  
meyutanenevienique, hipatü  
müme mecanicüriyecusixitücaitüni.  
<sup>21</sup>Müme Piripesüa meniu'axüani  
Vesairasie Carereya cuieyarisie  
mecateisüa. Mecanita'ivaviya  
yame'utiyuatü, Neuxei, Quesusi  
tepüxeiyaqueyu. <sup>22</sup>Piripe neyani.  
Nitahüave 'Atürexü. Hicü 'Atürexü  
Piripematü menecüne. Müme  
menitahüave Quesusi. <sup>23</sup>Quesusi  
nivaruta'eiya ya'utaitü, Tucari  
naye'aniri Yuri Tevi nehücütütü  
visi ne'aretü nemayanicü.  
<sup>24</sup>Niuqui caniseüyeni que  
nemütixecühüave, xüca türicu  
'imüariyari ca'ucateuquiyani cuiepa  
'ucaveca, yuxaüta niyuhayeva  
xeicüa. Mesü xüca 'ucateuquiyani,  
vaüca canititacaimücü. <sup>25</sup>Que  
mü'ane yutucari münaqui'eri  
canitatümaiyamücü. Que  
mü'ane 'ena cuiepa yutucari  
mü'uxive'erie, yuheyemecü  
caneixeyacamücü, pücaxüveni.  
<sup>26</sup>Xüca tevi nesiparevivame  
yüaneni, quenesiheveiya ne.  
Haque nemeyeicani, manarita  
caniuyeicamücü nesiparevivame.  
Xüca tevi nesiparevivame yüaneni,  
ne'uquiyari 'aye'ame ni'eriecamücü  
'iya.

**Quesusi que mütimüniqecai  
que mainecai**

<sup>27</sup>Hicüri ne'iyari niyumuinaneni.  
Queri ne'utainenü. Ne'uquiyari,

queneneutavicueisitüa 'icü  
tucarisie que nehaineniqueyu.  
Masi 'icü 'ayumieme necaninuani  
'ena cuiepa. <sup>28</sup>Ne'uquiyari, visi  
peticühüavarüvatü quena'ayeitüa.  
Hicü xevitü niutaniuni taheima  
müpaü 'utaitü, Neri visi  
neticühüavarüvatü nepaneyeitüave,  
tavarita müpaü necatiniyuriemücü.  
<sup>29</sup>Teüteri yumüretü mana  
memüti'ucai memu'enanä  
müpaü meniutiyuanecaitüni,  
Camü necutürarücani. Hipatüta  
mete'utiyuanecai, Xüari niuqui  
tuayame pitahüavixüri. <sup>30</sup>Quesusiri  
müpaü tinivaruta'eiya, 'Iya  
nehesie mieme püca'utaniu,  
xehesie mieme püta putaniu.  
<sup>31</sup>Hicürixüa 'ena cuiepa memütama  
nivatahüavimücü 'lisücame.  
Hicürixüa 'iya mütiva'aitüva  
cuiepa memütama tacua  
nanuyehüiyamücüri. <sup>32</sup>Ne xüca  
cuie heima ne'anucuhanieni,  
yunaimie necanivarahapamücü  
nehepa. <sup>33</sup>Müpaü niutainecaitüni  
tihecüatatü que mütimierieniquecai.  
<sup>34</sup>Teüteri 'ayumieme müpaü  
metenita'eiya, Tame 'inüari  
niuquiyaricü tecaniu'ena quename  
'iya Cürisitu yuheyemecü yuhayeva.  
Que pehaine meuyevese Yuri Tevi  
manucuhanienicü pemaine. Que  
püpaicü 'icü Yuri Tevi mütiteva.  
<sup>35</sup>Quesusiri 'ayumieme müpaü  
tinivarutahüave, Yareutevitü  
cuxi xeicüa hecüariya xesata  
caniuyeicamücü. Mexi hecüariya  
xehexeiya xequeneu'uvani, yüriya  
capa xeha'ivacü. Que mü'ane  
yüvipa muyeica 'asipücatimate  
que mütimie. <sup>36</sup>Mexi hecüariya  
xehexeiya, yuri xequetene'erieca

hecüariyasie, hecüaripa miemete  
xemacüneçü.

Müpaü tincuxatacaitüni Quesusi.  
'Arique heyaca niyuti'avietta  
memücaheitaxeyacı.

**Huriyusixi yuri que  
memücate'eriecai**

<sup>37</sup>Sepasü müya päümeme 'inüari  
mütüyurienecai vahüxie, yuri  
mecacateni'eriecaitüni hesiena.

<sup>38</sup>Müpaü catinaye'ani Quisariyaxi  
tixaxatame niuquieya müpaü  
mutayüçü,

Ti'aitame quepai yuri  
pütita'eriri taniuqui.

Quepai püxeisituarie Ti'aitame  
türücariyaya.

<sup>39</sup>'Ayumieme mepüçayüvavecai  
yuri memüteta'erienicü, tavari  
müpaü mutayüçü Quisariyaxi,

<sup>40</sup>Nivaracüpiriya vahüxita,  
Nivaruseiriya va'iyarisie,  
Capa yuhüxicü  
meheunenierenicü,

Capa yu'iyarisie  
meteyüçühüavenicü,

Capa ta'aurie me'axürienicü  
nemüvaranayexürienicü.

<sup>41</sup>Müpaü niutayüni Quisariyaxi  
quepaucua mixei visi que  
mü'anecai, quepaucua hepaüsitana  
müticuxatacai.

<sup>42</sup>Siepüresü hipatü teüteri  
va'uquiyarima yumüretü  
yuri mecateniuta'erieni  
hesiena. Pareseusixi vacü  
mepüçayuecüatacai capa tuquita  
me'anuyeveyarierenicü. <sup>43</sup>Vaüca  
nivanaquecaitüni teüteri 'aixüa  
memütevacühüavenicü, 'esiva  
xeicüa vanaquecacu Cacaüyari püta  
'aixüa mütivacühüavenicü.

**Quesusi niuquieya que  
mütivaranutaxürieni teüteri**

<sup>44</sup>Hicü Quesusi müpaü  
tiniuhiva, Que mü'ane nehiesie  
yuri müti'erie, nehiesie xeicüa  
yuri pücati'erie. Masi que mü'ane  
münesiheyenü'asie yuri tini'erieca.  
<sup>45</sup>Que mü'ane münesixeiya,  
canixeiyani 'iya münesiheyenü'a.  
<sup>46</sup>Ne nehecüariyatütü cuiepa  
necaninuani yunaitü yuri  
memüte'erie nehiesie yüvipa  
memüçayuhayevacı. <sup>47</sup>Xüca tevi  
'icü 'u'enieni que nemüticuxata,  
xüca yacaticamieni, ne  
nepüca'ixaneta. Cuiepa memütama  
nevataxanetaque nepücanua, cuiepa  
memütama nevatavicueisitüanique  
püta necaninuani. <sup>48</sup>Que  
mü'ane münesixani'eri, neniüqui  
müca'utanaqui'eri, caneixeiyani  
que mü'ane mixaneta. Mücü  
neniüqui que nemutayü, mücü  
canitaxanetamücü, tucari 'aye'ayu  
quepaucua mütapare. <sup>49</sup>Ne  
necümana 'asinepüaticuxata. Masi  
'iya münesiheyenü'a ne'uquiyaritütü,  
canetiniuta'aitüani que  
nemutaineni que nemüticuxatani.  
<sup>50</sup>Ne necatinimaica tita müti'aita  
'iya, tucari mücaxüve mühüçücü.  
Tita nemüticuxata ne, ne'uquiyari  
que münetiutahüavixü, müpaü  
necatinicuxatani.

**Quesusi que mütivaruhauxina  
teyü'üquitüvamate vaquetasie**

**13** Mericüsü Pasicua 'ixüarari  
pücasutüarievacai cuxi.  
Quesusi catinimaicaitüni tucariyaya  
maye'a müyupataçü 'ena cuiepa  
müyemieçü yu'uquiyarisüa.

Yuhesüa miemete cuiepa memütama que mütivanaqui'eriecai, 'aye'arücamecü nivanaqui'eriecaitäni. <sup>2</sup>Hicüsüari metenicuacaitüni. Cauyumarieri müpäü tini'iyaritüani Cura 'Isicariutitanaca Simuni nu'aya miyetuanicü Quesusi. <sup>3</sup>Mericüsü Quesusi müpäü tinimaicaitüni 'uquiyarieya nai mütiyetuiri mamayasie. Cacaüyarisüa meyetüacü timaitü, Cacaüyarisüa müyemiecü timaitü, <sup>4</sup>nanucuqueni mexa 'aurie macatei. Herie mieme yu'ixuriqui 'anutihünaca vasiüxame 'anuhurica nayühüani. <sup>5</sup>Ha 'acatuaca pateyusie, nisütüani vahauxinatü teyü'üquitüvamete vaquetasie, vacavasiüxatü vasiüxamecü cümana mayühüacü. <sup>6</sup>Hicü Simuni Pecuru manucatei ninuani. Mücü tinitahüave, Ti'aitame, 'ecü penetihauxina nequetasie. <sup>7</sup>Quesusi müpäü tita'ei, Ne tita nemütiyuriene 'asipepücatimate hicü, 'ariquemücaque pecaneitimaimücü. <sup>8</sup>Pecuru rehüave, Hasuacuari pepücanesihauxinani nequetasie. Quesusi müpäü tita'ei, Xüca necamasihauxinani, 'ahesie pücatinaqueni nehapäü. <sup>9</sup>Simuni Pecuru müpäü titahüave, Ti'aitame, nequetasie xEICÜA pepücanesihauxinani, masi nemamasieta nemu'usieta cuerietü. <sup>10</sup>Quesusi müpäü ticühüave, Que mü'ane mecu'üvaxü pücaheiyehüva hauxinarica, yuquetasie xEICÜA. Masi naitü caneu'itiyaca. Xemerita xecani'itiyatücani, peru yunaitü pücatixaü. <sup>11</sup>Mücüri canimaicaitüni quepai

miyetuaniquecai. 'Ayumieme yunaitü xemüca'itiyatüca niutayüni. <sup>12</sup>Vaquetasie varuhaulica, yu'ixuriqui herie mieme 'anacatüca, mana 'ayerüca, hutarieca müpäü tinivarutahüave, Xetemate tita nemütiuyuri xehesie mieme. <sup>13</sup>Xeme Ti'üquitame Ti'aitame xepünete'uterüva. 'Aixüa xepaitüca nemühücücü. <sup>14</sup>Mericüte, ne Ti'üquitame Ti'aitame nehücütütü xüca xequetasie nexe'uhauxini, caneuyevaca xemeta yunaitü xemüyutihauxinani yuquetasie. <sup>15</sup>Xemünesi'üquenicü 'linüari necanixe'upitüani xemeta müpäü xemüteyuriecacü nemüxe'uyuripaü. <sup>16</sup>Niuqui caniseüyeni que nemütixecühüave, que mü'ane vaüriyarica müti'uximaya pücahe'iva yucusiyari cui ve'emetütü, 'iya cave'emetücacu. Nü'ari pücahe'iva que mü'ane meiyenü'a cui ve'emetütü, 'iya cave'emetücacu. <sup>17</sup>Xüca 'lipaü xetemaica, xecaniyutemamaviecacuni xüca yaxetecahuni. <sup>18</sup>Yunaimie xehepaüsita nepücatixata. Ne nepüxemate quehate nemüxe'anuyexei. Masi müpäü netiniuyuriene 'utüarica maye'anicü müpäü maine, 'Iya ne'icuai mücuacai yuquepusacü pünesi'uquesi. <sup>19</sup>Hicüri necatinixetaxatüamücü yacatiyüvecacu cuxi, yuri xemüteta'erienicü quename ne nehücü quepaucua müpäü mütiyüni. <sup>20</sup>Niuqui caniseüyeni que nemütixecühüave, que mü'ane mitanaqui'erie que mü'ane nemanunü'ani, mücü

caneniutanaqui'erieni ne. Que mü'ane münesi'utanaqui'erie ne, 'iya münesiheyenü'a caniutanaqui'erienita.

**Quesusi que mütiutahecüataxü Cura que mütiyetuaniquecai**

(Mateu 26:20-25; Maricuxi 14:7-21; Rucaxi 22:21-23)

<sup>21</sup>Müpaü 'utayüca Quesusi niyumuinanecaitüni yu'iyarisie. Tiniutahecüata, müpaü niutayüni, Niuqui caniseüyeni que nemütixecühüave, xevitü xeme caneniyetüamücü.

<sup>22</sup>Teyü'üquitüvamate meniuyuxexeyacaitüni me'iyarixietü 'asimecatemaitü quepai müraxatacai. <sup>23</sup>Xevitü tiyü'üquitüvame Quesusi 'aurie niucateitüni Quesusi minaqui'eriecai. <sup>24</sup>Simuni Pecuru 'ayumieme nitamaviya. Müpaü titahüave, Quepai pepüraxata quetineutahüavi. <sup>25</sup>Mücü Quesusi 'aurie 'ucaitü ta'aurie 'aveca müpaü tinitahüave, Ti'aitame, quepai pühücü. <sup>26</sup>Quesusi müpaü tinita'eiya, 'Iya canihücütüni pa tarimeyari nemi'üitüani ne'itihaviyame xacüsie. Hicü pa 'utihaviyaca nenucu'üni, ni'üitüani Cura 'Isicariutitanaca Simuni nu'aya. <sup>27</sup>Pa 'anu'ücu, 'ana Cauyumarie caniviya mücü. Quesusi müpaü tinitahüave, Que pemütiyurieni, xeiya quetineuyuri.

<sup>28</sup>Müme mana mematecai ni xevitü 'asimepücatemaicai titayari mürehüavecai. <sup>29</sup>Cura vatumini maname mahanacaicü, hipatü müpaü metenicu'erivacaitüni Quesusi mütitahüavixücü, Tita

temüteuyehüva 'ixüararipa quetinenanaimie, tumini müva'üitüaniquecai memümamave nusu metecu'erivacai. <sup>30</sup>Cura pa 'anu'üca caneyani. Niuyüvicaitüni.

**Hecuamecü que mütiu'aita**

<sup>31</sup>Mericüsü quepaucua metüa, müpaü niutayüni Quesusi, Hicürixüa Yuri Tevi visi 'anetü nayeitüarieni, Cacaüyarita visi 'anetü rayeitüari hesiena tiviyatü.

<sup>32</sup>Xüca Cacaüyari visi 'anetü 'ayeitüarieni hesiena tiviyatü, Cacaüyarita yücümama visi 'aneme canayeitüamücü Yuri Tevi. Cuitüva visi 'aneme rayeitüani.

<sup>33</sup>Nenivema, yareutevitü xeciüa xehamatü necaniuyecamücü. Xenenicuvautüvecuni. Que nemütivacühüavecai Huriyusixi, haque nemeyemie xepücayüvave xemeta'axüani ne'utaitü, yaxeciüa netinixehahüaveni xeme hicü.

<sup>34</sup>Hecuamecu necatinixe'aitüaca, xequeneyunaqui'erieca. Ne que nemütixenaqui'eriecaipäü, xequeneyunaqui'erieca yunaitü. <sup>35</sup>Icücü yunaitü mecatenimaicacuni nehesüa miemete teyü'üquitüvamate xemühüme, xüca xeyunaqui'erieca yuhsie.

**Quesusi que mütiutahecüataxü Pecuru que mütitanenaniquecai**

(Mateu 26:31-35; Maricuxi 14:27-31; Rucaxi 22:31-34)

<sup>36</sup>Simuni Pecuru müpaü tinitahüave, Ti'aitame, haque pepeyemie. Quesusi müpaü tita'ei, Haque nemeyemie pepücayüve pemünesi'anuveiya hicü. 'Arique



pepünesi'anuveiya. <sup>37</sup>Pecuru müpaü titahüave, Ti'aitame, titayari necatiyüve nemümasi'anuveiya hicü. Netucari nepüyetuani 'ahesie mieme. <sup>38</sup>Quesusi müpaü tita'ei, 'Atucari nehesisie mieme petiyetuanitütü. Niuqui caniseüyeni que nematicühüave, vacana catahivavecacu, 'ecü haicaciä pepü'acu'imavani, quename pecanesimate pe'utaitü.

**Quesusi huye ta'uquiyarisüa  
meutiylene mühücü**

**14** Yu'iyarisie xüca xecayumuinani. Cacaüyarisie yuri xecateni'erieca, nehesisetari yuri xequetene'erieca. <sup>2</sup>Ne'uquiyari quiecariena vaüca canexuaveni qui. Xüca müpaü ca'anenique, müpaü nepücatixecühüaveniqueyu. Nepüyemie xehesisie mieme 'aixüa nemeiyurienicü mana. <sup>3</sup>Xüca neheyani, xüca xehesisie mieme 'aixüa neheyurieni mana, tavari necaninuamücü, nehesisia nenixe'anuvitümücü, haque nemeyeica xemeta mana xeme'uvanicü. <sup>4</sup>Haque nemeyemie xecatenimaica, huye xetemateta. <sup>5</sup>Tumaxi müpaü tinitahüave, Ti'aitame, tame 'asitepücatemate haque pemeyemie. Que tete'imani huye. <sup>6</sup>Quesusi müpaü ticühüave, Ne necanihücütüni huye, tita yuricü müraine netihücü, tucari netihücü. Xevitü ne'uquiyarisüa püca'aye'ave yuxaüta, necümana xEICÜA paye'ave. <sup>7</sup>Xüca xenesihetimanique, ne'uquiyarita xepümaicaqueyu. Hicürixüa xecaneitimani xecanixeiya.

<sup>8</sup>Piripe müpaü tinitahüave, Ti'aitame, quetaneuxesisitüa 'a'uquiyari. Mücücü tepünaqui'aca. <sup>9</sup>Quesusi müpaü titahüavixü, Müixa xehamatü ne'uyeicacacu pecaneretimaive cuxi, Piripe 'acu. Que mü'ane munesixeiya, ne'uquiyarita canixeiyani. Quepaütütü peputaine, 'a'uquiyari quetaneuxesisitüa pemaine. <sup>10</sup>Yuri pecati'eri quename ne ne'uquiyarisie netiviya, ne'uquiyarita nehesisie tiviya. Que nemütixecuxaxatüva, necümana nepücatixaxata. Ne'uquiyari nehesisie tiviyatü müyuhayeva, mücü yacatiniyurieneni. <sup>11</sup>Yuri xequetene'erieca ne'uquiyarisie nemütiviyacü, ne'uquiyarita nehesisie mütiviyacü. Me xüca müpaü yuri xecate'erieca, yanemütivurienecü püta yuri xequetene'erieca. <sup>12</sup>Niuqui caniseüyeni que nemütixecühüave, que mü'ane nehesisie yuri müti'eri yacatiniyurienemücü que nemütivurienne ne. Canena'ivamücü yatiyurienetü, ne ne'uquiyarisüa nemüyemiecü. <sup>13</sup>Sepanetü que mütitita xemünetetavavirieni nehesisia xemiemetetütü, ne müpaü necatiniyurienemücü, ne'uquiyari visi 'anetü mayeitüaricü yunivesie tiviyatü. <sup>14</sup>Xücaritixaütü xenete'utavavirieni nehesisia xemiemetetütü, ne müpaü necatiniyurienemücü.

**'Iyari Mütiyupata que  
mütivareyenü'airieniquecai,  
que mainecai**

<sup>15</sup>Xüca xenesinaqui'erieca, yaxequetenecahuni que nemüti'aita.

<sup>16</sup>Neta nepitavavirieni ne'uquiyari. Mücü xeime canixepitüacamücü Titutuicametüme xehamatü muyeicanicü yuheyemecü. <sup>17</sup>'Iyari yuri maine necanixatani. Cuiepa memütama mepücayüvave memitanaqu'erieni memüca'ixeyavavecü memüca'imatecü. Xemeri xecanimaicatütü. Xeteütatü niyuhayevani, xehesie catiniviyani. <sup>18</sup>Ne nepücaxecu'eirieni nepücaxenutuita. Xehesüa necani'axemücü. <sup>19</sup>Yareutevitü cuxi, cuiepa memütama mepücanesixeyia. Xeme püta xepünesixeyia. Nemayeyuricü, xemerita xecanayeyuricacuni. <sup>20</sup>'Iya tucari 'aye'ayu, müpäü xecatenimaicacuni ne ne'uquiyarisie nemütiviyacü, xeme nehesie xemüteviyacü, neta xehesie nemütiviyacü. <sup>21</sup>Que mü'ane mimate tita nemüti'aita, yamüticamie, mücü canihücütüni que mü'ane münesinaqu'erie. Que mü'ane münesinaqu'erie, ne'uquiyarita caninaqu'eriecamücü 'iya. Neta netinaqu'erieca, nemasiücüme nepaneyeitüani hesiena.

<sup>22</sup>Xevitü Cura müca'isicariutitanacatücai müpäü tinitahüave, Ti'aitame que 'uyü pemaüücütü pema'ayeitüani tame tahesie pemañecü, cuiepa memütama vahüxie pücatixaü. <sup>23</sup>Qesusi müpäü tita'ei, Xüca tevi nesinaqu'erieca, nenuiquisie yacatinicamiemücü. Ne'uquiyari caninaqu'eriecamücü 'iya. Hesüana tecani'axecuni, hesüana tenitaquicuni. Que mü'ane mücanesinaqu'eri, nenuiquisie

yapücaticamie. <sup>24</sup>'Icü niuqui xemü'enie, nehesüa pücamieme. Ne'uquiyari münesiheyenü'asüa canimiemetüni püta.

<sup>25</sup>'Icü netinixe'utaxatüani xehesüa ne'uyeicatü. <sup>26</sup>Titutuicame, 'iya 'Iyari Mütiyupata ne'uquiyari meiyenü'ani nehesüa miemetüme, mücü catinixeta'üquitüamücü naime. Catinixeta'eritüamücü nai que nemütixecuxaxatüvacai ne.

<sup>27</sup>Müpäü nepütixe'uhayevi, yu'iyarisie xemüca'uximatüaricacü. Nehepäü yu'iyarisie xemüca'uximatüaricacü nepüxepitüa. Cuiepa memütama que memütüyupitüva nepücatixepitüa. Xe'iyari xüca cayumuinaneni, xüca camamaca. <sup>28</sup>Xeneni'uenieni, nemüyemie, xehesüa nemayeneni que nemütixe'utahüavixü. Xüca xenesinaqu'eriecaque, xecaniyutemamaviecaqueyu ne'uquiyarisüa nemüyemiecü. Ne'uquiyari yemecü canive'emetüni, ne hepäüna nepücave'eme. <sup>29</sup>Hicü yanepütixe'utahüavixü yacatiyüvecacu cuxi, yuri xemüteta'erienicü quepaucua müpäü mütiyüni.

<sup>30</sup>Hicü xehamatü väica nepücaticuxataniri. Que mü'ane mütiva'aitüva cuiepa memütama 'ucanamieni. Tixaü pücarexeiya nehesie timieme. <sup>31</sup>Masi cuiepa memütama memütehetimeanicü ne'uquiyari nemünaqu'erie, ne'uquiyari que müneti'aitüa, müpäü netiniyurieneni. Xequenancu'uti, cümü tepiyehuri.

**Qesusi tita yuricü  
mütinanayari mühücü**

**15** Ne nana necanihücütüni, tita yuricü mütinanayari.

Ne'uquiyari catini'üviyametüni.

<sup>2</sup>Yunaitü nana mamateya nehésie memüteviya xüca meca'utixuxuavereni, 'iya nivananuyexürimücü. Yunaitü memutixuxuavere, 'iya nivati'itimücü masi vaücava mütixuaverenicü. <sup>3</sup>Hicürixüa xecani'itiyani xeme nenuquicü nemütixecuxaxatüvacaicü. <sup>4</sup>Nehésie xeteviyatü xequeneyuhayevani, neta xehésie netiviyatü netinehayeva. Mamateya püca'yüve yücümana mütixuavere xüca nanayarisie tiviyatü cayuhayeva. Yaxeicüa xemerita xepüca'yüvave xemütixuavere xüca nehésie xeteviyatü xecayuhayeva.

<sup>5</sup>Ne nanayari necanihücütüni, xeme mamateya xetehüme. Que mü'ane nehésie tiviyatü müyuhayeva, neta hesiena netiviyacacu, mücü vaüca canitixuaverimücü. Nehésie xecateviyatü 'asixepücate'yüvave xeme. <sup>6</sup>Xüca tevi nehésie tiviyatü cayuhayeva, nana mamayaripaü cananuyehüiyamücü, nitavamücü. 'Icuxeüriyame taipa neuxüriyamücü, nititaiyariemücü.

<sup>7</sup>Xüca nehésie xeteviyatü xeyuhayeva, xücaritita nemüticuxata xehésie tiviyatü yuhayeva, tita mütixenaque xequenecuvava, müpaü catiniyümücü xehésie mieme.

<sup>8</sup>Ne'uquiyari visi 'anetü canayeitüarivani quepauca vaüca xemutixuxuavere, quepauca nehésie miemete teyü'üquitüvamete xemacüca. <sup>9</sup>Ne'uquiyari münetaqu'eriecaipaü, müpaüta

necatinixenaqu'eriecaitüni.

Xequeneyuhayeva nehésie xeteviyatü, ne nexenaqu'eriecacu. <sup>10</sup>Xüca yaxetecahuni que nemütü'aita, xeniyuhayevacuni nehésie xeteviyatü, nexenaqu'eriecacu ne, ne'uquiyari 'aisicayasie yanemüticamiepaü, iyasie netiviyatü nemünehayevapaü nesinaqu'eriecacu 'iya.

<sup>11</sup>Ipaü netinixecuxaxatüvacaitüni netemavierica xehésie müyuhayevanicü, xetemavierica maye'atüarienicü. <sup>12</sup>Ipaü necatini'aitani, xequeneyunaqu'erieca que nemütixenaqu'eriecai ne. <sup>13</sup>Que tevi yamücatiyucanaqu'eriepaü, vaüca masi pütüyucanaqu'erie yutucari yetuatü müme müvanaqu'erie vahésie mieme.

<sup>14</sup>Xeme xecaninenaqu'erimatüni xüca yaxetecahuni que nemütix'e'aitüa. <sup>15</sup>Te'uximayatameteri nepücatixe'uterüva. Ti'uximayatame 'asipücatimate que mütiyuriene cusiyarieya. Ne masi nenaqu'erima nepütix'e'uterüva, naime nemütü'eni ne'uquiyarisüa nepütix'e'uta'üquitüa.

<sup>16</sup>Xeme xepücanesi'anayexei. Ne püta nenixe'anayexeiya. Nepüxe'uhürütüa xemüyehücü, xemutixuxuaverenicü, xehesüa mieme 'icuaxi müyuhayevanicü, sepanetü que mütitita xemitavavirieni ne'uquiyari nehésie xemiemetetütü müxepitüanicü. <sup>17</sup>Ipaü necatinixe'aitüaca, xequeneyunaqu'erieca.

**Cuiepa memütama que memütexe'uxive'erieca**

<sup>18</sup>Xüca cuiepa memütama mexe'uxive'erieca,

yaxequetenemaica,  
 memünesita'uxi ne meri. <sup>19</sup>Xüca  
 cuiépa xemiemetetünique  
 xeme, cuiépa memütama  
 mecanixenaqui'eriecaqueyu  
 yuteüterima. Xemeri  
 cuiépa xepücamiemete, ne  
 masi nenixe'anayexeiya  
 cuiépa memütama vasata.  
 'Ayumieme cuiépa memütama  
 mecanixe'uxive'erieca.  
<sup>20</sup>Neniuqui xequena'erivani  
 que nemütixe'utahüavixü, Que  
 mü'ane müti'uximayatame  
 pücahe'iva yucusiyari cui  
 ve'emetütü 'iya cave'emetüca.  
 Que memünete'uveveyacai ne,  
 xemeta mecanixetaveveyacuni.  
 Neniuquisie yamepücatecahucai,  
 yaxeicüa xeniuquisieta  
 yamepücatecacüne. <sup>21</sup>Masi 'ipaü  
 naime mecanixeyuriecuni nehesüa  
 xemümiemetecü, memüca'imatecü  
 'iya münesihyenü'a.

<sup>22</sup>Xüca necanuanique, xüca  
 necavarutaxatüanique, tita 'axa  
 müti'ane mepücatehexeiyaqueyu.  
 Hicüri tixaü mepücatehexeiya  
 memiti'avietacü tita 'axa  
 memüteyurie. <sup>23</sup>Que mü'ane  
 ne'uquiyari mü'uxive'erie, netari  
 caneni'uxive'erieca. <sup>24</sup>Vasata  
 xüca yanecatuiyurienique  
 xevitü yamücatiyurievepäü,  
 müme tita 'axa müti'ane  
 mepücatehexeiyaqueyu.  
 Hicüri mecaniuneniere,  
 mecatan'i'uxive'erieca neri  
 ne'uquiyarita. <sup>25</sup>Masi niuqui  
 canaye'atüarieni 'inüari  
 niuquiyarisie müpäü müre'uxa,  
 Sepa 'asinemücatuiyuri,  
 mecaneni'uxive'eriecaitäni.

<sup>26</sup>Quepaucua munuani 'iya  
 Titutuicame nemüxehanü'airieni  
 ne'uquiyarisüa mieme, 'Iyari yuri  
 maine ne'uquiyarisüa mayeneica  
 quepaucua munuani, 'iya  
 nehépaüsita catinitahecüatamücü.  
<sup>27</sup>Xemetari xecatenitahecüatacuni  
 nehamatü xemu'uvacü  
 matüaripaitü.

**16** 'Ipaü  
 nepütixecuxaxatüvacai  
 xemücatiquetamürecü.  
 Müme mepücaxepitüani  
 tuquita. <sup>2</sup>Masicutaxi tucari  
 canaye'amücü quepaucua  
 yunaitü memüxecuini Cacaüyari  
 me'ayexeyame memüyu'erieca.  
<sup>3</sup>Müpäü mecateniyuriecuni  
 memüca'imatecü ne'uquiyari,  
 memücanesimatecü neta. <sup>4</sup>Masi  
 'ipaü netinixecuxaxatüvacaitüni,  
 xeme'erivanicü neniuqui quepaucua  
 maye'ani tucariyari, müpäü  
 nemütixe'utahüavixü xeteha'erivatü.

### 'Iyari Mütiyupata que mütiyurieneni

Matüaripai 'ipaü  
 nepücatixe'utahüavixü  
 xehamatü nemuyeicacaicü.  
<sup>5</sup>Hicü necaniyemieni 'iya  
 münesihyenü'asüa. Xevitü xeme  
 pücanesita'ivaviyave, haque  
 pepeyemie 'utaitü. <sup>6</sup>Müpäü  
 nemütixecuxaxatüvacai'cü xe'iyari  
 canihüpüneni hivericacü. <sup>7</sup>Ne  
 nepütixecuxaxatüva tita yuri  
 müraine, masi 'aixüa caniyümücü  
 xehesie mieme nemüyemiecü. Me  
 xüca necaheyani, Titutuicame  
 pücanuani xehesüa. Masisü xüca  
 nehéyani, necanixehanü'airiemücü.  
<sup>8</sup>'Iya nuame nivatatiemücü cuiépa  
 memütama tita 'axa memüteyurie

hepaüsita, tita mütiheiserie  
hepaüsita, titacü müranutahüiyani  
hepaüsita. <sup>9</sup>Tita 'axa memüteyurie  
hepaüsita püvatatieni yuri  
memücate'eriecü nehesie. <sup>10</sup>Tita  
mütiheiserie hepaüsita tivatatieni  
ne'uquiyarisüa nemüyemiecü,  
tavari xecanesixeiyacacu. <sup>11</sup>Titacü  
müranutahüiyani hepaüsita  
tivatatieni, cuiépa memütama  
tiva'aitüvame que müranutahüiya.

<sup>12</sup>Vaüca cuxi necaneixeiyani  
nemütixetaxatüanicü. Xeme xeicüa  
xepüca'yüvave cuxi xemi'enieni hicü.

<sup>13</sup>Quepaucua 'iya munuani 'Iyari  
yuri maine, 'iya nixehcüatüamücü  
xemeitimanicü naitü yuri maine.  
Yücümana pücatücuxatani. Tita  
müti'enie catinitaxatamücü. Tita  
'umüramie tinixetaxatüamücü.

<sup>14</sup>'Iya visi ne'aneme  
canenayeitüamücü. Tita nehesüa  
mütimieme catinanupimücü  
catinixetaxatüamücü. <sup>15</sup>Quepaü  
mürexeyia ne'uquiyari, naitü  
catininepinitüni. 'Ayumieme  
neputayü, tita nehesüa mütimieme  
catinanupimücü tinixetaxatüamücü.

**Xeyutihiverieme masi que  
xemüteyutemamavieca,  
que mainecai**

<sup>16</sup>Yareutevitüri xepücanesixeiyana.  
Tavari yareutevitüta  
xecanenixeiyacuni.

<sup>17</sup>'Ayumieme  
teyü'tüquitüvamete hipatü  
müpaü metenyücühüavecaitüni,  
Titari taticühüave, yareutevitü  
xepücanesixeiyana, tavari yareutevitü  
xepünesixeiyana 'utaitü, müpaüta  
'utaitü, ne'uquiyarisüa nemüyemie.

<sup>18</sup>'Ayumieme mete'utiyanecai,

tita 'icü tixata yareutevitü maine.  
'Asitepücatemate quetütü mutaine.

<sup>19</sup>Quesusi müpaü tinetimani  
memi'ivaviyacuaicü. Müpaü  
tinivarutahüave, 'Icücü niuqui  
xetexüatüa, müya nemutayücü,  
yareutevitü xepücanesixeiyana,  
tavari yareutevitü xepünesixeiyana  
nemainecaicü. <sup>20</sup>Niuqui  
caniseüyeni que nemütixecühüave,  
xecaniutisuanacuni  
xenyuhiveriecacuni.

Cuiépa memütama püta  
meniyutemamaviecacuni.  
Xeme xecaniyhiveriecacuni,  
peru xeyutihiverieme masi  
xeyutemamavietü xecanacünicuni.

<sup>21</sup>'Uca tiniverümetü  
niyhiveriecamücü tucarieya  
maye'acü. Nu'esi 'utinüivacu  
'uximatüarica pücaha'eriva  
müyutemaviecü tevi mutinüivaxücü  
cuiépa. <sup>22</sup>'Ayumieme xemeta  
hiverica xecanexeyiani hicü. Tavari  
necanixexeyiamücü. 'Ana xe'iyari  
niyutemamaviecamücü. Xevitü  
pücaxenavairieni xetemavierica.

<sup>23</sup>'Iya tucarisie tixaü  
xepücanetecu'ivaviyani. Niuqui  
caniseüyeni que nemütixecühüave,  
sepa que mütitita xemüte'itavavirieni  
ne'uquiyari nehesüa xemiemetetütü,  
yacatinixepitüamücü. <sup>24</sup>Hicüque  
tixaütü xepücate'itavavirievave  
nehesüa xemiemetetütü.  
Xequeneutavaviriri,  
xenitanaqui'eriecuni xetemavierica  
maye'anicü.

**Ne necane'iva tita cuiépa  
mütimieme, que mainecai**

<sup>25</sup>'Icü ha'aviecamecü  
necatinixetaxatüacaitüni. Tucari

canaye'amücü quepaucua  
nemücatixetaxatüani  
ha'aviecamecü, masi heiseriemecü  
necatinixetaxatüamücü  
ne'uquiyari hepaüsita. <sup>26</sup>Iya  
tucarisie xecanitavaviriecuni  
nehesüa xemiemetetütü. Ne  
'asinepücatixecühüave quename  
xehesie mieme ne'itavavirieni  
ne'uquiyari. <sup>27</sup>Iyasü  
ne'uquiyaritütü canixenaqui'erieca,  
xeme xemünesinaqui'eriecaicü,  
yuri xemüte'uta'ericiü quename  
Cacaüyarisüa neheyetüa. <sup>28</sup>Ne  
ne'uquiyarisüa nemiemetütü  
necaneyeyani, cuiepa necaninuani.  
Tavari nepüyemie cuiepa,  
ne'uquiyarisüa necaniyemieni.  
<sup>29</sup>Teyü'üquitüvamete müpäü  
meniutiyuani, Camü hicürixüa  
heiseriemecü pecatinicuxatani,  
ha'aviecamecü pecaticuxatatü.  
<sup>30</sup>Hicü müpäü tepütemate nai  
pemütimate, tixaü pücareuyevese  
xevitü mümasicu'ivaviyanicü.  
'Ayumieme müpäü yuri  
tecateni'erieca Cacaüyarisüa  
pemeyetüacü. <sup>31</sup>Quesusi müpäü  
tivaruta'ei, Yuri xete'erie hicü  
'acu. <sup>32</sup>Camü tucari canaye'amücü,  
canaye'aniri masi, quepaucua  
xemütaxüriyaxüani yuxexuitü  
yuquie. Xepünesicu'eirieni  
nexaütamecü. Masi nexaütamecü  
nepüca'uyeica, ne'uquiyari  
nehamatü puyeica. <sup>33</sup>İpäü  
necatinixecuxaxatüvacaitüni  
yu'iyarisie xemüca'uximatüaricacü  
nehesie xeteviyatü. Cuiepa  
'uximatüarica xecanexeyiacuni.  
Yu'iyari xequeneucayesa masi, ne  
necane'iva tita cuiepa mütimieme.

Quesusi que mütiyutanenevi  
teyü'üquitüvamete vahesie mieme

**17** Mericüsü müpäü  
tinicuxatacaitüni Quesusi.  
Yuheima heutinierca müpäü  
niutayüni, Ne'uquiyari, tucariri  
paye'a. Visi 'ane quenayeitüa  
'anive, 'iyata 'anive visi pe'aneme  
mümasi'ayeitüanicü <sup>2</sup>heiserie  
pemipitüapaü yunaime  
teüteri vahepaüsita, 'iya tucari  
mücaxüve müvapitüacacü  
yunaime pemiyetüirie 'ecü. <sup>3</sup>Icü  
tucari mücaxüve canihücütüni,  
memümasimaicacü 'ecü  
pe'axevitü yuri pemücacaüyari,  
memünesimaicacü neta Quesusi  
Cürisitu pemünesiheyenü'a.  
<sup>4</sup>Ne cuiepa visi pe'aneme  
nemanayeitüani. Que  
pemünetiuhüritüa  
yanemütiyurienenicü,  
netinaye'atüaniri. <sup>5</sup>Hicüri  
ne'uquiyari, 'ahesüa visi ne'aneme  
quenenayeitüa, visi nemü'anecaipai  
cuie caxuavecacu cuxi.  
<sup>6</sup>Ne nepümasitaheciüataxü  
'ecü que pemü'ane mücü teüteri  
vahüxie, cuiepa memütama  
vasata miemete pemünesiyetüiri  
vahüxie. Mepü'ateüterimatücai,  
pöpünesiyetüiri müme. 'Aniuquisie  
yamecatenica'huni. <sup>7</sup>Hicürixüa  
müpäü mecatenetimani  
quename 'ahesüa nemieme,  
nai pemünetyetüiri.  
<sup>8</sup>Niuqui pemünesi'upitüa  
nenivarupitüani müme. Mümerita  
mecanitanaqui'erieni. Müpäü  
mecatenetimani, yuricü  
'ahesüa nemeyetüacü. Yuri

mecateniuta'erieni quename  
penesiheyenü'a.

<sup>9</sup>Vahesie mieme nepümasitavaviri.  
Cuiepa memütama vahesie  
mieme nepücamasivaviri, müme  
pemünesiyetuiri vahesie mieme  
püta nepümasivaviri, 'ateüterima  
memühümeccü. <sup>10</sup>Naitü nepini  
'apini catinihücütüni, 'apini nepini  
tihücüta. Vahesie netiviyatü visi  
ne' Janetü necanayeitüarivani.

<sup>11</sup>Ari cuiepa nepüca'uyeica. 'Ime  
masi cuiepa mecaniu'uvani, ne  
'ahesüa neniymieni. Ne'uquiyari  
pemüpasie, queniva'üviyani  
müme pemünesiyetuiri  
'ahesüa memümiemetecü,  
memüyutaxevicecü que  
temütetaxevi tame. <sup>12</sup>Mexi  
vahamatü ne'uyeicacai  
necaniva'üviyacaitüni müme  
pemünesiyetuiri 'ahesüa  
memümiemetetücaicü.  
Nenivacueriecaitüni. Xevitü  
müme püca'uta'unari, 'iya xEICÜa  
'unaricacü mü'ayumiemetücai  
niuta'unarieni 'utüarica maye'anicü.

<sup>13</sup>Hicü 'ahesüa neniymieni.  
'Ipaü netinicuxatani cuiepa,  
yuhesie netemavierica  
memexeiyanicü 'aye'arücame.

<sup>14</sup>Ne 'aniuqui necanivarupitüani.  
Cuiepa memütama  
mecanivaruti'uxive'erietücüne  
cuiepa memücamiemetecü,  
ne cuiepa nemücamiemepaü.

<sup>15</sup>Nepücamasivaviri  
pemüvaranuvitünicü cuiepa  
memüca'u'uvanüci. Masi  
nepümasivaviri pemüva'üviyanicü  
tita 'axa müti'ane hepaüsita.

<sup>16</sup>Cuiepa mepücamiemete ne cuiepa  
nemücamiemepaü. <sup>17</sup>Tita yuri

mürainecü quenivapatani 'ahesie  
mieme. 'Aniuqui canihücütüni  
tita yuri müraine. <sup>18</sup>Cuiepa  
pemünesiheyenü'apaü, neta  
nepüvareutani'axüa cuiepa.

<sup>19</sup>Vahesie mieme nepasietü  
nepüyüane, mümerita 'ahesie  
mieme memüpasienicü tita yuri  
mürainesie meteviyatü.

<sup>20</sup>'Ime xEICÜa vahesie mieme  
nepücamasivaviri. Masi müme  
nehesie yuri memüteta'erieni  
vanuquicü, müme vahesie mieme  
nepümasivavirieta <sup>21</sup>yunaitü  
memüyuxevinicü, ne'uquiyari  
'acu, 'ecü nehesie pemütiviyapaü,  
neta 'ahesie nemütiviyapaü,  
mümerita tahesie memüteviyanicü,  
cuiepa memütama yuri  
memüteta'erienicü quename  
'ecü penesiheyenü'a. <sup>22</sup>Visi  
ne'aneme pemünesi'ayeitüapaü,  
neta müpaü me'aneneme  
nenivarayeitüani memüyuxevinicü  
tame temütaxevicecü, <sup>23</sup>ne  
vahesie netiviyacacu, 'ecüta  
nehesie petiviyacacu, me'aye'atü  
memüyutaxevicecü, cuiepa  
memütama memütemaicaicü  
quename penesiheyenü'a, quename  
müpaü petivarutanaqui'eri  
pemünetiunaqui'eripaü ne.

<sup>24</sup>Ne'uquiyari, tita  
pemünetiyetuiri, müpaü  
pünetinaque, haque nemeyeicani,  
mümeta nehamatü meme'uvanüci,  
memünesixeiycü visi ne'aneme  
que pemünerayeitüa. Tamüsü 'ecü  
pecaneninaqui'ericaitüni cuie  
cuxi canevacacu. <sup>25</sup>Ne'uquiyari  
yapemütüyuriene que  
mütiheiserie, cuiepa memütama  
mepücamasihetimaivave. Ne

püta nepümasihetima. 'Ime müpaü mecatenetimani quename penesiheyenü'a. <sup>26</sup>Ne necanivarutahecüatüani memümasimaicacü 'ecü que pemü'ane. Yaxeicüa netinivatahecüatüamücü, pemü'ahayevacü 'ecü pevanaqui'erietü que pemünetinaqui'eriecai ne, neta vahesie nemütiviyanicü.

**Que memüte'ivi Quesusi**

(Mateu 26:47-56; Maricuxi 14:43-50; Rucaxi 22:47-53)

**18** Müpaü 'utayüca caneyani Quesusi teyü'üquitüvamete vahamatü. 'Aquisie Cariuxa Muye'u mütiuyetevasie menanucüne haraveri muyemacaisiepai. Mana neutahani teyü'üquitüvamete vahamatü. <sup>2</sup>Hicü Cura miyetuaniquecai mana canemariecaitüni, müixa Quesusi teyü'üquitüvamete vahamatü memüyuyexexeürivacaicü muva. <sup>3</sup>Cura cuyaxi varavitütü, tupirisixi mara'acate memühüritüariecai vahesüa miemete Pareseusixi vahesüa miemete varavitütü, mana caninuani cüxemete haurite cusirate mete'u'ütü. <sup>4</sup>Quesusiri nai timaitü 'amüramiecai hepana, nivayeyani. Müpaü tinivarutahüave, Quepai xepütehacuvautüve. <sup>5</sup>Müme müpaü metenita'eiya, Quesusi Nasaretitanaca. 'Iya müpaü tivarutahüave, Nesü nepühücü. Cura miyetuaniquecai mana niutivecaitüni vahamatü.

<sup>6</sup>Hicü ne nepühücü tivarutahüavecu yucuta meniyeccüne, mecanatixürieni cuiepa. <sup>7</sup>'Ayumieme tavari müpaü tinivaruta'ivaviya, Quepai xepütehacuvautüve. Müme müpaü mete'utiyuane, Quesusi Nasaretitanaca. <sup>8</sup>Quesusi müpaü tivaruta'ei, Yanepütixehahüave, ne nepühücü. Xücari xenesicuvautüveni ne, xequenivaruhayeva 'ime memüyehücü, <sup>9</sup>maye'anicü niuquieya que mainecai, Müme pemünesiyetuiri nepücavareuyexürriexüa xeime. <sup>10</sup>Hicü Simuni Pecuru cusira 'acavietü nivatihana. Mara'acame mühüritüariecai ti'uximayatameya niuvani. Serietana mieme nacaya neucuviteni. Ti'uximayatame Marucu catinitevacaitüni. <sup>11</sup>Hicü Quesusi müpaü tinitahüave Pecuru, 'Acusira queneucaquesa painatana. Ne necarenu'ieni 'iya tecüxita mieme ne'uquiyari münesi'itüiani yanemüranayeyanicü.

**Mara'acame mühüritüariecaisüa que mütiu'atüarie Quesusi**

(Mateu 26:57-58; Maricuxi 14:53-54; Rucaxi 22:54)

<sup>12</sup>Hicü cuyaxiri, cuyaxi tiva'aitüvameri, Huriyusixi vatupirisixiri mecaniviya Quesusi. Menihüani. <sup>13</sup>'Anasisüa meri mecani'atüiani. 'Iya Caipasi munieya nihücütücaitüni. Caipasi mara'acate vahepaüsita canihüritüariecaitüni mücü viyarisie. <sup>14</sup>Caipasi tihücütücai



que mü'ane müvaruti'imaiyaxü  
Huriyusixi masi 'aixüa müyünicü  
xevitü tevi mümünicü teüteri  
vahesie mieme, 'utaitü.

**Pecuru que mütiyucu'imavacai,  
quename Quesusi camaicai 'utaitü**

*(Mateu 26:69-70; Maricuxi  
14:66-68; Rucaxi 22:55-57)*

<sup>15</sup>Mericsü Simuni Pecuru  
niveiyacaitüni Quesusi, xevitüta  
tiyü'üquitüvame tiveiyacai.  
Mara'acame mühiritüariecai  
nimaicaitüni 'iya tiyü'üquitüvame.  
Qesusimatü neutahani  
mara'acame mühiritüariecai  
curarutanapai. <sup>16</sup>Pecurusü mana  
niutivecaitüni tacua quitenie  
'aurie. Hicü mücü tiyü'üquitüvame  
mara'acame mühiritüariecai  
mimaicai mana neyani. Nitahüave  
quitenie tihüveme, curarutapai  
Pecuru ni'atüani. <sup>17</sup>Üimari  
quitenie müti hüvemetücai müpäü  
tinitahüave Pecuru, 'Ecüta 'icü  
tevi teyü'üquitüvametemama  
vahesüa mieme pecatihücü. 'Iya  
tiutayü, Ne pücatixaü. <sup>18</sup>Hicü  
te'uximayatamete tupirisixi  
vahamatü mana meniuti'ucaitüni  
mecüxetü me'atinaica,  
muhaütücaicü. Pecuruta vahamatü  
niutivecaitüni cüxetü.

**'Anasi que mütitä'ivaviyaxü Quesusi**

*(Mateu 26:59-66; Maricuxi  
14:55-64; Rucaxi 22:66-71)*

<sup>19</sup>Mericsü mara'acame  
mühiritüariecai canita'ivaviya  
Quesusi teyü'üquitüvametemama  
vahepaüsita, tita müti'üquitacai  
hepaüsita. <sup>20</sup>Quesusi müpäü  
tinita'eiya, Ne teüteri vahüxie

netinicuxatacaitüni cuiepa. Ne  
neheyemecü netini'üquitacaitüni  
tuquiteta, tuqui 'amüpatata,  
haque yunaitü Huriyusixi  
memüytixexeüriva. Ne  
tixaütü nepücatixatacai 'avie.

<sup>21</sup>Titayari peneticu'ivaviya  
ne. Quenivaruta'ivaviya müme  
memünesi'eniecai püta, siparasü  
que nemütivacuxaxatüvacai. Camü  
'ime mecatenimaica que nemutayü.

<sup>22</sup>Müpäü 'utayücu, xevitü tupiri  
mana mutivecai canivani Quesusi  
müpäü 'utaitü, Quepäü petita'eiya  
mara'acame mühiritüarie.

<sup>23</sup>Quesusi müpäü tita'ei, Xücasü  
'axa ne'utaineneni, quetineutahecüata  
tita 'axa müti'anecü. Me xüca  
'aixüa ne'utaineneni, titayari  
penetiüva. <sup>24</sup>Hicü 'Anasi neinü'ani  
hüiyacame Caipasisüa mara'acame  
mühiritüariecaisüa.

**Pecuru tavari que  
mütiyucu'imavacai, quename  
Quesusi camaicai 'utaitü**

*(Mateu 26:71-75; Maricuxi  
14:69-72; Rucaxi 22:58-62)*

<sup>25</sup>Mericsü Simuni Pecuru  
mana niutivecaitüni cüxetü.  
Hicü müpäü mete'itahüave,  
'Iya teyü'üquitüvametemama  
vahesüa mieme pecatihücü.  
Mücü niyuta'imani, müpäü  
niutayüni, Ne pücatixaü.  
<sup>26</sup>Mara'acame mühiritüariecai  
te'uximayatametemama  
xevitü, 'iya Pecuru minacavite  
canimarieyatücaitüni. Mücü müpäü  
rehüave, Quete ne necamarexei  
vana haraverita hamatüana  
pe'uyeicame. <sup>27</sup>Tavari niyuta'imani  
Pecuru. Yapaucua niutahiva vacana.

**Piratusüa que mütiu'atüarie Quesusi***(Mateu 27:1-2, 11-14; Maricuxi**15:1-5; Rucaxi 23:1-5)*

<sup>28</sup>Hicü Caipasisüa meheyecüneca mecani'atüani Quesusi 'isücame quie. Niyuimuanatücaitüni. Mümeri mepücaheutahaxüa 'isücame quita capa meca'itiyatü me'acü necü, masi Pasicua 'icuaiyari memütécuanicü.

<sup>29</sup>'Ayumieme Piratu tacua nivayeyani vahüxie. Müpäü niutayüni, Titacü xete'ixaneta 'icü tevi. <sup>30</sup>Müme müpäü metenita'eiya, Xüca 'icü 'axa catiyurienenique, tepücamasiyetuirieniqueyu.

<sup>31</sup>Hicü Piratu müpäü tivarutahüave, Xequenanuvitüqui. Xequeneuta'inüata xe'inüari niuquiyari que maine. Huriyusixi müpäü metel'itahüave, Tame heiserie tepücahexeiyä temimienicü tevi. <sup>32</sup>Mücücü naye'ani Quesusi niuquieya mutainecai que mütimüniquecai ticuxatatü. <sup>33</sup>Hicü tavari Piratu neutahani 'isücame quita. Nitahüave Quesusi, müpäü tinitahüave, 'Ecü Huriyusixi petiva'aitüvame. <sup>34</sup>Quesusi müpäü tita'ei, 'Acümana müpäü petiutaine, hipatü nusu memate'utahüavixü nehepäüsita. <sup>35</sup>Piratu tita'ei, Ne netihuriyu. 'Ateüterima, mara'acate memühürütüarie mepümasiyetua nehesüa. Que petiuyuri. <sup>36</sup>Quesusi müpäü tita'ei, 'Ena cuiepa pücamieme que nemüti'aita. Xüca 'ena cuiepa miemetünique que nemüti'aita, netupirisixima mecaniyucuitüveniqueyu nemücayetuiyanicü Huriyusixi vahesüa. Masi hicü que nemüti'aita 'uva pücamieme.

<sup>37</sup>Piratu müpäü titahüave, Que peti'aitametüni 'ecü. Quesusi müpäü tita'ei, 'Ecü pecaniutaineni ne ti'aitame nemühücü. 'Ayumieme necaniutinuiva, 'ayumieme cuiepa necaninuani, nemütitahecüatanicü tita yuri müraine hepäüsita. Yunaitü yuri mürainesie miemete mecaneni'enieca ne'utaniucame.

<sup>38</sup>Piratu müpäü tinitahüave, Que titita yuri maine.

**'Isücame que mütiuta'aitaxü, Quesusi mümierienicü***(Mateu 27:15-31; Maricuxi**15:6-20; Rucaxi 23:13-25)*

Hicü müpäü 'utayüca tavari nivayeyani Huriyusixi vahüxie. Müpäü tinivarutahüave, Ne tixaü nepücatiucaxei nemütüihüpanicü hesiena.

<sup>39</sup>Ipäü cani'aneni xeyeyari, xeime nemüxexünirienicü Pasicua 'ixüararipa. Mericüte, xecateyuvaüriya nemüxexünirieni Huriyusixi tixe'aitüvame. <sup>40</sup>Hicü müpäü meniutihiva tavari, Mücü pücatixaü, Vaxavaxi püta me'utiyuatü. 'Iya Vaxavaxi catinina vayametücaitüni.

**19** Hicü Piratu neivitüni Quesusi, tiniuta'aita mücuveiyaxüanicü. <sup>2</sup>Cuyaxita xuya mumayari me'utasaca mu'uyasie menenutimanirieni. Herie mieme 'ixuriqui mütaüräiyecü menenacuvirieni. <sup>3</sup>Hüxiena meni'axecaitüni müpäü me'utiyuatü, 'Aixüa 'acu Huriyusixi tiva'aitüvame. Menicuvaxüanita.

<sup>4</sup>Hicü tavari tacua nivayeyani Piratu. Müpäü tinivarutahüave, Camü 'uva tacuapai

nepüxe'atüirieni xemütemaicaicacü tixaü nemücatuicaxeicü hesiena nemütiuhüpanicü. <sup>5</sup>Hicü Qesusi nivayeyani xuya mumayari 'anamatü, herie mieme 'ixuriqui mütaüraüye 'anacuvietü. Müpäü tivarahüave, Camü tevi. <sup>6</sup>Hicüri mara'acate memühürütüariecai tupirisixita quepaucua memixei meniutihiva müpäü me'utiyuatü, Curuxisie queneumi'a, curuxisie. Piratu müpäü tivacühüave, Xemesü xequenanutitüqui, curuxisie xequenemi'a. Neri tixaü nepücatuicaxei hesiena nemütiuhüpanicü. <sup>7</sup>Huriyusixi müpäü mete'ita'ei, Tame 'inüari niuquiyari tecanexeyani. Mücü 'inüari que maine, neuyeveca 'icü mümüni Cacaüyari nu'aya mayueitüacü.

<sup>8</sup>Piratu 'icü niuqui 'u'enieca masi vaüca neumacaitüni. <sup>9</sup>Tavari 'isücame quita heutahaca müpäü tinitahüave Qesusi, Haque pepemieme 'ecü. Qesusiri haquevasü cacanita'eiya. <sup>10</sup>Piraturu müpäü titahüave, Pecanetita'eiya ne. Pecatimate ne heiserie nemexeyia nemümasixünacü, heiserie nerexeyata curuxisie nemümasimienicü. <sup>11</sup>Qesusi müpäü tita'ei, 'Ecü heiserie pepücahexeyianiqueyu nehapaüsita taheima miemecü xüca pecapitüariecaque. 'Ayumieme 'iya munesiyetua 'ahesüa, mücü masi vaücava 'axa tiniuyurieni. <sup>12</sup>Piratu 'ayumiemeru tinicuvaunecaitüni que mütixünacü. Huriyusixi mecanutihiva müpäü me'utiyuatü, Xüca 'icü pe'uxüna, pepüca'inaqu'erie Ti'aitame Sesaxi.

Yunaitü te'aitamete memayueitüa mecaneyle'unieca Sesaxi.

<sup>13</sup>Hicü Piratu 'icü vaniuqui 'u'enieca nivayehana Qesusi. Mana caniuçayerüni Piratu yu'uvenisie Macutenusariya müracutevasie, Hepürayusixi vaniuquicü Cavata müracutevasie. <sup>14</sup>Iya tucarisie meniha'arütüacaitüni Pasicua 'ixüarariyari. 'Esivatücacu tuca nayeiximecaitüni. Müpäü tinivarutahüave Huriyusixi, Camü tixe'aitüvame. <sup>15</sup>Mümeri meniutihiva, Quenanuvitüqui, quenanuvitüqui, curuxisie quenemi'a. Piratu müpäü tivacühüave, Quetütüri curuxisie nepeimieni tixe'aitüvame. Mara'acate memühürütüariecai müpäü mete'ita'ei, Tame xeime tepücahexeyia tati'aitüvame, Sesaxi xeicüa pütati'aitüvame. <sup>16</sup>Hicü nivayetuirieni curuxisie mümierienicü. Hicü meneihana Qesusi.

### Qesusi que mütiümierie curuxisie

(Mateu 27:32-44: Maricuxi  
15:21-32; Rucaxi 23:26-43)

<sup>17</sup>Yucuruxi 'atütü mana neyani Müqui Mu'uya Manuca müracutevasie, Hepürayusixi vaniuquicü Curucuta müracutevasie. <sup>18</sup>Manari curuxisie menitivieni. Yuhutame hamatüana meteverutivütüa naisata, Qesusi vahixüata. <sup>19</sup>Piratuta 'inüari niuta'utüani. Curuxisie neimani. Müpäü catine'ucaitüni, QESUSI NASARETITANACA HURIYUSIXI TIVA'AITÜVAME. <sup>20</sup>Huriyusixi yumüiretü menititerüva 'iya 'inüari quiecaru mehuracü Qesusi mamieriesie. Hepürayusixi

Xumatari Cüriyecusixi vaniüquitecü püraye'uxacai. <sup>21</sup>Hicü Huriyusixi vamara'acate memühürütüariecai müpaü metenitahüave Piratu, Pepücaniu'utüani Huriyusixi Tiva'aitüvame. 'İpaü püta, 'İya mainecai Huriyusixi nepütiva'aitüvame pepütiniu'utüani. <sup>22</sup>Piratu müpaü tivaruta'ei, Que nemütü'utüa netiniuta'utüaniri.

<sup>23</sup>Hicü cuyaxi curuxisie me'icavieca Qesusi, 'ixuriquiteya meneutahuriexüani. Naucame menayeitüani, yuxexütü cuyaxi xei 'ixuriquiyari memexeianicü, tetüata mieme 'ixuriquita 'aparüte yuxaüta. Tetüata mieme 'ixuriquieya pücavipecai, yuxevitü ni'isecaitüni naitü. <sup>24</sup>Hicü müpaü meteniyutahüaveni, Camü tepüca'itisanani. Masi tepütata'iva, siparasü quepai pe'iva. Müpaü tinaye'atüarieni 'utüarica müpaü maine, Ne'ixuriqui meniutapataxüani yuhesie mieme, ne'ixuriquicü menayu'iva.

Mericüsü müpaü mecateniuyurieni cuyaxi. <sup>25</sup>Qesusi curuxieya 'aurie meniti'ucaitünita Qesusi varusieya, varusieya 'ivaya, Mariya Cüreupa 'üyaya, Mariya Mararatanaca yunaitü. <sup>26</sup>Qesusisü varuxeiyaca mana meti'ucacu yuvarusi, 'iya tiyü'üquitüvame münacqu'eriecai, müpaü tinitahüave yuvarusi, 'Uca 'acu, camü 'anive. <sup>27</sup>'Arique müpaü tinihürütüani 'iya tiyü'üquitüvame, Camü 'avarusi 'utaitü. 'İya tucarisie tiyü'üquitüvame yuhesüa nei'inieni.

### **Qesusi yu'iyari que mütiyetua**

*(Mateu 27:45-56; Maricuxi*

*15:33-41; Rucaxi 23:44-49)*

<sup>28</sup>'Anari Qesusi müpaü timaitü naitü 'ari maye'atüariecü, 'utüarica

maye'atüarienicü müpaü niutayüni, Nepeuharimücü. <sup>29</sup>Xari mana niucateitüni vinu masina hünetü. Hicü ha 'iseveme mucuxani me'utahüniyaca vinu masinacü, hisupu cüyeyarisie me'iyeca, teniena meneitiserieni. <sup>30</sup>Qesusi he'inüataca vinu masina müpaü niutayüni, Canaye'aniri. Yumu'usie 'anacatusireca niyetuani yu'iyari.

### **Cuya que müreitise**

#### **Qesusi 'aquitana**

<sup>31</sup>Mericüsü 'iya tucarisie meniha'arütüacaitüni 'ixüarari. 'Ayumieme Huriyusixi menitavavirieni Piratu vavatute memütitaracü memüvaraca'ünicü, caxarite memücayuhayevacü curuxisie me'uyevütü 'uxiپیا tucarisie. 'İya 'uxiپیا tucari yemecü cani'ixüararitüacaitüni.

<sup>32</sup>'Ayumieme cuyaxi mana meniu'axüani, memucavütüarie curuxisie hamatüana xeime vatuteya meniutitara, xeimetari vatuteya mete'utitaraxü. <sup>33</sup>Qesusisüa me'u'axüaca vatuteya mepüca'utitaraxü memixeicü müquime.

<sup>34</sup>Masi xevitü cuya pisicacü neitiseni 'aquitana. Yapaucua naneni xuriya hata. <sup>35</sup>Que mü'ane munierixü tiniutahecüata. Tita mütitahecüata yuri canaineni. Mücüta tinimaica yuri mainecü, yuri xemüte'eriecacü xemeta.

<sup>36</sup>Müpaü tiniuyüni 'utüarica maye'atüarienicü müpaü mutaine, 'Umeyari pücatitare. <sup>37</sup>Tavari xevitü 'utüarica 'İpaü naineni, Mecani'ixüariecuni que mü'ane memuse.

**Teuquiyapa que memüteheite  
Quesusi**

(*Mateu 27:57-61; Maricuxi  
15:42-47; Rucaxi 23:50-56*)

<sup>38</sup>Mericsü 'arique Cuse  
'Arimateyatanaca canitavavirieni  
Piratu menucuenicü  
Quesusi caxarieya. 'Iya  
Cuse Quesusisüa mieme  
catiniyü'üquitüvemetücaitüni 'avie,  
müvamacarücaicü Huriyusixi.  
Piraturi canipitüani. Neyani,  
caxarieya necueni. <sup>39</sup>Nicuremu  
mana ninuanita meripai  
hesüana munua yüvicüta. 'Iyasü  
miru haruhemame visi mu'üa  
mutacuicuiya ni'atüani merie  
necapaü paümeme. <sup>40</sup>Hicü  
meneicueni Quesusi caxarieya.  
Menicu'eima 'ixuriquitecü visi  
mu'üa me'icavirieca. Müpaü  
cani'aneni Huriyusixi vayeiyari  
teuquiyacü. <sup>41</sup>Mana curuxisie  
mameriesie haraveri niyemacaitüni.  
Haraverita teuquiyapa xique  
müvaye'inierie nicumacaitüni.  
Xevitü cuxi mücü teuquiyapa  
pücacateuquievecai. <sup>42</sup>Muva  
'ayumieme meneiteni Quesusi,  
Huriyusixi memüyuh'aaritüacaicü  
'iya tucarisie, teuquiyapa  
mehuracaicü.

**Que müranucuque Quesusi müquite  
vasata**

(*Mateu 28:1-10; Maricuxi  
16:1-8; Rucaxi 24:1-12*)

**20** Mericsü mexüacame  
tucariyarisie semanasie  
teuquiyapa ninuani Mariya  
Mararatanaca 'uyüvicacu cuxi  
yuimuana. Heuhüiyacame

niuxeiya tete teuquiya hüxie  
meucatei. <sup>2</sup>Hicü nausarümetü  
neyani. Simuni Pecurusüa ninuani,  
xeimesüata tiyü'üquitüvame  
Quesusi minaqu'eriecaisüa. Müpaü  
tinivarutahüave, Teuquiyapa  
menivayecueni Ti'aitame.  
'Asitepücatemate haque memeite.  
<sup>3</sup>Hicü Pecuru neyani xevitü  
tiyü'üquitüvameatü. Teuquiyapa  
menahucaitüni. <sup>4</sup>Yuhepaüsita  
meniunausarümeacaitüni.  
Xevitü tiyü'üquitüvame masi  
niutanausacai, Pecuru na'iva,  
naye'ani meri teuquiyapa.  
<sup>5</sup>Anahuca nixeiya 'ixuriquite  
mana 'acateme, peru muva  
pücaheutaha. <sup>6</sup>Hicü Simuni Pecuru  
'u'imatütü ninuani. Teuquiyapa  
neutahani. 'Ixuriquite niuxeiya  
mana 'acateme. <sup>7</sup>Tuvaxa tiuxei  
mu'uya me'eimecai 'ixuriquite  
'aurie caticateme, yateva ticateme  
püta tutunime 'uxeicüa. <sup>8</sup>Ana  
neutahani 'iya tiyü'üquitüvame  
'umexüatü munua teuquiyapa.  
Nixeiya, yuri tiniuta'erieni. <sup>9</sup>Müme  
cuxi mepücaheitimaivavecai  
'utüarica meuyevecaicü müquite  
vasata manucuqueni maine.  
<sup>10</sup>Hicü teyü'üquitüvamate yuquie  
menecüne.

**Masiücütü que mürayuyeitüa  
Quesusi Mariya Mararatanaca hüxie**

(*Maricuxi 16:9-11*)

<sup>11</sup>Mericsü Mariya teuquiya hüxie  
nitüvecaitüni tacua 'utasuatü. Hicü  
'utasuatü nanahuni, teuquiyapa  
neutaniere. <sup>12</sup>Mana nivaruxeiya  
niuqui tuayamete yuhutame  
me'anacatuxame. Xevitü Quesusi  
mu'uya manucatei nacateitüni,

xevitüta quetaya manucatei  
 racatei haque Qesusi caxarieya  
 manutequiecai. <sup>13</sup>Müme müpäü  
 metenitahüave, Neuxei 'uca,  
 titayari petiutasuaca. <sup>14</sup>Müpäü  
 tivacühüave, Neti'aitüvame  
 mepecuei, 'asinepücatimate haque  
 memeite. Müpäü 'utayüca ta'aurie  
 naveni. Nixeiya Qesusi mana  
 'utiveme, masi 'asipücatimaicai  
 müquesusitücaicü. <sup>15</sup>Qesusi  
 müpäü tinitahüave, Neuxei  
 'uca, titayari petiutasuaca.  
 Quepai pepüracuvaune. Mücü  
 haravericame 'erietü müpäü  
 tinitahüave, Neuxei 'uqui, xüca 'ecü  
 peheicueni, queneneutaxatüa haque  
 pemeite. Neri nenenucueimücü.  
<sup>16</sup>Qesusi müpäü ticühüave,  
 Mariya 'acu. 'Iya hepana  
 'aniereca müpäü tinitahüave  
 Hepürayusixi vaniucicü, Xavuni,  
 taniuquicü Ti'üquitame maine.  
<sup>17</sup>Qesusi müpäü ticühüave,  
 Pepücanesiviyani. Ne'uquiyarisüa  
 nepüca'anutiyeive cuxi. Masi  
 ne'ivama vahesüa quenemie.  
 Müpäü quetinivaretahüavi,  
 Ne'uquiyarisüa müxe'uquiyarisüa  
 nenanutiyemücü, necacaiyarisüa  
 müxecacaiyarisüa neranutiyani.  
<sup>18</sup>Hicü Mariya Mararatanaca mana  
 ninuani müpäü tivacuxaxatüvatü  
 teyü'üquitüvamete Ti'aitame  
 muxecü, müpäü mürehüavecaicü.

**Masiücütü que mürayuyeitüa  
 Qesusi teyü'üquitüvamete vahüxie**

*(Mateu 28:16-20; Maricuxi  
 16:14-18; Rucaxi 24:36-49)*

<sup>19</sup>Merücüsü 'acayunecu mücü  
 mexüacame tucariyarisie semanasie,  
 teyü'üquitüvamete memütitecaisie

quiteniete reunatücaicacu  
 memüvamacarücaicü Huriyusixi,  
 Qesusi ninuani. Vahixüapa  
 niutaqueni. Müpäü tinivarutahüave,  
 Xüca xeca'uximatüarieca  
 yu'iyarisie. <sup>20</sup>Müpäü 'utayüca  
 nivaruxeisitüani yumamate  
 yu'aqui. Teyü'üquitüvamete  
 meniütetemamaviecaitüni Ti'aitame  
 mexeyatü. <sup>21</sup>Hicü Qesusi  
 tavari müpäü tivarutahüave,  
 Xüca xeca'uximatüarieca  
 yu'iyarisie. Ne'uquiyari  
 munesihyenü'apau, neta müpäü  
 necanixeheutanü'axüani. <sup>22</sup>Müpäü  
 'utayüca nivaru'iyamani. Müpäü  
 tivarutahüave, Xequeneutanaqui'eri  
 'Iyari Mütiyupata. <sup>23</sup>Sepa que  
 memühate xemüteyareuyehüvirieni  
 tita 'axa memüteyurie,  
 meteneuyehüviyariecuni. Sepa que  
 memühate xemüvavesitüaca tita  
 'axa memüteyurie, menivecacuni  
 mepücauyatüxüna.

**Tumaxi yuri que mücati'eriecai**

<sup>24</sup>Merücüsü Tumaxi Vavari  
 mütitevacai tamamata heimana  
 yuhutame vahesüa mieme  
 canihücütücaitüni. 'Iya vahamatü  
 püca'uyeicacai quepauca  
 Qesusi munua. <sup>25</sup>Hicü hipatü  
 teyü'üquitüvamete müpäü  
 metenicuxaxatüvacaitüni, Ti'aitame  
 tecanixeiya, me'utiuyatü. 'Iya  
 tivacühüave, Xücarü mamayasie  
 neca'ixeiyani cürapuxi 'uxayari,  
 xüca ne'itüvamecü neca'imayüani  
 cürapuxi 'uxayari, 'aquieya xüca  
 nemamacü neca'imayüani, yuri  
 nepücatita'erieniri.

<sup>26</sup>Merücüsü 'atahairieca tucari  
 'anucayacu tavari menititecaitüni

quita teyü'üquitüvametemama.  
Tumaxita vahamatü tiucatei. Hicü  
quiteniete reunarümacacu Quesusi  
ninuani. Vahixüapa niutaqueni.  
Müpaü tinivarutahüave, Xüca  
ceca'uximatüarieca yu'iyarisie.

<sup>27</sup>Hicü müpaü titahüavixü  
Tumaxi, Quenaye'a, 'a'itüvamecü  
queneneumayüa nemamatesie,  
'amamacü queneneumayüani  
ne'aqita. Yuri pecati'erietü  
pépüca'ayeiximeni, yuri  
peti'erietü püta quenaye'a.

<sup>28</sup>Tumaxi müpaü tinita'eiya,  
Neti'aitüvame necaüyari 'acu.

<sup>29</sup>Quesusi müpaü titahüave, Yuri  
petiuta'erie pemünesi'uxeicü.  
Müme memücanesixeiyavave  
peru yuri memüte'erie, müme  
mecaniyutemamavieca.

#### Titayari maca'utüari xapa

<sup>30</sup>Meriçüte, 'inüari yücü 'aneneme  
müireme yatiniyuriencaitüni  
Quesusi teyü'üquitüvamete  
vahüxie, que mücare'utüarie 'icü  
xapasie. <sup>31</sup>Içürü canaca'utüarieni  
yuri xemüte'eriecacü Quesusi  
mücürisitücü, Cacaüyari  
münu'ayacü. Yuri xete'erietü  
tucari xemexeyanicü hesüana  
xemiemetetütü raca'utüarie.

#### Masiücütü que mürayuyeitüa

#### Quesusi teyü'üquitüvamete 'atayuhutame vahüxie

**21** Meriçüsü 'arique tavari  
Quesusi masiücütü  
nayuyeitüani teyü'üquitüvamete  
vahüxie Tiveriya haracunayarisie.  
'Ipaü masiücütü nayuyeitüani.

<sup>2</sup>'Axeicüa meniu'uvacaitüni  
Simuni Pecuru, Tumaxi Vavari

mütitevacai, Natanaheri  
Canatanaca Carereya cuieyarisie  
mieme, Severeu nivemama,  
teyü'üquitüvametemama hipatü  
yuhutatü. <sup>3</sup>Simuni Pecuru  
müpaü tinivarutahüave, Ne  
nepüquesüveyami. Müpaü  
mete'itahüave, Tame 'ahamatü  
tepuhu tanaitü. Mana menecüne,  
canuvasie menicayaxe. Mücü  
tücarisie tixaütü mepücate'u'axixü.  
<sup>4</sup>Meriçüsü 'esiva 'uhecüacacu  
mana niutaqueni Quesusi  
haracuna tesita. Masi  
teyü'üquitüvamete mepüca'imaicai  
Quesusitüme. <sup>5</sup>Hicü Quesusi  
müpaü tinivarutahüave, Neuxei  
temari, 'icuai xecatehexeiyä.  
Müpaü mete'ita'ei, Havaicü.  
<sup>6</sup>'Iya tivacühüave, Vipi  
xequeneucavivi canuva serieta.  
Mana xecanivacaxeyiacuni. Mana  
meneicavivieni. Mepüyutatexi  
me'ihanatü memüvaücavacaicü  
quesüte. <sup>7</sup>Hicü 'Iya tiyü'üquitüvame  
Quesusi minaqui'eriecai müpaü  
tinitahüave Pecuru, Cari Ti'aitame  
canihücütüni. Hicü Simuni Pecuru  
'u'enaca quename Ti'aitame  
hücütücai, yu'ixuriqui herie  
mieme 'anacuvieca 'amavetü  
'amuyeicacaicü, hapa neucasuna.  
<sup>8</sup>Hipatü teyü'üquitüvamete  
canuvasie meyetetü mecaniu'axüani  
vipi me'uhaximetü quesüte  
mehüneme. Cuiepa pücahetevacai,  
huta tevyari heimana tamamata  
mamayari xeicüa petevacai.  
<sup>9</sup>Cuiepa me'u'axüaca tü meniuxeiya  
'etinereme, quesü tüpa 'acaimie  
mete'uxei pamame. <sup>10</sup>Quesusi  
müpaü tinivarutahüave, Qesüte  
xique xemüvarutivi xequenivara'tüi.

<sup>11</sup>Simuni Pecuru mana neutimaque, vipi canihana cuiepa. Qesüte 'amepapatü menihünecaitüni, xei sienituyari heimana huta teviyari heimana tamamata heimana yuhaicatü meniypaümeccaitüni. Sepanetü memüvaücavacai, püca'utasanixü vipi. <sup>12</sup>Qesusi müpaü tinivarutahüave, Xequenacüni xequetenecuacari. Teyü'üquitüvamete ni xevitü pücayuvaüriyacai 'ecü que pepüpaicü titahüaveque, Ti'aitame mühücütücaicü memütemaicaicü. <sup>13</sup>Hicü Qesusi mana ninuani, pa nanucu'üni. Nivarumini, quesü yaxeciüata tivarumi.

<sup>14</sup>Ana hairieca masiücütü nayuyeitüani Qesusi teyü'üquitüvamete vahüxie müquite vasata 'anucuqueca.

**Nemuxasi türixi quetinivarumicua, que mainecai**

<sup>15</sup>Mericsüsi mete'ucuacu Qesusi müpaü tinitahüave Simuni Pecuru, Simuni 'acu Vani nu'aya, vaücava penetinaqui'erie, 'ime 'esiva xeciüa menesinaqui'eriecacu. 'Iya rehüave, Hü Ti'aitame. 'Ecü pepütimate nemümasinaqui'erie. Titahüave, Mericüte, nemuxasi türixi quetinivarumicua. <sup>16</sup>Hutarieca müpaü titahüave, Simuni 'acu Vani nu'aya, penetinaqui'erie. Müpaü titahüave, Hü Ti'aitame. 'Ecü pepütimate nemümasinaqui'erie. Müpaü titahüave, Nemuxasi queniva'üviyani. <sup>17</sup>Hairiecaritahüave, Simuni 'acu Vani nu'aya, penetinaqui'erie. Pecuru niyuhiverieca hairieca penetinaqui'erie mütitahüavixücü.

Müpaü tinitahüave, Ti'aitame, 'ecü nai pecatinimaica. Pepütimate nemümasinaqui'erie. Qesusi titahüave, Quetinivarumicua nemuxasi. <sup>18</sup>Niuqui caniseüyeni que nematicühüave, quepaucua pemühecuacai 'acümana pena'ahüayacaitüni peticuyeicacai haque pemeuyeimücücai. Quepaucua pemütaseüye, xevitü camananahüamücü maranuhana haque pemücaheuyeimücü, 'amama penitaseraxüamücü. <sup>19</sup>Müpaü niutayüni tihecüatatü que mütimüniquecai visi 'aneme 'ayeitüanique Cacaüyari. Müpaü 'utayüca müpaü tinitahüave, Quenenanuveyia ne'utüma.

**Mücü tiyü'üquitüvame Qesusi minaqü'eriecai**

<sup>20</sup>Pecuru ta'aurie 'aveca nixeiya mücü tiyü'üquitüvame Qesusi minaqü'eriecai, mücü memüte'ucuaisie 'auriena mucatei müpaü mütitahüavixücü, Ti'aitame que paicü masiyetüani. Nixeiya 'iya varuveiyame. <sup>21</sup>Pecuru 'ixeyaca mücü, müpaü tinitahüave Qesusi, Ti'aitame que tiyurieni 'iya. <sup>22</sup>Qesusi müpaü ticühüave, Xüca nesi'unaqueque 'icü müyuhayevacü nemunuanique, quesü pe'aneniqueyu 'ecü. Quenenanuveyia ne'utüma. <sup>23</sup>'Ayumieme ta'ivama vasata 'icü niuqui canixasivacaitüni, quename 'iya tiyü'üquitüvame camüniquecai. Masi Qesusi müpaü pücatitahüavixücü mücamüniquecaicü. Xüca nesi'unaqueque müyuhayevacü nemunuanique, quesü



pe'aneniqueyu 'ecü, püta  
titañuavixü.

<sup>24</sup>Mücü tiyü'üquitüvame  
canihücütüni que mü'ane  
mütihecüata 'icü hepaüsita,  
que mü'ane mütiuti'utüa 'icü.  
Tepütemate tita mütihecüata yuri  
maine.

<sup>25</sup>Vaücava cuxi yücü 'anenetü  
canixuaveni que mütiuyuri  
Quesusi. Xüca xexuitü  
tiuti'utüarienique, müpaü  
nepüticu'eriva, 'ena cuiëpa  
pücatinaquëniyëyu xapate  
mütiti'utüarieniqueyu. Müpaü  
xeicüa.

# NÜ'ARISIXI

## Que Memüte'uyuri

---

Que memüte'utahüavarie  
memeixeianiquecaicü  
'Iyari Mütiyupata

**1** Neuxei Teuquiru, matüaripai mieme xapa neputavevi mexüacame, nai que mütiuyü hepaüsita ticuxatame, Qesusi que mütisutüa yatiyurienetü yati'üquitatü. <sup>2</sup>Müpaü tiuyurieca, 'ana nanutivitüquienu, 'aisica varupitüaca nü'arisixi müvaranuyeteüixixü, 'Iyari Mütiyupata yati'aitacacu. <sup>3</sup>Tiucuinca mücü, vahesüa 'ayenieretü puyuhcüatacai mamariavaveme tiyurienetü. Huta teviyari tucari mepixeyacai. Tinivacuxaxatüvacaitüni que müti'ane Cacaüyari ti'aitametücacu. <sup>4</sup>Hicü vahamatü 'a'ucaitü 'ipäü tinivaruta'aitüani, Xepüca'ayecücani Querusareme, masi xequetenecuevieca tita ne'uquiyari mütxatacai quename tixehanü'airieni, que nemütixe'utahüavixü. <sup>5</sup>Vani hacü tiniuca'üyacaitüni, xeme püta xepüca'üyarieni 'Iyari Mütiyupatacä yapaümexa tucari tixüyu. Müpaü niutayüni.

Qesusi que müranutitüa

<sup>6</sup>Mericüsü müme hamatüana memuyucuxeürü müpaü metenicu'ivaviyacaitüni, Neuxei Ti'aitame, hicü petatipitüa tame 'Ixaherisixi teüteriyari temütetati'aitüanicü meripaipäü. <sup>7</sup>Mücüsü müpaü tinivarutahüave, Xeme xehesie pücatinaque xemütemaicacü viyari tucari hepaüsita. Ne'uquiyari püta nipata mücü naima heiserie mexeyanicü hepaüsitanu. <sup>8</sup>Masisü xecanitürücariryaricuni 'Iyari Mütiyupata xehesie tiviyayu. Xemunenierixü xepüyüaca xetehecüatatü nehepaüsita Querusareme, naisarie Cureyasie Samariyasie naisarie cuie manunierepai. <sup>9</sup>Müpaü 'utayüca, müme me'ixeyacacu, nanutivitüquienu. Hai niucuyani memüca'ixeyacü. <sup>10</sup>Hicü yuheima me'utinienierecacu mexi 'utimiecai, camü 'uquisi yuhutatü va'aurie meniuti'uni me'anacatuxatü. <sup>11</sup>Müme müpaü metenivarutahüave, Carereyatari 'acu, titayari yuheima

xete'utineniere. Mücütütü xesata  
'uветü meutivitüque yuheima  
Quesusitütü, que xemüte'ixei  
heutimieme yuheima, yaxeixüa  
'anetü caninuamücü.

**Que, memütehenuyexei  
xeime mühürütüarienicü  
Cura tiutahayevacu**

<sup>12</sup>Mericsü yemuri Huriva  
Mati'usie me'ayenexüaca  
Querusareme meniu'axüani.  
'Uxipiya tucarisie tevi que  
mütüpütüarie muyeicanicü,  
müpaü pehura Querusareme.  
<sup>13</sup>Me'u'axüaca, quita  
meheutahaxüaca meneuticüne  
qui taüta. Mana mepü'axecai  
Pecuru Cacuvu Vani 'Atürexü  
Piripe Tumaxi Parüturume Mateu  
Cacuvu 'Aripeu nu'aya, Simuni  
müserutisitatücai, Cura Cacuvu  
'ivaya. <sup>14</sup>Müme yunaitü 'axeixüa  
mepü'ayumiemetetücai neneviericü,  
'ucarita, Mariyata Qesusi  
müvarusieyatücai, 'ivamamata.

<sup>15</sup>Mericsü 'ana Pecuru  
nanucuqueni yu'ivama vahixüapa.  
Teüteri 'axeixüa meyuxeürietü xei  
sienituyari heimana xei teviyari  
yacütütü meniyupaümeccaitüni.  
Müpaü niutayüni Pecuru,

<sup>16</sup>Ne'ivamarixi, neuvevecaitüni  
'ütüarica maye'anicü, meripai  
que mütiutayü 'Iyari Mütiyupata,  
Raviri müpaü 'utayücu Cura  
hepaüsita, que mü'ane müvarevitü  
müme memivi Qesusi hepaüsita.

<sup>17</sup>Tame xevitü pühücütücai, 'icü  
tahürütüarica hesiena pütinaquecai.

<sup>18</sup>Mericsü vaniu cuie punanai  
mücü tumini ma'ivaxücü  
yatiuyurica que mücatiheiserie.

Mana 'ativeca yuhuriepa pasanixü,  
cuinurieya naitü navivieni.

<sup>19</sup>Querusareme memütama yunaitü  
mepüte'utamari. 'Ayumieme mücü  
cuie Haserama catinacutevaca  
vanuquicü, taniuquicü Xuriya  
Mataxüri racuteva. <sup>20</sup>Putä'utüarie  
Cuicari Xapayarisie müpaü  
'anuyütü,

Que'uyemaveni quiya,  
Xevitütüma püca'ayecani.

Müpaü panuyüneta,

Que mütihürütüariecai,

Xevitü püta yaquetihürütüarieca.

<sup>21</sup>Mericüte, neuveveca xevitü  
müme 'uquisi tahamatü memü'uvacai  
tucaricü quepaucua Ti'aitame Qesusi  
tahesüa manuyeicacai <sup>22</sup>'iya tucarisie  
Vani meca'üyaxüsie, 'iya tucarisie  
tasata manutivitüqueque, peuyevese  
xevitü müme memunenierixü  
tahamatü tihecüatätü mayanicü que  
müranucuque.

<sup>23</sup>Hicü yuhutame  
menivaruti'uitüani Cuse Vartüsavaxi  
mütitevacai Cusitu müremu'uhüacai,  
Matiya. <sup>24</sup>Meniyutanenevieni  
müpaü me'utiyuatü, 'Ecü Ti'aitame  
pecatinimaica yunaima va'iyari.

Quetaneuxeisitia que mü'ane  
pemanuyexei 'icü yuhutame,  
<sup>25</sup>hesiena mütinaquenicü 'icü  
hepaüsita mühürütüarienicü  
mütanü'arienicü, Cura  
yatiuhayevacu yuhuyeripa metüaciü.

<sup>26</sup>Inüari meputavevi que mü'ane  
mühücütüni. Matiyasie tiniunaque.  
Mepi'inüataxü tamamata heimana  
xevime nü'arisixi vahamatü.

**'Iyari Mütiyupata que mütinua**

**2** Mericsü 'ixüarari  
'atahutarieca semanasie

mieme 'aye'acu yunaitü  
 mepüyuxeüriceai yametyurienique  
 'uxeicüa. <sup>2</sup>Yapaucua taheima  
 mieme 'ecapaü 'anetü niyuani  
 türücaüyetü carima 'uyemietü.  
 Mücü yuariya putahünixü quita  
 memüvayetecaisie. <sup>3</sup>Taipaü  
 'aneneme mepuxeü yuxexuime  
 vahesie 'a'ucame. <sup>4</sup>Yunaime  
 püvaruvi 'Iyari Mütiyupata.  
 Mepisütüa me'utiniütü niuquitecü,  
 'Iyari que mütivapitüacai  
 memütiniunicü.

<sup>5</sup>Merücüsü Querusareme  
 mepütitecai Huriyusixi Cacaüyari  
 memayexeyacai yunaime nuivarite  
 vahesüa memümiemetetücai naisari  
 muyuavitüa. <sup>6</sup>Quepaucua yuariya  
 muyua yunaitü mepuyuxeüri,  
 mepüxamuriyacai yuxexuitü  
 yuniuquicü memüva'eniecaicü  
 me'utiniucame. <sup>7</sup>Mepü'Iyarixiecai  
 mepühüxiyacai müpaü me'utiyuatü,  
 Neuxei, 'icü yunaitü memutiniuca  
 mecatecarereyatari. <sup>8</sup>Quetütüri  
 'icü teteva'enie taxexuitü  
 taniuquicü memutiniuca que  
 temüte'ununuivaxü. <sup>9</sup>Parutiyatari,  
 Meriyatari, 'Eramitatari,  
 Mesuputamiyasie temütama,  
 Cureyasie Caparusiyasie  
 Punitusie 'Asiyasie <sup>10</sup>Püriquiyasie  
 Pamüpiriyasie 'Equipitusie  
 'Apüricasie Sirene temütama,  
 Xumatari memü'ivatatüve,  
<sup>11</sup>Huriyusixi, hipatü Huriyusixi  
 memacü, Cüretatari, 'Araviyatari,  
 tanaitü tepüva'enie me'utiniucame  
 taniuquicü, que mütimarive  
 Cacaüyari me'utiyuaneme.  
<sup>12</sup>Yunaitü meni'Iyarixiecaitüni,  
 'asimepücatemaicai quetütü  
 mütiyüanecai, yuxexuitü müpaü

meteyücühüavetü, Que tititari 'icü.  
<sup>13</sup>Hipatü mevananaimatü müpaü  
 meniutiyanecaitüni, Mepuhuxa  
 xEICÜA vinu macacacü.

### Pecuru que müticuxatacai heiva

<sup>14</sup>Hicü Pecuru 'anucuqueca  
 tamamata heimana xevime  
 vahamatü, carima niutaniuni,  
 müpaü tinivarutahüave, Neuxei  
 Huriyusixi, yunaitü Querusareme  
 xemütama. Xequetenemaica  
 'icü, xequeneneu'enie que  
 nemütayüni. <sup>15</sup>Ime mepücatarüve  
 xeme xemütecuerivapaü, 'esiva  
 xEICÜA tucari püxüca. <sup>16</sup>Masi 'icü  
 canihücütüni tita mütixasivacai,  
 tixaxatame Cuheri ya'utainecacu,  
<sup>17</sup>Müpaü paine Cacaüyari,  
 tucari 'aye'ayu quepaucua  
 mütaparirümeni, müpaü  
 pütiiyüni.  
 Ne'Iyari nepütatüani teüteri  
 yunaime vahesie.  
 Xenivema nehiesie mieme  
 mepütaniuni 'uquisi 'ucari,  
 Xetemari hecüta heinüsipaü  
 'aneneme mepüxeiyani,  
 Xe'uquiravesixi cusipa  
 mepüteheiniüni.  
<sup>18</sup>Yuricü müme nemütiva'aitüa  
 'uquisi 'ucari vahesie  
 Ne'Iyari nepütatüani 'iya  
 tucarisie,  
 Nehesie mieme mepütaniuni.  
<sup>19</sup>Nepühühüxiyasitüani vaheima  
 muyuavisie,  
 Hetüanata cuiepa 'iniüari  
 nepütiiyurieni vaücava,  
 Xuriya, tai, 'aüxi cüsü nücame  
 'iniüariyari.  
<sup>20</sup>Tau yüvitü canayeimücü,  
 Meserita xuriya payani.

- 'Arique 'upamie Ti'aitame  
mücü tucarisie marivemesie  
xavatümesie.
- <sup>21</sup> 'Anarique yunaitü memihüaveni  
que mü'ane Ti'aitame mühücü,  
Müme mepütaviceisitüarieni.
- <sup>22</sup> Neuxei 'Ixaherisixi, 'icü  
neniucui xequene'enieca. Cacaüyari  
xesata pitahecüataxü Quesusi  
Nasaretitanaca marivemecü  
tiyurienetü türücaüyemecü, 'inüari  
tiyurienetü, 'iyacü que mütiuyuri  
Cacaüyari xesata que xemütemate  
xeme. <sup>23</sup> Cacaüyari müpaü  
tiyücühüavetü, matüaripai müpaü  
timaitü, nicayeni müyetuiyanicü.  
'Inüari sanamete xetevaruta'aitüaca  
xeniviya, vamamacü cüyesie  
xe'icavieca xecanimieni. <sup>24</sup> Cacaüyari  
nenucuquetüani 'ixünaca que  
mürehüiyacai müquitü. 'Iya  
pücaýüvecai müquitü muyuhayevacü.
- <sup>25</sup> Raviri müpaü paine hepaüsitana,  
Ti'aitame nepüxeiyacai  
yuheyemecü nehüxie,  
Neserieta mutivecü  
nepücacuyani.
- <sup>26</sup> Ne'iyarisie 'ayumieme  
nepünetemavi,  
Nenetemavietü nepütaniuni  
nenenicü.  
Sepa necaxari 'amuca,  
Mexi neta'icueva yuri nepüti'erie
- <sup>27</sup> Quename ne'iyari  
peca'ucu'eirieni müquime.  
Que mü'ane pemupataxü 'ahesie  
mieme pepüca'ipitüaca  
mütapüne.
- <sup>28</sup> Pepünesi'utamarcasitüa  
nemayeyurinicü.  
Temavierica pepünesipitüaca  
vaücava, nehamatü  
pe'uyeicatü.
- <sup>29</sup> Neuxei 'ivamarixi. 'Aixüa  
cani'aneni heiseriemecü  
mütixecuxaxatüvanicü  
tatevari Raviri hepaüsita.  
Caniumüni 'iya, tiucateuqui,  
macateuquesie mana tiuca cuxi  
tasata hicüque. <sup>30</sup> Tixaxatame  
hücütütü catinimaicaitüni  
quename Cacaüyari 'üyühürütüa  
heiseriemecü müpaü 'utaitü, xevitü  
Ravirisie müyeyaniquecai heiserie  
püpütüarieniquecai Cürisitütütü,  
picayeniquecai 'uvenieya  
müra'aitasie haitü. <sup>31</sup> Matüaripai  
'ixeyatü müpaü caniyatüni,  
Cürisitu que müranucuque  
ticuxatatü, müpaü 'utaitü,  
'Iyarieya püca'ucu'eirivaxü  
müquitü,  
Vaiyarieya püca'utapünixü.
- <sup>32</sup> Mericüsü Cacaüyari  
penucuquetüa 'iya Quesusi. Tame  
tanaitü tepühüme temunenierixü  
temitahecüata. <sup>33</sup> Anutivitüquieca  
Cacaüyari serieta, nitanaqui'erieni  
tita 'uquiyarieya mütitahüavixü  
mütüpütüaniquiecai, 'Iyari  
Mütüyupata hücütüme. Mücü  
niutatüani que xemüte'ixeyia que  
xemüte'l'enie. <sup>34</sup> Mücü Raviritütü  
püca'anütitüa muyuavisie, siepüre  
müpaü paine,  
Ti'aitame müpaü tinitahüave  
'iya müneti'aitüva,  
Neserieta mexicuxi quenacani
- <sup>35</sup> Müme memümasi'aca'unie  
nemüva'atüani 'ahetüa.
- <sup>36</sup> Heiseriemecü 'ipai  
xequetenemaica yunaitü 'Ixaheri  
quie quiecatari. Cacaüyari  
Ti'aitame payeitüa 'icü Quesusi,  
heiserie canipütüani que mü'ane  
xemumi curuxisie.

<sup>37</sup>Mericiüsü me'u'enanaca yu'iyarisie mepühiveritüariecai. Müpaü metenivarutahüave Pecuru hipame nü'arisixita, <sup>38</sup>Que teteyurieni ta'ivama. Pecuru müpaü tinivarutahüave, Xequeteneuhayeva que xemüteyurie, yuxexuitü xepüca'üyarieni Quesusi Cürisitu xehüavetü. Tita 'axa xemüte'uyuri, xepüteheuyehüvyarieni. Xepütemiquieni 'Iyari Mütiyupata. <sup>39</sup>Icü que mutayü que mütiyurieni niuquieya xehesie pümieme, xetüriyama vahesie timiemeta, yunaime teva miemete vahesie timiemeta, müme müvata'inieni Ti'aitame tacacaüyari vahesie timiemeta. <sup>40</sup>Hipame müireme niuquicü püvarutahecüasitüiyaxü, nivavaviriecaitüni müpaü 'utaitü, Xequeneyutavicueisitüa hicü miemete 'axa memüte'u'iyari vasata. <sup>41</sup>Hicü müme niuquieya memutanaqui'eri meniuca'üyarieni. Mepüvarutinüi mücü tucarisie teüteri haica miriyari yacütütü. <sup>42</sup>Yamepü'ayumiemetetücai tita nü'arisixi memüte'üquitacai me'enietü meyuparevietü me'ititaratü pa meyuneneyetü.

**Que memüte'u'uvacai müme matüari Cürisitusie memütevyiacai**

<sup>43</sup>Hicü yuxexuitü yu'iyarisie meheumamatü menacüne. Vaücava mamarivavame 'inüari metenyuriecailüni nü'arisixi. <sup>44</sup>Yunaitü yuri memüte'uta'eri meniyuteütacailüni yunaitü meyuxevitü, 'axeicüa mepeixeyacai naim. <sup>45</sup>Yucuei yupinite mepüte'utua, mepüvapiütücai yuxexuitü que

memüteheiyehüacai. <sup>46</sup>Tucaricü yamepü'ayumiemetetücai mepüyuxeüriecai tuqui curaruyarita. Mepititaracai pa qui meuti'uta, yu'inüa meputicuai meyutemamavietü 'aixüa mete'u'iyaritü. <sup>47</sup>Meputiniucacai Cacaüyari hepaüsita 'aixüa me'utiyuatü. Yunaitü teüteri 'aixüa mepütecu'erivacai vahepaüsita. Tucarcü Ti'aitame püvaxeüriecai müme memütavicueisitüarieximecai vaxeviriyatü.

**Muhurie que müranayehüiya**

**3** Mericiüsü Pecuru Vanimatü meneuticüne tuquipa cüa caviecacu tau quepaucua müyuneneviva. <sup>2</sup>Uqui hurietü mutinuivaxü mana ni'atüarivacailüni. Tucarcü menitiyescailüni tuqui quitenie Visi Mü'ane müracutevasie. Mana rimusina püvavaviriecai müme tuquita memeutahaquecai. <sup>3</sup>Varuxeiyaca Pecuru Vani tuquita meheutahaxüaximecacu, rimusina püvavaviriecai. <sup>4</sup>Pecuru 'ixeyatü, Vanita, müpaü Pecuru tinitahüave, Quetaneuxeiya. <sup>5</sup>Mücü nivaruxeiya tixaü mete'iminiqueme 'erietü. <sup>6</sup>Müpaü niutayüni masi Pecuru, Ni pürata tuminiyari ni huru tuminiyari nepücahexeiya. Tita nemürexeiya, mücü nepümatimini. Quesusi Cürisitu Nasaretitanacasüa nemümiemecü nepaine, quenancuquexi quenecuyeicani. <sup>7</sup>Serietana 'iviyaca mamayasie nenucuhana. Yapaucua niutiserire 'ücateya turuteya. <sup>8</sup>Anucusunaca niutaqueni, nicuyeicailüni. Vahamatü neutahani tuquita

cuyeicatü 'utisucucacatü 'aixüa  
 'utaitü Cacaüyari hepaüsita.  
<sup>9</sup>Yunaitü teüteri menixeiya  
 'uyeicame 'aixüa 'utaineme  
 Cacaüyari hepaüsita. <sup>10</sup>Meneitimani  
 quename mücü hücütücai que  
 mü'ane mutiyeixacai rimusina vietü  
 tuqui quitenie Visi Mü'ane  
 müracutevasie. Mepühüxiyacai  
 mepü'iyarixiecai müya mütiyücü.

**Pecuru que müticuxatacai  
 Sarumuni Nivetarieyatüa**

<sup>11</sup>Hicü mücü tevi nivaruviya  
 Pecuru Vanimame. Teüteri  
 me'unausarümetü mehüxiyatü  
 vahesüa mepu'axüa Sarumuni  
 Nivetarieyatüa mütiyetevasie.  
<sup>12</sup>Pecuru varuxeiyaca müpaü  
 tinivarutahüave teüteri, Neuxei  
 'Ixaherisixi, titayari xetehüxiya  
 'icücü. Titayari xetatexeiya müpaü  
 xetecu'erivatü, tatürücariyacü  
 Cacaüyari cui temayexeiyacü  
 nusu 'uyeicame temeyetitüa  
 'icü. <sup>13</sup>Apurahami 'Isahaqui  
 Cacuvu vacacaüyari tatevarima  
 müvacacaüyari mariveme  
 nayeitüani yunive Quesusi.  
 'Iya xepüyetua xepitixani'eri  
 Piratu hüxie quepaucua mücü  
 mixünaquecai. <sup>14</sup>Xeme masi  
 xepitixani'eri que mü'ane mupasie  
 Cacaüyarisie mieme que mü'ane  
 heiserie mexeiya, xepitavaviri  
 tiyumemivame püta müxünarienicü,  
<sup>15</sup>tucari tiyupitüvame xepumi.  
 Cacaüyari nenucuquetüani  
 müquite vasata. Tame tepühüme  
 temunenierixü temihecüata.  
<sup>16</sup>Yuri mütiuta'ericü que mü'ane  
 mühücüsie, mücü 'ayumieme  
 pitiseraxü 'icü xemüxeiya xemimate.

Yuri que müti'erie Quesusi  
 'ipareviecacu, müpaü naime 'aixüa  
 reu'eriecame neyeitüani yunaime  
 xehüxie.

<sup>17</sup>Hicütütüri ne'ivamarixi,  
 ne nepütimate xeme müpaü  
 xepüte'uyuri 'asixecatemitü,  
 xe'uquiyarima vahepaü.  
<sup>18</sup>Cacaüyari meripai  
 müpaü putayücai yunaitü  
 texaxatametemama müpaü  
 me'utiyanecacu, quename  
 Cürisitu ticuinequecai que mü'ane  
 Cacaüyari heiserie mipitüaniquecai.  
 Müpaü tinaye'atüani. <sup>19</sup>'Ayumieme  
 xequeteneuhayeva que xemüteyurie,  
 ta'aurie xequenaxürieca  
 manuyeitüarienicü tita 'axa  
 xemüte'uyuri, xehesüa 'uxipiya  
 maye'anicü Ti'aitamesüa mieme,  
<sup>20</sup>menü'anicü mücü Cürisitu que  
 mü'ane xehesie mieme mucayeri,  
 Quesusi heiserie mupitüari.  
<sup>21</sup>Peuyevese müтанаqui'eriyani  
 taheima mexi叔ari ca'aye'ave  
 quepaucua 'aixüa mütiyurieni  
 naime, que müticuxatacai  
 Cacaüyari, texaxatametemama  
 hesiena mieme memupasie meripai  
 miemete yame'utiyanecacu.  
<sup>22</sup>Muisexi müpaü  
 pütivarutahüavixü tatevarima,  
 Ti'aitame müxecacaüyari  
 tixexaxatüvame payeitüani xeime  
 xe'ivama vasata mieme nehapaü  
 'aneme. Xeme xepi'enieca nai que  
 mütišetahüave. <sup>23</sup>Que mü'ane  
 müca'ienieni mücü tixaxatame,  
 teüteri vasata pü'unierieca.  
<sup>24</sup>Camüsü yunaitü texaxatamete,  
 Samueri meri, 'arique  
 yuxexütü quemeyupaümetü  
 memütecuxaxatacai, 'icü叔ari

hepaüsita metenihecüatacaitüni.

<sup>25</sup>Xeme texaxatamete xepüvanivema. Xehesie catiniunaque 'Iya türatu Cacaüyari mitavevi xetevarima vahamatü. Cacaüyari müpaü tinitahüave 'Apurahami, Que mü'ane 'ahesie müyeyani 'aixüa nivayuriemücü nuivarite cuiepa miemete yunaime. <sup>26</sup>Meriçüte, Cacaüyari 'enucuquetüaca yunive, peiyenü'la xehesie mieme meri 'aixüa müxeyurienicü, yuxexuitü ta'aurie xemaxürienicü tita 'axa xemüteyurie xetecu'eirieme.

**Pecuru Vanimatü que  
memüte'utahüavarie  
'isücate vahesüa**

**4** Meriçüsü metevacuxaxatüvacacu cuxi teüteri, yapaucua vahesüa meniu'axüani mara'acate, tuqui mühürütüariematü Saruseusixi vahamatü <sup>2</sup>meha'atü Pecuru Vani memüteva'üquitüacaicü teüteri, memüvahecüatüacaicü müquite vasata que müranucuqueni me'utiyaütü Qesusi mexatatü. <sup>3</sup>Mepüvarutiviyaxü, mepüvaranutaxüri 'uxa'ariecaque mucutaicairixücürü. <sup>4</sup>Yümüretü memi'eniecai niuqui yuri mepüte'uta'erie. 'Uquisi 'auxüme miriyari yacütütü meyupaümetü mepacü.

<sup>5</sup>Hicü 'uxa'arieca Querusaremesie mepüyucuxeüri va'uquiyarima, 'uquiravesixi, müme 'inüari niuquiyaricü memüte'üquitametetücai, <sup>6</sup>mücü meta, 'Anasi mühürütüariecai mara'acate vahepaüsita, Caipasi,

Vani, Herecanuturu, yunaitü mara'acate memühürütüariecai vaquie miemete. <sup>7</sup>Mana yuhixüapa mevati'uitüaca mecanivaruta'ivaviya 'ipaü me'utiyaütü, Que 'aneme türücariya xehexeyatü, que mü'anesüa xemiemetütü müya xepüteyurie xeme.

<sup>8</sup>Hicü 'Iyari Mütiyupatacü hüneti müpaü tinivarutahüave Pecuru, Neuxei teüteri va'uquiyarima 'uquiravesixi xemü'ixaherisixi, <sup>9</sup>'icü tucarisie tepüta'ivaviyarixime 'aixüa temiyuricü tevi ticuicame, que mütiuvicueisitüarie 'icü.

<sup>10</sup>Siepüre xequetenemaica yunaitü, yunaitü teüteri 'Ixaherisixita yamequetemaica, Qesusi Cürisitu Nasaretitanacasüa mümiemecü, mücüsie tiviyatü 'icü 'ena puve xehüxie 'aixüa reu'erietü. Curuxisie xepicavi Qesusi, Cacaüyari nenucuquetüani müquite vasata. <sup>11</sup>'Icü tete canihücütüni xemixani'eri qui vevivamete, tete 'amüna sicurita mieme canayani. <sup>12</sup>Xevitüta 'apüca'uyeica tasitavicueisitüvame. Ni xevitü püca'ucayerie muyuavitüa tame teüteri tasata cümana temütavicueisitüarienicü, mücü xeicüa pucayerie.

<sup>13</sup>Meriçüsü menivaxeyacaitüni Pecuru Vanimame mecamaçame. Müpaü metenimaicaitüni hasuacua memücateyü'üquitüacaicü müme, tixaü memücatehümetücaicü. Menihüxiyacaitüni, menivaretimani Qesusimatü que memüte'u'uvacai. <sup>14</sup>Me'ixeyatü mücü 'uqui manayehüiya va'aurie 'uveme, mepücaiyüvavecai



memüvaniquimanicü. <sup>15</sup>Mericüsü mevaruta'aitüaca memanuyecü necü 'isücate vahesüa, mecaniyyu'enieni <sup>16</sup>müpaü me'utiyyatü, Qesü teteyurieni 'icü teüteri vahepaüsita. Yuricü vacümana 'inüari püreyü, yunaitü que memütemate, que mütimasiücü yunaitü Querusareme memütama vahüxie. Tame tepücayyüvave müpaü temutiyyuanenicü quename 'asicatiyyü. <sup>17</sup>Mericüte, tavari capa cuxasivanicü teüteri vasata, cümü türücaüyemecü tepüvahürütüani 'uxa'atüni varie 'iyasüa memiemetetütü memüca'icühüavenicü xeimeri. <sup>18</sup>Yuhesüa mevarutahüaveca yemecü mecanivaruta'aitüani tixaü memücatecuxatanicü memücateti'üiquitanicü Qesusisüa memiemetetütü. <sup>19</sup>Pecuru Vanimatü müpaü metenivaruta'eiya, Xequeteneuta'inüata xeme xüca heiseritüni Cacaüyari hüxie temüxe'enienicü, Cacaüyari püta temüca'enienicü. <sup>20</sup>Mesü tepücayyüvave temütehayeve tetecuxatatü tita temüte'uxei tita temüte'u'eni hepaüsita. <sup>21</sup>Müme tavari yametevaruta'aitüaca menivarutatüani. Tixaütü mepücate'ucaxei memüva'uximatüacacü teüteri vacü, yunaitü 'aixüa memutiyyuanecaicü Cacaüyari hepaüsita mete'utamariECA que mütiyyü. <sup>22</sup>Iya tevi huta teviyari heimana yapaümeme viyari pexeyacai mücü 'inüaricü manayehüiya.

**Yuri memüte'eriecai que  
memüte'uyutanenevi**

<sup>23</sup>Mericüsü me'uxüariECA meniu'axüani yuteüterima vahesüa. Mecanivarutaheciatüani nai que

memütevaciühüavecai mara'acate memühürütüariecai 'uquiravesixi vahamatü. <sup>24</sup>Müme mevaru'enieca 'axeicüa müpaü metenitahüave Cacaüyari, Nai Ti'aitame 'ecü Cacaüyaritütü muyuavi peputavevi, cuie haramara naime vahesie mütitama petiutivevi. <sup>25</sup>Müpaü peniutayüni mücü pemüti'aitüacai Raviri tatevari yutetacü müpaü ticuxatacacu, 'a'iyari Mütiyyupata ya'utainecacu,

Titayari meteyuxamurie  
teüterixi,

Titayari xüanacüa metecu'eriva  
nuivarite.

<sup>26</sup>Cuiepa memütama  
teva'aitüvamete xurucu  
mepu'ucai,

Va'uquiyarima 'axeicüa  
mepuyucuxeüri

Ti'aitame me'aye'unietü,  
Que mü'ane heiserie mipitüa

Cürisitütüme me'aye'unietü.

<sup>27</sup>Tamüsü 'anive 'ahesie mieme mupasie Qesusi hepaüsita que mü'ane heiserie pemipitüa hepaüsita, yuricü mepuyucuxeüri 'icü quiecarisie Herurexi Punisiyu Piratu teüteri memücahuriyusixiri 'Ixaherisixiri teüteriyari yunaitü. <sup>28</sup>Meniyucuxeürie yametyurienique tita 'amamacü pemütiyyurieniquecai meripai pemüti'acühüavecaicü que mütiyyüni quecai. <sup>29</sup>Hicürixüa Ti'aitame quenivaruxeiya 'axa que memutiyyuane, quetatineupitüa tame pemütati'aitüa tixaü tecaheumamatü temütecuxatanicü 'aniuqui hepaüsita, <sup>30</sup>'ecüta 'amama queneutasera teüteri memanayexürüyanicü 'inüarite

petiyuriencacu mamarivaveme  
 petiyuriencacu mücü 'anive  
 'ahesie mieme mupasie  
 Quesusisüa temümiemetecü.  
<sup>31</sup>Hicü me'uyutanenevieu mana  
 niutayuanı memayuxeüriesie.  
 'Iyari Mütiyupatacü meniutihüne  
 yunaitü, Cacaüyari niuquieya  
 menicuxatacaitüni mecamamatü.

**'Axeicüa que  
 memütheixeyacai naime**

<sup>32</sup>Queyupaümetü yuri  
 memüte'uta'erie va'iyari  
 caniyuxevicaitüni, yaxecüa  
 mepüte'u'iyaricai. Ni xevitü  
 'asipücahainecai yupüni  
 mütipinieyatücai, masi naime  
 'axeicüa metenexeyacaitüni.  
<sup>33</sup>Cui türücaüyemecü nü'arisixi  
 mecatenihecüatacaitüni Ti'aitame  
 Quesusi hepaüsita que müranucuque.  
 'Aixüa yemecü meteniu'iyaricaitüni  
 yunaitü. <sup>34</sup>Tixaü pücareuyehüacai  
 xevitü müme. Yuxexuitü  
 cuie, qui nusu, memexeyacai  
 meneituacaitüni, que memütheitua  
 tuminiyari meni'atüvacaitüni,  
<sup>35</sup>nü'arisixi vahetüa menitimana.  
 Menivapitüacaitüni yuxexuime que  
 memütheiyehüacai. <sup>36</sup>Mericsüsi  
 Cuse, nü'arisixi meteniterüva  
 Verunave, taniuquicü Titutuicame  
 maine. Mücü pürevitatücai,  
 Sipüresie petinuivaxü. Mücüta  
 cuie pexeyacai. <sup>37</sup>Heituaca, que  
 müreitua menu'üi, ni'atüani,  
 nü'arisixi vahetüa nitimana.

**Hananiya Sapiramatü 'axa  
 que memüte'uyuri**

**5** Mericsüsü 'uqui Hananiya  
 mütevacai yü'üitatü

Sapiramatü mecaneituanı  
 cuie. <sup>2</sup>Yuhesie mieme 'esiva  
 niyuhayevieni que müreitua,  
 'üyayata yatimaicacu. Hipame  
 pü'atüa, nü'arisixi vahetüa  
 pitimanaxü. <sup>3</sup>Hicü Pecuru müpaü  
 tinitahüave, Neuxei Hananiya,  
 titayari Cauyumarie 'a'iyari tinü'ü,  
 pemüti'itai 'Iyari Mütiyupata,  
 yapäumeme pemeucu'üicü cuie  
 pemetuasie mieme. <sup>4</sup>Süricüte  
 quepaucua mü'acuietücai  
 catini'apinitücaitüni. Peheituaca  
 heiserie pepexeyacai cuxi  
 hepaüsitana. Titayariri 'a'iyarisie  
 peti'acühüave 'ipaü. 'Ecü teüteri  
 pepücativaru'itai, Cacaüyari püta  
 pecatinü'itaiya. <sup>5</sup>Hicü 'icü niuqui  
 'u'enieca Hananiya, 'ativeca pümü.  
 Mepümamacai yemecü yunaitü  
 memü'enanaxü. <sup>6</sup>Me'anucu'uca  
 'uquisi me'icu'eimaca mepeicuei  
 me'icateucuque.

<sup>7</sup>Hicü haica hurayari yacütütü  
 'aye'acu 'üyaya caninuani  
 'asicatimaitü que mütiyüü.  
<sup>8</sup>Pecuru müpaü tinitahüave,  
 Yaquenetineutahüavi, yucuei  
 yapäumemecü xüca xeheituani. 'Iya  
 müpaü tinitahüave, 'Eri, müpaü  
 canipaümecaitüni. <sup>9</sup>Pecuru müpaü  
 titahüave, Titayari xete'uyu'eni  
 'ipaü xemüte'i'isipacacü Ti'aitame  
 'Iyarieya. Neuxei 'acüna teucumete  
 mana meniuti'uca quiteni 'aurie.  
 Mecamananucueicunita 'ecü.  
<sup>10</sup>Yapaucua canativeni hetüana,  
 tiumü. 'Uquisi meheutahaxüaca  
 mepicaxei müquime. Meheicueca  
 mecaneicuteucu cünaya 'aurie.  
<sup>11</sup>Vaücava mepümamacai yunaitü  
 memüyuyexexeürivacai, yunaitü  
 memi'eni 'icü.

**'Inüarite mamarivaveme que mütiuyü**

<sup>12</sup>Mericsü nü'arisixi vamamacü vaücava 'inüarite mamarivaveme tiniuyüni teüteri vahüxie. Yunaitü 'axeicüa meniu'uvacaitüni Sarumuni Nivetariyatüa. <sup>13</sup>Hipatüri memamatü vahesie mepücateviyacai. Siepüre teüteri yemecü 'aixüa meniutiyanecaitüni vahepaüsita. <sup>14</sup>Yümüretü meniucuxexeürivacaitüni yuri mete'uta'erica Ti'aitamesie 'uqisi 'ucari. <sup>15</sup>Müpaürita caye 'utüa meputuarieximecai tecuicucate 'utasie 'isise me'aheitü, Pecuru siqueresü 'etürieya siparasü maye'ani vahesie xeime 'anuyenecacu. <sup>16</sup>Yümüretüta Querusareme hura quiecatari meni'axecaitüni mevaravitütü tecuicucate, cacaüyarixi 'axa memü'anene memüva'uximatüacai vahamame, yunaitü mepanayexüri.

**Pecuru Vanimatü que memüte'utaveiyarie**

<sup>17</sup>Hicü me'anucu'uca mara'acame mühürütüariecairi, yunaitüri 'auriena memü'uvacai memütecü'erivacai Saruseusixi memütecü'erivapaü, müme meni'uxiva'acaitüni. <sup>18</sup>Mecanivarutiviya nü'arisixi, mepüvaranutaxüri casariyanata. <sup>19</sup>Ti'aitame niuquieya tuayame tücaricü püreuyepixü casariyanata. Püvaranuyevitü müpaü 'utaitü, <sup>20</sup>Xequenehu, tuqui curaruyarita xequenaye'uca. Xequetenivacuxaxatüvani teüteri naime que mütixasiva tevi 'ipaü tucari que mürexeiyani hepaüsita.

<sup>21</sup>Me'i'enieca meneutahaxüani tuquita tuxacüta. Mana meteni'üquitacaitüni.

Mara'acame mühürütüariecai, müme 'auriena memü'uvacai me'u'axüaca menivarucuxeürieni 'isücate yunaime 'Ixaheri xiüyarimama va'uquiyarima. Mepüvarenü'a tupirisixi casariyanapai memüva'atüanicü. <sup>22</sup>Tupirisixi me'u'axüaca mepücavaretaxe casariyanata. Ta'aurie mepaxüri, metenivarutahecüatüani <sup>23</sup>müpaü me'utiyuatü, Panasi casariyana tepetaxe 'aixüa renacame, tehüvemetepeti'ucai quitenie 'aurie, perusü teteheuyepieca xeime tepücahetaxe quita. <sup>24</sup>Aruvasini tuquita miemete tupirisixi tiva'aitüvame, mara'acate memühürütüariecaita mepüvaru'enie 'icü vaniuquicü. 'Asimepücatemaicai vahepaüsita que mütiuyü. <sup>25</sup>Xevitü nuaca tinivarutahecüatüani müpaü 'utaitü, Neuxei müme 'uqisi xemüvaranutaxüri, müme tuqui curaruyarita mepaye'u meteva'üquitatü teüteri.

<sup>26</sup>Ana 'aruvasin petüa tupirisixi varavitütü. Menivarayevitüni siepüre carima mecavaravitütü, memüvamacarücaicü teüteri capa mevarutituaxacü tetcü. <sup>27</sup>Mericsü meva'atüaca menivaruti'uitüani 'isücate vahüxie. Mara'acame mühürütüariecai nivaruta'ivaviya <sup>28</sup>müpaü 'utaitü, Tamesü cuini mieme tecatexe'uta'aitüa xemücate'üquitanicü mücüsüa xemiemetetütü. Camüsü, Querusareme xepüte'utihüniyaxü

yü'üquiscacü. Xeme tahesie xepüte'ahüpaniqueyu 'iya tevi xuriyayacü. <sup>29</sup>Pecuru nü'arisixi vahamatü mevacu'eiyatü müpaü metenivarutahüave, Püreuyevese siepüre temi'enienicü Cacaüyari, teüteri sepa temücava'eni. <sup>30</sup>Tatevarima vacacaüyari nenucuquetüani Qesusi xeme xemimi cüyesie xe'icavivatü. <sup>31</sup>Cacaüyariri Ti'aitame Tiyuvicueisitüvame nanutivitüni yuserieta, müxepitüanicü 'Ixaherisixi xemütehayanicü que xemüteyurie, tita 'axa xemüteyurie xemüteheuyehüviyarienicü. <sup>32</sup>Tame tecanilhümetüni temunenierixü temütehecüata 'icü que mütiuyü hepäüsita. Müpaüta tinihecüatani 'Iyari Mütiyupata Cacaüyari müvarupitüa müme memi'enie.

<sup>33</sup>Müme me'u'enanaca meniuyeha'ani menivacuicuaitüni.

<sup>34</sup>Hicü xevitü 'anucuqueca memayuxeüriesie Pareseu mühücütücai, Camarieri mütitevacai, 'inüari niuquiyari ti'üquitameya mühücütücai, ve'eme memü'eriecai yunaitü teüteri, mücü tivaruta'aitüaca memüvaranuyenü'anicü mücü teüteri yareutevicacu, <sup>35</sup>müpaü tinivarutahüave, Neuxei 'Ixaherisixi, yumarima 'aixüa que xemüteyurieni 'icü teüteri vahepäüsita. <sup>36</sup>Meripai panucuque Teuraxi, ya'utaitü quename yüvemetücai. Nauca sienituyari 'uquisi yacütütü hesiena mecateniviyacaitüni. Mücü pumierie, yunaitü memi'eniecai mepeutaxüriexüa, tixaü mepücate'acü. <sup>37</sup>'Arique

nanucuqueni Cura Carereyatanaca quepaucua memacayasarie. Teüteri yumüireme canivarevitüni yu'utüma. Mücüta pu'unieriecai, yunaitü memi'eniecai mepeutayeixüa. <sup>38</sup>Hicüri nepaine, xequenivaruhayeva 'ime teüteri, xequenivarutixüna. Que memütecu'eriva que memüteyurie xüca teüteri vahesüa miemetüni cani'unieriecamüci. <sup>39</sup>Mesü xüca Cacaüyarisüa miemetüni püta, xepücayüvaveni xemeye'unie tietüsü Cacaüyari xe'aye'unieca.

<sup>40</sup>Merücüsü meni'enieni. Yuhesüa mevarutahüaveca nü'arisixi mevarutivaca müpaü metenivaruta'aitüani memücatiniunicü Qesusisüa memiemetetütü. Menivarutixüna. <sup>41</sup>'Isücate vahesüa menivayenexüani meyutemamavietü Cacaüyari meyüvaveme müva'eriecaicü memütave'erivanicü hesüana memümiemetetücaicü. <sup>42</sup>Tucaricü tuquita yuquiteta mepücatehayevacai mete'üquitatü metecuxatatü niuqui 'aixüa manuyüne quename Qesusi heiserie hexeiya Cürisitütütü me'utiyaatü.

**Teparevivamete que memüte'anayexeyarie 'atahutatü**

**6** Merücüsü 'ana mepütetamüiriyarümecai teyü'üquitüvamete. Müme Cüriyecusixi vaniuquicü memutiniucacai mepünüquixiecai müme Hepürayusixi vaniuquicü memutiniucacai vahepäüsita, viyurasixi vahesüa miemete

memüvaratümaiyaicü tucaricü quepauca memüvareviecai.

<sup>2</sup>Tamamata heimana

yuhutatü mevarucuxeürieca teyü'üquitüvamete müpäü mecatenivarutahüave, 'Aixüa püca'aneniqueyu tame Cacaüyari niuquieya xüca tehayevasque mexasie temüte'apinenicü püta.

<sup>3</sup>Hicü ta'ivama, xequenivacuvava yusata 'uquisi 'atahutame 'aixüa memütehecüasie 'Iyaricü memühüpüne memütemaivave. Müme tepüvahürütüani 'icü hepaüsita que müreyeveve.

<sup>4</sup>Tamesü tetanenevietü niuquicü texeparevietü tepü'ayumiemetetüni.

<sup>5</sup>Merücüsü 'icü niuqui püvanaquecai yunaitü memüyucuxeüri.

Mepüvaranuyexei 'Esitevani, 'uqui yuri müti'eriecai 'Iyari Mütiyupatacü mühünecai, Piripe, Purucuru, Nicanuri, Timuni, Parumenaxi, Nicuraxi Huriyu mayuyeitüa 'Anutiyuquiyatanaca.

<sup>6</sup>Mepüvaruti'uitüa nü'arisixi vahüxie. Müme meyunenevietü yametenivaruhürütüani vaheima me'utimetü.

<sup>7</sup>Merücüsü Cacaüyari niuquieya niutixuavere. Teyü'üquitüvamete mepütetimüiriyarümecai vaücava Querusaremesie. Mara'acate yumüiretü mepu'enana yuri mete'erietü.

#### 'Esitevani que mütiuviyarie

<sup>8</sup>Merücüsü 'Esitevani 'aixüa tiuca'iyaritü türücaüyemecü tiyurienetü vaücava tiniyurienecaitüni teüteri vasata, 'inüari mamarivaveme tiyurienetü.

<sup>9</sup>Hicü tuqui 'epuvecai Xünariecate

Sirenetari Herecanütüreyatari Vatuqui titevatü. Mana miemeteri, Sirisiya 'Asiya miemete vahamatü mepanucu'ui mehe'ivarümetü niuqui mexüatüatü 'Esitevanimatü. <sup>10</sup>Mepitexiecai que müticuxatacai mütimaivecaicü, 'Iyari mipareviecaicü.

<sup>11</sup>Mepüteva'aitüacai 'uquisi memütecuxatanicü 'ipäu, Tame tepi'enie 'axa 'utaineme Muisexi hepaüsita Cacaüyari hepaüsita me'utiyuatü. <sup>12</sup>Mepüvaxamuriecai teüteri, 'uquiravesixi, müme 'inüari niuquiyaricü memüte'üquitacai. Yapaucua me'u'axüaca meniviya, meneivitüni 'isücate vahesüa.

<sup>13</sup>Mana mepüvaruti'uitüa hipame memütehecüatanicü mete'itavatü yame'utiyuatü, 'Icü tevi pücatihayeva 'axa 'utaitü 'icü 'ena Cacaüyarisie mieme mupasie hepaüsita, ta'inüari niuquiyari hepaüsita. <sup>14</sup>Tepi'enie müpäü 'utaineme quename 'icü Qesusi Nasaretitanaca 'i'unieca 'icü 'ena, quename 'ipata tayeiyari Muisexi mütasi'upitüa. <sup>15</sup>Me'l'ixüarrietü yunaitü mana memütitecai memayuxeüriesie, mecanixeiya niericaya taheima mieme niuqui tuayame niericayapaü 'aneme.

#### 'Esitevani que mütiutaniu yuhesie mieme, que mütiümü

**7** Merücüsü mara'acame mühürütüariecai müpäü niutayüni, Müpäü ti'ane 'icü. <sup>2</sup>Iya rehüave, Neuxei 'ivamarixi, 'uquiyarima, xequeneu'enana. Tatevari 'Apurahami 'ixeyiacacu Cacaüyari visi mü'ane masiücütü nayuyeitüani Mesuputamiyasie

'uyeicacacu Haranisie caheta'avetü cuxi. <sup>3</sup>Müpaü tinitahüave Cacaüyari, Quenemie 'ena 'acueipa 'amarema vahesüa, cümü mücü cuieyarisie nemümasihetamaricasitüani quenemie. <sup>4</sup>Mericusü Cariteyusixi vacuie heyeyaca Haranisie niucayerüni. Manata quemasieya 'umücu Cacaüyari nipata 'icü cuiepa haque xeme'uva hicü. <sup>5</sup>Cacaüyari püca'imi 'ena mütinaqueni ni yü'ücacü mücataquenicü, masi Cacaüyari müpaü tinitahüave quename 'ipitüaniquecai mücü, pinieya mürayanicü, 'arique hesiena memüyecünequecaita vapini mürayanicü, sepa yunive mücahexeyacai cuxi. <sup>6</sup>Müpaü tinitahüave Cacaüyari, 'Atevarima cu'uvamete mepacüne hipame vacuiepa. Mepüteta'uximayasitüarieni vaüriyarica. Nauca sienituyari viyari meniyuriecuni 'axa me'itüarietüvetü muva. <sup>7</sup>Necanivataxanetamücü 'iya nuivari vaüriyarica memütevata'uximayasitüani. Müpaü niutayüni Cacaüyari, 'Ariquemücaque menayecünicuni, ne'uximayasica menexeyacuni 'ena. <sup>8</sup>Xitequiya 'inüariyari 'ipitüatü nitavevirieni türatu. Müpaüri yüanecacu 'Apurahami nitinuivitüani 'Isahaqui. 'Atahairieca tucarisie pi'inüaritäxü 'ixitetü, 'Isahaquita müpaü piyuri Cacuvu, Cacuvuta müpaü tivaruyuri tamamata heimana yuhutame tatevarima. <sup>9</sup>Müme tatevarima me'ita'uxieca Cuse menitüani 'Equipitusie manuvitüquienicü. Cacaüyari

hamatüana puyeicacai.

<sup>10</sup>Nitavicueisitüani nai que müti'uximatüariecai, pipitüa 'aixüa mütixeyarienicü mütimaivenicü Parahuni hüxie 'Equipititari mütiva'aitüvametücai hüxie. Mücüri 'isücame neyeitüani Cuse 'Equipitu cuieyari hepaüsita naime yuquita mieme hepaüsita 'ihüritüatü.

<sup>11</sup>Mericusü pühacaxatücai naisarie 'Equipitusie Cananisie, me'uximatüarieximecacu vaücava. 'Icuai mepüca'ucaxexeyacai tatevarima. <sup>12</sup>'U'enaca Cacuvu quename 'icuai hexuavecai türicutütü 'Equipitusie, canivarenü'ani tatevarima heiva. <sup>13</sup>Hutarieca me'u'axüacu Cuse puyuecüataxü yu'ivama vahüxie. Parahunita canivaretimani Cuse maremama. <sup>14</sup>Cuse tiutanü'aca nivaruta'inieni yuquemasi Cacuvu yunaime yumarema haica teviyari heimana tamamata heimana 'auxüvitü meyupaümeme teüteri. <sup>15</sup>Mücü Cacuvu caneyani 'Equipitusie. Mana canemüni, tatevarima mana mecanecuinita. <sup>16</sup>Mana mepayevitüqui Siquemisiepai, mepucateuquiexüa teuquiyapa 'Apurahami minanai pürata tuminiyaricü 'Emuri nivemama Siquemitari me'itüiriecü.

<sup>17</sup>Mericusü 'ayehuracacu mücü tucari maye'atüarienicü tita Cacaüyari yühüritüatü mütitahüavixü 'Apurahami que mütüyünequecai haitü, mücü teüteri mepütetümüiriyarümecai 'Equipitusie. <sup>18</sup>'Anari panucuque xevitü 'Equipititari tiva'aitüvametütü. Mücü

püca'imaicai Cuse. <sup>19</sup>Mücü cuiepa ti'aitame tateüterima pütivacuamanacai. 'Axa püvaruyuri tatevarima 'üsita memüvarecu'eirienicü yutüriyama, capa meyutinuivitüaxüanicü.

<sup>20</sup>Merücüsü 'ana caniutinuiva Muisexi. Visi pü'anecai Cacaüyari hüxie. Mücü haica meseri puverecai yu'uquiyari quie. <sup>21</sup>Quepaucua mucu'eirivaxü, Parahuni nu'aya nicaxeyi 'ucatütü, yunivepäü pitaveriyaxü. <sup>22</sup>Püti'üquitüarie Muisexi naima que memütemaivavecai 'Equipitutari yatimaitü. Que mütiniuvecai que mütiuyuri püyüvemetücai.

<sup>23</sup>Merücüsü huta teviyari viyari hexeyatü puyuvaüri müva'ivatamiecü yu'ivama 'Ixaheri xiüyarimama. <sup>24</sup>Ixeiyatü xeime 'axa 'itüariecame, heimana niutanuani, 'aixüa pütüuyuri hesiena mieme, pimi 'Equipitutanaca.

<sup>25</sup>Müpaü tinicu'erivacaitüni quename 'ivamama metemaicaquecai Cacaüyari que mütivatavicueisitüaniquercai 'iya vapareviecacu. Mümesü müpaü mepücatemaicai.

<sup>26</sup>Merücüsü 'uxa'arieca menixeyi teyucucuyamete. Nivanütüamücücaitüni 'aixüa memütexuyeyanicü müpaü 'utaitü, Neuxei, xeme xecaniyu'ivamaca. Titayari 'axa xeteyuyurie. <sup>27</sup>Que mü'ane yu'iva 'axa müyurienecai penuyehüa Muisexi müpaü 'utaitü, Quepaicü tati'aitüvame ta'isücame pümasi'acaye 'ecü.

<sup>28</sup>Cauca penesimiemücü neta, tacai pemütimipaü 'Equipitutanaca.

<sup>29</sup>Hicü 'l'enieca mücü niuqui niyuta'una Muisexi. Cuyeicame nayani Mariyani cuieyarisie. Mana meniutinunuiva nivemama yuhutatü.

<sup>30</sup>Merücüsü huta teviyari viyari 'anuye'acu, macumavesie canixeyi niuqui tuayame taipa 'uveme tupiriya matitavecaisie yemuri 'aurie Sinahi mütitevasie. <sup>31</sup>Mücü Muisexi 'ixeyiaca heinüsicapaü 'aneme canihüxiyacaitüni. 'Aura 'ayacu müretimanicü que mütiyüanecai, Ti'aitame putaniu müpaü 'utaitü, <sup>32</sup>Ne 'atevarima necanivacacaüyaritüni. 'Apurahami 'Isahaqui Cacuvu necanivacacaüyaritüni.

Mücü Muisexi 'uyüyüacatü pücauyuvaüriyacai münierenicü.

<sup>33</sup>Ti'aitame müpaü tinitahüave, 'Acacai quenanuyexünaxüa 'a'ücasie, mana pemanuca nehiesie mieme mupasiecü. <sup>34</sup>Yemecü necanivaxeyi neteüterima que memüte'uximatüarie 'Equipitúsie. Necaniva'enieca mema'aiva. Nenacanenani mana nemüvarayevitünicü. Cümüsüari nepümasi'anunü'ani 'Equipitúsie.

<sup>35</sup>Mücü Muisexi memutixani'eri müpaü me'utiuyatü, Quepai tati'aitüvame ta'isücame pümasi'ayeitüa, mücütüme Cacaüyari caneyenü'ani tiva'aitüvame vavicueisitüvame, niuqui tuayame muxei tupiriyasie 'uveme 'ipareviecacu yütürücariyacü. <sup>36</sup>Mücüri nivarayevitüni 'inüari tiuyurieca mamarivaveme tiuyurieca 'Equipitu cuieyarisie, Haramara Müxetasie, macumavesieta

yatiyurienetü huta teviyari viyari.  
<sup>37</sup>Icü Muisexi canihücütüni que mü'ane müpaü mütivarutahüavixü 'Ixaheri xiüyarimama, Ti'aitame müxecacaiyari tixexaxatüvame nanucuquetüamücü xe'ivama vasata nehepaü 'aneme. Xepi'enieca. <sup>38</sup>Icü Muisexi canihücütüni que mü'ane meyeicacai memüyuyexexeürivacai vahesüa macumavesie, niuqui tuayamematü meyeicacai mitahüavixü yemurisie Sinahi mütitevasie, tatevarima vahamatü meyeicacai. Mücüta niuqui mayeyuri putanaqui'erie tasipitüanique.

<sup>39</sup>Müme tatevarima mepüca'i'eniecucai, masi mepenuyehüacucai. Yu'iyarisie ta'aurie mepaxüricucai 'Equipitusie <sup>40</sup>müpaü mete'icühüavetü 'Aruni, Cacaüyarixi quetaneutiveviri. Müme tahüxi meniye'huni. Tame 'asitepücatemate que mütiuyunixü 'icü Muisexi mütasi'ayevitü 'Equipitusie. <sup>41</sup>'Ana siqueru meputavevie, mavari mepütecupi mücü cacaiyaritüa. Mecaniyutemamaviecaitüni tita yumamacü memüte'utivevi me'ayexeyatü. <sup>42</sup>Hicü Cacaüyari ta'aurie pave. Püvayetua taheima memücaneniere yunaima va'uximayasica memexeianicü, müpaü que müre'utüarie texaxatamete vaxapayarisie müpaü 'anuyütü,

Xeme 'Ixaheri quie quiecatari  
 Xenete'atüirivacai 'acu caxarite  
 mavarite  
 Huta teviyari viyari  
 macumavesie xehe'uvatü.

<sup>43</sup>Masi xepeyexeyacai Muruqui xiriqieya,

Xemüpani yucacaiyari  
 xuraveyari,  
 Vahepaü tiyuxexeyame  
 xepüyueviriecai  
 Nenevieri xemüvapitüanicü.  
 Nesü necanixe'anuvitümücü  
 Vaviruniya varita.

<sup>44</sup>Mericüsü 'ixuriqui tuquiyari haque hecüasica mayecatei mana niuvecaitüni tatevarima vahesüa macumavesie, que mütiu'aitaxü mücü mitahüavixü Muisexi quename hepaüna 'aneme 'ita'aitaquecai 'ixuriqui tuquiyari, 'inüari muxepaü 'aneme. <sup>45</sup>Mücü tuqui meputanaqui'eri tatevarima. Cusumatü meni'atüani quepaucua memüvareutaveiyaxüa 'ena memütitecai hipame nuivarite. Mümesietü Cacaüyari vaüriyarica püvati'unasitüa tatevarima vahüxie. 'Arique 'aniyueicacaitüni Raviri. <sup>46</sup>Cacaüyari 'aixüa tiniuca'iyaricaitüni hesiena mieme. Mücü pitavaviri Cacaüyari qui vevimütü haque Cacuvu Cacaüyarieya mayecanicü. <sup>47</sup>Sarumuni püta pitaveviri qui, <sup>48</sup>sepanetü mücü taheima mümieme tixaü quita müca'ayeca mamacü müveviyata. Que maine tixaxatame,

<sup>49</sup>Muyuavi canine'üvenitüni haque nemüra'aita.  
 Cuié püta nequetatüa pucuma.  
 Que 'aneme qui  
 xepünesitavevirieni,  
 Naineni Ti'aitame,  
 Haque nemeca'uxipieni.

<sup>50</sup>Camüsü, ne nemamacü 'icü naime nepütüitivevi.

<sup>51</sup>Xeme xecüipi püsese'i,  
 yu'iyarisie yunacata



xepüca'inüaritärievave Cacaüyari 'inüarieyacı, xeme yuheyemecü xepi'unie 'Iyari Mütiyupata xemeri xetevarimata. <sup>52</sup>Que mü'ane texaxatamete 'atiyueicacai meca'itaveiyavecacu xetevarima. Mepüvarucui müme meripai memitahecüataxü 'Iya Heiserie Mexeiya 'umamieniquecai. Mücüri xepüyetua, teyucucuyamete xepacı hicü. <sup>53</sup>Inüari niuquiyari xeputanaqui'eri niuqui tuayamete metexe'aitüacacu, yaxepücatecahu.

#### 'Esitevani que mütiumierie

<sup>54</sup>Merücüsü me'l'enieca 'icü, yu'iyarisie mepuyeha'a. Mepüyutaquevecacai me'ihecatü. <sup>55</sup>'Esitevaniri hünētü 'Iyari Mütiyupatacü, heutinieretü yuheima, visi 'aneme catiniuxeiya Cacaüyari, Qesusi tiuxei Cacaüyari serieta 'utiveme. <sup>56</sup>Müpaü niutayüni, Camü, muyuavi nepüxeiya 'anacatenime, Yuri Tevi Cacaüyari serieta 'utiveme netixeiya. <sup>57</sup>Carima me'utihivatü meneuyucanaca yunacata. Meniviya 'axeicüa. <sup>58</sup>Quiecarisie menenuyehüani, meneitituaxixüani tetcü. Tehēcüiatamete memunenierixü yu'ixuriqui meputivivi 'uquitüa Sauru mütitevacaitüa. <sup>59</sup>Meneitituaxixüani 'Esitevani. Mücü nitahüave Qesusi. Müpaü niutayüni, Qesusi Ti'aitame 'acu, queneutanaqui'eri ne'iyari. <sup>60</sup>'Utitunumaqueca carima caniutahiva, Ti'aitame 'acu, 'icü 'axa memüteyuriecü vahesie pepücarahüpani. Müpaü 'utayüca caneucuni.

#### Sauru que mütivaruveiyacai memüyutixexeürivacai

**8** Sauruta 'iyarieya 'aixüa pü'anecai mumieriecü. Merücüsü 'ana Querusaremesie memüyutixexeürivacai carima menitaveiyarieximecaitüni memü'uximatüariecaicü. Yunaitü meneutayeixüani naisarie quiecarie mucumanesie Cureyasie Samariyasie. Nü'arisixi xEICÜA meniuhayeva. <sup>2</sup>'Uquisi Cacaüyari memayexeiycacai meneicuteucu 'Esitevani, vaücava me'utisuatü hepaüsitanä. <sup>3</sup>Sauru cuini mieme püva'uximatüacai memüyutixexeürivacai. Vaquita peutahaquecai, varayehapaca 'uquisi 'ucari nivanranutaxürüvacaitüni.

#### Niuqui 'aixüa manuyüne que müticuxasivacai Samariyasie

<sup>4</sup>Merücüsü memeutaxürüexüa naisarie meneutayeixüani niuqui 'aixüa manuyüne mecuxatatü. <sup>5</sup>Piriperi nuaca Samariya quiecarisie tinivahecüatüacaitüni Cürisitu heiserie mupitüarie hepaüsita. <sup>6</sup>Meni'enieni yunaitü que mutainecai Piripe 'axeicüa me'l'enietü me'ixeyatü 'inüari que mütiyurienecai. <sup>7</sup>Cacaüyarixi 'axa memü'anene carima me'utihivatü mepüvarutixünaxüa yumüireme memüvaviycacai. Yuvaücavatü memütutunicacai memühurietücatei menanayexürieni. <sup>8</sup>Mücü quiecarisie yemecü meniyyutemamaviecaitüni. <sup>9</sup>Merücüsü 'uqui Simuni mütitevacai mana puyecacai mücü

quiecarisie meripaitü vaquevayatü,  
Samariyatari tiva'irüviyatü, müpaü  
'utaitü quename türücaiyecai.

<sup>10</sup>Yunaitüri 'uquiravesixi türita  
mepi'eniecai müpaü me'utiyuatü,  
'Icü Cacaüyari türücariyaya  
canihücütüni, Mümarive  
mütiteva. <sup>11</sup>Mepi'eniecai müxa  
mütiva'irüviyacaicü vaquevayatü.  
<sup>12</sup>Quepauca yuri memüte'ita'eriri  
Piripe tivacuxaxatüvame niuqui  
'aixüa manuyüne, que müti'ane  
Cacaüyari ti'aitametücacu  
ticuxatatü, que mü'ane Qesusi  
Cürisitu mühücü cuxatatü, 'uquisi  
'ucari mepuca'üyarie. <sup>13</sup>Mücüta  
Simuni yuri tiniuta'erieni.  
'Uca'üyarieca pipareviecai Piripe.  
'Ixeiyatü 'inüari türücaiyemecü  
vaücavamecü que mütiyurienecai  
pü'iyarixiecai.

<sup>14</sup>Merücüsü me'u'enanaca  
nü'arisixi Querusareme  
meme'uvacai quename  
Samariyatari me'itanaqui'eri  
Cacaüyari niuquieya, vahesüa  
mepüvarenü'a Pecuru Vanimame.  
<sup>15</sup>Müme meheta'axüaca  
meniyutanenevieni vahesie mieme  
'Iyari Mütiyupata mehexeiyatü  
memacünecü. <sup>16</sup>'Acuxisü  
pücativiyavecai ni xeimesie müme.  
Mepuca'üyarie xeicüa Cürisitusüa  
memiemetetütü. <sup>17</sup>'Ana vaheima  
meniutimeni, 'Iyari Mütiyupata  
mehexeiyatü menacüne.

<sup>18</sup>Hicü Simuni nivaruxeiya  
'Iyari que memüte'upitüari  
nü'arisixi vaheima me'utimecu.  
Nivaranu'üirieniquecaitüni tumini  
<sup>19</sup>müpaü 'utaitü, Xequeneneupitüa  
neta 'icü türücariya, que mü'ane  
heima nemutimeni 'Iyari

Mütiyupata hexeiyatü mayanicü.

<sup>20</sup>Pecuru müpaü tinitahüave,  
'Atumini 'ahamatü que'uta'une, tita  
Cacaüyari mütimicua tuminicü  
nanaiyacame pemü'eriecaicü.  
<sup>21</sup>'Icü päirisie mieme 'ecü  
tixaütü pepücarexeiyani,  
'ahesie pücatinaqueni. 'A'iyari  
pücaheiserie Cacaüyari  
'ixeyacacu. <sup>22</sup>Quetineuhayeva  
que pemütiyuriene, pe'licu'eirieme  
'icü tita 'axa pemütiyuriene,  
queneutavaviri Ti'aitame siparasü  
xüca pereuyehüviyariemücü  
'ipaü pemüti'acühüavecü. <sup>23</sup>Ne  
nepümasixeiya siüricapäu  
pehasivime, tita mücatiheiserie  
penücame. <sup>24</sup>Hicü Simuni  
müpaü tinita'eiya, Xemesü  
xequeneutavaviri Ti'aitame nehiesie  
mieme, 'asinemüca'itüarienicü que  
xemutiyuane.

<sup>25</sup>Hicü mümeri  
mevarutahecüatüaca me'itixataca  
Ti'aitame niuquieya, ta'aurie  
mepaxüri, Querusareme menecüne.  
Metenicuxatacaitüni niuqui 'aixüa  
manuyüne naisarie Samariyatari  
vaquiecaritiesie.

#### **Piripe 'Etiyupiyatanacamätü que memütecuxatacai**

<sup>26</sup>Merücüsü Ti'aitame niuquieya  
tuayame müpaü tinitahüave  
Piripe, Quenanucuquexi, taserieta  
quenemie huyeta Querusareme  
mayehane 'utüma quiecarü Caxa  
müracutevasie müye'axe, haque  
macumave. <sup>27</sup>'Anucuqueca neyani.  
Camüsü 'uqui 'Etiyupiyatanaca  
vaücavamecü mühürütüarietü  
'enunucütütü, 'Etiyupiyatari  
va'uquiyari 'uca Canarase

mütitevacaisie miemetütü.  
 Catinihürütüariecaitüni naime  
 piniteya hepaüsita. Mücü 'uqui  
 necuyeixüani Querusareme  
 müyutanenevienicü, yu'utüma  
 'acunuaca pumiecai <sup>28</sup>yucaxetasie  
 yecaitü, titerüvatü tixaxatame  
 Quisariyaxi xapaya. <sup>29</sup>Cacaüyari  
 'Iyarieya müpaü tinitahüave  
 Piripe, Mana quenemie, 'aura  
 queneuye'a mücü caxeta 'aurie.  
<sup>30</sup>'Unasarümetü Piripe, ni'enieni  
 titerüvacame tixaxatame  
 Quisariyaxi xapaya. Müpaüsü  
 tinitahüave, Petimate 'acu tita  
 pemütiterüva. <sup>31</sup>Mücüri rehüave,  
 Que netiyüveniqueyu, me xüca  
 xevitü canesi'utahecüatüanique.  
 Piripe niuta'inieni manutimaquecü,  
 'auriena mayerünicü. <sup>32</sup>'Ipaü  
 panuyüne 'utüarica miterüvacai,  
 Muxa nunusipaü ni'atüarieni  
 mümierienicü,  
 Muxa müca'utaniucapaü  
 texicamete vahüxie  
 Müpaüta püca'utaniü.  
<sup>33</sup>Tixaü mücaratüacü, heiserie  
 püca'upitüarie  
 Que müreuyevacai quepaucua  
 muta'inüasie.  
 Quepai püvamaica türiyamama  
 Tucarieya munavaiyariecü  
 cuiepa.  
<sup>34</sup>Hicü tevi mühürütüariecai  
 müpaü tinita'eiya Piripe,  
 Yaquenetineutahüavi cuerietü,  
 quepai püxaxata tixaxatame.  
 Püyuxata, xeime püta püxata nusu.  
<sup>35</sup>Piripe niutaniuni, nisütüani  
 mücü 'utüaricasie tihecüatüatü  
 ticuxaxatüvatü niuqui 'aixüa  
 manuyüne Quesusi hepaüsita.  
<sup>36</sup>Huyeta me'uhutü haixapa

meniu'axüani. Müpaü niutayüni  
 tevi, Camü ha. Titari reuyevese  
 nemüca'üyarienicü. <sup>37</sup>Müpaü  
 niutayüni Piripe, Xüca 'a'iyarisie  
 yemecü yuri peti'erieca, 'aixüa  
 caniyümücü. Mücü müpaü  
 tinita'eiya, Ne yuri necatini'erieca  
 Cacaüyari Nu'aya Quesusi Cürisitu  
 mühücü. <sup>38</sup>Nita'aita mana  
 mütaquenicü caxeta. Yuhutatü  
 meneucacüne hapa Piripe tevi  
 mühürütüariecaimatü. Nica'üya.  
<sup>39</sup>Hapa me'anaticünecu Ti'aitame  
 'Iyarieya canitihana Piripe. Tevi  
 tavari püca'ixei, yutemavietü  
 yuhuyeta niümiecaitüni. <sup>40</sup>Piripe  
 'Asutusie caniyueicacaitüni.  
 Tinicuxatacaitüni niuqui 'aixüa  
 manuyüne naisarie cuyeicatü  
 quiecaritesie, 'arique peta'a  
 Sesareyapaitü.

### Sauru ta'aurie que mürave

(Nü'arisixi 22:6-16; 26:12-18)

**9** Mericüsü Sauru 'uxiva'atü  
 cuxi müpaü 'utaitü  
 müvacuiniquecai Ti'aitame  
 teyü'üquitüvametemama, caninuan  
 mara'acame mühürütüariecaisüa.  
<sup>2</sup>Nitavavirieni xapate  
 mütivati'utüirienicü tuqita  
 miemete Ramasicusie, müpaü  
 'utaineme, Xücasü 'icü varetaxeiya  
 hipame mücü huyeta miemete  
 'uquisi 'ucari, nivaravitümücü  
 mehüatücaime Querusaremepai.  
<sup>3</sup>Hicü huyeta 'uyemiecacu,  
 Ramasicu hura 'aye'aximecacu,  
 'auriena niucumerüca taheima  
 mieme. <sup>4</sup>Cuiepa 'ucaveca ni'enieni  
 xeime müpaü haineme, Sauru 'acu,  
 Sauru, titayari peneticuveiyane  
 'ecü. <sup>5</sup>Mücü rehüave, 'Uqui

que pepüpaicü. 'Iya müpaü niutayüni, Nesü necaniquesusitüni pemünesicuveyane. Pümasi'ucucuine pemüca'avaüriyacü, pemüti'aquesinacü pe'anaseivatü tisevemecü. <sup>6</sup>Sauru 'utayüüacatü matü müpaü niutayüni, Ti'aitame, tita matinaque yanemütiyurieni. Ti'aitame rehüave, Hicü quenanucuquexi, quiecarisie queneutahaqui. Manari yapepüretahüavarieni que müreuyevese pemütiyurienenicü. <sup>7</sup>'Uquisi hamatüana memu'uvacai mehüxiyatü meniuti'uni me'ienietü que mu'ane mutaniu, peru tevi mecaxeyatü. <sup>8</sup>Hicü nanucuqueni Sauru cuiepa. Yühüxita 'anutaniereca tixaü pücatiuxei. Mepeiha mamayasie metivütü, meni'atüani Ramasicupai. <sup>9</sup>Haica tucari puyuri caheunieretü caticuatü caharetü.

<sup>10</sup>Mericusü xevitü mana niuyeicacaitüni Ramasicusie tiyü'üquitüvametütü Hananiya titevatü. Tücaricü heinüsita Ti'aitame müpaü tinitahüave, Hananiya 'acu. Mücü müpaü niutayüni, Camüsü Ti'aitame ne necanihücütüni. <sup>11</sup>Ti'aitame müpaü rehüave, Quenanucuquexi, mana quenemie caye Müxearüiye mütiteva 'utüa. Cura quita queneta'livau Tarusutanaca Sauru mütiteva. Camü mana peyunenevi. <sup>12</sup>Mücüta heinüsita nixeiya 'uqui Hananiya titevacame mana ye'arücame heimana 'utimecame manutanierecü. <sup>13</sup>Hananiya müpaü tinita'eiya, Ti'aitame nepüvaru'eni yumüireme metecuxatame 'icü

'uqui hepaüsita, naime 'axa que mütivayurienecai müme 'ateüterima Querusaremesie. <sup>14</sup>'Enata heiserie menipitüani vaniu mara'acate memühürütüarie müvaviyanicü yunaime 'uva mematahüave. <sup>15</sup>Ti'aitame müpaü tinitahüave, Quenemiesü. Ne nepenuyeteüxixü 'icü, mütihecüatanicü nehepaüsita nuivarite vahüxie cuiepa te'aitamete vahüxie 'Ixaheri xiüyarimama vahüxie. <sup>16</sup>Netinita'üquitüamücü que müreuyevese müticuinecü nehesisie mieme. <sup>17</sup>Hicü Hananiya petüa, quita neutahani. Heimana 'utimeca müpaü niutayüni, Ne'iva Sauru, Ti'aitame caneneyenü'ani ne. Mücü Qesusi pemuxei huyeta pe'aye'aximetü, mücü caneneyenü'ani peheunieretü pemayanicü, pemühünenicü 'Iyari Mütiyupatacü. <sup>18</sup>Yapaucua payexüri hüxitana cunieripau 'anenetü. Heunieretü nayani, 'anucuqueca niuca'üyarieni. <sup>19</sup>'Itanaqui'erieca 'icuai türücaüyetü nayani. Mericusü Ramasicusie puyeicacai yapaimexa tucari teyü'üquitüvamate vahamatü.

#### Sauru que müticuxatacai Ramasicusie

<sup>20</sup>Cuitüva Huriyusixi vatuquiteta tinihecüatacaitüni Qesusi hepaüsita, 'Iya Cacaüyari caninu'ayatüni 'utaitü. <sup>21</sup>Menihüxiyacaitüni yunaitü memi'eniecai. Müpaü meniutiyanecaitüni, Cari 'icü canihücütüni que mü'ane müvaraye'uniecai müme memehüave mücü que mü'ane mühücü Querusareme quiecatari,

'uvata 'ayumieme munua,  
müvaranuvitünicü mehüatücaime  
mara'acate memühürituarie  
vahesüa. <sup>22</sup>Sauru yemecü  
canitürücarixarieximecaitüni.  
Niva'iyarixitüacaitüni Huriyusixi  
Ramasicusie memütamacai,  
nivarutahecüatüani quename  
'iyatütü que mü'ane heiserie  
mupituarie hücü Cürisitu.

**Sauru que mütiutavicuei  
Huriyusixi me'imiecucacu**

<sup>23</sup>Merücüsü müixa tucari 'utixücu  
Huriyusixi mecaniyu'enieni  
me'imienique. <sup>24</sup>Sauru tintimani  
que memütëyurieniquecai. Quiecari  
quitenitesie tucarcü tücaricü  
menihupiecaitüni me'imienique.  
<sup>25</sup>Quirivásie me'icayeca tesariya  
varie meneicatuani yüvicüta  
teyü'üquitüvamete.

**Sauru que mütiuyeicacai  
Querusaremesie**

<sup>26</sup>Hicü Querusareme nuaca  
pütüviyamücücai teyü'üquitüvamete  
vahesie. Yunaitü mepimacarücai  
yuri mecate'erietü quename  
tiyü'üquitüvametücai. <sup>27</sup>Verunave  
heivitüca cani'atüani nü'arisixi  
vahesüa. Nivarutahecüatüani  
ya'utaitü quename huyeta  
'ixei Ti'aitame, quename  
Ti'aitame 'itahüavixü, quename  
Ramasicusie camatü ticuxatacai  
Quesusisüa miemetütü. <sup>28</sup>Hicü  
vahesüa niuyeicacaitüni  
Querusaremesie naisarie cuyeicatü.  
<sup>29</sup>Pücamacai mütaniunicü  
Ti'aitamesüa mümiemetücaicü.  
Niuqui nixüatüacaitüni  
Cüriyecusixi vaniucüicü

memutiniucacai vahamatü.  
Mümesü menimiecucaitüni.

<sup>30</sup>Ivamariximama  
yametehetimaica meneivitüni  
Sesareyasiepai, Tarusupaitü  
mëneitanü'ani.

<sup>31</sup>Merücüsü  
memütütxexëürivacai naisarie  
Cureyasie, Carereyasie, Samariyasie  
mepüca'uximatüariecai.  
Mepuseiriyarie, 'amëniu'uvacaitüni  
meteheiyehüvirietü Ti'aitame.  
'Iyari Mütiyupata müremecü  
nivatuicacaitüni.

**'Eneya que müranayehüiya**

<sup>32</sup>Merücüsü Pecuru naisarie  
pücuyeicacai. Manata penua  
Cacaiyari teüterimama vahesüa  
Rirasie memütamacai. <sup>33</sup>Mana  
nicaxëiya xeime 'uqui 'Eneya  
mütitevacai 'atahaica viyari  
müyuriecai yu'utásie cacaitü  
mühuriecaicü. <sup>34</sup>Müpaü tinitahüave  
Pecuru, 'Eneya 'acu, Quesusi  
Cürisitu pümasi'anayehüa.  
Quenanucuquexi, 'a'isi  
queneutacuicui. Yapaucua  
nanucuqueni. <sup>35</sup>Yunaitü Rirasie  
Sarunisie memütamacai  
menixëiyacaitüni. Ta'aurie  
me'axürieca Ti'aitamesie  
metëniviyani mümerita.

**Maxama que müranucuquetüari**

<sup>36</sup>Merücüsü tiyü'üquitüvame 'uca  
Cupesie necateitüni Tavita titevatü,  
taniuquicü Ruruçaxi titevatü  
Maxama titevatü. Mücü 'aixüa  
ti'aneneme tiniyurienecaitüni cuini  
mieme, tiniyucanenimayacaitüni.  
<sup>37</sup>Hicü 'ana tiutacuineca  
caniumüni. Me'itahauxica qui taüta

meneitateni. <sup>38</sup>Meriçüsü Rirasie pehura Cupe. Teyü'lüquitüvamete me'u'enanaca quename Pecuru mana heyeicacai, hesüana menivarenü'ani 'uquisi yuhutame müpaü mete'itavavirienique, Penücahürixüa 'areutevini tahesüa pemünüani. <sup>39</sup>Pecuru 'anucuqueca vahamatü petüa. Nuacu qui taüta meneitivitüni. 'Auriena meniu'axüani yunaitü 'ucari vacünama memucui, me'utisuatü me'ixeisitüatü 'ixuriquite tetüata miemete herie miemete miveviecai Maxama vahesüa 'uycicatü. <sup>40</sup>Yunaima nivanarunyenü'ani Pecuru. 'Utitudumaqueca niyutanenevieni. Ta'aurie 'aveca caxari manucatei müpaü niutayüni, Tavita 'acu, quenanucuquexi. Mücü nanutanriere. Pecuru 'uxeiyaca 'aniutayerüni. <sup>41</sup>'Iya mamayasie tiviereca nenuchana. Yuhesüa nivarutahüave Cacaüyari teüterimama 'ucari vacünama memucui vahamame. Niyetuani 'ayeniereme. <sup>42</sup>Naisarie tiniutamariva Cupesie, yuvaücavatü yuri meteniuta'erieni Ti'aitamesie. <sup>43</sup>Müixa tucari Cupesie pecatei Simunisüa navi 'uhayamesüa.

### Pecuru Curineriyumatü

**10** Meriçüsü 'uqui Sesareyasie pecatei Curineriyu titevatü xei sienituyari cuyaxi tiva'aitüatü. Mücü cuyaxi 'Itariyasie Miemete Cuyaxi mepütetetevacai. <sup>2</sup>'Iya caneyexeyacaitüni Cacaüyari, tineiyehüviriecaitüni, yunaitü quiena quiecatarita. Vaücava tiniyurienecaitüni teüteri vahesie mieme vanenimayatü, nenevieri

pipitüacai Cacaüyari yuheyemecü. <sup>3</sup>Meriçüsü heinüsipäü 'aneme niuxeiya hecüacame cüa caviecacu tau yacütütü. Cacaüyari niuquieya tuayame hesüana neutahani. Müpaü tinitahüave, Curineriyu 'acu. <sup>4</sup>Mücü 'ixeiyatü pümacai. Müpaü niutayüni, Tita 'acu 'uqui. Mücü müpaü tinitahüave, 'Anenevieri 'anenimayasica nanutiyeicani Cacaüyari hüxie, pümasi'a'eriva. <sup>5</sup>Hicü quenivaranunü'a 'uquisi Cupepai memivitüyucü xeime Simuni Pecuru mütiteva. <sup>6</sup>Mücü necani Simunisüa navi 'uhayamesüa. Quiya haramara tesita peve. Mücü camatinitaxatüamücü que müreuyevese yapemütiyurienenicü. <sup>7</sup>Heyacu niuqui tuayame yamütitahüavixü, yu'aurie püvarutahüavixü yuhutame yunü'arivamete cuya meta Cacaüyari mayexeyacai, memipareviecai xevitü mühücütücai. <sup>8</sup>Tivarutahecüatüaca naime, nivarenü'ani Cupepai. <sup>9</sup>'Uxa'arieca me'uhucacu cuxi, quiecaru 'aurie me'aye'axüaximecacu, neutiyani Pecuru qui heima manuvericaisie yutanenevienique tuca. <sup>10</sup>Neuhacamücücaitüni, reucuaimecücücai. Mexicuxi 'aixüa ticuyüncacai 'icuai pütüheini. <sup>11</sup>Nixeiya müyuavi 'anacatenime, päüri 'acamieme savanapaü 'aneme, cuiepapai macatuiya 'eyeütü tesitana tivütücaitü. <sup>12</sup>Mana meniye'ucaitüni yunaitü cuiepa temiemete nauca 'ucayari memexeyia, cuterixi, viquixi taheima miemete. <sup>13</sup>Xevitü müpaü tinitahüave, Quenanucuquexi

Pecuru, quenivarucuya  
 quenivaruticua'i. <sup>14</sup>Pecuru müpäü  
 niutayüni, Tixaü Ti'aitame.  
 Hasuacu nepüca'iticuaive päüri  
 'axa müti'anene mücati'itiatüca.  
<sup>15</sup>Hutarieca müpäü tinitahüave  
 mücü, Tita Cacaüyari müti'itie 'axa  
 ti'aneneme pepücatixata.  
<sup>16</sup>Haicacüa müpäü pütüyü, cuitü  
 yapaucua mücü päüri panutihani  
 taheima. <sup>17</sup>Pecuru 'asicatimaicacu  
 tita müti'ayumiemetücai  
 heinüsi, camü 'uqisi Curineriyu  
 müvareyenü'a quiteni meniu'axüani  
 me'icu'ivavatü Simuni quiya.  
<sup>18</sup>Meputihivacai meheicu'ivaviyatü  
 xüca mana hecateitüni Simuni  
 Pecuru mütiteva. <sup>19</sup>Mücü Pecuru  
 yu'iyaritüacacu heinüsi hepäüsita,  
 'Iyari müpäü tinitahüave, Neuxei,  
 'uqisi yuhaicatü mepümasicu'ivava.  
<sup>20</sup>Quenanucuquexi, mana  
 queneucaye'a, vahamatü  
 quenemie peca'a'iyaritüatü. Nesü  
 nepüvareyenü'a. <sup>21</sup>'Anacayaca  
 haque memeti'ucai 'uqisi  
 Pecuru müpäü tinivarutahüave,  
 Camüsü ne necanihücütüni  
 xemicuvautüve. Titayari  
 xete'u'axüa. <sup>22</sup>Mümesü müpäü  
 meniutiyuani, Curineriyu xei  
 sienituyari cuyaxi mütiva'aitüvame,  
 mücü heiseriemecü  
 yapütüyuriene, püreiyehüviri  
 Cacaüyari. Yunaitü Huriyusixi  
 teüteriyari mepitahecüata.  
 Niuqui tuayame Cacaüyarisüa  
 mümieme müpäü tinitahüave  
 'ahesüa mütiutanü'acü yuquie  
 masi'inietü, niuqui mü'enienicü  
 'ecü yapeticuxatacacu. <sup>23</sup>Quita  
 nivaruta'inieni, nivarupitüani  
 haque memayeyaxecü.

'Uxa'arieca 'anucuqueca  
 vahamatü neyani. Hipatü  
 'ivamarixi Cupesie miemete  
 vahamatü menecüne. <sup>24</sup>'Uxa'arieca  
 Sesareyapai meneta'axüani.  
 Curineriyu nivarecueviecaitüni  
 varuta'inieca yumarema  
 yuhamicuma müvanaqui'eriecai.  
<sup>25</sup>Heutahaximecacu Pecuru,  
 Curineriyu nenucunaque. Hetüana  
 'ucaveca nenevieri pipitüa. <sup>26</sup>Pecuru  
 nenucuquetüani müpäü 'utaitü,  
 Quenanucuquexi. Nesü 'ahepäü  
 necanitevitüni. <sup>27</sup>Metecuxatacacu  
 mana neutahani. Nivaretaxeiya  
 yuvaücavame memüyuxeirie.  
<sup>28</sup>Müpäü tinivarutahüave,  
 Xeme müpäü xepütemate, que  
 mü'ane Huriyu tevyari mühücü  
 pücatauniva mütiviyanicü xeime  
 nuivarisie, va'aurie mamienicü.  
 Perusü Cacaüyari müpäü  
 pünetiutahecüatüa tevi mücayüve  
 müpäü mütayüni quename tevi 'axa  
 'ane quename ca'itiya. <sup>29</sup>'Ayumieme  
 necanecu'imavatü necaninuani  
 quepaucua nemeyevitüquie. Hicü  
 necanixecu'ivaviyaniqueyu titayari  
 xenete'utanü'airi.  
<sup>30</sup>Curineriyu müpäü  
 tinitahüave, Ranuca'atu  
 nepünehaquiecai 'epaucua.  
 Cüa caviecacu tau yacütütü  
 nenineneneviecaitüni nequita.  
 Camü 'uqui nehüxie putique  
 'ixuriqui merücaüyeme 'anacatütü  
<sup>31</sup>müpäü 'utaitü, Curineriyu  
 'acu, pe'enierie 'anenevieri.  
 Cacaüyari pümasiha'eriva que  
 pemüti'acanenimaya. <sup>32</sup>Mericüte,  
 quetineutanü'a Cupepai.  
 Queneta'ini Simuni Pecuru  
 mütiteva. Mücü Simuni navi

'uhayame quie peca haramara  
tesita. Nuame pümatitaxatüani.

<sup>33</sup>Hicü cuitü nepütitanü'a.

'Ecüsü 'aixüa petiniuyurieni  
pemunuacü. Hicüsüari tanaitü 'uva  
tepütacuxeüri Cacaüyari hüxie  
temi'enienicü naime Ti'aitame  
mümatl'aitüa.

**Pecuru que mütiyarutaxatüa  
Curineriyusüa**

<sup>34</sup>Hicü Pecuru müpäü niutayüni,  
Yuricü hicürixüa nepütimate,  
Cacaüyari yücü pücativaxeiya  
teüteri, <sup>35</sup>masi yuxexuime nuivarite  
vasata que mü'ane müreyehüviri,  
que mü'ane heiseriemecü  
yamütiyuriene, Cacaüyari  
pitanaqui'eri 'iya. <sup>36</sup>Niuqui  
'aixüa manuyüne meyenü'a  
'Ixaheri xiüyarimama vahesüa  
müpäü paine quename Qesusi  
Cürisitu vapitüani yu'iyarisie  
memüca'uximatüaricacü. Mücü  
Qesusi yunaime tiva'aitivame  
canihücütüni. <sup>37</sup>Xemeri xepütemate  
naisarie Cureyasie que mütiuyü,  
Carereyasie tiusutüaricü  
quepaucua Vani mütihecüatacai  
que memüteca'üyarieniquecai.

<sup>38</sup>Qesusi Nasaretitanaca  
canihücütüni, que mü'ane  
Cacaüyari micaviri yu'iyari  
Mütiyupatacü türüariyacü.  
Mücü 'aniyuecacaitüni  
'aixüa tiyurienetü, yunaime  
Cauyumarie müva'uximatüacai  
varanayexürivatü, Cacaüyari  
muyeicacaicü hamatüana.

<sup>39</sup>Tameta tepühüme temunenierixü  
temütehecüata naime hepaüsita que  
mütiuyurie Huriyusixi vacuiepa  
Querusaresie. Müme menimieni

me'icavivatü cüyesie. <sup>40</sup>Cacaüyari  
nenucuquetüani hairieca  
tucarisie. Nipitüani masiücütü  
mayanicü <sup>41</sup>yunaitü teüteri  
meca'ixeyacacu, tehecüatamete  
xeicüa Cacaüyari müvaranuyexei  
matüaripai menixeiya, temixei  
tame temütecuacai temüte'u'i  
hamatüana müquite vasata  
'anucuquecu. <sup>42</sup>Pütasi'uta'aitüa  
temütevacuxaxatüvanicü  
teüteri, temütehecüatanicü  
quename 'icü hücü que mü'ane  
Cacaüyari micaye 'ayenenieremete  
müquiteta va'isücame mayanicü.  
<sup>43</sup>Hepaüsitanata yunaitü  
texaxatamete mecatenihecüatani  
müpäü me'utiuyatü, müme  
hesiena yuri memüte'erie  
tinivareuyehüvirieni tita 'axa  
memüte'uyuricü hesüana  
memümiemetecü.

**Teüteri memücahuriyusixitücai  
meheixeyatü que memüte'acü  
'Iyari Mütiyupata**

<sup>44</sup>Merücüsü 'icü niuqui  
ticuxatacacu cuxi Pecuru,  
'Iyari Mütiyupata vahesie  
tiniviyani, yunaitü niuquieya  
memu'enie vahesie. <sup>45</sup>Yuri  
memüte'eriecai Pecurumatü  
memu'axüa memühuriyusixitücai  
mecanihüxiyacaitüni  
memücahuriyusixi müpäü  
memüte'umiquiecü, 'Iyari  
Mütiyupata vahesie mutatuiyacü.  
<sup>46</sup>Mepüva'eniecai metecuxatame  
niuquitecü, 'aixüa me'utiyaneme  
Cacaüyari hepaüsita. <sup>47</sup>Merücüsü  
müpäü tinivarutahüave Pecuru,  
Quepai püvanenasitüiya ha,  
memüca'üyarienicü 'ime.



Havaicü. 'Iyari Mütiyupata meputanaqui'eriexüa tahepaü. <sup>48</sup>Tinivaruta'aitüani memüca'üyarienicü Quesusi Cürisitu mehüavetü. 'Ana menitavavirieni vahesüa 'amüreutevinicü yapaümexa tucari.

**Pecuru que mütiyarutahecüatüa memüyuyexexeürivacai Querusaremesie**

**11** Mericüsü nü'arisixi ta'ivamata Cureyasie memü'uvacai meteniutamarieni quename müme memücahuriyusixitücai me'itanaqui'eri Cacaüyari niuquieya. <sup>2</sup>Quepaucua Querusaremesie meutiynixü Pecuru, müme xitequiya 'inüariyarisie miemete meniniuquixiecaitüni <sup>3</sup>müpaü me'utiyaütü, Titayari 'ecü petinua müme memüca'inüaritärie xitequiya 'inüariyaricü vahesüa, vahamatü perecuacai. <sup>4</sup>Pecuru tinivarutixatüatüyani xexuime que müreyü müpaü 'utaitü, <sup>5</sup>Ne quiecaru Cupe müracusevasie neneycacaitüni. Nenenenevietü, heinüsipäü 'aneme nexeyatü, necanixeiya päüri taheima 'acamieme tesitana tivütücaime savana 'amayeyevapäu tiyuxexeyame. Ne'aurie niucaveni. <sup>6</sup>Neni'ixüariecaitüni nehe'erivatü. Nenivaruxeiya nauca 'ücateyari memexeiya cuiepa miemete, yeutari cuterixi viquixi taheima miemete. <sup>7</sup>Nepi'enie xeime müpaü münetiutahüavixü, Quenanucuquexi Pecuru, quenivarucuya quenivaruticua'i. <sup>8</sup>Nesü müpaü neniutayüni, Tixaü

Ti'aitame, tita 'axa müti'anene mücati'itiya hasuacua neteta pücaheutahave. <sup>9</sup>HutariECA müpaü canetiniuta'eiya que mü'ane taheima mutaniucacai, Tita Cacaüyari müti'itie pepücahaine 'ecü quename 'axa ti'anene. <sup>10</sup>Haicacüa müpaü pütiuyü. Päüri naitü nanutihanieni taheima. <sup>11</sup>Camüsü yapaucua meniu'axüani yuhaicatü 'uquisi mücü qui nemüvayecateisie, nehesüa memeyenü'ari Sesareyasie meheyecüneca. <sup>12</sup>Iyari müpaü pünetiutahüavixü, Vahamatü quenemie tixaü pecati'a'iyaritüatü. 'Ime ta'ivama 'ataxevitü menesiteütacacu mana teneta'axüani. 'Uqui quita teneutahaxüani. <sup>13</sup>Mücü catatiniutahecüatüani que mütiexei niuqui tuayame yuquita 'utiveme müpaü 'utaineme, Cupepai quetineutanü'a memevitünicü Simuni Pecuru mütiiteva. <sup>14</sup>Mücü pümatitaxatüani niuqui cümana pemütavicueisitüarieni 'ecü, 'aquie quiecatarita metetavicueisitüarieni yunaitü. <sup>15</sup>Ne netiusutüacu neticuxatatü, 'Iyari Mütiyupata vahesie pütiuyiyaxü tahepaü sutüapai tahesie mütiuyiyaxüpaü. <sup>16</sup>Ne nepeye'erie Ti'aitame niuquieya que mainecai, Vani pütiuca'üyacai hacü, xeme püta xepüca'üyarieni 'Iyari Mütiyupatacä. <sup>17</sup>Mericüte, Cacaüyari yaxecüa que mütiatiupitüa yuri temüteta'erienicü Ti'aitame Quesusi Cürisitusie, müpaürta tinivarupitüani müme. Ne quesü netiyüvecai nemitanenanicü Cacaüyari. <sup>18</sup>Hicü 'icü me'u'enieca,

cayuvatü meniumacaitüni. 'Aixüa meniutiyanecaitüni Cacaüyari hepaüsita müpaü me'utiyaatü, Mericüte Cacaüyari tinivarupitüani müme memücahuriyusixita memütehayevanicü que memüteyuriecäi para tucari memexeyanicü.

**Que memüteyuyexexeürivacai  
'Anutiyaquiyasie**

<sup>19</sup>Merücüsü müme memüveveyarietüvecäi 'umieriecu 'Esitevani meneutayeixüani. Meneta'axüani Penisiyasie Sipüresie 'Anutiyaquiyasie. Niuqui mepücatevacuxaxatüvacai hipame, Huriyusixi xEICÜA. <sup>20</sup>Hipatü müme mecanisipüretarütücaitüni mecanisirenetarütücaitüni. Müme 'Anutiyaquiyä me'u'axüaca metenivacuxaxatüvacaitüni Cüriyecusixi niuqui 'aixüa manuyüne Ti'aitame Qesusi hepaüsita. <sup>21</sup>Mücü Ti'aitame yütürücariyacü nivapareviecaitüni. Yuvaücavatü yuri mete'erietü, ta'aurie me'axürieca, Ti'aitamesie meteniviyani.

<sup>22</sup>Merücüsü vahepaüsita mepu'enanaxü müme memüyuyexexeürivacai 'ana Querusaremesie. Verunave menenü'ani 'Anutiyaquiyapai. <sup>23</sup>Nuaca, nieretü 'aixüa quemütüca'iyaricai Cacaüyari, caniyutemaviecaitüni. Yunaime nivatuicacaitüni Ti'aitamesie memüteviyanicü ya'ayumiemetücacu va'iyari. <sup>24</sup>Mücü 'uqui 'aixüa pütüyuriencäi, pühüncäi 'Iyari Mütüyupatacä, yuri pütü'eriecaï vaüca.

Yümüiretü yemecü Ti'aitamesie meteniviyacaitüni.

<sup>25</sup>Hicü Verunave Tarusupai neyani 'icuvaunetü Sauru. Heitaxeiyaca caneivitüni 'Anutiyaquiyapai. <sup>26</sup>Mana xei viyari mepuyurie memüyuyexexeürivacai vahamatü meycuxexeürivatü. Yümüireme meteniva'üquitüacaitüni vaücava. 'Anutiyaquiyasie teyü'üquitüvamete Cürisitiyanusixi mepüte'utaterüvari meri.

<sup>27</sup>Merücüsü 'ana menacanexüani texaxatamete Querusaremetari 'Anutiyaquiyapai. <sup>28</sup>Xevitü 'anucuqueca Hacapu mütitevacai tiniutahecüata 'Iyari müpaü titahecüatüacu quename hacaxa 'ayaniquecai vaücava naisarie teüteri mematitecaisie. Müpaü pütüyü quepaucua Cürauriyu müti'aitametücai mücü cuiepa. <sup>29</sup>Yuxexütü teyü'üquitüvamete que memüteheixeyacai, meniYuvaüriyacaitüni tixäütü memüte'anunü'anicü memüvapärevienicü yu'ivama Cureyasie memütamacai. <sup>30</sup>Müpaüsü mepüte'uyuri. Meneinü'a va'uquiyarima vahesüa. Verunaveri Saururi menei'üni.

**Cacuvu 'umieriecu Pecuru  
que müranutahüiya**

**12** Merücüsü 'ana Herurexi müti'aitametücai mücü cuiepa nivarutiviya memüyuyexexeürivacai hipame 'axa vayurienique. <sup>2</sup>Ixiparacü tiniuta'aita mümierienicü Cacuvu Vani mü'ivayatücai. <sup>3</sup>Retimaica que mütivanaquecai Huriyusixi,

müpaüta 'arique niviya Pecuruta,  
 'iya semanasie quepauca  
 'ixüararipa pa mücuxaxani  
 mecuatü memüte'uhayevaxü.  
<sup>4</sup>Pecuru 'uviyaca nenutahüani.  
 Nivaruhüritüani tamamata heimana  
 'ataxeime cuyaxi yunanaucatü  
 memi'üviyanicü. Pasicua  
 'ixüarariyari 'aye'ayu teüteri  
 vahüxie ni'atüarieniquecaitüni  
 Pecuru mümierienicü. <sup>5</sup>Mücü  
 ni'üviyariecaitüni casariyanata.  
 Memüyuyexexeürivacai  
 mecatehayevatü nenevieri  
 mepipitüacai Cacaüyari hesiena  
 mieme.

**Pecuru que mütiuxünarie  
 casariyanata**

<sup>6</sup>Merücüsü quepauca Herurexi  
 'uxa'arieca mi'atüaniquecai Pecuru  
 teüteri vahüxie mümierienicü,  
 mücü tücarisie nicusucaitüni  
 Pecuru yuhutatü cuyaxi naisata  
 me'uti'ucacu, huta tepüayarcü  
 'acuvietü. Tehüvemete quitenie  
 hüxi meni'üviyacaitüni casariyana.  
<sup>7</sup>Camüsü Ti'aitame niuquieya  
 tuayame mana niutiqeni. Quitapai  
 pucumerücacü. Serietana heicuvaca  
 Pecuru nenutahütüani müpaü  
 'utaitü, Quenanucuquexi xeiya.  
 Tepüa panacaxüri mamayasie  
 puxünixü. <sup>8</sup>Niuqui tuayame müpaü  
 tinitahüave, Quena'ahüa, 'acacaisie  
 queneuquexi. Müpaü pütiuyuri.  
 'Arique müpaü tinitahüave,  
 'A'ücarü quenivacuquema  
 quenenanuveiya. <sup>9</sup>Anuyeyaca  
 neiveiya. 'Asipücatimaicai  
 muyuritücai que mütiyuriencai  
 niuqui tuayame. Heinüsi püta  
 pü'eriecai. <sup>10</sup>Me'anuyenexüaca

xeime yuhutame tehüvemete  
 va'aurie, tepüa 'itupariyarisie  
 meniu'axüani quiecarisie  
 muyenena. 'Itupari yücümäna  
 natenire vahesie mieme. Mana  
 me'anuyenexüaca xeime cayesie  
 menanuyenexüani. Yapaucua  
 neyani hesüana niuqui tuayame.  
<sup>11</sup>Hicü Pecuru tiyumaica müpaü  
 niutayüni, Hicürixüa nepütimate  
 yuricü Ti'aitame meiyenü'a  
 yuniuqui tuayame. Herurexi  
 nesi'uviyacu pünesi'uxünaxü,  
 Huriyusixi teüteriyari que  
 memünetexeyacucai nai  
 pünesi'uxünaxü.

<sup>12</sup>Merücüsü yatiumaica  
 mana ninuani Vani Maricuxi  
 mütittevacai varusieya quie,  
 Mariya mütittevacai varusieya.  
 Muva meniyuxeüriecaitüni  
 yumüiretü meyunenevietü.  
<sup>13</sup>Itupari vari neyuitüani. 'Üimari  
 püvayetüa Xute mütittevacai  
 heu'enaque. <sup>14</sup>Tinetimani  
 Pecuru müniuquieyatücaicü,  
 peru cacatineueyepieni  
 müyutemaviecaicü. Masi  
 'unausarümetü quita  
 tinivarutahecüatüani Pecuru  
 quitenie mutivecaicü. <sup>15</sup>Müme  
 müpaü metenitahüave, Tietü  
 peca'amaica. Mücüsü, Xüari  
 mücü pühücü 'utaitü, müpaü  
 tinivacühüavecaitüni masi.  
 Müme müpaü menutiuyani,  
 Niuquieya tuayame pühücü.  
<sup>16</sup>Pecuru mana puyuhayevacai  
 heyüitvatü. Metehueyepieca  
 menixeiya, menihüxiyacaitüni.  
<sup>17</sup>Yumamacü nivaru'inüarütüani  
 cayuvatü memütamarecü,  
 tinivarutahecüatüani Ti'aitame

que mütivavevitü casariyanata.  
Müpaü tinivarutahüave,  
Yaxequetenivarutahecüatüa Cacuvu  
ta'ivamarixita. 'Anuyeyaca xaüsie  
neyani.

<sup>18</sup>Mericusü 'ucatarecu cuyaxi  
yemecü meniuyaxamurietüvecaitüni  
queri tiuyunixü Pecuru me'utiyuatü.  
<sup>19</sup>Herurexi heicuvauca pücaheitaxei.

'Ayumieme nivaruta'ivaviya  
tehüvemeti, tini'aitacaitüni  
memücüi'ivacü. Hicü Herurexi  
Cureya heyeyaca yapaümexa tucari  
neyuriecaitüni Sesareyasie.

#### Herurexi que mütiumü

<sup>20</sup>Mericusü Herurexi  
püvaxeümecai Tirutari Sirunitari.  
Müme 'axeicüa meniu'axüani  
hesüana, me'itihamicutaca que  
mü'ane cuiepa ti'aitame quita  
mühürütüaricai Purasitütütü.  
'Aixüa memüteyuxeiyanicü  
menitavavirieni, vacuiepa  
quiecatari memeiyehüacaicü 'icuai  
mematücünicü ti'aitame cuieyarisie  
timieme. <sup>21</sup>Xeime tucarisie  
Herurexi ti'aitame 'ixuriquiyari  
'anacatütü, ti'aitame 'uvenieyasie  
'acaitü, tinivacuxaxatüvacaitüni.  
<sup>22</sup>Teüteri müpaü meniutihvacaitüni,  
Tevi püca'utaine, Cacaüyari püta  
putaine. <sup>23</sup>Ti'aitame niuquieya  
tuayame yapaucua nivani 'aixüa  
müca'utainecaicü Cacaüyari  
hepaüsita. Cuisietü niümüni.

<sup>24</sup>Mericusü Ti'aitame niuquieya  
naisarie pü'enieriecai niutimüire.

<sup>25</sup>Verunave Saurumatü  
Querusareme me'ayenexüaca  
yu'utüma meniucunuaxüani  
'aye'acu vahürütüarica. Menevitüni  
Vani Maricuxi mütitevacai.

#### Verunave Saurumatü heiva que memütehecü metecuxatatü

**13** Mericusü  
memüyuyexexeürivacai  
'Anutiuyuqiyasie hipatü  
mecatenixaxatametetücaitüni  
meteni'uiquitametetücaitüni  
Verunave, Simuni Niqueri  
mütitevacai, Rusiyu Sirenetanaca,  
Manaheni ti'aitame Herureximatü  
memutivaverixü, Sauru. <sup>2</sup>Müme  
Ti'aitame 'uximayasicaya  
yameteyuriecacu meyuhaquiecacu,  
müpaü niutayüni 'Iyari Mütiyupata,  
Nehesie mieme xequenivarupata  
Verunave Saurumame 'ipaü  
memüte'uximayacacü que  
nemütivatahüave. <sup>3</sup>Me'uyuhaquieca  
meyutanenevieca vaheima  
me'utimeca memühürütüaricacü,  
menivarutatuani.

#### Nü'arisixi que memütecuxatacai Sipüresie

<sup>4</sup>Mericusü 'Iyari Mütiyupata  
nivarenü'ani. Sereusiyasie  
menecüne. Mana naviyasie  
menecüne Sipürepai. <sup>5</sup>Saramina  
me'u'axüaca metenihecüatacaitüni  
Cacaüyari niuquieya Huriyusixi  
vatuquiteta. Vani püvatupiritücai.  
<sup>6</sup>Cuie hapa müyema 'amacuyevasie  
meniuyecüne Papuxipai. Mana  
meneitaxeiya xeime Huriyu  
mütiyuquevayametücai, ti'itavatü  
mütixaxatametücai, Paruquesusi  
mutitevacai. <sup>7</sup>Mücü necateitüni que  
mü'ane cuiepa mühürütüaricaisüa,  
Seruquiyu Pauru mütitevacaisüa  
mütimaivecaisüa. 'Iya  
nivaruta'inieni Verunave Sauru.  
Ni'eniemücücaitüni Cacaüyari

niuquieya. <sup>8</sup>Vahepaüsita ni'uxiva'acaitüni mücü tiyuquevayame 'Erimasi müтитеvacai Cüriyecusixi vani quicü. Nicunuitüamücücaitüni que mü'ane cuiepa mühürütüariecai yuri mücatita'erienicü. <sup>9</sup>Saurutütü, Papuru müてevata, hünetü 'Iyari Mütiyupatacü, 'ixeyatü, <sup>10</sup>müpaü niutayüni, Cari 'ecü pepühüne naime 'irümaricü nai 'axa müti'anecü. Cauyumarie pepünu'aya, pepica'una nai mütiheiserie, pepücatihayeva 'ecü pe'itunatü Ti'aitame hüyeva müxexeuravi. <sup>11</sup>Camüsü Ti'aitame pümasinenani yumamacü. Pe'acüpetü peca'ixeyavetü tau penayeimücü yapaümexa. Yapaucua pucucutuxaxüa pu'iyüri. Cumenetü xeime nicuvaunecaitüni menuhanacü mamayasie tiviereme. <sup>12</sup>Iya cuiepa mühürütüariecai 'uniereca que mütiuyü yuri tiniuta'erieni. Pühüxiyacai Ti'aitame 'üquisicaya hepaüsita.

**Papuru Verunavematü que  
memütecuxatacai 'Anutiyuquiyasie  
Pisiriya cuieyarisie**

<sup>13</sup>Mericusü Papuxisie menecüne müme Papurumatü memü'uvacai. Perüque meniu'axüani Pamüpiriya cuieyarisie. Vani mana nanayeyani vahesie. Ta'aurie 'aveca Querusareme neyani. <sup>14</sup>Mümesü me'anucüneca Perüque, meniu'axüani 'Anutiyuquiyasie Pisiriya cuieyarisie. Meheutahaxüaca Huriyusixi vatuquita 'uxipiya tucarisie mana menatecaitüni. <sup>15</sup>Utiterüvariecu 'inüari xapayari texaxatamete

vaxapayari, tuqui vava'üte niuqui menenü'ani vahesüa müpaü me'utiyuatü, Ta'ivama xüca niuqui xehexeyani xemüvatuicanicü teüteri, yaxequeteneutaxata.

<sup>16</sup>Papuru 'anucuqueca yumamacü varu'inüaritüaca müpaü niutayüni,

Neuxei 'Ixaherisixi, xemeta Cacaüyari xemüteheuyehüviri, xequene'enanaca. <sup>17</sup>Icü

'Ixaherisixi teüteriyari vacacaüyari nivaranyeteüxü tatevarima. Teüteri vahesie

mieme 'aixüa pütiuyuri quepaucua memücü'uvametetücai 'Equipitu cuieyarisie. Yütürüariyacü

nivarayevitüni muva. <sup>18</sup>Huta teviyari viyari yacütütü tinivamicuacaitüni macumavesie

me'u'uvacacu. <sup>19</sup>Varuca'unaxüaca 'atahutame nuivarite Canani cuieyarisie

mana nivarupitüani vacuie vahesie mütinäquenicü. <sup>20</sup>Arique nauca sienituyari

heimana huta teviyari heimana tamamata viyari yacütütü 'isücate nivapitüacaitüni, 'ariqueta Samueri

pütixaxatametücai. <sup>21</sup>Mericusü 'ana menitavavirieni cuiepa ti'aitame. Cacaüyari nivarupitüani Sauru Sixi

nu'aya Venicamini nuivarieyasie mieme. Huta teviyari viyari 'anucayacu <sup>22</sup>Cacaüyari nipata.

Nicayeni Raviri, cuiepa ti'aitame mayanicü vahesie mieme. Müpaü tinitahecüata hepaüsitana, Ne

nenitaxeiya Raviri Quisahi nu'aya, 'uquitüme ne'iyaripaü yaticamieme. Naime que münätinaque

yatiniyuriemücü. <sup>23</sup>Iyasie memüyecü xevitü, Cacaüyari que maineipaü 'Ixaherisixi vavicueisitüvame payeitüa Quesusi.

<sup>24</sup>Meripai canuavecacu cuxi mücü, Vani tinivahecüatüacaitüni yunaime 'Ixaherisixi teüteriyari memüca'üyarienicü metehayevatü que memüteyuriecäi.

<sup>25</sup>Yu'uximayasica nüximetü Vani, müpäü niutainecaitüni, Que xetecu'eriva ne nemühücü. Nesü nepücahücü. Camü xevitü ne'utüma 'upamie. Nesü 'aixüa nepücatiucal'yari nehiesie mütnaquenicü ni cacaiya nemixünirienicü nemiparevienicü.

<sup>26</sup>Neuxei 'ivamarixi, 'Apurahami xemüxiüyarimama, xeme Cacaüyari xeteheuyehüvirietü xemu'uva, xehesie mieme peyenü'ari 'icü niuqui que xemütetavicueisitüarieni manuyüne.

<sup>27</sup>Querusareme memütama va'uquiyarimata mepücaheitima Quesusi, mepücaheitima texaxatamete vaniucü 'uxipiya tucarisie mütiütiterüvarüva, masi mepeye'atüa mücü niuqui me'enutahüatü. <sup>28</sup>Sepa tixäü memücate'utaxei me'imienique, menitavavirieni Piratu mümierienicü. <sup>29</sup>Mete'aye'atüaca naime hepaüsitanä mütiuti'utüarie, mehexaxünaca cüyesie, teuquiyapa meneitateni. <sup>30</sup>Cacaüyari püta müquite vasata nenucuquetüani.

<sup>31</sup>Müixa tucari müme hamatüana memeutiyunixü Querusaremepaitü Carereyasie meheycüneca, müme mecanixeyacaitüni. Müme memunenierixü metenivahecüatüaca teüteri hicü cuxi.

<sup>32</sup>Tameta tepütexetaxatüani niuqui 'aixüa manuyüne, quename 'ipaü tiuyü que mütiavarutahüavixü

tatevarima manuyüne.

<sup>33</sup>Cacaüyari 'enucuquetüaca Quesusi müpäü püreye'atüa tame temüvatüriyama tahesie mieme. Müpäüta hutarieca mieme cuicari Cuicari Xapayarisie müpäü paine, 'Ecüsü pecaninenivetüni, hicü nepümasi'utinuivitüa. <sup>34</sup>Müpäü paineta quename 'enucuquetüayu müquite vasata, hasuacuari tavari catapünequeca müpäü 'utaitü, Ne yaneticamietü netinixepitüamücü tita nemütiuta'aitaxü Raviri hepaüsita. <sup>35</sup>Ayumieme xeime cuicarisie müpäü paineta, Que mü'ane pemipataxü 'ahesie mieme, mücü pepücapitüani mütapü necü.

<sup>36</sup>Mericusü Raviri yutucarisie miemete varuparevieca, Cacaüyari que mütiyücühüaveca, müpäü tineucuni Raviri. Yutevarima vahesüa neyani. Xüari putapünixü.

<sup>37</sup>Mücü masi que mü'ane Cacaüyari menucuquetüa, mücüri pücapünica. <sup>38</sup>Ayumieme yaxequetenemaica xeme ne'ivama, müpäü tepütexehecüatüa, tita 'axa xemüteyurie xemüteheuyehüvirienieni 'iya yamütiuyuricü. Naime cümana xemücaüyaveca heiserie xemüpitüarienicü Muisexi 'inüarieya niuquiyaricü, <sup>39</sup>mücüsie meteviyatü yunaitü yuri memüte'erie heiserie mecanipitüarieca. <sup>40</sup>Yumarima 'aixüa 'asixe'itüarienicü texaxatamete vaxapayarisie que maine,

<sup>41</sup>Neuxei tave'eriecate, Xequene'iyarixieca xequenecui'ini. Que nemütiyurieni ne mexi xe'u'va,

Yuri xepücate'erieca sepa xevitü  
mütixe'utaxatüanique.

<sup>42</sup>Mericsü me'ayenexüaca  
Huriyusixi vatuquita, müme  
menivarutavavirieni 'licü niuqui  
memütecuxatanicü tavari  
'uxipiya tucarisie. <sup>43</sup>Tuquipa  
mehecünecu yumüiretü  
Huriyusixi menivaranucuveiya  
Papuru Verunavemame, hipatüta  
Cacaiyari me'ayexeyatü Huriyusixi  
memayuyeitüa vahamatü. Müme  
metenivacuxaxatüvacaitüni  
menivatuicacaitüni  
memüyuhayevacü tavari  
memücaypatacü Cacaiyari 'aixüa  
tiuca'iyaricacu vahesie mieme.

<sup>44</sup>Hicü tavari 'uxipiya  
tucarisie 'esivatücacu yunaitü  
quiecatari meniucuxeürieni  
memi'enienicü Cacaiyari niuquieya.

<sup>45</sup>Huriyusixi mevaruxeiyaca müme  
memüyucuxeüri, meniuye'uxiva'ani.  
Meneuniuni Papuru niuquieya  
hepaüsita 'axa metecuxatatü.

<sup>46</sup>Papuru Verunave mecamaamatü  
müpaü meniutiyuani, Püreuyevecai  
temütexetaxatüanicü xeme  
Cacaiyari niuquieya meri. Xeme  
xepixani'eri, xecaniyuhecüatani  
'aixüa xemücate'u'iyari xehesie  
mütinaquenicü tucari mücaxüve.  
'Ayumiemerü ta'aurie tepaxüri,  
nuivarite tenivatahüavicüni.

<sup>47</sup>Müpaü pütatiuta'aitüa Ti'aitame  
müpaü 'utaitü,

Ne hecüarivivame  
nepümasi'ucaye nuivarite  
vahesie mieme

Pemüvatavicueisitüanicü naisari  
cuie manunierapai.

<sup>48</sup>Hicü nuivarite me'l'enieca  
meniutemamaviecaitüni. 'Aixüa

meniutiyuanecaitüni Cacaiyari  
niuquieya hepaüsita. Yunaitü tucari  
mücaxüve memupitüarieniquecai  
yuri meteniuta'erieni. <sup>49</sup>Mücü  
cuiepa naisarie pü'enieriecai  
Ti'aitame niuquieya. <sup>50</sup>Huriyusixi  
mepüvarutaxamuri 'ucari  
memütehayeixeyacai  
memümarivacai, quiecatari  
va'uquiyarimata,  
memüvaruveiyanicü Papuru  
Verunave. Menivaranuyenü'ani  
yucuepa. <sup>51</sup>Müme meneicasixüani  
tumuanari yü'ücatesie 'inüari  
meyurietü vahepaüsita.

'Icuniyu meneta'axüani.

<sup>52</sup>Teyü'üquitüvamete vaücava  
meniutemamaviecaitüni, 'iyari  
Mütiyupatacü mecanihüpünecaitü  
ni.

#### Papuru Verunavematü que memüte'uyuri 'Icuniyusie

**14** Mericsü 'Icuniyusie  
meyuteütatü  
meneutahaxüani Huriyusixi  
vatuquita. Metenicuxatacaitüni,  
'ayumieme yuri meteniuta'erieni  
Huriyusixi Cüriyecusitüxita  
yumüiretü. <sup>2</sup>Huriyusixi  
yuri memücate'eriecai  
mepüvarucunüitüa  
mepüvahaxüatüacai müme  
memücahuriyusixitücai ta'ivama  
vahepaüsita. <sup>3</sup>Müme masi müixa  
'amepütitecai mecamaamatü  
Ti'aitamesüa memümiemetetücaicü.  
'Iya tinihecüatacaitüni niuqui  
'aixüa que mütiuca'iyari manuyüne  
hepaüsita. Püvarupitüaxüa  
yumamacü 'inüari mamarivaveme  
memüteyurienicü. <sup>4</sup>Hicü  
quiecatari hixüata mepüyusanaxü.

Hipatü Huriyusixi vahesie meteniviyacaitüni, hipatüta nü'arisixi vahesie meteviyacai. <sup>5</sup>Müme memücahuriyusixitücai Huriyusixi vahamatü va'uquiyarima vahamatü menisütüani 'axa mevayuricutü mevatuaxicutü. <sup>6</sup>Nü'arisixi yamepütehetime, mepüyuta'unaxüa quiecaritesie Risitürasie Rerüvesie mana hurava Ricahuniya cuieyarisie. <sup>7</sup>Muva mepe'uvacai metecuxatatü niuqui 'aixüa manuyüne.

### Papuru que mütiutuaxi Risitürasie

<sup>8</sup>Mericsü 'uqui Risitürasie pecatei müyutexiecai yü'ücatecü, hurietü mutinuivaxü hasuacua müca'uyeicacai. <sup>9</sup>Mücü ni'eniecaitüni Papuru ticuxatame. 'Iya 'ixeyatü, yatimaitü yuri müti'eriecaicü mütavicueisitüarienicü, <sup>10</sup>carima müpaü tinitahüave, Quenanucuquexi, 'a'ücate queneutixusera. Niutisuna, cuyeicatü nayani. <sup>11</sup>Teüteri me'ixeyaca Papuru que mütiuyuri, me'utihivatü Ricahuniyatari vaniüquicü, müpaü meniutiyuani, Cacaüyarixi tahesüa mepacanexüa teüteri vahepaü meteyuxexeyatü. <sup>12</sup>Verunave meputaterüvaxü Cupiteri, Papuru mete'utaterüvaxü Mericuriyu mücü niuqui mecutuacü masi. <sup>13</sup>Cupiteri tuquieya quiecarie 'aurie manuve, mara'acameya niva'atüani turusixi va'avate xuturiyatücaime quiteniesie. Teüteri vahamatü, 'iya mavari nivacui'iriemücücaitüni. <sup>14</sup>Me'u'enanaca nü'arisixi Verunave Papuru, yu'ixuriqui metisanatü

me'unasaxüaximetü meniu'axüani teüteri vahesüa me'utihivatü <sup>15</sup>müpaü me'utiyuatü, Xeme 'acu titayari müpaü xeteyurie. Tame xehepaü tecaniteüteritüni, xehepaü teteniu'iyarini. Tepütexetaxatüani niuqui 'aixüa manuyüne ta'aurie xemaxürienicü, xetehayevame 'icü yacü xemüyüa, Cacaüyari mayeyurisie xemüteviyanicü püta. Mücü muyuavi cuie haramara putivevi, naime vahesie mütiyeyeica tiutivevi. <sup>16</sup>Xeteüteriama quepaucua memaniticüpai nivapitüacaitüni yunaime nuivarite yuhuyeta memeu'uvanicü. <sup>17</sup>Siepüre pücauyahayevacai caheixeyatü que mü'ane mitahecüataque. 'Aixüa tiniyuriencaitüni, taheima mieme viyeri pütasipitüacai, 'icuaxi mutixuxuavere pütasipitüacai. Xe'iyarisie putihüniyaxü xemütecucacü xemüyutemamaviecacü. <sup>18</sup>Müpaü me'utiyuaca haveri mieme xeicüa menivarucunuitüani teüteri mavari memücavacui'irienicü.

<sup>19</sup>Mericsü Huriyusixi mana meniu'axüani 'Anutiyuquiyasie 'Icuniyusie meheycüneca. Menivarucunuitüani teüteri. Menituaxixüani Papuru. Meneihana quiecarie tesie müquime me'eritü. <sup>20</sup>Teyü'üquitüvamete mehaquetücünecu 'auriena, nanucuqueni. Quiecarisie neutahani. 'Uxa'arieca Rerüve petüa Verunavematü.

<sup>21</sup>Mana niuqui 'aixüa manuyüne metenivacuxaxatüvacaitüni quiecatari, yuvaücavame meteniva'üquitüacaitüni. 'Arique ta'aurie menaxürieni, Risitürasie



'Icuniyusie 'Anutiyuquiyasie meniuyecüne. <sup>22</sup>Teyü'üquitüvamete va'iyari meniutuicaxüani metevacuxaxatüvatü para yuri mete'erietü memüyuhayevacü, müpäü me'utiyaütü que müreyevese vaüca te'u'uximatüarieme temeutahaxüani Cacaüyari müra'aitasie. <sup>23</sup>Naisarie memüyutixexeürivacai va'uquiyarima menivaranucayasa. Meyutanenevieca me'uyuhaquieca mepihürütüa Ti'aitame müme yuri memüte'uta'erie hesiena vahepäüsita.

#### Que memüteheta'axüa

##### 'Anutiyuquiyasie Siriya cuieyarisie

<sup>24</sup>Hicü Pisiriya cuieyarisie mepuyecü. Pamüpiriya cuieyarisie meniu'axüani. <sup>25</sup>Perüquesie niuqui mete'utixatata meniucayune Hatareyasie. <sup>26</sup>Mana naviyasie menecüne 'Anutiyuquiyasiepai haque memetatuiya Cacaüyari 'aixüa mütiuca'iyarinicü vahesie mieme, memüte'uximayacacü que memüteheye'atüa. <sup>27</sup>Me'u'axüaca menivarucuxeürieni memüyuyexexeürivacai. Metenivacuxaxatüvacaitüni quepäümeme mütiyuriencai Cacaüyari vahamatü 'uyeicatü, müpäüta que müreteni yuri memüteta'erienicü nuivarite. <sup>28</sup>Müixa meniyuhayeva teyü'üquitüvamete vahesüa.

##### Querusaremesie que memüte'uyu'eni

**15** Mericüsü hipatü  
Cureya meheyecüneca  
meteniva'üquitüacaitüni

ta'ivama müpäü me'utiyaütü, Xeme xüca xitequiyacü xeca'inüaritüarieni que maine Muisexi yeiyarieya, xepücaüyave xemütaviceuisitüarienicü. <sup>2</sup>Papuru Verunave yemecü meniniuquixiecaitüni niuqui metexüatüacai müiremecü vahepäüsita. 'Aixüa meniyurieni Papuru Verunavematü hipatü müme me'üaritü Querusareme memanuticünecü nü'arisixi vahesüa 'uquiravesixi vahesüa 'icü niuqui hepäüsita.

<sup>3</sup>Mana memüyuyexexeürivacai mepüvarenü'a. Penisiyasie Samariyasie mepuyecü metecuxatatü nuivarite vahepäüsita quename ta'aurie me'axürie me'utiyaütü. Yunaima ta'ivamarixi mepüvatemavieriyacai yemecü.

<sup>4</sup>Meheta'axüacu Querusareme, müme memüyuyexexeürivacai nü'arisixi 'uquiravesixi yunaitü menivarutanaqui'erieni. Metenitaheciätani naime que mütiyuriencai Cacaüyari vahamatü 'uyeicatü. <sup>5</sup>Mericüsü hipatü Pareseusixi vahepäü memütecü'erivacai mecananucu'uni müpäü me'utiyaütü, Peuyevese temüvata'aitüani memü'inüaritüarienicü xitequiyacü, Muisexi 'inüari niuquiyarisie yamemütecahunicü reuyevese.

<sup>6</sup>Hicü meniyucuxeürieni nü'arisixi 'uquiravesixi yametehetimanique 'icü niuqui hepäüsita. <sup>7</sup>Vaüca niuqui mexüatüacacu, Pecuru 'anucqueca müpäü tinivarutahüave, Neuxe'i'ivamarixi, xeme müpäü xepütemate, Cacaüyari

meripaitü pünesi'anuyexei  
 xesata, müme memücahuriyusixi  
 memi'enienicü niuqui 'aixüa  
 manuyüne ne ne'utaniucacacu,  
 mücücü memütavicueisitüarienicü.

<sup>8</sup>Cacaüyari ta'iyari mümate  
 tinivarutahecüatüani vapitüatü  
 'Iyari Mütiyupata tahepaü. <sup>9</sup>Yücü  
 pücatatiuxei müme tame. Yuri  
 mete'uta'eriecu nivaru'itirieni  
 va'iyari. <sup>10</sup>Hicü camüsüari, titayari  
 xete'l'isipatüve Cacaüyari, titayari  
 yuyeyari xetevaranuyetequirie  
 teyü'üquitüvamate puixisixi  
 vahepaü. Tatevarima tameta  
 tepütatexiecai temenuyetenicü.

<sup>11</sup>Masi Ti'aitame Qesusi 'aixüa  
 mütiuca'iyaricü yuri tepüte'erie  
 quename tetavicueisitüarieni tame  
 vahepaü.

<sup>12</sup>Mericüsü yunaitü cayuvatü  
 meputamarixü, mepüvaru'enie  
 Verunave Papuru metehcüatame  
 'inüari mamarivaveme que  
 mütiyurienecai Cacaüyari  
 memücahuriyusixi vasata  
 müme metecuxatacacu.

<sup>13</sup>Cayuvatü mehexeiyacacu  
 müpaü tinivaruta'eiya Cacuvu,  
 Ne'ivamarixi xequenene'enieca.

<sup>14</sup>Simuni tiniutahecüata Cacaüyari  
 meripai que mütiyuvaüri  
 menuyexeyacü xei nuivariyari  
 nuivarite vasata hesüana  
 memümiemetetünicü. <sup>15</sup>Yaxeicüa  
 paine texaxatamete vaniucü,  
 müpaü que müre'utüariepaü,

<sup>16</sup>'Arique ta'aurie nepaveni.

Raviri quiya nepütavevieni  
 mü'unicai.

Cüyexiyari mana meutihe nai  
 nepanucu'uitüani.

Nepiseiriya.

<sup>17</sup>'Ayumieme teüteri  
 memüyuhayeva  
 menicuvaucuni Ti'aitame  
 Yunaitü nuivarite vahesie  
 mieme nemücühüavarüva  
 Neteüterima memüteteteva

<sup>18</sup>Müpaü paine Ti'aitame  
 masiücüme meyeitüa 'icü  
 matüaripai.

<sup>19</sup>'Ayumieme ne  
 'ipäü nepüticu'eriva,  
 tepücava'uximatüaca müme  
 memücahuriyusixi ta'aurie  
 memaxürie Cacaüyarisie  
 memüteviya. <sup>20</sup>Xapacü  
 tepüvata'aitüani xeicüa  
 memüyucuerivayuriecacü tita  
 mütisevixima tetexi vahesie  
 mütimiemeccü, mücü hepaüsita,  
 memücavacumaüvanicü que  
 mü'ane mücayü'üya mücayücüna,  
 memüyucuerivayuriecacü  
 'ucaviyacame vaiyarieya hepaüsita  
 xuriya hepaüsita memüca'icuanicü.  
<sup>21</sup>'Iya Muisexi meripaitü hicüque  
 püvarexeiya müme memitahecüata  
 quiecarie mucumanesie vatuquiteta  
 yamemüte'ititerüva 'uxipiya  
 tucarisie.

<sup>22</sup>Mericüsü nü'arisixi  
 'uquiravesixi vahamatü yunaitü  
 memüyuyexexeürivacai vahamatü  
 'aixüa 'aneme meni'eriecaütüni  
 yusata memüvaranuyexeyacü  
 'uquisi, memüvaranunü'anicü  
 'Anutiyuquiyapai Papuru Verunave  
 vahamame. Menivaranuyexeyia  
 Cura Varüsavaxi mütitevacai,  
 Siraxi meta. Müme 'uquisi  
 mepüte'aitametetücai yu'ivama  
 vasata. <sup>23</sup>'Ipaü meteniu'tütüani  
 memenuhurienicü xapa,  
 Nü'arisixi 'uquiravesixi

'ivamarixi tecanixevauritüaca  
 ta'ivamarixi 'Anutiyuquiyasie  
 Siriyasie Sirisiyasie xemümiemet  
 xemünüivarite. <sup>24</sup>Tepu'enana  
 quename hipatü tahesüa miemet  
 mexexamurietüvecai yuniuquicü  
 xe'iyari meyuitüatüvetü  
 mexe'aitüatü xemüyu'inüaritüanicü  
 xitequiyacü, 'inüari niuquiyarisie  
 yaxemütecahunicü. Tame  
 tepücateva'aitüa. <sup>25</sup>Meriçüte,  
 'axeicüa te'uta'enieca 'aixüa  
 'aneme teni'eriecaitüni  
 temüvaranuyeteüxücü 'uquisi  
 temüvaranunü'anicü xehesüa  
 Verunave Papuru temüvanaqui'eri  
 vahamame. <sup>26</sup>Müme yutucari  
 meniyetuacaitüni Quesusi Cürisitu  
 Tati'aitüvamesüa memümiemetecü.  
<sup>27</sup>'Ayumiemicü tepüvarenü'a  
 Cura Siraxita. Müme yuniuquicü  
 yaxaicüa mepütexehecüatüani.  
<sup>28</sup>'Aixüa 'anemeta tepü'eriecai  
 tameri, 'Iyari Mütiyupata,  
 haheteme temücaxeti'icatüanicü,  
 'icü xeicüa que müreyeveese,  
<sup>29</sup>xemüca'icüacacü tita tetexi  
 memütexatüarie, xuriya, que  
 mü'ane mücaviyacame vaiyarieya,  
 xemücvacumaüvanicü que mü'ane  
 mücaxe'üya mücaxecüna. Xüca  
 mücü xeca'umayüani, 'aixüa  
 xepüyüaca. Müpaü xeicüa  
 cani'aneni.

<sup>30</sup>Meriçüsü müme memeyenü'ari  
 meniu'axüani 'Anutiyuquiyasie.  
 Mevarucuxeüriea  
 yunaimeniyetuan  
 xapa. <sup>31</sup>Me'itaterüvaca  
 mecaniyutemamaviecaitüni  
 'ivamarixi memütuicariecaicü.  
<sup>32</sup>Cura Siraxi  
 memütexaxatametetücaicü, vaüca

metecuxatatü menivatuicacaitüni  
 yu'ivama, menivaseiriyacaitüni.  
<sup>33</sup>Yapaümexa tucari me'uyurieca,  
 yu'ivama vahesüa menecüne  
 'aixüa metevaxeyatü. Müme  
 memüvareyenü'a vahesüa  
 meniu'axüani. <sup>34</sup>Siraxisietü  
 'aixüa tini'eriecaitüni mana  
 muyuhayevacü. <sup>35</sup>Papuru  
 Verunavematü mana  
 meniuhayevani 'Anutiyuquiyasie  
 mete'üquitatü Ti'aitame niuquieya,  
 metecuxatatü niuqui 'aixüa  
 manuyüne hipame yumüireme  
 vahamatü.

**Papuru 'icü'eirieca Verunave que  
 müretüa hutarieca ticuxatatü**

<sup>36</sup>Meriçüsü yapaümexa tucari  
 'anucayacu, Papuru müpaü  
 tinitahüave Verunave, Cümüsüari  
 hutarieca tepüyehu, ta'ivama  
 tepüva'ivatayu naime quiecaritiesie  
 haque temütecuxatacai  
 Ti'aitame niuquieya, parasü  
 que metecahu. <sup>37</sup>Verunave  
 nivitümücücaitüni Vani Maricuxi  
 mütitevacai. <sup>38</sup>Papururi müpaü  
 tinicü'erivacaitüni, 'aixüa  
 püca'anecai memenuvitünicü  
 que mü'ane müvarecu'eirie  
 Pamüpiriyasie, vahamatü  
 mücahetüa müti'uximayacacü.  
<sup>39</sup>'Ayumieme mepuyeha'a,  
 mepeutayeixüa. Verunave  
 Maricuxi havitütü naviyasie  
 petüa Sipürepai. <sup>40</sup>Papururi  
 'enuyexeyaca Siraxi caneyani.  
 Ta'ivama menihürütüani Ti'aitame  
 'aixüa mütiuca'iyarinicü müme  
 vahepaüsita. <sup>41</sup>Siriyasie Sirisiyasie  
 puyetüa vatuicatü müme memüyut  
 ixexeürivacai.

**Timuteu que müivateütacai  
Papuru Siraxi**

**16** Mericüsü Rerüve Risitüra caneta'ani. Mana pecatei tiyü'üquitüvame Timuteu titevatü. Varusieya Huriyu yuri müti'eriecai nihücütücaitüni, quemasieya Cüriyecu tihücütücai.

<sup>2</sup>Ivamarixi Risitüratari

Icuniyutari menihecüatacaitüni.

<sup>3</sup>Papuru pita'ini hamatüana müyemiecü. Ni'inüaritüani 'ixitetü Huriyusixi teüteriyari vayeiyari que maine, Huriyusixi muva memütamacai vacü, yunaitü memimaicaicü quemasieya mücüriyecutücaicü. <sup>4</sup>Mecu'uvatü quiecaritiesie menivahüritücaitüni yamemütecahunicü 'aisicasie que memüte'aitacai nü'arisixi 'uquiravesixi Querusaremetari.

<sup>5</sup>Memüyutixexeürivacai menitüicariecaitüni yuri mete'erietü. Tucarcü que memüyupaümecai metenimüiriyacaitüni.

**Papuru heinüsita que mütxei  
Maseruniyatanaca**

<sup>6</sup>Mericüsü Püriquiyasie Carasiya cuieyarisie meniuyecüne. 'Iyari Mütiyupata püvanenacai 'Asiyasie memücatecuxatanicü niuqui. <sup>7</sup>Misiya cuieyari tesita me'u'axüaca Vitiniyasie meneuyeyunequecaitüni. Quesusi 'Iyarieya yapücativarupitüa. <sup>8</sup>Misiya cuieyari tesita me'uyenexüaca mana meneucacüne Türuhasipai. <sup>9</sup>Yüvicüta heinüsita Papuru nixeiya 'uqui Maseruniyatanaca muva 'utiveme yativavirietü

müpaü 'utaitü, Qenanaye'a 'anataüye Maseruniyapai, quetaneparevieca. <sup>10</sup>Yuheinüsita 'ixeyacu cuitü tepicuvau que temüte'anucü necü 'anutaüye Maseruniyapai müpaü tete'umaica Cacaüyari müta'si'uta'inie temütevaretaxatüanicü niuqui 'aixüa manuyüne.

**Que memüte'anutaxüriya Piripusie**

<sup>11</sup>Mericüsü Türuhasi tehecüneca heiseriemecü tecaneta'axüani Samutürasiyasie, 'uxa'arieca Quiecarü Mühecuasiepai teneta'axüani, <sup>12</sup>arique Piripusiepai. Mücü quiecarü 'amüyeva nihücütücaitüni 'esimüyeyeu hesiena mütiyaya Maseruniya cuieyarisie. Xumatari canivacuruniyatücaitüni. Yapaümexa tucari teniuyurieni 'iya quiecarisie. <sup>13</sup>Uxipiya tucarisie tepanuyenexüa quiecarü tesie. Mana hatüa tesita mürayutinenevitüre 'uveme teni'eriecaitüni. Mana tetiyaxeca tenivarutaxatüani 'ucari mana memüyuxeürü. <sup>14</sup>Xevitü 'uca Ririya mütevevacai purupura 'ixuriquiyari mutuacai Tiyatira quiecarisie mieme meyexeyacai Cacaüyari, mücü pütasi'u'enie. Ti'aitame nivatiyepieni 'iyarieya mi'enienicü Papuru que mainecai.

<sup>15</sup>Mücü puca'üyarie, quiena quiecatarita. Hicü cataniuta'inieni müpaü 'utaitü, Xeme Ti'aitamesie yaneticamieme xüca xenesi'erieca, nequie xequeneu'axüaca, mana xequeneteni. Müpaü 'utaitü väriyarica cataniupitüani.

<sup>16</sup>Mericüsü mürayutinenevitüre tehecü necü, 'üimari väriyarica

müti'uximayacai catananucunaque.  
Xevitü cacaiyari pinücai  
mütimaicai que mütiyüniquecai  
'arique. Mücü ticuxatatü que  
mütiyüniquecai vaüca püti'ivacai  
yucusiyarima vahesie mieme.

<sup>17</sup>Mücü pütasi'uveyacai Papuru  
tameta. Putahivacai müpäü 'utaitü,  
Cacaiyari taheima macavesie  
mieme mepüte'uximaya 'icü 'uquisi.  
Mepütexetahecüasitüani huye  
xemütavicueisitüarienicü. <sup>18</sup>Müpäü  
tiniyuriencaitüni müixa tucari.  
Hicü puti'uxixü Papuru. Ta'aurie  
'aveca müpäü tinitahüave 'iya  
cacaiyari, Qesusi Cürisitusüa  
nemümiemecü nepümasita'aitüani,  
queneuxüna.

<sup>19</sup>Cuitü nixüna. Cusiyarimama  
me'uneniereca que müretüa  
cümama memüte'ivaniquecai,  
mepüvarutivi Papuru Siraxi.  
Quiecari hixüapa mepüvarehapa  
haque va'uquiyarima memacatei.

<sup>20</sup>Mevarevitüca püraheturisixi  
memü'isücatetücai vahesüa,  
müpäü meniutiyuani, 'Icü teüteri  
mepüvaxamurietüve tahesüa  
quiecatari. Mecanihuriyusixitüni.

<sup>21</sup>Mepihecüata tutuyari tame  
Xumatarü temücatauniva  
temitanaqui'erienü  
yatemüteyurienicü.

<sup>22</sup>Yunaitü meniycuxeürieni  
vahepäüsita. 'Isücate va'ixuriqui  
menivaranutihünirixüani.  
Meteniuta'aita memüteiveyanicü  
cüyecü. <sup>23</sup>Mevarutivaca  
vaüca, menivaranutaxürieni  
casariyanata. Menihürütüani  
'aixüa mütiva'üviyanicü tihüveme.

<sup>24</sup>Mücü 'aisica 'utanaqui'erieca  
nivaranutaxürieni mutapurupai.

Neiye'uitüani va'ücate  
tiyüxürüvamesie.

<sup>25</sup>Mericiüsü tücari  
hixüapa yacütütü Papuru  
Siraximatü meyunenevietü  
meninüavacaitüni Cacaiyari.  
Vahamatü memanutaxüriyacai  
meniva'eniecaitüni. <sup>26</sup>Yapaucua  
cuie carima niutayuani,  
casariyanatüa mieme tiutayua.  
Naitü quiteniete püreutenirixüa.  
Yunaime vatepüate canacaxürieni  
vamamasie va'ücatesie.

<sup>27</sup>Anutanierca tihüveme,  
'ixeyaca casariyana quitenie  
hatetenime, yucusira nivatihana  
yumienique, memanutaxüriyacai  
meyuta'unaxüame 'erietü.

<sup>28</sup>Papuru carima nitahivieni,  
Penücahürixüa peti'acuitüani  
rehüavetü, Tame tanaitü 'uva  
tecanayeteni haitü. <sup>29</sup>'Ita'aitüaca  
tai, 'utayüyüacatü, quita  
neutasuna. Pucave Papuru Siraxi  
vahetüa. <sup>30</sup>Tacua varanuyevitüca  
müpäü niutayüni, Neuxei, tita  
reuyevese yanemütiyurienicü  
nemütavicueisitüarienicü.

<sup>31</sup>Müme müpäü meniutiyuani,  
Yuri quetineuta'eri Ti'aitame  
Qesusisie, mücücü  
pecanitavicueisitüariemücü  
'ecüri, 'aqueie quiecatarita.

<sup>32</sup>Metenivacuxaxatüvacaitüni  
Cacaiyari niuquieya 'iya,  
yunaime quitana memüye'uvacai  
hamatüana. <sup>33</sup>Mücü nivarevitüni  
cuitü yüvicüta, nivarahauxixüani  
memaveyatücateisie. Yareutevitü  
mepuca'tiyarie 'iya, yunaitü  
hesüana miemete 'axeicüa.

<sup>34</sup>Yuque varevitüca mexasie  
'atinapini, yunaitü yuri

mete'uta'erieca Cacaüyarisie  
'axeicüa meniyutemamaviecaitüni.

<sup>35</sup>Hicü 'ucatarecu 'isücate  
yutupirisixi menivarenü'ani müpaü  
me'utiyuatü, Quenivarutixüna  
mücü teüteri. <sup>36</sup>Tihüveme  
nitahecüatüani Papuru 'icü  
niuqui hepäüsita, müpaü 'utaitü,  
'Isücate niuqui meneyenü'ani  
xemütixünarienicü. Hicüsüari  
xe'ayecüneme xequenehu  
xeca'uximatüarietü. <sup>37</sup>Papuru  
müpaü tinivarutahüave, Müme  
mepütasi'utiva yunaime vahüxie  
sepa 'isücame havai pücatatahüave,  
sepa temüxumanusixi.  
Mepütasi'anutaxüri. Caucasü  
hicü metasi'anuyenü'ani  
'avie. Tixaütütüri, 'uva  
meque'u'axüani, mümetütü  
mequetasi'anuyevitüni. <sup>38</sup>Tupirisixi  
metenivarutahecüatüani 'isücate  
que mütiuyü. Quepaucua  
memu'enana quename  
Xumanusixi mehümetücai,  
mepümamacai. <sup>39</sup>Me'u'axüaca  
menivanütüacucaitüni,  
mevaranuyevitüca  
menivarutavavirieni memüyehücü  
'iya quiecarisie. <sup>40</sup>Hicü casariyanata  
me'ayenexüaca Ririyasüa  
meniu'axüani. Mevaruxeiyaca  
yu'livamarixi menivatuicani  
menecüne.

**Tesarunicatari que  
memüteyuxamuriecai**

**17** Mericüsü 'Amipipurisie  
'Apuruniyasie me'uyecüneca  
meneta'axüani Tesarunicasiepai.  
Huriyusixi vatuqui mana  
niuvecaitüni. <sup>2</sup>Papuru que  
mütiyeyariefyatücai, vahesüa

neutahani, hairieca 'uxipiya  
tucarisie tinivacuxaxatüvacaitüni  
<sup>3</sup>'utüaricasie mieme vahecüatüatü  
vatuicatü quename reuyevecai  
'iya Cürisitu heiserie mupitüarie  
müticuinecü müquite vasata  
manucuquenicü, müpaü 'utaitü,  
'Icü nemüxehecüatüa, 'icü que  
mü'ane heiserie mupitüarie  
Cürisitu canihücütüni  
Quesusitütü. <sup>4</sup>Hipatü müme  
yuri meteniuta'erieni, Papurusie  
Siraxisie meteniuyiya. Yümüretü  
Cüriyecusixi memeyexeyacai  
Cacaüyari, yumüretü 'ucari  
ve'emetec mecanihümetücaitüni.  
<sup>5</sup>Huriyusixi yuri memücate'eriecai  
me'uxiva'atü menivaruta'inieni  
hipame 'axa memüteyuriecai  
quiecarari hixüapa memü'uvacai,  
mevaruxeüriecca yumüireme  
menivareutaxamuriexüani  
quiecatari. Casuni quie  
me'u'axüaca mepüvarutavaviri  
memüvaranuyevitünicü nü'arisixi  
quiecatari memüyuyexexeürivacai  
vahürüpa. <sup>6</sup>Mecavataxeiyavavetü,  
Casuni hipame 'ivamamata  
mepüvarahapa 'isücate vahüxie  
müpaü mete'uhivatü, 'Ime  
naisarie cuiepa memütama  
menivaxamurietüveni, 'uvata  
meniu'axüani. <sup>7</sup>Casuni  
nivarutanaqu'erieni. 'Ime  
yunaitü yamepücatecahu Sesaxi  
que müti'aita, meniutiyuani  
quename xevitü ti'aitametütü  
'a'uyeica Quesusitütü. <sup>8</sup>Müpaü  
me'utiyuatü menivamuinacaitüni  
yunaime memü'uvacai, 'isücateta  
memi'enie 'icü. <sup>9</sup>Casuni hipatüta  
meniuuetatüarieni 'uxa'atüni varie  
'asimücatiyünicü, meniutixünarieni.

**Papuru Siraximatü que  
memütecuxatacai Vereyasie**

<sup>10</sup>Mericusü cuitü yüvicüta  
teyü'üquitüvamate mepüvarenü'a  
Papuru Siraxi memüyehucü  
Vereyasiepai. Mana me'u'axüaca  
Huriyusixi vatuquita  
meneutahaxüani. <sup>11</sup>Mana  
memütamacai Huriyusixi  
yemecü 'aixüa mepüte'u'iyaricai,  
Tesarunicatari yamecate'u'iyaricacu.  
Menitanaqui'erieni niuqui  
vaüca meyuväriyatü. Tucarcü  
metenicuvautüvecaitüni 'utüarica  
xapayarisie siparasü xüca müpäü  
'aneniqueyu 'icü. <sup>12</sup>Yümüiretü  
müme yuri meteniuta'erieni.  
'Ucari memücüriyecusixitücai  
memüseüyecai, 'uquisita  
yuvaücavatü yuri mepüte'uta'erie.  
<sup>13</sup>Mericusü Huriyusixi  
Tesarunicatari metenetimani  
quename Papuru tihecüatacai  
Cacaiyari niuquieya Vereyasietä.  
Manarita menü'axüani  
mevacuyuitüvatü mevamuinatüvetü  
teüteri yumüireme. <sup>14</sup>Ivamarixi  
cuitü meneinü'ani Papuru  
haramara tesita müyemiecü. Siraxi  
Timuteu Vereyasie meniyuhayeva.  
<sup>15</sup>Müme memiteütacai Papuru  
meneivitüni 'Atenasiepai. Mana  
menitnuaxüani 'iya müpäü  
tivaruta'aitüacu, Siraxi Timuteu  
hesüana memü'axüanicü mexüüma.

**Papuru que mütiuyeicacai 'Atenasie**

<sup>16</sup>Mericusü Papuru  
vacuevietü 'Atenasie, yu'iyarisie  
niyühüavecaitüni müvaxeyacacü  
quiecatari tetexi me'ayexeyame  
yemecü. <sup>17</sup>Tuquita niuqui

nixüatüacaitüni Huriyusixi  
vahamatü, hipameta Cacaiyari  
memayexeyacai vahamatü.  
Quiecarixi hixüapata tucarcü niuqui  
nixüatüacaitüni mana memü'uvacai  
vahamatü. <sup>18</sup>Hipatü 'Epicureyusixi  
'Esituicusixi temaivavemete  
meniti'eiyarümeccaitüni. Hipatü  
müpäü meniutiyuanecaitüni,  
Titacuta raineniqueyu 'icü  
niuquivivame, hipatüta 'ipaü  
mete'utiyanecai, Süricüte  
cacaiyarixi xaüsie miemete  
nivahecciatani. Müpäü  
meniutiyuanecaitüni Papuru  
Quesusi müxatacacü, müquite  
que memüte'anucu'uni  
müticuxatacaicüta. <sup>19</sup>Meneivitüni  
'isücate 'Arexixi yemuriyarisie  
memüyuyexexeürivacai vahürüpa  
müpäü me'utiyuatü, Siparasü tame  
xüca teyüvaveni temeitimaniqueyu  
que mütitita 'icü 'üquisica mühecua  
pemüxata. <sup>20</sup>Xaüsie timieme  
pepütasi'atüiri tanacata. 'Ayumieme  
tecatenetimaniqueyu que  
maine 'icü. <sup>21</sup>'Atenatari yunaitü,  
cu'uvamete mana memü'ivatatüveta  
'asimepücateyuruva, tixaütü  
mütihecua mepütahüavicu  
mepüte'eniecu xeicüa.

<sup>22</sup>Hicü 'isücate vahixüata  
'üvetü 'Arexixi yemuriyarisie  
müpäü niutayüni Papuru, Neuxei  
'Atenatari, necanixexeyani  
xeme naimecü xevarayexeyame  
memanucuneniere. <sup>23</sup>'Uva  
necuyeicatü ne'i'ixüarietü tita  
xemüte'ayexeyia, neneitaxeyia  
mürayutimavatüre, hesiena  
mütiuti'utüari 'ipaü, CACAÜYARI  
TEMÜCAMATESIE PÜMIEME  
'ICÜ. Mericüte, que mü'ane

xemayexeiya xeca'imaitü, mücü  
nenixetaheciätüamücü ne.

<sup>24</sup>Mücü Cacaüyari mitivevi cuie,  
nai cuiepa mütimieme, mücü  
tini'aitani muyuavisie cuiepata.  
Mücü mamacü müveviyata  
püca'ayeca tuquita, <sup>25</sup>teüteri  
yumamacü mepüca'eyexeiya, tixaü  
mücareuyehüvacü. Mücütütü  
pütivamicua vatucari va'lya naime.

<sup>26</sup>Xeime tevi va'uquiyari  
'ayeitüaca, püvarutivevi yunaime  
nuivarite naisarie cuie manuniere  
memütamacü. Vatucarite  
meripai pucaye, vacuie 'inüariyari  
tiucaye <sup>27</sup>memicuvaunicü  
Cacaüyari siparasü mecumetüvetü  
memitaxeiyacü. Xüari mücü teva  
püca'uyeica taxexuime tahesüa.

<sup>28</sup>Iyasie teteviyatü tenayeneniereni  
tenicuyuaneni teniu'uvani, müpäü  
que memutiyuanepaü hipatü  
teyününüavamete xehesüa  
miemete, Tame hesiena tepüyecü,  
me'utiyuatü. <sup>29</sup>Mericiüte, xücasü  
hesiena teyecüne, 'aixüa püca'ane  
para müpäü temüte'ixeiyani  
hurupaü püratapaü tetepaü 'aneme,  
tevi veviyayapaü 'aneme, tita  
tevi mütiyücühüavepaü 'aneme.

<sup>30</sup>Mericiüsü Cacaüyari 'axa  
pücatixeiycacai tita memüteturiecai  
quepaucua 'asimemücatemaicai,  
peru hicüri püvaheciäsitüa  
yunaime teüteri naisarie  
memütama memütehayevanicü  
que memüteturie. <sup>31</sup>Xeime  
tucari pütüucaye müva'inüatanicü  
cuiepa memütama heiseriemecü  
yüanetü, 'iya 'uqui manuyexei  
yatiyuriencacu. Cacaüyari yuricü  
nivarutaheciätüani yunaime,  
'enucquetüaca 'iya müquite vasata.

<sup>32</sup>Hicü me'u'enanaca müquite  
que memüte'anucu'uni, hipatü  
meninanaimacaitüni, hipatüta  
müpaü meniutiyuani, Hutarieca  
tepümasi'enieni 'icü hepaüsita.  
<sup>33</sup>Hicü tiuhayevaca Papuru,  
vahixüata nayeneni. <sup>34</sup>Hipatü  
hesiena meteviyatü yuri  
meteniuta'erieni. Riyunisiyu  
mü'isücametücai 'Arexü  
yemuriyarisie miemetütüri, xevitü  
'uca Ramarisi mütitevacairi,  
hipatüri vahamatü yuri  
mepüte'eriecai.

#### Papuru que mütiuyeicacai Curinitusie

**18** 'Arique 'Atenasie heyeyaca  
Curinitusie neta'ani. <sup>2</sup>Muva  
neitaxeiyä xeime Huriyu 'Aquira  
mütitevacai Punitusie metinuivaxü  
yü'üitacame Pürisiramame. Xique  
punua 'Itariya cuieyarisie heyeyaca,  
Cürauriyu mütivaruta'aitüacü  
yunaime Huriyusixi memüyehucü  
Xumasie. Vahesie tiniuviya  
Papuru. <sup>3</sup>Vahepaü 'ivarica  
mexeiycacü, vahesüa niucateitüni,  
meteni'uximayacaitüni yuhamatü.  
Müme 'ixuriqui quiyari  
mecanivevivametetücaitüni.  
<sup>4</sup>Xexuime 'uxipiya tucarisie  
tuquita tinicuxatacaitüni,  
Huriyusixi Cüriyecusixi yuri  
tiniva'eritüamücücaitüni.

<sup>5</sup>Hicü Siraxi Timuteu  
meheyecünecu Maseruniyasie,  
me'u'axüacu, Papuru niuquicü  
'ayumiemetütü nayani,  
tivaheciätüatü Huriyusixi  
quename Qesusi hücü que  
mü'ane heiserie mupitüarie  
Cürisitütü. <sup>6</sup>Me'i'uxive'eriecacu



'axa me'utiyuanecacu müme,  
 Papuru yu'ixuriqui 'utacaseca  
 'inüari 'ayeitüaca, müpäü  
 tinivarutahüave, Xeme yuhesie  
 xepütehahüpa xüca xe'ucuini.  
 Ne püta nepü'itiya. Hicürixüa  
 memücahuriyusixi vahesüa  
 nepüyemie. <sup>7</sup>Muva 'ayeneca xeime  
 quie ninuani Cusitu mütitevacai  
 quiecame. Mücü neyexeyacaitüni  
 Cacaüyari. Quiena pehuracai tuqui.  
<sup>8</sup>Cürisipu tuqui va'üyaritütü yuri  
 tinita'eririeni Ti'aitame, yunaitü  
 quiena quiecatari hamatüana  
 yuri mete'uta'erita. Yümüretü  
 Curinitutari me'u'enanaca yuri  
 mepüte'uta'eri mepuca'üyarie.  
<sup>9</sup>Yüvicüta Ti'aitame müpäü  
 tinitahüave Papuru heinüsita,  
 Pepücamaca, masi quetinecuxatani,  
 cayuvatü pepücaticani. <sup>10</sup>Ne  
 'ahamatü 'anepuyeica, xevitü tixaü  
 pücamasiviya 'axa masiyurienique.  
 'Icü quiecarisie yuvaücavame teüteri  
 necanivarexeiyani. <sup>11</sup>Xei viyari  
 heimana 'ataxeime meseri mana  
 puyuriecai tiva'üquitütü Cacaüyari  
 niuquieya.

<sup>12</sup>Mericsü, Careuni  
 cani'isücametücaitüni, 'Aaiya  
 cuieyarisie mühürütüaricai.  
 Huriyusixi 'axeicüa mepuyuxeüri  
 Papuru mehecatü. Meneivitüni  
 'isücame 'uvenieya hüxie  
 haque müre'inüatacai <sup>13</sup>müpäü  
 me'utiyuatü, 'Icü yuri  
 tiniva'eritüaca teüteri Cacaüyari  
 memayexeyanicü 'inüari niuquiyari  
 que mücahaine. <sup>14</sup>Papuru  
 'esivatücacu pütaniuximecai, masi  
 Careuni müpäü tinivarutahüave  
 Huriyusixi, Neuxei Huriyusixi,  
 'icü xüca caheiserietünique

xüca cuamanaricatünique 'icü,  
 xasunimecü nepüxe'enieniqueyu  
 Huriyusixi. <sup>15</sup>Mesü xüca  
 xeniuquixieca niuqui hepaüsita  
 terüvarica hepaüsita xe'inüari  
 hepaüsita xeicüa, 'aixüa  
 xequeteneuyuri xemetütü. 'Isücame  
 nepüca'ayeimücü 'icü hepaüsita.  
<sup>16</sup>Nivaranuyenü'ani yuhüxie.  
<sup>17</sup>Müme yunaitü me'iviyaca  
 Susitenexi tuqui va'üyari  
 mühücütücai, meneicuvaxüani  
 'isücame 'uvenieya hüxie. Careuni  
 'asipücahainecai 'icü hepaüsita.

**Papuru que müreta'a  
 'Anutiuyuqiyasie, hairieca que  
 müreyetüa ticuxatanique**

<sup>18</sup>Mericsü Papuru müixa  
 tucari mana puyuhayevaxü.  
 Varutateütüaca yu'ivama Siriyasie  
 nanuyani naviyasie. Pürisira  
 'Aqira hamatüana menecüne.  
 Meripai müyühürütüacaicü,  
 'ayumieme Senicüreyasie  
 yumu'usie pucaxiri. <sup>19</sup>Hicü  
 'Epesusie meneta'axüani. Mana  
 nivarecu'eirieni Papuru. 'Iya tuquita  
 heutahaca niuqui nixüatücaitüni  
 Huriyusixi vahamatü. <sup>20</sup>Müme  
 menitavavirieni yapäumexa  
 tucari müyurienicü vahesüa,  
 perusü mücü pücayuvaüriyacai.  
<sup>21</sup>Nivaratateütüani masi müpäü  
 'utaitü, Yemecü neuyeveca  
 Querusareme nemü'ixüaramieni  
 'umamiesie. Hutarieca  
 neninuamücü xehesüa xüca müpäü  
 tinaqueni Cacaüyari. Hicü 'Epesusie  
 neyani. <sup>22</sup>Hicü Sesareypai nuaca,  
 heutiyuneca, nivavaüritüani  
 memüyutixexeürivacai, 'arique  
 'Anutiuyuqiyasie petüa.

<sup>23</sup>Yapaümexa mana 'uyurieca caneyani 'uyemietü Carasiya cuieyarisie Püriquiyasie yunaime teyü'üquitüvamete vatuicatü.

**'Apuruxi que müticuxatacai 'Epesusie**

<sup>24</sup>Merücüsü Huriyu teviyari 'aniuyeicacaitüni 'Apuruxi müтитеvacai Herecanitüreyasie metinuiavaxü. 'Epesusie caninuani. 'Aixüa pü'anecai niucamecü. 'Utüarica xapayaricü pütürücaüyecai. <sup>25</sup>Mücü Ti'aitame huyeya hepaüsita tiniuta'üquitüarieni. 'Aixüa 'iyaricü niyuvaüriyacaitüni. Tinicuxatacaitüni ti'üquitatü heiseriemecü Qesusi hepaüsita, sepa mütimaicai Vani que mütiü'üyacai xEICÜA. <sup>26</sup>Tuquita nisütüani ticuxatatü yutatuatü. Me'l'enioca Pürisira 'Aqira menita'inieni, heiseriemecü masi meteni'üquitüacaitüni Cacaüyari huyeya hepaüsita. <sup>27</sup>Mücü niyeimücücaitüni 'Acaiya cuieyarisie. 'Ivamarixi me'ituicatü metenivaruta'utüirieni teyü'üquitüvamete memitanaqui'erienicü. Henuca vaüca nivapareviecaitüni müme yuri memüte'uta'eri Cacaüyari 'aixüa tiuca'iyaricacu. <sup>28</sup>Yunaime vahüxie cuini mieme nivara'ivaxüani Huriyusixi yuniuquicü, 'utüarica xapayarisie tivaxeisitüatü quename que mü'ane heiserie mupitüarie Cürisitutütü, Qesusi hücütücai.

**Papuru que mütiuyeicacai 'Epesusie**

**19** Merücüsü 'Apuruxi Curinitusie 'uyeicacacu

cuxi, Papuru hürü 'utüa 'uyeyaca 'Epesusie neta'ani. Hipame nivaretaxeiya muva teyü'üquitüvamete. <sup>2</sup>Müpaü tinivarutahüave, 'Iyari Mütiyupata xete'utanaqui'eri yuri xete'uta'erieca. Mümesü müpaü metenitahüave, Masi tepüca'enanavave quename 'Iyari Mütiyupata xuave. <sup>3</sup>Mücü müpaü niutayüni, Mericüte, titasie xeteviyatü xete'uca'üyarie. Müme müpaü meniutiyuani, Vani que mütiü'üyacai tenuca'üyarieni tame. <sup>4</sup>Papuru müpaü niutayüni, Vani nivaruca'üyacaitüni metehayevacacu que memüteyuriecai, müpaü tivacuxaxatüvatü teüteri yuri memüteta'erienicü que mü'ane 'utümana 'umamiecaisie. Mücü Qesusi canihücütücaitüni Cürisitutütü. <sup>5</sup>Me'u'enanaca menuca'üyarieni Ti'aitame Qesususüa memiemetetütü. <sup>6</sup>Vaheima 'utimecu Papuru, 'Iyari Mütiyupata mehexeyatü mepacü. Niuquitecü meniutiniütüüne, Cacaüyarisie mieme metenicuxatacaitüni. <sup>7</sup>Yunaitü tamamata heimana yuhutatü yacütütü mepüyupaümecai 'uquisi. <sup>8</sup>Merücüsü haica meseri puyuriecai Huriyusixi teüteriyari vatuquita 'axetü, ticuxatatü camatü. Niuqui nixüatüacaitüni, yuri tiniva'eritüamücücaitüni, que müti'ane Cacaüyari ti'aitametücacu ticuxatatü. <sup>9</sup>Hipatü menisese'icaitüni. Yuri mecacateniuta'erieni, 'axa me'utiyuatü 'iya huye hepaüsita yumüireme vahüxie. Papuru

varucu'eirieca nivananuyevitüni teyü'üquitüvamete. Tucaricü Tiranu müti'üquitacaisie niuqui nixüatüacaitüni. <sup>10</sup>Müpaü tiniyuriencaitüni huta viyari. Yunaitü 'Asiyasie memütamacai Huriyusixi Cüriyecusixi meni'enieni Ti'aitame Qesusi niuquieya. <sup>11</sup>Mericusü 'inüari türücvime tiniyuriencaitüni Cacaüyari Papuru yatiyuriencacu, xaüsie müpaü mücatiuriencapaü. <sup>12</sup>Tecuicucate mepüvarahuririvacai tuvaxate peserate manacatütücatei Papuru. Mücücü yucuiniyacü mepanayexürüvecai, cacaüyarixi 'axa memü'anene mepüvarutixünaxü. <sup>13</sup>Hipatü cu'uvamete Huriyusixi cacaüyarixi memüvaranuyenü'avacai, müme menitixatatüüne Ti'aitame Qesusi, cacaüyarixi 'axa memü'anene memüvanücai teüteri vahepaüsita, müpaü me'utiyuatü, Ne nepüxe'aitüa Qesusisüa Papuru mitahecüatasüa nemümiemecü, me'utiyuatü. <sup>14</sup>Hicü Huriyu 'Isiqueva mütimevacai mara'acate memühürütüaricai vahesüa mümiemetücai, mücü 'atahutame nivarexeiyacaitüni yunivema müpaü memüteyuricai. <sup>15</sup>Hicü cacaüyari 'axa mü'ane müpaü tinivaruta'eiya, Qesusi nepümate, Papuruta nepetima. Xemesü que xepühatetütü. <sup>16</sup>Mücü tevi cacaüyari 'axa mü'ane miviyacai vaheima niutiveni, nivara'iva yunaime türücaüyetü. Mümesü memamavetü meheuxitequietücaitü meniyuta'una 'iya quita. <sup>17</sup>Yametenetimani que mütiyü

yunaitü Huriyusixi Cüriyecusixi 'Epesusie memütamacai. Cui menimamacaitüni yunaitü. Que mü'ane Ti'aitame Qesusi mühücü 'aixüa cuxasivatü nayani.

<sup>18</sup>Yümüiretü yuri memüte'uta'eri meniu'axüani meyumurucitüatü me'ihecüatatu yu'iquevari. <sup>19</sup>Yümüiretü müme memüteyunquevayametetücai, xapayari me'ucuxeürieca menititaiya yunaime vahüxie. Meniti'inüata 'axeicüa que müraye'arücai xapayari. Huta teviyari heimana tamamata miriyari pürata tuminiyari 'inüariyari naye'arücaitüni. <sup>20</sup>Müpaü tiyücu, Ti'aitame niuquieya türücaüyemecü niutumüire, caniutürücare. <sup>21</sup>Mericusü müya tiyücu, Papuru yu'iyarisie niyuvaüriya Maseruniyasie 'Acaiyasie 'uyeyame meta'anicü Querusaremesie, müpaü 'utaitü, Mana neheta'ayu, 'arique peuyevese nemixeiya Xumata. <sup>22</sup>Yuhutame 'iparevivamete Timuteu 'Erasitu varenü'aca Maseruniyasie, mücütütü 'acuxi 'apüreutevicai 'Asiyasie.

**Que memüteyuxamurie 'Epesutari**

<sup>23</sup>Mericusü 'ana vaücavamecü mepüyumuinacai teüteri 'iya huye hepaüsita. <sup>24</sup>Xevitü Remetüriyu mütimevacai püratavevivame mühücütücai, pürata cacaüyarixiyari püvaveviecai Riyanapaü tiyuxexeyame. 'Iya müpaü tiyurienetü vaüca 'ivarica nivapitüacaitüni tevivamete. <sup>25</sup>Hicü varucuxeürieca müme, vahepaü te'uximayatamete

vahamame, müpaü niutayüni,  
 Neuxei, xeme xecatenimaica tame  
 temüte'iva 'icü ta'uximayasicacü.  
<sup>26</sup>Müpaü xepütexeiya, müpaü  
 xepüte'enana, Papuru yuri  
 que mütiva'eritüa que  
 mütivarucunuitüa yumüireme  
 teüteri, 'ena 'Epesusie xeicüa  
 pücatixaü, masi naisarie 'Asiyasie  
 'esivatücacu. Müpaü tinicuxatani  
 'iya, müme mamacü memüveviya  
 cacaiyarixi memücahüme haitü.  
<sup>27</sup>Mücü meta, tita temütehexeiya  
 tame pücueriva'ane capa xüanacüa  
 'ayanicü. Masita, 'icü cacaiyari  
 mütürücaüye Riyana tuquieya,  
 tixaü catihücütüme cauca me'erieca  
 teüteri. Yunaitü 'Asiyatari, naisarie  
 cuiépa memütamata, que mü'ane  
 memayexeiya, 'icü türücariyaya  
 püca'unarieximeni.

<sup>28</sup>Hicü me'u'enanaca mepuyeha'a.  
 Meniutihivacaitüni müpaü  
 me'utiyaütü, Canitürücaüyeni  
 'Epesutari tacacaüyari Riyana.  
<sup>29</sup>Quiecarisie pühüncai  
 yuariyacü. 'Axeicüa mepecü  
 me'unausaxüaximetü xeurüpa,  
 mevarutiviyaca Cayu 'Arisitaricu  
 Maseruniyatari, Papuru  
 teütameteya memühümetücai.  
<sup>30</sup>Papuru nihamücücaitüni  
 haque quiecatari memeyuxeürrie,  
 peru teyü'üquitüvamete  
 mepüca'ipitüa. <sup>31</sup>Hipatü  
 'Asiya cuieyarisie quiecatari  
 va'uquiyarima, hamicumama  
 mehümetütü, metenetanü'ani  
 hesüana me'itavavirietü xeurüpa  
 mücamiecü. <sup>32</sup>Merücüsü hipatü  
 yücü mete'uhivatü hipatüta yücü  
 mete'uhivatü meniutihivacaitüni.  
 Mana xeicüa meniucuxeürrie

yunaitü, yumüiretü  
 'asimepücatemaicai titayari muva  
 memüte'u'axüa. <sup>33</sup>'Amemu'uvacai  
 vasata menenuyexeiya  
 Herecanituru, Huriyusixi  
 me'itaquecu vahüxie. Herecanituru  
 yumamacü varu'inüaritiüaca  
 nitaniumücücaitüni yuhesie  
 mieme memüyucuxeürri  
 vahüxie. <sup>34</sup>Meheitimaica  
 Huriyu mühücütücaicü, carima  
 meniutihivacaitüni 'axeicüa yunaitü  
 huta hurayari meyurietü müpaü  
 mete'uhivatü, Canitürücaüyeni  
 'Epesutari tacacaüyari Riyana.  
<sup>35</sup>Merücüsü quiecarisie mieme  
 sicürivanu vanütüatü müpaü  
 tinivarutahüave 'amemu'uvacai,  
 Neuxei 'Epesutari, haquevasü tevi  
 'asimücatimate quename 'Epesu  
 quiecatari Riyana mütürücaüye  
 vava'ütemama tehüme, Cupiterisüa  
 macane tete cacaiyariyari  
 vava'ütemama quename tehüme.  
<sup>36</sup>Merücüte, xüca müpaü 'aneni,  
 xüca cayuxamurieca 'icü niuqui,  
 neuyeveca cayuvatü xemütamarecü  
 xemücarucusixitünicü.  
<sup>37</sup>Xeniva'atüani 'icü 'uquisi,  
 sepa 'axa memücate'uyuri  
 tuqui hepaüsita, sepa 'axa  
 memücatecuxata xecacaüyari  
 hepaüsita. <sup>38</sup>'Ayumieme  
 Remetürüyu, tevevivamete  
 hamatüana memü'uva xüca tixaü  
 metehexeiya xeime hepaüsita,  
 tucari puxuave quepaucua 'isücate  
 'amemütiteni, müme cuiépa  
 memühürütüarie 'ameniu'uvani.  
 Mana mequehe'atüani yuxanesica.  
<sup>39</sup>Xücasü masi cuxi xetecuvauni,  
 'aixüa püyüni quepaucua quiecatari  
 memüyuxeürrie, 'inüari niuquiyari

que maine. <sup>40</sup>Hicümüsüari tepücueriva'aca capa tahesie rahüiyanicü cuya temüvevecü hicü, sepa mücareuyevecai. Tame tepücaüyüvave 'asitemütiyuani tahesie mieme 'icü xamuriyacü. <sup>41</sup>Müpaü 'utayüca nivananuyenü'ani memayuxeürie.

**Papuru que müretüa  
Maseruniyasie Cüresiyasie**

**20** Mericüsü yuariya heunuacu, Papuru yu'aurie nivarutahüave teyü'üquitüvamate. Vatuicaca varutateütüaca Maseruniypai neyani. <sup>2</sup>Muva 'uyemietü, nivatuicacaitüni väucavame niuquicü. 'Arique Cüresiya cuieyarisie neta'ani. <sup>3</sup>Haica meseri yuriecacu, Huriyusixi meniyu'enieni me'imienique quepauca Siriyapai müyemiecai. 'Ayumieme müpaü tiniyumaicaitüni Maseruniya püta muyeyunecü. <sup>4</sup>Asiyapai hamatüana meniu'uvacaitüni Supateri Vereyatanaca 'Arisitaricu Secunitu memütesarunicataritücai, Cayu Rerüvetanaca, Timuteu, Tiquicu Türupimumatü memü'asiyataritücai. <sup>5</sup>Müme mehaitütüaca metanecueviecaitüni Türuhasisiepai. <sup>6</sup>Tamesü Piripusie tecaneyecüne naviyasie, pa cacuxanariyame 'ixüarariyari 'anutiyacu. Vahesüa teneta'axüani Türuhasisie 'auxüme tucari 'anucayacu. Mana 'atahuta tucari tepuyuri.

**Papuru que mütivaruteütüa  
Türuhasitari varecu'ivatata**

<sup>7</sup>Mericüsü mexüacame tucari semanasie tenitacuxeürieni

pa temütitaracü. Papuru tinivacuxaxatüvacaitüni. 'Uxa'arieca müyemiecaicü, 'ayumieme 'apüreuterixü ticuxatatü tucari hixüapaque. <sup>8</sup>Väucava puti'ucai cüxemete qui taüta haicacüa heutitevacacu temütayexeüriesie. <sup>9</sup>Xevitü temaicü 'Euticu mütitevacai mana nacateitüni quitenie. Mücü neucuni yemecü. Papuru väuca ticuxatacacu, nayexüne cusutü, neucaveni haicame quiyarisie, müquitü niuticueiyani. <sup>10</sup>Anacayaca Papuru, heimana niuveni, niviya, müpaü niutayüni, Cayuvatü xepücayumuinani. 'Iyarieya 'upüyeca. <sup>11</sup>Hicü neutiyani Papuru. Pa 'utitaraca, he'inüataca 'icuai, mana tinicuxatacaitüni väucava. 'Atinecu tau caneyani. <sup>12</sup>Meni'atüani temaicü 'ayeniereme, mepütüicariecai väucava.

**Que memüteheta'axüa Miretusie,  
Türuhasisie meheyecüneca**

<sup>13</sup>Hicü tame naviyasie tepecü te'uhaitütüatü. 'Asunisie teneta'axüani. Mana tepenucunaquequecai. Papurumatü müpaü tetenipini. 'Iya yü'ücama neta'aniquecaitüni. <sup>14</sup>'Asunisie tasi'anucunaquecu, te'itanaqui'erieca naviyasie, Mitirenepai tenecüne. <sup>15</sup>Manata 'uxa'arieca tenecüne naviyasie teheta'axüanique Quiuxi hüxie, 'uxa'arieca Samusie tepeta'axüa, 'arique Turuquiriyu teheta'axüaca 'uxa'arieca Miretupai teneta'axüani. <sup>16</sup>Müpaü pütüyumaicai Papuru, temuyecünequecai 'Epesu 'aurie, tucari mücaurienicü 'Asiya

cuieyarisie. Niyumexüitiacaitüni xüca yüvenique Querusareme meyeicanicü 'ixüarari 'atahutarieca semanasie mieme 'aye'ayu.

**Miretusie que müticuxatacai  
Papuru vateutüatü**

<sup>17</sup>Hicü Miretusie 'ucaitü, retanü'aca 'Epesusie, nivarecu'inieni memüyutixexëürivacai va'uquiyarima. <sup>18</sup>Hesüana me'u'axüacu müpaü tinivarutahüave, Xeme xecatenimaica matüaripai nemunua 'Asiyasie, tucaricü que nemütiuyeicacai xehesüa. <sup>19</sup>Ti'aitamesie mieme netini'uximayacaitüni tixaü netihücütüme necane'erietü, ne'utasuatü, ne'inüasienetü, Huriyusixi que memüteyu'eniecai nehepaüsita. <sup>20</sup>Nepücanecu'imavacai, nepünevaüriyacai nemütixetahecüatüanicü tita müreyevecai, teüteri vahüxie xequitata netinixe'üquitüacaitüni püta. <sup>21</sup>Huriyusixi Cüriyecusixi müpaü nepütixetahecüatüacai xetehayevame que xemüteyurie Cacaüyarisie xemüteviyanicü, yuri xemüteta'erienicü Tati'aitüvame Qesusisie. <sup>22</sup>Hicüsüari ne Querusaresie nepüyemie ne'iyarisie väüriyarica nepitüarietü. 'Asinecacatinimaica que neme'itüarieni mana. <sup>23</sup>Ipaü xEICÜA nepütimate, 'Iyari Mütiyupata pünëtitahecüatüa xexuime quiecarisie, müpaü 'utaitü quename caunaritecü 'uximatüaricacü necueviya mana. <sup>24</sup>Sepanetü,

netucari raye'arücame nepüca'eri nehesie mieme. Nepinüniqueyu xEICÜA neyeiya nenetemavietü, nepinüniqueyu nehüritüaricacü Ti'aitame Qesusi que münëtiuhüritüa, nemütihecüatanicü niuqui 'aixüa manuyüne hepaüsita, Cacaüyari 'aixüa que mütiuca'iyari manuyüne hepaüsita.

<sup>25</sup>Hicümüsüari ne nepütimate hasuacuari nenierica xepücaxeiya yunaitü xeme xehesüa nemuyeicacai netihecüatätü que müti'ane Cacaüyari ti'aitametücacu.

<sup>26</sup>Ayumieme 'icü tucarisie necatinixe'utahecüatüani quename ne'itiya, quename ni xeime xuriyayacü necarahüviyarüva.

<sup>27</sup>Tixaü nepücanecu'imavacai, nepünevaüriyacai nemütixetaxatüanicü naime Cacaüyari mütisütüa.

<sup>28</sup>Xequeneyucuerivayurieca xeme, xequenivacuerivayurieca mümeta muxasi vacümana 'Iyari Mütiyupata xehüritüaricame müxe'ayeitüa, xemüva'üviyanicü müme yunaime Ti'aitamesüa miemete memüyutixexëüriva, 'iya müvarunanai yuxuriyacü. <sup>29</sup>Nesü necatinimaica neyemieyu 'arique 'üravesixi xesata meneutahaxüacuni teyu'uximatüvamete.

Mepüca vahayeva muxasi.

<sup>30</sup>Uquisi xesata menanucu'uicuni tutunimecü me'utiniütü, yu'utüma memüvarahapanacü teyu'üquitüvamete. <sup>31</sup>Ayumieme xequenayeneniereni, xequena'erivani haica viyari tucaricü tucaricü que nemücatinehayevacai nexecu'imaiyatü yuxexuime, ne'utasuatü.

<sup>32</sup>Hicürixüa xehepaüsita  
nenihürütüani Cacaüyariri,  
niuquiyarita. Mücü niuqui  
quename 'aixüa tiuca'iyari  
manuyüne, mücü caniyüveni  
müxeseiriyani, müxepitüani xehesie  
mütinaquenicü yunaime Cacaüyari  
müvarupataxü yuhesie mieme,  
müme vahesie que mütinaqueni.

<sup>33</sup>Ne xeime tuminieya püratu huru  
'ixuriquieyata nepüca'ihive'eririecai.

<sup>34</sup>Masi xeme xecatenimaica 'icü  
nemamacü nepütinepitüacai  
tita nemüreyehüacai ne,  
nehamatü memü'uvacai  
tita memüteheuyehüacai  
nepütivapitüacaita. <sup>35</sup>Neheyemecü  
netinixehēcūatüacaitüni  
müpaü xete'uximayatatü  
xemüvaparevienicü müme  
memücatürücavi, xeme  
xema'erivanicü Ti'aitame Quesusi  
niuquieya que mutayü, Que  
mü'ane mütiyumicua yemecü  
caniyutemavieca, que mü'ane  
mütimiquie 'esiva xEICüa  
caniyutemavieca.

<sup>36</sup>Hicü müpaü 'utayüca,  
'utitunumaqueca, yunaime  
vahamatü niyutanenevieneni.

<sup>37</sup>Yunaitü vaüca  
meniutisuanacaitüni. Cüipleyasie  
me'acavütü meni'iseni

<sup>38</sup>meyuhiverietücaiti  
yeme niuquieyacu que  
maineacai, quename niericaya  
mecaxeyaniquecai tavari.  
Meneiteüta naviyasiepai.

**Papuru que müreta'a  
Querusaremesie**

**21** Hicü tevarutateutüaca  
tenecüne. Heiseriemecü

te'u'uvatü naviyasie Cuhusipai  
teneta'axüani, 'uxa'arieca  
Ruraxisiepai, 'arique Patarasiepai  
teneta'axüani. <sup>2</sup>Mana tepeitaxeiyaca  
naviya Penisiyasie muyeyunequecai.  
Te'acayaxeca tenecüne. <sup>3</sup>Te'ixeyaca  
Sipüre, ta'utata teheicu'eirieca,  
Siriyasie teneta'axüani. Mana  
Tirusie teniuyeyunüani naviya  
mana müti'icapiyaniquecaicü.

<sup>4</sup>Tevaretaxeiyaca  
teyü'üquitüvamete, 'atahuta  
tucari teniuyurieni mana.  
'Iyari müpaü tiva'üquitüacacu  
müpaü metenitahüave  
Papuru müca'uyeyanicü  
Querusaremepaitü. <sup>5</sup>Yapaümexa  
tucari 'anucayacu, te'ayenexüaca  
tenecüne. Yunaitü 'ucarita  
türita mepütasi'uvitüximecai  
quiecarie tesiepai. Mana ha tesita  
te'utitunuma'uca, tetatanenevieca,  
<sup>6</sup>tenitatateutüaxüani. Tame mücü  
naviyasie tepacayaxixü, mümesü  
yuquiecarisie meniucunuaxüani.

<sup>7</sup>Tirusie teheyecüneca mücü  
naviyasie, tavari tenecüne.  
Turemaira tecaneta'axüani. Mana  
tevarutavaürütüaca 'ivamarixi,  
xei叔ari tepuyuri vahesüa.  
<sup>8</sup>Teheyecüneca Papurumatü  
temü'uvacai, 'uxa'arieca Sesareya  
teneta'axüani. Piripe niuqui 'aixüa  
manuyüncü mütixaxatametücai,  
mücü quita teheutahaxüaca  
hesüana tenitahayeva. 'Iya xevitü  
canihücütücaitüni 'atahutame  
vasata. <sup>9</sup>Yunaucame yunivema  
püvarexeiyacai 'üimarixi  
texaxatamete. <sup>10</sup>Hicü yapaümexa  
tucari te'uyuriecu, xevitü muva  
nacaneni Cureyasie heyeyaca,  
tixaxatametütü Hacapu

mütitevacai. <sup>11</sup>Tahesüa nuaca, Papuru hüyameya 'uviyaca, yü'licate yumamate niutihüani müpäü 'utaitü, 'Iyari Mütiyupata müpäü paine, 'icü hüyame cusiyarieya, 'ipäü meteneihüacuni Huriyusixi Querusaremesie. Menivayetuiriecuni müme memücahuriyusixi. <sup>12</sup>Te'l'enieca 'icü, tame quiecatari vahamatü tenitavavirieni Querusaremepai müca'uyeyanicü. <sup>13</sup>Papuru müpäü tatiniuta'eiya, Titari xeteyurie xe'utisuatü ne'iyari xeveranariyatü. Ne nepüha'arisi Querusaremesie nemühüyanicü, masi nemümünicü Ti'aitame Quesusisüa nemümiemecü. <sup>14</sup>Ca'ucunuitüariecu cayuvatü tepumacai, müpäü te'utiyuatü, Mericüte, yaquetiyüni que mütinaque Ti'aitame.

<sup>15</sup>Mericüsü yapäumexa tucari 'utixücu tetacuha'aritüaca Querusaremesie teneutiyune.

<sup>16</sup>Teyü'üquitüvamate Sesareyasie miemete hipatü tahamatü mepu'uvacai xeime mehavitütü Münasunitüme. Mücü Sipüretanaca tiyü'üquitüvame canihücütücaitüni matüaripai mieme. Mana hesüana tepütahayevaquecai.

#### **Papuru Cacuvu que mütiutavaüritüa**

<sup>17</sup>Mericüsü Querusaremesie teheta'axüacu, 'ivamarixi metaniutanaqui'erieni meyutemamavietü. <sup>18</sup>Uxa'arieca Papuru Cacuvusüa neutahani tahamatü. Hesüana meniu'uvacaitüni va'uquiyarima yunaitü. <sup>19</sup>Varutavaüritüaca tinivahecüatücaitüni naime que mütiühütüariecai hepaüsita

xexuime que mütiuyuri Cacäyari nuivarite vasata.

<sup>20</sup>Müme me'u'enanaca 'aixüa meniutiyuanecaitüni Cacäyari hepaüsita. Müpäü metenitahüave, Neuxei ta'iva, pecanivaxeyaveni quepäümeme miriyari Huriyusixi yuri memüte'erie. Yunaitü yemecü mepüteviya yu'inüari niuquiyarisie. <sup>21</sup>Müpäü mepütecühüavarüva 'ahepaüsita, quename yapeti'üquitane yunaitü Huriyusixi nuivarite vasata memütama yamemücatecahunicü Muisexi niuquieyasie pe'utaitü vaniu, yape'utaitüta vaniu memücava'inüaritüanicü yütüriyama xitequiyacü, yututuyarisie yamemücatecahunicü vaniu. <sup>22</sup>Queteri 'aneni.

Yümüretü xüari mepüyuxeürieni. Mepü'enanani pemunua.

<sup>23</sup>Mericüte, 'ipäü quetineuyuri que temümatecühüave. 'Uva tasata mepu'uva 'uquisi yunaucatü, paye'axime memüyuxünacü que memütüyühütüacai.

<sup>24</sup>Qenivaranuvitüqui, queneu'a'itieca vahamatü, quetineu'atua vacüpa mücaxirienicü 'inüari mayanicü vatucari maye'acü. Müpäü petiyurieyu yunaitü mecatenimaica tixaü mücatihücü que memütecühüavarüva 'ahepaüsita, masi 'inüari niuquiyarisie yapeticamietü 'apemuyeica.

<sup>25</sup>Mümesü memücahuriyusixi yuri memüte'uta'erie, niuqui tepüvarenü'airi teva'aitüatü müpäü 'anenemesie yamemücatecahunicü, masi memüca'icucacü tita tetexi memütexatüarie, xuriya,



caviyacame, que mü'ane mücayü'üya mücayücüna memücavacumaüvanicü.

**Papuru que mütiuviyarie tuquita**

<sup>26</sup>Hicü 'uxa'arieca Papuru nivarevitüni müme 'uquisi. Vahamatü neutahani tuquita yu'itieca, müpäü tihecüatatü quename tucari 'aye'a memuyu'iti, yuxexuime vamavari mexi ca'atüarievecai.

<sup>27</sup>Mericsü 'atahuta tucari 'aye'aximecacu, Huriyusixi 'Asiyasie miemete me'ixeyaca Papuru tuquita, menivarutamaina yunaime muva memu'uvacai. Meniviya <sup>28</sup>müpäü me'utihivatü, Xequetaneuparevi 'Ixaherisixi.

'Icü tevi canihücütüni que mü'ane tateüterima vahepäüsita 'inüari niuquiyari hepäüsitata 'icü 'ena hepäüsitata 'axa mütiva'üquitüa yunaime naisarie. Hicüri Cüriyecusixi 'uva nivaratavitüni tuquita, 'icü 'ena Cacaüyarisie mieme müracupasie caniuseviximani.

<sup>29</sup>Meripai mepixeyacai Türupimu 'Epesutanaca hamatüana 'uyeicame quiecarisie. Papuru tuquita hetavitüme mepü'eriecai.

<sup>30</sup>Yunaitü quiecatari meputayua. Teüteri me'unausaxüaximetü meniu'axüani. Me'iviyaca Papuru, menenuyehana tuqui tacua. Yapaucua 'itupariyari neunarixüani.

<sup>31</sup>Hicü me'imieccacu, niuqui nenuani xei miriyari cuyaxi tiva'aitüvamesüa quename yunaitü Querusareme quiecatari metemuinatüvecai. <sup>32</sup>Cuitü cuyaxi varevitüca, xei sienituyari cuyaxi

teva'aitüvamate varevitücata, mücü mana niutanausa vahesüa. Teüteri mevaruxeyaca cuyaxi tiva'aitüvame, cuyaxirita, meteniuhayeva me'icuvayatü Papuru. <sup>33</sup>'Aura 'ayaca cuyaxi va'uquiyari, niiviya. Tiniuta'aita memihüanicü huta tepüayaricü. Nivaruta'ivaviya que müpaicütücai que mütiuyuri. <sup>34</sup>Hipatü yücü meteniuhivacaitüni, hipatüta yücü mete'uhivacai. 'Asimüicaretimaivecaicü heiseriemecü müme memutihivacaicü, 'ayumieme nivaruta'aitüani memenuvitünicü cuyaxi vaqui. <sup>35</sup>'Imumuitüa me'u'axüaca, püreuyevecai cuyaxi me'enuyevietü memenuhanacü vaüriyarica, teüteri memüsaipünecaicü. <sup>36</sup>Yümüiretü meniveiyacaitüni, Queneumi'a mete'uhivatü.

**Papuru yuhesie mieme que mütiutaniu teüteri vahüxie**

<sup>37</sup>Hicü meheutahaxüaximecacu cuyaxi vaquita, Papuru müpäü tinitahüave cuyaxi tiva'aitüvame, Catiyüve nemasitahüave. 'Iya müpäü niutayüni, Que petiniuve 'ecü Cüriyecusixi vaniuquicü 'acu. <sup>38</sup>'Iya 'Equipitutanaca pecatihücü meripai cuya matüa, 'uma macumavesiepaitü müvarevitü navaxa'üvemete nauca miriyari meyupaümeme. <sup>39</sup>Papuru müpäü tinitahüave, Nesü necanihuriyütüni, necanitarusutanacatüni Sirisiya cuieyarisie nemiemetütü, quiecarie 'amüyevasio necaniquiecametüni. Hicü nepümasivaviri, queneneupitüa

nemütivataxatüanicü  
teüteri. <sup>40</sup>Ipitüacu, Papuru  
'imumisie 'utivetü yumamacü  
nivaru'inüaritüani teüteri.  
Cayuvatü me'utamarecu yeme,  
Hepürayusixi vaniuquicü  
niutaniuni, müpaü 'utaitü,

**22** Neuxei 'ivamarixi  
'uquiyarimata.

Xequenene'enieca nehesie mieme  
que nemütitaniuni hicü xehüxie.

<sup>2</sup>Hicü me'l'enieca Hepürayusixi  
vaniuquicü ticuxatame, masi  
cayuvatü mepumacai. Müpaü  
niutayüni,

<sup>3</sup>Ne necanihuriyutüni. Tarusisie  
Sirisiya cuieyarisie nenetinuiva.  
Neniutavere 'icü quiecarisie  
Camarierisüa netine'üquitüatü  
heiseriemecü tatevarima  
va'inüari niuquiyari hepaüsita. Ne  
neheyemecü nepü'ayumiemetücai  
Cacaüyari hepaüsita, xehepaü 'icü  
tucarisie xemü'ayumiemetepaü.

<sup>4</sup>Icü huyeta miemete  
nepüvareutaveiyaxüa nevacuinique.  
Nepüvarutihüa, netivaranutaxüri  
'uquisi 'ucari. <sup>5</sup>Mara'acame  
mühürütüarie, ta'uquiyarimata  
yamepüneteheciata. Mümeri  
menesi'uhuritüacu xapa ta'ivama  
vahesie mieme, noneyani  
Ramasicusie nevaravitünique  
Querusaremesie mehüatücaime  
müme mana memecü,  
memanutaxüriyanicü.

**Papuru ta'aurie que mürave, que  
müticuxatacai**

*(Nü'arisixi 9:1-19; 26:12-18)*

<sup>6</sup>Mericusü ne'uyemiecacu,  
Ramasicu 'aurie ne'aye'aximecacu,  
yapaucua tuca taheima mieme

hecüariya niucumerüca ne'aurie.

<sup>7</sup>Cuiepa nenativeni. Xeime  
nepu'eni müpaü müneretahüavixü,  
Sauru 'acu, Sauru, titayari  
penetiuveiya. <sup>8</sup>Nesü müpaü  
netinita'eiya, 'Uqui que pepüpaicü  
'ecü. 'Iya müpaü netiniutahüave, Ne  
necaniquesusitüni Nasaretitanaca  
pemünesi'uveyiya. <sup>9</sup>Nehamatü  
memu'uvacai hecüariya  
menixeiyacaitüni meniutimama.  
Mepüca'l'eniecai que mü'ane  
müneticühüavecai. <sup>10</sup>Ne müpaü  
neniutayüni, Que netiyurieni  
ne Ti'aitame. Ti'aitame müpaü  
pünetiutahüavixü, Quenanucuquexi,  
Ramasicusie quenemie. Manari  
yapepütitahüavarieni naima que  
müti'aisie yapemütiyurienenicü.  
<sup>11</sup>Nepütauruxiecai xavatüricü.  
Müme nehamatü memu'uvacai  
menesi'ahanacacu, neninuani  
Ramasicusie.

<sup>12</sup>Mericusü xevitü Hananiya  
mütitevacai mana peyeicacai  
'uquitütü 'aixüa yamüticamiecai  
'inüari niuquiyarisie. Yunaitü  
Huriyusixi muva memütamacai  
meniheciatacaitüni. <sup>13</sup>Hicü  
nehesüa nuaca, mana 'utivetü,  
müpaü pünetiutahüavixü, Ne'iva  
Sauru, quenanutanieri. 'Anatütü  
ne'anutanierieca nenixeiya. <sup>14</sup>Mücü  
müpaü niutayüni, Tatevarima  
vacacaüyari matüaripai  
camananuyexieya yapemütimanicü  
tita mütinaque, 'iya Heiserie  
Mexieya pemüxeiyanicü, niuquieya  
pemü'enienicü 'utaniucame. <sup>15</sup>Que  
pemütiunierixü que pemütieu'anaxü  
yapecatinivahecüatüamücü  
yunaime teüteri. <sup>16</sup>Hicümüsüari,  
titayari petita'icuevani.

Quenanucuquexi, queneuca'üiyari,  
tita 'axa pemütiuyuri  
quene'ahauxina pehehüavetü que  
mü'ane mühücü.

**Papuru que mürenü'arie  
memücahuriyusixi vahesüa**

<sup>17</sup>Mericsü Querusareme  
nenuaca, tuqui curaruyarita  
nenenenevietü, heinüsipäu  
'aneme neniuxeiya. <sup>18</sup>Nenixeiya  
Ti'aitame müpäü neticühüaveme,  
Quene'amexüitüaca, Querusareme  
quenayeye'a, memüca'itanaqui'ericü  
'aniuqui que pemütiheciata  
nehapaüsita. <sup>19</sup>Nesü müpäü  
necaniutayüni, Ti'aitame,  
müme mecatenimaica ne que  
nemüticuyeicacai tuquiteta  
nevaranutaxürüvatü nevahüatü  
müme yuri memüte'eriecai  
'ahesie. <sup>20</sup>Mücü meta, quepaucua  
'Esitevani xuriyaya mutaxüri  
'ahepaüsita mütiheciatacai, ne  
'aneputivecai ne'iyari ya'anecacu,  
ne'ihütü müme memimieniquecai  
va'ixuriquite. <sup>21</sup>Mücü müpäü  
pünetiutahüavixü, Quenemiesü,  
tevpai necamananunü'amücü  
memücahuriyusixi vahesüa.

**Cuyaxi tiva'aitüvame  
que mütiivi Papuru**

<sup>22</sup>Mericsü teüteri  
meni'eniecaitüni 'iya niuquique,  
perusü 'ana carima meputihivaxü  
müpäü me'utiyuatü, Queneumi'a,  
cüepa püca'uyeicani que  
mü'ane müpäü mütiyuriene.  
'Aixüa cacani'aneni 'ayenieretü  
müyuhayeva. <sup>23</sup>Me'utihivacacu  
yu'ixuriqui 'itüata mehevivacacu  
tumuanari me'uti'enisitüvacacu,

<sup>24</sup>cuyaxi tiva'aitüvame tiniuta'aita  
manuvitüquienicü cuyaxi vaquita,  
müpäü 'utaitü, Tepita'inüata  
'aruvasini 'icuvaxüayu,  
yanemüretimanicü titayari müya  
mete'uhivacai hepaüsitana. <sup>25</sup>Mexi  
me'enutihanacai navicü quita,  
Papuru müpäü tinitahüave xei  
sienituyari cuyaxi tiva'aitüvame  
mana 'utivecacu, Que xetetauniva  
xemicuvaxüani tevi Xumasie  
müquiecame ca'itahüavivecacu  
'isücame. <sup>26</sup>Xei sienituyari  
tiva'aitüvame 'u'enaca, xei  
miriyari tiva'aitüvamesüa  
neyani. Tiniutaheciata müpäü  
'utaitü, Que petiyuriemücü. 'Icü  
tevi Xuma caniquiecametüni.  
<sup>27</sup>Nuaca xei miriyari cuyaxi  
tiva'aitüvame, müpäü tinitahüave,  
Yaquenetineutahüavi, 'ecü  
Xuma petiquiecame. 'Iya, Hü,  
niutayüni. <sup>28</sup>Cuyaxi tiva'aitüvame  
müpäü tinita'eiya, Cari ne vaüca  
netinetuaca quiecame nepatüa.  
Papuru müpäü tinitahüave, Nesü  
müpäü ne' Janetü nenetinuiva.  
<sup>29</sup>'Ayumieme yapaucua  
hesüana menecüne müme  
memita'inüataquecai. Xei miriyari  
cuyaxi tiva'aitüvame nimacaitüni  
yamüretimacü quename Xuma  
quiecame hücütücai, quename  
'ihüacai.

**'Isücate que memüte'ita'ivaviyaxü  
Papuru**

<sup>30</sup>Hicü 'uxa'arieca heiseriemecü  
tinimaimücücäitüni titayari  
Huriyusixi meteniuquixiecai  
hepaüsitana. Pixünaxü,  
tinivaruta'aitüani  
memüyucuxeürienicü mara'acate

memühürütüariecai 'isücate yunaitü.  
Heivitüca Papuru, vahüxi nitaqueni.

**23** Hicü Papuru varuxeiyaca  
'isücate, müpaü  
niutayüni, Ne'ivamarixi, ne'iyari  
'aixüa 'anecacu canesitate'acacu  
'aneniuyeicani Cacaüyari hüxie  
meripai hicü cuxi. <sup>2</sup>Hicü Hananiya  
mara'acametütü mühürütüariecai  
tinivaruta'aitüani müme 'auriena  
memütü'ucai teniena memitavanicü.  
<sup>3</sup>Hicü Papuru müpaü tinitahüave,  
Cacaüyari pümasivani 'ecüta, que  
pemütimasiücü yapepüca'ane  
'ixumari münaximapaü. 'Ecü  
'apecanacani penesi'inüatanetü  
'inüari niuquiyari que maine,  
masi 'inüari mücahainepaü püta  
pepütü'aita nemüveiyanicü. <sup>4</sup>Mana  
memu'uvacai müpaü meniutiyuani,  
Tietüsü pe'itateni Cacaüyari  
mara'acameya mühürütüarie.  
<sup>5</sup>Papuru müpaü niutayüni,  
Ne'ivama, 'asinepücatimaicai  
mara'acame mühürütüarie  
mühücücü. Müpaü pütü'utüarie,  
'Axa pepüca'utaineni 'ateüterima  
tiva'aitüvame hepaüsita.

<sup>6</sup>Merücüsü retimaica  
Papuru hixüata me'atü  
memüsaruseusixitücai hixüata  
me'atü memüpareseusixitücai,  
'isücate vahüxie müpaü tiniuhiva,  
Ne'ivamarixi ne necanipareseutüni,  
Pareseu nepünü'aya.  
Yanetita'icuevatü yuri nemütü'eriecü  
quename müquite me'anucu'uni,  
'ayumieme nepü'inüasie. <sup>7</sup>Mexi  
cuxi 'utaniuca, Pareseusixi  
Saruseusixi meniuticuitüüne.  
'Amemu'uvacai hixüata meniyusana.  
<sup>8</sup>Saruseusixi müpaü meputiyuane  
quename müquite meca'anucu'uni,

quename niuqui tuayamete  
tixaü mecatehüme, quename  
'iyari tixaü catihücü. Pareseusixi  
yamecani'aneneni naimecü. <sup>9</sup>Hicü  
carima meniutihiva. Me'anucu'uca  
hipatü 'inüari niuquiyaricü  
memüte'üquitametetücai  
Pareseusixi vahesie memüteviyacai,  
meniuticuitüüne müpaü  
me'utiyuatü, Tame tixaütü  
tepücate'ucaxei 'axa ti'aneme  
'icü tevi hepaüsita. Tietüsü 'iyari  
'itahüave niuqui tuayame nusu.  
<sup>10</sup>Utümüirecu 'imieri, xei miriyari  
cuyaxi tiva'aitüvame nimacaitüni  
capa hixüata me'isanacü Papuru.  
Tinivaruta'aitüani yucuyaxima  
memeutacü necü, memiviyacü  
vasata, memenuvitünicü cuyaxi  
vaquita.

<sup>11</sup>Uxa'arieca yüvicüta  
Ti'aitame 'auriena 'utivetü  
müpaü niutayüni, Pepücamaca  
Papuru. Que pemünetihecüatacái  
Querusaremesie, müpaü  
tineuyeveca pemünetihecüatanicü  
Xumasieta.

#### Que memüte'imieniquecai Papuru

<sup>12</sup>Merücüsü 'atinecu tau,  
Huriyusixi hipatü meniyu'enieni.  
Meniyühürütüani müpaü  
me'utiyuatü, Tepüca'anuhareni  
tepücatecuaca te'imimeque  
Papuru. <sup>13</sup>Huta teviyari  
meyupaümetü yacütünüquetü  
müpaü meteniyühürütüacaitüni.  
<sup>14</sup>Mara'acate memühürütüariecai  
vahesüa yu'uquiyarima vahesüa  
me'u'axüaca müpaü meniutiyuani,  
Tame müpaü tepüte'utahürütüa,  
tixaütü tepücateha'inüatani  
Papuru temiemeque. <sup>15</sup>Hicü

'ayumieme xeme 'isücate vahamatü yaxequeteneutahüavi xei miriyari cuyaxi tiva'aitüvame xehesüa mevitünicü, 'aixüa 'anemecü masi xemütetimanicü hepaüsitana yacütüniquetü. Tame canuavecacu cuxi 'uma tenetaha'aritüaca temimienicü.

<sup>16</sup>Mericsü Papuru masuya niu'ena que memüte'imieniquecai. Mana nuaca, cuyaxi vaquita heutahaca, tinitaxatüani Papuru. <sup>17</sup>Papuru yu'aurie 'itahüaveca xei sienituyari cuyaxi teva'aitüvamate xeime, müpaü niutayüni, 'Icü temaicü quenanutitüqui xei miriyari cuyaxi tixe'aitüvamesüa. Tixaü pürexeyia yamütitahüavecü. <sup>18</sup>Iya caneivitüni xei miriyari tiva'aitüvame hüxie. Müpaü niutayüni, Papuru manutahüiya yu'aurie nesi'utahüaveca pünesi'utavaviri 'ahüxie nemenuvitünicü 'icü temaicü. Tixaütü niu pürexeyia yamümatitahüavecü. <sup>19</sup>Xei miriyari cuyaxi tiva'aitüvame tiviereca mamayasie vatipai yühüciate mematitei neihana müpaü ticu'ivaviyatü, Que titita pemeixeyia yapemüneticühüave. <sup>20</sup>Mücü müpaü niutayüni, Huriyusixi mepuyu'enie. Mepümasitavavirieni 'uxa'a pemenuvitünicü Papuru 'isücate vahesüa, heiseriemecü memütemaicacü hepaüsitana yacütütü. <sup>21</sup>'Ecü pepücava'enieni. Huta tevyari yacütütü 'uquisi vahesüa miemete mepicuevie. Müpaü mepüte'uyühürütü memücatecuacacü memüca'anuharenicü

me'imiemeque. Hicü meniyuha'aritüaca memasicuevietü pemü'avaüriyanicü. <sup>22</sup>Hicü xei miriyari tiva'aitüvame neini'ani temaicü müpaü ti'aitüaca, Tixaü xeime pepücaraxaxatüvani 'icü hepaüsita que pemünetiutahecüatüa.

**Papuru que mürenü'arie  
Perixi mü'isücomesüa**

<sup>23</sup>Mericsü yu'aurie varutahüaveca xei sienituyari cuyaxi teva'aitüvamate yuhutame, müpaü niutayüni, Xequenivarucuha'aritüaca huta sienituyari cuyaxi, cavayasie memayaxivave haica tevyari heimana tamamata, 'ixipara vivamate huta sienituyari vahamame, Sesareyasie memüyehucü haica hurayari 'aye'ayu yüvicüta. <sup>24</sup>Cavayasixi xequenivarexeyia, Papuru me'anuhanatü memivicueisitüanicü Perixi mü'isücomesüa. <sup>25</sup>Xapa nita'utüirieni 'ipaü 'utaineme, <sup>26</sup>Ne Cürauriyu Risixiyi nepümasivaüritüa 'isücame pemütürücaüye Perixi. <sup>27</sup>Huriyusixi meniviya 'icü tevi, 'esivatücacu menimieni. Yanetiumaica, cuyaxi vahamatü nepiviya, nemüretimacü Xuma müquiecamecü. <sup>28</sup>Netimaimütü titayari meteniuquixiecai hepaüsitana, nenevitüni va'isücate vahesüa. <sup>29</sup>Nepüvaretaxei meniuquixiecame que maine va'inüari niuquiyari hepaüsita. Tixaü 'asipücati'anecai hesiena mürähüiyani mümierienicü manutahüiyanicü. <sup>30</sup>Müpaü netiutahüavareca

memimieniquecaicü 'icü tevi,  
cuitüva necaneinü'ani 'ahesüa.  
Nepütivaruta'aitüa müme  
hepaüsitana memüniuquixie  
'ahüxie memitahüavecü. Müpäü  
xeicüa.

<sup>31</sup>Mericiüsü cuyaxi que  
mütivaruta'aitüa, yüvicüta  
meneivitüni Papuru  
'Anutipatürisisiepai. <sup>32</sup>'Uxa'arieca  
mevarucu'eirica müme cavayasio  
mematecai memüyehucü  
hamatüana, cuyaxi yuquiepai  
meniucunuaxüani. <sup>33</sup>Müme  
Sesareyasie meheutahaxüaca, xapa  
meniyetürieni 'isücame. Papuruta  
mete'iyetüiri. <sup>34</sup>Itaterüvaca  
xapa, nita'ivaviya Papuru que  
mü'ane cuieyarisie mümiemetücai.  
Sirisiyasie mümiemetücai timaitü  
<sup>35</sup>müpäü niutayüni, Mericüte,  
nepümasi'enieni me'axüayu  
müme 'ahepaüsita memüniuquixie.  
Tiniuta'aita Herurexi parasiyuyasio  
me'üviyariecacü.

**Papuru yuhesie mieme que  
mütiutaniu Perixi hüxie**

**24** Mericiüsü 'auxüviriaca  
tucari 'anucayacu,  
mara'acame mühüritüariecai mana  
neta'ani Hananiya mütitevacai,  
hipatüta va'uquiyarima, xevitüta  
Teruturu müniucametücai  
mete'u'axüa. 'Isücame hüxie  
meteniutahecüata Papuru  
hepaüsita. <sup>2</sup>'Isücame 'itahüavecü,  
Teruturu nisütüani 'ixanetatü,  
müpäü 'utaitü, Yemecü cayuvatü  
pecatanipitüaca 'ecü. Timaveme  
pemühücücü pecaniheiserietüaca  
vaücava tateüterima tahesie mieme.  
<sup>3</sup>Neuxei Perixi pemütürücaüye,

naisarie tenitanaqui'erieni naime  
pamüpariyusi temasipitüatü.  
<sup>4</sup>Mericüte necamasi'uximatüamütü  
vaüca niuquicü, 'ayumieme  
nepümasitavaviri pemütasi'enienicü  
yareutevitü 'aixüa  
pemütiuca'iyaricü. <sup>5</sup>Tenitaxeiya  
'icü tevi 'axa tiyurieneme  
cuya vevieneme yunaime  
Huriyusixi vasata naisarie cuiepa.  
Nasaretitanacasio memüteviya  
catiniva'aitüvametüni. <sup>6</sup>Tuquita  
neutahani 'iseviximanique. Tepivi,  
teni'inüatacucaütüni que maine  
ta'inüari niuquiyari. <sup>7</sup>Perusü  
nuaca Risiyaxi xei miriyari  
cuyaxi tiva'aitüvame mühücü,  
väüriyarica cataniunavairieni.  
<sup>8</sup>Catatineta'aitüani tame  
hepaüsitana temüniuquixie  
'ahesüa temüyehucü. 'Ecüta  
pe'ita'ivaviyame pecaniyüveni  
pemüretimani naime que  
temüteniuquixi hepaüsitana.

<sup>9</sup>Huriyusixita hepaüna  
mecaniniuquimacaitüni, quename  
müpäütütü 'ane me'utiyuatü.  
<sup>10</sup>Hicü 'isücame yumu'ucü  
'i'inüaritüacu mütaniunicü, müpäü  
niutayüni Papuru,

Yanetimaitü 'ecü müixa viyari  
que pemütiuyuri 'ena 'icü  
teüteri va'isücame pehücütütü,  
'ayumieme 'aixüa 'iyaricü  
nehesie mieme nepütaniuni que  
müticuxasiva nehepaüsita. <sup>11</sup>'Ecü  
pecaniyüveni pemütimaica,  
tamamata heimana huta tucari  
püca'anucayeive cuxi quepauca  
nemeutiyunixü Querusaresmie  
nemünetanenevienicü. <sup>12</sup>Sepa  
tuqui 'amüpata, tuquite  
'esimüpepeta, quiecariseta,

tixaü mepücanesihetaxei niuqui nexüatüacame xeimematü, teüteri nevacuyataneme. <sup>13</sup>Mepücayüvave memiseiriyani yuniuqui que memüteniquixie nehepäüsita hicü. <sup>14</sup>Ipaü nepümatitaheciätüaniquyeu, ne 'iya huyeta netiviyatü nepüti'uximaya tatevarima vacacäyarisie mieme, sepa müme xaüsie tiviyacame memüxata 'iya huye. Yuri nepüti'eri naitü que mütiuti'utüarie 'linüari xapayarisie texaxatamete vaxapayarisie. <sup>15</sup>Imetütü vahepäü yuri que memüte'erie meta'icuevatü, neta yuri netini'erieca müpäü netita'icuevatü Cacaüyari müvaranucu'uitüani müquite, heiseriemecü yamemüteyurie, heiseriemecü yamemücateyurie yunaime. <sup>16</sup>Mücücü yaneticuvauneni ne'iyari mücanesitatienicü naime hepäüsita, sepa Cacaüyari hepäüsita, sepa teüteri vahepäüsita.

<sup>17</sup>Ne tumini nenicuxeürieni neteüterima vahesie mieme. Yapaümexa viyari müpäü netiniyuriencaitüni. 'Arique 'uva neninuani ne'e'ütü. <sup>18</sup>Müpäü netiyuriencacu hipatü Huriyusixi 'Asiyatari menenetaxeiya tuqita nene'itiecame. Yümüretü teüteri 'amepüca'u'uvacai ne'aurie, nepücavaxamuriecai. <sup>19</sup>Neuyeveca memü'axüani 'ahüxie müme, reuyevese müme memüniuquixieni que memüneteniuquimanique. <sup>20</sup>Mesü, 'ime 'ena yameque'utiyuaneni tita memüte'ucaxei mücatiheiserie quepauca ne nemutivecai 'isücate vahüxie, <sup>21</sup>tita memüte'ucaxei

xeime nenuqui hepäüsita que nemütiuhiva vahüxie ne'utivetü müpäü ne'utaitü, Müquite me'anucu'ume nemüti'eriecü, 'ayumieme xehesüa neni'inüasieca hicü.

<sup>22</sup>Merücüsü Perixi heiseriemecü tinimaicaitüni 'iya huye hepäüsita. 'Ayumieme müpäü tinivaruta'eiya, Nuayu Risiyaxi xei miriyari cuyaxi tiva'aitüvame, nepi'inüatani xeniuqui. <sup>23</sup>Tinita'aitüani xei sienituyari cuyaxi tiva'aitüvame mi'üviyanicü, mi'uxipitüacacü, mücavanenacacü hesüana miemete memiparevienicü hesüana memü'axenicü.

<sup>24</sup>Merücüsü yapaümexa 'anucayacu, Perixi mana niuyeicacaitüni yil'üitatü Rurusiramatü mühuriyutücai. Yu'aurie nitacuevieni Papuru, ni'eniecaitüni ticuxatame yuri que müti'erie Cürisitu Quesusisie. <sup>25</sup>Ticuxatacacu tita mütiheiserie hepäüsita, tevi que mütiyünü'a hepäüsita, tevi que mütitita'inüasieni hepäüsita, Perixi pümacai. Müpäü tinitahüave, Hicürixüa quenemie. Quepauca tucari nemühüca ne'aurie nepümasitacuevieni. <sup>26</sup>Siepüre nicueviecaitüni Papuru mi'tiütianiquecai tumini 'iya mixünacü ticu'erivatü. 'Ayumieme müixa yu'aurie pitacuecuevivacai, tinicuxatacaitüni hamatüana. <sup>27</sup>Huta viyari 'uyurieca Perixi niuyupata. Purusiyu Pesitu 'isücame nayani. Perixi vanaqui'aritüamütü Huriyusixi, 'ayumieme hüacame necu'eirieni Papuru.

#### Papuru que mütitahüavimücücai Sesaxi

**25** Merücüsü Pesitu nuaca haque mehüritärieceai,

hairieca tucari 'aye'acu, Sesareya heyeyaca Querusaremesie ninuani.

<sup>2</sup>Mara'acate memühürütüariecai Huriyusixi va'uquiyarima hüxiena meniu'axüani metehecüatätü Papuru hepaüsita. Menitavavirieni

<sup>3</sup>müpaü me'utiyaütü, 'Aixüa petiucal'iyaritü Querusaremesie quenanunü'a Papuru. Müme meneicueviecaquecaütüni me'imienique huyeta

'uyemieme. <sup>4</sup>Pesitu masi müpaü tinivaruta'eiya, Sesareyasiepai nepei'üviyani Papuru. Ne yareutevitü mana nepümie.

<sup>5</sup>Xesata miemete teyüvavemete nehamatü meque'uhuni, müme mequeheniuquixieca hepaüsitana, xüca tixaütü catiheiserietüni 'icü tevi hepaüsita.

<sup>6</sup>Mana müixa püca'uyuri, 'atahaica tucari xeicüa ya tamamata. 'Arique Sesareyasie neyani. 'Uxa'arieca yu'uveni haque müre'inüatacai 'acaitü tinivaruta'aitüani memi'atüanicü Papuru. <sup>7</sup>Mana nuacu 'auriena meniyuxeürieni Huriyusixi Querusaremesie miemete. Vaüca türücavimecü metenexeiyacaitüni memüniuquixienicü hepaüsitana. Mepüyutatexie me'iseiriyatü yuniuqui. <sup>8</sup>Papuru müpaü tiniutaniuni yuhesie mieme, Huriyusixi va'inüari niuquiyari hepaüsita, tuqui hepaüsita, Sesaxi hepaüsita, 'asinepücatiuyuri

'axa ti'aneme, 'utaitü. <sup>9</sup>Pesitu vanaqui'aritäamütü Huriyusixi müpaü tinita'eiya Papuru, Peti'avaüriya Querusareme pemüyemie mana nemümasita'inüatacä 'icü

niuquixiya hepaüsita. <sup>10</sup>Papuru müpaü niutayüni, Ne Sesaxi 'uvenieya hüxie xeicüa 'anepütiveni nemü'inüasienicü. Mana xeicüa peuyevese nemü'inüasieni. 'Axa nepücavaruyuri Huriyusixi, heiseriemecü que pemütimate 'ecü. <sup>11</sup>'Axa xüca netiuyurienique, tixaü xüca netiuyurienique que müreuyevese nemümünicü, nepücanecu'imavaniqueyu nemümünicü. Mesü xüca tixaütü catihücütüni 'icü que memütenuquixie nehepaüsita, xevitü tixaü pücaüve munesiyetüani vanaqui'aritäamütü. Necanitahüavimücü Sesaxi. <sup>12</sup>Hicü Pesitu varutahüaveca 'imavamete müpaü tinita'eiya, Sesaxi petitahüavimücü 'acu. Mericüte, Sesaxisüa pecaniyemieni.

**Papuru que müti'atüarie  
'Acüripa Verenise vahüxie**

<sup>13</sup>Merücüsü müixa tucari 'anucayacu, cuiepa ti'aitame 'Acüripa mütitevacai Verenisematü meneicu'ivata Pesitu Sesareyapai. <sup>14</sup>Yapaümexa tucari mana mepuyuri. Pesitu tinicuxaxatüvacaitüni cuiepa ti'aitame Papuru hepaüsita, müpaü 'utaitü, Xevitü tevi 'uva pucu'eiriva Perixi mivi menutahüa. <sup>15</sup>Querusaremesie neheta'acu, hepaüsitana meteniutaheciata mara'acate memühürütüarie, Huriyusixi va'uquiyarima, menesivavirietü manutahüiyanicü. <sup>16</sup>Nesü müpaü netinivaruta'eiya, Xumatari tatutuyari müpaü püca'ane, tepüca'iyetüani 'uqui, hüxiena meca'axüavavecacu cuxi



müme hepaüsitana memüniuquixie, cayüvecacu cuxi yuhesie mieme mütaniuni vaniuquixiya 'hepaüsita. <sup>17</sup>'Uva me'u'axüacu, 'ayumieme 'enepücareuterixü. 'Uxa'arieca 'isücame 'uvenieyasie haque nemüra'inüata ne'ayerüca, nenivaruta'aitüani memevitünicü 'iya 'uqui. <sup>18</sup>Müme memüniuquixiecai quepaucua memanucu'ui, mepücaniuquixiecai 'axa müti'ane mütiuyuricü, que nemütimaicai ne. <sup>19</sup>Niuqui xüatüaricacü xeicüa tita memüte'ayexeiya hepaüsita xeime Qesusi hepaüsita mümüquicai, Papuru 'ayeniereme müxatacai, mücücü püta meniniuquixiecaitüni hepaüsitana. <sup>20</sup>Nesü 'asinepücatimaicai 'icü niuqui hepaüsita. 'Ayumieme müpaü netinitahüave, Peti'avaüriya Querusaremesie pemüyemie mana peme'inüasienicü 'icü hepaüsita. <sup>21</sup>Papuru caneniutavavirieni nemi'üviyanicü, ti'aitame 'Aucusitu mi'enienique. 'Ayumieme netinivaruta'aitüani memi'üviyanicü Sesaxisüa nemenunü'anique. <sup>22</sup>'Acüripa müpaü tinitahüave Pesitu, Nesüari necani'enieniqueyu 'iya tevi. Müpaü niutayüni, Mericüte 'uxa'a pecani'eniemücü.

<sup>23</sup>'Uxa'arieca meniu'axüani 'Acüripa Verenisehatü cuini mieme mete'unüütü memamarivavetü. Mana mürayuti'enieritüre meneutahaxüani xei miriyari cuyaxi teva'aitüvamate vahamatü, 'uquisi quiecatari memüva'uquiyarimatücai vahamatü. Pesitu tinivaruta'aitüani

memevitünicü Papuru. <sup>24</sup>Hicü Pesitu müpaü niutayüni, Ti'aitame 'Acüripa, xemeta yunaitü tahamatü xemüyucuxeüri 'uquisita, manari xenixeiyani que mü'ane hepaüsita vaüriyarica memünesi'upitüa yunaitü Huriyusixi teüteriyari Querusaremesie 'uvata, müpaü mete'uhivatü quename 'aixüa ca'ane mayeyurini. <sup>25</sup>Ne tixaütü nepücatiucaxei que mütiuyuri que müreuyevese mumünicü. 'Iyasü yamütitahüavimücücaicü 'Aucusitu, ne yanepütinemaicai nemenunü'anicü. <sup>26</sup>Niuqui müheiserie nepücahexeiya nemiti'utüirienicü cuiepa ti'aitame. 'Ayumieme neni'atüani xehesüa, 'ahesüatütü ti'aitame 'Acüripa, pe'iti'inüatayu tixaütü nemürexeyanicü nemütiti'utüanicü. <sup>27</sup>Timaivemepaü nepüca'yüniqueyu xüca xeime nehenü'anique hüacame, necatihecüatätü que mütiniuquim arie.

**Papuru yuhesie mieme que mütiutaniu 'Acüripa huxie**

**26** Mericüsü 'Acüripa müpaü tinitahüave Papuru, Pecanipitüarieca 'ahesie mieme pemütaniunicü. Papuru yumama 'utaseraca müpaü niutayüni, <sup>2</sup>Neuxei ti'aitame 'Acüripa, nenetemaviecame nepüne'eri 'ahüxie nemutaniucü hicü naime Huriyusixi que memüneteniuquima hepaüsita. <sup>3</sup>Huriyusixi naime vayeiyari mücü vaniuqui que memütexüatüa pecatinimaica 'aixüa 'anemecü. 'Ayumieme nepümativaviri pemünesi'enienicü peca'uxivetü.

**Papuru que mütiyueicacai meripai**

<sup>4</sup>Meriçüte yunaitü

Huriyusixi mecanenimaica que nemüticuyeicacai neteüterima vasata Querusaremesie, matüaripai temaicüyaripai que nemüticuyeicacai. <sup>5</sup>Müme matüaripai memünesimaicai xüca metehécüatanique, müme müpäü meniütüyuaneniqueyu ne que nemüticuyeicacai Pareseusixi vahesie netiviyatü. Pareseusixi tita temütehaxeyesie yeme yamepütecahu. <sup>6</sup>Hicü yuri neti'erietü nemüticueviecü tita Cacaüyari mütivarutahüavixü tatevarima mütivaminiquecai, 'ayumieme 'uva neputive ne'inüasietü. <sup>7</sup>Yunaitü tateüterima tamamata heimana yuhutatü nuivarite temühüme tucaricü tücaricü 'uximayasicayacü te'eyexeyatü cuini mieme teneicuevieca Cacaüyari siparasü xüca müpäü tetepitüarieca. Neuxei ti'aitame, ne yuri nemütü'eriecü müpäü neticuevietü, 'ayumieme nehepäüsita mepünüquixie Huriyusixi. <sup>8</sup>Titayari xeme xecateyüvave yuri xemüte'erieca quename Cacaüyari varanucu'uitüani müquite.

**Papuru que mütivaruveiyacai**

<sup>9</sup>Neri heuyevecame nepü'eriecai vaüca 'axa nemiyurienicü que mü'ane Quesusi Nasaretitanaca mühücü. <sup>10</sup>Müpäüta netiniyurienecaitüni Querusaremesie. Yümüireme Cacaüyari teüterimama casariyanata

nepüvaranutaxürüvacai, mara'acate memühürütüariecai heiserie menesi'upitüacu. Mecui'ivarümecacu, neniüqui nepeuyeqesacai vahepäüsita. <sup>11</sup>Naime tuquiteta müixa nepüvaranutaxürüvacai, väüriyarica nepüvapitüacai 'axa memutiüyuanenicü Quesusi hepäüsita. Vaücava nevahecattü necanivataveveyacaitüni hipame quiecaritiesie.

**Ta'aurie que mürave Papuru**

(Nü'arisixi 9:1-19; 22:6-16)

<sup>12</sup>Meriçüsü mara'acate memühürütüariecai heiserie menesi'upitüacu menesi'uhürütüacu Ramasicusie neneyani. <sup>13</sup>Neuxei ti'aitame, tuca huyeta ne'uyemietü nenixeiya hecüariya taheima mieme masi que taupäu xavatüme ne'aurie 'acuxavatüme, nehamatü memü'uvacai va'aurieta. <sup>14</sup>Tanaitü cuiépa tepatixüri. Ne xeime neniü'enieni müpäü münetiutahüavixü Hepürayusixi vaniüquicü, Sauru 'acu, Sauru, titayari penetiüveiya. Pümasi'ucucüne pemüca'avaüriyacü, pemütü'aquesinacü pe'anaseivatü tisevemecü. <sup>15</sup>Nesü müpäü netinitahüave, Que pepüpaicü 'uqui. Ti'aitame müpäü netayüni, Nesü necaniquesusitüni pemünesi'uveyiya. <sup>16</sup>Hicürixüa quenanucuquexi, 'a'ücacü queneuveni. 'Icü 'ayumieme pepünesi'uxei, pemanayexeyariecü netupiri pemayanicü, pemütihecüatanicü que pemünetiuxei que pemünetixeyanata.

<sup>17</sup>Nepümasitavicueisitüani  
 'ateüterima vasata  
 memücahuriyusixi vasata, müme  
 vahesüa nemananunü'amücü  
<sup>18</sup>pemüvaranutanenieritüvanicü,  
 yüriya mecu'eirieme hecüariyasie  
 memüteviyanicü, Cauyumarie  
 türücariyaya mecu'eirieme  
 Cacaüyarisie memüteviyanicü,  
 tita 'axa memüteyurie  
 memüteheuyehüviyarienicü  
 nehésie yuri mete'erietü,  
 vahésie mütinaquenicü tita  
 memütetanaqu'erieni müme  
 nemüvarupataxü nehésie mieme.

**Papuru que müticamiecai  
 tita mütiuxeisie**

<sup>19</sup>Ayumieme ti'aitame 'Acüripa,  
 yaneticamietü nepatüa que  
 nemütixei taheima mieme.  
<sup>20</sup>Masi yunaimie Ramasicutari  
 meri, 'arique Querusaremetari,  
 naisarie Cureya cuieyarisie  
 miemete, memücahuriyusixita  
 netinivahecüatüacaitüni  
 memütehayevanicü que  
 memüteyurie ta'aurie  
 me'axürieme Cacaüyarisie  
 memüteviyanicü, yameteyurietü  
 müme memüte'uhayevaxü que  
 memüteyuriecäi vahésie que  
 mütinaque yamemüteyuriecäi.  
<sup>21</sup>'Ayumieme Huriyusixi tuqita  
 menesi'uviyaca yumamacü  
 mepünesimieniquecai. <sup>22</sup>Cacaüyari  
 nesipareviecacu hicüque, 'ena  
 neputive netivahecüatüatü  
 teüteri te'aitamete yunaimie.  
 Muisexi, texaxatameteta  
 que memutiyanecai que  
 mütiyüniqecai, müpaü  
 xEICÜA nepaine, <sup>23</sup>quename

heuyevcai Cürisitu müticuinecü  
 nehaitü, quename mücü meri  
 'anucuqueca müquite vasata,  
 vatahecüatüaniquecai tateüterima  
 memücahuriyusixita hecüariya  
 hepaüsita, müpaü ne'utaitü.

**Papuru yuri que  
 müti'eritüamüccai 'Acüripa**

<sup>24</sup>Mericüsü müpaü 'utayücu,  
 Pesitu carima müpaü tinitahüave,  
 Papuru pepüca'amatesüari. Väica  
 pemüti'a'üquitüacü pepütixamurie.  
<sup>25</sup>Papuru müpaü tinitahüave,  
 Tixaüsietü Pesitu pemütürücaüye,  
 ne nepücatixamurie. Que  
 nemüticuxata, nenuqui yuri paine,  
 timaiveme niuquieya pühücü.  
<sup>26</sup>Cuiepa ti'aitame 'icü nai pütimate,  
 necamatü yanetinehüaveni  
 'iya. 'Icü camaicame nepüca'eri,  
 sicurita yapücatiuyü 'icü.  
<sup>27</sup>Neuxei ti'aitame 'Acüripa,  
 yuri peti'erie 'ecü texaxatamete  
 vaniuquisie. Ne necatinimaica yuri  
 pemüti'erie. <sup>28</sup>'Acüripa müpaü  
 tinitahüave Papuru, Cari yapaucua  
 Cürisitiyanupaü netiyurieneme  
 pepünesi'ayeitüaniqueyu. <sup>29</sup>Papuru  
 müpaü tinitahüave, Nenevieri  
 nepipitüaniqueyu Cacaüyari, sepa  
 yapaucua sepa yapaümexa tucaricü,  
 'ecüri yunaitüta xemünesi'enie  
 hicü, xücatüma nehepaü xe'aneneti  
 xehacüneque, 'icü tepüa xEICÜA  
 xecahexeiyaü cümana nemühüa.  
<sup>30</sup>Hicü müpaü 'utayücu, cuiepa  
 ti'aitame 'isücameta Vereniseta  
 vahamatü memateita menanucu'uni.  
<sup>31</sup>Me'anuyecüneca yunaitü  
 yameteniyücühüavecaitüni  
 müpaü me'utiyuatü, 'Icü  
 tevi 'asipücatiuyuri que

müreyevese mümünicü manutahüiyacü. <sup>32</sup>'Acüripa müpaü tinitahüave Pesitu, 'Icü tevi püyüveniqueyu müxünarieni, xüca ca'itahüavimücünique Sesaxi xeicüa.

### Papuru que mürenü'arie Xumasiepai

**27** Mericüsü quepaucua Pesitu yamütiuyuma temüyehucü naviyasie 'Itariyapai, mepüvayetua Papuru hipame memanutaxüriyacai vahamame. Vahepaüsita menihürütüani xei sienituyari cuyaxi tiva'aitüvame Curiyuxi mütitevacai. Cuyaxi müvaravitücücai 'Aucusitu Cuyaximama mepütetetevacai. <sup>2</sup>Naviya 'Aruramitiyusie pümiemetücai. 'Asiya cuieyari tesita niuyeyeicacaitüni. Mana te'acayaxeca tecanecüne. Tahamatü niuyeicacaitüni 'Arisitaricu Tesarunicatanaca Maseruniya cuieyarisie mümiemetücai. <sup>3</sup>'Uxa'arieca Siruni teneta'axüani. 'Iya Curiyuxi 'aixüa tiniuca'iyaricaitüni Papuru hepaüsita. Nipitüani menuanicü yuhamicuma vahesüa memiparevienicu. <sup>4</sup>Manarita tepeyecü, Sipüre 'aurie temüca'enisitüarieceaisie tecaniuyecüne tahepa maye'ecacaicü. <sup>5</sup>Haramara 'utüa teniuyecüne Sirisiya 'aurie Pamüpiriya 'aurie. Mana teneta'axüani Mira Risiya cuieyarisie.

<sup>6</sup>Xei sienituyari cuyaxi tiva'aitüvame mana neitaxeiya naviya Herecanitüreyasie mieme 'Itariyasie müyemiecai. Mücüsie

cataneutahatüani. <sup>7</sup>Müixa tucari 'axücai mana tepu'uvacai. Haveri mieme teneta'axüani Cüniru hüxie. 'Eca mütasi'anutavayacaicü, mana teneyecüne. Cüretatüa teniuyehucaitüni, viye manucasuri Sarumune müracuteva 'aurie teniuyecüne. <sup>8</sup>Mana haveri mieme xeicüa tenanuyenexüani. 'Arique teneta'axüani Visi Müracu'ane Mürayutituiva müracutevasie. Mana nehuracaitüni quiecaru Raseya müracuteva. <sup>9</sup>Hicü müixa tucari 'anucayacu, nicueriva'anecaitüni naviya, manutiyacaicü Huriyusixi vahaquiya. Papuru nivaruta'limaiya <sup>10</sup>müpaü tivacühüavetü, Neuxei, 'ipaü nepütimate, xe'ica naviyata pütatümaiyarieni peuyeveni, tameta tepütatümaiyarieni tepeuyexürieni textücayhuni. <sup>11</sup>Xei sienituyari tiva'aitüvame masi nivaru'enieni naviya mücuyuitüvacai naviya cusiyarieyamame, Papuru que mainecai püca'i'eniecai. <sup>12</sup>Mürati'icapiva pücatinaquequecai muhütüsie. 'Ayumieme yumüiretü mepüyu'enie memüyehucü mana, siparasü Penisesie xüca meyüvavenique memeta'axüani, mana memütitenicü muhütüsie. Penisi catinacutevaca haque mürati'icapiva Cüretasie. Tasütüa ta'utata paye'eca tahepa.

### Vitari que müttivarutayuitüvacai haramarasie

<sup>13</sup>Mericüsü taserieta 'aye'ecacacu, tita memüteheuyehüacai mete'utanaqui'erieme mepüyu'eriecai. Me'enatihanaca tihaname, Cüreta 'aurie

mepayenexüa. <sup>14</sup>Yareutevitü carima 'upacane 'eca teücapai, Ta'utata Mieme titevatü 'eca. <sup>15</sup>Naviya niuviya. Te'utatatexieca ta'aurie temehüanicü tahepa maye'ecanicü, tepihayevaxü. Tahüxie tepu'enixüaximecai. <sup>16</sup>Cuie hapa müyema hetüa Cüraura müracutematüa te'anuyenexüaca, haveri mieme xeicüa tepüyüvavecai temiviyacü canuva 'esimüpe. <sup>17</sup>Mehenatihanaca menenacahüaxüani naviya caunari me'anacavütüaca. Mepümamacai capa Sirite xiecariyarisie mete'utavaxüanicü. Yucarüpa mecaxüraca, müpaü me'anenetü yuhüxie meniu'enixüaximecaitüni. <sup>18</sup>Vitari yemecü pütasi'utayütüvaca. 'Uxa'arieca yu'ica menanatixürieni. <sup>19</sup>Hairieca tucarisie tamamacü naviya piniteya tetenanatixürieni. <sup>20</sup>Müixa tucari tau pücaheciüacai, xuravesixi mepücaheciüacai. Vitari pücatihayevamücücai. Müixa tucari 'anucayacu tetavicueniqueme tepücata'eriecairi. <sup>21</sup>Hicü müixa tetahaquiecacu, 'ana Papuru vahixüapa 'utaqueca müpaü niutayüni, Neuxeï, 'aixüa cani'aneniqueyu xüca xenesi'u'enienique yanemainecaicü Cüretasie temücaheycüneccü 'ipaü tetatümayarietü teteheuyexürietü. <sup>22</sup>Hicüsüari nepaine, xequeneyutemamavieca. Xevitü xeme yutucari pücatatümaiya, naviya xeicüa peuyeveni. <sup>23</sup>Tacai yüvicüta 'iya que mü'anesüa nemümieme hesiena mieme nemüti'uximaya Cacaüyari niuquieya tuayame ne'aurie

puvecai. <sup>24</sup>Müpaü niutayüni, Papuru 'acu, pepücamaca. Neuyeveca Sesaxi hüxie 'apemutiveni. Camü Cacaüyari pümasi'upitüa yunaime 'ahamatü memü'uva naviyasie. <sup>25</sup>'Ayumieme nepaine, xequeneyutemamavieca. Ne yuri nepüti'erie Cacaüyarisie quename müpaü tiyüni que nemütiutahüavarie. <sup>26</sup>Cuie hapa müyemasie tepütixüriyani xeicüa tame.

<sup>27</sup>Hicü tamamata heimana naurieca tucarisie yüvicüta tahüxi tepeutacüne haramara 'Aruriyaticu müracutevasie. Tücarü hixüapa yacütütü naviya vequemete cuie hehurame mepü'eriecai. <sup>28</sup>Caunari 'inüariyari meneucavivieni yuhetüa. Meniti'inüata xei teviyari mamayari heucatevame. Yareutevitü hutarieca meneicavivieni, tamamata heimana 'auxüme mamayari meniuti'inüata. <sup>29</sup>Menimamacaitüni tetesie tetetivaxüaniqueme me'erietü. Nauca tehapanameteyari cüsapana mehavütüaca, xücatüma 'ucatareque metenyücühüavecaitüni. <sup>30</sup>Naviya vequemete metenicuvautüvecaitüni que memütüyuta'unacü naviyasie. Canuva 'esimüpe meneucatuani haramarasie yame'utiyuatü mete'itavatü quename hüxienapai tehapanamete me'anuhanaquecai. <sup>31</sup>Papuru müpaü tinivarutahüave xei sienituyari cuyaxi tiva'aitüvame cuyaximame, 'Ime xüca naviyasie mecayuhayeva, xepücaüyävaveni xemütavicueni xeme. <sup>32</sup>Cuyaxiri canuva 'esimüpe caunariyari menexitexüaniri, mana niucaveni. <sup>33</sup>Mexi cuxi catucaritücai, Papuru nivatuicacaitüni yunaime 'inüa

memüticuanicü, müpäü 'utaitü,  
 'Icü tucarisie tamamata heimana  
 nauca tucari xepuyuri xeta'icuevatü  
 xecatecuatü. <sup>34</sup>'Ayumieme nepaine,  
 'icuai xequeneutanaqui'eriri. Mücü  
 'apuve xemütavicuenicü. Xevitü  
 xeme xei cüpayari yumu'usie  
 pücaheuyehüani. <sup>35</sup>Müpäü 'utayüca  
 pa 'uti'üca pamüpariyusi nipitüani  
 Cacaüyari yunaime vahüxie.  
 'Ititaraca, nisutüani 'icuatü.  
<sup>36</sup>Mümeta meniyuvaüriya, 'icuai  
 meniutanaqui'erieni. <sup>37</sup>Tanaitü  
 naviyasie temüyetecai huta  
 sienituyari heimana haica teviyari  
 heimana tamamata heimana  
 'ataxevitü tecanipaümecaitüni.  
<sup>38</sup>Te'utihuxacari 'icuaicü, naviya  
 tena'exanariya tehenatixürieca  
 türücu haramarasie.

#### Naviya que mütiutatümayari

<sup>39</sup>Merücüsü tau hanecu, cuie  
 mepücamaicai. Yusicuriviyame cuie  
 mepuxei haque macuxiecariyacai.  
 Cuiepa mepeitihüaniquecai  
 naviya xüca meyüvavenique.  
<sup>40</sup>Tehanamete meniutatüani,  
 menicu'eirieni haramarasie.  
 Mexicuxirita 'itunisitüvame  
 caunariyari meniuxüna. Carüpa  
 'esimüyeva metixüraca, cuiepa  
 menitinxüaximecaitüni.  
<sup>41</sup>Haramara mayunaquesie  
 meniu'axüani. Muva cuiepa  
 menatinexüani. Surieya cuiepa  
 neuhani, mana niyuhayeva niuseire.  
 Cüsapana nita'unirümeccaitüni  
 türücariyacü. <sup>42</sup>Hicü hipatü  
 cuyaxi menivacuicucaitüni  
 memanutaxüriyacai, capa xevitü  
 tavicuenicü 'uhauximetü. <sup>43</sup>Xei  
 sienituyari cuyaxi tiva'aitüvame

masi pitavicueisitüamücücai  
 Papuru. 'Ayumieme nivarutanenani  
 'asimemücateyurienicü que  
 memaitücaitei. Niva'aitüacaitüni  
 müme memahauvavecai  
 memeucasunaxüanicü meri, cuiepa  
 memütinexüanicü, <sup>44</sup>hipatüta  
 'arique cüyesie hipatü naviyasie  
 miemetesie 'amemütinexüanicü.  
 Müpäü mete'uyurieca yunaitü  
 meputavicuei cuiepa me'uta'axüaca.

#### Papuru que mütiuyeicacai Maritasie

**28** Merücüsü te'utavicueca,  
 'anaque tetenetimani  
 Marita müracusevacai cuie hapa  
 müyemacai. <sup>2</sup>Teüteri muva miemete  
 yemecü 'aixüa meteniu'iyaricaitüni  
 tahepaüsita. Meniutinaini, muva  
 metani'atüani tanaime müviyecaicü  
 muhaütücaicü. <sup>3</sup>Hicü Papuru  
 necucü'eni, taipa nenutixürieni.  
 Cu macxücasie heyeyaca,  
 mamayasie niqüeni. <sup>4</sup>Teüteri  
 muva miemete me'ixeyatü cu  
 mamayasie haviecame, müpäü  
 meteniuyutahüave yunaitü, Nusenu  
 'iya tevi xüari tiyumemivame  
 canihücütüni, sepa mutavicuei  
 haramarasie, heiserie pücapitüari  
 'ayenieretü müyuhayevacü. <sup>5</sup>Masi  
 'iya yumama niutasique. Cu taipa  
 neuveni. Tixaü 'asipüca'utiüari.  
<sup>6</sup>Müme mepicueviecai müpäü  
 metecu'erivatü, Tietüsü tahaimücü,  
 müquitü cavemücü yapaucua.  
 Me'icueviecacu me'l'ixüariecacu  
 müixa, 'asipüca'uyü. 'Ayumieme  
 yücü metenyücühüaveni. Müpäü  
 meteniutinutüdüne, Xüari  
 canicacüyaritüni. <sup>7</sup>Merücüsü  
 mana hurava cuie nicumacaitüni,  
 Pupiriyu mütipinieyatücai.

Yunaima haramarasie müyema cuiépa memütamacai püva'uquiyaritücai 'iya. Tasi'utanaqui'erieca haica tucari 'aixüa tiuca'iyaritü pütasi'upitüa haque teme'axüani. <sup>8</sup>Pupiriyu quemasieya hüiyacü hacuisicü ticuyetü 'aniucateitüni. Papuru hesüana neutahani, yutanenevieca heimana 'utimeca nenayehüani. <sup>9</sup>Müpaü tiuyücu, haramarasie müyema cuiépa memütamacai hipatü tecuicucate meniu'axüani, meniuti'uhayemarieni. <sup>10</sup>Müme vaücava metatenimicuacaitüni. Teyehuximecacu mepütatemicuacai tita temüteheuyehüacai.

#### **Papuru que müreta'a Xumasie**

<sup>11</sup>Hicü haica meseri 'utixücu, naviyasie tenecüne. Haramarasie müyema cuiépa nitiheteitüni mücü naviya muhaütücaisie. Herecanitüreyasie pümiemetücai, Vavarixi pü'inüarieyatücai. <sup>12</sup>Siracusa teheta'axüaca, haica tucari tepütahayevacai. <sup>13</sup>Mana teheyecüneca, Requiya teneta'axüani. Xei tucari 'anucayacu, taserieta pa'ecacai. Hutarieca tucarisie Puteuri teneta'axüani. <sup>14</sup>Mana tenivaretaxeiya ta'ivamarixi. Müme mepütasi'uta'inie 'atahuta tucari temüyurienicü vahesüa. Müpaü tete'uyurieca, Xumasie teneta'axüani. <sup>15</sup>Ta'ivamarixi mana miemete meni'enanacaitüni tahepaüsita. Menayenexüani metasi'anucunaqueque 'Apiyu Pürasayarisiepatü, Haica Canitinayari Macu'upai. Papuru varuxeyaca, pamüpariyusi

nipitüani Cacaüyari. Vaüca niyuvaüriyacaitüni. <sup>16</sup>Xumasie teheutahaxüacu, xei sienituyari cuyaxi tiva'aitüvame nivayetüani memanutaxüriyacai cuya mühüritüariecaisüa. Papuru niupitüarieni yuxaüta mecanicü cuya 'i'üviyamematü.

#### **Papuru que müticuxatacai Xumasie**

<sup>17</sup>Mericsü hairieca tucarisie Papuru yuhesüa nivaruta'inieni müme Huriyusixi memüva'uquiyarimatücai. Me'u'axüacu müpaü tinivarutahüave, Neuxei 'ivamarixi, sepa 'asinemücatiuyuri teüteri vahepaüsita, tatevarima vatutuyari hepaüsita neca'uxiva'atü, nepüyetuiya Querusaremesie nehüatü Xumatari vahesüa. <sup>18</sup>Müme va'isücate menesi'u'enieca menenixünacuacaitüni 'asinemücatiuyuricü que müreyevecai nemümünicü. <sup>19</sup>Huriyusixi memeuniucacaicü nenuiqui hepaüsita, 'ayumieme vaüriyarica nepihüavimücücai Sesaxi, sepa neteüterima vahepaüsita tixaütü nemücarexeiyacai nemütiniuquixienicü. <sup>20</sup>'Ayumiemericü nenixeta'inieni tahüxi temütinenierenicü nemütixecuxaxatüvanicü. Yuri neti'erietü nemicueviecü tita 'Ixaherisixi temütecuevi, 'ayumieme 'icü tepüa nepa'ü. <sup>21</sup>Mümesü müpaü metenicühüaveni, Tame xapate tepü'ca'utanaqui'erivave Cureyasie miemete 'ahepaüsita. Xevitü ta'ivama pücanuave 'axa tatihecüatüatü 'axa

ticuxatatü 'ahepaüsita.

<sup>22</sup>Tecamani'enieniqueyu que pemüticu'eriva. 'Iyasie memüteviya vahepaüsita 'icü xeicüa tepütemate, naisarie 'axa metenicuxasivani.

<sup>23</sup>Mericsü tü cari menipitüani memü'axüanicü. Hesüana manucateisie yumüiretü meniu'axüani. Tinivacuxaxatüvacaitüni tivahecüatüatü que müti'ane Cacaüyari ti'aitametüacu, yuri tiva'eritüamütü Qesusisie, Muisexi 'inüariyari'icü texaxatamete vaxapayaricü 'iseiriyatü yuniuqui. 'Amanamecü mütiucatarixü 'acayunecuque tinicuxatacaitüni. <sup>24</sup>Hipatü meni'eniecaitüni niuquieya, hipatü yuri mepücate'uta'erie. <sup>25</sup>Yunaitü yaxaicüa mecateyücühüavetü meneutayeixüani, xei niuquiyari 'utaniucu Papuru 'ipäu 'utaitü, 'Iyari Mütiyupata 'aixüa canitayüni, Quisariyaxi tixaxatame müpäü tivacühüavecacu tatevarima,

<sup>26</sup>'Icü teüteri vahesüa quenemie, müpäü quetinivaretahüavi, Yemecü xepü'enanani peru tixaü xepücate'enieni. Yemecü xepüneniereni peru tixaü xepücatexeiya.

<sup>27</sup>'Icü teüteri yu'iyarisie mepüyü'üraraxi. Vaüriyarica xeicüa mepü'enana yunacatecü. Vahüxite pu'litutupe Capa meheunenierenicü yühüxicü, Capa me'u'enananicü yunacatecü Capa yametetimanicü yu'iyarisie, Capa ta'aurie me'axürienicü Capa nevaranayexürienicü.

<sup>28</sup>'Ayumieme yaxequetenemaica xeme, Cacaüyari 'icü niuqui caneyenü'ani memücahuriyusixi vahesüa memütavicueisitüarianicü. Mümesü mecani'eniecacuni. <sup>29</sup>Hicü müpäü 'utayücu Huriyusixi menecüne niuqui mexüatüatü vaücava.

<sup>30</sup>Mericsü huta viyari mana peyuri yücümana tiyutuatü. Mana nivanaqui'eriecaitüni yunaime memü'axecai hesüana.

<sup>31</sup>Camatü tinivahecüatüacaitüni que müti'ane Cacaüyari ti'aitametüacu. Tiniva'üquitüacaitüni Ti'aitame Qesusi Cürisitu hepaüsita, canenarietü.



# XUMATARI

## Que Mütivarunü'airi Papuru

---

### Vaürisica

**1** Ne Papuru nenixevaüritüaca Cürisitu Qesusisie mieme nemüti'uximayatame, nemuta'inierie nü'ari nemayanicü, nemupasie Cacaüyari niuquieya 'aixüa manuyüne nemücuxatanicü.

<sup>2</sup>Meripai Cacaüyari nainecaitüni temeixeiyaniquecaicü mücü niuqui, texaxatametemama yametcuxatacacu 'utüiaricacü hesüana mümiemecü, <sup>3</sup>yunive xatatü. Tevi hücutütü, nu'aya caniutinuiva Ravirisie müyetüa.

<sup>4</sup>Müquite vasata manucuquecü, türücariyacü caniuçayerieni Cacaüyari Nu'ayatütü, 'Iyari Cacaüyarisie mieme mütasipata que müticaye. Qesusi Cürisitu nixatacaitüni mütati'aitüvame.

<sup>5</sup>Mücü 'aixüa tepü'itüarie 'iya 'aixüa tiuca'iyaricacu, tepeutanü'ariexüata para yunaitü nuivarite yuri mete'erietü yamemütecahunicü, que mü'ane mühücüsie mieme meyüatü.

<sup>6</sup>Xemeta nuivarite xecanihümetüni xemuta'inieri Qesusi Cürisitu teüterimama xemacü necü.

<sup>7</sup>Netinixe'uta'utüirieni yunaime Xumasie xemütama Cacaüyari müxenaqui'erie, xemuta'inierie hesiena mieme xemüpasienicü. Cacaüyari müta'uquiyari, Ti'aitame Qesusi Cürisituta, xüca 'aixüa mete'u'iyarini xehesie mieme, xüca mexepitüaca yu'iyarisie xemüca'uximatüariecacü.

### Papuru que müti'ivatamücücai Xumasie

<sup>8</sup>Mericüsü Qesusi Cürisitu nesipareviecacu pamüpariyusi necanipitüaca necacaüyari meri yunaime xehesie mieme, naisarie cuiepa mücuxaxasivacü yuri que xemüte'erie.

<sup>9</sup>Ne'iyaricü Cacaüyarisie mieme nepüti'uximayata, niuqui nu'aya hepaüsita 'aixüa manuyüne necuxatatü. 'Iya Cacaüyari müpäü pütihecüata, que nemütixexata necatihayevatü quepaucua nemünenenevie neheyemecü <sup>10</sup>ne'ivavirietü 'uxa'a varie sipara xüca 'ari 'aixüa nepitüarieni xehesüa nemüyemiecü, müpäü tinaquecacu Cacaüyari. <sup>11</sup>Nepütinecahive'eri

nemüxexeyacü, 'Iyarisie mieme nemüxeminicü xemütücariecacü, <sup>12</sup>neta yacütütü xehesüa temüvaüriyarienicü yuri xemüte'eriecü xeme, neta yuri nemüti'eriecü.

<sup>13</sup>Ne'ivama müpaü pücanetinaquenuqueyu xüca 'asixecatemaicaque müixa que nemütinecuha'arütüvacai xehesüa nemüyemiecü, sepa nemücapitüariecai hicüque. 'Icuaxi nehexeyatü nepayaniqueyu xehesüa, hipame nuivarite vahesüa nemeixeyapaü. <sup>14</sup>Neuyeveca nemütivataxatüani Cüriyecusixi memücacüriyecusixita, temaivavemete memücatemaivaveta. <sup>15</sup>'Ayumieme ne'iyari yapü'ane nemütixetaxatüanicü niuqui 'aixüa manuyüne xemeta Xuma xemütama.

**Niuqui 'aixüa manuyüne  
que mütitürücaüye**

<sup>16</sup>Nepüca'iteviya niuqui 'aixüa manuyüne. Türücaria canihücütüni Cacaüyarisüa mieme, yunaitü yuri memüte'erie memütavicueisitüarianicü cani'ayumiemetüni, Huriyusixi meri, Cüriyecusixita. <sup>17</sup>Xüca yuri ti'erieca, mücü niuquisie canimasiücücämücü Cacaüyari heiserie que mütiyupitüva, para yuri müti'eriecacü, que müre'uxa, Que mü'ane heiseriemecü yamüticamie, mücü canayeyuricämücü yuri müti'eriecü.

**Teüteri vahesie que mürahüiva**

<sup>18</sup>Masi haxüa canimasiücüni, Cacaüyari taheima macave que mütiheca naime teüteri que

memüteyurie mecaheyexeyatü heiseriemecü yamecatecahutü, müme meminena tita yuri müraine heiseriemecü yamecatecahutü.

<sup>19</sup>Tita mütiyüve mütimaica Cacaüyari hepaüsita, mücü canimasiücüni vahesüa.

Cacaüyaritütü yatinivaruxeisitüani.

<sup>20</sup>Cuie munetüariepai hicüque, tita mücatixeyarieve hepaüsitana, yuheyemecü que mütitürücaüye que müticacaüyari, mücü catinihecüaca yara'erivacacu tita mütiutivevi hepaüsita.

'Ayumieme 'asimepücaüyüve yuhesie mieme memütiniunicü.

<sup>21</sup>Cacaüyari mehetimaica, 'aixüa mepüca'utiyanecai hepaüsitana Cacaüyari hepaüsita temutiyanepaü. Pamüpariyusi mepüca'ipitüacai. Masi yacü metecuxatatü menacüne mexi niuqui mexüatüacai. Va'iyari 'asimatimaivecacu, niucuyüre va'iyarisie. <sup>22</sup>Temaivavemete meyuxatatü 'asimecatemaivavetü menacüne. <sup>23</sup>Cacaüyari mücapünive visi mü'ane, menipata tevi müpünivepaü tiyuxexeyame memayexeyanicü püta, viquixi vahepaü yeutari vahepaü cuterixi vahepaü tiyuxexeyame.

<sup>24</sup>'Ayumieme Cacaüyari nivayetuani yu'iyarisie mete'ucahive'eriecacu, para meca'itiyatü memacüneccü, memiseviximanicü yuva'yari yusata. <sup>25</sup>Cacaüyari yuri que maine, müme menipata 'itarica memexeyanicü püta. Tita mütiveviya mepayexeyacai, hesiena mieme mepüte'uximayatacai, mecaheyexeyatü que mü'ane

mitivevi. 'Aixüa yemecü  
queticühüavariüvani 'iya  
yuheyemecüsü, müpaü xeicüa  
pü'ane.

<sup>26</sup>Ayumieme Cacaüyari  
nivayetuanı memihive'eriecacü  
tita 'axa müti'ane. Va'ucariri  
me'icu'eirieca tita 'ucari  
memüteyuruva, 'ucapaü  
mecateyurietü mepacü. <sup>27</sup>'Uquisita  
yaxeicüa, me'icu'eirieca tita 'ucari  
memüteyuruva, mepüyutaiyacai  
meyuhive'erietü. 'Uquisi 'uquisi  
vahamatü yamepüteyuriecai que  
mücatinaque. Que müreuyevecai  
yamemüteheuyexürüvecaicü,  
mepüte'epiniriecai yuvaiyarisie.

<sup>28</sup>Müpaü memücatecu'erivacaicü  
quename 'aixüa 'ane me'erivanicü  
Cacaüyari, 'ayumieme Cacaüyari  
nivayetuanı que mücatinaque  
yamemütecu'erivanicü, que  
mücatinaque memüteyuriecacü.

<sup>29</sup>Mecanaye'axüani que  
mücatiheiserie meyüatü,  
mevacumaivatü que mü'ane  
müca'yü'üya müca'yücüna, 'axa  
metecuyuruvatü, naima  
metehive'erietü, 'axa  
me'ananetü. Menihüpünecaitüni  
me'ütesatü meyucuitü  
meha'atü meteyu'irüviyatü  
'axa metecu'erivatü.

<sup>30</sup>Mecani'avieniucani,  
mecaniniuquixieca, Cacaüyari  
mecani'uxieca, mecatenitave'erieca  
naima, menanuyehaitürüveni,  
metenyucatave'erieca,  
metenicuvautüveni 'axa que  
mütiyuruva, yu'uquiyarima  
mepücava'enie. <sup>31</sup>Yu'iyari  
mepüca'enie vatate'acacu,  
yamepücatecahu que memutiyuane,

mepüses'e'i, mepücayunütüanüa,  
mepücateyucanenimaya. <sup>32</sup>Müme  
mepütehetima tita Cacaüyari  
mütixata tiheiserietüme, quename  
yunaitü müya memüteyurie vahesie  
tinaque memücuinicü 'utaitü.  
Müme masi müya mecatenyurieca,  
masicutari meninaqui'aca hipatü  
yamemüteyuriecü.

### Cacaüyari heiseriemecü que mütivaranutaxürüva

**2** 'Ayumieme 'ecü sepa que  
pemüpaicü pemüniuquixie,  
'ahesie mieme pepücataniuni. Xeime  
que pemütiniuquima, mücücü  
pepü'aniuquima. Cari yaxeicüa  
petiniyurieneni 'ecü müpaü que  
pemütiniuquixie. <sup>2</sup>Tame müpaü  
tepütemate, Cacaüyari yuri haitü  
müvaranutaxürüvacü müme  
müya memüteyurie. <sup>3</sup>Camüsü  
'ecü pemüvanuquima müme  
müya memüteyuruva, vahepaü  
petiyurienetü queri peticu'eriva  
'ecü pepütavicueni quepaucua  
Cacaüyari masi'anutahüani.  
<sup>4</sup>Mesü cauca pe'ixani'eri  
cuini mieme 'aixüa que  
mütiuca'iyari que mütita'icueva  
que mücatiyumexüütüa. Cauca  
'asipecatimate Cacaüyari  
'aixüa mütiuca'iyaricü para  
pemütihayevanicü que  
pemütüyuriene. <sup>5</sup>'Ecüsü 'a'iyari  
müse'licü pemüca'avaüriyacü  
pemütihayevanicü que  
pemütüyuriene, 'ahesie mieme  
pepüti'utane haxüa, 'iya  
tucarisieque quepaucua  
pemühecarieni, quepaucua  
masiücütü mayani heiseriemecü  
que mütivaranutaxürüva Cacaüyari.

<sup>6</sup>Mücü que memüteyurie  
pütivapitüani yuxexuime.

<sup>7</sup>Müme mete'uca'enivatü 'aixüa  
meteyuruvatü memütecuvautüve  
visi me'ananetü que memüte'acüne,  
'aye'amete que memütehe'erivani,  
que memücatetipüne, müme  
nivapitüamücü yuheymecü  
memayeyuyurinicü.

<sup>8</sup>Mümesü yuhesie mieme  
xeicüa memü'ayumiemete,  
yamemücatecahu tita yuri  
mürainesie, yamemütecahu  
tita mücatiheiseriesie püta,  
müme haxüa canivapitüamücü  
vahecätü. <sup>9</sup>Nivahiveritüamücü  
niva'uximatüamücü yunaime  
teüteri yu'iyarisie 'axa  
memüteyuruva, Huriyusixi  
meri, Cüriyecusixita.

<sup>10</sup>Nivapitüamücü visi me'ananetü  
memacü necü, 'aye'amete  
memü'erivanicü, yu'iyarisie  
memüca'uximatüaricacü  
tivapitüani yunaime 'aixüa  
memüteyuruva, Huriyusixi meri,  
Cüriyecusixita.

<sup>11</sup>Cacaüyari yücü pücativaxeiya  
teüteri. <sup>12</sup>Queyupaümetü 'inüari  
niuquiyari mecahexeyatü  
'axa memüteyurie, müme  
mepücuini 'inüari mecahexeyatü.  
Queyupaümetü 'inüari niuquiyari  
mehexeyatü 'axa memüteyurie,  
müme 'inüari manuyünapäü  
mepanutaxüriyani. <sup>13</sup>Müme  
memi'enie xeicüa 'inüari  
niuquiyari, müme heiserie  
mepücahexeiya Cacaüyari hüxie.  
Müme yamemütecahu 'inüari  
niuquiyari que maine, müme  
püta heiserie mecanipitüaricuni.

<sup>14</sup>Müme memücahuriyusixi

'inüari niuquiyari memücahexeiya,  
quepaucua yücümana  
yamemüteyurie que maine 'inüari  
niuquiyari, sepa 'inüari niuquiyari  
memücahexeiya, 'inüari niuquiyari  
mehexeyatü mepacüne yücümana.

<sup>15</sup>Mümeri mepüyuhecüata  
tita 'inüari niuquiyaricü  
yamütiyuriene metehexeyatü  
yu'iyarisie müraye'uxa.

Va'iyari que memüteyumate  
tinihecüatani vahepaüsita.  
Yuhamatü metecuxatätü, que  
memüteyu'iyaritüa yuhesie  
metenahüpani, yuhesie  
mieme meniutiniucani nusu.

<sup>16</sup>Müpaü catiniyümücü 'iya  
tucarisie quepaucua Cacaüyari  
müvata'ivaviyani teüteri tita  
memüte'uti'avietaxü hepaüsita  
Cürisitu Quesusi varahüavecacu,  
neniuqui 'aixüa manuyüne que  
maine.

#### Huriyusixi 'inüari niuquiyari que memütehexeiya

<sup>17</sup>Mericüte 'ecü Huriyu  
pemütiutaterüvarie, yuri  
pemüti'erie 'inüari niuquiyarisie,  
'aixüa pemüti'acühüave  
Cacaüyarisie pemütiviyacü,  
<sup>18</sup>pemimate tita mütinaque,  
pemütimaive tita 'aixüa  
müti'ane pemütiuta'üquitüaricü  
'inüari niuquiyarisie miemecü,  
<sup>19</sup>pevaranucuhapame memacücüpé  
pemü'a'eri, hecüarivivame  
pemü'a'erie yüvipa memü'uva  
vahasie mieme, <sup>20</sup>ti'üquitame  
pemü'a'erie 'asimemücatemate  
vahasie mieme, türi  
tiva'üquitüvame pemü'a'erie, 'inüari  
niuquiyari pehexeyatü pemeixeiya

tita timaiveme mütimate tita yuri müraine 'uxeicüa, <sup>21</sup>camüsü 'ecü xeime pemüti'üquitüa, pecati'a'üquitüa 'ecü. 'Ecü müpaü pepüticuxata quename 'aixüa ca'ane xüca tinavayani. Mericüte, petinavaya 'ecü. <sup>22</sup>'Ecü müpaü pepüticuxata quename 'aixüa ca'ane micumaüvanicü xeime 'üyaya xeime cünaya. Mericüte, peticumäüva 'ecü. 'Ecü müpaü pepaine quename pevaxani'erie tetexi cacäüyarixiyari. Mericüte, petinava vapini vamavari. <sup>23</sup>'Ecü 'aixüa pepüti'acühüave 'inüari niuquiyari pemexeyacü. Mericüte, pe'itisanatü 'inüari niuquiyari müpaü metecu'erivame petivarayeitüa quename Cacaüyari 'asicayüve. <sup>24</sup>Camüsü, que müre'uxa, que mü'ane Cacaüyari mühücü 'axa canixasivani nuivarite vasata xecümana.

<sup>25</sup>Xitequiya 'inüariyari camaniparevieca xüca 'inüari niuquiyarisie yapeticamieni. Masi xüca 'inüari niuquiyari petisanatü peyüaneni, sepa xitequiya 'inüariyari pemexeiya, peca'inüasietü pepa'ayeitüa. <sup>26</sup>Masisü xüca que mü'ane 'iya 'inüari mücahexeiya yaticamieni que mütiheiserie 'inüari niuquiyari que maine, 'inüari sepa mücahexeiya, 'inüasiecame cati'erivani 'iya. <sup>27</sup>Que mü'ane yuвайarisie müca'inüasie xitequiyacü, peru meye'atüva 'inüari niuquiyari que maine, mücü 'ahesie pürähüpani 'inüari niuquiyari pemütisanacü, sepa 'utüaricayari pemexeiya sepa 'inüariyari pemexeiya. <sup>28</sup>Que

mü'ane herie xeicüa Huriyu teviyari mühücü, mücü Huriyu pücahücü. Que mü'ane herie xeicüa yuвайarisie xeicüa mü'inüasie xitequiyacü, mücü püca'inüasie. <sup>29</sup>Masi que mü'ane yutaüta mühuriyu, mücü püta Huriyu canihücütüni. Que mü'ane yu'iyarisie mü'inüasie, mücü 'Iyari mainepaü püta pü'inüasie, sepa müca'inüasie 'utüarica müti'eniüriücüpaü. Que mü'ane müpaü mü'ane, teüteri visi mepüca'utiyuaneni hepaüsitana, Cacaüyari püta visi paineni hepaüsitana.

#### Tita rexeiya Huriya hipatü memücahexeiya

**3** Mericüte tita rexeiya Huriyu hipatü memücahexeiya. Que tiparevie xitequiya 'inüariyari. <sup>2</sup>Vaicavamecü piparevie, naimecü. Camüsü meri, Huriyusixi niuqui Cacaüyarisüa mümieme hepaüsita mepuhüritüari. <sup>3</sup>Quete 'aneni xüca hipatü yamecatecahucaitüni. Cacaüyari yacaticamietü que rayeitüarieni müme yamemücatecahucaicü. <sup>4</sup>Pücatixaüsietü. Masi Cacaüyari tita yuri mürainesie yaqueticamieni, sepa yunaitü teüteri memüte'itava, que müre'uxa,

Para 'aniuquicü pemümasiücünicü heiserie que pemürexeiya,

Para heiserie pemüpütüarienicü quepaucua pemütaxanesieni.

<sup>5</sup>Mericüsü tame heiseriemecü yatecatecahucacu xüca masiücütü 'ayani Cacaüyari heiseriemecü que müticamie, que te'utiyuanenisiari

tame. Cacaüyari tiyüane que mücatiheiserie haxüacü rapitü. Tevipaü nepüticuxata. <sup>6</sup>Pücatixaüsietü. Xüca müpaü 'anenique, Cacaüyari quepaü tivata'ivaviyaqueyu cuiepa memütama 'isücamepaü.

<sup>7</sup>Perusü neti'itavacacu ne xüca masiücünü Cacaüyari que müticamie tita yuri mürainesie, masi yeme visi 'anetü mayanicü Cacaüyari, titayari neranunahüiyani ne 'axa tiyuruvamepaü. <sup>8</sup>Müpaü cati'aneniqueyu masi, 'axa temütécühüavarüvapaü, hipatü memutiyanepaü quename müpaü tehaitüca tame, Cümü 'axa tepütëyurieni 'aixüa 'anetü mayanicü te'utiyaatü vaniü. Heiseriemecü mecanixani'erivani müme müpaü memutiyuane.

**Pumave que mü'ane  
heiseriemecü yamüticamie**

<sup>9</sup>Mericiü titanetü. Tame masi 'aixüa tete'anene. Tixaü yemecü. Teteniutahecüata Huriyusixi Cüriyecusixita yunaitü tita 'axa müti'anesie que memüteviya, <sup>10</sup>que müre'uxa,

Que mü'ane heiseriemecü  
yamüticamie 'apüca'uyeica ni  
xevitü.

<sup>11</sup>Que mü'ane mütimaive  
'apüca'uyeica,

Que mü'ane micuvaune  
Cacaüyari 'apüca'uyeica.

<sup>12</sup>Yunaitü mepeuyexüri, 'axa  
me'ananetü mepacü 'axeicüa.

Que mü'ane 'aixüa ti'aneme  
mütiyuriene 'apüca'uyeica,  
Xevitü tüma pumave.

<sup>13</sup>Tivaxürüvame müqui terüya  
canihücütüni reutenitü.

Mepüte'irüma yuneniciü.

Xaye 'uhayeya vateta payeca.

<sup>14</sup>Vateta pühüne 'axa 'anuyütü  
hasivitü.

<sup>15</sup>Yü'ücatecü mepüyumexütüa  
xuriya memütayeurienicü.

<sup>16</sup>Yuhuyeta mepüte'uca'una  
mepütëyuhiveritüa.

<sup>17</sup>Huye haque mücati'uximatüa  
mepücahemaririe.

<sup>18</sup>Mepücateheiyehüvirie Cacaüyari  
yuhesüa.

<sup>19</sup>Hicü tame müpaü tepütëmate,  
naime 'inüari niuquiyari que maine,  
pütivarutaxatüa müme 'inüari  
niuquiyarisie memüteviya, yunaime  
vateni müranunamacü, Cacaüyari  
müvataxanetacü yunaime cuiepa  
memütama. <sup>20</sup>Cacaüyari hüxie  
'inüari niuquiyari que maine  
yamütiyuricü, mücücü ni xevitü  
tevi heiserie pücapitüarieni. Masi  
'inüari niuquiyaricü pütimate tita  
'axa müti'ane.

**Heiserie que mütipitüariva  
yuri müti'eriecü**

<sup>21</sup>Hicüri masi, masiücütü  
canayani Cacaüyari heiserie  
que mütiyupitüva, sepa 'inüari  
niuquiyari mumavenique. 'Inüari  
niuquiyari, texaxatamete  
vaxapayarita yacatinihécüatani.

<sup>22</sup>Cacaüyari heiserie que  
mütiyupitüva yuri ti'eriecacu  
Qesusi Cürisitusie, mücü  
nimasiücünü, heiserie que  
mütivapitüa yunaime yuri  
memüte'erie. Yücü mepüca'anene.

<sup>23</sup>Axa mepüte'uyuri yunaitü,  
yunaitü mepüca'aye'axüavave  
Cacaüyari visi müti'vaxeyiacü,

<sup>24</sup>heiserie mepupitüarie

'asimecatecuetatüarietü 'aixüa mütiuca'iyaricü 'iya, Cürisitu Quesusi müvatixünacü.  
<sup>25</sup>Cacaüyari nicayeni 'iya 'aixüa miyurienicü yuxuriyacü temüteheuyehüviyarienicü xüca yuri tete'erieca. Müpaü tiuyurieca masiücüme nayeitüani heiserie que mürexeiya, sepa mücattivacühüavecai tita meripai 'axa memüte'uyuri hepaüsita, Cacaüyari mücayumexüütüacaicü 'ana. <sup>26</sup>Nicayeni masiücüme mayeitüanicü hicü, heiserie que mürexeiya. 'Ayumieme mücü heiserie canexeiyani, heiserie canipitüanita que mü'ane 'amuyeica yuri ti'erietü Quesusisie.

<sup>27</sup>Hicüri quepaü 'aixüa tiyücühüaveni yuhepaüsita. Havaicü pücayüve. Mericüte que mü'ane 'inüariyaricü catiyüve. Tita mütiyuriene, mücü ti'inüariyari va'atü. Tixaüsietü. Yuri que müti'erie, mücü cani'inüariyaritüni püta. <sup>28</sup>Tame 'ipaü tetenitamaica, teüteri heiserie mecaniupitüarieni yuri memüte'eriecü, sepa yamemücate'uyurienique 'inüari niuquiyari que maine.

<sup>29</sup>Mesü Cacaüyari Huriyusixi xeicüa tivacacaüyari. Memücahuriyusixita cativacacaüyari. Hü, memücahuriyusixi canivacacaüyaritüni. <sup>30</sup>Mericüte, Cacaüyari caniyuxeveni. Heiserie nivapitüamücü müme xitequiya 'inüariyari memexeiya, müme yuri memüte'eriecü. Heiserie nivapitüamücüta müme xitequiycü memüca'inüasie, müme yuri memüte'eriecü. <sup>31</sup>'Ayumieme

nepaine, xüanacüa tetehayeitüa 'inüari niuquiyari xüca yuri tete'erieca. Tixaüsietü. Tepiseiriya püta 'inüari niuquiyari.

#### 'Apurahami que mütiuyuri

**4** Mericüte que te'utiyaneni tita 'Apurahami mütiucaxei hepaüsita. Mücü yateva canita'uquiyaritüni hesiena temüyecü. <sup>2</sup>'Ipaü teputiyuane, xüca 'Apurahami heiserie 'upitüarienique tixaütü mütiuyuricü, caniyüveniqueyu 'aixüa mütiyücühüaveni yuhepaüsita. Masi Cacaüyari hüxie pücayüve. <sup>3</sup>Que haine 'utüarica xapayari. 'Apurahami yuri tinita'eririeni Cacaüyari, 'ayumieme Cacaüyari heiserie hexeyame nimaicaitüni 'iya, paine. <sup>4</sup>Que mü'ane tixaü mütiyuriene, tita müti'iva 'imiquieri püca'eriva. Peuyevese masi menu'unicü. <sup>5</sup>Que mü'ane püta 'asicatiyurienetü yuri müti'eri 'iyasie, müme memücaheyexeiya Cacaüyari que mü'ane heiserie müvapitüasie, mücü heiserie hexeyatü canimarivani yuri müti'eriecü. <sup>6</sup>Ravirita müpaü canaineni tevi que mütiyutemavie, quepaucua Cacaüyari heiserie hexeyame mimate, sepa tixaü mücattiuyurienique,

#### <sup>7</sup>Mecaniyutemamavieca

quepaucua  
 memüteheuyehüviyarieni  
 'Inüari que memüte'utisanaxü,  
 Quepaucua tita 'axa memüte'uyuri müranucanamieni.

<sup>8</sup>Caniyutemavieca mücü tevi, Ti'aitame xüca 'axa tiyurieneme ca'erieca.

<sup>9</sup>Meriçüte 'ipaü meteyutemamavie müme xitequiya 'inüariyari memexeiya xeicüa. Müme memüca'inüasieta, müpaü mecateyutemamavie. Müpaü teputiyuane, 'Apurahami yuri müti'eriecaicü, 'ayumieme heiserie hexeyatü canimarivacaitüni. <sup>10</sup>Que 'anetü müpaü ti'erivacai. Xitequiya 'inüariyari rexeyacai 'ana, pücaheixeyacai nusu. Xitequiya 'inüariyari pücahexeyacai, masi püca'inüasievecai. <sup>11</sup>Xitequiya niutanaqui'erieni 'inüaritüme. Caniuseyumarieni heiserie mupitüariecü yuri tiuta'erieca mexi xitequiya 'inüariyari cahexeyacai. 'Ayumieme yunaitü yuri memüte'erie xitequiya 'inüariyari mecahexeyatü, müme va'uquiyari nayani, müme heiserie mehhexeyatü memümarivanicü. <sup>12</sup>Mümëta xitequiya 'inüariyari memexeiya va'uquiyari nayani, müme xitequiya 'inüariyari xeicüa memexeiya pücatixaü, masi müme yamemütecahuta ta'uquiyari 'Apurahami huyetana yuri que müti'eriecai xitequiya 'inüariyari cahexeyatü.

**Yuri ti'eriecacu hesiena que mütiunaquixü tita mütiutaxasie**

<sup>13</sup>Quepaucua 'Apurahami müpaü mütiutahüavarie, nivemamata, quename hesiena tinaquequecai naitü cuie, 'inüari niuquiyari hexeyatü müpaü pücatiutahüavarie. Heiserie 'upitüarieca püta yuri mütiuta'ericü, müpaü pütiutahüavarie. <sup>14</sup>Xücarì müme 'inüari niuquiyarisie memüteviya vahesie tinaquënicue,

xüanacüa xeicüa yuri tepüte'eriecaqueyu, yacü xeicüa müpaü pütiutahüavariënicueyu 'iya. <sup>15</sup>Inüari niuquiyari haxüa pütiyupitüva. 'Inüari niuquiyari cacuavecacu, püca'itisana.

<sup>16</sup>'Ayumieme yuri ti'eriecacu müpaü cani'aneni, para müpaü mütiyünicü 'iya 'aixüa tiuca'iyaricacu, tita mütitaxatüa müseiriyariënicü yunaime nivemama vahesie mieme, müme 'inüari niuquiyarisie memüteviya vahesie mieme xeicüa pücatixaü, masita müme 'Apurahamipaü yuri memüte'erie vahesie mieme. Mücü tanaime canita'uquiyaritüni, <sup>17</sup>que müre'uxa, Ne yumüireme nuivarite va'uquiyari nepümasi'ayeitüa. Cacaüyari hüxie yuri pütiuta'eri hesiena, que mü'ane müquite müvaranutanieritüva, que mü'ane mütiutahüave tita 'emücatiue mütinënicü, mücü hesie.

<sup>18</sup>Mücü que mücatiüvecai yuri müti'eriecacü ta'icuevatü, ta'icuevatü yuri tini'eriecaitüni. 'Ayumieme yumüireme nuivarite va'uquiyari nayani, müpaü que mütiutahüavarie, Müya meyupaümetü mecanacünicuni 'anivema. <sup>19</sup>Püca'utaveranaxü yuri ti'erietü, sepa me'erivacai yuvaiyari que mütimüximëcai 'esivatücacu xei sienituyari viyari mexeyacacü, sepa me'erivacai Sara mücayüvecai mütinivenicü. <sup>20</sup>Püca'yuxamuriecai yücü ticu'erivatü tita Cacaüyari mütitaxatüa hesiena mütinäquequecaicü, mücü hepäüsita, yuri cati'erietü pücahatüa. Masi yuri que müti'eriecai pütürücariyariecai,



visi 'ixatatu Cacaüyari. <sup>21</sup>Müpaü pütiumaical, tita mütitahüavixü 'iya quename yatiyurieniquecai, müpaüta niyüvecaitüni yamütiyurienicü. <sup>22</sup>'Ayumiemicü heiserie pitüaricame ni'erivacaitüni, yuri müti'eriecaicü.

<sup>23</sup>Que müti'erivacai 'iya, hesiena mieme xeicüa pücaraca'utüarie, <sup>24</sup>masi tahesie miemeta müpaü pütü'utüarie. Müpaüta tepüte'erivani tame yuri tete'erietü 'iyasie que mü'ane müquite vasata menucuquetüa Tati'aitüvame Quesusi, mücü hesie. <sup>25</sup>Mücü püyetüiya ta'aurie temaxüricü, panucuquetüarie heiserie temüpütüarienicü.

**Tita temütehexeiya heiserie temüpütüaricü**

**5** Mericüte heiserie temüpütüaricü yuri tete'erietü, 'ayumieme 'aixüa tecatenitaxeiyani Cacaüyarimatü, Tati'aitüvame Quesusi Cürisitu yatatipitüacacu. <sup>2</sup>Mücü yatatipitüacacuta, yuri tete'erietü müpaü teni'itüarica, Cacaüyari 'aixüa tiniuca'iyarini tahesie mieme. 'Ateputi'u 'iya 'aixüa tiuca'iyaricacu. 'Aixüa tepütetacühüave yuri temüte'erieciü teta'icuevatü Cacaüyari visi mütatixeiyanicü. <sup>3</sup>Mücü meta, 'aixüa tepütetacühüave temü'uximatüaricü müpaü tetemaitü, xüca te'uximatüarica, tete'uca'enivatü tepacüne. <sup>4</sup>Xüca tete'uca'enivani, te'inüasietü tepacüne. Xüca te'inüasieca, teyüvavetü tepacüne yuri temüte'eriecacü teta'icuevatü.

<sup>5</sup>Müpaü teteta'icuevatü xüca yuri tete'erieca, tepücateviyasitüarieni, Cacaüyari ta'iyarisie mütihüniyacü tasinaqui'erietü, 'Iyari Mütiyupata temüpütüarie yatiyurienecacu.

<sup>6</sup>Cürisituri, quepaucua temuveraranicai cuxi tame, caniumüni tame Cacaüyari temüca'ayexeiya tahesie mieme, tucari 'aixüa mü'ane 'anuyeyacu. <sup>7</sup>Hicümüsü haveri mieme xeicüa xevitü pümüniqueyu tevi heiseriemecü yamüticamiesie mieme. Capücarai yuvaüriyaniqeyu 'asita mumünicü tevi 'aixüa mütiuca'iyarisie mieme. <sup>8</sup>Masi Cacaüyari 'ipaü tiuyurica masiücüme nayeitüani que mütatinaqui'erie, Cürisitu tahesie mieme mumücü tame 'axa teteyuriecacu cuxi. <sup>9</sup>Xuriyayacü heiserie temüpütüaricü hicü, masi vaücava mücü pütasitaviceisitüani temücahecariecacü. <sup>10</sup>Te'eye'uniecacu Cacaüyari nu'aya mumücü, tepupasie 'aixüa temütetaxeiyanicü Cacaüyarimatü. 'Ayumieme 'aixüa tetetaxeiyatü, masi vaücava tepütaviceisitüarieni 'iya mayeyuricü. <sup>11</sup>Mücü meta, 'aixüa tepütetacühüave Cacaüyari teha'erivatü Tati'aitüvame Quesusi Cürisitu yamütiuyuricü. Mücü canihücütüni que mü'ane mütasi'upataxü 'aixüa temütetaxeiyanicü.

**'Arani Cürisitupaü que mü'ane**

<sup>12</sup>Merücüsü tita 'axa müti'ane catiniuneni cuipea tevi müyuxevicai 'axa mütiuyuricü. 'Axa mütiuyuricü caniumüni. Müpaürita 'ayumieme yunaitü

teüteri mecul'itü menacüne,  
yunaitü 'axa memüte'uyuricü.

<sup>13</sup>'Inüari niuquiyari caxuavecacu  
cuxi, cuiëpa memütama 'axa  
mepüteyuriecäi. Peru 'inüari  
niuquiyari caxuavecacu, tevisie  
pücarahüiva 'axa xüca tiuyurieni.

<sup>14</sup>Masi 'Arani meri, 'arique yunaitü  
Muisexi 'amuyeicacapai, yunaitü  
me'uyuitüarieca mepucüi, sepa  
hepaüna 'axa memücate'uyuri,  
'Arani ta'aurie mavepaü que  
mücatiheiseriecai. Mücü 'Arani  
que mü'ane 'umamieniquecai  
cani'üquisicayaritüni.

<sup>15</sup>Peru ta'aurie que mürave,  
müpaüta yaxeicüa tepücate'umiquie.  
Mücü müyuxevicai ta'aurie mavecü,  
hipatü mepucui, peru masi vaücava  
'aixüa pütüuca'iyari Cacaüyari, masi  
vaücava mepüte'umiquie, xevitü  
tevi Qesusi Cürisitütütü 'aixüa  
tiuca'iyaritü que mütümüriyaxü  
'imiquieri hipame vahesie  
mieme. <sup>16</sup>Tita mütivarumi, mücü  
müpaü püca'ane que mütiuyü  
quepaucua mücü müyuxevicai  
'axa mütiuyuri. Heiva 'axa  
mütiuyuricü, nanutahüiyani  
'inüasietü. Masi que mütivarumi  
müixa ta'aurie me'axüriecu,  
heiserie mecaniupitüarieni  
püta. <sup>17</sup>Yuxevitü ta'aurie  
mavecü, yunaitü mepuyuitüarie  
memücüi'inicü xeimecü. Masi  
vaücava müme memüyuvaüriya  
memitanaqui'erienicü cuini  
mieme que mütiuca'iyari 'iya,  
que mütümüriyaxü yu'imiquieri  
heiserie vapitüatü, müme  
me'ayeyuyuritü mepüte'aitani tevi  
müyuxevi Qesusi Cürisitütütü  
müpaü mütiuyuricü.

<sup>18</sup>Hicüri 'ayumieme,  
xevitü ta'aurie mavecü que  
memüte'anutaxüriya yunaitü  
teüteri, müpaürita yaxeicüa yunaitü  
teüteri heiserie mecaniupitüarieni  
memayeyuyurinicü, xevitü  
heiseriemecü yamütiuyuricü.

<sup>19</sup>Xevitü tevi yamücaticameicaicü,  
hipame 'axa teyuruvamete que  
mütivarayeitüa, müpaürita yaxeicüa  
hipame heiserie mehexeyame  
nivarayeitüamücü xevitüta  
yamüticameicaicü.

<sup>20</sup>'Inüari niuquiyariri punua masi  
yemecü mütitamüirecü ta'aurie  
que memüte'axürie. Masisüari  
yemecü tiutamüriyacu tita 'axa  
memüte'uyuri, 'anata Cacaüyari  
masi cuini mieme cuxi 'aixüa  
pütüuca'iyaricai, <sup>21</sup>tita 'axa müti'ane  
que mütüvacuyuitüvacai vacui'itü,  
müpaürita yaxeicüa Cacaüyari  
'aixüa tiuca'iyaritü müvayuitüanicü  
heiserie vapitüatü, tucari mücaxüve  
vapitüatü, Tati'aitüvame Qesusi  
Cürisitu yatüvapitüacacu.

**Que temüte'ucui 'axa  
temücateyuriecacü, que  
temüte'ayeyuyuri  
Cürisitusie teteviyatü**

**6** Mericüte que te'utiyaneniri.  
Capüca müpaü 'axa  
teteyurietü tetahayevani, 'iya  
masi cuini mieme 'aixüa  
mütiuca'iyarinicü. <sup>2</sup>Pücatixaüsietü.  
Tameri temucui para 'axa  
temücateyuriecacü, queri  
tete'ayeyuyurini müpaü teteyurietü.  
<sup>3</sup>Capüca 'asixecatemate, tame  
quetapaümetü temuca'üyarie  
Cürisitu Qesusisie temüteviyanicü,  
tame tecanica'üyarieni hepaüna

temücuinicü. <sup>4</sup>'Ayumieme hamatüana tepucateuquiexüa müpaü tete'uca'üyarieca temücuinicü, para yaxeciüa hepaüna temu'uvanicü te'utihecuariyarieme que temüteyurie te'ayeyuyuritü tameta, müpaüta Cürisitu manucuquepaü müquite vasata ta'uquiyari visi mü'ane 'enucuquetüaca.

<sup>5</sup>Quepaucua hepaüna temucui hamatüana tecanitaxevire. 'Ayumieme masisüari hepaünata tenanucu'uicuni. <sup>6</sup>'Ipaü tepütemate, que temü'anenecai matüaripai, tecaniucui'liva hamatüana curuxisie, müca'unarienticü tita 'axa temüte'uyuri tavaiyarisie, tavari vaüriyarica temücate'uximayacacü tita 'axa müti'anesie mieme. <sup>7</sup>Que mü'ane mümüqui, mücü heiserie pexeiya 'axa mücatiurienenicü. <sup>8</sup>Tame Cürisitumatü temucucü, 'ayumieme yuri teteni'erieca hamatüana tepayeyurini. <sup>9</sup>Müpaü tepütemate, Cürisitu müquite vasata 'anucuqueca hutarieca pücamüni. Pücaýve mücuyuitüarienticü mumünicü. <sup>10</sup>Que mütiümü, tita 'axa müti'ane hepaüsita caniumüni xei mieme. Que mürayeyuri, Cacaüyarisie mieme canayeyurini. <sup>11</sup>Xemeta yaxeciüa müquite xequenyu'erieca 'axa xemücateyuriecacü, xe'ayeyuyurime püta xequenyu'erieca Cacaüyarisie mieme, Tati'aitüvame Cürisitu Quesusisie xetevíyatü.

<sup>12</sup>'Ayumieme xevaiyari mümüximesie xe'u'uvatü, xepücacuyuitüarienti 'axa xemüteyuriecacü

yaxemütecahunicü que mütiucahive'erie xevaiyari.

<sup>13</sup>Xepüca'iyetuaniri yuvaiyari para cümana 'axa xemüteyuriecacü heiseriemecü yaxecatecahutü. Masisü müme memanutanenierixü müquite vasata vahepaü xeyüatü, xequenyuyetuaca Cacaüyari müxecuyuitüarienticü xevaiyari, heiseriemecü yatiyurienetü. <sup>14</sup>Xepücaývaveni xemücuýitüarienticü 'axa xemüteyuriecacü. Xepücaýa 'inüari niuquiyari mütxe'aitüacü. Que mü'ane 'aixüa mütiuca'iyari mütxe'aitüacü püta xecaniyüaca.

**Que temüte'uximaya tita mütiheiseriesie mieme**

<sup>15</sup>Qesü 'aneni. 'Inüari niuquiyari mücatati'aitüacü, que mü'ane 'aixüa mütiuca'iyari püta mütatü'aitüacü, 'ayumieme 'axa teteyurieca. Pücatixaüsietü. <sup>16</sup>Capüca 'asixecatamate, que mü'anesüa xemüyuyetua xemüte'uximayacacü 'iyasie mieme yaxemütecahunicü que maine, vaüriyarica te'uximayatamete xepühüme que mü'anesie mieme yaxemütecahu que maine. Xüca tita 'axa müti'anesie mieme xete'uximayaca, xecanicuicuni. Me xüca xete'uximayaca yaxetecahutü Cacaüyari que maine, heiserie xehexeyatü xecanacünicuni. <sup>17</sup>Pamüpariyusi nepipitüa Cacaüyari, sepa tita 'axa müti'anesie mieme xemüte'uximayacai, yu'iyaricü yaxetecahutü xenacüne que xemüteyutüarienticü yaxete'üquitüarientü. <sup>18</sup>Xe'utixüarica 'axa

xemücateyuriecacü, tita mütiheiseriesie mieme xete'uximayatü xenacüne.

<sup>19</sup>Tevipaü nepüticuxata xemüveraranicü teüteri vahepaü xete'u'iyaritü. Xepüyuyetuacai xevaiyari müti'uximayacacü tita mücati'itiyasie mieme tita 'inüari mütisanasie mieme, 'inüari xemütisananicü. Hicürita yaxecüa xequeneyuyetua xevaiyari müti'uximayacacü tita mütiheiseriesie mieme, 'iyasie mieme xemüpasienicü.

<sup>20</sup>Quepaucua tita 'axa müti'anesie mieme xemüte'uximayacai, xepuxüxünicai tita mütiheiserie hepaüsita. <sup>21</sup>Que xete'utixuxuaverecai 'ana. Hicü xepüyuteteviya mücü hepaüsita. Que mü'ane müpaü mütiyuriene, mücü müquitü canayeimücü.

<sup>22</sup>Hicü püta xe'utixünarieca 'axa xemücateyuriecacü, Cacaïyarisie mieme xete'uximayatü, 'ayumieme xepütixuxuavere xemüpasienicü 'iyasie mieme. Que mü'ane müpaü mütiyuriene, mücü tucari mücaxüve hexeyatü canayeimücü.

<sup>23</sup>Camüsü, que mü'ane 'axa mütiuyuri, mücü müyacü 'apürapiniyarieni, masi Cacaïyari que mütatimicua, mücü tucari mücaxüve catanamicuacamücü Tati'aitüvame Cürisitu Quesusisie teteviyacacü.

**Memüneneüque vahesie que mütimasiücü 'üquisica**

**7** Ne'ivamarixi, xeme xemütemate que mütitita 'inüari niuquiyari, nepütixetaxatüaniqueyu. Capüca

'asixecatemate, 'inüari niuquiyari püti'aitüa tevi mexi 'ayeyuri xecüa. <sup>2</sup>'Inüari niuquiyari que maine, peuyevese 'uca mürecacüna yücünasie mütiyianicü mexi 'ayeyuri 'iya. Xüca cünaya 'umüni, puxünixü, 'inüari niuquiyari racüna müxata 'asipücahaine hepaüsitana. <sup>3</sup>Mericüte, xüca xeime 'uquisie tiviyani mexi cünaya 'ayeyuri, 'uca micumaüva que mü'ane mücayücüna canitaterüvariemicü. Mesü xüca 'umüni cünaya, puxünarie, 'inüari niuquiyari 'asicañecacuri hepaüsitana. 'Ana xüca xeime 'uquisie tiviyani, 'uca micumaüva que mü'ane mücayücüna pücahücütüni.

<sup>4</sup>Müpaüta yaxecüa xeme ne'ivama, Cürisitu yuvaiyarisie mumieriecü, xemeta xeniucui'iva 'inüari niuquiyari 'asimücahainenicü xehepaüsita. 'Ayumieme xeimesie xepüteviya, que mü'ane müquite vasata manucuquesie, Cacaïyarisie mieme temutixuxuaverenicü. <sup>5</sup>Quepaucua teüteri vahepaü temüte'u'iyaricai, 'axa que temüteyuriecäi tetetacahive'erietü, tavaiyari niucuyütüarivacaitüni, 'inüari niuquiyari yataticuyütüvacacü. 'Ayumieme teniucui'ni que temüte'utixuxuaverecai. <sup>6</sup>Hicüri tenixüxünini, 'inüari niuquiyari 'asipücahaine tahepaüsita temucucü tita mütativiyacai mücatasiviyacüri. 'Ayumiemicü hecuamecü 'Iyari que maine teteni'uximayaca, 'utüarica ye'imecü que müti'eniürüücü püta tepücate'uximaya.

**Tita 'axa müti'ane nehesisie  
que mütiyeca**

<sup>7</sup>Queri te'utiyaneni. Capüca 'inüari niuquiyari 'axa 'ane. Pücatixaüsietü. Masi xüca 'inüari niuquiyari caxuavenique, ne nepücaretimaniqueyu 'axa que nemütiyuriene. Hive'erica nepücahetimaniqueyu xüca 'inüari niuquiyari müpaü ca'anuyünenique, Pepücati'acahive'erica.

<sup>8</sup>'Aisicayari muxuavecaicü, tita 'axa nemütiyuri nisütüani nesicuyitüvatü para naimecü nemütinecahive'erica. Xüca 'inüari niuquiyari 'umavenique, tita 'axa müti'ane pümüquiniqueyu. <sup>9</sup>Nesü heiva 'inüari niuquiyari necahexeyatü 'anepuyeicacai. Quepaucua 'aisica münesi'u'axixü, tita 'axa nemütiyuriencai nanutanieri. Neri neniumüni. <sup>10</sup>Mücü 'aisica münesi'anutanieritüaniquecai, que nemütitaxe, mücü pünesi'umi püta. <sup>11</sup>Peru 'aisica muxuavecaicü, tita 'axa nemütiyuri nisütüani neti'irüviyatü, mücü 'aisicacü pünesi'umi.

<sup>12</sup>'Ayumieme 'inüari niuquiyari Cacaüyarisüa canimiemetüni, 'aisicata hesüana pümieme, püheiserie, 'aixüa pü'ane.

<sup>13</sup>Meriçüte, mücü 'aixüa mü'ane tihücü tita münetime. Pücatixaüsietü. Masiri, para mümasiücünicü 'axa que müti'ane, tita 'axa nemütiyuri pünesi'umi, 'icuyitüvatü tita 'aixüa müti'ane. 'Ayumieme 'aisica muxuavecaicü, cuini mieme 'axa 'anetü nayani tita 'axa nemütiyuri.

<sup>14</sup>Tame tepütemate, 'inüari niuquiyari 'iyarisie pümieme. Ne püta teüteri vahepaü nepütiuca'iyari xeiçüa. Tita 'axa müti'ane pünesi'unanai. <sup>15</sup>Nepüca'imate tita nemütiyuriene. Tita münetime yanepücatiyuriene, masi tita nemüti'uxie yanepütiyuriene. <sup>16</sup>Hicü mericü, xüca tita mücanetinaque yanetiurieneneni, 'ayumieme 'aixüa nepütixeyia 'inüari niuquiyari, quename 'aixüa 'ane ne'utaitü. <sup>17</sup>Hicü neri nepücahücü que mü'ane müpaü mütiyuriene, masi tita 'axa müti'ane nehesisie mütiyeca, mücü yapütiyuriene. <sup>18</sup>Ne nepütimate, nehesisie tita 'aixüa müti'ane mücatiyeca, teüteri vahepaü que nemütiuca'iyari. 'Aixüa nepütiyurieneniqueyu peru nepünetexie 'aixüa que nemütiyurieniqueyu. <sup>19</sup>'Aixüa que nemütiyurieniqueyu, müpaü nepücatiyuriene. Masi 'axa que nemücatiyurieniqueyu, müpaü püta nepütiyuriene. <sup>20</sup>Meriçüte xüca yanetiurieneneni que mücanetinaque, neri müpaü nepücatiyuriene, tita 'axa müti'ane nehesisie mütiyeca püta yapütiyuriene.

<sup>21</sup>'Ipaü nepüretima 'inüari hepaüsita, quepaucua nemünevaüriya 'aixüa nemütiyurienicü, tita 'axa müti'ane nehesisie 'apuve. <sup>22</sup>Que nemütinemate ne'iyarisie, nepünetemavi Cacaüyarari 'inüariyepa hepaüsita, <sup>23</sup>peru 'inüari yicü 'aneme nepüxeyia nevaiyarisie tiviyame. Mücü 'inüari, que nemütinemate 'inüariyarimatü mepyucuitüve. Mücü 'inüari 'axa

mü'ane nevaiyarisie mütiviya pünesi'uvi.

<sup>24</sup>Ne xüa 'ui nepü'uximatüarie.

Quepai pünesitavicueisitüani 'icü caxari que mütiumü.

<sup>25</sup>Pamüpariyusi nepipitüa Cacaüyari, Qesusi Cürisitu mütati'aitüvame nesipareviecacu. 'Ayumiemi, que nemütinemate, nepüti'uximaya Cacaüyari 'inüariyaside mieme, teüteri vahepaü que nemütiuca'iyari püta, nepüti'uximaya 'inüari 'axa mü'anesie mieme.

### Que temüte'ayeyuyuri

#### 'Iyarisie teteviyatü

**8** 'Ayumieme hicürixüa müme Cürisitu Qesusisie memüteviya mepüca'anutaxüriyaniri, müme 'amemüca'u'uva teüteri vahepaü mete'u'iyaritü, 'Iyari püta que maine 'amemu'uva. <sup>2</sup>Mücü 'inüari cümana 'Iyari tucari mipitüa que mü'ane Cürisitu Qesusisie mütiviya, mücü pünesi'uxünaxü, mücanesicuyitüvanicü mücü 'inüari cümana 'axa nemütiyuriencai, cümana nemümü. <sup>3</sup>'Inüari niuquiyari que mücatiüvecai, que mütiveranicai temüteütericü, Cacaüyari püta nenutahüani tita 'axa müti'ane que memüteyurie teüteri vahepaü mete'u'iyaritü. Nenutahüani yunive heyenü'aca teüteri 'axa memüteyuruva vahepaü 'aneme, heiyenü'aca tita 'axa müti'ane hepaüsita. <sup>4</sup>Müpaü catiniuyurieni, tita mütiheiserie 'inüari niuquiyari que maine maye'atüarienicü tahesie, tame 'atemüca'u'uva teüteri

vahepaü tete'u'iyaritü, 'Iyari püta que maine 'atemu'uva tahesie.

<sup>5</sup>Müme teüteri vahepaü mete'u'iyaritü 'amemu'uva, müme teüteri vahepaü mepüteyumate. Müme 'Iyari püta que maine 'amemu'uva, müme 'Iyaripaü mepüteyumate. <sup>6</sup>Xüca teüteri vahepaü tiyumaica, canimümücü. Xüca 'Iyaripaü tiyumaica, canayeyuricamücü, yu'iyarisie püca'uximatüarieca. <sup>7</sup>Que mü'ane teüteri vahepaü mütiyumate, mücü Cacaüyari cani'uxieca. Yapücaticamie Cacaüyari 'inüariyaside, ni müpaü püca'yüve. <sup>8</sup>Müme teüteri vahepaü memüte'u'iyari, müme 'asimepüca'yüvave para Cacaüyari münaqui'acacü.

<sup>9</sup>Xemeri teüteri vahepaü xepücate'u'iyari. 'Iyarisie püta xepüteviya, xücate Cacaüyari 'Iyarieya xehesie yecani. Xüca xevitü Cürisitu 'Iyarieya cahexeiyani, mücü Cürisitusüa pücamieme. <sup>10</sup>Xüca Cürisitu xehesie tiviyani, xevaiyari canimüquini 'axa xemüte'uyuricü, xe'iyari masi canayeyurini heiserie xemupitüariecü. <sup>11</sup>Que mü'ane menucuquetüa Qesusi müquite vasata, mücü 'Iyarieya xüca xehesie yecani, que mü'ane menucuquetüa Cürisitu Qesusi müquite vasata, mücütütü canenutanieritüamücü xevaiyari cuicui'ime, 'Iyarieya xehesie mütiyecä yatiyuriencacu.

<sup>12</sup>'Ayumieme ne'ivama, tixaütü püreuyevese yatemüteyuricacü. Peru pücaheuyevese teüteri vahepaü temüyüacacü que memüte'u'iyari, 'ate'u'uvatü

teüteri que memüte'u'iyari.

<sup>13</sup>Xüca 'axe'u'uvani teüteri que memüte'u'iyari, xepücuini. 'Iyari xepareviecacu xüca xe'imieni tita yuvaiyarisie mütiyuriene tevi, xenayeyuyuricacuni.

<sup>14</sup>Queyupaümeme Cacaüyari 'Iyarieya müvaravitücü, müme Cacaüyari nivemama mecanihümetüni. <sup>15</sup>Xeme 'iyari xepüca'utanaqui'erie väüriyarica xemüte'uximaya hesiena mieme, tavari xemümamacacü. Xenitanaqui'erieni 'Iyari Cacaüyari nivemama müxe'ayeitüa püta. Mücüsie teteviyatü müpaü tepüte'uhiva, Quemasi, 'uquiyari.

<sup>16</sup>Mücü 'Iyari ta'iyarimatü 'axeicüa mepütehecüata quename Cacaüyari türiyamama tehüme. <sup>17</sup>Xüca tetüriyamamatüni, tixaütü tahesie pütinaqueni. Tita Cacaüyari mütatimini tahesie pütinaqueni, Cürisitusie que mütinaquenita, xücate hamatüana tete'ucueine, hamatüanatari visi te'anenetü temayeitüarienicü.

<sup>18</sup>Ipaü nepüticu'eriva, que temütecuine hicü, mücü tixaütü catihücütüme tepü'erieca quepaucua temüxeisitüarieni visi que müti'ane 'uxa'a varie.

<sup>19</sup>Naitü mütiunetüari püta'icueva Cacaüyari nivemama memasiücütü memacünecü, cui vaxeyamütü.

<sup>20</sup>Tita mütiunetüari xüanacüa que mürayeitüari, müpaü mütiyuväüriyacaicü müpaü pücatiuyü. Que mü'ane müpaü 'aneme meyeitüa yamütiuyuricü püta puyü. Ta'icuevatü xeicüa yuri tini'erieca. <sup>21</sup>Tita mütiunetüari 'ayumieme püxünarieni, tita

mütipünive müca'l'aitüacacüri, masi Cacaüyari türiyamama visi memü'anene vahepaü xünitü mayanicü. <sup>22</sup>Müpaü tepütimate, naitü mütiunetüari 'axeicüa ma'aiva, 'axeicüa müticueine hicüque. <sup>23</sup>Mücü meta, tameta 'Iyari temexeiya tita 'umüramesie timiemetüme, siepüre tataütä tena'aivani teta'icuevatü Cacaüyari nivemama temacünecü quepaucua tavaiyari müxünarieni. <sup>24</sup>Müpaü yuri tete'rietü teteta'icuevatü teputavicueisitüari. Peru xüca 'ixeiya tita müticuevie, masi püca'icuevieri. Queri ticuevieca tita mütxeiya. <sup>25</sup>Perusü xüca tel'icuevieca tita temücatexeiya, tenita'icuevani tete'uca'lenivatü.

<sup>26</sup>Müpaürita yaxecüa 'Iyari pütasiparevi que temüteverarani. 'Asitepücatemate tita temüte'itavavirieni que müreyeveve. Mücü 'Iyari masi tahesie mieme nitavavirivani Cacaüyari, ha'aivatü niuquiyari que mücatixuave. <sup>27</sup>Que mü'ane ta'iyari müta'inüata, mücü catinimaica que müticu'eriva 'Iyari, 'iya mitavavirivacü Cacaüyari que mütinaque, müme Cacaüyarisie mieme memupasie vahesie mieme.

#### **Yemecü que temütehe'iva naime**

<sup>28</sup>Tame müpaü tecatenimaica, müme meminaqui'erie Cacaüyari, 'iya nivaparevieca, naime ticuyuitivatü para 'aixüa memü'itüarienicü müme memuta'inieri, 'iya que mütiyuriemücücai meripai. <sup>29</sup>Müme meripai müvamaicai, müme nu'ayapaü me'aneneme

püvarayeitüamücücai meripai, 'iya yumüireme 'ivamarixi vamasica mayanicü. <sup>30</sup>Müme meripai müya me'aneneme müvarayeitüamücücai, müme nivaruta'inieni. Müme müvaruta'inie, heiserie nivarupitüani. Müme heiserie müvarupitüa, visi me'aneneme nivarayeitüani.

<sup>31</sup>Qeri te'utiyaneni xüca müpaü 'aneni. Xüca Cacaüyari tasinaqui'erieca, quepai pütasi'uxive'erieca. <sup>32</sup>Que mü'ane yunive müca'utavicueisitüa, miyetua püta tanaima tahesie mieme, 'iya xüari hamatüana naime pütatiminia. <sup>33</sup>Quepai püvaxanetani müme Cacaüyari müvaranuyexei. Cacaüyari canihücütüni que mü'ane heiserie müvarupitüa. <sup>34</sup>Quepairi püvaranutaxürieni. Cürisitu Qesusi canihücütüni que mü'ane mumü, que mü'ane masi manucque, que mü'ane Cacaüyari serieta macaca, que mü'aneta tahesie mieme mitavaviriva. <sup>35</sup>Quepai pütasipata Cürisitu mücatasinaqui'eriecacü. Xüca te'uximatüarieca, xüca tesaipünarieca, xüca te'utaveiyarieni, xüca teheuhacacuicuni, xüca temamaveni, xüca te'ucueriva'itüarieni, xüca tecui'ivarümeni, mücü naitü que tiyüve. <sup>36</sup>Que müre'uxa,

Taheyemecü tepücü'i'iva 'ahesüa temümiemetecü.

Muxasi memücü'i'ivanipäu teni'erivani.

<sup>37</sup>Sepasü naime, cuini mieme tecatene'ivani 'icü naime 'iya

mütasinaqui'erie yatatipitüacacu.

<sup>38</sup>Ne müpaü nepütinemat, sepa temücuini sepa temayeyuyurini, sepa niuqui tuayamete sepa te'aitamete memüyüaca, sepa tita hicü mütimieme sepa tita 'uxa'a mütimieme, sepa memütürücavi, <sup>39</sup>sepa müreutiteva sepa müreucateva, sepa que mütitita que 'anetü mütiunetüari, mücü püca'yüveni mütasipata Cacaüyari mücatasinaqui'eriecacü, Cürisitu Qesusi mütati'aitüvame que mütatinaqui'erie.

### 'Ixaherisixi que memüte'anayexeyari

**9** Yuri nepaine Cürisitusie netiviyatü. Nepücati'itava, ne'iyari nehamatü yatiniheciatani 'Iyari Mütiyupatasie netiviyacacu. <sup>2</sup>Müpaü nepaine, yemecü nepünehieverie, ne'iyarisie nepüticuine necatihayevatü. <sup>3</sup>Nemeuyehüiyaniqueyu Cürisitusie necativiyatü nemayanicü, ne'ivama vahesie mieme, müme memünemarema que memüte'utinunuiva, müme vahesie mieme. <sup>4</sup>Müme mecani'ixaherisixitüni. Müme Cacaüyari nivemama mepayeitüari, visi ti'aneme mepüte'upitüari, türatute mepupitüari, 'inüari niuquiyari mepupitüari, Cacaüyarisie mieme 'uximayasica mepexeiya, mepüte'utahüavari que memütemiquieniquecai. <sup>5</sup>Ta'uquiyarima mepüva'uquiyarima, vasatata canimietüni que mü'ane heiserie mupitüarie Cürisitutütü, que mütiunuivaxü. 'Iya nai ti'aitame Cacaüyari canihücütüni. 'Aixüa quetixasivani yuheyemecü. Müpaü xEICÜA pÜ'ane.



<sup>6</sup>Perusü Cacaüyari niuquieya pücajutatexie, müpaü püca'ane. Yunaitü 'Ixaherisie memüyecü, müme mepüca'ixaherisixi.

<sup>7</sup>Apurahamisie memüyecü xeiçüa, yunaitü mepücatüriyamama. Masi müpaü paine, 'Isahaquisie memüyecüne, müme 'anivema mecanitaterüvariecuni. <sup>8</sup>Ipaü cani'aneni, türi vaiyarieyasie memüyecü, müme Cacaüyari türiyamama mepücahüme, masisü müme memutinunuivaxü Cacaüyari que mütitahüavixü mütiminiquecai, mümetütü nivemama meputaterüvari. <sup>9</sup>Catinitahüave que mütiminiquecai müpaü haitü, 'Epaucua nepayeneni. 'Ana Sara yunive pexeyaniri.

<sup>10</sup>Mücürita, 'ana Xevecasie yamepüte'inüaricai türi, ta'uquiyari 'Isahaqui muyuxevicai va'uquiyaritücacu.

<sup>11</sup>Mecatinunuivavecacu cuxi, tita 'aixüa müti'ane tita 'axa müti'ane mepücateyurievavecai cuxi para müseiriyaricü tita Cacaüyari mütiyuriemüccai que mütivaranuyeteüxixü, <sup>12</sup>que mü'ane müvaruta'linie yatiyurienetü, sepa tevi que mütiyurienecai. 'Ana Xeveca müpaü pütütahüavari, Masicaya catini'uximayacamücü yumutasie mieme, <sup>13</sup>que müre'uxa, Nepinaqui'eriecai Cacuvu, 'Esahu püta nepu'uxiecai.

<sup>14</sup>Meriçüte, que te'utiyuaneni. Cacaüyari que mücatiheiserie pücatiyuriene. Pücatixaüsietü.

<sup>15</sup>Müpaüri pütitahüavixü Muisexi, Nepinenimaya que mü'ane nemünenimayatamücü, nepi'üviya que mü'ane nemü'üviyamücü.

<sup>16</sup>'Ayumieme sepasü xevitü yamütiyuvaüriya yamütiunanausa, Cacaüyari mütiyucanenimaya canihücütüni que mü'ane müpaü müyüane. <sup>17</sup>'Utüarica niuquiyari müpaü püticühüave Parahuni, 'Ayumieme nepümasi'anucuquetüa, 'ahesie nemütiheçüatanicü que nemütitürücaüye, naisari cuiepa nemücuxasivanicü que mü'ane nemühücü. <sup>18</sup>'Ayumieme caninenimayaca que mü'ane münenimayatamücü, se'ime nayeitüani que mü'ane se'ime mayeitüamücü.

<sup>19</sup>Süricü müpaü pepüneticühüaveni, Meriçüte, titayaricuta tiniuquixie cuxi. Quepai pi'uxive'erieca tita mütiyuriemücü 'iya. <sup>20</sup>Neuxei, 'ecüsüari que pepüpaicü pemitai'eiyanicü Cacaüyari. Tita mütiuveviya que ticühüaveni 'ivevivame, Titayari 'ipaü ne'aneme penetiutavevi, 'utaitü. <sup>21</sup>Camü 'ivevame heiserie carexeiya haxu hepaüsita, xei tapuriyaricü mütitivevienicü xeime xari visi mürapiyacacü, xeimeta 'axa mürapiyacacü.

<sup>22</sup>Sepa Cacaüyari masiüçüme mayeitüamücü que mütiha'a, titaheçüatamütü que mütitürücaüye, quesü yüni xüca cui tiuca'enivatü 'inevieni paüri mühecarieni müha'arisie müca'unaricü. <sup>23</sup>Müpaü pütüyuri mütiheçüatanicü vaüçavamecü visi que müti'ane, visi 'aneme 'ayeitüatü paüri münenimaya, meripai micuha'aritüa visi 'anetü mayanicü. <sup>24</sup>Tamesü tecanühümetüni. Pütasi'uta'linie,

Huriyusixi vasata xeicüa pücatixaiü,  
masi memücahuriyusixi vasatata  
pütasi'uta'inie. <sup>25</sup>Que maine  
Huxeya xapayarisie,

Müme memücaneteüterimatücai,  
neteüterima nepütivataterüva.

'Iya mücanaqui'erivacai,  
münaqui'eriva nepütitaterüva.

<sup>26</sup>Haque müpaü  
memütetahüavarie,  
Xepücaneteüterima,

Mana Cacaüyari mayeyuri  
nivemama mepütaterüvarieni.

<sup>27</sup>Quisariyaxita müpaü  
tiniuhiva 'Ixaheri hepaüsita,  
Sepanetü 'Ixaheri xiüyarimama  
haramarasie mieme xiecaripaü  
memüyupaümenique, hipatü  
xeicüa mecanitavicueisitüariecuni.

<sup>28</sup>Heye'atüatü yuniuqui,  
'imexüitüatü yacatiniyuriemücü  
Ti'aitame cuiepa. <sup>29</sup>Meripai que  
mainecaita Quisariyaxi,

Que mü'ane yumüireme  
mütiva'aitüvame

Xüca catasi'ucu'eiririenique  
tatüriyama,

Surumatari vahepaü  
tecani'litüarieniqueyu,

Cumuxatari vahepaü  
tepu'aneneniyequy.

**Huriyusixi teüteriyari que  
memüteheyehüva niuqui  
'aixüa manuyüne**

<sup>30</sup>Mericüte, que te'utiyaneni.  
Müme memücahuriyusixi  
memücayumexüitüacai  
heiserie memexeianicü, müme  
heiserie mecaniupitüarieni.  
Heiserie mepexeyia yuri  
memüte'eriecü. <sup>31</sup>'Ixaherisixi  
püta memüyumexüitüacai

heiserie memexeianicü 'inüari  
niuquiyarisie mieme, müme  
mepüca'aye'axüa 'inüari  
niuquiyarisie. <sup>32</sup>Titayariri.

Yuri mepücate'eriecai,  
masi que memüteyuriecäi  
mepüyumexüitüacai.

'Ayumieme mepüca'aye'axüa.

Meputi'ücamürixü tete  
mürati'ücamüritüresie, <sup>33</sup>que  
müre'uxa,

Camü Siyunisie nepicaye tete  
mürati'ücamüritüre,

Tete cümana  
memüti'ücamürique.

Que mü'ane yuri müti'erie  
'iyasie pücayuteviyani.

**10** Ne'ivama, ne'iyaricü 'ipaü  
nepüreixeyaniqueyu,  
'ipaü nepütivaviri Cacaüyari  
müme vahesie mieme,  
memütavicueisitüarienicü.

<sup>2</sup>Netiniheciütani cuini mieme  
Cacaüyarisie mieme que  
memüteyumexüitüa, masi 'aixüa  
metemaitü mepücayumexüitüa.

<sup>3</sup>'Asimepücatemate heiserie  
que mütiyupitüva Cacaüyari.  
Yücümana püta mepütecuvautüve  
heiserie que memüteyupitüanicü.  
'Ayumieme yamepücatecahu  
Cacaüyari que maine, heiserie  
müvapitüanicü. <sup>4</sup>Cürisitu  
nitaparitüani 'inüari niuquiyari,  
yunaitü yuri memüte'erie heiserie  
memüpütüarienicü.

<sup>5</sup>Muiseixiri müpaü tiniu'utüani,  
'inüari niuquiyaricü heiserie que  
mürexeyia xatatü, müpaü 'utaitü,  
Que mü'ane tevi müpaü mütiyurieni,  
mücü canayeyuricamücü  
cümana. <sup>6</sup>Peru yuri müti'eriecü  
heiserie que mürexeyia, 'ipaü

püta paine, 'A'iyarisie müpai  
pepücati'acühüaveni, quepai  
taheima peutimieni pe'utaitü,  
Cürisitu manacavitünicü  
peticu'erivatü, <sup>7</sup>quepai peucamieni  
meucatevasie pe'utaitü nusu,  
Cürisitu manativitünicü  
müquite vasata peticu'erivatü.

<sup>8</sup>Masi que haine. Niuquiyari  
canehuraniri 'atenisie 'a'iyarisie.  
Tita temütecuxata yuri que  
müti'erie hepaüsita, mücü  
canihücütüni. <sup>9</sup>Müpaü paine,  
xüca 'atenicü peti'ahecuatüaca  
Quesusisie petiviyatü Ti'aitame  
que mütilhücü, xüca 'a'iyaricü yuri  
peti'erieca quename Cacaüyari  
henucuquetüa müquite vasata,  
pecanitavicueisitüariemücü.

<sup>10</sup>Yu'iyaricü tevi yuri püti'erie  
heiserie müpitüarienicü.  
Yutenicü pütiyuhecüatüa  
mütavicueisitüarienicü.

<sup>11</sup>Ipaü paine 'utüarica  
xapayari, Yunaitü hesiena yuri  
memüte'erie mepücayuteteviyani.

<sup>12</sup>Huriyusixi Cüriyecusixi  
yücü mepüca'anene. Yunaima  
Tiva'aitüvame caniyuxevini, cui  
pütivamicua yunaitü memitahüave.

<sup>13</sup>Yunaitü memitahüaveni  
Ti'aitame mepütavicueisitüarieni.

<sup>14</sup>Mericüte, que mü'anesie  
yuri memücate'uta'erie que  
mete'ihüaveni. Quepaü yuri  
meteta'erien que mü'anesie  
'asimemücatehetimaivave  
hepaüsitana. Quepaü  
meteheitimani xüca 'umaveni  
que mü'ane mütivacuxaxatüvani.

<sup>15</sup>Quepaü metecuxatani xüca  
mecaheutanü'ariexüani. Que  
müre'uxa, Müme memütecuxata

que mücati'luximatüarieca  
yu'iyarisie, niuqui 'aixüa manuyüne  
memütecuxata, visi que 'anenedi  
vaqueiya.

<sup>16</sup>Masi yunaitü yamepücatecacü  
niuqui 'aixüa manuyüne que  
maine. Quisariyaxi müpaü paine,  
Ti'aitame, quepai yuri tita'eririe  
tita mütiu'enie yatetecuxatacacu  
tame. <sup>17</sup>Tita mütiu'enie mi'axixücü,  
'ayumieme tevi yuri pütiuta'erie.  
Müpaü catini'enani, tita  
müticuxasiva Cürisitu hepaüsita  
mi'axixücü.

<sup>18</sup>Masisü müpaü nepaine,  
mete'u'enana 'acu. Camüsü,  
Naisarie cuiepa peutayeixüa  
vanuqui,  
Cuie manunierapai neta'axüani  
vaxasica.

<sup>19</sup>Mericüte, müpaü nepaineta,  
Süricü 'Ixaherisixi yamecatehetima  
'acu. Mericüsü Muisexi meri 'ipaü  
paine,

Xel'ütesacame nepüxe'ayeitüani  
xemüvatesanicü  
Müme xei nuivariyari  
memücahüme.  
Xevahecame teüteri  
'asimemücatemaivave  
nepüxe'ayeitüani.

<sup>20</sup>Arique Quisariyaxi camatü 'ipaü  
paine,

Müme memücanesicuvautüvecai  
mepünesi'utaxei.  
Müme nehepaüsita  
memücatecu'ivavacai,  
Vahüxie nemasiücütü nenayani.

<sup>21</sup>Müpaüta naineni 'Ixaherisixi  
vahepaüsita, Tucaricü  
nemama nepeutasera teüteri  
yamemücatecahu memü'uxiva'a  
vahepa.

**Hipatü 'Ixaherisixi que  
memüteyuhayevani**

**11** Mericüsü 'ayumieme  
'ipaü nepaine, Cacaüyari  
tivarutixani'erie yuteüterima.  
Pücatixaüsiyetü. Neri 'Ixaherisixi  
necanixevitütüni. 'Apurahamisie  
nepüyetüa, Venicamini  
nuivarieyasie nepümieme.  
<sup>2</sup>Cacaüyari pücvavarutixani'erie  
yuteüterima meripai müvamaicai.  
Mesü 'asixecatemate que maine  
'utüarica xapayari 'Eriyaxi  
xatatü. Mücü nitavavirieni  
Cacaüyari 'Ixaherisixi vahepaüsita,  
müpaü 'utaitü, <sup>3</sup>Neuxei  
Ti'aitame, mepüvarucui müme  
memütecuxatacai 'ahesie mieme.  
Mepica'unaxüa haque 'amavari  
müratimemierivasie. Ne nexaüta  
nepünehayeva, mepünesicuvautüve  
memünesimienicü. <sup>4</sup>Peru  
Cacaüyari que tita'eitütü. 'Ipaüsietü,  
Nehesie mieme 'atahuta miriyari  
nepüvatiyasa 'uquisi, Vahari  
hüxie memücacatunuma'uivave.  
<sup>5</sup>Müpaüri yaxecüa hicüta  
mepüyuhayevaxü hipatü  
memanayexeyarie 'aixüa que  
mütiuca'iyari 'iya. <sup>6</sup>Camü 'aixüa  
mütiuca'iyaricü mepanayexeyari,  
tixaütü memüte'uyuricü  
mepüca'anayexeyari. Mesü,  
'aixüa que mütiuca'iyari,  
xüca tixaütü meteyurieca  
me'anayexeyarienique, mücü  
püta 'aixüa pücatiuca'iyariniqueyu.  
Xücateri me'anayexeyarienique  
tixaütü memüte'uyuricü,  
'aixüa tiuca'iyaritü  
pücvaranayexeyaqueyu. Mesü,  
que memüte'uyurie, xüca 'aixüa

tiuca'iyaritü varanayexeyaque,  
müme püta tixaütü  
mepücateyurieniqueyu.

<sup>7</sup>Queteri 'aneni. 'Ixaherisixi  
mepücaheitaxei tita  
memütecuvautüvecai. Müme  
memanayexeyarie meneitaxeyia  
püta. Hipatü müme mesese'itü  
menacüne, <sup>8</sup>que müre'uxa,

Cacaüyari 'iyari müyü'üraxie  
nivarupitüani,  
Hüxi tivarupitüa cümana  
memücaheunenierenicü,  
Naca tivarupitüa cümana  
memücaheu'enanacacü  
Hicüque.

<sup>9</sup>Ravirita müpaü paine,  
Mexasie quepauca  
memüte'apica,  
'Ipari que'ayani, viniyari  
que'ayani vahesie mieme,  
Meque'utiquetamürixüani muva.  
'Amemüte'apinepaü  
mequete'epinirieni.

<sup>10</sup>Vahüxi que'acüpire  
memücaheunenierenicü.  
Me'anacatutusitü meque'acüne  
yuheyemecü.

**Memücahuriyusixi que  
memütetavicueisitüarieni**

<sup>11</sup>Mericüsü nepaine,  
metiquestamürixüaca  
mecatehecaxüri yuheyemecü.  
Pücatixaüsiyetü. Masi  
ta'aurie memaxüricü müme,  
müme memücahuriyusixi  
mepütavicueisitüarieni, Huriyusixi  
memü'ütesanicü. <sup>12</sup>Ta'aurie  
memaxüricü cuiepa memütama  
vaüca que memüte'upitüarie, müme  
memüyutexiecü memücahuriyusixi  
vaüca que memüte'upitüarie, camü

masi vaücava mecatepitüarieni cuxi quepaucua memaye'axüani Huriyusixi.

<sup>13</sup>Ne müpaü nepütixecühüave xeme xemücahuriyusixi, ne que nemürenü'arie memücahuriyusixi vahesüa, 'aixüa nepaine nehiritüarica hepaüsita, <sup>14</sup>siparasü xüca neyüveni nemüva'ütesatüanicü ne'ivamarixi, siparasü xüca nevatavicueisitüani hipame müme. <sup>15</sup>Müme memüxani'erivacü, cuiepa memütama meniupasieni 'aixüa memütexeyarienicü. Masi vaücava cuxi catiyüni quepaucua memünaqui'erivani. Xüari cuiepa memütama 'ayumieme mepanutaneniereni müquite vasata. <sup>16</sup>Hecuame mavariyari xüca Cacaüyarisie mieme 'upasieni, naitü yacatinipasiemücü. Nanayari xüca Cacaüyarisie mieme 'upasieni, mamateyata canipasiemücü.

<sup>17</sup>Hicü hipatü mamateya menanumurixüani, 'ecü huriva yeutanaca pehöcütütü vasata peniuaquerieni huriva cüeyari nanayasie mieme hayari que müracacapaü pe'ietü pemayanicü vahepaü. <sup>18</sup>'Ayumieme pepücavatave'erieca mamateya. Xücaru pevatave'erieca, camü 'ecü pepüca'itituica nanayari, nanayari püta pümasitituica 'ecü.

<sup>19</sup>'Ecüri müpaü pepütayüni, Mamateya mepanumurariexüa nemücaquerienicü ne. <sup>20</sup>Mericüte, yuri memücate'eriecaicü, 'ayumieme mepanumurariexüa. 'Ecüsü yuri pemüti'eriecü 'apepuve. Pepüca'anuyehaitürüve que pemüti'amate, masi que neumaca. <sup>21</sup>Xücaru Cacaüyari cavarucu'eirieni

mamateya yücümana memutinexüa, tietü camasicu'eiriemücü 'ecüta. <sup>22</sup>Camü 'aixüa que tiuca'iyari que tise'ita Cacaüyari. Canise'icaitüni memacaxüri vahepaüsita. 'Aixüa catiniuca'iyarini 'ahepaüsita xüca pe'ahayevani 'aixüa tiuca'iyaricacu 'iya. Me xüca catixaütüni, penanuvitequiemücü 'ecüta. <sup>23</sup>Mümerita xüca yuri mecate'erietü mecayuhayevani, müme mepeca'uitüarieni. Cacaüyari türücariya canexeyani tavari müvaca'uitüanicü. <sup>24</sup>'Ecüri huriva yeutanaca mutinüivaxüsie pemiemetütü penanuvitequieni, haraverita mieme hurivasie peniuaquerieni que pemücatiunuivaxü. Masi yemecü müme mamateya mücü hurivasie memümiemete mecateca'uitüarieni yücüyeyarisie.

#### 'Imatürieca que memütetavicueisitüarieni 'Ixaherisixi

<sup>25</sup>Ne'ivama, yacü xeicüa capa temaivavemete xeyu'eriecacü, pücanesinaqueniequeyu xüca xecaheitimanique 'icü niuqui muti'aviesiecai. Hipatü xeicüa 'Ixaherisixi mesese'itü menacüne, mexi yunaitü memücahuriyusixi meca'aye'axüavave. <sup>26</sup>Müpaü tiyüyu, yunaitü 'Ixaherisixi menitavicueisitüariecuni, que müre'uxa,

Tiyüvicueisitüvame Siyunisie nayeyeimücü.

Ta'aurie pehöani Cacuvu, Cacaüyari ca'ayexeyatü mücayuhayevacü.

<sup>27</sup>'Ipaü netinivaveviriemücü türatü

Quepaucua nemüvanavairieni  
tita 'axa memüte'uyurie.

<sup>28</sup>Niuqui 'aixüa manuyüne  
que müticuxasiva, müme  
meniu'uxiva'ani, xeme 'aixüa  
xemü'litüarienicü. Peru que  
memüte'anayexeyarie, Cacaüyari  
püvanaqui'erie va'uquiyarima  
müvanaqui'erieaicü. <sup>29</sup>Cacaüyari  
pücayupata que mütivamicua  
que mütiva'inie. <sup>30</sup>Xemesü que  
yaxemücatecahucai'anapai, hicü  
que xemütenenimayasie mexi  
müme yamecatecahu, <sup>31</sup>yaxeicüa  
müme hicü yamepücatecahu mexi  
xenenimayasie xeme, mümerita  
hicürixüa memünenimayasiecacü.  
<sup>32</sup>Cacaüyari yunaime nivayetuan  
yamemücatecahunicü, yunaime  
müvanenimayacacü.

<sup>33</sup>Quetimarive, Cacaüyari  
vaücava que mürexeyia, que  
mütimaive, vaüca que mütimate.  
Que tiyutexie tevi 'i'inüatätü  
tita mütiyücühüave Cacaüyari,  
'icuvaunetü huyeteya.

<sup>34</sup>Quepai püretima Ti'aitame que  
mütiyumate,

Quepai picu'imaiya.

<sup>35</sup>Quepai pütimicua meri,  
'amürapinenicü 'iya.

<sup>36</sup>Naitü hesüana catinaneicani,  
'acatinuveni 'iya ticuyütivacacu,  
hesiena catinimietüni. 'Aixüa  
queticuxasivani yuhayemecü.

**Que müreyevese yamütiyurienenicü  
Cacaüyarisie mieme pasietü**

**12** 'Ayumieme  
ne'ivama Cacaüyari  
mütiyucanenimayacü, müpaü  
netinixevavirica, xemiyetuanicü  
yuvaiyari mavari mayanicü

mayeyuri mupasie minaque  
Cacaüyari. Mücü 'uximayasicacü  
xecaneyexeyacacuni 'iyarisie  
mümiemecü. <sup>2</sup>Müme hicü cuiepa  
memütama xepücava'üqueni, masi  
yücü xe'ananetü xequenacüni  
xetihehecuareme que  
xemütecu'eriva. Müpaü xeteyurietü  
heiseriemecü xeneitimaicuni tita  
mütinaque Cacaüyari, tita 'aixüa  
müti'ane titacü mütinaqui'a titacü  
müraye'ave.

<sup>3</sup>'Iya 'aixüa mütiuca'iyaricü  
nehesie mieme, 'ayumieme  
müpaü nepütixecühüave  
yuxexütü yuhesüa xemetitei,  
xepüca'anuyehaitürüveni  
xeteyücühüavetü yuhepaüsita  
que mücareuyevese  
yaxemüteyücühüavenicü. Masi  
yaxequeteneyücühüaveni  
para 'aixüa xemüteyumaicacü  
püta, yuxexütü Cacaüyari  
que mütixe'u'inüasirie yuri  
xemüte'eriecacü. <sup>4</sup>Tavaiyari  
caniyuxevini, peru paüriyari  
hesiena mümieme canimüireni.  
Xexütü paüriyari yücü pütüyuruva.  
<sup>5</sup>Tameta temümüire, xei vaiyari  
tecanihümetüni Cürisitusie  
teteviyatü. 'Axeicüa taxexütü  
tinitapinitüni.

<sup>6</sup>Yücü teteniumiquivani, 'iya  
'aixüa que mütiuca'iyari taxexuime  
tahasie mieme. Xüca müpaü  
tete'umiquieni texaxatamete  
temacüneccü, yatepüte'umiquiva  
yuri que temüte'erie. <sup>7</sup>Xüca  
teteparevivametetüni, teteparevietü  
yatepüte'umiquiva, xüca  
tete'üquitametetüni, tete'üquitatü  
yatepüte'umiquiva, <sup>8</sup>xüca  
tetetutuicametetüni, tevatuicatu

yatepüte'umiquiva. Que mü'tane mütivamicua, 'aixüa 'iyaricü mütivamicuanicü yapütiumiquiva, que mü'ane müti'aita, yamütiumexüitüacacü yapütiumiquiva, que mü'ane müvanenimaya hipame, müyutemaviecacü yapütiumiquiva.

**Cürisitu teüterimama que yamemütecahuni**

<sup>9</sup>Yacü xEICÜa xecayütü xequeteneyucanaqui'erieca. Xe'ixeümatü tita 'axa müti'ane, tita 'aixüa müti'anesie xequeteneyiani.

<sup>10</sup>Que xemütevanaqui'erie yu'ivamarixi, yu'iyaricü xequenivahive'erieca. Yuxexuitü masi xequenivapitüaca yu'ivama ve'lemete xe'vaxerietü.

<sup>11</sup>Xepüca'yü'üraraxieca que xemüteyuxüitüa. 'Aixüa 'iyaricü xequeneyuvaüriyaca. Xequetene'uximayaca Ti'aitamesie mieme.

<sup>12</sup>Yuri que xemüte'erie xeta'icuevatü, xequeneyutemamavieca. Que xemüte'uximatüarie, xequeteneuca'enivani. Que xemüteyunenevie, xepücatehayevani.

<sup>13</sup>Cacaüyari teüterimama que memüteheiyehüva, xequenivaparevieca. Xequeneyumexüitüaca xe'vaxerietü cu'uvamete.

<sup>14</sup>'Aixüa xequetenivaxatani müme memüxe'uveiya vahepaüsita 'aixüa memü'itüarienicü. 'Aixüa xequetenivaxatani, tixaü xepücatevaxatani para 'axa memü'itüarienicü.

<sup>15</sup>Memüyutemamavie vahamatü xequeneyutemamavieca. Memütisuana vahamatü xequeneutisuanani.

<sup>16</sup>Yaxeicüa xequeteneyücühüaveni yuhepaüsita yuxexuitü. Xepüca'anuyehaitürüveni que xemüteyumate, masi tixaütü memücatehüme vahamatü xequeneu'uvani. Yacü xEICÜa xetecu'erivatü, xetemaivavemete xepüca'yü'erieca.

<sup>17</sup>Ni xeime 'axa xepücate'apica 'iya 'axa xe'uyuriecu. Xequetenecuvava 'aixüa xemüteyuriecacü yunaima teüteri vahüxie. <sup>18</sup>Xüca xeyüvaveni, que xemüteyurie xeme, cayuvatü xequeteneteni yunaima teüteri vahamatü. <sup>19</sup>Nenaqui'erima, yuhesie mieme xepüca'yucuitüveni, masi xequetenehayevani müme püta memühecarienicü. Müpaü püre'uxa, Ne xehesie mieme nepünemieneni. 'Anepürapica ne, canaineni Ti'aitame. <sup>20</sup>Masisü xüca que mü'ane mümasi'uxie heuhacamücünü, quetineumicua. Xüca heuharimücünü, queneuharitia. Müpaü petiyurienetü pecanihiveritüamücü müpaü mütiyumaicacü que mü'ane muteviyasitüariepäü. <sup>21</sup>Xepüca'ipitüani tita 'axa müti'ane müxeha'ivanicü, masi xequena'ivani tita 'axa müti'ane, 'aixüa xeteyurietü püta.

**13** Yunaitü yamequetecahu que memüte'aita müme heiserie memexeiya memüte'aitanicü, müme vaheima memucayasarie. Tevi heiserie pücahexeyianiqueyu

müti'aitanicü, me xüca Cacaüyari ca'ipitüanique. Müme heiserie memexeia hicü memüte'aitanicü mecani'aisieca, Cacaüyari tiva'aitüacacu. <sup>2</sup>Ayumieme que mü'ane meye'unie cuiepa ti'aitame, mücü caneye'unieca tita Cacaüyari mütiuta'aitaxü. Müme memeye'unie yücümana menanuyutaxüricuni. <sup>3</sup>Isücate mepücaüa memimariutanicü que mü'ane 'aixüa mütiyuriene, masi mepüya memimariutanicü que mü'ane 'axa mütiyuriene püta. Pereuyeimücü peca'imacarütü que mü'ane heiserie mexeia müti'aitanicü 'acu. Mericüte, 'aixüa quetineyurieneni. Mücüri 'aixüa paineni 'ahepaüsita. <sup>4</sup>Cacaüyari parevivameya canihücütüni 'aixüa pemü'itüarienicü. Me xüca 'axa petiyurieneni, queneumaca. Yacü pücahecue'le 'ixipara. Cacaüyari parevivameya canihücütüni haxüacü mürepinirienicü que mü'ane 'axa mütiyuriene. <sup>5</sup>Ayumieme peuyevese yamüticamienicü que müti'aita, haxüacü xeicüa pücatixaü, masi yu'iyarisie 'aixüa mütiyumaicacüta. <sup>6</sup>Ayumiemerita xepütüyutuanı que xemüteheuyehüviyarüva. Müme Cacaüyari tupirisiximama mecanihümetüni, mücücü mecani'ayumiemetetüni. <sup>7</sup>Xequetenivarapinirica yunaime tita müreyevese. Xequene'üitüa que mü'ane meuyevese xemi'üitüanicü tita xemüteheuyehüviyarüva. Xequene'üitüa que mü'ane meuyevese cuviyexunu tuminieya xemi'üitüanicü.

Xequeteneuyehüvirieca que mü'ane meuyevese xemüteheiyehüviriecacü. Ve'eme xequenexatani que mü'ane meuyevese ve'eme xemüxatanicü. <sup>8</sup>Aixüa pücaüni xüca heuyeveca xeime xemüte'apiniriecacü. Peuyevese xeicüa xemüyunaqui'eriecacü püta. Que mü'ane minaqu'erie xeime, mücü caneye'atüaniri 'inüari niuquiyari. <sup>9</sup>Mücü niuqui, xeime 'üyaya pepücacumaivani, pepücati'amemivani, pepücatinavayani, peti'itavatü pepücatihecüatani, pepücati'acahive'erieca, que maine, xevitü 'aisica xüca xuavenita, mücü naitü catiniyutaxeüre 'icü niuquicü, Pepinaqui'erieca 'ahepaü tevi que pemüti'anaqui'erie 'ecü. <sup>10</sup>Inaqui'erietü yuhepaü tevi, 'axa püca'iyurieneni. 'Ayumieme tiyucanaqui'erietü caneye'atüamücü 'inüari niuquiyari.

<sup>11</sup>Mücü meta, xenimaicari 'icü tucari. Hicürixüa canaye'aniri xemanutanenierenicü xecusutü. Hicü canahuraniri temütavicueisitüarieni. Quepaucua yuri temüte'uta'erie pücahahuracai hicüpaü. <sup>12</sup>Tücarı pütixüxime, tucari nehuraniri. Hicü 'ayumieme teque'icü'eirienı tita teüteri memütüyurie yüvipa timieme. Cuya tepüayari teque'anacatücinı hecüaripa mieme. <sup>13</sup>Aixüa 'anemecü teque'u'uvani hecüaripa memü'uva vahepaü teyüatü, teca'ixüaratüvetü tecatarüvetü tecarucusixitütü tecaheutayexürietü tecata'eririyatü teca'ütesatü. <sup>14</sup>Masi xequenanacatücinı que mü'ane Ti'aitame Quesusi Cürisitu



mühücü. Xepücayuha'aritiüaca  
yaxemüteyuriecacü que  
memüte'ucahive'erie teüteri  
vahepaü xete'u'iyaritü.

**Müme memüverarani yuri  
que memüte'erie**

**14** Xequeneutanaqui'erie  
que mü'ane müverani  
yuri que müti'erie, peru niuqui  
xemüxuatüacacü que müticu'eriva  
hepaüsita pücatixaü. <sup>2</sup>Xevitü  
yuri catini'erieca quename  
yüve nai müticuaca, xevitüta  
müverani sisiüravime xeciüa  
püca'a. <sup>3</sup>Que mü'ane müticua'a  
püca'itave'erieca que mü'ane  
mücaticua'a. Que mü'aneta  
mücaticua'a püca'iniuquimani  
que mü'ane müticua'a, Cacaüyari  
mitanaqui'ericü 'iya. <sup>4</sup>Ecüsü que  
pepüpaicü peminiuquimanicü  
que mü'ane xeimesie mieme  
müti'uximaya. Yucusiyari hürüpa  
'aputive 'apative nusu. 'Aputivenitütü.  
Cusiyarieya türücarिया pexeiya  
'amitaquetüanicü.

<sup>5</sup>Mücü meta, xevitü tucariite yücü  
'aneneme cani'erieca, xevitüta naitü  
tucari yaxeciüa ti'ananeme ni'erieca.  
Yuxexuitü yu'iyarisie heiseriemecü  
mequeteyumaica. <sup>6</sup>Que mü'ane  
ma'eriva tucari, Ti'aitamesie  
mieme yüanetü cana'erivani.  
Que mü'ane mücaha'eriva tucari,  
mücüta Ti'aitamesie mieme  
yüanetü pücaha'eriva. Que mü'ane  
müticua'a, Ti'aitamesie mieme  
yüanetü catinicuaca, pamüpariyusi  
nipitüani Cacaüyari. Que mü'ane  
mücaticua'a, mücüta Ti'aitamesie  
mieme yüanetü pücaticua'a,  
pamüpariyusi nipitüani Cacaüyari.

<sup>7</sup>Xevitü tame yuhesie mieme  
xeiciüa püca'ayeyuri, yuhesie  
mieme xeciüa püca'umüni. <sup>8</sup>Xüca  
te'ayeyuyurini, Ti'aitamesie  
mieme tenayeyuyurini. Xüca  
te'ucuini, Ti'aitamesie mieme  
tenicuicuni. 'Ayumieme sepa  
temayeyuri sepa temücuini,  
Ti'aitamesüa tecanimiemetetüni.  
<sup>9</sup>'Ayumiemerita Cürisitu niümüni  
nanutanieri, müme memümüquite  
memayeyuyurita tiva'aitüvame  
mayaniciü.

<sup>10</sup>'Ecüri titayari petiniuquima  
'a'iva. 'Ecütari, titayari petitave'erie  
'a'iva. Tanaitü tecaniuti'uicuni  
Cacaüyari 'uvenieya hüxie.

<sup>11</sup>Müpaü püre'uxa,  
Ne necanayeyurini, canaineni  
Ti'aitame.  
'Ayumieme nehüxie yunaitü  
menicatunuma'uicuni,  
Yunaitü yutetacü 'aixüa  
mecanihecüatacacuni  
Cacaüyari.

<sup>12</sup>Hicü 'ayumieme taxexuitü tahesie  
mieme tepütiniuni Cacaüyari hüxie.

**Xepüca'icahüani titasie  
mütitiquetamüreni xe'iva**

<sup>13</sup>'Ayumieme  
tepücataniuquimatüveni.  
Masi 'ipaü xequeteneyumaica  
püta, xemüca'icahüani titasie  
mütitiquetamüreni xe'iva, titacü  
mativauseni. <sup>14</sup>'Ipaü nepütimate,  
Ti'aitame Quesusisie netiviyatü  
'ipaü yuri nepüti'erie, tixaütü xüca  
cati'itiyaca, yücümana müpaü  
püca'ane. Masi xeciüa, que mü'ane  
ca'itiyacame mü'erie, mücüsie  
mieme püca'itiya. <sup>15</sup>Xüca 'a'iva  
'uhiveritüarieni 'icuaicü, 'ecü

pe'inaqui'erietü pepüca'yüane.  
 'A'licuaicü pepüca'lica'unani  
 que mü'anesie mieme mumü  
 Cürisitu. <sup>16</sup>Tita xehesie mieme  
 'aixüa müti'ane, xüca tüma 'axa  
 caticuxasivanique. <sup>17</sup>Caca'yari  
 'i'aitüacacu xüca 'a'uyeicani tevi,  
 sepa müticua'a sepa müranuye'e,  
 heiserie canipitüarieni, yu'iyarisie  
 püca'uximatüarie, niyutemavieca  
 'Iyari Mütiyupatasie tiviyatü.  
<sup>18</sup>Que mü'ane müpaü tiyurienetü  
 müti'uximaya Cürisitusie mieme,  
 Caca'yari caninaqui'acamücü 'iya  
 hepaüsita, teüterita meneitimaicuni  
 'aixüa que mütiyuriene.  
<sup>19</sup>'Ayumiemicü tame  
 tenitamexüitüaca cümana ta'iyarisie  
 temüca'uximatüariecacü, cümana  
 'axeicüa temütaseiriyanicü tanaitü.  
<sup>20</sup>'Icuaicü pepüca'lica'unani tita  
 Caca'yari mütiuyuri. Naitüri  
 catini'itiyaca, peru 'axa püyüni  
 xüca tevi ticuatü 'itiquetamüra  
 xeime. <sup>21</sup>'Aixüa püyüniqeyu  
 masi xüca vai pecacua'anique  
 xüca vinu peca'anuye'enique, xüca  
 tixaü pecatuyurienenique cümana  
 'a'liva mativauseni mütiquetamüre  
 müveranare. <sup>22</sup>Yuri que pemüti'erie,  
 'acümana yaquetinecu'erivani  
 Caca'yari hüxie. Caniyutemavieca  
 que mü'ane yuhesie mücarahüpa  
 paüri 'aixüa 'aneme 'erietü. <sup>23</sup>Que  
 mü'ane müyuxamurie yücü  
 ticu'erivatü, mücü nanutahüiyamücü  
 xüca ticuaca, yuri ti'erietü  
 mücayüanecü. Nai mütiyuriene yuri  
 que mücati'erie, 'axa tiniyurieneni.

#### Memütürücavi memüverarani

**15** Caneuyevecani tame  
 temüyüvavemete

teminevieni tita memücateyüvave  
 müme memüverarani. Tepüca'yüaca  
 para taxaütame xeicüa  
 temünaqui'acacü. <sup>2</sup>Taxexuitü  
 tequeyüaca tahepaü tevi  
 püta münaqui'acacü, 'aixüa  
 mü'itüarienicü müseiriyarienicü.  
<sup>3</sup>Ni Cürisitu püca'yüanecai para  
 yuxaütame xeicüa münaqui'acacü,  
 masi que müre'uxa, Müme 'axa  
 que memutiyanecai 'ahepaüsita,  
 vaniuxixiya pünesi'u'axixü ne püta.  
<sup>4</sup>Naitü meripai mütiuti'utüarie,  
 temüteti'üquitüarienicü  
 tiniuti'utüarieni, para  
 tete'uca'enivatü 'utüarica  
 xapayari tasinütüacacu yuri  
 temüte'eriecacü teta'icuevatü.  
<sup>5</sup>Mücü Caca'yari müpaü  
 mütatipitüva temüte'uca'enivanicü  
 temünütüarienicü, mücü  
 quexepitüaca yaxaicüa  
 xemüteyumaicacü yuhesüa,  
 Cürisitu Qesusi que maine,  
<sup>6</sup>'axeicüa xei tetayaricü xe'utaniütü  
 'aixüa xemutiyanenicü que mü'ane  
 Tati'aitüvame Qesusi Cürisitu  
 mücaca'yariieya mü'uquiyariieya  
 hepaüsita.

#### Niuqui 'aixüa manuyüne memücahuriyusixi vahesie que mütimieme

<sup>7</sup>'Ayumieme  
 xequeneyutanaqui'erie yunaitü,  
 Cürisitu müxe'utanaqui'eripaü,  
 Caca'yari 'aixüa  
 müticühüavarüvanicü. <sup>8</sup>'Ipaü  
 nepaine, Cürisitu müme  
 xitequiya 'inüariyari memexeiya  
 vaparevivame nayani, masiücüme  
 meyeitüanicü yuri que maine  
 Caca'yari, mitaseiriyanicüta

tita meripai mütivarutahüavixü  
ta'uquiyarima quename  
metemiquieniquecai, <sup>9</sup>mümeta  
memücahuriyusixi 'aixüa  
memutiyuanenicü Cacaüyari  
hepaüsita müvanenimayacü, que  
müre'uxa,

'Ayumieme 'aixüa  
nemaniheciüatacamüci  
memücahuriyusixi vahesüa,  
Nemaninüavacamüci que  
mü'ane pemühücü.

<sup>10</sup>Tavari müpaü paine,  
Xemücahuriyusixi  
xequeneyutemamavieca  
teüterimama vahamatü.

<sup>11</sup>Tavarita,  
'Aixüa xequeteneutahüavi  
Ti'aitame hepaüsita  
Yunaitü xemücahuriyusixi.  
Yunaitü nuivarite 'aixüa  
mequehaitücani hepaüsitana.

<sup>12</sup>Tavari Quisariyaxi müpaü paine,  
Quisahi quie mieme  
tinitinemücü nana,  
Que mü'ane manucuqueni  
mütiva'aitüanicü  
memücahuriyusixi.  
Hesiena yuri  
mecateni'eriecacuni  
Memücahuriyusixi  
meta'icuevatü.

<sup>13</sup>Hicü 'iya Cacaüyari  
mütasi'upitüva temüta'icuevanicü  
yuri tete'erietü, müci  
quexehüniyani naimecü  
xemüyutemamaviecacü yu'iyarisie  
xemüca'uximatüariecacü mexi  
yuri xete'erie, masi vaücava yuri  
xemüte'eriecacü xeta'icuevatü,  
'Iyari Mütüyupata xetürücariryacacu.

<sup>14</sup>Neri yuri nepüti'erie ne'ivama  
xehepaüsita, quename yücümana

xehüpüne 'aixüa xeteyurietü,  
quename xe'aye'axüavave  
nai xetemaitü, quename  
xeyüvave xemüyul'maiyanicü.  
<sup>15</sup>Hipame tapari necueriva'atü  
nepütixe'uta'ütüiri, tavari  
nexeha'eritüatü hepaüsitana  
yacütüniquetü, Cacaüyari 'aixüa  
tiuca'iyaritü müpaü münetiomicü,  
<sup>16</sup>Cürisitu Qesusi parevivameya  
nemayanicü memücahuriyusixi  
vahesie mieme, mara'acamepaü  
neti'uximayatü Cacaüyari niuquieya  
'aixüa manuyenesie mieme,  
müme memücahuriyusixi mavari  
memacüneccü memütanaqui'eriva,  
Cacaüyarisie mieme memupasie  
'Iyari Mütüyupata yativapatacacu.

<sup>17</sup>Hicüsü Cürisitu Qesusisie  
netiviyatü necaniyüveni 'aixüa  
nemütinecühüaveni nehepaüsita,  
tita Cacaüyari mütiyuriene  
nexatatü. <sup>18</sup>Nepücacueriva'a tixaütü  
nemüticuxatanicü, tita Cürisitu  
mütüyuri yanetiurieneccacu  
ne xeicüa nepüticuxatani.  
Yanetiurieneccacu, müme  
memücahuriyusixi yameteçahutü  
menacüne, netaniucacacu  
neti'uximayacacu, <sup>19</sup>türücariry  
nehexeyacacu 'inüarite  
mamarivavemete mütiyünicü,  
türücariry nehexeyacacu  
'Iyarisüa mümieme. Qerusareme  
neheyeyaca 'Iricupai  
neheuyeyuneca nenaye'ani  
yemecü neticuxatatü niuqui 'aixüa  
manuyüne Cürisitu hepaüsita,  
<sup>20</sup>'ipaü netinemexütüatü,  
nemüticuxatanicü niuqui 'aixüa  
manuyüne haque que mü'ane  
Cürisitu mühücü mücaxasieve  
xeicüa, capa xeime tenarieya heima

ne'anuquinicü ne. <sup>21</sup>Masi müpaü  
que müre'uxa,

Müme

'asimemücate'utahüavarie  
hepaüsitana, müme

menixeyacacuni,

Hepaüsitana memüca'u'enana  
meneitimaicuni.

**Papuru que müreuyeimücaü**

**Xumapaitü**

<sup>22</sup>'Ayumieme müixa

nepacunütüarie

nemücaxe'u'ivatamienicü.

<sup>23</sup>Hicüri 'uva pumaveri

haque nemüre'uximayaca.

Müixa viyari nepütihive'erie

nemüxe'u'ivatamienicü

<sup>24</sup>quepaucua 'Isipaniya nemümie.

Ne'anuyeneme nepüxexeyaniqueyu.

Xemeta mana xepünesi'anuyenü'ani,

xehesüa netemaviritüarieyu

'esiva meri. <sup>25</sup>Masi hicü

Querusareme nepüyemie

nevaparevienique Cacaüyari

teüterimama. <sup>26</sup>Maseruniyatari

'Acaiyatari meniYuvaüriya

'axeicüa tixaitü memütevaminicü

müme memümamave Cacaüyari

teüterimama vasata memetitei

Querusaremetari. <sup>27</sup>Müpaü

meteniYuvaüriyani, neuyevecata

müpaü memütevarapinirienicü.

Memücahuriyusixi vahepaü

meheixeyatü mepacü 'Iyarisie

timieme. Peuyevese mümetari

memüvaparevienicü vaiyarisie

timieme hepaüsita. <sup>28</sup>'Ayumieme

'icü ne'aye'atüame, 'icü va'imiquieri

nevayetuiieme, nenayeyeimücü,

xehesüa ne'anuyeneme 'Isipaniya

nemeta'anicü. <sup>29</sup>Xehesüa

quepaucua nemeta'ani, nepütimate

nemunuani nehünetü niuqui

Cürisitu hepaüsita 'aixüa

manuyünesie timiemecü 'aixüa

xemü'itüarienicü.

<sup>30</sup>Quesusi Cürisitu

mütati'aitüvamecü,

'Iyari mütasipitüacü

temütetacanaqui'eriecacü, 'ipaü

netinixetavavirieni ne'ivama,

cui xemünesipareviecacü

nenevieri xe'ipitüatü

Cacaüyari nehiesie mieme

<sup>31</sup>nemütavicueisitüarienicü, Cureya

memütama yamemücatecahu

'axa memücanesiyurienicü,

memünaqui'acacüta

Cacaüyari teüterimama, que

nemütivaparevieneni Querusaremesie,

<sup>32</sup>para xehamatü nemü'uxipiecacü

quepaucua nenetemavietü

nemeta'ani xehesüa, que

mütinaque Cacaüyari. <sup>33</sup>Mücü

Cacaüyari mütasipitüa ta'iyarisie

temüca'uximatüariecacü, mücü

que'uyeicani yunaime xehamatü.

Müpaü xeicüa nepaine.

**Que mütivavaüritüacai**

**16** Nenixehecüatüani  
ta'iva 'uca Peve

mütiteva. Mücü tiparevivame

canihücütüni Senicüreyasie

memüyuyexexeüriva vahesüa.

<sup>2</sup>Xequeneutanaqui'erie Ti'aitamesie

xeteviyatü, que müreuyevese

Cacaüyari teüterimama

memüyutanaqui'erienicü.

Xequeneuparevi xüca tixaitü

reuyehüaca xehesüa. Mücü

tiparevivametütü nivaparevieca

yümüireme, neta caneniuparevieneni.

<sup>3</sup>Xequenivavaüritüacai

Pürisira 'Aqiramame.

Nehamatü mepüte'uximaya  
 Cürisitu Quesusisie  
 teteviyacacu. <sup>4</sup>Nemayeyurinicü  
 ne, meniucueriva'itüarieni  
 meniucui'iva tüma. Ne nexaüta  
 pamüpariyusi nepücavapitüa,  
 masi yunaitü memüyutixexeüriva  
 memücahuriyusixi pamüpariyusi  
 mepüvapitüata nehamatü.  
<sup>5</sup>Vaquita memüyuyexexeürivata  
 xequenivavaüritüaca.  
 Xequenevaüritüaca 'Epainetu  
 neminaqui'erie. Mücü  
 meri 'Asiyatari vasata  
 peu'isanari Cürisitusie mieme.  
<sup>6</sup>Xequenevaüritüaca Mariya  
 vaüca müti'uximayacai xehesie  
 mieme. <sup>7</sup>Xequenivavaüritüaca  
 'Aniturunicu Cuniyaximame  
 nenuivarisie memümiemete  
 nehamatü memanutaxüriya. Müme  
 menive'emetetüni nü'arisixi vasata.  
 Cürisitusie mepüteviyacai ne  
 hesiena necativiyavecacu cuxi.  
<sup>8</sup>Xequenevaüritüaca  
 'Amupüriyatu neminaqui'erie  
 Ti'aitamesie netiviyatü.  
<sup>9</sup>Xequenivavaüritüaca 'Uruvanu  
 tahamatü müti'uximaya  
 Ti'aitamesie teteviyacacu,  
 'Isitaquimame neminaqui'erie.  
<sup>10</sup>Xequenevaüritüaca 'Aperexi  
 mü'inüasieve Cürisitusie tiviyatü.  
 Xequenivavaüritüaca 'Arisitupuru  
 quie miemete. <sup>11</sup>Xequenevaüritüaca  
 Heruriyuni nenuivarisie mümieme.  
 Xequenivavaüritüaca Narusisu  
 quie miemete, queyupaümetü  
 Ti'aitamesie memüteviya.  
<sup>12</sup>Xequenivavaüritüaca Türipina  
 Türipusamame Ti'aitamesie  
 meteviyatü memüte'uximaya.  
 Xequenevaüritüaca Perüsira

münaqui'eriva vaücava  
 müti'uximayacai Ti'aitamesie  
 tiviyatü. <sup>13</sup>Xequenivavaüritüaca  
 Xupu manayexeyari Ti'aitamesie  
 tiviyatü, varusieyamame  
 nevarusipaü mü'anecaita.  
<sup>14</sup>Xequenivavaüritüaca  
 'Asinicüritu Pürecuni Herümexi  
 Patüruva Herüma hipame  
 'ivamarixi vahamatü memü'uva.  
<sup>15</sup>Xequenivavaüritüaca Pirurucuxi  
 Curiyamame, Nereya 'ivaya  
 'ucamame, 'Urimipata yunaitü  
 Cacaüyari teüterimama vahamatü  
 memü'uva.  
<sup>16</sup>Xequeneyuvaüritüaca 'isiyacü  
 Cacaüyarisüa que xemütemiemete.  
 Yunaitü Cürisitusüa miemete  
 naisari memüyutixexeüriva  
 mepüxevaüritüa.  
<sup>17</sup>Ne'ivama 'ipaü  
 netinixevavirica,  
 xequenivaxeiyani müme hixüata  
 memüxesana memüxeti'ücamüra,  
 müme memüyüa que  
 yaxemücate'uta'üiquitüarie.  
 Xequeneyupata vahepaüsita.  
<sup>18</sup>Tati'aitivame Cürisitusie  
 mieme mepücate'uximaya  
 müya memü'anene, yuyuriepa  
 mieme püta mepüte'uximaya.  
 'Aixüa me'utiyuatü peru  
 yacü xEICÜa, visi me'utiniütü  
 mepüteva'irüviya müme tita  
 'axa müti'ane memücateha'eriva  
 va'iyari. <sup>19</sup>Xeme que xemütecahu  
 metenetimani yunaitüri.  
 'Ayumieme xehepaüsita  
 nepünetemavi. 'Ipaü pünetinaque,  
 xemütemaivavenicü 'aixüa  
 xeteyurietü, xemüca'inücacü  
 püta tita 'axa müti'ane. <sup>20</sup>Mücü  
 Cacaüyari mütasipitüa ta'iyarisie

temüca'uximatüariecäü, mücü  
nixepitüamücü xemicaquesinacü  
Satanaxi yareutevitü.

Tati'aitüvame Qesusi xüca  
'aixüa tiuca'iyarini xehesie  
mieme.

<sup>21</sup>Timuteu nehamatü  
müti'uximaya nixevaüritüaca,  
Rusiyuta Casunita Susipaterita  
nenuivarisie memümiemete.

<sup>22</sup>Ne Terütüyu 'icü xapa  
nemaca'utüa nepüxevaüritüa  
Ti'aitamesie netiviyatü.

<sup>23</sup>Que mü'anesüa nemü'axe  
ne, yunaitü memüyuyexexeüriva  
memü'axeta hesüana,  
Çayütütü canixevaüritüaca.  
'Erasitu quiecatari vatumini  
hüveme, ta'iva Cuarutumatü  
menixevaüritüaca.

<sup>24</sup>Yunaime xehesie mieme xüca  
'aixüa tiuca'iyarini Tati'aitüvame  
Qesusi Cürisitu.

**Visi queticühüavarüvani Cacaüyari**

<sup>25</sup>Mücü caniyüveni  
müxetuicanicü, que maine  
niuqui 'aixüa manuyüne  
nemücuxata, xasica Qesusi  
Cürisitu hepaüsita que maine.  
Catinicuxasivani que maine niuqui  
'iya mitahecüataxü. Mücü niuqui  
müixa caniuti'aviesiecaitüni  
çayuvatü xecüa, <sup>26</sup>hicürixüa  
masiücütü nayani. Texaxatamete  
va'utüarica ya'utainecacu, que  
mütiuta'aitaxü mücü Cacaüyari  
yuheyemecü 'amuyeica,  
canivarutahecüatüani yunaime  
nuivarite para yamemütecahunicü  
yuri mete'erietü.

<sup>27</sup>Mücü Cacaüyari muyuxeve  
mütimaive, visi queticühüavarüvani  
Qesusi Cürisitu hepaüsita  
yuheyemecü. Müpaü xecüa  
cani'aneni.

# CURINITUTARI

## Mexüacame Xapayari Que Mütivarunü'airi Papuru

---

### Vaürisica

**1** Ne Papuru, ta'iva Susiteneximatü, tecanixevaüritüaca Curinitutari. Cürisitu Quesusi caneniuta'inieni nü'ariecame nemayanicü, müpaü mütinaquecaicü Cacaüyari. <sup>2</sup>Curinitutari xemeyutixexeüriva Cacaüyarisüa xemiemetetütü, tenixevaüritüaca. Cürisitu Quesusisie xeteviyatü, xecaniupasieni Cacaüyarisie mieme. Xecaniuta'inierieni yaxemütepasienicü, que memüte'uta'inierie yunaitü naisarie memehüave que mü'ane Tati'aitüvame Quesusi Cürisitu mühücü, que mü'ane müme tiva'aitüvame mühücü tameta tati'aitüvame mühücü. <sup>3</sup>Cacaüyari müta'uquiyari, Quesusi Cürisitu mütati'aitüvame, 'aixüa xüca mete'u'iyarini xehesie mieme, xüca mexepitüaca xemüca'uximatüariecacü yu'iyarisie.

**Pamüpariyusi que mütipitüacai, 'iyarisie timieme memütecumiquivacaicü**

<sup>4</sup>Neheyemecü pamüpariyusi necanipitüaca Cacaüyari

xehepaüsita, 'aixüa tiuca'iyaritü mütixe'umicü Cürisitu Quesusisie xeteviyacacu. <sup>5</sup>Nai tinitimüiriyarümeni xehesie mieme, hesiena xeteviyacacu. Naimecü xecaniyüvaveni xemütiniunicü, naime xecatenimaica, <sup>6</sup>xehesie que mütiuseiriyarie mücü niuqui mihecüata Cürisitu. <sup>7</sup>Ayumieme naime xecatenicumiquivani, tixaü pücareuyevese mexi xe'icuevie Tati'aitüvame Quesusi Cürisitu, masiücütü mayeitüarienique. <sup>8</sup>Mücü canixeseiriyamücü xeme, tapareyuque, xehesie mücarahüivanicü 'iya tucarisie quepaucua munuani Tati'aitüvame Quesusi Cürisitu. <sup>9</sup>Cacaüyari que maine yacatinicamieni. Mücü canihücütüni que mü'ane müxe'uta'ini xemüyutaxevirecü nu'ayamatü Quesusi Cürisitu mütati'aitüvamematü.

### Cürisitu que tisanive

<sup>10</sup>Perüsü ne'ivama, vaüriyarica siepüre necanixepitüaniquyeyu, Tati'aitüvame Quesusi Cürisitusüa temiemetetütü 'ipäu ne'utaitü, xeniuku yuxevicacu

yaxeicüa xequetenecu'erivani,  
 hixüata xepücayusanani. Masi  
 xequenütüarieca yaxeicüa  
 xeteyumaitü, yaxeicüa xetecu'erivatü.  
<sup>11</sup>Hipatü Cürühesüa miemete müpaü  
 mecanetenuheciatüani xehepaüsita  
 ne'ivama, quename vaniu, hipatü  
 xeme xeyucuitüve. <sup>12</sup>Ipaü nepaine,  
 xeme yuxexuitü 'ipaü xeputiyuane,  
 Ne Papurusie necatiniviyani, xevitüta,  
 Nesü 'Apuruxisie püta necatiniviyani,  
 xevitüta, Nesü Sepaxisie püta  
 necatiniviyani, xevitüta, Nesü  
 Cürisitusie püta necatiniviyani.  
<sup>13</sup>Cürisitu que tisanive 'acu. Ne  
 Papuru xehesie mieme que netiumerie  
 curuxisie. Papurusia xemiemetetütü  
 que xete'uca'üvaxü. <sup>14</sup>Cari  
 pamüpariyusi nepipitüa Cacaüyari,  
 xeime tüma nemüca'uca'üyaxücü  
 xeme, Cürisipu xeicüa, Cayu xeicüa,  
<sup>15</sup>capa 'uxa'atüni varie xevitü  
 müpaü hainenicü, quename xeme  
 xe'uca'üyarie nehesüa xemiemetetütü.  
<sup>16</sup>Mesü necanivaruca'üyata  
 'Esitepanaxi quie quiecatari.  
 'Asinepücara'eriva xeimetüme que  
 nemütü'üyaxü. <sup>17</sup>Cürisitu que  
 münereyenü'a, capünesiheyenü'a  
 nemütü'üyanenicü xeicüa. Niuqui  
 'aixüa manuyüne nemücuxatanicü  
 caneneyenü'ani masi, peru  
 nemütücuxatanicü yacü timaivemepaü  
 necati'enierietü yacü xeicüa ne'utaitü.  
 Me xüca müpaü netiuniucanique, yacü  
 xeicüa catinixaxasivaniqueyu que  
 mütiumerie Cürisitu curuxisie.

**Türücariya que mütatipitüa,  
 temaivavemete que mütarayeitüa  
 Cürisitu, Cacaüyari yatipitüacacu**

<sup>18</sup>Icü niuqui que mütiumerie  
 curuxisie manuyüne, yacü

haineme mecani'erieca müme  
 memütatümaiyariexime. Tameri  
 püta temütaviceisütüariexime  
 que temüte'l'enie, mücü niuqui  
 türücariya canihücütüni  
 Cacaüyarisüa mümieme. <sup>19</sup>Ipaü  
 catine'uca,

Tita memütemate  
 temaivavemete, mücü  
 necanica'unamücü.

Tita memütemaivave yüvemete,  
 mücü necanixani'eriecamücü.

<sup>20</sup>Haquevari temaivavemete,  
 haquevari müme 'inüaricü  
 memüte'üqita, haquevari niuqui  
 xüxüatüvavemete hicü miemetexi.  
 Camüsü, tita memütemaivave  
 cuiepa memütama, yacü xeicüa  
 haineme canayeitüani Cacaüyari.  
<sup>21</sup>Cui timaivetü, müpaü  
 tiniuta'aita Cacaüyari, cuiepa  
 memütama que memütemaivave  
 memüyutatexienicü  
 meheitimanique Cacaüyari. Masi  
 caniyuväuriya Cacaüyari niuqui  
 mücuxasiva müvataviceisütüanicü  
 müme yuri memüte'erie, sepa  
 mücü niuqui yacü xeicüa haineme  
 memü'erie hipatü.

<sup>22</sup>Huriyusixi teüteriyari 'inüarite  
 menivauca, Cüriyecusixi timaiveme  
 niuquieya menivauca. <sup>23</sup>Tame  
 Cürisitu püta tecanixatani, que  
 mü'ane curuxisie mumierie que  
 mütihücü. Mücücü Huriyusixi  
 meniutiquetamürixüani, yacü  
 xeicüa ticuxaxasivame meni'erieca  
 hipatü memücahuriyusixi.

<sup>24</sup>Tame püta temuta'inierie, sepa  
 Huriyusixi sepa Cüriyecusixi,  
 müpaü tetenitamaica, Cürisitu  
 canihücütüni que mü'ane  
 türücariya mütasipitüa



Cacaüyarisüa miemetütü, que mü'ane temaivavemete mütasi'ayeitüa Cacaüyari que mütimaive. <sup>25</sup>Sepanetü xüca Cacaüyari yacü xEICÜA hainenique, mücüsiere masi yemecü catinimaiveniqueyu, teüteri hepaüna 'asimecatemaivavecacu. Sepa xüca Cacaüyari catürücaüyenique, masi yemecü canitürücaüyeniqueyu, teüteri hepaüna mecatürücaivicacu. <sup>26</sup>Xequetena'erivani que xe'ananetü xemuta'inierie ne'ivama. Camüsü, hipatü xEICÜA xeme xecatenimaivavemetetüni, teüteri que memütecü'eriva. Hipatü xEICÜA xepüve'emeté, hipatü xEICÜA mamarivavemete xepüvanivema, que xemüte'uta'inierie. <sup>27</sup>Masi 'ena cuiepa miemete tita yacü haineme memüte'erie cananuyeteüxieni Cacaüyari, para mütivatiteviyasitüanicü temaivavemete. Canenuyeteüxieni tita mücatitürücaivi 'ena cuiepa, mütivatiteviyasitüanicü müme memütürücaivi. <sup>28</sup>Cacaüyari canenuyeteüxieni tita tixaü mücatihücü, tita mütixani'eriva, tita 'amücatiive meta, para yacü xEICÜA meyeitüanicü tita mütixuave, <sup>29</sup>capa xevitü tevi ve'eme yuxatanicü Cacaüyari hüxie. <sup>30</sup>Masi Cacaüyari müxe'UNETÜACÜ, 'ayumieme 'axecaniu'uvani, Cürisitu Qesusisie que xemüteviya. Cürisitu canihücütüni que mü'ane Cacaüyari micaye, temaivavemete mütasi'ayeitüanicü, tasipitüatü heiseriemecü yatemütecahunicü, tasipatatü Cacaüyarisie mieme, tasixünatü. <sup>31</sup>'Ayumieme müpaü

cani'aneni que müre'uxa, Que mü'ane ve'eme müxatamücü, Ti'aitame quexatani ve'emetüme.

**Que müticuxatacai Cürisitu  
hepaüsita, curuxisie  
que mütiumerie**

**2** Yaxeicüa neta ne'ivama, quepaucua xehesüa nemunua, cui yüvemepaü nepücaüyanecai que nemütüniucacai, que nemütümaivecai, quepaucua nemütixecuxaxatüvaca ne'ihECÜATATÜ Cacaüyari que mü'ane. <sup>2</sup>Ipaü netininemaicaitüni püta, tixaü nepücara'erivaniquecai xehesüa ne'uyeicatü, Qesusi Cürisitu xEICÜA netina'erivaniquecaitüni, que mü'ane curuxisie mumerie que mütihücü. <sup>3</sup>Nesüari necatürücaüyetü masi necaninuani xehesüa, neheumatü vaüca, ne'uyüyüacatü. <sup>4</sup>Que nemütüniucacai, tita nemüticuxatacai, timaivemepaü nemütü'enierienicü xEICÜA nepücaüyanecai, visi netiuniütü xEICÜA yuri nemütixe'eritüanicü nepücaüyanecai. Masi necanixehECÜATÜACAITÜNI 'Iyari que müti'ane, Cacaüyari que mütitürücaüye, <sup>5</sup>capa heuyevecacü tita teüteri memütemaivave para yuri xemüte'eriecacü xeme, masi Cacaüyari türücaridayasie püta yuri xemüte'eriecacü.

**Tita Cacaüyari 'Iyarieya  
masiücüme mürayeitüa**

<sup>6</sup>Tetemaivavetü masi tetenicuxatani müme memaye'axüavave vasata. Peru que

temütemaivave, hicü miemetexi müpaü mepücatemaivave. Hicü miemetexi teva'aitüvameteta müpaü mepücatemaivave, müme yacü xeicüa memacünirüme. <sup>7</sup>Masi que temütécuxata tame, tenihécüatani tita müti'aviesiecai, que mütimaive Cacaüyari tetécuxatatü. Timaivetü que mütiyurieniquecai 'arique, visi te'aneneme que mütarayeitüani, mücü 'ana pücamasiücücai hicüque, sepa Cacaüyari müpaü mütiyumaicai cuie canetüarievécacu cuxi. <sup>8</sup>Hicü miemetexi teva'aitüvamate hasuacua müpaü mepücatehetimaivavecai ni xevitü. Xüca müpaü metehetimanique, curuxisie mepüca'imieniqueyu Ti'aitame visi mü'ane. <sup>9</sup>Masi que müre'uxa,

Tita tevi mücatixeyave  
yühüxicü, mücati'enieve  
yunacacü,

Titacü mücati'uyaritüave tevi,  
Müya 'aneneme Cacaüyari  
nivaruha'arütürieni

Müme meminaqui'erie.

<sup>10</sup>Müya 'aneneme Cacaüyari masiücüme canayeitüani, 'Iyari yatatixeisitüacacu. Mücü 'Iyari catinimaica naisarie que müti'ane, naitü que mütiyumate Cacaüyari.

<sup>11</sup>Teüteri, que titita tevisie mieme yamütimate tevi que mütiyumate. Tevi 'iyarieya hesiena müyeca canihücütüni tita müpaü mütimate. Yaxeicüata tevi 'asipücatimate Cacaüyari que mütiyumate. Cacaüyari 'iyarieya xeicüa müpaü catinimaica. <sup>12</sup>Tame 'uva cuiepa mieme 'iyari tepüca'uyeyesa. 'Iyari Cacaüyarisüa mümieme püta

tecaniuyeyeca, temütemaicacü tita Cacaüyari mütatiumi.

<sup>13</sup>Tita 'Iyarisie mütimieme teteni'avehécüasitüiyani müme 'Iyari memuyeyesa. 'Ayumieme quepaucua temixata tita Cacaüyari mütatiumi, tepücatecuxata que temüte'u'üquitüarie teva'enietü müme teüteri vahepaü xeicüa memütemaivave. Yatetenicuxatani 'Iyari que mütati'üquitüa püta.

<sup>14</sup>Tevi mücü 'Iyari müca'uyeyesa püca'yuväüriya mitanaqui'erienicü tita Cacaüyari 'Iyarieyasie mütimieme. Yacü xeicüa haineme cani'eriecamücü. Püca'yüve yamüretimanicü, me 'Iyari 'ipareviecacu xeicüa caniyüvemücü mita'inüatacü que müti'ane tita 'Iyarisie mütimieme. <sup>15</sup>Que mü'ane mücü 'Iyari muyeyesa püta, nai catinita'inüatamücü, peru xevitü 'Iyari müca'uyeyesa hepaüna püca'ita'inüata que mü'ane miyeyesa. <sup>16</sup>Que müre'uxa, Quepaicü pütimate que müticu'eriva Ti'aitame, quepai pütita'üquitüani. Peru tame Cürisitupaü tetenicu'erivani.

### Cacaüyarimatü que temüte'uximaya

**3** Neri ne'ivama, 'ana nepüca'yüvecai nemütixecuxaxatüvanicü que nemütivacuxaxatüva müme 'Iyari memuyeyesa. Müme vai xeicüa memühüme, türi Cürisitusie memüteviya que nemütivacuxaxatüva, müpaü püta netinixecuxaxatüvacaitüni xeme. <sup>2</sup>Resi nenixemicuacaitüni, 'icuai nepücaxe'umi, xemüca'iquemacacü. Peru hicü cuxi xepüca'iquema,

<sup>3</sup>vaisie xemüteviyacü cuxi. Mexi xeyumexüitüa hipame vahepaüsita, mexi xeyucuitüve cuxi, cari vaisie xecateviya xeicüa, teüteri vahepaü xecateyüa. <sup>4</sup>Xevitü quepaucua müpaü maine, Nesü Papurusie necatiniviyani, xevitüta, Nesü 'Apuruxisie netiniviyani, cari teüteri xeicüa xecanihümetüni.

<sup>5</sup>Mericiüte, 'Apuruxitütü que titita. Papurutütü que netitita. Cacaüyari parevivametemama tecanihümetüni, tacümana yuri xeteniuta'erieni. Ti'aitame que mütatiumi taxexuime, <sup>6</sup>ne neniuca'eni, 'Apuruxi ni'ipanecaitüni. Peru Cacaüyari canihücütüni mitinetüa. <sup>7</sup>'Ayumieme 'esame tixaü pücatihücü, 'ipavame tixaü pücatihücü. 'Iya xeicüa mitinetüa tixaütü catinihücütüni Cacaüyaritütü. <sup>8</sup>Mecaniyuxevini 'esame 'ipavame. Yuxexuitü yu'ivarica mecateni'ivacacuni que memütecumaüvacai.

<sup>9</sup>Cacaüyarimatü tecateni'uximayaca. Xemeri Cacaüyari vasiyaya xecanihümetüni.

Mücü meta, Cacaüyari veviyaya xecanihümetüni. <sup>10</sup>Cacaüyari 'aixüa tiuca'iyaritü que münetiumi, müpaü nepütitavevi tesariya quitüa mieme, qui vevivamete tiva'aitüvamepaü neyüanetü mütimaivepaü. Xevitü qui pütavevieni heimana. Yuxexuitü mequeyucuerivayurieca que memüte'iveviva. <sup>11</sup>Tesariya quitüa mümieme 'apuve yuxevitü. Xevitü püca'yüve tavari mitavevieni xeime. Qesusi Cürisitu canihücütüni tesariya 'amuve. <sup>12</sup>Hurucü püratacü tetexi visi mü'anenecü

xüca 'utaquini heimana, cüyexicü 'üxacü müaxacü nusu, <sup>13</sup>yuxexuime vaveviya canihecüacamücü.

Tucari 'aye'ayu hecüatü canayeimücü, tucari masiücütü que mürayani tai xuavecacu. Tai canita'inüatamücü yuxexuime vaveviya, 'aixüa que müti'anene.

<sup>14</sup>Tita mütiutavevie xüca yuhayeva, 'ivevivame catini'ivacamücü.

<sup>15</sup>Me xüca 'utitani, 'ivevivame tinitatümayamücü. 'Ivevivame xeicüa canitavicueimücü, peru que mü'ane taicü mutavicueipaü catini'eriecamücü.

<sup>16</sup>Xüari xeme müpaü xecatenimaica, Cacaüyari tuquieya xemühümecü haque Cacaüyari 'Iyarieya meyeca. <sup>17</sup>Tevi xüca 'ica'una Cacaüyari tuquieya, Cacaüyari canica'unamücü 'iya. Cacaüyari tuquieya canipasieca hesiena mieme. Xemeri xepühüme tuqui.

<sup>18</sup>Xepücateyu'irüviyani. Xüca xevitü xeme timaiveme yu'erieca, temaivavemete que memüteyu'erie hicü miemetexi, 'asicatimaitü püta que'ayani, yuri timaivetü mayanicü. <sup>19</sup>Cuiepa memütama que memütemaivave, yacü xeicüa haineme cani'erieca Cacaüyari. 'Ipaü catine'uca, Temaivavemete que memüteyucumana, mücü yacatinivaviyani. <sup>20</sup>Tavari 'ipaü catine'uca, Ti'aitame catinimaica niuqui que memütexüatüa temaivavemete, yacü xeicüa niuqui memüxüatüacü catinimaica.

<sup>21</sup>'Ayumieme 'aixüa püca'ane ve'emete müvaxatanicü teüteri. Masi naitü xehesüa catinimietetüni. <sup>22</sup>Sepa Papuru,

sepa 'Apuruxi sepa Sepaxi, sepa cuie, sepa xemayeneniere, sepa xemucui, sepa hicü mieme xemütehexeiya, sepa 'uxa'atüni varie mieme xemütehexeiya, naitü xehesüa catinimiemetüni. <sup>23</sup>Xemeta Cürisitusüa xecanimiemetetüni, Cürisituta Cacaüyarisüa canimiemetüni.

#### Nü'arisixi que memütehürütüariecai

**4** 'Ipaüta tequete'erivani tame, Cürisitu tupirisiximama que temütehüme, que temüte'uhürütüarie temihecüatanicü tita müti'aviesiecai Cacaüyari hepaüsita. <sup>2</sup>Camüsü 'ena xüca hürütüarieca, caneyeveca yamüticamienicü. <sup>3</sup>Peru xüca xeme xenesicu'ivaviyanique 'isücate vahepaü, xüca 'isücate memüteüteri xeicüa menesicu'ivaviyanique, tixaü nepücane'iyaritüacaqueyu mücücü. Ni necümana nepücane'ivaviyave. <sup>4</sup>Sepa 'asinemücatimate nehésie nemürähüpanicü, mücücü xeicüa heiserie nepücahexeiya. <sup>5</sup>Ti'aitame püta canihücütüni que mü'ane 'isücametütü munesicu'ivaviyani. 'Ayumieme xepüca'inüatani tucariyari ca'aye'avecacu cuxi, Ti'aitame 'acuxi canuavecacu. Mücü canihecüariviyamücü tita mütiuti'aviesie yüvipa. Masiücüme caneyeitüamücü que memütëyuriecu teüteri yu'iyarisie. 'Anaqueri yuxexuitü 'aixüa mecatenicühüavarüvacuni, Cacaüyari que mütivanaquisitüani. <sup>6</sup>Yanemütixehécüatüanicü ne'ivama, 'ayumieme necaninexatacaitüni, 'Apuruxi necanixatacaitüni, para

xetasiha'erivatü xemeitimanicü 'icü 'inüari, Que müre'uxa püca'anuyehaitürüveni, manuyüne, capa xevitü 'utahüsierienicü, xeimecü naqui'atü, xeime püta xani'erietü. <sup>7</sup>Camüsü quepaicü pe'anuyehaitürüveme pümasi'ayeitüa. Tita perexeiya pecatimiquievëtü. Mericüte, xüca petiumiquieni, titayariri ve'eme peti'axata, pecaticumiquivame pe'axatatü.

<sup>8</sup>Xemeri xüari xeniuhuxaca, naime xetehexeyatü xenacüneri. Xecanaye'axüani te'aitamete xe'acüneca, xetasitave'erietü tame. Xüca yuricü te'aitamete xe'acüneque tüma, tametari xehamatü tete'aitatü temacünecü. <sup>9</sup>'Ipaü netinicu'erivani, Cacaüyari pütasi'ucayasaxü tame nü'arisixi, 'imatüremete temühümetünicü, müme memanutaxüriya mecui'ivaque vahepaü temü'anenenicü. Te'ixüariyatü tecanacüne cuiepa memütama vahüxie, Cacaüyari tupirisiximama teüterita vahüxie. <sup>10</sup>Tame yacü te'utiyaneme tecani'erivani Cürisitusie mieme, cari xeme püta xecatenimaivaveni Cürisitusie xeteviyatü. Tameri tepücatürücavi, cari xeme xecanitürücavini. 'Aixüa xecatenicuxaxasivani xeme, tame püta tenixani'erivani. <sup>11</sup>Hicüque teneuhacacuicuni teneuharicuni tenimamaveni teniutiveiyani teneu'uvacatetüni. <sup>12</sup>Tetenita'uxitüaca tamamacü tete'ivatü. 'Axa tetcühüavarüvatü, 'aixüa teputiyuane. Te'uveyarietü yatepüte'uca'eniva. <sup>13</sup>'Axa me'utiyanecacu tahepaüsita,

tepüvanütüa. Cuiepa xasiyaripaü tecani'aneneni, naime temüxiquiyaripaü tecani'aneneni hicüque.

<sup>14</sup>Ipaü neti'utüatü

nepücaxeteviyasitüamücü. Masi nepüxenütüamücü nenivema xemühümecü nemüxenaqui'eriecü.

<sup>15</sup>Sepa tamamata miriyari xemüvarexeiyanique texe'üquitüvamate Cürisitusie xeteviyacacu, yumüreme xepücavarexeiya yuquemasima. Cürisitu Quesusisie netiviyatü, niuqui 'aixüa manuyüne neticuxatatü, necanixe'utinüvitüani.

<sup>16</sup>Ayumieme vaüriyarica necanixepitüaca, xenesi'üquetü xequenacüni.

<sup>17</sup>Müpaü xemütecahunicü, 'ayumieme xehesüa nepeitanü'a Timuteu. Mücüta caninenivetüni, neninaqui'erieca, yacatinicamieni Ti'aitamesie tiviyatü. Mücü canixe'aye'eritüamücü que nemütiuyeica Cürisitu Quesusisie netiviyatü, yaxeixia que nemüti'üquita naisarie memeyutixexeüriva vahesüa.

<sup>18</sup>Hipatü vaniu mecaniutihüsierieni, xehesüa necaheta'ame me'erietü.

<sup>19</sup>Neri cuitüva necaneta'amücü xehesüa, xüca müpaü tinaqueni Ti'aitame. 'Ana nepüretimani que memütetürücavi müme müpaü memütehüsierietüca, sepa que memütecuxata. <sup>20</sup>Cacaiyari ti'aitametücacu, pücaheuyevese vaüca müticuxatanicü. Mücü ti'aitametücacu, türücarिया puxuave püta. <sup>21</sup>Que tixenaque. Xehesüa netita'ani nexetavayatü.

Nepeta'ani nusu nexenaqui'erietü neca'ane'eriyatü 'acu.

**Que mütiuta'inüasie xevitü mürucuyanecai**

**5** Cari müpaü catinicumivani, quename xeniu, xevitü xeme 'icumaüva que mü'ane mücayü'üya. Que memücateyurie nuivarite, yacatiniyurieneni 'iya 'icumaüvatü. Yuteivari xeniu caniutivitüni. <sup>2</sup>Cari xeme xepühüsierietüca. Caneuyevaca masi xemutisuananicü, yusata xemenuyenü'anicü müya mütiyuriene. <sup>3</sup>Nesü sepa nevaiyarisie teva nemuyeica, netininemaica xehesüa nemuyeicanipaü. <sup>4</sup>Ipaü xequeteneuyuri Ti'aitame Qesusi xehüavetü. Xequeneuyucuxeürie, neta xehamatü ne'uyeicacacu yacütütü. Tati'aitüvame Qesusi xetürücayacacu, <sup>5</sup>xequeneyetua que mü'ane müya mü'ane, Cauyumarie mica'unacü vaiyarieya, 'iyarieya püta mütavicueisitüarienicü 'iya tucarisie quepauca munuani Ti'aitame.

<sup>6</sup>Ve'emete que xemüteyuxata, mücü 'aixüa püca'ane. Müpaü xecatamate, 'esipemecü pa naitü caniuatucuxaniriyarieni ticuxanariyamecü. <sup>7</sup>Xequeneyu'itieca ticuxanariyame müye'i mumavenicü, 'axa que xemüteyuriecai. Pa mühecuca püta xequenacüni, xemü'tiyatücanicü yaxeixia mücü 'ixüararipa que memüte'i'itiva pa cuxaxanime, cacuxaxanime xeixia memütecuanicü püta. Mücü 'ixüararipa muxasi türixi que memüte'ucuicüiva, teüteri meteha'erivacacu Cacaiyari que mütivaruhayevaxü

vateüterima, hicüta yaxeciä  
 mavariyari 'ari caniumierieni  
 Cürisitütütü. <sup>8</sup>Ayumieme tame  
 temü'ixüaramete yacütütü, ye'imecü  
 cuxaxanimecü tepücayuäca,  
 'axa 'aneneme tehexeiyatü 'axa  
 teteyurietü. Masi cacuxaxanitü  
 que müticuaiva 'ixüararipa, tameta  
 'aixüa tequeteheciäsieca, yuri  
 teque'utiyuaneni.

<sup>9</sup>Müpaü netinixe'u'utüirieni xeime  
 xapasie, xemücavanücacü rucusixi  
 ne'utaitü. <sup>10</sup>Nesü nepücavaxatacai  
 'ena cuiepa memürucusixi, müme  
 naime memütehiv'e'erie yuhesie  
 mieme, memütenavaya, mümeta  
 tetexi memüvarayexeiya. Müme  
 yemecü xüca xecavanücaque,  
 caneuyevacaqueyu masi cuiepa  
 xemücajuhayevacü, xemanuyecüneccü  
 püta. <sup>11</sup>'Ipaü necanaineni hicü,  
 que nemütixe'u'utüiri 'ana, ta'iva  
 yuxatatü xüca rucuyaneni, xüca  
 naime tihive'erieca yuhesie mieme,  
 xüca tetexi varayexeiyani, xüca  
 'axa 'utaineni hipame vahepaüsita,  
 xüca taveneni, xüca tinavayani,  
 müpaü nepaine, müpaü 'aneme  
 xepücanüca, ni hamatüana  
 xepücatecuaca. <sup>12</sup>Careuyevese  
 'acu xemüva'inüatanicü yuhesüa  
 miemete. Queri reuyevacaqueyu  
 nemüvata'inüatanicü tacua miemete,  
<sup>13</sup>Cacaüyari püta mü'isücamecü  
 müvacu'ivaviyacü. Peru yusata  
 xequenanyenü'a xeme que mü'ane  
 'axa mütiyuriene.

**Que mütarutahüavixü, que  
 memüteyuxanetacai 'isücate  
 yuri memücate'erie vahüxie**

**6** Xevitü xeme xüca  
 'ixanetamücünü yu'ivatüme,

queri tiyumaica menuhanacü  
 'isücate yuri memücate'erie  
 vahüxie, Cacaüyari teüterimama  
 vahüxie püta cayuvaüriyatü.  
<sup>2</sup>Müpaü xecatemate, Cacaüyari  
 teüterimama 'isücate tenacünicuni  
 cuiepa memütama tevati'ivaviyaque.  
 Xücasü xeme xehümetüni  
 xemüva'inüatani cuiepa  
 memütama, titayari xecateyüvave  
 xemüte'inüatanicü 'esitipeme  
 hepaüsita. <sup>3</sup>Müpaü xecatemate,  
 tame tepüvata'inüatani Cacaüyari  
 tupirisiximama. Pini hepaüsita  
 titayari xecateyüvave masi  
 yemecü. <sup>4</sup>Me xücarı pini hepaüsita  
 xeyuxanetani, titayari xetevarayasa  
 'isücate memücamariva  
 memüyuyexexeüriva  
 vasata xemüva'enienicü.  
<sup>5</sup>Nexeteviyasitüanique 'ipaü  
 netinicuxatani. Ni xevitü  
 'acatiuyeica xesata timaivetü,  
 yüvetü müti'inüatanicü 'ivamama  
 que memüteyuxaneta. <sup>6</sup>Masisü  
 yu'ivamatü xepüyuxaneta,  
 müya xeteyurietü müme yuri  
 memücate'erie vahüxie.

<sup>7</sup>Masiri mexi xeyuxaneta, yemecü  
 xeniyutexieca xemaye'axüanicü.  
 Titayari masi xecatevapitüaca  
 hipame, 'axa memüxeyurienicü,  
 titayari masi xecateyutauni  
 xemünavaıyarienicü. <sup>8</sup>Peru  
 xeme püta 'axa xecaniyuyurieni.  
 Xecaniyunavatüveni yu'ivamatü.

<sup>9</sup>Müpaü xecatemate, müme  
 'axa memüteyurie vahesie  
 pücatinaqueni memaye'axüanicü  
 Cacaüyari tiva'aitüvame  
 mayanicü. Xepücateyu'irüviyaniri.  
 Xüca 'icumaüvani que mü'ane  
 mücaü'üya mücaücuna, tetexi

xüca varayexeyani, xüca 'icumaivani xeime 'üyaya cünaya, xüca 'uquitütü 'ucari vahepaü yüaneni, 'uquitütü xüca 'icumaivani xeime 'uqui, <sup>10</sup>xüca tinavayani, xüca naime tihive'erieca yuhesie mieme, xüca taveneniri, xüca 'axa 'utaineni hipame vahepaüsita, xüca ticumaivani hipame tivapini, hesiena pücatinaqueni maye'anicü, Cacaüyari ti'aitävame mayanicü. <sup>11</sup>Müpaü xe'anenetü xecanihümetücaitüni hipatü. Perusü hicürixüa xecaniu'itiyani masi. Xecaniupasieni Cacaüyarisie mieme. Heiserie xecaniupitüarieni, Ti'aitame Quesusi Cürisitusüa xemiemetetütü, tacacaüyari 'iyarieyasie xeteviyatü.

**Yuvaïyarisie xe'u'uvatü,  
visi ticuxaxasivame  
xequenayeitüa Cacaüyari**

<sup>12</sup>Heiserie necanexeyani nai nemütiyurienenicü, que pemaine. Xasunicü, peru nai netiyurienetü nepücapareviyani. Que pemaine, heiserie nepexeyia nai nemütiyurienenicü, peru nepücaneväüriya tixaütü heiserie mexeyanicü nehapaüsita. <sup>13</sup>Icuai rayuriepa catini'ayumiemetüni, rayuriepa 'icuaisie catini'ayumiemetüni, que pemaine. Hü, peru Cacaüyari 'uxa'atüni varie canitaxütüamücü rayuriepa 'icuaime. Peru ravaiyari para micumaivanicü que mü'ane mücayü'üya mücayücüna, mücücü püca'ayumieme. Ti'aitamesie mieme püta catini'ayumiemetüni,

Ti'aitame tavaiyarisie mieme catini'ayumiemetüni. <sup>14</sup>Cacaüyari canenucuquetüani Ti'aitame. Catananucu'uitüamücü tameta yütürücariyacü.

<sup>15</sup>Müpaü xecatemate, xevaiyari Cürisitu mamateya 'ücateya canihücütüni. Mericüte, tita Cürisitu vaiyarieyasie mütimieme, ne que netinavairieni Cürisitu, para 'uca tuminicü muyuvitünüa pinieya mürayanicü. Pücatixaü yemecü. <sup>16</sup>Müpaü xecatemate, que mü'ane 'uca tuminicü muyuvitünüasie mütiviya, yuhamatü xeï vaiyari mecanacücani meyuxevitü. Que maine 'utüaricayari, Yuhutatü xeï vaiyari mecanacünicuni meyuxevitü. <sup>17</sup>Masi que mü'ane Ti'aitamesie mütiviya, yuhamatü xeï 'iyariyari mecanacücani meyuxevitü.

<sup>18</sup>Xequeneyuta'una capa xe'imayüanicü que mü'ane mücayü'üya mücayücüna. Naime 'axa que mütiyuriene tevi, püca'yusevixima yuvaïyarisie, peraine. Pücatixaü, masi que mü'ane micumaiva que mü'ane mücayü'üya mücayücüna, mücü püyusevixima yuvaïyarisie. <sup>19</sup>Müpaü xecatemate, xevaiyari tuqui canihücütüni 'Iyari Mütiyupatasie mieme, xehesie müyecacü. Cacaüyari canixepitüaca mücü 'Iyari. Xeme yücümana xepüca'yucusiyarima. <sup>20</sup>Xevitü püta 'uyutuacu xepunanaïya. 'Ayumieme yuvaïyarisie visi ticuxaxasivame xequenayeitüa Cacaüyari, yu'iyarisie meta, Cacaüyari mücusiyarieyacü.

**Müme memüneneüque  
memüviqi vahepaüsita**

**7** Nepütixetaxatüaniq ueyu yuxapasie que

xemünete'uta'ivaviyaxü. 'Aixüa cani'aneni xüca 'uqui 'uca cacumaüvani. <sup>2</sup>Peru rucusixi memüyumüirecü, 'uquisi yuxexuitü yül'ütama mequevarexeiyani, 'ucarita yuxexuitü yücünama mequevarexeiyani.

<sup>3</sup>'Uqui que'ipitüaca yül'üya que müreyeveve, yaxeciüata 'uca quetipitüaca yücüna. <sup>4</sup>'Uca heiserie pücahexeiya yuvaiyari hepaüsita, cünaya püta heiserie canexeiyani. Yaxeciüata 'uqui heiserie pücahexeiya yuvaiyari hepaüsita, 'üyaya püta heiserie canexeiyani.

<sup>5</sup>Xepücatehayeva xeyucumaüvatü, me xeyu'enietü 'esiva xeciüa xüca yaxeteheutevini, neneviericü xemü'ayumiemetetünicü, tavari xeyuxevitü xe'acüneque, capa Cauyumarie xe'uta'inüatacä, capa xecayüvavenicü xemüteyu'aitüacacü.

<sup>6</sup>'Ipaü nepaine xemütemaicacü que xemüte'upitüarie. Netixe'aitüatü nepücahaine.

<sup>7</sup>Müpaü pünetinaquenieyü, xüca yunaitü teüteri nehapaü me'anenique. Masisü Cacaüyari 'aixüa tiuca'iyaritü yücü catinivapitüaca yuxexuime, xeime 'ipaü, xeimeta müpaü.

<sup>8</sup>'Ipaü netinivarutahüave müme memücaneneüque memücaviqui, viyurasixi meta. 'Aixüa caniyümücü xüca nehapaü me'anenetü meyhayeva. <sup>9</sup>Me xüca müpaü mecayüvaveni, meque'utineneüque meque'utiviquieni. Mecuxi queneüqueni, mecuxi queviequieca, capa 'utatanicü.

<sup>10</sup>Peru müme memüneneüque memüviqui, müpaü netiniva'aitüaca,

masi ne pücatixäü, Ti'aitame püta müpaü tinivaruta'aitüani, 'uca yücüna pücacu'eirieni. <sup>11</sup>Me xüca 'icu'eirieni, neuyeveca caviquietü müyuhayevacü, ya neuyeveca hutarieca munuanicü yücünasüa. 'Uquita yül'üya pücacu'eirieni.

<sup>12</sup>Hipameri müpaü netinivarutahüave, Ti'aitame 'asimüca'utayücü 'icü hepaüsita, xevitü ta'ivatütü yül'üya xüca 'avitücünü yuri cati'eriecame, xüca 'üyaya yuvaüriyani hamatüana mucanicü, mücü püca'icu'eirieni yül'üya. <sup>13</sup>'Uca meta yücüna xüca hexeiyani yuri cati'eriecame, xüca cünaya yuvaüriyani hamatüana mucanicü, mücü püca'icu'eirieni yücüna. <sup>14</sup>'Uqui yuri mücati'erie canipasieca yül'üyasie tiviyatü. 'Uca yuri mücati'erieta canipasieca ta'ivasie tiviyatü. Mesü xüca müpaü ca'anenique, xenivema mepüca'itiyatücanique, peru müpaü mü'anecü, mecanipasieca Cacaüyarisie miemecü. <sup>15</sup>Peru que mü'ane yuri mücati'erie xüca 'i'eirimücünü yuri ti'eriecame, mecuxi queheyani. Pücaheuyeveve ta'iva 'uquitütü 'ucatütü hesiena tiviyatü müyuhayevacü xüca müpaü 'aneni. Cacaüyari que mütatiuta'ini, cataniuta'inieni hesiena temüteviyanicü teca'uximatüarietü ta'iyarisie. <sup>16</sup>'Uca queri petimate, xüca pe'itavicueisitüani 'acüna. 'Uquita que petimate xüca pe'itavicueisitüani 'a'üya.

<sup>17</sup>Mücü xeciüari, Ti'aitame que mütivarupitüa yuxexuime, que me'anenetü 'amemu'uvacai yuxexuitü quepaucua Cacaüyari müvaruta'ini, müpaü



me'anenetü meque'u'uvani.  
 'Ipaü netiniva'aitüaca yunaitü memeyutixexeüriva naisarie.  
<sup>18</sup>Huriyusixi vaxitequiyacü 'inüasietü xüca 'uta'inierieni, pücaheyeitüani va'inüari.  
 Ca'inüasietü vaxitequiyacü xüca 'uta'inierieni, pücayu'aitani mü'inüaritüarienicü. <sup>19</sup>Sepa mu'inüasie, sepa müca'u'inüasie, xüca yaticamieni que müti'aita Cacaüyari, mücü xeicüa caneuyeveca. <sup>20</sup>Yuxexütü que me'anenetü memuta'inierie, müpaü meteyurietü mequeyuhayeva.  
<sup>21</sup>Vaüriyarica peti'uximayacai quepauca pemuta'inierie. Sepasü pepüca'a'iyaritüaca mücücü. Me xüca peyüveni pemüxü necü, 'aixüa caniyümücü masi. <sup>22</sup>Que mü'ane muta'inierie Ti'aitamesie mütiyianicü, vaüriyarica ti'uximayatame hücütütü, xünariecame nayani Ti'aitamesie mieme. Müpaüta yaxecüa, que mü'ane muta'inierie xünitü, 'iya Cürisitusie mieme catini'uximayatametüni.  
<sup>23</sup>Xevitü 'uyutuacu xepunanaiya. Te'uximayatametetütü xepüca'acüne teüteri vahesie mieme.  
<sup>24</sup>Yuxexütü que me'anenetü memuta'inierie, müpaü meteyurietü mequeyuhayeva Cacaüyarisie meteviyatü. Müpaü nepaine ne'ivama.

<sup>25</sup>Müme memücaxuriquitüca vahepaüsita tixaü nepücarexeiya Ti'aitame yatiu'aitacu. Peru que nemüticu'eriva netinixetaxatüani müpaü netimaitü, Ti'aitame caneninenimayaca nenuiqui müseüyenicü. <sup>26</sup>'Ayumieme

'Ipaü 'aixüa 'aneme neni'erieca hicü temü'uximatüariecü, 'aixüa cani'aneni xüca tevi yuhayeva que müti'ane. <sup>27</sup>'Uca petiuvitütüarie 'acu. Mericüte, pepücatücuvauneni pemü'axünacü. 'Uca petimave 'acu. Pepüca'icuvauni 'uca. <sup>28</sup>Me xüca peneüqueni, 'aixüa cani'aneni, 'axa petiuyurieme pepüca'a'erieca. 'Üimari mücaxuriqui xüca 'utiviquieni, 'aixüa cani'aneni, 'axa tiuyurieme pücayu'erieca. Mücü xeicüa, müme memüvitütüarie mecani'uximatüariecuni mexi yuvaiyarisie me'u'uva. Ne masi nepünaqui'acaqueyu xüca xeca'uximatüariecaque.

<sup>29</sup>'Ipaü nepaine ne'ivama, tucari canaye'aximeniri. Mexicuxi, müme memüvaravitücü yü'üitama, yaxecüa müme memücavaravitücü vahepaü meque'aneneni, <sup>30</sup>mümeta memütisuana müme memüca'utisuana vahepaü meque'aneneni, mümeta memüyutemamavie müme memüca'yutemamavie vahepaü meque'aneneni, müme memütenanetüve, müme memüca'atüiyarievave vahepaü meque'aneneni, <sup>31</sup>müme memi'usarüva 'ena cuiepa timieme, yaxecüa müme memüca'i'usarüva vahepaü meque'aneneni. 'Icü cuie que mü'ane 'epücareutere.

<sup>32</sup>Pünesinaque xemücayu'iyaritüacacü vaüca xeteha'erivatü. Que mü'ane mücareca'üya, Ti'aitamesie timiemecü niyu'iyaritüaca, que mütinacü'asitüani Ti'aitame. <sup>33</sup>Que mü'ane müreca'üya cuiepa timiemecü niyu'iyaritüaca, que

mütinaqui'asitüani yü'üya.

<sup>34</sup>Hutamecü müpaü tinimaica.

'Uca mücarecacüna mücaxuriqui meta niyu'iyaritüaca Ti'aitamesie timiemecü, hesiena mieme müpasienicü yuvaïyarisie yu'iyarisietä. Que mü'ane mürecacüna niyu'iyaritüaca cuiëpa timiemecü, que mütinaqui'asitüani yücüna.

<sup>35</sup>Ipaü netinicuxatani xemüpareviyanicü. Nexeviniyamütü nepüca'utaine. 'Aixüa 'anemecü xemümasiücünicü que müreyeveşe neputaine, Ti'aitamesie mieme xemü'ayumiemetetünicü xecacuhapanietüvetü.

<sup>36</sup>Me xüca 'üimari hexeiyani mücaxuriqui, 'aixüa que mücati'ane 'iyurieme xüca yu'erieca, xüca 'e'uteviniri, xüca reuyeveca müpaü mü'anenicü, que mütinaque yaquetiuyurieni. 'Aixüa caniyümücü, meque'utineneüque, 'axa mete'uyurieme mepücayu'erieca. <sup>37</sup>Que mü'ane müseire yu'iyarisie, tixäu careuyehüatü, yünü'avetü que mütiyurate, xüca yu'iyarisie müpaü tiyumaica mi'üviyanicü caxuriquime que mü'ane hesüana mümieme, 'aixüa catiniyuriemücü. <sup>38</sup>'Ayumieme que mü'ane mivitütüa 'üimari mücaxuriqui hesüana mümieme, mücü 'aixüa catiniyuriemücü, que mü'ane müca'livitütüa masi 'aixüa catiniyuriemücü.

<sup>39</sup>Caneuyeveca 'uca yücünasie mütiyivanicü mexi 'ayeyuri 'uqui. Xüca cünaya 'umüni, canixünariemücü. Caniyüvemücü mütiyiquienicü

que mütinaque, peru Ti'aitamesie tiviyatü xeicüa canitivitümücü.

<sup>40</sup>Ne que nemüticu'eriva, caniyutemaviecamücü masi xüca müpaü 'anetü yuhayeva. Müpaüta netinicu'erivani, neta Cacaüyari 'Iyarieya nepexeiya.

**Tita tetexi memütemaviyari hepaüsita**

**8** Tita cacaüyarixi memütemaviyari hepaüsita netinixetaxatüaniqueyu. 'Ipaü tetenimaica, quename tanaitü tetemate que temütecu'eriva. Peru yatetemaitü que temütecu'eriva, mücücü tecanihüsieriecuni xeicüa. Tetetacanaqui'erietü püta tecaniseiriyariecuni masi. <sup>2</sup>Tixaütü timaiveme xüca yu'erieca, 'acuxi 'asipücatimaive que müreyeveşe yamütimaicacü. <sup>3</sup>Masi xüca 'inaqui'erieca Cacaüyari, Cacaüyari canimaicamücü müya mü'ane.

<sup>4</sup>Mericüte, 'licuai hepaüsita cacaüyarixi que memütemaviyari, müpaü tepütemate, tete pücaxuave cuiëpa yuri mücacaüyari, xevitü pücaxuave cacaüyaritütü. 'Iya yuxevitü 'acanijuveni xeicüa cacaüyaritütü. <sup>5</sup>Peru sepa 'amemu'uva müme cacaüyarixi memüte'umamativa taheima cuiëpa, cacaüyarixi que memüteyumüire, te'aitamete que memüteyumüire, <sup>6</sup>masi tame que temütemate, Cacaüyari caniyuxevini ta'uquiyaritütü. Naitü hesiena canayeneicani, tame hesiena mieme tecani'ayumiemetetüni. Ti'aitameta caniyuxevini Qesusi Cürisitu hücütütü. Naitü tiniunetüarieni 'iya 'inetüacu, tameta teniunexüani 'iya tasi'unetüacu.

<sup>7</sup>Peru yunaitü 'ipäu mepücatemate. Hipatü 'acuxi mecacanivaratümaiavaveni, mevamaive'erietü memanucuneniere. Müme quepaucua memicua'a tete mavarieya, mücü cacaiyari mecana'erivani. Müpaü metecu'erivatü mecaniyuseviximaca yu'iyarisie, memücaseseüye que memüteyumatecü. <sup>8</sup>Mericüte, ta'icuai pücatasi'aye'atüani Cacaïyarisüa. Sepa temüca'icua'a, yaxaicüa tixaü tepücateheuyehüva. Mesü, sepa temicua'a, mücücü tepücapareviya. <sup>9</sup>Xequeneyucuerivayurieca, capa xevurutiquetamüracü müme memücaseseüye, xetecuatu heiserie que xemütehexeïya. <sup>10</sup>Ecü müpaü xeniu pemütimate, xüca caseüyetü masixeiyani mana peticuacame xeime cacaiyari tuquieyasie, que mütiyumate catiuvaiuriyarieni miticuanicü tita mütimaviyari mücü cacaiyari. <sup>11</sup>Iya mücaseseüye canitatümaiariemücü masi, 'ecü müpaü pemütimatecü, sepa mü'a'iva, sepa Cürisitu hesiena mieme mumü. <sup>12</sup>Müpaü 'axa xevayurietü yu'ivama, xevatavayatü müme que memüteyumate, 'axa xecaniyurieca Cürisitu. <sup>13</sup>Ayumieme xüca 'icuaicü 'utiquetamüre ne'iva, mecuxi nemüca'iticuani vai neheyemecü, capa ne'itiquetamüracü ne'iva.

**Nü'arütü heiserie que mürexeyacai**

**9** Camüsü necatinenü'ave ne. Necatinü'ariecame 'acu. Qesusi necatiuxei Tati'aitüvame.

Xeme xecatehüme tita mütiutixuaverixü neticumaiüvacacu ne, Ti'aitamesie netiviyatü.

<sup>2</sup>Sepa hipatü nü'ariecame memücanesi'eriecaque, xeme xecanenimaica nü'ari que nemütihücü. Ne'inüari xecanihümetüni, xecümana catinimasiücünü nü'ari que nemütihücü Ti'aitamesie netiviyatü.

<sup>3</sup>Ipaü nepaine ne'utaniütü nehiesie mieme, neva'eiyatü müme memünesixaneta.

<sup>4</sup>Camüsü, heiserie tecatehexeïya temütemiquienicü para temütecuanicü temüte'ienicü.

<sup>5</sup>Heiserie tecatehexeïya ta'üitama temüvaravitücünicü ta'utüma,

'ivamarixi mehümetüme, que memüteyurie hipatü nü'arisixi, Ti'aitame 'ivamama que memütevaravitücü, Sepaxita que mütiyuriene. <sup>6</sup>Ne xEICÜA

Verunave xEICÜA xüari müpaü tepücatepitüarie, temütehayevacü tete'ivatü. <sup>7</sup>Tamüsü, quepaicü cuya payani yuxaüta tiyupitüatü. Quepaicü haraveri muca'iteüta pücaticuani 'icuaxiyari. Quepaicü va'üviyatü muxasi, varesiyari ca'anu'ieni. <sup>8</sup>Tevipaü xEICÜA que neticuxata, 'ipäu ne'utaitü. 'Inüari niuquiyari yaxaicüa caraine 'acu. <sup>9</sup>Müpaü catine'uca Muisexi 'inüarieyasie, Pepüca'isurihüani puixi quepaucua mitiquesina türicu mütihenarienicü. Puixisixi vahütü xEICÜA que ticuxata Cacaïyari.

<sup>10</sup>Masi tahesie mieme caticuxata. Tahesie mieme yemecü müpaü püraca'ütüarie, meuyevesecü cuiesaname mücuiesananenicü yuri ti'erietü mexi ta'icueva,

'uvameta müti'unicü yuri ti'erietü quename 'icuaxiyari hexeyatü 'ayani. <sup>11</sup>Tame 'iyarisie timieme tecaniuca'eni xehesüa. 'Aixüa catiyüni vaisie timieme xüca te'uca'isanani yaxetatemicuacacu. <sup>12</sup>Hipame xecanivapitüaca heiserie memexeyanicü xehepaüsita. Tame masi yemecü heiserie tecatehexeiya temütemiquienicü.

Peru sepa heiserie temexeya mücücü, müpaü tepüca'yüa. Naime tepütenevie masi, temüca'inenacacü niuqui 'aixüa manuyüne Cürisitu hepaüsita. <sup>13</sup>Müpaü xecatemate, müme tuquita memüte'uximaya, müme tuquita mieme mepütecua'a. Müme müratimavatüre memü'ayumiemete, mavaripa mieme metenihapanani. <sup>14</sup>Ti'aitame yaxecüa tinivaruta'aitüani müme niuqui 'aixüa manuyüne memücuxata, müme memüte'ivanicü yametecuxatatü. <sup>15</sup>Ne xecüa nepücanevaüriya müpaü nemütiyurienenicü. Que nemüti'utüa meta, müpaü nepüca'utaine yanemütimiqlienicü. Mecuxi nemümüniqueyu masi. Xevitü yacü ne'utaineme pücanesi'ayeitüani, 'aixüa que nemüticuxata nehepaüsita.

<sup>16</sup>Sepa niuqui 'aixüa manuyüne nemücuxata, masi mücücü nepüca'yüe 'aixüa nemüticuxatanicü nehepaüsita. Vaüriyarica masi netinicuxatani. Xüa 'ui, que nemütinemaicaqueyu, xüca niuqui 'aixüa manuyüne necacuxatanique. <sup>17</sup>Xüca nenevaüriyanique müpaü nemütiyurienenicü,

nepüti'ivaniqueyu. Masi nepuviyarie hüritüaricacü, sepa nemücanevaüriyanique. <sup>18</sup>Querite neti'ivani 'acu. Niuqui 'aixüa manuyüne xüca necuxatani necatinecuetatüatü, mücücü canine'ivaricatüni. Netinicuxatamücünü yanecatiyurienetü heiserie que nemürexeya, niuqui 'aixüa manuyüne necuxatatü. <sup>19</sup>Sepa nemünenü'ave, yunaime vahesie mieme vaüriyarica neti'uximayatatü nepaneyeitüva, yumüireme masi nemüvarahapanacü. <sup>20</sup>Huriyusixi nevacuxaxatüvatü, nepünehuriyuta, nemüvarahapanacü Huriyusixi. Müme 'inüari niuquiyarisie mepüteviya, 'ayumieme vahepaü ne'aretü nepaneyeitüva nemüvarahapanacü müme 'inüari niuquiyarisie memüteviya, sepa va'inüarisie nemücativiya ne. <sup>21</sup>Nuivarite meta mücücü 'inüari niuquiyari memümamave nevacuxaxatüvatü, vahepaü ne'aretü nepaneyeitüva, nemüvarahapanacü müme 'inüari niuquiyari memümamave, sepa Cacaiyari hüxie 'inüari nemücamave ne, Cürisitu 'inüarieya nehexeyatü. <sup>22</sup>Müme memücaseseüye nevacuxaxatüvatü, necaseüyetü nepaneyeitüva, nemüvarahapanacü müme memücaseseüye. Yunaime nevacuxaxatüvatü, naime nenaneyeitüvani xüca 'acu naimecücü nevatavicueisitüani hipame. <sup>23</sup>Ipaü naime yanecatiniyurieneni niuqui 'aixüa manuyünesie mieme, neta nehiesie

mieme mütinaquenicü que maine niuquiyari.

<sup>24</sup>Müpaü xecatemate, müme parecu memüte'unanausa, yunaitü metanausame, xevitü xeicüa heixeiyatü nayeimücü 'ivaricasie mieme. Yaxeicüata xeme, xequeteneunanausani para xeheixeiyatü xemacüneccü.

<sup>25</sup>Yunaitü parecu memüte'unanausa mecateniyu'aitüaca naimeccü.

Müpaü meteniyurieca müme muma mütixainive memühuritüarienicü.

Tame masi muma mücatixainive tecanihuritüariecuni. <sup>26</sup>Nesietü

que nemütiunanausa, 'aixüa necatinimaica que nemütimie.

Que nemütinemiene, 'eca nepücacuvaxüaxime.

<sup>27</sup>Masi nevaiyari nepücuvaya.

Nepünemaxiuta capa ne'utixani'erivacü ne,

netivacuxaxatüvame hipame.

**Que mütivacu'imaiyacai capa tetexi mevarayexeianicü**

**10** Yaxeicüa ne'ivama, neuyeveca müpaü xemütemaicacü, tatevarima yunaitü mücü haivitürütüa quepauca memu'uvacai, yunaitü mana haramarasie quepauca memanucü, <sup>2</sup>yunaitü müme yacütütü Muisexisie meteviyatü meniuca'üyarieni haivitürisie haramarasie. <sup>3</sup>Yunaitü 'axeicüa 'iyarisie mieme metenicuacaitüni, <sup>4</sup>yunaitü 'axeicüa 'iyarisie mieme meteniharecaitüni. 'Iyarisie mieme tete müvaruveiyacai, mücü nivaharütüacaitüni. Mücü tete Cürisitu canihücütüacaitüni. <sup>5</sup>Sepanetü, Cacaüyari

pücanaqui'acai yumüireme vahepaüsita. Macumavesie mecaniutixüriyaniri vacaxarite.

<sup>6</sup>Mericüsü, mücü 'inüari caniuüni tahesie mieme, capa te'ihive'eriecacü tita 'axa müti'anene, müme memüteyucahive'eriecaipaü.

<sup>7</sup>Yaxeicüa tetexi xeverayexeiyatü xepüca'acüne, hipame müme vahepaü. Müpaü catine'uca,

Teüteri meniucayaxixüani memütécuanicü memüte'ienicü,

'arique menanucu'uni memüteneitüvenicü. <sup>8</sup>Yaxeicüata,

que mü'ane mücata'üya mücatacüna tepücavacumaivani,

hipatü müme que memüte'uyuri.

Mevarucumayüaca, meniucuni xei tucarisie, xei teviyari heimana haica miriyari meyupaümetü müme.

<sup>9</sup>Mücü meta, tepücate'l'uxitüaca Ti'aitame te'l'isipatüvetü, hipatü müme que memüte'uyuri.

Me'l'isipaca, cuterixi vacü meniutatümaiarieni müme.

<sup>10</sup>Mücü meta, xepücaniuxieca, yaxeicüa hipatü müme que memüte'uyuri. Me'unuquixiecu, ti'uname nivaruca'una müme.

<sup>11</sup>Mericüte, que memu'itüarie müme, 'inüari caniuüni.

Yacatinaca'utüarieni que

mütüuyü, temü'imaiarienicü tame, tucari manucatüa

maye'acü, taparetü 'ate'u'uvacacu tame. <sup>12</sup>Ayumieme que mü'ane

'a'uveme müyu'erie, mücü queyü'üviyani capa 'acavenicü.

<sup>13</sup>Teüteri que memüte'isiparie xeicüa xecateni'isiparieca xeme.

Cacaüyari masi yacatinicamieni que maine. Mücü pücaxepitüani

xemü'isiparienicü que  
xemücateyüvave. Xe'isipariecacu  
masi canixepitüamücü que  
xemütevicuecacü, xepitüatü  
xemüyüvavenicü xete'luca'enivatü.

<sup>14</sup>Ayumieme nenaqu'erima,  
xequeneyuta'una capa  
tetexi xevarayexeyanicü.

<sup>15</sup>Temaivavemete

nemütivacuxaxatüvapaü, müpaü  
necatinixecuxaxatüvani xeme.  
Yücümana xequeneu'inüata tita  
nemüraine. <sup>16</sup>Tecüxi hepaüsita  
quepaucua 'aixüa temutiyuane  
Cacaüyari hepaüsita, mücü tecüxicü  
tecatetaxevi Cürisitumatü, yuxuriya  
que mütiutayeyuri. Pa quepaucua  
temititara, mücü pacü tecatetaxevi  
Cürisitumatü, yuvaïyarisie que  
mütiumierie. <sup>17</sup>Mücü pa que  
mütüyuxevi, tameta tamüiretü xei  
vaïyari tecanihümetüni. Tanaitü  
'axeicüa tenitihapanani xei  
payarisie mieme.

<sup>18</sup>Mücü meta, müme 'Ixaheri  
nuivarieyasie memütinunuiva  
xequenivara'erivani. Müme mavari  
memütecua'a, mecateyuxevi  
müratimavatüre miemematü.

<sup>19</sup>Mericüte, quesü nehainericü.  
Tita tete mütimaviyari tixaütü  
mütihücücü neraine. Tete  
cacaüyariyari tixaütü mütihücücü  
neraine. <sup>20</sup>Masisüari 'ipäu  
nenaineni, tita memütemava  
nuivarite, cacauyarixi 'axa  
memü'anene vahesie mieme  
mecatenimavani, que mü'ane yuri  
cacaüyari mücahücüsie mieme.  
Pücanesinaque xemüyutaxevirecü  
cacaüyarixi 'axa memü'anene  
vahamatü. <sup>21</sup>Xepücaüvave  
Ti'aitame tecüxieyasie mieme

xemanu'ieni, mexi xe'enuye'e  
cacaüyarixi 'axa memü'anene  
vatecüsiesie mieme. Xepücaüvave  
Ti'aitame 'icuaïya xemütecuaüni,  
mexi xetecua'a cacauyarixi 'axa  
memü'anene va'icuai. <sup>22</sup>Me,  
tete'ihaxüatüani Ti'aitame. Que  
tetetürücavi tame, Ti'aitame  
tahepaü catitürücaüyecacu.

**Nai xequeteneyurieca Cacaüyari  
visi müticuxaxasivanicü**

<sup>23</sup>Que pemaine, heiserie  
tecanexeyani nai temüteyurienicü,  
peru nai teteyurietü  
tepücapareviyani. Heiserie  
tecanexeyani nai temüteyurienicü  
'acu, peru nai teteyurietü  
tepücaseiriyarieni. <sup>24</sup>Mecuxi  
yuxexuitü mepücatecuvauni  
yuxaüta 'aixüa memü'itüarienicü.  
Mequetecuvauni hipatü püta 'aixüa  
memü'itüarienicü.

<sup>25</sup>Naitü mütituyi quiecarü  
hixüapa, mücü xequetenecuaca,  
tixaü xecayu'iyaritüatü que  
xemüteyumate. <sup>26</sup>Cuie Ti'aitame  
pinieya catinhücütüni,  
naitü cuiepa mütixuave  
catinipinieyatüni.

<sup>27</sup>Peru xevitü yuri  
cati'erietü xüca xe'uta'inieni  
xemütecuanicü quiena, xüca  
xeyuvaüriyani xemuhücü, nai que  
xemütemiquieni xequeteneucua'i,  
tixaü xecayu'iyaritüatü que  
xemüteyumate. <sup>28</sup>Peru xevitü  
xüca müpaü tixe'utahüaveque,  
'Icü tete mavarieya  
canihücütüni, 'utaitü, mecuxi  
xepüca'iticuaniqueyu, xehe'erivatü  
que mü'ane yamütixe'utahecüatüa,  
xehe'erivatü que mütüyumate,

capa yu'iyaritüanicü.

<sup>29</sup>Que xemüteyumate xeme, 'asinepücahaine. 'Iya püta que mütiyumate nepaine.

Meriçüte, peru 'aixüa que tiyüni, xüca nenenü'avetü nexan'erivani, xevitü müyu'iyaritüacü que mütiyumate. <sup>30</sup>Xüca ne'iticuani pamüpariyusi ne'ipitüatü Cacaüyari, titayariri 'axa neticühüavarüva ne'icuatü, hepaüsitana pamüpariyusi nemipitüacü Cacaüyari. <sup>31</sup>Meriçüsü, sepa xemütecua'a, sepa xemüte'ie, sepa tita xemüteyurie, nai xequeteneyurica Cacaüyari visi müticuxaxasivanicü.

<sup>32</sup>Xepücavati'ücamüraxüani Huriyusixi, müme memücahuriyusixi meta, müme meta memeyutixexeüriva Cacaüyarisüa miemete.

<sup>33</sup>Naimecü necatiniyurieneni memüpareviyanicü yunaitü. 'Aixüa nemü'itüarienicü ne, mücücü nepücayüane. Yümüiretü 'aixüa memü'itüarienicü püta necaniyüaneneni, memütavicueisitüarienicü müme.

**11** Xenesi'üquetü xequenacüni, neta que nemüti'üque Cürisitu.

**'Ucari que memüte'umucuresi**

<sup>2</sup>'Aixüa nepaine xehepaüsita xemünesiha'erivacü naimecü, yaxemütecahucü yeiyarisie que nemütixeyetüiri. <sup>3</sup>Peru neuyeveca müpäü xemütemaicacü, Cürisitu yunaime 'uquisi canivamu'utüni, 'uquita 'uca canimu'uyatüni, Cacaüyarita Cürisitu canimu'uyatüni.

<sup>4</sup>'Uqui xüca yutanenevieni, xüca ticuxatani, yucumu'ututü, caniyuteviyasitüaca yumu'ucü.

<sup>5</sup>'Uca püta xüca yutanenevieni, xüca ticuxatani, cayucumu'ututü, caniyuteviyasitüaca yumu'ucü.

Yaxeicüa catiniyüni queyu xüca yumu'usie yucaxicanique. <sup>6</sup>Xüca cayucumu'utuca 'uca, mecuxi queheyucaxicani. Me 'uca xüca yuteviyani yucaxime, mu'umesetü, queyucumu'utuca masi. <sup>7</sup>Pücaheuyevese müyucumu'utucacü 'uqui, Cacaüyari 'üquisicaya mühücücü, hesiena mümasiücücü que mü'ane Cacaüyari. 'Ucasie masi canimasiücünü que mü'ane 'uqui.

<sup>8</sup>Sütüapai 'uqui 'ucasie püca'ayene, 'uca 'uquisie payene püta. <sup>9</sup>Mücü meta, 'uqui püca'UNETIARIE 'ucasie mieme, 'uca 'uquisie mieme caninetüarieni püta. <sup>10</sup>'Ayumieme caneuyeveca 'uca 'inüari manuyecacü yumu'usie, cümana mümasiücünü heiserie que mürexeiya, Cacaüyari tupirisiximama vara'erivatü.

<sup>11</sup>Peru Ti'aitamesie meteviyatü que memüte'u'uva, 'uca 'apüca'uyeica 'uqui caheuyehüatü, 'uquita 'apüca'uyeica 'uca caheuyehüatü.

<sup>12</sup>'Uca 'uquisie payene 'ana, peru 'uqui 'ucasie püyenuiva. Naitü masi Cacaüyarisie catinayenexüani.

<sup>13</sup>Yücümana xequeneu'inüata que xemüteyumate. 'Aixüa ti'ane xüca 'uca nenevieri 'ipitüani Cacaüyari cayucumu'ututü.

<sup>14</sup>Camü yututuyaricü müpäü xecate'üquitüarie, que mütitevive 'uqui xüca cüpateya 'etütüni,

<sup>15</sup>'uca püta visi que müti'ane

xüca cüpateya 'etütüni. Yücüpa caniumiquieni manuyunacacı.

<sup>16</sup>Me xüca xevitü niuquixiemücüni, müpaü quetimaica, tame tepücaheixeiya yeiyari müpaü 'aneme, Cacaüyarisüa miemete memeyutixexeüriva, mümeta mücü yeiyari mepücahexeiya.

**Que memüte'iseviximacai  
Ti'aitame 'Icuaiya 'inüariyari**

<sup>17</sup>Ipaü que nemütixe'aitüa, nepücayüve 'aixüa nemutainenicü xehepäüsita, que xemütüyuyexexeüriva. 'Aixüa xepüca'itüariva yaxetüyuyexexeürivatü, 'axa xecani'itüarieca püta. <sup>18</sup>Mücü meri, que müraniuva, 'axeicüa quepaucua xemüyuyexexeüriva, yuhixüata xecaniyusanani. Hixüata 'arücamecü müpaü yuri nepüti'erie que müraniuva. <sup>19</sup>Süricü neuyeveca yuxexuime vahesie xemüteviyanicü, xesata mümasiücinicü müme memühecüasie. <sup>20</sup>'Axeicüa quepaucua xemüyuyexexeüriva que xemütecua'a, Ti'aitame 'Icuaiya pücahücü. <sup>21</sup>Yuxexütü xecaniyumexüitüaca, yu'icuai xe'ahapatü, quepaucua xemütecua'a. Xevitü neuhacamücüni, xevitüta nitaveca. <sup>22</sup>Cari quite xepücatehexeiya xemütecuanicü xemüte'ienicü. Masicutaxi xetevateviyasitüa müme tixaü memücatehexeiya, xevaxani'erietü müme memüyuyexexeüriva Cacaüyarisüa miemete. Querü netixetahüave. 'Aixüa netiutainenü xehepäüsita 'acu. 'Ipaü que xemütüyurie, 'aixüa nepüca'utainenü xehepäüsita.

**Ti'aitame 'Icuaiya que mütiu'aisie  
'inüariyari**

(Mateu 26:26-29; Maricuxi  
14:22-25; Rucaxi 22:14-20)

<sup>23</sup>Que nemütixeyetüiri, neta necaniyetüiriyarieni Ti'aitamesüa mieme. Müpaü tiniuyüni. Mücü tücarisie quepaucua müyetüiyaniquecai, Ti'aitame Qesusi pa nanucu'üni. <sup>24</sup>Pamüpariyusi 'ipitüaca Cacaüyari, canititara pa, müpaü 'utaitü, 'Icü nevaiyari canihücütüni. Xehesie canimiemetüni. 'Ipaü xequeteneyurieca xemünesiha'erivanicü ne. <sup>25</sup>Yaxeicüata tiniuyurieni tecüxi 'anucuhanatü mete'ucuacu, müpaü 'utaitü, 'Icü tecüxita mieme türatu mühecua canihücütüni. Nexuriyacü caniseiriyariemücü. Quepaucua xemi'ieca, 'ipaü xequeteneyurieca xemünesiha'erivanicü. <sup>26</sup>Quepaucua 'icü pa xemuticua'ani, 'icü tecüxi quepaucua xemanuye'eni, xecatenihecüatacacuni que mütiümü Ti'aitame, mexi canuave.

**Que mütiyüni xüca 'iticuani  
Ti'aitame 'Icuaiya, 'iyarieya  
yaca'anecacu**

<sup>27</sup>'Ayumieme que mü'ane 'icü pa müticuani 'icü tecüxi manu'hieni, hesiena catinaquecacu 'iyarieya que müti'ane, hesiena pürähüiyani miseviximacü Ti'aitame vaiyarieya xuriyaya. <sup>28</sup>Tevi queyu'inüatani. Müpaü tiyurienetü, 'icü pa quehecua, 'icü tecüxita mieme que'anuye'eni. <sup>29</sup>Mesü, ticua'atü 'ienetü xüca heiseriemecü catimaica tita vaiyarieya



mütihücü, yuhesie rahüpatü  
catinicuacamücü cani'iecamücü.

<sup>30</sup>Müpaü xemüteyuriecü,  
'ayumieme xeneuveraranini  
yumüiretü xeme, xetenicucuyeni,  
yuvaücavatü meneucusu.

<sup>31</sup>Xüca tacümana teta'inüataque,  
tatacuri tepücapitüarieniqueyu.

<sup>32</sup>Peru Ti'aitame quepaucua  
mütasita'inüata, teteni'üquitüarieca  
'uximatüaricacü, capa  
te'anutaxüriyanicü cuiepa  
memütama vahamatü.

<sup>33</sup>'Ayumieme ne'ivama,  
quepaucua xemüyuxeürie  
xetecuanique, xequeneyucuevieca.

<sup>34</sup>Xüca heuhacamücüni,  
yuquita quetiucuanı, capa  
xe'u'inüasienicü xeyucuxeürieme.  
Hipatü müreyeveşe 'aixüa  
netiniyuriemücü quepaucua  
nemunuani.

**'Iyarisie timieme que temüte'umiquiva**

**12** Ne'ivama, neuyeveca 'ipaü  
xemütemaicacü tita 'Iyarisie  
mütimieme hepaüsita. <sup>2</sup>Xeme müpaü  
xecatenimaica que müti'anecai  
quepaucua xemünüivaritetücai  
xeicüa. Xecanicuhapanietüvecaitüni  
tetexi memücaniuvave vahesüa, que  
xemütecühüavarüvacai. <sup>3</sup>'Ayumieme  
'ipaü netinixetahecüatüaniqueyu,  
tevi xüca müpaü 'utayüni, Qesusi  
'axa queticuxaxasivani, 'utaitü,  
mücü Cacaüyari 'Iyarieyasie  
tivyatü püca'utaine. Mücü meta,  
tevi xüca müpaü 'utayüni, Qesusi  
catini'aitametüni, 'utaitü, 'Iyari  
Mütiyupatasie tiviyatü xeicüa  
caniyüveni müpaü mütayüni.

<sup>4</sup>Yücü tepüte'umiquiva,  
'Iyari yuxevicacu. <sup>5</sup>Yücü

tepüte'uhüritüariva, Ti'aitame  
yuxevicacu. <sup>6</sup>Yücü  
tepütecuyuitüariva, Cacaüyari  
yuxevicacu. Mücü canihücütüni que  
mü'ane yunaime müvacuyuitüva  
naimecü. <sup>7</sup>Taxexuime tahesie,  
'Iyari masiücütü canayeitüarivani,  
'aixüa temü'itüarienicü tanaitü.  
<sup>8</sup>Xevitü canipitüarieca mütaniunicü  
timaivemepaü, 'Iyari yatipitüacacu.  
Xevitüta canipitüarieca  
mayeniüvenicü vaüca timaitü,  
mücütütü 'Iyari yuxevitü que  
mütüpütüa. <sup>9</sup>Xevitüta canipitüarieca  
yuri müti'eriecacü, mücü 'Iyarisie  
tivyatü. Xevitüta canipitüarieca  
müvaranayexürüvanicü  
tecüicucate, mücü 'Iyari  
müyuxevisie tiviyatü. <sup>10</sup>Xevitüta  
canipitüarieca türücaüyemecü  
yamütiyurienenicü, xevitüta  
müticuxatanicü, xevitüta  
müva'inüatanicü 'iyarite, xüca  
'aixüa me'aneneni me xüca 'axa  
me'aneneni. Xevitüta 'aiteüya  
vevietü mütaniunicü canipitüarieca,  
xevitüta mütihecüatanicü  
que müticuxaxasiva 'aiteüya  
veviecacu. <sup>11</sup>Mücü 'Iyari yuxevitü  
canihücütüni que mü'ane  
müvacuyuitüva yunaime. Yücü  
catinivapitüaca yuxexuime, que  
mütüyuväriya.

**Xei vaiyari tecanacüne tanaitü**

<sup>12</sup>Yaxeicüa tavaiyari caniyuxeveni,  
tamamate ta'ücate tatenite naitü  
timüirecacu. Naitü tavaiyarisie  
timieme timüirecacu müyuxevipaü  
vaiyari, müpaüta cani'aneni  
Cürisitu. <sup>13</sup>'Iyari müyuxeve  
que mütatiutaxeviriyaxü, xei  
vaiyari tecanacüne quepaucua

temuca'üyarie, sepa Huriyusixi Cüriyecusixi temühüme, sepa vaüriyarica temüte'uximaya, sepa temütanü'a. Tanaitü tecaniuhatuïyarieni, 'Iyari müyuxeve tahesie mieme mütaeyuriyacı.

<sup>14</sup>Mücü meta, ravaiyari xei mamayari xei 'ücyari pücahücü. Pümüire püta. <sup>15</sup>Ra'üca xüca müpaü hainenique, Ne ramama nemücahüücü, 'ayumieme ravaiyarisie nepücamieme, ravaiyarisie camiemetütü püca'ayaniqueyu, müpaü 'utayüca xeiçüa. <sup>16</sup>Ranaca xüca müpaü hainenique, Ne rahüxie nemücahüücü, 'ayumieme ravaiyarisie nepücamieme, ravaiyarisie camiemetütü püca'ayaniqueyu, müpaü 'utayüca xeiçüa. <sup>17</sup>Ravaiyari naitü xüca hüxitünique, queti'enaniqueyu. Naitü xüca nacatünique, queri reu'ücueniqueyu. <sup>18</sup>Peru hicü Cacaüyari ravaiyarisie canicayasa xexuime que mütinaque. <sup>19</sup>Me naitü xüca xei paüriyaritünique, queri tihücütüniqueyu ravaiyari. <sup>20</sup>Masi pümüire, peru ravaiyari caniyuxeveni.

<sup>21</sup>Rahüxie pücaýive müpaü mütitahüave ramama, Nepücamasiheuyehüva, 'utaitü. Yaxeüata ramu'u pücaýive müpaü mütitahüave ra'ücate, Nepücaxehueyehüva, 'utaitü. <sup>22</sup>Masi tita catitürücvime temüte'erie, mücü yemecü tepeuyehüva. <sup>23</sup>Tavaiyarisie timieme, tita 'aixüa cati'aneneme temüxata, mücü tecaniquemaritüaca masi. Tavaiyarisie tita visi mücatixeiyarie,

visi 'anenetü masi canayeitüarivani, <sup>24</sup>tita visi mütixeiyarie müpaü mücareuyeveseçü. Masi Cacaüyari nitaxeviriyani tavaiyari, 'aixüa 'iyurienetü masi tita tixaü müreuyehüva, <sup>25</sup>tavaiyari capa hixüata saninicü, masi tita tavaiyarisie mütimieme 'axeicüa mütiyü'üviyanicü naitü. <sup>26</sup>Xei paüriyari xüca ticuyeni, naitü hamatüana tinicuyecamücü. Xei paüriyari xüca visi 'u'itüarieni, naitü hamatüana niyutemaviecamücü.

<sup>27</sup>Xemeri Cürisitu vaiyarieya xecanihümetüni. Yuxexuitü vaiyarieyasie timieme xei paüriyari xecanihümetüni, que xemüte'upitüarie. <sup>28</sup>Müme memeyutixexeüriva, hipame canivarucayasa Cacaüyari nü'arisixi meri, 'arique texaxatamete, 'arique te'üquitamete, 'anarique müme türücaüyemecü memüteyurie, 'arique müme memütemiquiva memüvaranayexürüvanicü tecuicucate, teparevivamete meta, te'aitamete, mümeta 'aiteüya memüvevie. <sup>29</sup>Yunaitü nü'arisixi que metehüme. Yunaitü texaxatamete que metehüme. Yunaitü te'üquitamete que metehüme. Yunaitü türücaüyemecü que meteyurie. <sup>30</sup>Yunaitü que metemiquiva memüravanayexürüvanicü tecuicucate. Yunaitü 'aiteüya que metevevie. Yunaitü que mete'ihēcüata tita müticuxaxasiva 'aiteüya vevieacu. <sup>31</sup>Xequeneyuvaüriyani 'aixüa 'aneneme masi xemütemiquienicü. 'Acuxi huye yemecü 'aixüa mü'ane necanixetahecüatüamücü.

Cuini mieme que müreyevese  
mütiyucanaqui'eriecacü

**13** Xüca 'aiteüya  
nevevienique que  
memüteniuvave teüteri Cacaüyari  
tupirisiximama yunaitü, peru xüca  
necatinecanaqui'eriecaque, tepüa  
mucuyuanepaü necanayaniqueyu,  
tirinari mutatiriurücapaü. <sup>2</sup>Xüca  
netiumiquienique nemüticuxatanicü,  
xüca netimaicaque naime que  
müti'avie, naime meta que  
mütimasiücü, naimecü yuri  
neti'erietü xüca neyüvenique  
yemurite nemüvatayuitüanicü, peru  
xüca necatinecanaqui'eriecaque,  
tixaütü nepücatihücütüni queyu.  
<sup>3</sup>Xüca nepini naime netivaminique  
hipame, xüca neneyetuanique  
nevaiyari mütataiyarienicü, peru  
xüca necatinecanaqui'eriecaque,  
tixaütü nepücara'iva queyu.  
<sup>4</sup>Tiyucanaqui'erietü  
'ecatineutevini caha'atü. 'Aixüa  
catiniuca'iyarini tiyucanaqui'erietü,  
pücayumexüitüa hipame  
vahepaüsita vara'ivamütü.  
Tiyucanaqui'erietü  
pücatiyucatave'erie,  
püca'utahüserie. <sup>5</sup>Yapücatiyuriene  
que mütiyuteviyasitüa.  
Pücaticuvaune tita yuhesie  
mütimieme xeicüa,  
pücayhaxüatüa, 'axa müti'anene  
pücara'eriva. <sup>6</sup>Pücayumemavie  
yamete yuriecacu hipatü que  
mücatilheiserie, masi tita yuri  
müraine hepaüsita caniyutemavieca.  
<sup>7</sup>Nai tininevieca, naimecü  
yuri catini'erieca, naimecü  
canita'icuevani yuri ti'erietü,  
naimecü catiniuca'enivani.

<sup>8</sup>Que mütiyucanaqui'erie,  
hasuacua pücatapare. Que  
temütécuxata, mücü  
canitaparimücü. 'Aiteüya que  
temütevevie, mücü pücaheuyeveca.  
Que temütemaivave, mücüta  
canitaparimücü. <sup>9</sup>Xei taparie  
xeicüa tecanimaica, xei taparie  
xeicüa tetenicuxatani. <sup>10</sup>Quepaucua  
munuani que mü'ane tixaütü  
mücareuyehüva, tita xei tapariesie  
mütimieme catinitaparimücü.

<sup>11</sup>Quepaucua nemünunusitücai,  
nununüpaü netinicuxatacaitüni,  
nununüpaü netininemaicaaitüni,  
nununüpaü netinicu'erivacaaitüni.  
Quepaucua 'uqui nematüa,  
netiniuhayeva nununüpaü  
neyüanetü. <sup>12</sup>Cahecüacamecü  
tecanineniereni hicü, que mü'ane  
xicüri mayeyüvisie mücanierepaü.  
'Anari tahüxie teniutineniericuni  
püta. Xei tapariecü netinimaica  
hicü, 'anari püta netinitimaimücü,  
yaxeicüa 'iya münesimatepaü.  
<sup>13</sup>Mericüsü, yuri que temüte'erie,  
que temüteta'icueva, que  
temütetacanaqui'erie, mücü  
haicatü 'ecatineuterimücü. Que  
temütetacanaqui'erie, mücü masi  
caneuyeveca.

'Aiteüya que memüteveviecai

**14** Xequeneyumexüitüaca  
xemütéyucanaqui'eriecacü.  
Mücü meta, xequeneyuvaüriyani  
'Iyarisie timieme  
xemütehexeianicü, peru masi  
yemecü xequeneyuvaüriyani  
xemütécuxatanicü. <sup>2</sup>Que  
mü'ane 'aiteüya müvevie, mücü  
pücavatähüave teüteri. Nitähüave  
Cacaüyari püta. Tevi püca'lenie,

catinicuxatani tita müti'avie  
'Iyari 'icuyuitüvacacu. <sup>3</sup>Que  
mü'ane mütixaxatame, mücü  
masi canivarutahüaveni teüteri,  
vaseiriyatü vatuicatü vanütüatü.

<sup>4</sup>Que mü'ane 'aiteüya müvevie,  
mücü niyuseiriyani yuxaüta,  
peru que mü'ane müticuxata,  
mücü nivaseiriyani müme  
memüyuyexexeüriva.

<sup>5</sup>Caneninaqueni yunaitü  
'aiteüya xemüvevecü, peru  
pünesinaqueniequeyu masisü xüca  
xetecuxatanique. Que mü'ane  
müticuxata 'aixüa caniyüaneni, que  
mü'ane 'aiteüya müvevie 'aixüa  
cayüanecacu hepaüna, me xüca  
xevitü tihecüatani que mutaine  
xeicüa, 'aixüa caniyüaneni,  
müme memüyuyexexeüriva  
memüseiriyarienicü. <sup>6</sup>Hicüri  
ne'ivama, xüca xehesüa nenuanique  
'aiteüya nevevietü, tita  
netixepitüaniqueyu, me xüca  
nexetahüavenique netihecüatati  
tita müti'aviesiecai, xüca  
ne'ayeniuenique, xüca  
neticuxatanique, xüca  
neti'üquitanique xeicüa mücücü  
tixaü nepütixepitüaniqueyu.

<sup>7</sup>Tamüsü, tita mücarayeyuri  
caniniuveni cürautatütü canaritütü.  
Xüca 'aixüa catipüinarieca, que  
timasiücünü tita müticürautasieni  
tita müticanarisieni. <sup>8</sup>Cuxineta  
xüca hüsierieca cahecüaca, quepai  
püyucuha'aritüani cüya. <sup>9</sup>Xemerita  
yaxeicüa, yunenicü xüca niuqui  
'aixüa mühecüa xeca'utiniucani,  
que timasiücünü que xemutiyuane.  
'Ecapa xeicüa xeputiniucani. <sup>10</sup>Xüari  
teüteri vaniüqui canimüireni 'ena  
cuipea. Yuxexuitü yuniuquicü

me'utiniütü mecani'enierieca.

<sup>11</sup>Masi xüca 'asinecatimaica que  
mutaine niucame, yacü xeicüa  
tiriurücame necani'eriecamücü  
niucame, mücüta yaxeicüa  
canetini'eriecamücü ne. <sup>12</sup>Xemeta  
xeyuvaüriyatü xemütheixeiyanicü  
tita 'Iyarisie mütimieme,  
xequetenecuvava cuini mieme  
xemüvaseiriyanicü müme  
memüyuyexexeüriva.

<sup>13</sup>Ayumieme que mü'ane 'aiteüya  
müvevie, queyutanenevieni  
müyuhecüatanicü que mutaine.

<sup>14</sup>Xüca nenetanenevieni  
'aiteüya nevevietü, ne'Iyaricü  
nepünenenevie, peru tixaü  
pücatiutixuxuavere que  
nemütinemate. <sup>15</sup>Qesü yüni.  
Ne'Iyaricü nepünenenevieca, peru  
yanetinemaitü que nemutaine,  
müpaüta netinineneviecamücü.  
Ne'Iyaricü nenitacuicamücü, peru  
yanetinemaitü que nemutaine,  
müpaüta nenitacuicamücü.

<sup>16</sup>Camüsü xüca 'a'Iyaricü xeicüa  
'aixüa pehaineni Cacaüyari  
hepaüsita, 'iya vana muca  
'enamete memateisie, quepaüricü  
müpaü paineni, Caniyuritüni  
niuqui, 'utaitü, quepaucua 'ecü  
pamüpariyusi pemütayüni.  
'Asipücatimate que pemutaine.

<sup>17</sup>'Ecü 'aixüa 'anemecü  
pamüpariyusi pe'ipitüacacu  
Cacaüyari, 'iya püta pücaseiriyarie  
mücücü. <sup>18</sup>Ne pamüpariyusi  
necanipitüaca Cacaüyari, cuini  
mieme nemüyüvecü 'aiteüya  
nemüvevie, nexeha'ivatü xeme  
yunaime. <sup>19</sup>Peru xeüripa  
necaninevaüriyani masi 'auxüme  
niuquiyari nemütaniunicü

yanetinemaitü que nemutaine,  
nemütiva'üquitüanicü hipame,  
sepa tamamata miriyari niuquiyari  
nemücataniunicü 'aiteüya  
nevevietü.

<sup>20</sup>Ne'ivama, türi vahepaü  
xepücateyumaica. 'Aixüa  
cani'aneni xüca türi vahepaü  
'asixecatemaica tita 'axa müti'ane  
hepaüsita, peru xequenaye'axüa  
püta que xemüteyumate. <sup>21</sup>Inüari  
niuquiyarisie müpaü catine'uca,  
Nenivatahüavimücü 'icü teüteri,  
hipatü yücü memütiniuca  
yametevacuxaxatüvacacu. Müme  
vanuqui yücü mü'anene, vatenicü  
nenitayümücü. Sepa müpaü  
nemütüyurieni mepücayuvaüriyani  
memünesi'enienicü, canaineni  
Ti'aitame. <sup>22</sup>Ayumieme 'aiteüya  
'inüari pücahücü müme yuri  
memüte'erie vahesie mieme. Müme  
yuri memücate'erie püta vahesie  
mieme cani'inüaritäni. Tixaxatame  
niuquieya 'inüari pücahücü  
müme yuri memücate'erie  
vahesie mieme. Müme yuri  
memüte'erie püta vahesie mieme  
cani'ayumiemetüni. <sup>23</sup>Hicü  
'axeicüa xüca meyucuxeürieni  
yunaitü memüyuyexexeüriva,  
yunaitü 'aiteüya mevevietü, xüca  
mana meheutahaxüani hipatü  
'enamate ya yuri memücate'erie,  
cari müpaü mecanitiyuacuni,  
quename xecayumate xeme.  
<sup>24</sup>Me xüca yunaitü metecuxatani  
püta, xüca mana heutahani  
'enametütü ya yuri cati'erietü,  
yunaitü menitahecüatacuni que  
mütüyuri, yunaitü meni'inüatacuni.  
<sup>25</sup>Tita müti'aviesieca 'iyarieyasie  
masiücütü nayeimücü. Müpaü

tiu'ename, 'utihüximaqueme,  
nenevieri canipitüamücü Cacaüyari,  
müpaü 'utaitü, Yuricü Cacaüyari  
xehesie catiniviyani.

**Naitü heiseriemecü quetiuyüni**

<sup>26</sup>Queteri 'aneni ne'ivama.

Quepaucua xemüyucuxexeüriva,  
yuxexütü masi cuicari  
xecanexeyani, ya 'üquitüarica,  
ya xecaniha'arisieca  
xemütehecüatanicü tita  
xemüte'uxeisitüarie, ya  
'aiteüya xemüvevienicü, ya  
xemütehecüatanicü tita  
müticuxaxasiva 'aiteüya  
veviecacu. <sup>27</sup>Naitü masi quetiuyüni  
xemüseiriyarienicü. Xüca  
'aiteüya vevimücünü, yuhutatü  
xeicüa yuhaicatü nusu, xevitü  
meri, xevitüta 'arique, müpaü  
mequeteyurieni. Xevitüta  
que'ihecüatani vanuqui.

<sup>28</sup>Me xüca 'uca'ayecani que  
mü'ane mütihecüatani 'aiteüya  
veviecacu, niucame cayuvatü  
que'umaca xeüripa. Mecuxi  
queyutaxatüani yücümana,  
quetitaxatüani Cacaüyari.

<sup>29</sup>Texaxatamete yuhutatü ya  
yuhaicatü mequetecuxatani,  
hipatü meque'i'inüatani  
tita memüte'utiyya. <sup>30</sup>Xüca  
xevitü mana 'acaitü tixaütü  
tiupitüarieni mütihecüatanicü,  
que mü'ane müticuxata  
quetiuhayeva. <sup>31</sup>Xecaniyüvaveni  
xemütecuxatanicü yuxexütü,  
xevitü meri, xevitüta 'arique,  
memüteyü'üquitüanicü yunaitü,  
memütuicarienicü yunaitü.

<sup>32</sup>Texaxatamete yu'iyari  
mecani'aitüaca, <sup>33</sup>Cacaüyari

tiyuxamuriecame mücahücücü,  
cayuvatü tiyupitüvame mühücücü  
püta.

Que memüteyurie naisarie  
haque Cacaüyari teüterimama  
memeyutixexeüriva, <sup>34</sup>cayuvatü  
meque'umaca 'ucari xeüripa.  
Mepücapitüariva memütiniunicü.  
Mequete'aitüarieca masi, yaxeicüa  
'inüari niuquiyarita mainepäü.  
<sup>35</sup>Xüca tixaütü meteyü'üquitüacuni,  
yücünama mequevacu'ivaviyani  
yuquita. 'Aixüa püca'ane xüca 'uca  
'utaniuni xeüripa.

<sup>36</sup>Mesü, xehesüa xeicüa que  
rayene Cacaüyari niuquieya.  
Xehesüa xeicüa quetinua. <sup>37</sup>Xüca  
tixaxatame yu'erieca, 'Iyari  
hexeyame xüca yu'erieca, müpäü  
quetimaica, tita nemütixe'utüirie,  
mücü Ti'aitame 'aitüaricaya  
canihücütüni. <sup>38</sup>Me tevi xüca  
müpäü catimaica, mücütü  
pücamarivani.

<sup>39</sup>'Ayumieme ne'ivama,  
xequeneyumexüitüaca  
xemütecuxatanicü, peru  
xecavanenatü 'aiteyüa  
memüvevienicü. <sup>40</sup>Naitü  
heiseriemecü quetiuyüni, xevitü  
meri, xevitüta 'arique.

### Cürisitu que müranucuquetüarie 'umierieca

**15** Ne'ivama,  
necanixetahecüasitüiyamücü  
niuqui 'aixüa manuyüne, que  
nemütixecuxaxatüvacai.  
Xecanitanaqui'erieni mücü niuqui,  
hesiena xeteviyatü xecaniuti'uni.  
<sup>2</sup>Xüca cui xe'eyexeyani tita  
nemütixecuxaxatüvacai,  
mücü niuquicü

xecanitavicueisitüarieximeni,  
me yacü xeicüa xüca yuri  
xete'uta'erieni.

<sup>3</sup>Ne necanixeyetüirieni  
tita masi müreuyevese, que  
nemütiyetüiriyarie neta,  
quename Cürisitu 'umü tame  
'axa temüte'uyuricü, 'utüaricate  
mainepäü, <sup>4</sup>quename 'ucateuque,  
quename 'anucuquetüarie hairieca  
tucari 'aye'acu, 'utüaricate  
mainepäü, <sup>5</sup>quename Sepaxi  
'ixei, 'arique Tamamata Heimana  
Yuhutatü me'ixei. <sup>6</sup>'Arique  
'auxüme sientuyari heimana  
yameyupaümetü mecanixeyia  
'axeicüa 'ivamarixi. Yümüiretü  
müme 'ameniu'uvani hicüque,  
hipatüri meneucusuri. <sup>7</sup>'Arique  
Cacuvu nixeyia, 'ariqueta nü'arisixi  
yunaitü menixeyia.

<sup>8</sup>'Imatürieca neta  
necanixeyia, que mü'ane  
'axa 'anetü mutinuivaxüpäü  
ne'anetü. <sup>9</sup>Nü'arisixi vasata  
necani'imatüremetüni ne, 'aixüa  
nepücatiuca'iyari nehesis  
mütinaquenicü nü'aricame  
nemütaterüvarienicü,  
nemüvareutaveiyaxüacaicü müme  
memeyutixexeüriva Cacaüyarisüa  
miemete. <sup>10</sup>Peru Cacaüyari 'aixüa  
mütiuca'iyaricü, 'ayumieme  
müpäü necani'aneni que nemü'ane.  
Yacü xeicüa püca'uyü, 'aixüa  
que mütiuca'iyaricai nehesis  
mieme. Ne masi cuini mieme  
necatini'uximayaca, müme yunaitü  
que memücate'uximayatavave.  
Peru ne nepücahücü que mü'ane  
müpäü mütiyuriene. Cacaüyari  
püta 'aixüa tiuca'iyaritü nehamatü  
yacatini'uximayaca. <sup>11</sup>Mericüte,

sepa ne, sepa müme, müpaü tetenihecüatani, xemeta müpaü yuri xeteniuta'erieni.

**Müquite que memüte'anucu'uni**

<sup>12</sup>Cürisitu xüca cuxaxasivani müquite vasata manucuquetüarie, que me'utiyuane xeme hipatü, quename vaniu, müquite meca'anucu'uni. <sup>13</sup>Müquite xüca meca'anucu'uni, Cürisituta püca'anucuquetüarie. <sup>14</sup>Mericüte, xüca Cürisitu ca'anucuquetüarieni, xüanacüa canayani tita temütehecüata, xüanacüa yuri xecateniuta'erieni. <sup>15</sup>Xüca müquite meca'anucu'uni, canimasiücünü que temüte'itava tameta, 'axa temütehecüatacä Cacaüyari hepäüsita, quename henucuquetüa Cürisitu te'utiyuatü, 'iya cahenucuquetüacu, xüca müpaü 'aneni. <sup>16</sup>Mericusü, müquite xüca meca'anucu'uni, Cürisitu püca'anucuquetüarieveta. <sup>17</sup>Xüca Cürisitu ca'anucuquetüarieni, xüanacüa yuri xeteniuta'erieni, tita 'axa xemüteyuriecaisie xeteniviyani cuxi. <sup>18</sup>Mücü meta, müme memeucusixüa Cürisitusie meteviyatü, müme meniutatümaiarieniri. <sup>19</sup>'Uva mexi te'ayeyuyuri, xüca yuri tete'ericaqueyu Cürisitusie teta'icuevatü xeicüa, yunaime teüteri vasata tame masi neuyevecaqueyu temünenimayasienicü.

<sup>20</sup>Peru müpaü püca'ane. Cürisitu cananucuquetüarieniri müquite vasata, müme memeucusixüa vamatüari hücütütü. <sup>21</sup>Tevi que mütiuyuri, tame tenitacucuvani.

Yaxeicüata xevitü tevi que mütiuyuri, mecananucu'uicuni müquite. <sup>22</sup>'Aranisie meteviyatü yunaitü que memütetacucuve, müpaürita Cürisitusie meteviyatü yunaitü mecananutanieritüariecuni, <sup>23</sup>yuxexuitü que mütivarunaquixü. Cürisitu vamatüaritütü cananucuqueniri. 'Ariqueta müme Cürisitusüa memümiemete mecananucu'uicuni quepaucua munuani. <sup>24</sup>'Arique naitü catinitaparimücü, quepaucua Cürisitu müyuyetuani que müti'aita, 'uquiyarieya müti'aitanicü Cacaüyaritütü. Yacatiniyetuiiemücü vaca'uname yunaitü memüte'aita, yunaitü heiserie memexeiya türücariya memexeiya. <sup>25</sup>Caneuyeveca mücü müti'aitanicü mexi vara'iva yunaime memi'luxie. <sup>26</sup>'Imatürieca que mürayu'ivani, catanitaxünamücü temücatacucuvanicüri. <sup>27</sup>Naime canicayasa 'iya mi'aitüacacü, que maine 'utüarica. Quepaucua müpaü maine, naitü canicayasarieni 'utaitü, canahecüaca müca'ixatacü que mü'ane micayasaxü naime, Cürisitu mi'aitüacacü. <sup>28</sup>Quepaucua mücü mi'aitüaca naime, 'anari mücüta yücümana niyuyetüamücü, 'uquiyarieya püta mi'aitüacacü, 'uquiyarieya naime mucayasaxücü nu'aya mi'aitüacacü. 'Ana Cacaüyari naitü catinayeimücü yunaime vahesie mieme.

<sup>29</sup>Mesü xüca müpaü ca'aneni, que meteyurieni müme memuca'üyarie müquite vahesie mieme. Xüca yemecü müquite meca'anucu'uitüarieni, titayari vahesie mieme mete'uca'üyarie.

<sup>30</sup>Tameta titayari tetcueriva'a tucaricü. <sup>31</sup>Tucaricü 'esivatücacu necanicumemierivani tüma. 'Ipaü nepaine 'aixüa nemutainecü xehepaüsita ne'ivama, que nemütinetemavie nexeha'erivatü Cürisitu Quesusi mütat'laitüvamesie nemütiviyacü.

<sup>32</sup>Teüteri que memüteniniuqui, 'Epesusie xüca ne yeutari vahamatü tetacuitüvecaitüni, titasü nera'liva. Müquite xüca meca'anucu'uitüarieni, cümü mecuxi temütecuanı temüte'ieni, 'uxa'a temücuini.

<sup>33</sup>Xepücate'irüviyarıeni. Vanütü 'axa 'anenemete, canisevixımamücü yeıya 'aixüa mü'ane. <sup>34</sup>Xequenanutahütüvani heiseriemecü que müreyeveıe. 'Axa xepücateyurıeca. Hipatü 'asimepücatemate Cacaıyari hepaüsita. 'Ipaü nepaine nexeteviyasıtıanıque.

### Quepaü me'ananetü mepanucu'uni

<sup>35</sup>Perusü xüarı müpaü paineni xevitü, Quepaü mete'anucu'uitüarieni müquite. Que 'anecacu vavaiyari mepaye'axıanı. <sup>36</sup>Cari 'asipepücatimate müpaü pehaitü. Tita pemütiuca'e, mücü xüca ca'umüni, püca'anutanieritüarieni.

<sup>37</sup>Mücü meta, tita pemütiuca'e, tita mütitineicapau 'aneme pepüca'uca'e. 'Imüarı mümave xeicüa peniuca'eni, türıcu 'imüarıyari ya xeıme 'imüarıyari.

<sup>38</sup>Cacaıyari caniquemaritüaca que mütinaque, yücü tiquemaritüatü xexuıme 'imüarı que mü'anene.

<sup>39</sup>Naitü vai yaxeicüa püca'anene.

Teüteri vavaiyari püxevitü, vatevama vavaiyari yücü pü'anene, quesüte vavaiyari yücü pü'anene, viquixi vavaiyari yücü pü'anene. <sup>40</sup>Taheıma miemete, cuiepa miemete, yunaitü yücü mecani'aneneni. Taheıma mieme visi pü'anene, cuiepa mieme visi 'ananetü yücü pü'anene. <sup>41</sup>Tau visi cani'aneni, mesata visi pü'ane yücü 'anetü, xuravesixita visi mepü'anene yücü me'ananetü. Xuravesixi yuxexuitü visi me'ananetü yücü mecani'aneneni. <sup>42</sup>Müpaürıta catiniyümücü quepaucua müquite mepanucu'uitüarieni. Tita tipünirümetü mütiuca'esi, mücü catipünıvetü catınanucuquetüariemücü.

<sup>43</sup>Tita 'axa ticühüavarıvatü mütiuca'esi, mücü visi 'anetü cananucuquetüariemücü. Tita catürücaıyetü mütiuca'esi, mücü türücaıyetü cananucuquetüariemücü. <sup>44</sup>Vaitütü tita mütiuca'esi, mücü 'ıyarısie miemetütü cananucuquetüariemücü. Xüca ravaiyari xuaveni vai xeicüa hücütütü, ravaiyari canıxuavenıta 'ıyarısie miemetütü.

<sup>45</sup>Müpaü catıne'uca, Mexüacame tevi, 'Arani mütıtevacai, tiyumaitü 'ayeyuritü canayani. Mücü 'imatüreme 'Arani püta, 'ıyari tucari tiyupitüvame canayani. <sup>46</sup>Peru tevi 'ıyarısie mieme pücahexeıya meri. Vai xeicüa canexeıyani meri, 'arique 'ıyarısie mieme canexeıyacamücü. <sup>47</sup>Mexüacame tevi cuiepa canımiemetücaıtüni, cuiecü mutaveııya. 'Imatüreme tevi taheıma püta canımiemetüni.

<sup>48</sup>Que mü'ane mücü cuiecü



mutaveviya, müpaüta  
mecani'aneneni cuiepa  
miemete. Que mü'ane mücü  
taheima mümieme, müpaüta  
mecani'aneneni taheima miemete.  
<sup>49</sup>Que temüte'u'uvacai mücü cuieci  
mutaveviyapaü tequemaritüarietü,  
yaxeicüa 'atecaniu'uvacuni  
'iya taheima mümiemepaü  
tequemaritüarietü.

<sup>50</sup>'Ipaü nepaine ne'ivama,  
tita mütivai mütxuriya,  
mücü püca'yüveni heixeyatü  
mayanicü tita Caca'yari  
müra'aita. Tita mütipünive  
püca'yüveni heixeyatü mayanicü  
tita mücatipünive. <sup>51</sup>Camü  
netinixetahecüasitüiyamücü  
tita müti'aviesiecai. Tanaitü  
tepücaheucusu, peru tanaitü  
tecanipasieconi <sup>52</sup>yapaucua, xei  
cüpiyaricü, 'imatürieca cuxineta  
tahüsierieyu. Canitahüsieriemücü,  
müquite mecananucu'uitüarieci  
mecatipünivavetü, tameta  
tecanipasieconi. <sup>53</sup>Caneuyeveca  
'icü mütipünive menacatüni tita  
mücatipünive, 'icü mumüxime  
menacatüni tita mücatimüve  
peuyevese. <sup>54</sup>'Anari, quepaucua  
'icü mütipünive menacatüni tita  
mücatipünive, quepaucua 'icü  
mumüxime menacatüni tita  
mücatimüve, 'ana canaye'amücü  
mücü niuqui müpaü müre'uxa,

Tacucuyame caniutaxütüarieni  
'a'livarieca.

<sup>55</sup>Haqueva pepüra'iva, 'ecü  
pemütasicuicai 'acu.

Haqueva pepütasiheseni, 'ecü  
pemütasicuicai 'acu.

<sup>56</sup>'Axa temüteyuriecü tenicuseivani  
tecuitü. 'Inüari niuquiyari

canitürücarinyani tita 'axa  
temüteyurie. <sup>57</sup>Pamüpariyusi  
tecanipitüaca Caca'yari, mücü  
mütasipitüacü temüte'ata'ivanicü,  
Tati'aitüvame Quesusi Cürisitu  
tasipareviecacu.

<sup>58</sup>'Ayumieme ne'ivama  
nemüxenaqu'ierie,  
xeseiriyarietü xequenacüne,  
xepüca'yuyuitüarinüaca. Cuini  
mieme xequetene'uximayaca  
Ti'aitamesie mieme yuheyemeci,  
müpaü xetemaitü, Ti'aitamesie  
xeteviyatü sepa xemüteyu'uxitüa,  
xüanacüa püca'ayani.

**Tumini que memüte'ucuxeürie  
Caca'yari teüterimama  
vahesie mieme**

**16** Tumini hepaüsita  
netinixetaxatüaniqueyu,  
que xemüte'icuxeüriexime Caca'yari  
teüterimama vahesie mieme. Que  
nemütivaruta'aitüa Carasiya  
cuieyarisie memeyutixexeüriva,  
xemeta yaxeicüa xequeteneyurieca.  
<sup>2</sup>Mexüacame tucarisie xexuime  
semanasie, yuxexütü xeme  
xeque'iti'uta yuhesüa, xe'ixeürietü  
'aixüa que xemu'itüarie, 'ana  
xemüca'icuxeürivanicü  
quepaucua nemünuani. <sup>3</sup>Mana  
quepaucua nemeta'ani, müme  
memü'inüasie xemüvaranuyexeyaci,  
müme xapa nevahuritüame  
nenivaranunü'amücü, xe'imiquieri  
memanu'ünicü Querusaremepai.  
<sup>4</sup>Xüca 'aixüa 'aneni nemüyemiecü  
neta, müme mepünesiteütani.

**Papuru que mütiuyeicaniquecai**

<sup>5</sup>Xehesüa necaneta'amücü  
Maseruniyasie neheyeyame.

Maseruniyasie nepeuyeyanisü.

<sup>6</sup>Xehesüa capüca nenehayeva yapaümexa, ya macuhaütüsie naime. 'Arique xeme xecanenanunü'acuni que nemüreyune. <sup>7</sup>Ne'ivat Janetü xeicüa nepücaheuyeimücü xehesüa. 'Eneppureuteviniqueyu masi xehesüa, xüca Ti'aitame müpaü netipitüaca.

<sup>8</sup>Epesusie nepünehayeva 'auracacuque 'ixüarari 'atahutarieca semanasie mieme 'aye'ayuque.

<sup>9</sup>Quitenie catiniuyepiyani 'amuyeyevasio nemüti'uximayacacü, yumüiretü me'uxiva'acacu.

<sup>10</sup>Timuteu xüca henuani, xequeneyumexütüaca mücü 'aixüa 'iyaricü xehesüa muyeicanicü. Cacaüyarisie mieme catini'uximayaca nehepaü. <sup>11</sup>'Ayumieme xevitü püca'itave'erieca. 'Aixüa xeteyuxexeyatü xequenenanunü'a nehesüa müyemiecü. Ne necanicuevieca 'ivamarixi vahamatü.

<sup>12</sup>Ta'iva 'Apuruxi hepaüsita nepütixetaxatüaniqueyu. Vaüriyarica necanipitüacaitüni xehesüa müyemiecü 'ivamarixi vahamatü. Hicü pücayuvaüriyacai yemecü, peru quepaucua tucari mühüca püyemie niu.

**Vaürisica que mütivarunü'airiexüa**

<sup>13</sup>Xequenayeneniereni. 'Aixüa xequeneuti'uti yuri xete'erietü. Se'imecü xequeneyüaca. Xequeneturücavini xeturücariyarietü. <sup>14</sup>Nai que xemüteyurie, xeteyucanaqui'erietü yaxequetenecahuni.

<sup>15</sup>Ne'ivama, 'ipaü netinixevavirieca. Xeme xecanivamaica 'Esitepanaxi quie quiecatari. 'Acaiya cuieyarisie nivesicayari mecanihümetüni. 'Ayumiemetecanayuyeitüani memüvaporevienicü Cacaüyari teüterimama. <sup>16</sup>Xequeniva'enieca müya memü'anene, yunaime meta müya memüteparevie memüte'uximaya.

<sup>17</sup>Necaninetemavieca 'Esitepanaxi Purutunatumatü 'Acahicumatü memü'axüacü yunaitü. Xehesie mieme mepünesitemavieritüa, sepa xemüca'yüvavecai yunaitü xemahunicü.

<sup>18</sup>Mecaneniu'uxipitüani ne'iyarisie, xe'iyarisie mecanixe'u'uxipitüanita. 'Ayumieme xequenivamateni müme müya memü'anene.

<sup>19</sup>'Asiyatari memeyutixexeüriva mecanixevaüritüaca. 'Aqira Pürisiramatü, müme vaquita memüyuyexexeüriva vahamatü, yunaitü menixevaüritüaca vaücava, Ti'aitamesie meteviyatü. <sup>20</sup>'Ivamarixi yunaitü menixevaüritüaca. Xequeneyuvaüritüaca xemeta xeyuviyatü que xemütepasie.

<sup>21</sup>Nemamacü neti'utüatü nenixevaüritüaca ne Papuru.

<sup>22</sup>Xüca xevitü ca'inaqui'erieca Ti'aitame, 'axa que'u'itüarieni. Hepürayusixi que memüteniniuqui, Marana Ta, me'utiuyatü, taniuquicü nepaine, Quenaye'a Ti'aitame.

<sup>23</sup>Ti'aitame Qesusi xüca 'aixüa tiuca'iyarini xehesie mieme.

<sup>24</sup>Yunaime necanixenaqui'erieca, Cürisitu Qesusisie netiviyatü.

# CURINITUTARI

## Hutarieca Mieme Xapayari Que Mütivarunü'airi Papuru

---

### Vaürisica

**1** Ne Papuru necanixevaüiritüaca. Cürisitu Qesusi nü'ari pünesi'ayeitüa, caneneyenü'ani müpaü mütinaquecü Cacaüyari. Ta'iva Timuteumatü tenixevaüiritüaca Curinitusie xemütama xemüyutixexeüriva, Cacaüyari teüterimama xemühüme. Yunaitü xemupasie hesiena mieme naisarie 'erisitaruyarisie xemütama 'Acaiyasie tenixevaüiritüaca. <sup>2</sup>Cacaüyari müta'uquiyari Ti'aitame Qesusi Cürisitumatü, xüca 'aixüa mete'u'iyarini xehesie mieme, xüca mexepitüaca xemüca'uximatüariecacü yu'iyarisie.

### Papuru que müti'uximatüariecai

<sup>3</sup>Que mü'ane Tati'aitüvame Qesusi Cürisitu mücacaüyarieya mü'uquiyarieya, mücü hepaüsita 'aixüa queticuxaxasivani. Mücü ta'uquiyaritütü catiniyucananimayaca, Cacaüyaritütü naimecü catiniyuparevieca. <sup>4</sup>Mücü taheyemecü cataniparevieca te'uximatüariecacu, tameta

temüyüvavenicü naimecü temüvapareviecacü hipame sepa que memüte'uximatüarie, Cacaüyari mütatipareviepaü tame. <sup>5</sup>Tame yemecü que temütecuine Cürisitu mütiucuinixüpaü, müpaüta yemecü tecatenipareviyaca mücü yatatipitüacacu Cürisitu. <sup>6</sup>Sepa temü'uximatüarie, mücücü xecanipareviyacuni xeme, xenitavicueisitüariecuni que temüyüa. Me sepa temüpareviya, mücücü xecanipareviyacuni xemeta quepaucua xemüte'uca'eniva xete'ucacucuetü que temüte'ucacucueine tame. <sup>7</sup>Yuri que temüte'erie xehepaüsita, tepütürücariyari. Müpaü tepütimate, xeme tahamatü que temütetaxevi yaxecüca tete'ucacucuetü, müpaüta xeme tame tecanitaxevicacuni tanaitü tepareviyatü. <sup>8</sup>Ta'ivama peuyevese müpaü xemütemaicacü, cui tepe'uximatüariecai 'Asiya cuieyarisie te'u'uvatü. Cuini mieme püthetecai yemecü, tepüca'iquemacai. 'Asitepücatemaicai xüca

tetavicueniqueaitüni  
 ya temütecuiniquecai.  
<sup>9</sup>Asita ta'iyarisie müpaü  
 tepütetacühüavecai,  
 tepücuiniquecai. Peru  
 müpaü tiniuyüni tahesie yuri  
 temücate'eriecacü, Cacaüyarisie  
 püta, que mü'ane müquite  
 müvaranucu'uitüvasie, mücüsie  
 yuri temüte'eriecacü puyü. <sup>10</sup>Mücü  
 cataniutavicueisitüani capa  
 müpaü tete'ucuinicü. 'Uxa'atüni  
 varie pütasitavicueisitüanita, que  
 mü'anesie yuri temüte'erie. Tavarita  
 catanitavicueisitüamücü, <sup>11</sup>xeme  
 xetasipareviecacu xe'ivavirietü  
 Cacaüyari tahesie mieme.  
 Müpaü xeteyurieyu, yumüiretü  
 pamüpariyusi mecanipitüacacuni  
 tahepaüsita, yametemaitü  
 que temütemiqueie yumüiretü  
 memüyunenevicü.

### Titayari Curinitusie pücahetüa Papuru

<sup>12</sup>Aixüa temutiyuanenicü  
 müpaü tepaitüca tahepaüsita,  
 ta'iyarisie 'aixüa tepütetamate  
 que temüyüa 'ena cuiepa. Müpaü  
 tepütamate, Cacaüyarisie  
 mieme tepasietü tepüyüa, 'aixüa  
 tetehecüasietü tepüyüa Cacaüyari  
 que mütatipitüa. Teüteri vahepaü  
 que memütemaivave tepüca'yüa,  
 masi Cacaüyari yatatipitüacacu  
 'aixüa que mütiuca'iyari, müpaü  
 püta tecaniyüaca cuiepa  
 memütama vahesüa, xehesüa  
 yemecü müpaü tepüyüa. <sup>13</sup>Taxapa  
 que müti'eniüriücü xEICÜA, que  
 xemütatemate, müpaü xEICÜA  
 te'utiyuatü tepütexe'utüirie.  
 Siqueresü xepütasihetima

peru 'esiva xEICÜA, <sup>14</sup>'aixüa  
 püyüniqueyu xüca naimecü  
 püta xetasihetimanique, müpaü  
 xetemaitü, mücü tucarisie  
 quepaucua munuani Tati'aitüvame  
 Quesusi, 'ana xepüyüvaveni 'aixüa  
 xemutiyuanenicü xetasiha'erivatü,  
 yaxEICÜA 'aixüa temutiyuanenipai  
 tame texeha'erivatü.

<sup>15</sup>Müpaü yuri nemüti'eriecaicü  
 xehepaüsita, 'ayumieme müpaü  
 nepütinemaicai, hutacüa  
 xehesüa nepunuaniquecai xaüsie  
 necaheta'aveme meri, tixaütü  
 nemütixeminicü. <sup>16</sup>Xehesüa  
 neheta'ame Maseruniya  
 cuieyarisie nepüyemiecai,  
 tavori Maseruniya neheyeyame  
 xehesüa nepunuaniquecai  
 xemünesi'anunü'anicü Cureya  
 cuieyarisiepai. <sup>17</sup>Que xetecu'eriva,  
 müpaü netinemaitü yacü xEICÜA  
 netinepatacai. Teüteri vahepaü  
 neyüanetü netinematetü, Hü  
 ne'utaitü, que netinepata Tixaü  
 ne'utaitü. <sup>18</sup>Yapüticamie Cacaüyari  
 que maine. YaxEICÜA tame que  
 temütexetahüave, taniuqui  
 pücahuta, püyuxeve. Xüca müpaü  
 reuyeveca Hü temutiyuanenicü,  
 Tixaü tepüca'utiyuane, ya Tixaü  
 xüca reuyeveca temutiyuanenicü,  
 Hü tepüca'utiyuane. <sup>19</sup>Cacaüyari  
 nu'aya Cürisitu Quesusitütü  
 xehesüa canicuxaxasivacaitüni  
 tetecuxatacacu ne Sirivanu  
 Timuteu. Niuqui mücü hepaüsita  
 manuyüne pücahuta, püyuxeve  
 müpaü 'anetü mühücücü Cürisitu.  
<sup>20</sup>Nai que mutayü Cacaüyari  
 quename tiyurieni, mücüta  
 niuqui pücahuta, püyuxeve  
 Cürisitu meye'atüacü. 'Ayumieme

quepaucua 'aixüa temutiyuane  
 Cacaüyari hepaüsita, tepüyüvave  
 müpaü temutiyanenicü, Müpaü  
 cani'aneni, te'utiyaütü, Cürisitu  
 müpaü mütiuyuricü. <sup>21</sup>Mücü  
 Cacaüyaritütü canihücütüni que  
 mü'ane mütasiseiriya xeme tame  
 Cürisitusie temüteviyanicü. Mücü  
 heiserie pütasi'upitüa, <sup>22</sup>yuhesie  
 mieme pütasi'u'inüaritüa, ta'iyarisie  
 yu'iyari pütasi'upitüa 'inüaritüme  
 mümasiücünicü tita tahesie  
 mütinäque.

<sup>23</sup>Ne nepitahüave Cacaüyari  
 netucari münesinavairienicü  
 xüca neti'itavani que  
 nemaine. Nepacunua 'axa  
 nemücaxeretahüavecü. 'Ayumieme  
 Curinitu nepücahetüa tavari.

<sup>24</sup>Müpaü tepücahaitüca  
 tetexe'aitüacutü yuri que  
 xemüte'erie. 'Aixüa xecaneuti'uni  
 yuri xete'erietü. Masi müpaü  
 tepaitüca xehamatü tete'uximayatü  
 xemüyutemamaviecaü.

**2** Müpaü nepütinemaicai  
 'ana, 'aixüa pücayüniqeyu  
 xüca tavari nenuanique xehesüa  
 nexehieveritüatü, netinecühüavetü.

<sup>2</sup>Xüca nexehieveritüacaque  
 xeme, quepaicü

pünesitemavieritüaniqueyu  
 ne. Nexehieveritüacacu que  
 xenetetemavieritüaniqueyu.

<sup>3</sup>'Ayumieme xapa müpaü  
 nepütü'utüa, capa nenuayu  
 menesi'uheiveritüanicü  
 müme meuyevese masi  
 memünesitatemavieritüanicü püta.

'Ipaü yuri nepütü'erie yunaime  
 xehepaüsita, xüca nenetemavieca  
 ne xemeta xepüyutemamavieca  
 yunaitü. <sup>4</sup>Cui ne'uximatüarietü

'ana, nesaipünarietü ne'iyarisie  
 müpaü netinixe'u'utüirieni  
 vaüca ne'utasuatü. Peru  
 xemüheiveritüariecacü  
 yanepücatü'utüa, masi müpaü  
 xemütemaicacü vaüca que  
 nemütixenaqu'erie yanepütü'utüa.

### Papuru que müreiyehüviri tevi 'axa mütiyurienecai

<sup>5</sup>Xevitü que mütiyurienecai  
 pücanesi'uheiveritüa ne, masi  
 neca'anuhaitüamütü nepaine  
 siquere 'esiva püxeheiveritüa xeme  
 yunaime. <sup>6</sup>Mücüsie catiniunaque  
 que xemüte'itatacuritüacai  
 xe'uyu'enieca.

<sup>7</sup>'Ayumieme xepüyüvave  
 masi xemüteheiyehüvirienicü  
 hicü, xepüyüvave  
 xeminütüanicü mücü tevi, capa  
 'utaxütüarienicü yuheiverietü  
 'anayuhayevamecü. <sup>8</sup>'Ayumieme  
 vaüriyarica necanixepitüaca  
 xemihēcüasitüiyanicü que  
 xemüte'inaqu'erie. <sup>9</sup>'Ayumieme  
 müpaü nepütixe'u'utüirie,  
 yanemütimaicacü nexeh'inüiatame  
 xüca naime hepaüsita yaxetecahuni.  
<sup>10</sup>Que mü'ane xemüteheuyehüviri,  
 neta yaxecüa nepüreiyehüviri. Que  
 nemüreiyehüviri, sepa hesiena  
 nemücatihüpacai ne, nexeha'erivatü  
 yanepüreiyehüviri Cürisitu  
 nesixeyacacu, <sup>11</sup>capa Cauyumarie  
 tasicuamanacü. 'Aixüa tepütimate  
 que mütiyuruva 'iya.

### Que mütiyu'iyaritüacai Papuru, Türuhasisie 'uyeicatü

<sup>12</sup>Merücüsü, Türuhasi necaninuani  
 niuquü 'aixüa manuyüne Cürisitu  
 hepaüsita para nemüticuxatanicü,

peru quitenie sepa müreyepiyacai nehesie mieme Ti'aitamesie que nemütiviya nemüticuxatanicü, <sup>13</sup>nepüca'uxipiecai ne'iyarisie, nemücaheitaxeyavecaicü ne'iva Titu. Nevarutateutüaca masi necaneyeyani Maseruniya cuieyarisiepai.

**Que mütatihecüatüa  
Cürisitusie teteviyacacu**

<sup>14</sup>Masi Cacaüyari pamüpariyusi quepitüarieca. Mücü yuheymecü pütasihecüatüa Cürisitusie que temüteviya, teüteri vahüxie tasicuvitünetü yu'utüma. Tacümana naisarie müpäü catinihecüatani visi que mü'tütarie Cürisitu xüca maica. <sup>15</sup>Tame 'inüari tecanihümetüni 'ücua visi mü'üapaü Cacaüyari que mütatixeiya, temi'eritüacü Cürisitu que müti'ane. Mümeta memütavicueisitüariexime que memütatexeiya, memücuixime meta que memütatexeiya tecani'inüaritüni. <sup>16</sup>Memücuixime vacü tepumüqui'üa temüva'eritüacü que memütecuini, peru müme memütavicueisitüariexime vacü tepütucari'üa temüva'eritüacü que memüte'ayeyuyurini. Mericüte, quepaicü piquema 'icü naime. <sup>17</sup>Tame yumüireme vahepaü tepüca'anene. Harerusixi vahepaü tepücatetacuamana Cacaüyari niuquieya tecuxatatü. Masi 'aixüa tetehecüasietü, Cacaüyari que mütareyenü'a, Cacaüyari tasixeyiacacu teyüatü, Cürisitusie teteviyatü müpäü tetenicuxatani.

**Que temüte'uhürütüarie  
türatu mühecua hepaüsita**

**3** Müpäü te'utiyaütü tafari tete'isütüa

para temühecüacacü xemütasimaicacü 'acu. Hipame vahepaü que teteheiyehüva xapa mütasihecüatüacacü temümarivanicü, yaxemüte'u'utüiyarianicü yaxemüteti'utüanicü nusu. <sup>2</sup>Xeme taxapa xecanihümetüni ta'iyarisie müre'uxa. Yunaitü teüteri mepüyüvave memititerüvanicü müpäü memütetimanicü mexexeyatü. <sup>3</sup>Xecanimasiücünü xeme Cürisitu xapaya xehümetütü yatetehürütüariecacu tame. Mücü xapa tauxicü püca'utüarie, Cacaüyari mayeyuri 'iyarieyacü püta pü'utüarie. Tetesie pücare'uxa, vaisie püta teüteri va'iyarisie püre'uxa.

<sup>4</sup>Cürisitu yatatipitüacacu, müpäü tetetamaitü, yuri teteni'erieca Cacaüyarisie. <sup>5</sup>Müpäü te'utiyaütü 'asitepücahaitüca quenama tacümana tixaütü teyüvave, tacümana tixaütü temüte'usütüa tepücatecu'eriva. Masi que temüteyüvave, Cacaüyari yatatipitüacacu tepüyüvave. <sup>6</sup>Mücüri que mütatiupitüa, pütasi'uhürütüa türatu hecuame hepaüsita. Peru 'utüarica hepaüsita xecüca pücatasi'uhürütüa, masi 'iyarisie mieme hepaüsita püta pütasi'uhürütüa. 'Utüarica hexeyatü xecüca canimümücü, peru yu'iyarisie heixeyatü tucari canipitüariecamücü.

<sup>7</sup>Mücü türatu cümana mümüni visi 'anetü ninuani tetesie müre'uxacai Muisexi que mütiuhürütüarie. 'Ixaherisixi teüteriyari mepüca'yüvavecai memi'ixüarianicü Muisexi

hüxieya, visi mayexavatücaicü  
 sepa mayeyeiximecai. <sup>8</sup>Meriçüte,  
 masi vaücava visi cati'aneni türatu  
 'iyarisie mümieme xüca hepaüsitana  
 hürütüarieca. <sup>9</sup>Xüca visi 'uyüni  
 yatihürütüariecacu türatu hepaüsita  
 cümana teüteri memütixani'eriva,  
 masi vaücavamecü  
 'anayuhayevamecü visi pütüyüni  
 yatihürütüariecacu türatu hepaüsita  
 cümana heiserie memüpitüarieca.  
<sup>10</sup>Mücü meta, tita visi müti'anecai  
 visi pücatiyuxexeiya hicü, 'iya püta  
 cuini mieme visi 'anetü me'ivacü.  
<sup>11</sup>Tita mayeiximecai visi pü'anecai,  
 peru masi vaücava visi cani'aneni  
 tita mücatixüve.  
<sup>12</sup>Müpaü yuri temüte'erieciü,  
 'ayumieme cui tetayetuatü  
 tepütecuxata. <sup>13</sup>Muisexipaü  
 tepücaüya, 'ixuriquicü que  
 müreyucunacai 'Ixaherisixi  
 teüteriyari yuheyemecü  
 memüca'ixeyiacü, que  
 mürayeyeiximecai. <sup>14</sup>Mücü teüteri  
 me'u'itutupetü menacüne que  
 memüteyu'iyaritüacai. Hicüque  
 yaxeyicü mücücü 'ixuriquicü  
 heuyucunatü caniyuhayeva  
 quepauca mütitüvarüva  
 Türatu Meripai Mieme xapayari.  
 Pücaheucuyepiva, Cürisitisie  
 tiviyacacu xeyicü püca'unarüva.  
<sup>15</sup>Masi hicüque Muisexi xapaya  
 titerüvarüvacacu, mücü 'ixuriqui  
 heuyucunatü canacavüre va'iyarisie.  
<sup>16</sup>Peru que maine, Quepauca  
 ta'aurie mave 'itahüaveque  
 Ti'aitame, 'ana heucunatü  
 caninavaiyariemücü, 'anuyütü,  
 müpaü pü'ane. <sup>17</sup>Meriçüsü  
 Ti'aitame haitü 'iyari canixatani.  
 Haque Ti'aitame 'iyarieya meyeica,

tevi caniyünü'aca mana. <sup>18</sup>Tame  
 tanaitü tahüxie caheucunacacu  
 tepihēcüata Ti'aitame visi que  
 müti'ane, sepa yüxaüyemecü,  
 xicürisie que mütihecüata tevi.  
 'Ayumieme tepücupasiva, visi  
 te'ananetü tepacünirüme, hepaüna  
 te'ananetü tetetaxexeyiatü  
 tete'acünirüme. Ti'aitame 'iyaritütü  
 müpaü catiniyurieneni.

**4** 'Ayumieme müpaü  
 tetehürütüarietü  
 tepücaüripie, masi  
 que temütenenimayasie  
 tepüyüa. <sup>2</sup>Peuyevese hipatü  
 memüyuteteviyanicü 'avie  
 que memüteyurie, peru tame  
 tecateniutixani'erieni mücü naime.  
 'Atepüca'u'uva teteta'irüviyatü,  
 ha tepüca'inüitüa Cacaüyari  
 niuquieya, que mütivaiyacü püta  
 tetecuxatatü. Masiücüme tepeyeitüa  
 tita yuri müraine, Cacaüyari  
 tasixeyiacacu tepütahecüata,  
 yunaitü teüteri yu'iyarisie müpaü  
 memütemaicacü quename yuri.  
<sup>3</sup>Taniuqui 'aixüa manuyüne sepa  
 meucuname, memütümaiariexime  
 que memüte'i'enie xeyicü  
 caneucunaca. <sup>4</sup>Hicü miemete  
 vacacaüyari canivacüpiriyaxüani  
 müme yuri memücate'erie que  
 memüteyumate yu'iyarisie, capa  
 hecüariya me'uxeiyacü, niuqui  
 'aixüa manuyüne Cürisitu  
 que mütimarive manuyüne  
 que mütivahecüariviyaqueyu.  
 Mücü Cürisitu Cacaüyari  
 cani'inüarieyatüni, hepaüna  
 pütüyuxexeiya. <sup>5</sup>Mücü meta, tame  
 tepücatecuxata tahepaüsita, masi  
 müpaü püta tepütecuxata, quename  
 Cürisitu Quesusi ti'aitame hücü

te'utiyuatü, quename tame xeparevivamete tehüme Cürisitusüa temümiemetecü te'utiyuatü. <sup>6</sup>Que mü'ane Cacaüyaritütü müpaü mutayü, Hecüariya yüvipa que'uneni, 'utaitü, mücütütü catanihecüariyani ta'iyarisie. 'Ayumieme yatete'imaitü Cacaüyari que mütimarive, Cürisitusie que mütimasüicü, tecanihecüariviyarieca.

**Que temüte'ayeyuyuri  
yuri tete'erietü**

<sup>7</sup>Icü naitü cui püraye'axe, peru haxuta tecaneixeiyani xeicüa 'icü türücarिया, mümasiücünicü Cacaüyarisüa mümiemecü, tahesüa mücamiemecü. <sup>8</sup>Sepa naimecü temü'uximatüarie, tepücaha'ivarie. Sepa 'asitemücatemate que temütëyurieni, tepücavaürüpie. <sup>9</sup>Sepa temeutaveiyariexüa, tepücacu'eiriva. Sepa tematixüriya, tepüca'ütümaiyyarie. <sup>10</sup>Taheyemecü tepücuixime tavaiyyarisie, Quesusi que mütiumü. 'Ayumieme tucari canimasiücünü tavaiyyarisie, Quesusi que mürayeyuri canimasiücünü. <sup>11</sup>Tame temayeyuyuri taheyemecü teniyetuiyani temücuinicü Quesusisüa temümiemetecü, mümasiücünicü tavaiyyarisie que mürayeyuri Quesusi, sepa temücuixime. <sup>12</sup>'Ayumieme tecuiximetü tecaniyüaca, xemesü xe'ayeyuyuritü xepüyüa.

<sup>13</sup>Que müre'uxa, Yuri nepütiuta'erie, 'ayumieme neputaniu 'anuyütü, tameta yaxecüa tepüte'u'iyari. Yuri tepüte'erie, 'ayumieme teputiniuca <sup>14</sup>müpaü tetemaitü, que mü'ane

menucuquetüa Ti'aitame Quesusi, mücü catananucu'uitüamücü tameta Quesusipaü, xehamame meta catanaye'atüamücü yuhesüa. <sup>15</sup>Müpaü naitü catiniyümücü xehesie mieme. 'Ayumieme mücü yeme 'aixüa tiuca'iyaritü yumüireme vahesie mieme, pamüpariyusi canipitüariecamücü. Mücücü Cacaüyari visi que müti'ane canicuxaxasivamücü.

<sup>16</sup>'Ayumieme tepücavaürüpie. Sepa herie temütüpünirüme, tateüta tecanihecüariyyarieca tucarcü. <sup>17</sup>Pücahahete, que temüte'uximatüarie hicü, 'epücareutere. Peru yatete'uximatüarieme, taheyemecü cui visi 'anemecü tepü'icatüarieca mücaxüvecü. <sup>18</sup>Peru tepüca'icuvautüve tita temütexeyia, tita temücatexeyiyavave püta tecanicuvautüveni. Tita temütexeyia 'apücatiterive, tita temücatexeyiyavave püta yuheyemecü 'apütiterive.

**5** Müpaü tecatenimaica, xüca ca'unarieni 'icü xamaru haque temayetei 'ena cuiepa, qui tecanexeyiani Cacaüyari mütasipitüa mamacü mücaveyiya yuheyemecü 'amuve muyuavisie. <sup>2</sup>Mücü meta, müpaü te'anenetü teniu'aivani te'litücutü haque temayeteni taheima mieme. <sup>3</sup>Müpaü tete'itüme yemecü tepücamamaveni. <sup>4</sup>Icü xamarutüa te'ayetetü teniu'aivani tesaipünetü. Tasüari tecaheutaquemaripicutü, masi tepeitüicuni, tita mürayeyuri yuhesie mixeviriyanicü tita mütimüxime. <sup>5</sup>Merücüte, Cacaüyari canihücütünü que mü'ane



müta'utievevie müpaü mütiyünicü.  
Mücüta yu'iyari cataniupitüani  
'inüarütüme mümasiücünicü tita  
tahesie mütnaque.

<sup>6</sup>Ayumieme ta'iyari tepucayesa  
taheyemecü. Müpaü tepütemate,  
mexi tavaiyarisie te'u'uva,  
Ti'aitamesüa tepüca'u'uva. <sup>7</sup>Yuri  
tete'erietü tecaniu'uvani, te'ixeyatü  
tepüca'u'uva. <sup>8</sup>Ayumieme  
ta'iyari tepucayesa, tepütavaüriya  
masi temicu'eirienicü tavaiyari,  
Ti'aitamesüa püta teme'uvanicü.  
<sup>9</sup>Ayumiemeta tecanitamexütüaca  
teminaqui'arütüanicü sepa 'uva  
temu'uva sepa hesüana temu'uva.  
<sup>10</sup>Caneuyevecani tanaitü  
temasiücütü temayeitüarienicü  
Cürisitu 'uvenieya hüxie haque  
mütaticu'ivaviya, taxexuitü  
temüte'apiniyarienicü 'aixüa que  
temüte'uyuri'axa que temüte'uyuri,  
tavaiyarisie te'u'uvatü que  
temüte'uyuri.

**Que temütehürütüarie,  
temütecuxatanicü, teüteri  
Cacaüyarimatü 'aixüa  
memüteyuxeianicü**

<sup>11</sup>Ayumieme müpaü tetemaitü,  
müpaü que müreyeveve  
müreyehüvirienicü Ti'aitame,  
yuri teteniva'eritüaca teüteri.  
Tecanimasiücünü Cacaüyari que  
mütatixeiya. Yuri tepüte'erie  
quename temasiücü xemeta que  
xemütatexeiya, que xemüteyumate  
yu'iyarisie. <sup>12</sup>Müpaü te'utiyuatü  
tavari tepüca'isütüa tetahecüatätü  
xemütasimaicacü. Masi müpaü  
te'utiyuatü tecanixepitüaca 'aixüa  
xemutiyanenicü xetasiha'erivatü,  
niuqui xemexeyanicü cümana

xemüvata'eiyacü müme herie  
mieme xeicüa meha'erivatü  
'aixüa memutiyuane yuhepaüsita,  
'iyarisie mieme memücaha'eriva  
'aixüa me'utiyuatü yuhepaüsita.  
<sup>13</sup>Sepa 'asitemücatemate,  
Cacaüyarisie mieme teniyüaca.  
Me sepa temütemaivave,  
xehesie mieme tepüyüa.  
<sup>14</sup>Cürisitu mütasinaqui'eriecü,  
'ayumieme tinaquemecü  
tepüyüa, tepücayüvave yücü  
temüteyuriecacü. Müpaü masi  
tepütehetime, xevitü yunaime  
vahesie mieme caniumüni,  
'ayumieme yunaitü mepucü.  
<sup>15</sup>Mücü meta, yunaime  
vahesie mieme pümü, müme  
memayeyuyuri yuhesie mieme  
memüca'ayeyuyurinicüri,  
que mü'ane vahesie mieme  
mümü manucuquetüarie,  
mücüsie memiemetetütü püta  
memüyüacacü. <sup>16</sup>Ayumieme hicü  
xeime tepücamate teüteri que  
memüte'imate. Sepa temimaicai  
Cürisitu teüteri que memütehe'eriva,  
hicü müpaü tetehe'erivatü  
tepüca'imate. <sup>17</sup>Ayumieme xüca  
Cürisitusie tiviyani, yücü 'anetü  
tiniunetüarieni. Tita meripai  
mütimieme cananucayune. Camü,  
naitü yücü 'anetü nayani.  
<sup>18</sup>Icü naime Cacaüyari  
catiniusütüani. Mücü pütasi'upitüa  
'aixüa temütetaxeianicü  
hamatüana, Cürisitu müpaü  
mütüyuricü. Cataniuhürütüani  
temütecuxatanicü, hipatüta  
hamatüana 'aixüa  
memüteyuxeianicü, <sup>19</sup>müpaü  
te'utiyuatü, Cacaüyari Cürisitusie  
tivyatü müpaü pütivapitüa cuiepa

memütama hamatüana 'aixüa memüteyuxeiyanicü, vahesie pücatiuhüpa 'axa memüte'uyuricü, masi pütasi'uyetuiri mücü niuqui 'aixüa que temütetaxeiya hamatüana manuyüne, te'utiyaütü. <sup>20</sup>Ayumieme Cürisitu nü'arimama tecanihümetüni, hesiena mieme tecaniutiniucani, müpaü tetemaitü, Cacaüyari canixetuicani müpaü te'utiyanecacu, Cürisitusie mieme te'utiniütü vaüriyarica tecanixepitüaca, Cacaüyariatü 'aixüa xemüteyuxeiyanicü. <sup>21</sup>Que mü'ane 'axa mücatiyurievecai Cacaüyari müpaü piyuri 'axa tiyuruvamepaü mü'itüarienicü tahesie mieme, tame hesiena teteviyatü heiserie temexeyanicü Cacaüyari heiserie que mütiyupitüva.

**6** Mücü meta, hamatüana müpaü tete'uximayatü, vaüriyarica tecanixepitüaca xeme, xe'itanaqui'erieme tita Cacaüyari mütxemicua 'aixüa tiuca'iyaritü, xüanacüa xemüca'itanaqui'erienicü.

<sup>2</sup>Müpaü paine,  
Tucari 'aixüa mü'anesie  
Nemaniu'enieni,  
Tucari 'aye'acu  
Xemütavicueisitüarienicü  
Nemaniuparevieni.

Camü hicü tucari 'aixüa mü'ane canihücütüni, camü hicü tucari canaye'ani xemütavicueisitüarienicü.

<sup>3</sup>Ni xeime tepüca'ucununuitüva tixaütü hepaüsita, 'icü hüritüarica capa 'useviximariecacü que temütehüritüarie. <sup>4</sup>Masi Cacaüyari teparevivamete tehümetütü naimecü tepütahecüata. Vaüca

tepüte'uca'eniva te'uximatüarietü, teteheuyehüatü, tetatexietüvetü, <sup>5</sup>tecuveivatü, te'anutaxürivatü, teüteri meyuxamurietüvecacu, tete'uximayatü, tucari tecahütü cusicü 'icuaicü. <sup>6</sup>Tepü'itiya, tepütemate tita müreuyevese, müixa tepüvanevie hipame, 'aixüa tepüte'u'iyari, 'Iyari Mütiyupata tepexeyia, yacü tepücatetacanaqui'erie, <sup>7</sup>yuri tepütécuxata, Cacaüyari türücariyaya tepexeyia, heiserie temupitüariecü cuya tepüaya tepupitüarie naisata mieme cümana temütacuitüveni. <sup>8</sup>Visi tetexeyarietü 'axa tetexeyarietü yaxeicüa tepüyüa, 'axa tetcexaxasivatü 'aixüa tetcexaxasivatü yaxeicüa tepüyüa. 'Irumari tepüxasiva peru yuri tepütécuxata, <sup>9</sup>quename tecamariva meputiyuane peru yunaitü mepütasimate, quename tecuixime meputiyuane peru camü tepayeyuyuri, quename tetatacuritüariexime meputiyuane peru tepücacui'iva, <sup>10</sup>tepütaheiveri peru taheyemecü tepütatemamavi, tepüpuvüresixi peru xicusixi tepüvarayeitüva yumüireme, tixaütü tepücatehexeyia peru naitü pütitapini.

<sup>11</sup>'Aixüa 'iyaricü tepütexecuxatüva Curinitutari, yeme ta'iyari 'apüneina que temütexenaqui'erie. <sup>12</sup>Que temütexexeyia, ta'iyari pücasaipüne, xeme püta xepüyusaipüna yu'iyarisie. <sup>13</sup>Merücüte, netüriyama que nemütivacühüaveniqueyu, müpaü nepütixetahüave, yaxeicüa xequeteneuyuri que temüxeyurie, xe'iyari 'amütanerecü.

**Cacaüyari mayeyuri tuquieya  
que temütehüme**

<sup>14</sup>Yuri memücate'erie vahamatü  
xepücayuxeviriyani. Titari  
rexeiya tita mütiheiserie tita  
'aisica mütitisanamatü. Que  
tiyuxevini hecüariyamatü yüriya.  
<sup>15</sup>Que meteyu'enie Cürisitu xeime  
cacaüyari 'axa mü'anematü. Tita  
tinaque tevi yuri müti'eriesie  
'axeicüa yuri mücati'eriesie.  
<sup>16</sup>Cacaüyari tuqitana que  
metenaque tetexi cacaüyarixi.  
Pücayüvesietü. Tame Cacaüyari  
mayeyuri tuquieya tecanihümetüni,  
que mutayü Cacaüyari,  
Vahesüa neniucaimücü  
Vasata neniuyeicamücü  
Vacacaüyari nepühücütüni,  
Müme neteüterima  
mepühümetüni.  
<sup>17</sup>Ayumieme müpaü paine,  
Vasata xequenayecüneca,  
Xequeneyupata  
Canaineni Ti'aitame,  
Xepüca'imayüiani  
Tita mücati'itiya.  
Xüca müpaü xeteyurieca  
Neri nenixetanaqui'erimücü  
<sup>18</sup>Xe'uquiyari necanayeimücü,  
Xeme nenivema  
'Uquisi 'ucari  
Xecanacünicuni  
Canaineni Ti'aitame  
Nai mütürücaüye.  
**7** Mericüte nenaqui'erima,  
müpaü temüte'utahüavariecü  
quename müpaü tiyurieni,  
tepüta'itieca naime  
mütiyusevixima tavaiyarisie  
ta'iyarisie. Tepaye'axüaximeni

tepasietü Cacaüyarisie mieme,  
teteheiyehüvirietü.

**Papuru que mütiyutemaviecai,  
Curinitutari mete'uhayevacu  
que memüteyuriecai**

<sup>2</sup>Yu'iyari 'axequeneutaneriya  
xemütasinaqui'eriecacü. Ni  
xeime 'axa tepüca'uyuri, tixaü  
tepücate'inavairi xeime,  
tepüca'licuamanaxü ni xeime.  
<sup>3</sup>Müpaü que nemaine, xehesie  
nemütiuhüpanicü 'asinepücahaine.  
Meripai müpaü nepütixecühüavecai  
quename ta'iyarisie texeha'eriva,  
quename 'axeicüa tetaxevi sepa  
temücuini sepa temayeyuyurini.  
<sup>4</sup>Müiremecü nepücan'e'iyaritüa  
xehepaüsita, cui 'aixüa  
nepüticuxata xehepaüsita. Sepa  
naimecü temü'uximatüarie,  
nepaye'a nenütüarietü,  
panayuhayeva netemavierica.  
<sup>5</sup>Mericüsü Maseruniya cuieyarisie  
te'u'axüaca tepüca'uxipivavecai  
tavaiyarisie, naimecü masi  
tecani'uximatüariecaitäni.  
Ta'aurie pütüyucuinecai, tateüta  
tepümamacai. <sup>6</sup>Perusü que mü'ane  
Cacaüyaritütü müvanütüva  
müme memüyuheiverie,  
mücü cataniünütüani  
tameta, Titu munuacü.  
<sup>7</sup>Munuacü xeicüa pücatixaü,  
masi mücü munütüariecü  
xehepaüsitata tepunütüarie  
tame, taticuxaxatüvacacu  
Titu que xemütatexeiyaqueyu,  
que xemüteyuheiverie, que  
xemüteyumexütüta nehiesie  
mieme. 'Ayumieme ne masi yemecü  
nepünetemaviecai.

<sup>8</sup>Ne xapacü sepa nemüxe'uheiveritüa, yücü nepücatinecühüave. Sepa yücü nemütinecühüavecai 'ana, müpaü netimaitü mücü xapa müxe'uheiveritüacü siqueresü yapaümexa, <sup>9</sup>peru hicü masi nepünetemavie. Xemuheiveritüariecü, mücü meta nepücanetemavie. Masi yaxete'uheiveritüarieca xemüte'uhayevaxücü que xemüteyuriecäi, 'ayumieme nepünetemavie. Cacaüyari tixepitüacacu xecaniuheiveritüarieni, 'ayumieme tixaü xepücate'utümayaxü müpaü temüte'uyuricü. <sup>10</sup>Xüca yuheiverieca Cacaüyari tipitüacacu, pütihayeva que mütiyurienecai, pütavicueisitüarienita. Tihayevame que mütiyurienecai, taviari 'axa pücatiyücühüaveni yamütihayevaxücü. Me xüca yuheiverieca cuiepa memütama vahepaü xeicüa, püpütüarieni mumünicü. <sup>11</sup>Neuxei que mütiuyü quepaucua Cacaüyari müxe'upitüa xemüyuheiveriecacü. Mücü meta, xepüyutaheciataxü yuniuqui, xepüyuyehexaxü, xepütimama. 'Ana xepünesixeiyacucai, xepüyumexüitüacai, 'aixüa xepiyuri naime. Naimecü xeniyuheciatani xemü'itiyacü mücü que mütiuyücü. <sup>12</sup>Mericüte, müpaü nepütixe'u'utüiri, peru que mü'ane yu'liva 'axa muyuri neha'erivatü xeicüa nepücatiu'utüa, que mü'ane 'axa mu'itüarie neha'erivatü xeicüa nepücatiu'utüa. Xeme yücümana müpaü xemütemaicacü

que xemüteyuvaüriya tahesie mieme Cacaüyari xexeiyacacu, 'ayumieme yanepütü'utüa.

<sup>13</sup>Müpaü mütiuyücü, 'ayumieme tepunütüarie tame.

Mücü meta, tame müpaü tete'unütüarieca, masi vaüca tenitatemamaviecaitüni Titu müyutemaviecaicü, yunaitü cayuvatü xemipitüacü 'iyarieyasie. <sup>14</sup>'Aixüa que nemütitaxatüa xehepaüsita, nepüca'uteviyasitüarie neniuiqui hepaüsita. Masi yaxecüa yuri que temütexecuxaxatüvacai naimecü, müpaüta caniyuritücaitüni 'aixüa que temüte'itaxatüa Titu. <sup>15</sup>Mücüta cuini mieme masi canixenaqui'erieca xehe'erivatü yaxemütecahucü yunaitü, xehe'erivatü que xemüte'itanaqui'eri xe'umamatü xe'uyüyüacatü. <sup>16</sup>Neta nepünetemavi nemüyüvecü ne'iyari nemeucayesacü xehepaüsita naimecü.

**Tumini que memüte'ucuxeüri  
Cacaüyari teüterimama  
vahesie mieme**

**8** Tepütetaxatüaniqueyu ta'livama, Cacaüyari 'aixüa tiuca'iyaritü que mütiyarupitüa müme memeyutixexeüriva Maseruniya cuieyarisie memütevamicuanicü hipame. <sup>2</sup>Vaücava mepü'inüasietüve me'uximatüarietü, peru cananayuhayevani vatemavierica. Sepa yemecü memüpüvüresixi, mepimüiriyaxü 'aixüa 'iyaricü que memütevamicuacai. <sup>3</sup>Que nemütüinierixü yanepütiheciata.

Que memüteyüvavecai xeicüa nepücahaine, masi yemecü mepüca'uyuticueri que memütevamicuacai hipame. Yücumana <sup>4</sup>vaüriyarica metasipitüatü mecatanicutavavirieni müpaü temütevatauniecü, mevaparevietü memüyuxevinicü Cacaüyari teüterimama vahamatü.

<sup>5</sup>Que temütecu'erivacai müpaü memüteyurieniquecaicü yamepücate'uyuri. Masi meniyyuetuani meri Ti'aitame mütiva'aitüanicü, tameta temüteva'aitüanicü müpaü mütinaquecü Cacaüyari.

<sup>6</sup>Ayumieme Titu vaüriyarica tecaniupitüani 'icü 'imiquieri müraye'atüanicü xeme xehesüata mücü meripai misutüacü 'ixeürietü.

<sup>7</sup>Vaücava naitü tinimüriyarümeni xehesie mieme que xemüteyurie, yuri xete'erietü, xetecuxatatü, xetematetü tita müreuyevese, naimecü xeyuvaüriyatü texenaqui'eriecacu. Mericüte, yaxecüa 'icü 'imiquierita xequeneutimüiriya.

<sup>8</sup>Netixe'aitüatü 'asinepüca'utaine hicü. Masi hipatü müpaü memüteyuvaüriyacü, nexel'iniatatu nepaine, xüca hecüasieca quename xemeta xeteyucanaqui'erie. <sup>9</sup>Xeme müpaü xepütehetima 'aixüa que mütiuca'iyari Tati'aitüvame Quesusi Cürisitu. Mücü sepa müxicutücai, xehesie mieme puvüre nayuyeitüani, xeme xicusixi xemacüneccü, 'iya puvüre matüacü.

<sup>10</sup>'Icü hepaisita que nemüticu'eriva müpaü netinixe'utaxatüani. 'Aicü xepuyuvaüri xemisutüanicü

müpaü xeteyurietü, 'anata xepisutüa. Mericüte, hicü 'aixüa caniyümücü xehesie mieme xüca müpaü xeteyurieni, <sup>11</sup>xüca müpaü xete'aye'atüani que xemüteyurie. Xe'iyari que mü'anenecai müpaü xemüteyuvaüriyanicü, müpaüta xequetenaye'atüaca, que xemüteyüvave. <sup>12</sup>Xüca ra'iyari yat'i'ani, tita mürexeiya pünaqui'erivani, sepa tixaütü mücarexeiya.

<sup>13</sup>Peru müpaü nepücahaine hipatü memü'icapiyanicü xeme xemücuanimasitüarienticü, <sup>14</sup>masi müyeyesitüarienticü hicü nepaine. Tita müranuyuhayeva xehesie mieme hicü, mücücü xequenivaparevieca müme memüteheuyehüva, mümeta 'uxa'atüni varie vahesie mieme 'anayuhayevame mücücü memüxepareviecacü xeme que xemüteheuyehüaca meyeyesitüarienticü, <sup>15</sup>yaxecüa que müre'uxa, Que mü'ane vaüca mütiucuxeüri, püca'anayuhayevaxü. Que mü'ane 'esiva mütiucuxeüri, tixaütü pücareuyehüacai.

### Titu

<sup>16</sup>Pamüpariyusi necanipitüaca que mü'ane Cacaüyaritütü müpaü mipitüa Titu yu'iyarisie müpaü mütiyuvaüriyanicü xehesie mieme tahepaü. <sup>17</sup>Catanü'enieni vaüriyarica que temüte'ipitüa, peru yemecü masi müyuvaüriyacacü, yücumana xehesüa püyemie.

<sup>18</sup>Hamatüana tenenunü'acuni ta'iva mümariva niuqui 'aixüa manuyüne que müticuxata, yunaitü memüyutixexeüriva

memeitima naisarie.

<sup>19</sup>Mücü meta, memüyutixexeüriva mecanenayexeiya tahamatü muyeicanicü 'icü 'imiquieri manu'üiyanicü que temütehüritüarie, Ti'aitame hepaüsita 'aixüa müticuxaxasivanicü, temümasiücünicü tameta que temütetavaüriya. <sup>20</sup>Müpaü tepütetacuerivayurie, xevitü capa niuquixiecacü 'icü 'imiquieri hepaüsita que mütivaücava cümana temühüritüarie. <sup>21</sup>Tita 'aixüa müti'ane, mücücü tepütamexüitüa Ti'aitame que mütatixeiya, teüteri meta que memütatexeiya.

<sup>22</sup>Vahamame tenenunü'acuni xeime ta'iva. Müixa te'ita'inüatata müiremecü, tepeitima que mütiyuvaüriya. Hicüsüta masi püyuvaüriya, müiremecü yuri müti'eriecü xehesie. <sup>23</sup>Titu hepaüsita, müpaü nepütixecühüaveni nehamatü müyuxevicü, nehamatü müti'uximayacü xehesüa. Ta'ivama vahepaüsita, müpaü nepütixecühüaveni memüyutixexeüriva vanü'arima memühümecü, vacümana Cürisitu ve'eme mücuxasivacü. <sup>24</sup>Ime xequenivahecüasitüiyani quename yuri que xemüteyucanaqui'erie, quename yuri 'aixüa que temütevacühüave xehepaüsita, xaüsie memeyutixexeüriva mexexeyacacu.

**Tuminicü que memütevaparevieniquecai 'ivamarixi**

**9** Mericüsü, müpaü que xemüte'icuxeürie

Cacaiyari teüterimama vahesie mieme, tavari niuqui pücaheuyevese mücü hepaüsita para nemütixeti'utüieriecacü. <sup>2</sup>Ne müpaü nepütimate que xemüteyuvaüriya, 'ayumieme 'aixüa nepütivacuxaxatüva Maseruniyatari xehepaüsita. Müpaü nepütivacühüave, 'Acaiyatari 'aicü mepüha'arisiecai müpaü memüteyuriecacü. Müpaü xemüteyumexüitüacü xeme mümeta mepüyumexüitüa yumüretü. <sup>3</sup>Nenivaranunü'amücü ta'ivama capa xüanacüa 'ayanicü tita 'aixüa nemütivacuxaxatüva xehepaüsita, tita xemüte'ucuxeürie, mücü nexatatü. Peuyevese masi xemücuha'arisienicü yaxecüa que nemütivacühüavecai xehepaüsita. <sup>4</sup>Maseruniyatari ne'utüma xüca me'u'axüani, müme xüca mexe'utaxeiyaque xecaha'arisiecame, tepütateteviyaniqueyu tame müpaü yuri tete'erieme xehepaüsita. Que xemüteyuteteviyaniqueyu xeme 'asitepüca'utiyuane. <sup>5</sup>'Ayumieme müpaü nepüticu'eriva meuyevesecü vaüriyarica nemüvapitüanicü ta'ivama memünesi'anuhaisitüiyacü xehesüapai, memüxecuha'arisitüanicü müpaü 'aixüa que xemüteyuriecucai meripaitü xemüvamicuanicü hipame. Peuyevese mücuha'arisienicü xe'iyari ya'anecacu, yuhesie mieme xe'icueriecacu pücatixaü.

<sup>6</sup>Icü xecüa, que mü'ane 'esipaüme muca'esa 'icuerietü yu'imüari, 'esipaüme xecüa canica'isanamücü. Que mü'ane

nai me tatuatü mica'esa, mücü  
'anayuhayevame püca'isana.

<sup>7</sup>Yuxexütü matüaripai yücümana  
que memüteheitima yu'iyarisie,  
müpaü mequeteheyurica,  
mecayuheiverietü meviyariecame  
mecayu'erietü, müpaü püta  
mequetevamicuani. Cacaüyari  
caninaqui'erica que mü'ane  
yutemavietü mütivamicua.

<sup>8</sup>Cacaüyari caniyüveni mimüiriyani  
tita mütixepitüa 'aixüa tiuca'iyaritü,  
manayuhayevanicü. Xüca  
müpaü 'aneni, yuheyemecü naitü  
müreuyevese xepütehxeiyani,  
xepüyüvaveni 'aixüa  
xemüteyuriecacü naimesie, <sup>9</sup>que  
müre'uxa,

Canenuxürietüyani naisarie,  
Tinivarumini

memüteheuyehüacai,  
Heiseriemecü yaticamietü  
Tita mütiuyuri  
Yuheyemecü 'epütiterive.

<sup>10</sup>Que mü'ane 'imüari mimicua  
'esame, 'icuai mütasimicua  
müticuaiyanicü, mücü  
püxemicuanita xeme, pütimüiriyani  
tita xemüte'uca'esa pixuaveritüani  
tita mütiutixuxuavere heiseriemecü  
yaxemütecahucü. <sup>11</sup>Nai me  
hepaüsita xicusixi xepayeitüarieni  
yeme 'aixüa 'iyaricü  
xemütevamicuanicü hipame. Que  
temüteyurie, müpaü xetevamicuayu,  
pamüpariyusi canipitüariecämücü  
Cacaüyari. <sup>12</sup>Müpaü  
xetevaparevietü yu'uximayasicacü  
xepüvaraye'atüani que  
memüteheuyehüva Cacaüyari  
teüterimama hicü. Mücü heima  
'aixüa püyünita, yumüiretü  
pamüpariyusi memipitüacü

Cacaüyari. <sup>13</sup>Xeme xepümasiücü  
que xemüte'u'inüasie müpaü  
xemütevapareviecü. 'Ayumieme  
'aixüa meniutiyuaneni Cacaüyari  
hepaüsita yaxemütecahucü,  
yaxeicüa que xemüteyuhecüata  
quename niuquisie xeteviya Cürisitu  
hepaüsita 'aixüa manuyünesie,  
'aixüa 'iyaricü xemüvarumicü  
müme hipameta yunaime.  
<sup>14</sup>Mümerita xehesie mieme  
quepaucua memüyutineneviva  
mecanixehive'eriecacuni, Cacaüyari  
cui 'aixüa mütiuca'iyaricü  
xehesie mieme. <sup>15</sup>Pamüpariyusi  
quepitüarica Cacaüyari, müpaü  
mütatiumicü que temücateyüvave  
yatemütehecüatanicü.

Papuru yuhesie mieme que  
mütiutaniu, que müreye'atüa  
yühüritüarica 'utaitü

**10** Neri Papuru  
nehücütütü vaüriyarica  
necanixepitüacaqueyu. Cürisitu  
mümaxiücü müca'ayu'eriyacü,  
müpaü nepaine. Tahüxie  
te'utinierecacu tixaütü  
nepücatihücü xeni xehesüa  
ne'uyeicatü, teva ne'uyeicatü  
nepane'eriya püta que  
nemütixecühüave xeni. Yane'anetü  
xeni nepaine. <sup>2</sup>Mericüte,  
nepüxevaviri mücaheuyevanicü  
nemüxetahüavecü ne'ane'eriyatü  
xehesüa nenuame, sepa müpaü  
nemütimate, xüca 'aixüa  
'aneme ne'erica nemüyüvecü  
nemaneriyanicü hipame  
vahepaüsita, vaisie teteviyatü  
te'u'uvame memütasi'erie, müme  
vahepaüsita. <sup>3</sup>Sepa 'atemu'uva  
tavaiyarisie, vaisie teteviyatü

tepücatacutiüve. <sup>4</sup>Vaisie pücamieme cuya tepüaya cümana temütacuitiüve. Pütürücavi püta Cacaüyarisie mieme, temica'unaxüanicü cuyaxi vaqui. <sup>5</sup>Iyaritüarica tenica'unarümeni que memüteyücühüave teüteri, sepa que mütitita Cacaüyari müraye'unie memüca'imaicacü, mücü tecanica'unarümeni. Naime 'iyaritüarica tepanutahüva yamüticamienicü Cürisitu que maine. <sup>6</sup>Taheyemecü tepüha'arisie temüvatatacuritüanicü yunaime memücayuvaüriya yamemütecahunicü, xe'aye'atüarieyu xeme yaxetecahutü. <sup>7</sup>Xequeneuxeiya tita xehüxie müraniere. Xevitü xüca yu'iyarisie Cürisitusüa mieme yu'erieca, müpaüta masi yu'iyarisie quetiücühüaveni, mücü Cürisitusüa que mütimieme, tameta hesüana tepümiemete. <sup>8</sup>Icü heiserie temexeiya tame, Ti'aitame müpaü pünetiupitüa nemüxetürücarianicü, nemüxeca'unaxüanicü müpaü pücanetiupitüa. Mericüte, xüca 'esiva ne'anuyehaitürüveni ve'eme nenexatatü 'icü heiserie temexeiyacü, nepücaneteviyani müpaü ne'utaitü. <sup>9</sup>Aixüa pücaüüni xüca nexemariutame ne'erivani xapacü. <sup>10</sup>Müpaü püraniuva, xapacü que maine pahete pütürücavi, peru yuvaiyarisie 'uva 'uyeicatü 'asipücaüve, yuniuquisie püxani'eriva. <sup>11</sup>Müpaü quetiücühüaveni que mü'ane müya maine, que temü'anene taniuquisie xapa tevevietü teva te'u'uvatü,

müpaü yaxeixüa tepüteyurieni 'ate'u'uvatü.

<sup>12</sup>Mücü meta, tame tepücatavaüriya temütacayasanicü müme va'aurie, temüta'inüatanicü vahepaü te'anenetü, müme yuhesie mieme memüyuheciata memümarivanicü. Müme masi memüyuti'inüatacü yu'inüaricü, yücümana memüyuxeiyacü meyu'inüatatüvetü, 'asimepücatemaivave. <sup>13</sup>Tame püta ve'emete que temütetaxata, que müreyü haque temücahe'aitüarie 'asitepücahaitüca. Masi Cacaüyari que mütare'inüasiri, mana que müreyü tepütecuxata tetaxatatü. 'Asita xehesüapaitü tepu'inüasiyarie. <sup>14</sup>Xüca xehesüa tecahütüariecaque, tepanuyehaitürüveni que yu müpaü te'utiüatü, peru tame meri tepu'axüa xehesüa niuqui Cürisitu hepaüsita 'aixüa manuyüne tecuxatatü. <sup>15</sup>Ayumieme tahepaüsita que temütecuxata, que müreyü haque temücahe'aitüarie 'asitepücatecuxata. Hipatü que memüte'uximaya hepaüsita, 'asitepücahaitüca quename tame püta müpaü tete'uyuri tehaitü. Mücü meta, müpaü yuri tecateni'erieca xehepaüsita, quepaucua xemutixuxuavereni yuri xete'erietü, 'ana tepücasaipüneni xehesüa xeixüa temüte'uximayacü. Naisarie püta haque teme'inüasiyarie, mana tepüte'uximayaca. <sup>16</sup>'Asita xevaritapaitü niuqui 'aixüa manuyüne tepücuxatani. Peru haque xevitü meye'atüa yühütüarica que müre'inüasiyarie,



'asitepücahaitücani quename tame püta müpaü tete'uyuri.

<sup>17</sup>Masisü niuqui que maine, Que mü'ane ve'eme müxatamücü, Ti'aitame quexatani ve'emetüme.

<sup>18</sup>Que mü'ane yücümana müyuhécüata, mücü pücamasiücü que mütiu'inüasie, masi que mü'ane mütiuhécüata Ti'aitame, mücü püta pümasiücü que mütiu'inüasie.

**Müme yacü xeicüa  
memütexaxatametetücai**

**11** Xüca xenesitanevienique tüma yareutevitü mexi tevi 'asimücatimatepaü neticuxata 'esiva. Tasüari xepünesitanevieni.

<sup>2</sup>Cacaüyari que mütiyümexüitüa xehesie mieme, neta müpaü nepütinemexüitüa xehesie mieme, 'ayumieme müpaü nepaine. Nepüxeyetua xeimesüa, Cürisitumatü xemüyuxevinicü, yaxeicüa 'üimari mücaxuriqui que mütiyüquitüariva 'uqui yuxevitü xeicüa mitivitünicü. <sup>3</sup>Ne nepüma capa xe'useviximarienicü que xemüteyücühüave yu'iyarisie, yaxeicüa mücü cu que müti'irüviyaxü 'Eva. Me xüca müpaü tiuyünique, xe'iyari pücayuxeviniqueyu, Cürisitusie xeicüa xepücateviyaniqueyu, xepüca'ityacaqueyu. <sup>4</sup>Cari 'aixüa 'anemecü xecanitanevieni xüca xevitü nuani xeime Qesusi yücü mü'ane cuxatatü tame temüca'ixatacai, me xüca xecuxaxatüvani xeime 'iyari yücü mü'ane xeheixeyatü xemacüneccü xemüca'itanaqui'erivave, me xüca niuqui 'aixüa manuyüne yücü mü'ane xecuxaxatüvani

xemüca'itanaqui'erivavecai. Xüari xepinevie müya müticuxata.

<sup>5</sup>Ne müpaü nepüticu'eriva, müme cuini mieme vaniu memünü'arisixi, müme tixaütü mepücatehexeiyä neta que nemücareixeyä. <sup>6</sup>Sepa que mü'ane mücaniuepaü nemüticuxata, tevi 'asimücatimatepaü nepüca'ane que nemütimaive. Masi naimeccü, que temü'anene yatepütexehécüasitüya, yunaitü que memütatexeyä.

<sup>7</sup>Me queri 'axa netiuyuri quepaucua tixaütü necatihücütütü nemaneyetüa xeme püta tixaütü xehümetütü xemayetiüarienicü. Queri 'axa netiuyuri necaxecuetatüatü nemüxecuxaxatüvanicü Cacaüyari niuquieya 'aixüa manuyüne. <sup>8</sup>Xaüsie memeyutixexëüriya nenivanavanecaitüni yacütütü, vatumini nenaqui'erietü, xehesie mieme nemütü'uximayacacü. <sup>9</sup>Xehesüa ne'uyeicatü quepaucua nemüreyehüacai, nepücaxe'uximatüacai ni xeime. Que nemüreyehüacai mepünete'umicuacai ta'ivama Maseruniyasie memeyecü. Müpaü netiyurienetü naimeccü nepücanetauniecai nemüxe'uximatüanicü, müpaüta yaxeicüa nepütüyurieneni. <sup>10</sup>Yuri que maine Cürisitu, neta yuri nepaine. 'Ayumieme müpaü nepaine, yemecü nepücanenarieca müpaü netinexatatü naisarie 'Acaiyä 'erisaruyarisie. <sup>11</sup>Titayari müpaü netinemate. Nemüxenaqui'erieccü 'ayumieme müpaü nepütinemate. Cacaüyari müpaü pütimate que nemütixenaqui'erie.

<sup>12</sup>Que nemütiyuriene, yaxeciua müpaü nepütiyuriene. Müme memisutüaniqueyu tahepaü metexeyarietü, ve'emetete que memüteyuxataniqueyu, müpaü netiyurienetü necanivanenasitüiyamücü müme. <sup>13</sup>Müya memü'anene mepüte'itava, yacü xeciua mecaninü'arisixitüni. Mepü'irümarisixi masi que memüte'uximaya, sepa memuyupata Cürisitu nü'arimama vahepaü memüteyuxexeyanicü. <sup>14</sup>Mücücü tepücahüxiya. 'Asita Cauyumarieta puyupata hecüaripa mieme niuqui tuayamepaü mütiyuxexeyanicü. <sup>15</sup>'Ayumieme mariveme tepüca'erie xüca müme hesiena mieme memüte'uximaya me'uyupata, müme tita mütiheiserie mieme memüte'uximaya vahepaü memüteyuxexeyanicü. Müpaü mepüte'aye'axüani, que memüte'uximaya müpaü mepüpitärieni.

**Papuru que mütiucuinxü nü'ari mühücütücaicü**

<sup>16</sup>Tavari müpaü nepütayüni, capa xevitü 'asinecatimaicame nesi'eriecacü. Mesü xüca müpaü neti'erivani, sepa 'asinemücatimate, siqueresü xequeneneutanaqui'erie, ve'eme nemünexatanicü 'esiva yacütütü. <sup>17</sup>Que nemüticuxata hicü, Ti'aitame que müticuxata 'asinepücahaine, masi que mü'ane 'asimücatimatepaü, que mü'ane ve'eme müyuxatapaü müpaü yuri ti'erietü yuhepaüsita, müpaü püta nepaine. <sup>18</sup>Yümüiretü ve'emetete mepüyuxata tita yuvaiyarisie

mütimieme meteha'erivatü xeciua. Mericüte neta xüari vahepaü yacütütü ve'eme nepünexatani. <sup>19</sup>Cari xeme xepütemaivave, 'ayumieme xeyutemamavietü xepüvanevie müme 'asimemücatemate. <sup>20</sup>Xepinevie sepa xevitü müxeviya xemüte'uximayacacü vaüriyarica, sepa xepini mütxe'utixütüiri, sepa müxe'anaviviya, sepa müxetave'erie, sepa müxetavaya xehüxie. <sup>21</sup>Tame xeciua müpaü temücaxeyuriecaicü xüari xeniu tepüveraranicai, 'ayumieme xüari xeniu peuyevese neneteviyatü nemütaniuni.

Mericüte, tevi 'asimücatimatepaü neticuxatatü cuxi müpaü nepaine, xevitü que mütiyuvaüriya sepa cueriva'anemecü, neta müpaü nepüyüve sepa cueriva'anemecü. <sup>22</sup>Hepürayusixi teüteriyari metehüme. Neta nepühücü.

'Ixaherisixi teüteriyari metehüme. Neta. 'Apurahamisie meteyecü.

Neta. <sup>23</sup>Cürisitusie mieme mete'uximaya. 'Asimücatimatepaü nepaine, ne masi vaücava yanepüti'uximaya. Ne nepüvara'iva müixa neti'uximayatü masi, masi müixa ne'anutahüivatü, masi vaücava necuveivatü, masi müixa necueriva'aretü nemümünicü.

<sup>24</sup>Huriyusixi püresusixi que memütevarutiva xei veiyari meuyevecanicü huta teviyari veiyari müca'ayanicü, ne 'auxümexa müpaü nepu'itärie.

<sup>25</sup>Haicacüa cüyecü nepeuceveiyaxü. Heiva neputuaxi tetexicü. Haicacüa haramarasie ne'uyeicacacu naviya pucayunixü. Xei tucari xei tucari nepuhaximecai 'amatiyevasio.

<sup>26</sup>Müixa ne'uyeicatü nehuyeta nepücueriva'ane, nemarima hatuxamesie, nemarima tenavayamete vacü, nemarima neteüterima vacü, nemarima teüteri memücahuriyusixi vacü, nemarima quiecarisie, nemarima macumavesie, nemarima haramarasie, nemarima müme 'ivamarixi memüyuterüva mete'itavatü, müme vacü.

<sup>27</sup>Neti'uximayätü ne'uxetü, tucari necahütü cusicü, neheuhacamütü neheuharimütü, tucari necahütü 'icuaicü, neheuxerimütü nemavetü nepüyüane.

<sup>28</sup>Mücü pücanaitü, peru heimanata tucaricü nepüsaipüne, peuyevese nemüne'iyaritüanicü yunaitü memeyutixexeüriva vahesie mieme. <sup>29</sup>Xevitü xüca veranini, neta neveranitü nepütinemaica. Xüca xevitü 'ucunuitüarieni, mucunuitüariyecü nepüha'a neta. <sup>30</sup>Mericüte xüca xeniu heuyeveca ve'eme müyuxatanicü, ne xüari ve'eme nepünexatani, que nemütiverani neticuxatatü.

<sup>31</sup>Que mü'ane Ti'aitame Qesusi mücacaiyarieya mü'uquiyarieya, que mü'ane hepaüsita 'aixüa müticuxaxasiva, mücü müpäü pütimate nemücati'itavacü que nemaine. <sup>32</sup>Ramasicu quiecarisie 'Aretaxi quepaucua müti'aitametücai, hesüana mieme 'isücame cuyaximame mepütehücai Ramasicutari vaquiecarari quitenie memünesiviyacü. <sup>33</sup>Ne neputavicuei memücanesiviyacü, tesariya tenieyasie neheucatuiyaca quirivasie neyecaitü tesariya varita.

Que mütiupitüarie yuvaiyarisie  
mücuseivanicü

**12** Mericüte, xüari peuyevese ve'eme nemünexatanicü. 'Aixüa capüyüni siepüre, peru heinüsipaü que nemütüunierixü, tita Ti'aitame masiücüme mürayeitüa, mücü hepaüsita nepüticuxatani. <sup>2</sup>Ne nepimate tevi Cürisitusie mütiyia. Tamamata heimana nauca viyari 'anuyeyacu, nanutihanieni mücü muyuavisie Cacaüyarisüa yemecü. 'Asinepücatimate xüca 'iyarieya xEICÜA 'utihanieni, me xüca vaiyarieya naitü 'utihanieni, Cacaüyari müpäü pütimate. <sup>3</sup>Mericüsü, müya 'aneme tevi nepümate, xüca 'iyarieya xEICÜA 'utihanieni, me xüca vaiyarieya naitü 'utihanieni 'asinepücatimate, Cacaüyari müpäü pütimate, <sup>4</sup>peru panutihanie visi müracu'anesiepai. Niuqui ne'eniene müpasie tevi müpäü mücatayünicü, tevi heiserie mücahexeiyacü müpäü mainenicü. <sup>5</sup>Mericüte müya 'aneme hepaüsita neticuxatatü ve'eme nepüxatani, peru necümana ve'eme nepücanexatani, me xüca nenexatani que nemütiverani nehaitü xEICÜA. <sup>6</sup>Süricüte xüca nenevaüriyani que ve'eme nemünexatanicü, tevi 'asimücatimatepäü nepücatayüni queyu, yuri nepaineniqueyu püta. Perüsü nepücanevaüriya ve'eme nemünexatanicü, capa xevitü müpäü ticu'erivanicü quename yicü ne'ane, que münetixeyia que

müneti'enie, müpaü neca'aneme  
capa 'eriecacü.

<sup>7</sup>Capa ne'anuyehaitürüvenicü  
temavierica nera'erivatü ne'iyarisie,  
nera'erivatü marivemecü  
masiücütü que mürayeitüarie  
nehesie mieme, 'ayumieme  
nepupitüarie nevaiyarisie  
nemücuseivanicü. Cauyumarie  
tupirieya nepanayenü'aiyari  
münesicuvayanicü, capa  
ne'anuyehaitürüvenicü temavierica  
nera'erivatü. <sup>8</sup>Haicacüa vaüriyarica  
nenipitüani Ti'aitame 'icü hepaüsita,  
nehesie mayeyanicü. <sup>9</sup>Peru  
mücü müpaü pünetiutahüavixü,  
'Aixüa netiucal'iyaritü que  
nemasiyuriene, tavari tixaü  
pepücareuyehüaca. Peveranicacu  
netürücariya paye'atüariva.  
'Ayumieme nenetemavietü masi  
nepünexatani que nemütiverani,  
Cürisitu türücariyaya nehesie  
müyuhayevanicü. <sup>10</sup>'Ayumieme  
nepeunaqui'a neveranitü 'axa  
neticühüavarivatü nereuyehüatü  
netaveiyarrietü nenetexienetü  
Cürisitusüa nemümiemecü. Müpaü  
nepütimate, quepaucua nemüverani,  
'anari necanitürücaüyeni.

**Papuru que mütiyu'iyaritüacai  
Curinitutari memüyuyexexeürivacai  
vahepaüsita**

<sup>11</sup>Mericsü tevi  
'asimücatimatepaü  
neticuxatatü nenayani. Xeme  
xecümana peuyevecai müpaü  
nemütiyurienicü. Peuyevecai  
masi xemünesihecüatanicü  
xeme püta que nemütimariva.  
Haquevari müme cuini mieme  
vanü memünü'arisixi tixaütü

mepücatehexeiya, neta que  
nemücareixeiya, sepa tixaütü  
nemücatihücü. <sup>12</sup>Siqueresü 'inüari  
cümana Cacaiyari nü'arieya  
mümasiücü puyü xehesüa, naimecü  
netiucal'enivacacu, naimesie 'inüari  
nevevecacu mamarivavemecü  
türücaüyemecü. <sup>13</sup>Ne necümana  
nepücaxe'uximatüacai tumini  
hepaüsita. Xüari müpaü  
netiyurienetü necaxe'uximatüatü,  
'axa nepüxe'uyuri xeniu,  
yanetivavavirietü hipame  
xaüsie memeyutixexeüriva,  
'axa nepücavaruyuri xeniu.  
Xequeteneuyehüviri müpaü xeniu  
'ana nemüxe'uyuricü.

<sup>14</sup>Camüsü hicü hairieca  
nepüha'arisie xehesüa  
nemüyemiecü. Tavari  
nepücaxe'uximatüani.  
Nepücatihive'erie xepini, tucari  
xemexeyanicü püta nepütihive'erie.  
Vaüriyarica pücaheuyevese türi  
meme'ücacü yu'uquiyarima  
vahesie mieme, va'uquiyarima  
püta yutüriyama vahesie mieme  
meme'ücacü peuyevese. <sup>15</sup>Nesü  
nenetemavietü nepixütüani  
naime nemürexeiya, sepa yemecü  
nemutaxütüarieni ne, xeme xe'iyari  
'aixüa mü'itüarienicü. Perusü xüca  
cuini mieme nexenaqui'erieca,  
queri 'esiva xEICÜa netinaqui'eriva  
mücücü.

<sup>16</sup>Mericüte xeniu cuini mieme  
nepücaxeviyacai. Perusü xüari xeniu  
'irümarie nemühücücü nenixetaviviyani  
nexe'irüviyatü. <sup>17</sup>Mericü müme  
nemüvareutanü'axüa xehesüa,  
queri nexera'ivaxü vacümana.  
Pücatixaüsietü. <sup>18</sup>Ne vaüriyarica  
nenipitüani Titu, hamatüana

neneinü'ani mücü ta'iva xeime. Mericüte, que tixeha'ivaxü Titu. Havaicü. Camü yaxeicüa tecate'u'iyari que temüte'u'uva, taqueta catiyuxevitütü. Puyuxevi.

<sup>19</sup>Xüari müpaü xepütecule'iriva quename 'icü niuquicü naimecü tahesie mieme te'utiniuca xemütasi'enienicü xeme. Pücatixaüri. Masi Cacaüyari tasixeyiacacu, Cürisitusie teteviyatü, müpaü püta tepütecuxata. Tanaqui'erima naime que temüteyurie, xemütürücariyarienicü pü'ayumieme. <sup>20</sup>Nepüma xeicüa capa nenuame nexeu'acaxeyacü que mücanetinaque xe'aneneme, xemerita capa xenesi'ucaxeyacü que mücatixenaque ne'aneme. Nepüma capa xeyucuitüvenicü, capa xeyü'ütesatüvenicü, capa xe'uyuhecatüvenicü, capa xetecuvautüvenicü hipame xemüvara'ivanicü, capa xeveruniuquimanicü hipame, capa yunacata xeyuniuquimanicü, capa xeteyucatave'eriecacü, capa xeyuxamuruyanicü. <sup>21</sup>Nepüma nenuayu tavori capa necacaüyari tixaütü necatihücütüme nesi'ayeitüanicü xehesüa ne'uyeicacacu, capa neneheveriecacü nevara'erivatü yumüireme 'ana meripai 'axa memüteyuriecaci yamemücatehayevaxü 'axa que memüteyuriecaci meca'itiyatücaitü, mevacumaüvatü que mü'ane mücayü'üya mücayücüna, meyutatuatü memürucuyatüvenicü que memüteyucahive'erie.

### Teutüarica

**13** Hairiecari neniymieximeni xehesüa hicü. Yuhutatü ya yuhaicätü

memunenierixü vaniuquicü naitü niseiriyariemücü. <sup>2</sup>Meripai müpaü nepütivarutahüavixü müme 'ana 'axa memüteyuriecaci xehesüa ne'uyeicacacu hutarieca nemunua, hicüta xehesüa neca'uyeicatü yaxeicüa müpaü nepütivacühüave hipameta yunaime, tavori xüca nenuani nepücavahayeva. <sup>3</sup>Inüari xepüvava quename Cürisitu 'u'inüasie maniuca neticuxatacacu ne, 'ayumieme nepücavahayeva. Mücüri pücaverani que müxeyuriene, masi canitürücaüyeni xehesie tiviyatü. <sup>4</sup>Sepa curuxisie mumierie müveranicaicü, Cacaüyari mütürücaüyecü canayeyuriniri masi. Tameta sepa hesiena temüteviya tepüverarani, masi Cacaüyari mütürücaüyecü hesiena teteviyatü tepayeyuyurini texeparevienique.

<sup>5</sup>Xequeneuyu'inüata xüca 'acu 'axe'u'uvani yuri xete'erietü me xüca catixaütüni. Xequeneuyu'iyaritüaca xüca 'acu müpaü xete'u'inüasieni. Yuxexuitü yu'iyarisie tietü xecayumaica que xemü'anene, Quesusi Cürisitu xehesie mütüviyacü. Müpaü xüari xepütemate yuhepaüsita, me xüca xexani'erivani xeicüa. <sup>6</sup>Neri nepüta'icueva yuri neti'erietü quename müpaü xetehetimani, quename tame tecaxani'eriva. <sup>7</sup>Nenevieri tepipitüa Cacaüyari, xeme 'axa xemücateyuriecacü haquevasü. Müpaü tepücate'ivaviri teüteri memü'inüasie vahepaü temütetaxexeyanicü xeicüa, masi xeme 'aixüa xemüteyuriecacü püta müpaü tepüte'ivaviri, sepa tame xani'erivamete temü'eriva.

<sup>8</sup>Tame türücariya tepücahexeiyā  
temeye'uniecacü tita yuri  
müraine, tita yuri mürainesie  
mieme temüte'uximayacacü  
xeicüa türücariya tepexeyā.

<sup>9</sup>'Ayumieme tepütatemamavie  
quepaucua temüverarani tame,  
xeme püta xetürücacu.  
Müpaüta tepütetaneneviva,  
xemaye'atüarienicü xeme.

<sup>10</sup>'Ayumieme müpaü nepütiuti'utüa  
xehesüa neca'uyeicatü, xehesüa  
nenuame türücaüyemecü  
nemücatiyurienenicü, sepa  
heiserie nemexeyā müpaü  
nemütiyurienenicü. Ti'aitame  
mücü heiserie pünesi'upitüa  
nemüxetürücarianicü,  
nemüxeca'unaxüanicü müpaü  
pücanetiupitüa.

<sup>11</sup>Mericüte ne'ivama,  
xequeneyutemamavieca.

Xequenaye'axüaca  
xemümanesiquitüarieni.  
Xequenene'enieca que  
nemütixetuica. Xequeneyuxevini  
que xemüteyücühüave yu'iyarisie.  
'Aixüa xequeteneyuxeyani. Müpaü  
xüca xeteyurieca, que mü'ane  
Cacaüyariütü mütasipitüa  
temütetacanaqui'eriecacü  
temüca'uximatüariecacü ta'iyarisie,  
mücü xehamatü caniyueicamücü.

<sup>12</sup>Xequeneyuvaüritüaca  
xeyuviyatü Cacaüyari  
teüterimama xemühümecü.

<sup>13</sup>Cacaüyari teüterimama yunaitü  
menixevaüritüaca.

<sup>14</sup>Ti'aitame Qesusi Cürisitu  
'aixüa quetiuca'iyarini yunaime  
xehesie mieme, Cacaüyari  
quexenaqui'erieca, 'Iyari  
Mütiyupata quexetaxeviriya  
yunaime.

# CARASIYATARI

## Que Mütivarunü'airi Papuru

---

### Vaürisica

**1** Ne Papuru nenü'ariecametütü necanixevaürütüaca. Que nemütühürütüarie, teüteri mepücanesiheyenü'a, tevi pücanesi'ucaye. Qesusi Cürisitu püta caneniucayeni nü'ariecame nemayanicü. Que mü'ane 'umieriecu menutanieritüa, Cacaüyaritütü müta'uquiyari, mücü müpaü canetiniuhürütüani. <sup>2</sup>Ta'livama nehamatü memü'uva tanaitü tecanixevaürütüaca xeme xemeyutixexeüriva Carasiya cuieyarisie miemete müpaü te'utiyuatü. <sup>3</sup>Que mü'ane müta'uquiyari Cacaüyaritütü, que mü'ane müti'aitame Qesusi Cürisitutütü, xüca 'aixüa mete'u'iyarini xehesie mieme, xüca mexepitüaca xemüca'uximatüariecacü yu'iyarisie. <sup>4</sup>Mücü Qesusi canihücütüni que mü'ane müyuyetua, tame 'axa temüteyurie temüxünarienicü. 'Ayumieme pütasitavicueisitüani, hicü miemetexi 'axa memüteyurie vasata te'u'uvacacu. Müpaü catininaqueni tacacaüyari

ta'uquiyari. <sup>5</sup>Visi queticuxaxasivani 'iya hepaüsita yuheyemecü. Müpaü xeicüa cani'aneni.

### Xevitü niqi pumave 'aixüa manuyüne

<sup>6</sup>Nepü'iyarixi yanetimaitü yapaucua xemüyupatarümecü. Xenicu'eirieni que mü'ane müxe'uta'ini, Cürisitu 'aixüa tiuca'iyaricacu. Xeteniuviya niuqui yücü manuyünesie püta. <sup>7</sup>'Iya niuqui pücahücü 'aixüa manuyüne. Masi hipatü 'amepu'uva mexexamurietü me'ipatacutü niuqui 'aixüa manuyüne Cürisitu hepaüsita. <sup>8</sup>Sepanetü tame, sepa taheima mieme tupiri, xüca xecuxaxatüvanique niuqui 'aixüa niu manuyüne, xüca niuqui temüxecuxaxatüvacaipaü ca'anuyünenique, püxani'erivaniqueyu 'iya. <sup>9</sup>Que temutiyuanecai meripaü, tavari hicü que nemaine, xüca xevitü xecuxaxatüvani, xüca niuquieya xemitanaqu'i'eripaü ca'anuyüneni, quexani'erivani. <sup>10</sup>Merücüte, 'ipaü neticuxatatü, queri neticuvaune teüteri que

memünetenaqui'eriecacü. Cacaïyari püta que münetinaqui'eriecacü nepüticuvaune. Que netivanaqui'asitüamücü teüteri. Xüca nevarunaqui'asitüanique teüteri hicü, Cürisitusie mieme ti'uximayatame nepücahü cütüniqueyu.

**Papuru que müti'uximayacai**

<sup>11</sup>Ne'ivama, müpäü nepütixehécüatüaniqueyu 'icü niuqui 'aixüa manuyüne nemücuxata hepaüsita. Mücü niuqui tevi pücaveviyaya. <sup>12</sup>Neri quepauca nemitanaqui'eri, tevi pücanesiyetui. Nepeitima tevi caneti'üquitüacacu. Qesusi Cürisitu masiücütü 'ayacu püta nenitanaqui'erieni.

<sup>13</sup>Camüsü, xemeri xepu'enana que nemüticuyeicacai meripai, Huriyusixi vayeiyarisie netiviyatü. Ne cuini mieme nepüvataveviyacai Cacaïyari teüterimama memüyutixexeürivacai. Nepüvaruca'unacai. <sup>14</sup>Huriyusixi vayeiyarisie netiviyatü nepanuyehaitürivecai yumüireme ne'ivama vahüxie nehépai päümeme viyari memühücai nenuivarisie miemete, masi yemecü nenevaüriyatü netusima vayeiyaricü. <sup>15</sup>Masi que mü'ane münesi'upataxü necatinuivavecacu cuxi, que mü'ane 'aixüa tiuca'iyaritü münesi'uta'ini, mücü Cacaïyari, 'ana ninaquecaitüni <sup>16</sup>yunive masiücüme mayeitüanicü yanetimaicacu, hepaüsitana nemüticuxatanicü nuivarite memücahuriyusixi vasata. 'Ana teüteri memüvaite memüxuriyate

xeicüa 'asinepücativarahüavecai. <sup>17</sup>Müme nü'arisixi memühümetücai yanecatihüritüarievecacu cuxi, müme vahesüa nepücahetüa Querusaremesie. Masi 'Araviya cuieyarisie necaneyani cuitü. 'Arique tavarı Ramasicu necaninuani.

<sup>18</sup>'Arique haica viyari 'utixücu, Querusareme neneyani, nemeitimanicü Sepaxi. Tamamata heimana 'auxüme tucari nepuyuri hesüana. <sup>19</sup>Hipame nü'arisixi nepücaharexei, Cacuvu xeicüa Ti'aitame 'ivaya nepexei. <sup>20</sup>Camü, Cacaïyari hüxie, nepücati'itava que nemütixeu'utüiri.

<sup>21</sup>'Arique nepetüa Siriya cuieyarisie Sirisiya cuieyarisie. <sup>22</sup>Müme Cürisitusie meteviyatü memüyutixexeürivacai Cureya cuieyarisie, müme mepücanesihetimaivavecai cuxi. <sup>23</sup>Müpäü mepüte'enanacai xeicüa, quename vaniu, que mü'ane mütasitaveviyacai meripai, mücü ticuxata hicü niuqui 'aixüa manuyüne tita yuri temüte'erie hepaüsita, quename vaniu ticuxata tita 'anapai mütica'unamücücai hepaüsita. <sup>24</sup>'Aixüa meniutiyanecaitüni Cacaïyari hepaüsita necümana.

**Hipatü nü'arisixi que memüteheitima Papuru**

**2** 'Arique tamamata heimana nauca viyari 'utixücu, tavarı neneyani Querusareme Verunavematü, Titu ne'avitütü. <sup>2</sup>Mana nepetüa Cacaïyari masiücüme mayeitüacü mana nemümiécü. Tahücüate te'ayetecacu



mamarivavemete vahamatü, netinivarutaxatüani niuqui 'aixüa manuyüne, que nemüticuxata nuivarite memücahuriyusixi vasata, capa xüanacüa 'ayanicü ne'uximayasica que nemütimie que nemütimiecaita. <sup>3</sup>Peru Titu, sepa nehamatü muyeicacai, sepa Cüriyecu mühücü, pücaheuyevecai mücü mü'inüaritüarienicü Huriyusixi vaxitequiyacü, <sup>4</sup>sepa memi'inüaritüacucai hipatü yacü 'ivamarixi tahepaü memüteyuniniütüva. Müme menatahaxüani tasata que memütatehupienicü tame que temütetanü'a Cürisitu Quesusisie teteviyatü. Mepütasiviyacucai vayeiyarisie mieme temüte'uximayacacü. <sup>5</sup>Müme heiva xüca tevaru'enienique que memütate'aitüacucai, xeme xepücayuhayeveaqueyu xeheixeyatü niuqui 'aixüa manuyüne, yuri que müraine.

<sup>6</sup>Peru mamarivavemete, Cacaüyari yücü mücattivaxeyiacü teüteri, 'ayumieme neta 'asinepücatine'iyaritüa que memü'anencai meripai. Müme mamarivavemete tixaütü mepücate'utihüpacai neniucü hesie. <sup>7</sup>Masisü müpaü metenimaicaitüni nemuhürütüarienicü niuqui 'aixüa manuyüne nemütivataxatüanicü müme xitequiyacü memüca'inüasie, yaxecüa Pecuru que mütiuhürütüarie mütivataxatüanicü Hüriyusixi xitequiya 'inüariyari memexeyia. <sup>8</sup>Müpaü metenimaicaitüni, que mü'ane micuyütüva Pecuru mütanü'arienicü müme

memüxitequie vahesüa, mücüta canenicuyütüvani ne, nuivarite memücahuriyusixi vahesie mieme.

<sup>9</sup>Müpaü metemaitü que nemütiumiquiva Cacaüyari 'aixüa tiuca'iyaricacu, Cacuvu Sepaxi Vani, 'iquisaraüte que memütemarivacai, müme mepütasi'umayüa ne Verunave, temütaxevi me'utiuyatü, xeme nuivarite memücahuriyusixi vahesüa xemüyehücü, tameri Huriyusixi memüxitequie vahesüa temüyehücüta me'utiuyatü, <sup>10</sup>xemüvara'erivanicü xecüa puvüresixi me'utiuyatü. Nesietü 'aixüa 'iyaricü müpaü nemütüyurienenicü nepünevaüriya.

**Papuru que müreitati  
Pecuru 'Anutiyuquiyasie**

<sup>11</sup>Masi quepauca Sepaxi munua 'Anutiyuquiyasie, tahüxie te'utinenieretü nepeye'uniecai, meuyevecaicü hesiena mütiuhüivanicü. <sup>12</sup>Hipatü Cacuvusüa miemete meca'axüavavecacu cuxi, nuivarite memücahuriyusixi vahamatü pütiüticua'acai. Masi me'u'axüacu müme, niyuti'imatüyani. Püyupatanecai vaniuxixiya macatü müme xitequiya 'inüariyarisie memüteviyacaicü. <sup>13</sup>Hipatü Huriyusixi yacü mepüte'uyuri hepaüna. Yaxecüa Verunave püti'irüviyarie yacü meteyuriecacu. <sup>14</sup>Perusü quepauca ne müpaü nemütivaruxe, ta'aurie me'axüriecu, heiseriemecü meca'u'uvacacu niuqui 'aixüa manuyüne hepaüsita, yuri que müraine, müpaü nepütitahüavixü Sepaxi

yunaime vahüxie, 'Ecü Huriyu pehöcütütü, xüca pe'uyeicani nuivarite memücahuriyusixi vahepaü peyüanetü, Huriyupaü pecayüanetü 'ecü, titayaricuta väüriyarica petivapitüa nuivarite memücahuriyusixi, Huriyusixi vahepaü memüyüacacü.

**Yunaime vahepaü, Huriyusixi teüteriyari yuri mete'erietü xeicüa mepütaviceisitüarieni**

<sup>15</sup>Tame que temüte'ununuivaxü, Huriyusixi tecanilhümetüni, nuivarite memücahuriyusixi, yamemücateyurie 'inüari niuquiyari que müti'aita, tame tepücahüme. <sup>16</sup>Peru tame müpaü tepütehetima, tevi xüca tiyurieneni 'inüari niuquiyari que müti'aita, mücücü heiserie pücapitüarieni. Masi xeicüa xüca yuri ti'erieca Cürisitu Qesusisie, mücücü püta heiserie canipitüariemücü. 'Ayumieme tameta vahepaü yuri tepüte'uta'eri Cürisitu Qesusisie, heiserie temüpütüarienicü yuri tete'erietü Cürisitusie. Xüca yatete'uyurienique 'inüari niuquiyari que müti'aita, mücücü masi heiserie tepücapitüarieniqueyu. 'Utüaricayari müpaü paine, Haquevasü heiserie pücapitüarieni yatiyurienetü 'inüari niuquiyari que müti'aita.

<sup>17</sup>Tameri müpaü tepütetavaüriya, heiserie temüpütüarienicü. 'Ayumieme Cürisitusie teteniviyanı. Mericüte, xüca müpaü tetetavaüriyani, quesü yünü xüca vahepaü temasiücünü yatemücateyuriecü, 'inüari niuquiyari que müti'aita.

Cürisitu 'axa teyuruvamete tarayeitüa. Pücatixaüsietü. <sup>18</sup>Xüca tavari ne'enuquitüanique tita nemütiuca'unaxü, 'axa tiyuruvamepaü nepünehecüataniqueyu masi, tita nemüranuquitüamücü yaxeicüa müpaü mainecü. <sup>19</sup>Neri yanetiuyurieca que müti'aita 'inüari niuquiyari, ne'icu'eirieca, necaniumüni. 'Ayumieme 'inüari niuquiyari tavari pücaneti'aitüani Cacaüyarisie mieme püta nemayeyurinicü. <sup>20</sup>Cürisitumatü nenumierieni curuxisie. Hicüri que nemürayeyuri, ne necümana nepücahücü que mü'ane mayeyuri. Cürisitu masi canihücütünü mayeyuri nehesie tiviyatü. Que nemürayeyuri hicü nevaiyarisie, nepayeyuri yuri neti'erietü Cacaüyari nu'ayasie, que mü'ane munesinaqui'erie, que mü'ane nehesie mieme müyuyetua, mücü hesie. <sup>21</sup>Nepüca'ixani'eri Cacaüyari 'aixüa que mütiuca'iyari. Xüca heiserie 'upitüarienique yatiyurienetü que maine 'inüari niuquiyari, Cürisitu xüanacia xeicüa canimüniqueyu.

**Cacaüyari 'Iyarieya caniutanaqui'eriva yuri ti'eriecacu**

**3** Cari 'asixepücatemate Carasiyatari. Quepai püxe'utiquevayaxü, xecunuütüatü para yaxemücatecahunicü tita yuri mürainesie. Xeme yaxetemaicacu, Qesusi Cürisitu putahecüasie, curuxisie que mütiumerie. <sup>2</sup>Mericüte, 'ipaü xeicüa nepütixeta'ivavyaqueyu. 'Iyari xete'utanaqui'eri

yaxemüte'uyuricü 'inüari niuquiyari que müti'aita. Xepitanaqui'eri nusu yuri xemüte'uta'ericü que xemüte'u'enana. <sup>3</sup>Panasi 'asixecatemate. 'Iyarisie xeteviyatü, xepisutüa yuri xete'erietü. Hicü vaisie püta xeteviyatü, que xete'aye'axüani. <sup>4</sup>Cuini mieme xete'u'itüarie, yacü xeicüa. Xüari yacü xepüca'u'itüarie. <sup>5</sup>Hicümüsüari, 'iya que mü'ane 'Iyari müxemicua, que mü'ane türücaüyemecü müxecuyuitüva, müpaü tiyuriene yaxemüte'uyuricü 'inüari niuquiyari que müti'aita. Müpaü pütüyuriene nusu yuri xemüte'eriecü que xemüte'u'enana.

<sup>6</sup>Yaxeicüata 'Apurahami yuri tinita'eririeni Cacaüyari. 'Ayumieme heiserie hexeiyaame cani'erivacaitüni. <sup>7</sup>'Ayumieme müpaü xecatenimaica, müme 'amemu'uva yuri mete'erietü, müme 'Apurahami mecanixiüyarimamatüni.

<sup>8</sup>'Utüaricayarisie meripai müpaü tinimasiücücaitüni, nuivarite memücahuriyusixi yuri metenita'erieniquecaitüni, mücücü Cacaüyari heiserie nivapitüaniquercaitüni.

'Ayumieme niuqui 'aixüa manuyüne 'Apurahami meripaitü müpaü tiniutahüavarieni, 'Acümana yunaitü nuivarite mepütemavieritüarieni.

<sup>9</sup>'Ayumieme müme 'amemu'uva yuri mete'erietü, müme mepütemavieritüarie, que mü'ane 'ana yuri müti'eriecaimatü 'Apurahamimatü.

<sup>10</sup>Müme püta 'amemu'uva yametyurietü que müti'aita 'inüari

niuquiyari, mücüsie meteviyatü, müme mecanixani'erivani. Müpaü catine'uca, Mecanixani'erivani yunaitü yamemücatecahu, nai que müre'uxa 'inüari xapayarisie.

<sup>11</sup>Müpaü catinihecüaca, Cacaüyari hüxie ni xevitü heiserie pücapitüarie 'inüari niuquiyarisie tiviyatü. Müpaü püta panuyüne, Que mü'ane heiserie mupitüarie yuri ti'erietü canayeyuricamücü. <sup>12</sup>Peru que mü'ane 'inüari niuquiyari mexeiya, mücü 'apüca'uyeica yuri ti'erietü. Müpaü panuyüne masi, Que mü'ane yamütüyuriene que maine, mücü canayeyuricamücü xüca yatüyuriene.

<sup>13</sup>Cürisituri cataniunaneni, cataniuxüna temücaxani'erivanicü 'inüari niuquiyari mainepaü. Mücü püta canituxani'eriva tahesie mieme, que müre'uxa, Yunaitü cüyesie memacavüre menixani'erivani.

<sup>14</sup>Müpaüri tiniuyurieni, nuivarite memücahuriyusixi memüta'axiyarienicü hepaüna, 'Apurahami que mütiutahüavarie, mümeta meyutemamavietü memacü necü, Qesusi Cürisitusive meteviyatü. Müpaüta tiniuyurieni temitanaqui'erienicü 'Iyari yuri tete'erietü, que temüte'utahüavarie temeixeianiquercaicü.

**Cacaüyari que mutayü que mütatipitüaniquercai, 'inüari niuquiyari caxuavecacu cuxi**

<sup>15</sup>Ne'ivama nepütixetaxatüaniqueyu, que memüteyurie teüteri neticuxatatü. Tevi xüca tiyuta'utüirieni, tita

türiyamama vahesie mütnaqueni  
'utaitü, xüca 'aixüa 'aneni que  
maine, xevitü masi xüanacüa  
pücaheyeitüani türatuya, hesiena  
pücatihüpani. <sup>16</sup>Meriçüte,  
'Apurahamiri, que mü'ane hesiena  
müyeyaniquecaita, que maine  
'utüaricayari, müme müpaü  
mepüte'utahüavarie tita vahesie  
mütinaqueni quecai. Pücafaxatacai  
müme hesiena memüyecüne quecai,  
yumüireme vaxatatu. Yuxevime  
püta nixatacaitüni hesiena  
müyeyaniquecai, Cürisitu xatatü.  
<sup>17</sup>Meriçüsü que nemaine, Cacaüyari  
türatu niutavevieni Cürisitu  
hepaüsita. 'Inüari 'ariquemücaque  
caninuani, nauca sienituyari  
heimana xei teviyari heimana  
tamamata viyari 'anuyeyacu.  
'Ayumieme pücayüve xüanacüa  
meyeritüanicü niuqui, Cacaüyari  
que mütitahüavixü hesiena  
mütinaqueni quecaicü. <sup>18</sup>Xüca  
hesiena tinaqueni que 'inüari  
niuquiyarisie tiviyacacu, yacü  
xeicüa pütitahüavequeyu quename  
'iminiquecai. Perüsü Cacaüyari  
'aixüa tiuca'iyaritü tiniunaquisitüani  
'Apurahamisie, müpaü titahüaveca  
hesiena mütinaqueni quecaicü.

<sup>19</sup>Meriçüsü, titayari  
tixuave 'inüari niuquiyari.  
Mücü tiniuhüiyani niuquisie,  
mümasiücünicü teüteri que  
yamemücatecahu. Niuquisie  
tiniuhüiyani mexi canuavecai que  
'ane 'Apurahamisie müyeyaniquecai,  
que mü'ane müpaü mütiutahüavarie  
que mütimiqueni quecai. Cacaüyari  
tupirisiximama mepuhüritüarie  
memiyetüanicü 'inüari. Niucameta  
caniyetuiriyarieni teüteri vahesie

mieme, müme meheixeyatü  
memacü necü. <sup>20</sup>Hicü tevi xüca  
yücümama yüaneni, pücaheiyehüva  
niucame. Peru Cacaüyari yuxevitü  
caniyüaneni.

#### Titayari 'inüari niuquiyari tixuave

<sup>21</sup>Meriçüte 'inüari niuquiyari  
catiyucüitüve mücümätü,  
Cacaüyari que mütitahüavixü que  
mütiminiquecaicü. Pücatixaüsietü.  
Xüca 'inüari niuquiyari  
te'upitüarienique, müyüve tucari  
mütasipitüanicü, xasunimecü  
heiserie tepexeyaniqueyu  
'inüari niuquiyarisie teteviyatü.  
<sup>22</sup>Utüaricayari masi  
nivananütaxürüvani yunaime,  
vahecüatüatü que memütexani'eriva  
'axa memüte'uyuricü. Müpaü  
mütivananütaxürüvacü, 'ayumieme  
neuyeveca yuri memüteta'erienicü  
Qesusi Cürisitusie, para  
müme yuri memüte'erie müpaü  
memütepitüarienicü, Cacaüyari que  
mutayü que mütivaminiquecaicü.

<sup>23</sup>Titasie yuri temüte'erie 'acuxi  
canuavecacu, tenanütaxürüyacaitüni,  
'inüari niuquiyari tasi'üviyacacu.  
Tepanutanamiecai yuri  
temüteta'erienicü 'arique,  
masiücütü mürayaniquecaicü  
titasie yuri temüteta'erieniquecai.  
<sup>24</sup>'Ayumieme 'inüari niuquiyari  
ti'uximayatamepaü cani'anecaitüni,  
tahepaüsita mühüritüariecai  
mexi tetürütücai, Cürisitusie  
teteviyatü temacü necü, heiserie  
temüpitüarienicü yuri tete'erietü.

<sup>25</sup>Hicürixüa caninuani titasie  
yuri temüte'erie. 'Ayumieme  
ti'uximayatame 'ari pücahüritüarie  
tahepaüsita.

<sup>26</sup>Yuri xecateni'erieca,  
'ayumieme Cacaüyari nivemama  
xecanihümetüni, Cürisitu  
Qesusisie xeteniviyanı.

<sup>27</sup>Queyupaümetü xemuca'üyarie  
Cürisitusie xeteviyatü, xeme  
xecaniyupata, Cürisitupaü  
xe'anenetü xemacüneçü.

<sup>28</sup>Hicürixüa sepa mühuriyu  
sepa mücüriyecu, sepa  
müti'uximayatame sepa  
mütiyunü'avame, sepa mü'uqui  
mü'uca, yunaitü xecaniyuxevini  
Cürisitu Qesusisie xeteviyatü.

<sup>29</sup>Mericsü, Cürisitusüa  
xecanimiemetetüni. 'Ayumieme  
que mü'ane 'Apurahamisie  
müyeyaniquecai, xeme  
xecanihümetüni. Xehesie  
pütünaquixü que mütiutahüavarie  
'iya.

**4** 'Ipaü nepaine, quiecame  
nu'aya mexi nunusitüni,  
ti'uximayatamepaü cani'aneni, sepa  
naitü mütipinieya, sepa hesiena  
mütünaquixü. <sup>2</sup>Hipatü masi  
meni'aitüaca mexicuxi, heiserie  
menexeyani piniteya hepaüsita.  
'Arique tucarieya naye'amücü,  
'uquiyarieya que mutayü. <sup>3</sup>Tameta  
yaxeicüa, quepauca temütüritücai,  
vaüriyarica tetenyuriecaütüni que  
mütatiu'aitüvacai 'üquitüarica  
cuiepa mieme, hecuamete  
que memüte'üquitüarie. <sup>4</sup>Peru  
quepauca tucari 'aixüa mü'ane  
maye'a, 'ana Cacaüyari yunive  
caneyenü'ani, 'ucasie müyenuivaxü,  
müti'aitüaricai 'inüari niuquiyari  
que müti'aita. <sup>5</sup>Caneiyenü'ani  
müvananenicü müme  
memüte'aitüarie 'inüari niuquiyari  
que müti'aita, vaxünaque.

Caneiyenü'anita, tame nivemama  
temacüneçü.

<sup>6</sup>Mücü meta, Cacaüyari yunive  
'iyarieya neyenü'ani, ta'iyarisie  
müyecanicü müpaü tiuhivatü,  
Nequemasi, ne'uquiyari. Mücücü  
canimasiüçünü xemünivemamacü.  
<sup>7</sup>Mericsü hicürixüa  
ti'uximayatame pepücahücü.  
Pecaninu'ayatüni püta. Xüca  
penu'ayatüni, tita Cacaüyarisüa  
mütümieme catiniunaque 'ahesie,  
müpaü pe'aneme mümasi'ayeitüacü  
Cürisitu.

**Ta'aurie xepüca'axürieni tavari  
xemüteta'aitüaricü**

<sup>8</sup>Anapai xemüca'imaicacü  
que mü'ane mücacaüyari,  
vaüriyarica xecateniyuriecaütüni  
que memütexe'aitüacai müme  
memücauyuricacaüyarixi.  
<sup>9</sup>Hicürixüa xecaneitimani que  
mü'ane müyuricacaüyari, masisü  
püta, Cacaüyari canixehetimani  
xeme. Mericüte, titayari  
ta'aurie xete'axüri, tavari mücü  
'üquitüaricasie xeteviyacutü,  
hecuamete que memüte'üquitüarie,  
muverani, tixaütü mücarexeiya.  
Titayari xeteyuvaüriya, tavari  
vaüriyarica xemüteyuriecacü que  
mütixe'aitüa mücü 'üquitüarica.  
<sup>10</sup>Carı tucari xepüvevie, semanasie,  
meserisie, 'ixüarari matineicasie,  
visie. <sup>11</sup>Necanimaca, müpaü  
neticu'erivatü, xüari xüanacüa  
nayani que nemütüine'uxitüa  
xehesüa.

<sup>12</sup>Ne'ivama, 'ipaü  
nepütixetavavirieniqueyu. Nehepaü  
xeteyurietü xequenayuyeitüa,  
ne xehepaü netiyurienetü

nemaneyetitüacü. Xeme 'axa xepücanesi'uyuri. <sup>13</sup>Masi müpaü xepütemate, quepaucua matüaripai nemütixe'utaxatüa niuqui 'aixüa manuyüne, müpaü nepütüyuri nemüticuyecaicü nevaiyarisie.

<sup>14</sup>Sepa nemüxecuanivesitüa müpaü ne'aretü nevaiyarisie, xeme xepücanesi'utitave'eri xepücanesi'utixani'eri.

Xepünesi'utanaqui'eri püta, Cacaüyari tupiriyepaü, Cürisitu Quesusipaü.

<sup>15</sup>Xeyutemamaviecame xecaniyu'eriecaitüni 'ana. Queri 'uyü. Ne nepütihecüata que xemütüyumaicai que xemütüyuvaüriyacai. 'Asita xüca xeyüvavenique, yühüxi xepüvatituniquyeu 'ana, xepünesiminiquyeu.

<sup>16</sup>Xeneüquixivi neratüa, tita yuri müraïne nemütixe'utahecüatüacü.

<sup>17</sup>Müme meniymexüitüaca mexehive'erietü, peru müpaü que memütüyuriecü, 'aixüa xepüca'itüarieni. Masi mepüxecunaniquyeu xemüpasienicü xevahive'erietü müme xEICÜA. <sup>18</sup>Mericüsü 'aixüa cani'aneni yuheyemecü xüca hive'erievani para 'aixüa mü'itüarienicü, sepa xehesüa nemücaheycaniqu ne. <sup>19</sup>Xeme xepünenivema, peru xehesie mieme tavarı necatinicüineni 'uca mütiniverümpaü, mexi Cürisitupaü xe'ananetü xetiverirüme. <sup>20</sup>Xüca tüma xehesüa ne'uyeicanique hicü. Xüari yücü nepüti'eniürüicüniquyeu que nemaine. 'Asinepücatimate que nemütüyurieni xehepaüsita.

### Sara Hacarimatü 'üquisica que memüte'acü

<sup>21</sup>Mericüte, xeme xemüyuvaüriya xemüte'aitüariecacü 'inüari niuquiyari que müti'aita, 'ipaü xEICÜA xequeneteneutahüavi. Xecateheitimaivave 'inüari niuquiyari que maine. <sup>22</sup>Müpaü catine'uca, 'Apurahami yuhutame nivarexeiyacaitüni yunivema. Xevitü ti'uximayatameyasie caniyenuiva, xevitüta müyünü'asie tiyenuivaxü. <sup>23</sup>Que mü'ane ti'uximayatamesie müyenuivaxü, mücü canitünuiva teüteri que memüte'ununuiva, vaisie xEICÜA. Que mü'ane müyünü'asie müyenuivaxü, mücü masi canitünuiya Cacaüyari müpaü mütitahüavixücü 'Apurahami, que mütinüivaquecaicü. <sup>24</sup>Mericüsü, mücü naitü que mütiyü, 'üquisica canayani. 'Ucari que mütivaxata, türatute canixatani hutame. Xevitü türatu yemurisie catiniutaxatüarieni, Sinahi mütitevasie. Müme mücü türatusie memüyenunuiva, vaüriyarica te'uximayatamete mecanacünicuni. 'Uca Hacarı mütitevacai canixatani. <sup>25</sup>Mücü Hacarı, yemuri canihücütünita 'Araviya cuieyarisie, Sinahi mütiteva. Yaxeiciata Querusareme canihücütüni, mücü quiecarı hicü 'emuve. Vaüriyarica catini'uximayaca, nivemamata vaüriyarica meteni'uximayaca. <sup>26</sup>Xevitü püta Querusareme taheima mieme, mücü müyünü'a canihücütüni, tame canitavarusitüni. <sup>27</sup>Müpaü catine'uca,

Quene'atemavieca 'luca  
 pemücaniveve,  
 Türi pemücvarexeiya.  
 Queneutacuica,  
 Queneutahiva 'luca  
 pemücatiucuinixü.  
 Que mü'ane türi mücvarexeiya,  
 Mücü masi yumüireme  
 püvarexeiyani yunivema,  
 Que mü'ane mürecacüna  
 Hipame xeicüa püvarexeiyani.

<sup>28</sup>Xeme ta'ivama, Cacaüyari  
 müpaü mutayücü 'ayumieme  
 xenitutinunüiva, yaxecüa que  
 mütiutinüivaxü 'Isahaqui,  
 Cacaüyari yamutayücü. <sup>29</sup>Mericüsü,  
 'anapai que mü'ane mutinüivaxü  
 que memüte'ununüiva teüteri  
 xeicüa, mücü niveiyacaitüni que  
 mü'ane mutinüivaxü que mutayü  
 'Iyari. Hicüta yaxecüa cani'aneni.  
<sup>30</sup>Peru que haine 'utüaricayari.  
 Müpaü paine, Quenivarayenü'a  
 ti'uximayatame nu'ayamame.  
 Ti'uximayatame nu'ayasié  
 tixaitü pücatinaque. Müyünü'a  
 nu'ayasié püta catininaquimücü  
 naitü. <sup>31</sup>'Ayumieme ne'ivama,  
 ti'uximayatame tepücanivemama.  
 Müyünü'a püta tecaninivemamatü  
 ni.

**Xequeneuti'uti 'aixüa,  
 xemuxünariecü**

**5** Cürisitu cataniuxüna  
 temütanü'acacü 'iyapaü.  
 'Ayumieme xequeneuti'uti  
 'aixüa. Tavarí cüye  
 xepüca'anuyetequiyarieni,  
 vaüriyarica xemüte'uximayacacü.  
<sup>2</sup>Camüsü ne Papuru müpaü  
 nepütixehécüatüa, xüca  
 xeyu'inüaritüani Huriyusixi

vaxitequiyacü, Cürisitu  
 pücxeparevieni. <sup>3</sup>Tavari  
 nepüvahecüatüa yunaime  
 teüteri memüyu'aita müpaü  
 memüte'inüaritüarienicü,  
 caneuyevéca yamemütecahunicü  
 nai que müti'aita 'inüari  
 niuquiyari. <sup>4</sup>Xeme müxenaque  
 heiserie xemüpitüarienicü  
 'inüari niuquiyarisie xeteviyatü,  
 xecaniupasieni, Cürisitusie  
 xepücateviya. Xecanitatümaiya  
 Cacaüyari 'aixüa que mütiuca'iyari.  
<sup>5</sup>Tame püta teta'icuevatü müpaü  
 yuri teteni'erieca, tepaye'axüani  
 heiserie temüpitüarienicü xüca yuri  
 tete'erieca, 'Iyari tasipareviecacu.  
<sup>6</sup>Cürisitu Qesusisie xüca  
 tiviyani, sepa mü'inüaritüarie  
 sepa müca'inüaritüarie, 'aixüa  
 caniyümücü xüca yuri ti'erieca  
 xeicüa. Peru yuri que müti'erie,  
 tiyucanaqui'erietü caniyüanemücü.  
<sup>7</sup>'Aixüa xepüte'unanausacai.  
 Que mü'ane püxe'utiquetamüraxü,  
 que mü'ane püxe'ucunüitüa  
 yaxemücatecahunicü tita yuri  
 mürainesie. <sup>8</sup>Müpaü yuri que  
 xemüte'uta'eritüarie, mücü que  
 mü'ane müxe'iniesie pücamieme.  
<sup>9</sup>Ticuxanariyame 'esipemécü  
 niutacuxanariyarieni pa naitü.  
<sup>10</sup>Ne müpaü yuri netini'erieca  
 Ti'aitamesie xehepaüsita,  
 quename xecayupata, yaxecüa  
 xemüteyumaicacü meripaipaü.  
 Masi que mü'ane müxemuina,  
 tatacuri que mütipitüarie, müpaü  
 catiniuca'enivamücü sepa que  
 müpaicü.  
<sup>11</sup>Neri ne'ivama, xüca müpaü  
 cuxi neticuxatanique, quename  
 heuyevése mü'inüaritüarienicü

xitequiyacü ne'utaitü, titayari  
netitaveiyarieniqueyu cuxi.  
Niuqui Cürisitu que mütiümierie  
curuxisie que manuyüne, mücü  
'ari pücvavarucununuitüvaniqueyu  
teüteri, xüca müpaü  
neticuxatanique. <sup>12</sup>Mecuxi  
memanuyuxiteni müme müpaü  
memütexexamurie.

<sup>13</sup>Xeme ne'ivama,  
xeniuta'inierieni teyunü'avamete  
xemacünecü. Perusü  
xeicüa, que xemüteyunü'a,  
xepüca'ipitüani yuva'yari  
misütüanicü xecuyuitüvatü.  
Masi xeteyucanaqui'erietü  
xequetene'uximayaca  
yuxexuitü, yunaima vahesie  
mieme. <sup>14</sup>Caneye'atüamücü  
'inüari niuquiyari naime, xüca  
xei niuquiyarisie yaticamieni.  
Mücü niuqui müpaü panuyüne,  
Pepinaqui'erieca 'ahepaü tevi,  
yaxeicüa que pemüti'anaqui'erie  
'ecü. <sup>15</sup>Masi xüca xeyucümeni, xüca  
xeyuticuaiximeni, yumarima 'aixüa  
xeyutixütüani.

**Que mütiyurieneni yuva'yarisie  
tivyatü, que mütxixuavereni  
'Iyari 'icuyuitüvacacu**

<sup>16</sup>Ipaü nepaine, xequeneu'uvani  
'Iyari xecuyuitüvacacu. Müpaü xüca  
xeteyurieca, xepücaheye'atüani tita  
xevaiyari mütihive'erie. <sup>17</sup>Tavaiyari  
catiniyucahive'erieca mücü 'Iyari  
que mücatiyucahive'erie. 'Iyarita  
tiniyucahive'erieca tavaiyari  
que mücatiyucahive'erie.  
Mecanayuye'unieca,  
yaxemücateyuriecacü que  
xemüteyuvaiüriya. <sup>18</sup>Perusü  
xüca 'Iyari xecuvitüneni,

xepücate'aitüarieca 'inüari  
niuquiyari que müti'aita.

<sup>19</sup>Catinimasiücünü que  
mütiyurieneni yuva'yarisie  
tivyatü. 'Ipaü catiniyurienemücü  
tevi. Que mü'ane mücayü'üya  
müca'yücüna nivacumaüvamücü,  
yacatiniyurienemücü que  
mücati'itiya, que mütiyucahive'erie  
canirucuyanemücü. <sup>20</sup>Tetexi  
canivarayexeyiacamücü,  
tiniyuquevayamücü.  
Tinayuye'uniecamücü,  
niyumienemücü,  
niyumexüitüacamücü  
hipame vahepaüsita,  
niyuhaxüatüacamücü, yuhesie  
mieme xeicüa caniyüanemücü,  
niyuxamuriecämücü, yuxexuime  
vahesie catiniviyacamücü,  
<sup>21</sup>tinayu'ivacamücü,  
tiniyumemivamücü,  
canitavenemücü,  
nicu'ixüaranemücü, müpaü  
'aneneme catiniyurienemücü.  
Mücü hepaüsita, que  
nemütixecu'imaiyacai, yaxeicüa  
netinixecu'imaiyani, müme  
müpaü memüteyurie, vahesie  
pücatinaqueni Cacaüyari  
tiva'aitüvame mühücütünicü.

<sup>22</sup>Peru que mütxuaveriya  
'Iyari, 'ipaü püta tiniyurienemücü  
tevi. Tiniyucanaqui'eriecamücü,  
niyutemaviecamücü,  
yu'iyarisie püca'uximatüarieca,  
tiniuca'enivamücü, 'aixüa  
tiniuca'iyaricämücü, 'aixüa  
nivayurienemücü hipame,  
yacatinicamiemücü que maine,  
<sup>23</sup>yu'iyarisie tixaü pücareuyehüaca,  
caniseüyecämücü tiyu'aitüatü.  
'Inüari pücaxuave mixani'erie,



xüca müpaü tiyurieneni. <sup>24</sup>Müme Cürisitu Quesusisüa memümiemete, müme curuxisie mecanimieni yuvaiyari, mete'uhayevaca que memüteyumaicai que memüteyucahive'eriecai quepaucua yuvaiyarisie memüteviyacai. <sup>25</sup>Mericsü, 'Iyari tasicuyuitüvacacu tecanayeyuyurini.

<sup>26</sup>Yacü xEICÜA tetetamaitü tepücahacüne, tetahaxüatüatü tetehata'ivacutü tepücahacüne.

### Xequenyuparevieca

**6** Peru ne'ivama, xüca tevi 'utaxeiyarieni ta'aurie 'avetü, xeme 'axemu'uva 'Iyarisie xeteviyatü, xequeneheiserietüaca que mü'ane müpaü mütiuyuri, ve'lemete xecayuxatatü yu'Iyarisie. Quene'a'üviya masi, capa pe'uta'inierienicü 'axa pemütiyurienicü 'ecüta. <sup>2</sup>Yuxexuitü xequenivaparevieca hipame yunaime va'icacü. Müpaü xeteyurietü xecaneye'atüacuni Cürisitu 'inüarieya.

<sup>3</sup>Tixaü tihücütüme xüca yu'erieca, peru xüca tixaütü catihücütüni masi, yücümana niyucuanacamücü. <sup>4</sup>Yuxexuitü mequeyu'inüatani que memüteyurie. Mücücü niyutemaviecamücü yuhepaüsita, yuta'inüatame que mütiuyuri yuxaütame, hipatü que memüte'uyuri yacara'erivatü. <sup>5</sup>Yuxexuitü yu'ica meque'atücüni.

<sup>6</sup>Que mü'ane müti'üquitüarie niuqui hepaüsita, mücü queyuxevini que mü'ane müti'üquitüamatü, naima 'aixüa müti'anecü 'iparevietü.

<sup>7</sup>Xepücateyu'irüviyani, Cacaüyari pücayunanaimarinüa. Que

mütiuca'e tevi, müpaü pütü'isana.

<sup>8</sup>Que mü'ane yuvaiyarisie xEICÜA mütiuca'e, vaiyarieya pitixuavitüirieni püniya, 'ica'isanayu. Que mü'ane 'Iyarisie mütiuca'e, 'Iyari pitixuavitüirieni tucari mücaxüve, 'ica'isanayu.

<sup>9</sup>Cümü tepüca'u'uxeni 'aixüa teteyurietü. Tucari 'aye'ayu tepü'isanani xüca teca'amüni mexi cuxi ca'aye'ave. <sup>10</sup>Hicümüsüari que temüteyüvave, 'aixüa tequevayurieca yunaime, masi yemecü müme Cacaüyarisüa memüquiecatari yuri memüte'erie.

### Papuru que mütiyutemaviecai he'erivatü que mütiümierie Cürisitu curuxisie

<sup>11</sup>Neuxei, 'ütüaricate que mütipapa, nemamacü que nemütixe'utüirie. <sup>12</sup>Müme 'aixüa memütexeyarieniqueyu herie, müme mecanihümetüni vaüriyarica memüxepitüa xemü'inüaritärienicü xitequiyacü. Peru müpaü metenyurieca xEICÜA, memücaheutaveiyariexüanicü Cürisitu Quesusi curuxieya hepaüsita. <sup>13</sup>Müme memüyu'aita memü'inüaritärienicü xitequiyacü, ni müme yamepücatecahu 'inüari niuquiyari que müti'aita. Canivanaqueni xEICÜA xeme xemü'inüaritärienicü, müme mücücü memüyutemamaviecacü, meteha'erivatü herie que xemüte'u'inüaritärie. <sup>14</sup>Perüsü ne pücatixaü, yemecü nepücanetemavieca hipame vaücavame nera'erivatü. Tati'aitüvame Quesusi Cürisitu que mütiümierie curuxisie nehe'erivatü,

müciü xeciü nepünetemavieca.  
 Mücü que mütiemie curuxisie,  
 tita cuiëpa mütiemie pütüemie  
 que nemütixeiya. Neta nepüemie  
 'anemüca'uyeicanicü tita cuiëpa  
 mütiemiesie netiviyatü.

<sup>15</sup>Sepa mu'inüaritüarie, sepa  
 müca'u'inüaritüarie, xüca  
 xeciü hecuamecü 'unetüarieni  
 yücü 'anemecü, mücü xeciü  
 neuyevca. <sup>16</sup>Queyupaümetü

'amemu'uva 'icü 'inüaricü  
 püta, xüca meca'uximatüarieca  
 yu'iyarisie, xüca menenimayasieca,  
 müme Cacaüyari 'Ixaherisixi  
 mütaruterüva.

<sup>17</sup>'Uxa'atüni varie xevitü  
 pücanesi'uximatüaca. Nevaiyarisie  
 'inüari nepexeiya Qesusi 'uxaya.

<sup>18</sup>Tat'aitüvame Qesusi Cürisitu  
 xüca 'iteütani xe'iyari, ne'ivama.  
 Müpäü xeciü.

# 'EPESUTARI

## Que Mütivarunü'airi Papuru

---

### Vaürisica

**1** Ne Papuru necanixevaüiritüaca.  
Nü'ariecame necanihücütüni  
Cürisitu Quesusisüa mieme  
müpaü mütinaquecü Cacaüyari.  
Cacaüyari teüterimama  
nenixevaüiritüaca 'Epesusie  
xemütama yuri xemüte'erie  
Cürisitu Quesusisie xemüteviya.  
<sup>2</sup>Cacaüyari müta'uquiyari, Qesusi  
Cürisitu müti'aitameta 'aixüa xüca  
mete'u'iyarini xehesie mieme,  
xüca mexepitüaca yu'iyarisie  
xemüca'uximatüariecacü.

'Aixüa 'aneneme que  
temüte'upitüarie Cürisitusie  
teteviyatü, 'iyarisie mieme

<sup>3</sup>Aixüa queticuxaxasivani  
Cacaüyari, que mü'ane  
Tati'aitüvame Qesusi Cürisitu  
mü'uquiyarieya. Cürisitusie  
teteviyacacu mücü 'aixüa  
cataniuyurieni tasi'upitüaca  
naime 'aixüa mü'ane 'iyarisie  
mieme, muyuavisie mieme  
tasipitüatü. <sup>4</sup>Cuie canetüarievecacu  
cuxi, Cürisitu ha'erivatü 'aixüa  
cataniuyurieni tasi'anayexeiya

hesiena mieme temüpasiecacü,  
tahesie mücarahüivanicü  
tasixeiyacacu. <sup>5</sup>Tasinaqui'erietü,  
meripai yatiyücühüaveca,  
pütasi'ucayasaxü nivemama  
temacüneccü, Qesusi Cürisitu  
yatarayeitüacacu. Caninaqui'aca  
müpaü tiyurienetü. <sup>6</sup>Cataniucayasa  
'aixüa temutiyanenicü  
hepaüsitana, visi que mütatimicua.  
Müpaü pütatiumi, que mü'ane  
münaqui'erivasie temüteviyacü.  
<sup>7</sup>Mücü xuriyaya mutayeuriyacü,  
hesiena teteviyatü tecaniuxünarieni.  
Tecateneuyehüviyarieca  
'axa temüte'uyuri. Müpaü  
catatineuyehüvirieni cuini  
mieme 'aixüa tiuca'iyaritü.  
<sup>8</sup>Tinimüiriyacaitüni tita  
mütiyurienecai tahesie  
mieme 'aixüa tiuca'iyaritü.  
Naimeccü temaivavemete  
catanayeitüaca catanipitüaca  
'aixüa temütecü'erivanicü naime  
hepaüsita, <sup>9</sup>catatinihecüasitüaca  
tita mütinaque. Meripai  
pücatimasiücücai tita  
mütinaque, peru Cürisitu  
ha'erivatü yapütüyuvairiya  
mütatihecüasitüanicü. <sup>10</sup>Müpaü

catinaye'atüaniquecaitüni  
quepaucua tucari 'aixüa  
mü'ane maye'aniquecai,  
nitaxeviriyaquecaitüni naime  
Cürisitusie tiviyacame, naime  
taheima mieme cuiepa mieme.

<sup>11</sup>Mücü meta, мүcüsie  
teteviyatü tecananayexeyarieni.  
Müpaü tepüte'ucayasarie  
teüterimama temacünecü, müpaü  
catiniyuriemücücaitüni meripai,  
müpaü tiniyücüühüavecaitüni  
que mü'ane nai мүticuyuitüva  
yatiyücüühüavetü que  
mütinaque. <sup>12</sup>Tame meri yuri  
temüte'uta'eri Cürisitusie, tame  
tecananayexeyarieni 'aixüa  
temutiyuanenicü 'iya hepaüsita visi  
que mü'ane. <sup>13</sup>Xemeta xecani'enieni  
niuqui yuri maine, мүcü niuqui  
que xemütetavicueisitüarieni maine.  
Hesiena yuri xeteniuta'erieni.  
'Ana xepu'inüariatüarie, 'Iyari  
Mütüyupatacü xepuseyumarie.  
Cacaüyari müpaü putayü  
xemeixeyaniquecaicü мүcü  
'Iyari, <sup>14</sup>mücüta canihücütüni  
tita temütepitüarie hicü  
mieme, мүmasiücünicü tita  
tahesie mütinaque quepaucua  
mütasitaxüna yuteüterima. 'Ana  
'aixüa teniutiyuanecuni 'iya  
hepaüsita visi que mü'ane.

**Que temüte'upitüarie ta'iyarisie  
temütemaivavenicü**

<sup>15</sup>Ayumieme ne neretimaica yuri  
que xemüte'erie Ti'aitame Quesusisie,  
ne'u'enaca que xemütevanaqui'erie  
yunaimе Cacaüyari teüterimama,  
<sup>16</sup>nepücatihayeva pamüpariyusi  
ne'ipitüatü Cacaüyari xehesie mieme.  
Nenenenevietü nepehüave xehesie

mieme, <sup>17</sup>müpaü netinenenevietü,  
Tati'aitüvame Qesusi Cürisitu  
Cacaüyarieya, ta'uquiyari visi  
mü'ane, xüca müpaü tixepitüaca  
yu'iyarisie xemütemaivavenicü,  
naitü мүtimasiücünicü xehesie  
mieme xe'imaicacu. <sup>18</sup>Müpaüta  
nepütinenenevie, yu'iyarisie  
xehecüariviarieme xüca  
xe'imaica tita temütecuevi мүcü  
tasi'uta'iniecu, xemütemaicacü tita  
mütatipitüani, vaüca que mütüpaüme  
visi que müti'ane tita tahesie  
mütinaque Cacaüyari teüterimama  
vahamatü, <sup>19</sup>xemütemaicacü meta  
marivemecü que mütitürücaüye  
tasiparevienique tame yuri  
temüte'erie. Yütürücariyacü müpaü  
caniyüveni, yemecü türücaüyetü,  
<sup>20</sup>yaxeicüa que mütüyuri  
Cürisitusie mieme 'enucuquetüatü  
müquite vasata, yuserieta 'icayetü  
muyuavisie. <sup>21</sup>Mana yunaimе  
vaheima nacaveni teva, мүme  
memüte'aita heiserie memexeiya  
memütürücaivi memüva'uquiyarima,  
sepa que memüteteteva, yunaimе  
vaheima nacaveni, hicü miemete  
vaheima, tucari 'umamiesie miemete  
vaheima. <sup>22</sup>Müpaüta pütüyuri  
naime ra'ivatü mütita'aitacü. Müpaü  
tinipitüani nai мүticuyuitüanicü  
memüyutixexeüriva vahesie mieme,  
tevi mu'uya micuyuitüvapäu  
yuvaiyari. <sup>23</sup>Memüyutixexeüriva  
vaiyarieya mecanihümetüni. Müme  
mecaniutihüniyarieni, vahüniyacacu  
que mü'ane nai mütihüniya naisarie.

**Que temüte'utavicueisitüarie  
Cacaüyari 'aixüa mütiuca'iyaricü**

**2** Xemeta hepaüna  
canixe'anutanieritüani sepa

xemümüquitetücai xeheuyexürietü  
 'axa xeteyurietü. <sup>2</sup>'Anapai  
 xeni'uvacaitüni müpaü xeteyurietü  
 que memüteyurie hicü miemete  
 cuiepa memütama, que mütiyuriene  
 que mü'ane mütiva'aitüa  
 müme heiserie memexeiya  
 'ecapa memanucuneniere.  
 Que mütiyuriene mücü  
 cacaiyari hicü müvacuyuitüva  
 müme memücayuvaüriya  
 yamemütecahunicü, müpaü  
 xecateniyuriecaitüni xeme.  
<sup>3</sup>Müme tevanütü 'anapai  
 tecaniu'uvacaitüni tanaitü que  
 temüteta'ucahive'eriecai vaisie  
 teteviyatü. Que mütinaquecai  
 tavaiyari, que temütetacühüavecai,  
 yatecatenyuriecaitüni. Que  
 temü'anenecai tacümana,  
 tahesie catininaquequecaitüni  
 temühecarienicü, yaxeixüa  
 hipame vahepaü. <sup>4</sup>Masi Cacaiyari  
 vaüca cataninaqui'eriecaitüni,  
 niyatatuacaitüni tasinenimayatü.  
<sup>5</sup>'Ayumieme sepa temümüquitetücai  
 teheuyexürietü, mücü  
 Cürisitumame catananutanieritüani.  
 'Aixüa mütiuca'iyaricü  
 xeputavicueisitüarie. <sup>6</sup>Hamatüana  
 catananucu'uitüani, cataniucayasa  
 muyuavisie Cürisitu Quesusisie  
 teteviyacacu. <sup>7</sup>Tucari 'umamiesie  
 mütihecüatanicü que  
 mütiyatua 'aixüa tiuca'iyaritü,  
 'ayumieme müpaü tiniuyurieni.  
 Yatinihecüatamücücaitüni 'aixüa  
 tasiyurienetü Cürisitu Quesusisie  
 temüteviyacü. <sup>8</sup>Müpaü 'aixüa  
 mütiuca'iyaricü, 'ayumieme  
 xeputavicueisitüarie yuri xete'erietü.  
 Peru que xemüte'utavicueisitüarie,  
 yücümana xepüca'utavicueisitüarie.

Cacaiyari püta yacatinixe'upitüani.  
<sup>9</sup>Tixaütü xemüte'uyuricü  
 xepüca'utavicueisitüarie.  
 'Ipaü nepaine capa xevitü  
 naqui'acacü yücümana. <sup>10</sup>Mücü  
 'ivevarimama tecanühümetüni.  
 Cürisitu Quesusisie teteviyatü  
 tecaniunetüarieni 'aixüa  
 temüteyuriecacü, Cacaiyari  
 meripai que müticaye müpaü  
 teteyurietü temu'uvanicü.

**Curuxisie 'umierieca, 'aixüa  
 que mütiuyuri, 'aixüa  
 temütexeiaryiecacü**

<sup>11</sup>'Ayumieme xequetena'erivani  
 xeme 'anapai que xemü'anenecai.  
 Xepücahuriyusixitücai herie que  
 xemü'anenecai. Müme 'inüasiecate  
 memüte'uyuterüva, müme  
 mecanixetave'eriecaitüni müpaü  
 me'utiyuatü quename xeme  
 vahepaü xeca'inüasievave, müme  
 yuvaïyarisie memeixeyacaicü  
 Huriyusixi va'inüari, mamacü  
 que mütiuxiteque. <sup>12</sup>'Anapai  
 xepücaheixeyacai Cürisitu.  
 Xepüyupatacai 'Ixaherisixi  
 teüteriyari vahepaü heiserie  
 xecahexeyatü. Quiecame heiserie  
 que mürexeiya, xeme xaüsie  
 miemete vahepaü xepü'anenecai.  
 'Asixepücatemaicai tütatute  
 hepaüsita, Cacaiyari que mainecai  
 que müti vapitüaniquecai. Tixaü  
 xepücatecueviecai, Cacaiyari  
 xepücahexeyacai 'ena cuiepa.  
<sup>13</sup>Hicürixüa Cürisitu Quesusisie  
 xeteviyatü 'aura xenacüne  
 xeme teva xemu'uvacai 'ana,  
 Cürisitu xuriyaya mutayeuricü.  
<sup>14</sup>Mücü canihücütüni que  
 mü'ane mütasipitüa 'aixüa

temütetaxeiyanicü. Huriyusixi, mümeta memücahuriyusixi, nivarutaxeviriya yunaime. Quepaucua temataca'uniecai, tesariya varita temuti'ucapaü tecani'anenecaitüni, peru Cürisitu nenuta'una tesariya. <sup>15</sup>Que temüte'ataca'uniecai, cataniunütüani quepaucua mumierie. 'Inüari niuquiyari nanuyeitüani que temüte'aisiecai xexuime 'aisiacü. Müpaü tiniyurieni nuivari yücü mü'ane münütüanicü, tasitaxeviriyaca tame xeme hesiena teteviyacacu, que mütatipitüa 'aixüa temütetaxeiyanicü. <sup>16</sup>Müpaü tiniyurieni meta Cacaüyarimatü 'aixüa temütetaxeiyanicü xei vaiyari tehümetütü. Müpaü catinaye'atüani curuxisie 'umierieca, tasinütüatü temataca'uniecaicü. <sup>17</sup>'Ana nuaca niuqui 'aixüa manuyüne nixecuxaxatüvacaitüni, xeme tevapai xemu'uvacai 'aixüa que xemütexeyarie tameta 'aura temu'uvacai catanicuxaxatüvacaitüni 'aixüa que temütexeyarie. <sup>18</sup>Müpaü mütiuyuricü, tanaitü heiserie tecanexeyiani temaye'axüanicü ta'uquiyarisüa xei 'iyariyarisie teteviyatü. <sup>19</sup>Hicürixüa 'ayumieme xäusie xepücaquiecatari, cücamete xepücahüme. Masi Cacaüyari teüterimama vahamatü heiserie xepexiya, Cacaüyari quie xepüquiecatari. <sup>20</sup>Nü'arisixi texaxatamete que memütécuxatacai, tesariya quitüa miemepaü 'aneme mecaniutavevieni. Vahesie xeteviyatü xecanacüne, qui que mütiveviva tesariya heima. Cürisitu

Qesusitütü canihücütüni sicurita mieme tete 'amünena. <sup>21</sup>Mücüsie tiviyatü canixeviriyarieca naitü müveviya, Ti'aitamesie que mütiviya tuqui payeica Cacaüyarisie mieme müpasie. <sup>22</sup>Xemeta hesiena xeteviyatü xecaniti'uitüarieximeni xei quiyari xemacünecü 'axeicüa, Cacaüyari xetaüta mayecanicü yu'iyaricü.

**Papuru que müti'hürütüariecai  
teüteri memücahuriyusixitücai  
vahesie mieme**

**3** 'Ayumieme nenevieri necanipitüani Cacaüyari. Ne Papuru necanihücütüni que mü'ane Cürisitu Qesusisie mieme nemanutahüiya xeme xemücahuriyusixi xehesie mieme. <sup>2</sup>Xüari xepu'enana que nemütühürütüarie, Cacaüyari 'aixüa tiuca'iyaricacu. Müpaü nepütüipitüarie xehesie mieme. <sup>3</sup>Xepu'enana que mütiuyü quepaucua nemütüi'üquitüarie tita müti'aviesiecai hepaüsita. Cacaüyari yücümana masiücüme canayeitüani. Müpaü ne'utaitü nepütixe'uta'utüiri 'esiva. <sup>4</sup>Que nemainecai, xe'iterüvatü xecaniyüvaveni xemütemaicacü que nemütimaive 'icü niuqui mü'aviesiecai Cürisitu müxata hepaüsita. <sup>5</sup>Meripai teüteri memaniticü vavarita, 'ana müpaü mepücate'üquitüariecai teüteri, hicü masi nü'arisixi memupasie Cacaüyarisie mieme, texaxatametemama meta, müme müpaü mepüte'üquitüarie 'Iyari yativahecüatüacacu. <sup>6</sup>Müpaü mepütehetime, teüteri memücahuriyusixi Huriyusixi

vahamatü yaxaicüa vahesie pütinaque, xei vaiyari mepacü Huriyusixi vahamatü, 'axeicüa mepeixeiya tita Huriyusixi memüte'utahüavarie quename meheixeiyaniquecai müme. Cürisitu Quesusisie meteviyatü müpaü mepu'itüarie niuqui 'aixüa manuyü necü. <sup>7</sup>Neri mücü niuqui hepaüsita nepuhürütüarie Cacaüyari que münetiümü 'aixüa tiuca'iyarütü, yütürücariyacü que münetiuyütüa. <sup>8</sup>Merücü sepa yunaime Cacaüyari teüterimama vahepaü nemücave'eme, 'aixüa tiuca'iyaricacu müpaü nepütümi quie, niuqui 'aixüa manuyüne nemüvacuxaxatüvanicü hipame nuivarite müpaü ne'utaitü, vaüca que mürexeyia Cürisitu, yatemücatemaivavepaü. <sup>9</sup>Müpaüta nepütümi quie, nemütivahecüasitüiyanicü yunaime tita Cacaüyari mütiyurieniquecai. Müpaü pücatimasiücücai, catini'aviesiecaitüni masi matüaripai. Cacaüyari nai munetüa, mücü xeiçüa müpaü catinimaicaitüni que mütiyurieniquecai. Yacatini'avietacaitüni <sup>10</sup>masiücütü mayanicü hicü, memüyutixexeüriva yametehecüatacacu, müme muyuavisie memüte'aita heiserie memexeyia yamemütehetimanicü, müiremecü que mütimaive Cacaüyari, tahesie yatimasiücücacu. <sup>11</sup>Müpaü pütüyurieniquecai, yapütüyücühüavecai meripai, müpaüta tinaye'atüani Tati'aitüvame Cürisitu Qesusi yatiyurienecacu. <sup>12</sup>Müçüsie teteviyatü heiserie tecanexeyiani

temitahüavecü tetatatuatü, 'aixüa 'iyaricü temaye'axüanicü hüxiena, yuri temüte'erieciü hesiena. <sup>13</sup>Ayumieme nepüxetavaviri xemücavaüripiecacü ne'uximatüariecacu xehesie mieme. Müpaü nemü'itüarieciü, 'ayumieme xepaye'axüani visi xe'anenetü xemacü necü.

**Que temütetaxie tetemaitü  
vaüca que mütatinaqui'erie**

<sup>14</sup>Ayumieme nenititunumaqueni nenevieri ne'ipitüanique Tati'aitüvame Qesusi Cürisitu 'uquiyarieya. <sup>15</sup>Mücü meha'erivatü yunaitü nuivarite yamecatenitetevaca cuiepa memütama muyuavisie memütama. <sup>16</sup>Nepineneviya, mücü vaüca que mürexeyia visi 'aneneme, müxepitüanicü yemecü xemütürücariyarienticü yuhesie 'Iyarieya yatixetürücariyacacu, <sup>17</sup>mücü meta, quexepitüaca Cürisitu xe'iyarisie müyecanicü yuri xete'eriecacu. Xeteyucanaqui'erietü xequeseiriyarieca, cüye que mütise'i hananatü, qui que mütise'i tesariyasie vetü. <sup>18</sup>Müpaü xeteyucanaqui'erietü 'axeicüa xequeyüvaveni xemütehetimanicü, yunaime Cacaüyari teüterimama vahamatü, que macuyeva que meutateva que meutateva que meutateva Cürisitu que mütiyucanaqui'erie, <sup>19</sup>xemimaicacü Cürisitu naqu'i'eriyaya, sepa tevi müyutexie yatimaitü. Xeque'utihünyarienti, hepaüna xemü'anenenicü, Cacaüyari que mü'ane.

<sup>20</sup>Que mü'ane müyüve masi cuiñi mieme mütiyurienenicü sepa que mütitita, tame masi

que temücate'ivavirievave  
 que temücateta'iyaritüavave,  
 türücarıyaya que müaticuyuitüva,  
 21mücü hepaüsita 'aixüa  
 meque'utiyaneni metasıha'erivatü  
 tame temütatıxexeürıva Cürısitü  
 Quesusi meha'erivatü, yunaitü  
 teüteri mexi me'anutıcüca  
 yuheyemecü. Canıse'ini 'icü niuqui.

#### 'Iyari que mütatıxevırıya

**4** 'Ayumieme neri  
 ne'anutahüıyacame  
 nemühücücü Ti'aitamesie netıvıyatü,  
 vaürıyarıca necanıxepıtüaca, 'aixüa  
 'anemecü xemu'uvanıcü, que  
 müreyeveıe yamütıcamıenıcü  
 que mü'ane muta'inıerie que  
 xemüte'uta'inıerie xeme. 2Tıxaütü  
 xecatehümetütü xequenayuyeıtüaca  
 naımecü, xepüca'ayu'erırıyanı,  
 'axequeteneutevını xecaha'atü,  
 xequeneyunevıeca ması  
 xeyunaqui'erıetü. 3'Iyari  
 que mütatıxevırıya,  
 xequeneyumexüıtüaca  
 xemüyuhayevacı xeyuxevıtü  
 'aixüa xeteyuxeıyatü. 4Xeı  
 vaıyari tecanıhümetüni, 'Iyarıta  
 canıyuxevını. Yaxeıcüa xeme  
 quepaucua xemuta'inıerie, tıta  
 xetecuevıetü xemüte'acı, mücüta  
 canıyuxevını. 5Ti'aitame  
 canıyuxevını, xeımesıe yurı  
 tecatenı'erıeca xeımesıe tetevıyatü  
 tecanıuca'üyarıeni. 6Cacaüyari  
 yunaıme müva'uquıyarı mücüta  
 canıyuxevını. Mücü yunaıme  
 catınıva'aitüaca, yunaıme  
 canıvacuyııtüvanı, yunaıme  
 vahesıe catınıvıyanı.

7Masısü taxexııtü yatepütımıquıe  
 que temüte'inüasıyarı, Cürısitü que

mütatımıcua. 8'Ayumieme müpaü  
 paine 'utüarıca,  
 Vapai 'anutıyaca  
 Me'anutaxürıyacame  
 nıvarehapanı yumüıreme,  
 'Imıquıerııcü tınıvarumını teüteri.

9Merıcüte tıta tıxata, Vapai  
 'anutıyaca haitü. Müpaü xüarı paine,  
 peucayune merı 'emeucatevasıe  
 cuıepapıtü. 10Que mü'ane  
 meucayunıxü, mücü canıhücütünıta  
 que mü'ane muyuavı heıma  
 manıtıtüa teva, naı mühünıyanıcü.

11Mücü müpaü pütıvarumı,  
 hıpatü nü'arısıxı memacünecü,  
 hıpatüta texaxatamete, hıpatü  
 tehecüatamete, hıpatü meta  
 te'üvıyamete te'üquitamete.

12Yacatınıvarumını  
 varaye'atüanıque yuteüteriıma  
 yamemüte'uxımayacacı  
 que memüte'uhürıtüarıe.  
 Vacümana Cürısitü vaıyarıeya  
 canıverıyarıecamücü. 13Müpaü  
 tecatenıpıtüarıeca mexı  
 te'aye'axüaxıme tanıtü  
 temütaxevınıcü yurı que  
 temüte'erie Cacaüyarı nu'ayasıe,  
 que temüte'imate. Müpaü  
 tecatenıpıtüarıeca teví maye'ave  
 temacünecü, temüıesıeüyenıcü  
 Cürısitü que müraye'avepaü, mücü  
 Cürısitü ta'inüarıtıtcacu. 14'Ana  
 tepütehayevanı türı vahepaü  
 teyüatü. Tepücacuyııtüarıvanı  
 naıme 'ıquısıcacü, hamevarı  
 que mütıuyuane 'ecacı, teüteri  
 que memüteyucümana, que  
 memüteyu'ıyarıtüa mete'ırümatü  
 memıeyexürıenıcü. 15Ması yurı  
 te'utıyuatü tetetacanaqui'erıetü,  
 tecanıverııcunı 'ıyapaü te'anenetü  
 temacünecü naımecü. 'Iya



canitamu'utüni Cürisitütütü.

<sup>16</sup>Tanaitü hesiena teteviyatü tecanitaverirümeni, tevi vaiyarieya yumu'usie tiviyatü que mütiwere naitü. Vaiyarieya navütüarieni niutaxeviriyarieni, turuyari naitü 'ixeviriyacacu, xexuitü vaiyariteya yatiyurienecacu que müreyeveve. Yaxeicüa tevi vaiyarieya que mütiyuveriya yücümana, tameta tetetacanaqui'erietü tecanitürücarieya vaiyarieya tehümetütü.

**Yücü 'anemecü que mürayeyuri  
Cürisitusie tiviyatü**

<sup>17</sup>Ayumieme 'ipäu nepaine, Ti'aitamesie netiviyatü 'ipäu nepüthecüata. Xepüca'a'uvani hipatü que memüyüa memücatateüterima. Yacü xeicüa metenicu'erivani müme, <sup>18</sup>mecaniuyüriarieni que memüteyumate yu'iyarisie, heiserie mepücahexeiyä Cacaüyari tucari müvapitüanicü, müme 'asimemücatematecü va'iyari müsese'icü. <sup>19</sup>Que memü'anene, müme yu'iyarisie mecaniximümüanini, mepüyuyetua memürucuyatüvenicü que memüteyucahive'erie, yamemüteyuriecacü naime tita mücati'itiya yuhesie mieme metehive'erietü. <sup>20</sup>Peru xeme müpaü xepücate'u'üquitüarie Cürisitu hepaüsita. <sup>21</sup>Xüari hepaüsitana xepütemarie, hesiena xeteviyatü xepüte'u'üquitüarie tita yuri müraine, Quesusisie que mütimasüicü. <sup>22</sup>Ayumieme que xemüte'u'üquitüarie, xequenanutihüna tita mütiye'i,

xequeteneuhayeva que xemüyüacai meripai. Que mü'ane müpaü müyüane, mücü canitapünirümeni 'irümarie que mütihive'eritüa. <sup>23</sup>Yücü xe'anenetü püta xequenacüni, yu'iyarisie que xemüteyücühüave. <sup>24</sup>Xehecuariyarietü que xemüyüa hicü, xequenacatüqui tita yücü müti'ane, tita mütiunetüarie Cacaüyaripäu 'anetü. Müme tita yuri mürainesie memümiemete vahepaü heiseriemecü yaxequetenecahunü, Cacaüyari xe'ayexeyatü xequeneyüaca.

<sup>25</sup>Ayumieme xequeteneuhayeva xete'itavatü. Yuxexuitü yuri xequeteneyutahüavi, tanaitü 'axeicüa temütaxevicü xe'iyarisie temiemetetütü.

<sup>26</sup>Xüca xeha'aca, 'aixüa püca'yüni xüca 'axa xeteyurieca. 'Aixüa püca'ane tau macayune xecayunütüavavecacu.

<sup>27</sup>Mücü meta, xepüca'ipitüaca Cauyumarie 'asimütiyurienenicü.

<sup>28</sup>Que mü'ane mütinavayame quetiuhayeva tinavanetü. Queticumaüvani masi yumamacü 'aixüa tiyurienetü, tixaütü mürexeyanicü mütiyamicuanicü müme memüteheuyehüva.

<sup>29</sup>Niuqui mütipünirüme xüca vayeyani xeteta, 'aixüa püca'yüni, masi xüca 'aixüa 'aneni xeniuqui 'iseiriyatü que mü'ane meiyehüva, müpaü xequeneutiyaneni püta, 'aixüa xemüvayurienicü 'enamete. <sup>30</sup>Xepüca'ihiveritüaca Cacaüyari 'Iyarieya Mütiyupata. Mücü canixeseyütüni cümana xemu'inüasie mexi tucari ca'aye'ave quepaucua temüxünarieni.

<sup>31</sup>Xequeteneuhayeva xehayüsüriyatü

xeteyuca'uxive'erietü  
 xeyuhaxüaviyatü xe'utihivatü  
 'axa xe'utiyuatü. Mücü naitü  
 quetixani'erivani xehesüa,  
 naitü 'axa müti'aneta.  
<sup>32</sup>'Aixüa xete'u'iyaritü  
 xequenacüni que xemüuyurie,  
 xequenyunenimayaca,  
 xequeteneuyuehüvirieca,  
 Cacaüyari que mütixeheuyehüviri  
 xeme Cürisitusie tiviyatü.

**Hecüaripa miemete  
 vahepaü xequenyüaca**

**5** Mericüsü Cacaüyari  
 xe'üquetü xequenacüni.  
 Que mü'ane müxenaqui'erie  
 nivemama vahepaü xequenyüaca.  
<sup>2</sup>Xeteyucanaqui'erietü  
 xequeneu'uvani, yaxeicüa  
 Cürisitu que mütatinaqui'erie,  
 que mütiyuyetua tahesie mieme  
 mümierienicü. Mavaritütü  
 caniyuyetuan 'ixatüatü Cacaüyari,  
 'inaqui'asitüatü.  
<sup>3</sup>Hipatü menivacumaüvani que  
 mü'ane mücava'üya mücavacüna,  
 mepüca'itiyatüca, yuhesie mieme  
 metenihive'erieca naime. Masi que  
 memüteyurie, mücü xepücacuxatani  
 xeme, meuyevesecü müme  
 Cacaüyarisie mieme memupasie  
 müpaü memücateyuriecacü.  
<sup>4</sup>Hipatü müpaü mecateniyurieca,  
 que temüteteviyasitüarieniqueyu  
 xüca vahepaü teteyuriecaque.  
 Yacü xeicüa mecaniyuaneni,  
 mecaniyunanaimaca 'axa  
 mü'anecü. 'Aixüa püca'ane  
 müpaü xemüteyuriecacü, masi  
 peuyevese pamüpariyusi  
 xemipitüacacü Cacaüyari.  
<sup>5</sup>Teüter mepüvacumaüva

que mü'ane mücava'üya  
 mücavacüna, mepüca'itiyatüca,  
 nai mepütehive'erie yuhesie  
 mieme. Tita mütihive'erie, mücü  
 payexeiya yucacäuari. 'Ipaü  
 xequetenemaica, yunaitü müya  
 memüteyurie, müme vahesie  
 pücatinaque memaye'axüanicü  
 Cürisitu tiva'aitüvame mayanicü,  
 Cacaüyari meta. <sup>6</sup>Xevitü  
 caxe'ucuamana 'eca niuqui  
 vevietü. Müya memüteyuriecü,  
 'ayumieme Cacaüyari püvaheca  
 müme memücayuvaüriya  
 yamemütecahunicü. <sup>7</sup>Mericüte,  
 xepücayuxeviriyani vahamatü que  
 memüteyurie.

<sup>8</sup>Meripai yüvipa  
 xepümiemetetücai, hicürixüa masi  
 hecüaripa xemiemetetütü xenacüne  
 Ti'aitamesie xeteviyatü. Hecüaripa  
 miemete vahepaü xequenyüaca.  
<sup>9</sup>Hecüariya que mütixuaveriya,  
 'ipaü catiniyurienemücü tevi.  
 Naimecü 'aixüa catiniyurienemücü,  
 heiseriemecü yacatinicamiemücü,  
 yuri caniutainemücü.

<sup>10</sup>Xequenyü'üviya  
 yaxemütehetimanicü tita mütinaque  
 Ti'aitame. <sup>11</sup>Xepücayuxeviriyani  
 müme yüvipa mieme  
 memüteyurie vahamatü. Tixaü  
 pücatitixuavere que memüteyurie.  
 Masi xequeni vahecüatani  
 que memüteyurie. <sup>12</sup>'Avie  
 que memüteyurie müme,  
 püyuteviyasitüaniquyeu xüca  
 'icuxatanique. <sup>13</sup>Peru mücü  
 naitü hecüasietü, masiücütü  
 canayeitüarivani hecüaripa.  
 Hecüariya canihücütüni tita  
 masiücüme mürayeitüa naime.  
<sup>14</sup>'Ayumieme müpaü paine,

'Ecü pemücusu  
 Quenanutanieri,  
 Müquite vasata  
 Quenanucuquexi,  
 Cürisitu  
 Camanihecüariyamücü.

<sup>15</sup>Ayumieme

xequenyucuerivayurieca  
 'aixüa que xemüte'u'uva.

'Asimemücatemate vahepaü  
 xepücayüaca, memütemaivave  
 vahepaü xequenyüaca püta.

<sup>16</sup>Quepaucua xemüyüvave 'aixüa  
 xemüteyurienicü, yemecü müpaü  
 xequeteneuyuri, teüteri hicü  
 miemete 'axa memüteyuriecü.

<sup>17</sup>'Ayumieme 'asixecatayumatapaü

xepücayüaca, masi 'aixüa  
 xequetenemaica tita mütinaque  
 Ti'aitame. <sup>18</sup>Xepücatarüvetiveni  
 vinucü. Müpaü tiyurienetü  
 pürucuyaneni xeicüa. Masi

'Iyaricü xequenehüpüneni püta.

<sup>19</sup>Quepaucua xemüteyutahüave,  
 Cacaüyari cuicarieya

xequeneuticuica, nüavari Cacaüyari  
 hepaüsita manuyüne, cuicari

'Iyarisie timieme hepaüsita  
 manuyüne xequeneuticuica,  
 xe'inüavatü Ti'aitame yu'iyarisie.

<sup>20</sup>Yuheyemecü naimecü  
 pamüpariyusi xequenepitüaca  
 Cacaüyari müta'uquiyari,  
 Tati'aitüvame Qesusi Cürisitusüa  
 xemümiemetecü.

**Xeyuxevitü yaxequetenecahuni**

<sup>21</sup>Xeyuxevitü yaxequetenecahuni  
 xemütheiyehüviricü Cürisitu.

<sup>22</sup>'Ucari yaxequetenecahuni  
 xecünama que memaitüca,  
 yaxaicüa que xemütecahu  
 Ti'aitame ti'aitacacu. <sup>23</sup>'Uqui 'uca

mu'uya canihücütüni, yaxaicüa  
 Cürisitu memüyutixexeüriva  
 vamu'u canihücütüni. Mücütä  
 canihücütüni que mü'ane  
 yuvaiyari mutavicueisitüa.

<sup>24</sup>Memüyutixexeüriva

yamecatenecahuni que müti'aita  
 Cürisitu. Müpaürita yaxaicüa 'ucari  
 yamequetecahuni que memaitüca  
 vacünama sepa que mütitita.

<sup>25</sup>Xeme 'uquisi

xequenivanaqui'erieca yü'üitama,  
 Cürisitu mütivanaqui'eripaü  
 memüyutixexeüriva, müyuyetuapaü  
 mümierienicü vahesie mieme.

<sup>26</sup>Yuhesie mieme müvapatacü

müpaü tiniuyurieni, va'tietü  
 hacü niuquicü. <sup>27</sup>Müpaü  
 pütüuyuri yücümana,  
 yühüxie müvati'uitüanicü  
 memüyutixexeüriva visi  
 me'ananeme, mecaheucuyüvime,  
 mecaheuviravime, sepa  
 tita müpaü müti'ane, masi  
 memüpasiecacü püta  
 vahesie mücarahüivanicü.

<sup>28</sup>Yaxaicüa neuveveca 'uquisi  
 memüvanaqui'eriecacü yü'üitama,  
 yuvaiyari memütenaqui'eriepaü.

Que mü'ane minaqu'i'erie yü'üya,  
 mücü caniyunaqui'erieca. <sup>29</sup>Tevi  
 hasuacu püca'i'uxie yuvaiyari,  
 masi piveriya piquemaritüa.

Cürisitu yaxaicüa püvayurie  
 memüyutixexeüriva, <sup>30</sup>vaiyarieya  
 memühümecü. Vaiyarieya  
 'umeyarieya tepühüme tame.

<sup>31</sup>Que maine, 'Ayumieme tevi  
 püyupata, yuquemasi yuvarusi  
 vahesüa püyeyani, yü'üyasie  
 pütiviya. Memüyuhutacai xei  
 vaiyari mepacüne meyuxevitü.

<sup>32</sup>'Icü niuqui masi canitürücaüyeni,

sepa mü'aviesiecaí. Cürisitu hepaüsita memüütixexeüriva vahepaüsita nepaine. <sup>33</sup>Mericüte xemeta yuxexuitü yunaitü yü'üitama xequenivanaqui'erieca xemüteyunaqui'eriepaü. 'Ucari meta, mequetevareuyehüvirieca yücünama.

**6** Türi xequeniva'enieca yu'uquiyarima Ti'aitamesie xeteviyatü. Müpaü xüca xeteyurieca püheiserie.

<sup>2</sup>Quetinivareuyehüvirieca 'aquemasi 'avarusi que maine, mücü 'aisica canive'emetüni. Müpaü paineta quename tixaütü tipitüarieni, müpaü haitü, <sup>3</sup>Müpaü petiyurienetü 'aixüa pepü'itüarieni 'epepüreutevini cuiepa, haitü.

<sup>4</sup>Xemeta xemüva'uquiyarima xepücavahaxüatüaca yütüriyama. Masi xequenivaveriyani xeteva'üquitüatü xevara'imaiyatü que müreuyevese yamütiyurienicü Ti'aitamesie tiviyatü.

<sup>5</sup>Te'uximayatamete xequeniva'enieca müme memüxecusiyarima cuiepa, xeheumamatü xe'utiüyüacatü. 'Aixüa 'iyaricü xete'uximayatü, Cürisitusie mieme masi xecateni'uximayacacuni. <sup>6</sup>Vahüxie xeicüa xepücate'uximayaca teüteri xevanaqui'arütüanique. Masi Cürisitusüa miemete te'uximayatamete xemühümeccü, yu'iyaricü yaxequeteneyurieca tita mütinaque Cacaüyari. <sup>7</sup>Xeyuvaüriyatü xequetene'uximayaca, que mü'ane Ti'aitamesie mieme müti'uximayapaü keyüatü, teüteri vahesie mieme pücatixaü. <sup>8</sup>Müpaü

xequetenemaica, yuxexuitü 'aixüa que memüteyurie, müpaü mecatenipitüariyecuni Ti'aitame yativapitüacacu, sepa te'uximayatamete memühüme, sepa memüyunü'a.

<sup>9</sup>Xemerita xemüvacusiyarima, yaxeicüa xequenivayurieca. Xequeteneuhayeve xevamarivecatüatü, müpaü xetemaitü, que mü'ane müvacusiyari müxecusiyari 'axeicüa, mücü taheima pacave Ti'aitametütü, yücü pücativaxeyia teüteri.

#### Cacaüyari que mütiva'ixiparatüa yucuyaxima

<sup>10</sup>Imatürieca ne'ivama, Ti'aitamesie xeteviyatü xequenetürücariryarieca, que mü'ane mütürücaüye xetürücariyacacu. <sup>11</sup>Cacaüyari que mütiva'ixiparatüa yucuyaxima, mücücü xequeneyucuha'arütüaca cuyacü, xemüyüvavenicü xemüti'ucacü xecacuyuitüarietü Cauyumarie 'irümarieyasata. <sup>12</sup>Tameri teüteri tevaraye'unietü tepücatacuitüve. Masi te'aitamete, heiserie hexeyiamete, müme memüte'aita 'ena yüvipa naisarie cuiepa, 'iyarite memüyucuitüve tita 'axa müti'anesie mieme muyuavisie memuxuave, müme tevaraye'unietü püta tepücatacuitüve. <sup>13</sup>Ayumieme xequenanu'üi Cacaüyari cuyaximama vatepüa naime. Mücücü xecaniyüvaveni xemeye'uniecacü sepa tucari 'axa mü'ane, xecaniyüvavecuni xemüti'unicü xecacuyuitüarivatü, naime xe'aye'atüame.

<sup>14</sup>'Ayumieme 'axequeteti'uca  
 'aixüa. Cuya que mürayuhüa,  
 xemeta tita yuri müraïne  
 xequetenecuxatani. Cuya tepüa  
 que müranacatücü yutavie capa  
 'u'axienicü, xemeta heiseriemecü  
 yaxequetenecahuni. <sup>15</sup>Yucacaisie  
 que müreuquexüa, xemeta  
 xequeneyucuha'aritiüaca niuqui  
 'aixüa manuyünesie xeteviyatü,  
 'aixüa que temütexeyarie  
 manuyünesie. <sup>16</sup>Mücü meta,  
 'eyeume que müracaxu'u cümana  
 müyucunarüma, xemeta yuri  
 xequetene'erieca. Müpäü  
 xepüyüvaveni xemitünicü naime  
 'axa mütiuca'iyari 'ürüteya  
 mütaivave. <sup>17</sup>Cuya yumu'usie  
 tepüa que müranaquesa, xemeta  
 müpäü xequetenemaica,  
 xemutavicueisitüariecü. 'Ixipara  
 que müracue'le, Cacaüyari niuquieya  
 xehexeyatü xequeneyucuitüveni,  
 'Iyari que mütiyumiene mücücü.  
<sup>18</sup>Naimecü xequeneyunenevieca  
 xequenevavirieca. Yuheyemecü  
 nenevieri xequenepitiüaca 'Iyarisie  
 xeteviyatü. Müpäü xemüteyuriecacü,  
 xequeneyühütüaca, yemecü  
 xepücatehayevani xe'ivavirietü  
 Cacaüyari yunaime teüterimama  
 vahesie mieme. <sup>19</sup>Nehesie  
 miemeta xequeneyunenevieca,  
 niuqui nemüpitüariecacü  
 quepauca nemütaniuni,

nenetatuatü nemihecüatanicü  
 tita müti'aviesiecai niuqui 'aixüa  
 manuyüne hepaüsita. <sup>20</sup>Mücüsie  
 mieme necaniniucametüni  
 sepa tepüacü nemanutahüiya.  
 Xequeneyunenevieca  
 nemünetatuanicü niuquisie mieme,  
 que müreuyevese nemütaniunicü.

**Vaürisica que  
 mütivareutanü'airixüa**

<sup>21</sup>Yaxemütemaicacü  
 xemeta que nemüranayemie  
 que nemütiyuriene, naime  
 yacatinixetaxatüamücü Tiquicu.  
 Mücü canita'ivatüni teminaqui'erie.  
 Tiparevivame yamüticamie  
 canihücütüni Ti'aitamesie  
 mütiyiya.

<sup>22</sup>'Ayumieme xehesüa  
 nepenunü'ani yaxemütemaicacü  
 que temüte'anayecü, xe'iyari  
 mütuicariecacü.

<sup>23</sup>Cacaüyari müta'uquiyari,  
 Ti'aitame Qesusi Cürisituta  
 xüca mevapitiüaca 'ivamarixi  
 memüca'uximatüariecacü  
 yu'iyarisie, xüca mevapitiüaca  
 memüyunaqui'eriecacü  
 yuri mete'erietü. <sup>24</sup>'Aixüa  
 mequete'u'iyarini müme  
 yuheyemecü meminaqui'erie  
 Tati'aitivame Qesusi Cürisitu  
 vahesie mieme yunaime vahesie  
 mieme.

# PIRIPUTARI

## Que Mütivarunü'airi Papuru

---

### Vaürisica

**1** Papuru Timuteumatü tecanixevaüritüaca, te'uximayatamete tehümetütü Cürisitu Qesusisie mieme. Yunaitü Cacaüyarisie mieme xemupasie Cürisitu Qesusisie xeteviyatü Piripusie xemütama te'üviyamete teparevivamete, yunaime tecanixevaüritüaca. <sup>2</sup>Cacaüyari müta'uquiyari, Ti'aitame Qesusi Cürisitumatü xüca 'aixüa mete'u'iyarini xehesie mieme, xüca mexepitüaca yu'iyarisie xemüca'uximatüariecacü.

### Papuru que mütiyuneneviecai yuri memüte'erie vahesie mieme

<sup>3</sup>Pamüpariyusi necanipitüaca necacaüyari quepaucua nemüxeha'erivani. <sup>4</sup>Quepaucua nemivavirie yunaime xehesie mieme, nenetemavietü necaninenenevieca neheyemecü. <sup>5</sup>Pamüpariyusi necanipitüaca xeme tame temütaxevicü hicü tanaitü niuqui 'aixüa manuyüne tecuxatatü yaxaicüa matüaripaü. <sup>6</sup>Ipaü yuri netini'erieca, que

mü'ane misutüa xecuyuitüvatü 'aixüa xemüteyuriecacü, mücütütü catinaye'atüamücü tita mütiyuriene tucari 'aye'ayu quepaucua Cürisitu Qesusi munuani. <sup>7</sup>Caniheiserietüni 'ipaü nemütinemaicacü yunaime xehepaüsita, nemüxenaqui'eriecü 'aixüa 'iyaricü. Xeme neta tanaitü tepütaxevi tetemaitü 'aixüa que mütiuca'iyari Cacaüyari, ne'anutahüiyacacu niuqui 'aixüa manuyünesie mieme ne'utaniucacacu ne'ihēcüatüatü niuqui que mütiheiserie. <sup>8</sup>Cacaüyari catinihecüatani que nemütixexeyamücü yunaime, Cürisitu Qesusipaü netinemaitü. <sup>9</sup>Ipaü necatininenenevieca, xeme masi yemecü xeteyucanaqui'erietü xemacü necü heiseriemecü xetemaivavetü, nai xetemaitü que müreyevese yaxemüteyuriecacü, <sup>10</sup>xemüyüvavenicü xemipatacü tita 'aixüa müti'ane tita 'axa müti'ane que xemüte'imate. Müpaü xeteyurieyu, tucari 'aye'ayu quepaucua Cürisitu munuani canimasüücüamücü que xemücateseviximarieca, xehesie que mücarahüivani. <sup>11</sup>'Ana

heiserie xecanipitüariecacuni, que mütiyupitüva Quesusi Cürisitu. 'Ana mücücü visi 'anetü canayeitüariemücü Cacaüyari, 'aixüa catinicuxaxasivamücü hepaüsitana.

**Xüca ne'ayeyurini Cürisitu 'aixüa canicuxaxasivamücü, que mutayü**

**<sup>12</sup>Ne'ivama**

nepütixetaxatüaniqueyu que nemüranayetüa hepaüsita, müpäü xemütemaicacü, 'aixüa puyü masi vaüca mü'enierienicü niuqui 'aixüa manuyüne.

<sup>13</sup>Yunaitü cuviyexunu quita miemete hipatüta yunaitü müpäü mepütehema quename Cürisitusüa nemiemetütü ne'anutahüiya.

<sup>14</sup>Ivamarixi 'esivatücacu yunaitü menesiha'erivatü que nemüranutahüiya, Ti'aitamesie meteviyatü mecaniyuvaüriyani masi vaüca Cacaüyari niuquieya memücuxatanicü mecaheumamatü meyutatuatü.

<sup>15</sup>Hipatü siepüre 'asita me'lütesatü meyucuicutü mepütecuxata Cürisitu hepaüsita, hipatü püta 'aixüa mete'u'iyaritü mepütecuxata.

<sup>16</sup>Müme menesinaqui'erietü mepütecuxata müpäü metemaitü, ne niuqui 'aixüa manuyünesie mieme nemutaniucacü, 'ayumieme nepüyüane. <sup>17</sup>Hipatü püta mepütehecüata Cürisitu hepaüsita mevara'ivacutü hipame, va'iyari cayuxevicacu. Que memüteyurie, müpäü mepütecu'eriva, masi vaüca nepü'uximatüarיעa ne'anutahüiyatü. <sup>18</sup>Sepanetü que memüteyurie, Cürisitu canicuxaxasivani. Ne 'ayumieme

nepünetemavie, sepa memütecuxata yacü xeicüa meyüatü, sepa yuricü meyuvaüriyatü memüyüa.

Mücü meta, nepücatihayevani nenetemavietü. <sup>19</sup>Müpäü nepütimate, 'icü naitü 'aixüa püyüni nemütaviceisitüarienenicü xeyuneneviecacu xeme, Quesusi Cürisitu 'iyarieya nesituacacu.

<sup>20</sup>Ipaü yemecü yuri nepütü'erie neta'licuevatü, 'uxa'atüni varie nepücatevijasitüarieni. Masi Cürisitu que mütive'eme canimasiücucamücü yaxecüa meripaipai. Menesixeyatü nevaiyarisie que nemütüyeica nenetatuatü, teüteri müpäü mecatenimaicacuni sepa nemayeyurini sepa nemümü.

<sup>21</sup>Sepa nemayeyuri, Cürisitu 'aixüa canicuxaxasivamücü. Sepa nemümü, masi 'aixüa caniyümücü.

<sup>22</sup>Nevaiyarisie ne'uyeicacacu xüca tixaütü tiutixuavere neti'uximayacacu, quesü yüni. 'Asinepücatimate que mü'ane masi 'aixüa müyüni queyu. <sup>23</sup>'Esimacuyeva nepüyüane. Nepünevaüriya nemüyemiecü Cürisitumatü mana nemeyeicanicü. Müpäü masi 'aixüa pü'aneniqueyu. <sup>24</sup>Perusü xehesie mieme caneuyevaca masi nemünehayevacü 'ena nevaiyarisie netiviyatü. <sup>25</sup>Hicürixüa nepüretima que nemütüyurieni, müpäü necatinimaica nemünehayevanicü. Yunaimie xehesüa necaninehayevamücü nexeparevietü masi vaüca xemüyüvavenicü, xemüyutemamaviecacü yuri xete'erietü. <sup>26</sup>Müpäü xüca netiyurieneni, Cürisitu Quesusisie xeteviyatü yemecü xepüyüvaveni

'aixüa 'ane xemütemaicacü  
xehesih'a'ervatü, quepaucua  
xehesüa nemunuani tavari.

<sup>27</sup> Ipaü xeicüa xequeteneyurieca,  
que müreyeveve yamütiyurienenicü  
heixeyatü niuqui Cürisitu  
hepaüsita 'aixüa manuyüne,  
müpaü xequeteneu'uvani cuiepa.  
Xüca müpaü xeteyurieca, sepa  
xehesüa nemeyeicani nexexeyatü,  
sepa tevapai nemeyeica  
xehepaüsita ne'enatü xeicüa,  
müpaü necatinimaicamücü  
xemüseseyenicü 'iyari xehexeyatü  
müyuxeve, yaxecüa xetecu'ervatü  
yunaitü xemüyucuitüvecü capa  
xe'unavaiyarienicü titasie yuri  
xemüte'erie niuqui 'aixüa manuyüne  
que maine, <sup>28</sup> xepüca'utiüyüacani  
quepaucua müme memüxe'aye'unie  
memüxemariutani. Müpaü  
xeteyurietü 'inüari  
xenacünicuni vahepaüsita, que  
memüteheuyexüriyani. Xemeta  
yuhesie mieme 'inüari xepacüne  
que xemütetavicueisitüarieni  
Cacaüyari xetavicueisitüayu.  
<sup>29</sup> Cürisitusüa xemümiemetecü  
xepupitüarie yuri xemüte'eriecacü  
hesiena, masisü cuxi xepupitüarie  
xemütectuinitüarieni hesiena  
mieme. <sup>30</sup> Yaxeicüa nehepaü  
xequeteneyucuitüveni hicü, que  
xemünetexeyiacai yanetinemiene,  
hicüta que xemüte'enana quename  
yanetinemiene.

**Cürisitu tixaütü catihücütütü  
que müratüa, 'arique  
ve'eme que müratüa**

**2** Caniyuritüni, Cürisitusie  
teteviyatü tecanituicarieca  
tecaninütüarieca que

temütetacanaqui'erie, 'Iyarimatü  
tecanitaxeveni tanaitü,  
tetenitacanenimayaca que  
temüte'u'iyari. <sup>2</sup> Ayumieme  
nepaine, xüca müpaü  
'aneni, xequeneye'atüa  
xenesitemavieriyatü. Yaxeicüa  
xequeteneyumaica, yaxecüa  
xequeteneyucanaqui'erieca,  
yuhepaü xequetenecu'ervani,  
xequeneyuvaüriyani yu'iyarisie  
xemüyuxevinicü. <sup>3</sup> Hipame  
xevara'ivacutü xepücayüaca,  
teüteri xehepaüsita 'aixüa  
memutiyanenicü xeicüa  
xepücayüaca. Vavemete  
masi xequeniva'erieca  
hipame, xeme püta tixaütü  
xecatehümetüme xequeneyu'erieca  
yücümana. <sup>4</sup> Yuxexuitü xeme  
xepücatecuvautüveni tita  
xehesie mütimieme xeicüa. Tita  
hipame vahesie mütimieme püta  
xequetenecuvautüveni.

<sup>5</sup> Ipaü xequeteneyumaica  
yu'ivama xevara'ervatü que  
mütiumate Cürisitu Quesusisie  
tivyatü.

<sup>6</sup> Cacaüyari que mü'ane,  
Mücü yaxecüa pü'anecai.  
Peru müpaü pücaticu'ervacai  
Quename 'aixüa yüniqueyu  
Xüca Cacaüyaripaü ve'eme  
'Ayuyeitüanique,  
Sepa müyüvecai.

<sup>7</sup> Catiniuhayeva  
Heiserie hexeyatü  
Que mü'ane vaüriyarica  
Müti'uximayapaü 'anetü  
Nayuyeitüani.  
Teüteri vahepaü 'anetü  
Nayani.

<sup>8</sup> Mericüsü



Xeiyarietü  
 Tevipäü 'anetü  
 Tixaütü catihücütütü  
 Canayuyeitüani.  
 Yacatinicamiecaitüni  
 Sepa mumü,  
 Curuxisie caniumierieni.  
<sup>9</sup> 'Ayumieme Cacaüyari  
 Ve'eme caneyeitüani.  
 Canipitüani  
 Visi mütimarivanicü  
 Que mü'ane mühücü  
 Hipatü que memücatemarivapaü.  
<sup>10</sup> 'Uxa'atüni varie  
 Quepaucua Quesusi  
 Mütahüavarieni  
 Que mü'ane mühücü,  
 Müpaü que mütimariva  
 'Ana yunaitü  
 Mecanicatunuma'uicuni  
 Nenevieri mecanipitüacuni  
 Taheima memütama  
 Cuiepa memütama  
 Cuietüa memütama,  
<sup>11</sup> Yunaitü  
 Mecaniyutahecüatacuni,  
 Que memüteheitima  
 Quesusi Cürisitu  
 Quename Ti'aitame hücü,  
 Me'utiyuatü.  
 'Ana 'aixüa canicuxaxasivamücü  
 Cacaüyari müta'uquiyari.

**Cuiepa memütama que  
 temütevahecüatüa**

<sup>12</sup> Xemeta nenaqui'erima, müpaü  
 nepütixetahüave, yuheyemecü  
 yaxetenicahucaitüni xehesüa  
 neheyeicacacu. Hicü tevapai  
 neheyeicacacu masi vaüca  
 peuyevese yaxemütecahunicü  
 Cürisitupaü. Yaxequeteneyurieca

que müreyevese  
 yaxemüteyuriecacü mexi  
 xetavicueisitüariexime, peru  
 xeheumamatü xe'utiyüüacatü.  
<sup>13</sup> Cacaüyari canihücütüni que  
 mü'ane yamütiyuriene xesata,  
 xecuyuitüvatü xemüyuvaüriyanicü,  
 'arique meta yaxemüteyuriecacü.  
 Que mütixecuyuitüva  
 yacatiniyümücü que mütinaque.  
<sup>14</sup> Müpaü nai yaxequetenecahuni,  
 xecaniuquixietü niuqui  
 xecaxüatüatü. <sup>15</sup> Müpaü  
 xeteyuriecacu, xehesie  
 pücarahüivani, xepüca'inüca tita  
 'axa müti'ane. Masi Cacaüyari  
 nivemama xecanacünicuni,  
 xepücaseviximarieca teüteri  
 vasata xe'u'uvatü va'iyari  
 mütütuni memeyexüri. Vasata  
 xe'u'uvatü xecanivahecüariviyani,  
 xuravesixi que memütehecüarivie  
 cuiepa. <sup>16</sup> Niuqui xecanexeyiani  
 varanutanieritüvame. 'Ayumieme  
 'aixüa 'ane netinimaicamücü  
 nexeha'erivatü quepaucua  
 tucari maye'ani, quepaucua  
 Cürisitu munuani. Xehesie  
 catinimasiücücamücü 'ana,  
 xüanacüa que nemücatiunanausa  
 xüanacüa que nemücati'uximaya.  
<sup>17</sup> Xeme yuri que xemüte'erie,  
 Cacaüyari xecanayexeyia  
 yaxecüa que mü'ane mavari  
 müvevi meixeyapaü yucacaüyari.  
 Hesiena mieme xeteni'uximayaca.  
 Xüca ne'umierieni müpaü yuri  
 xemüte'eriecacü, nexuriyacü xüca  
 xemavari 'uxurimarieni, mücücü  
 necaninaqui'acamücü. Xeme  
 yunaitü que xemüteyutemamavie,  
 ne xehepaü necaninetemavieca.  
<sup>18</sup> Mericüte xemerita yaxecüa

xequeneyutemamavieca, 'axeicüa temütatemamaviecacü.

**Timuteu 'Epäpüruritu que memüteyurieniquecai**

<sup>19</sup>Ti'aitame Qesusisie netiviyatü 'ipäu nepüticu'eriva, yareutevitü xehesüa nepenunü'ani Timuteu, ne'iyarisie nemütürücariyarienicü neretimaime xehepaüsita. <sup>20</sup>Xeime nepücahexeiyä hepaüna tiuca'iyarime, mücü xeicüa 'aixüa 'iyaricü caniyu'iyaritäcamücü xehesie mieme. <sup>21</sup>Hipatü yunaitü tita vahesie mütimieme xeicüa metenicuvautüveni, tita Cürisitu Qesusisie mütimieme mepücatecuvautüve. <sup>22</sup>Xeme xepimate 'iya, que müti'inüasie que mütimasiücü, xepütemate nehamatü que müti'uximaya niuqui 'aixüa manuyüne tetecuxatacacu, ranive yuquemasimatü müti'uximayapaü. <sup>23</sup>'Ayumieme 'ipäu nepüticu'eriva, nepenunü'ani cuitü neretimaime que mütiyüni nehepaüsita. <sup>24</sup>Ti'aitamesie netiviyatü yuri nepüti'erie cuitüva nemüyemiecü neta.

<sup>25</sup>Müpaüta netinicu'erivani, peuyevese ta'iva nemanunü'anicü xehesüa 'Epäpüruritu. Mücü nehamatü catini'uximayaca, tahamatü tecanicuyaxitüni. Xeme xecaneiyenü'ani nehesüa münesipareviecacü que müreuyevecai.

<sup>26</sup>Yunaime nixexeyamücüni, niyhiveriecaitüni xemu'enanacü que müticuyecai. <sup>27</sup>Tasüari catinicyecaitüni, 'esivatücacu caniumüni. Masi Cacaüyari nitinenimayata, 'axeicüa

nesinenimayatü neta, capa nenetihiverieme tavari nenetihiveriecacü. <sup>28</sup>'Ayumieme necaninevaüriyani nemenunü'anicü xemüyutemamaviecacü xeme tavari xe'ixeyatü, neta necanehiverietü nemayanicü. <sup>29</sup>Hicüri xequeneutanaqu'erie Ti'aitamesie xemüteviyacü, vaüca xequeneyutemamavieca xehe'erivatü. Müya memü'anene vavemete xequeniva'erieca. <sup>30</sup>Cürisitusie mieme ti'uximayatü caniumüni tüma. Yücümana caniyucuerivayuriecaitüni meye'atüanicü que müreuyevecai xe münesiparevieniquecaicü.

**Heiserie nepexeyä que mütivaiyacü**

**3** Mücü meta ne'ivama, xequeneyutemamavieca Ti'aitamesie xeteviyatü. Tavari 'ipäu netixe'utüürietü, nepünevaüriya, niuquicü nepüca'uxive. 'Aixüa caniyümücü masi xehesie mieme xecueriva'anenecacu. <sup>2</sup>Xequeneyucuerivayurieca müme nemüvaxatacai 'axa memüteyurie vahepaüsita, müme süicüri vahepaü memüca'itiyatüca, müme vahepaüsita. Xequeneyucuerivayurieca que memütexe'inüaritäcä vitequiyacü. <sup>3</sup>Tame püta Cacaüyari 'inüarieya tepexeyä, tame püta tepühüme Cacaüyari temayexeyä 'Iyari que maine. Tame taheyemecü tecaninaqu'aca Cürisitu Qesusisie temüteviyacü. Mücü meta, yuri tepücate'erie herie miemesie. <sup>4</sup>Müme que memü'anene herie miemesie yuri memüte'erie, neta müpaü necani'aneni. Xüca xevitü

müpaü ticu'erivani quename yüve herie miemesie yuri müti'eriecacü, ne masi necaniyüveniqueyu.

<sup>5</sup>Ne'utinui vaca 'atahairieca tucarisie necaniu'inüasieni Huriyusixi vaxitequiyacü. 'Ixaheri teüteriyari vahesie Venicamini nuivariyarisie necaniyeyani. Hepürayu teviyari necanihücütüni Hepürayusixi vahesie nemüyetüa. 'Inüari niuquiyarisie que nemütiviyacai,

Pareseu necanihücütücaitüni. <sup>6</sup>Que nemütinevaüriyacai yaneticamietü, necanivataveveyacaitüni memüyutixexeürivacai. Heiserie que nemürexeyacai 'inüari niuquiyarisie yaneticamietü, nehesisie pücarahüivacai yemecü.

<sup>7</sup>Perusü Cürisitusie nemütiviyacü müpaü nepütinemate, mücü nai netiniutatümaiya, naime cümana 'aixüa nemü'itüarieniquecai.

<sup>8</sup>Mücü meta, sepa que mütitita, naitü tiniutatümaiarieni que nemütixeyia, müpaü nemütinematecü, masi yemecü 'aixüa necani'itüariemücü ne'imaütü neti'aitüvame Cürisitu Qesusi.

Mücüsie nemümiemecü 'ari naime netiniutatümaiya. Sepanetü, mücü naitü xasi xeciüa canihücütüni que nemütixeyia. Necaninevaüriyani masi Cürisitu nehexasiyatü nemayanicü, <sup>9</sup>hesiena netiviyatü yanepütixeyiariecaqueyu xeciüa. Necümana heiserie nepücahexeyia, 'inüari niuquiyarisie yaneticamietü heiserie nepücanepitüa necümana. Masi heiserie que nemürexeyia, Cürisitusie yuri nemüti'eriecü püta heiserie necanexeyiani, Cacaüyari heiserie que

münetipitüa yuri nemüti'eriecü.

<sup>10</sup>'Ipaü xeciüa nepütinevaüriya, nemimaicacü Cürisitu, nehesisie nemimaicacü türücariyaya cümana müranucuquetüarie, ne hamatüana temütaxevinicü que mütiucuinixü netimaitü, hepaüna ne'aretü nemayanicü mücü que 'aretü matüa 'umierieca.

<sup>11</sup>Necanaye'aniqueyu xeciüa nemanucuquetüarienicü müquite vasata.

### Que mütiunanausacai, he'ivanique

<sup>12</sup>'Acuxi müpaü nepüca'ane, 'acuxi nepüca'aye'ave. Cürisitu Qesusi pünesi'u'axixü, neta nemi'axenicü tita münetimini. 'Ayumieme nepünemexüitüa, yanemüraye'anicü. <sup>13</sup>Ne'ivama, ne'aye'ame nepücan'e'erie cuxi. Peru siqueresü 'ipaü netiniyuriene, nenetümaiya nesütüa mieme, necaninetatuani masi hicü nemi'axenicü neyeta mieme. <sup>14</sup>Yanetiunanausatü nepünemexüitüa neme'ivacü, Cacaüyari que münetiuta'ini taheima miemecü nemü'ayumiemetünicü Cürisitu Qesusisie netiviyatü.

<sup>15</sup>Quetapaümetü temüseseyie 'ipaü tequetecu'erivani. Xüca yücü xetecu'erivani, Cacaüyari yacatinixeheciütüamücü. <sup>16</sup>Que temüte'aye'axüavave, müpaü yatequetecahuni.

<sup>17</sup>Ne'ivama 'axeicüa xequenene'üqueni ne que nemütiyuriene. Tame 'inüari tecanihümetüni. Müme tahepaü memüte'u'uva, müme xequenivaxeyiani. <sup>18</sup>Yümüretü que

memüte'u'uva, mecaneyeu'unieca  
 Cürisitu que mütiümierie  
 curuxisie. Vahepaüsita müixa  
 netinixecuxaxatüvacaitüni, hicüta  
 yaxecüa nepaine ne'utasuatü.  
<sup>19</sup>Müme que memüte'aye'axüani,  
 menica'unariecuni xecüa. Yuhuca  
 mecanayexeyani yucacäyariipäu.  
 Visi me'aneneme mecaniyuxatani  
 quepauca müpaü memüyüa que  
 temüteteviyasitüarie. Cuiepa  
 timiemecü xecüa mecaterna'erivani.  
<sup>20</sup>Tame püta muyuavisie  
 tecaniquiecataritüni. 'Ayumieme  
 tecanicuevieca tasivicueisitüvame  
 Ti'aitame Qesusi Cürisitu  
 'umamiecü. <sup>21</sup>'Iya yücü 'aneneme  
 caneyetüamücü tavaiyari. Hicü  
 tixaü tecatehümetütü 'icü  
 tavaiyarisie tecaniu'uvani. Peru  
 'ana yuvaiyariipäu 'aneneme  
 caneyetüamücü, visi 'anetü  
 que mütiuyeica mücü. Müpaü  
 tiniyuriemücü yütürüariyacü.  
 Müpaü titürücaüyetü caniyüveni  
 naime yaticamieme mayeitüanicü,  
 mücü que müti'aita.

**Yuheyemecü xequeneyutemamavieca  
 Ti'aitamesie xeteviyatü, que mutayü**

**4** 'Ayumieme nepaine,  
 Ti'aitamesie xeteviyatü  
 xecacuyütüarivatü xequeneuti'uti,  
 nenaqui'erima. Müpaü  
 nepütixecühüave nexexeyamütü  
 ne'ivama nemüxenaqui'erie.  
 Xeme xecanihümetüni  
 xemünesitemavieritüa,  
 xehesie catinimasiücünü que  
 nemüreyehüviyarie. Yaxeicüa  
 ve'eme muma que mütiuhanitüariva,  
 neta necanixehexeyani xeme  
 ne'inüaritüme.

<sup>2</sup>Neuxei 'Euhuriya, neuxei  
 Sinitique, vaüriyarica  
 necanixepitüaniqueyu yaxecüa  
 xemüteyumaicacü xeca'ütesatü  
 Ti'aitamesie xeteviyatü. <sup>3</sup>'Ecü meta  
 nehamatü yuricü pemicuhanane  
 hararu, nepümasitavavirieniqueyu  
 'ecü pemüvaporeviecacü  
 mücü 'ucari. Nehamatü  
 'axeicüa tepütacuitüvecai  
 niuqui 'aixüa manuyüne  
 tecuxatatü, Cüremenitimatü  
 hipameta vahamatü nehepaü  
 te'uximayatamete. Müme  
 mepacayasarie quename tucari  
 mehexeiya.

<sup>4</sup>Mericüte, yuheyemecü  
 xequeneyutemamavieca  
 Ti'aitamesie xeteviyatü. Tavari  
 nepaine, xequeneyutemamavieca.  
<sup>5</sup>Yunaitü teüteri mequexexeyani  
 xeca'ayu'eririyacacu. Ti'aitame hura  
 caniuyeicani.

<sup>6</sup>Xepücayu'iyaritüaca tixaütü  
 hepaüsita. Masi naimecü  
 xeyunenevietü xe'ivavirietü  
 pamüpariyusi xe'ipitüatü,  
 yaxequeteneutahüavi Cacaüyari  
 tita xemüte'ivavirie. <sup>7</sup>'Ana  
 Cacaüyaritütü nixepitüacamücü  
 yu'iyarisie xemüca'uximatüariecacü.  
 Müpaü tixepitüatü  
 canl'üviyacamücü xe'iyari,  
 sepa xeme 'asixemücatemate  
 que mütiyüveni mi'üviyanicü.  
 Que xemütüyücühüavesie  
 canixe'üviyacamücü Cürisitu  
 Qesusisie xeteviyacacu.

**'Icü hepaüsita xequeteneyücühüaveni,  
 que mutayü**

<sup>8</sup>Mücü meta, ne'ivama, naitü yuri  
 müraine, naitü müreyehüviyarie,

naitü mütiheiserie, naitü müti'itiya, naitü visi mü'ane, naitü 'aixüa maine, sepa que mütitita xüca 'aixüa 'aneni xüca 'aixüa ticuxaxasivani, mücü hepaüsita yaxequeteneyücühüaveni xeme.

<sup>9</sup>Que xemüte'u'üquitüarie, que xemüteyetuiriyarie, que xemünete'u'eni, que xemünete'uxeiyaniyuriyecacu, müpaü yaxequeteneyurieca. 'Ana que mü'ane müxepitüa yu'iyarisie xemüca'uximatüariecacü, mücü Cacaüyaritütü xehamatü caniyueicamücü.

#### **Piriputari que memüte'imicuacai**

<sup>10</sup>Ti'aitamesie netiviyatü yemecü nepünetemavie tavari xemisutüacü xenesiha'erivatü. Süricü xepünesiha'erivacai, masi pumavecai xevitü xeme müyüvecai tixaütü mütiyurienicü. <sup>11</sup>Ne nereuyehüatü nepücahaine. Nepü'iyamate ne'iyari 'aixüa müyünicü necümana, sepanetü que nemüranayemie. <sup>12</sup>Nepü'iyamate tixaü necatihücütütü, vaüca nerexeyatüta nepü'iyamate. Naimecü yanepüretima nemütahuxanicü nemühacamünicü vaüca nemürexeyanicü tixaütü nemücarexeyanicü nepü'iyamate. <sup>13</sup>Naime necaniquemaca Cürisitusie netiviyatü, 'iya nesitürüariyacacu. <sup>14</sup>Siepüre 'aixüa xepüte'uyuri nehamatü xeyuxeviriyatü que nemüti'uximatüariecai.

<sup>15</sup>Xeme Piriputari müpaü xepütemate que mütiuyü quepaucua niuqui 'aixüa manuyüne musutüarie cuxaxasivatü, Maseruniya quepaucua nemeyetüa.

'Ana memüiyutixexeürivacai mepücanesipareviecai. Mepücanetemicuacai neheixeyatü nemayanicü, xeme xeciüa xepünetemicuacai.

<sup>16</sup>Tesarunicapai neheycacacu tita nemüreyehüacai xepünete'utanü'airi heiva hutarieca. <sup>17</sup>Neticuvaunetü tavari yaxemüneteminicü nepücahaine. Nepüticuvaune tita mütxemaquieri püta mayanicü. <sup>18</sup>Necanitanaqui'erieniri xe'imiquieri naime, cananuyuhayevani. Catinaye'ani tita nemüreyehüacai, 'Epapüruritu nesil'ü'üitiüacu tita xemüteheyenü'a. Que xemüte'uyuri, mücü visi mu'üiapü caninaqui'erivani, mavari münaqui'eriva canihücütüni, caninaqueni Cacaüyari. <sup>19</sup>Mücü meta, necacaüyaritütü catinaye'atüamücü tita xemüteheuyehüaca hepaüsita naime, vaüca mürexeyacü visi 'aneneme, müpaü que mütimasiücü Cürisitu Quesusisie. <sup>20</sup>Cacaüyari müta'uquiyari 'aixüa queticuxaxasivani yuheymecü. Canise'ini 'icü niuqui.

#### **Vaürisica que mütiyarunü'airixüa**

<sup>21</sup>Xequenivavaürütüaca Cacaüyari teüterimama yunaime, Cürisitu Quesusisie temüteviyacü. Nehamatü memü'uva ta'ivama menixeväürütüaca. <sup>22</sup>'Ena yunaitü Cacaüyari teüterimama mepüxeväürütüa, müme meta Sesaxisüa miemete cuviyexunusixi.

<sup>23</sup>Ti'aitame Quesusi Cürisitu xüca 'aixüa tiuca'iyarini xe'iyarisie mieme. Müpaü xeciüa cani'aneni.

# CURUSETARI

## Que Mütivarunü'airi Papuru

---

### Vaürisica

**1** Ne Papuru, ta'iva Timuteumatü, tecanixevaüritüaca. Nü'ariecame necanihücütüni Cürisitu Quesusisie mieme, müpaü mütinaquecü Cacaüyari. <sup>2</sup>Tecanixevaüritüaca ta'ivama yuri xemüte'erie Curusetari, Cacaüyari teüterimama xemühüme Cürisitusie xeteviyatü. 'Ipaü teputiyuane, Cacaüyari müta'uquiyari Tati'aitüvame Quesusi Cürisitumatü xüca 'aixüa mete'u'iyarini xehesie mieme, xüca mexepitüaca yu'iyarisie xemüca'uximatüariecäcü.

**Que mütitavaviri Cacaüyari,  
müvapitüanicü memütemaicacü  
'Iyarisie timieme**

<sup>3</sup>Tetanenevietü, taheyemecü xehepaüsita pamüpariyusi tecanipitüaca Tati'aitüvame Quesusi Cürisitu 'uquiyarieya, Cacaüyari hücütüme. <sup>4</sup>Teniu'ena yuri que xemüte'erie Cürisitu Quesusisie, que xemütevanaqui'erie Cacaüyari teüterimama yunaime. <sup>5</sup>Müpaü xeteniyurieca 'amuvecü tita xehesie mieme müti'üviyarie taheima,

yaxete'icuevietü. Xeme meripai xeniu'enanani que müti'üviyarie, cuxaxasivacacu niuqui 'aixüa manuyüne que mütivaüyacü. <sup>6</sup>Mücü niuqui canixe'uta'axiyani. Naisarie cuiepa catinitixuaverirümeni, canitaverirümeni yaxecüa que mütiuyü xehesüa. Niuqui caniusutüarieni 'iya tucarisie quepaucua xemü'enana, quepaucua xemütehetima yuricü 'aixüa que mütiuca'iyari Cacaüyari, <sup>7</sup>Epapüraxi que mütixe'uta'üquitüa. Mücü tahepaü catini'uximayatametüni, tecaninaqui'erieca, yacatinicamieni Cürisitu parevivameya hücütütü xehesie mieme. <sup>8</sup>'Iya cataniutaheciäsitiüya que xemüteyucanaqui'erie 'Iyarisie xeteviyatü.

<sup>9</sup>Yatetemaitü 'anapai hicüque, tame 'ayumieme tepücatehayeva tetanenevietü xehesie mieme, müpaü tete'ivavirietü Cacaüyari, xemühüpünenicü yaxetemaitü tita mütinaque Cacaüyari, naimecü xetemaivavetü, 'Iyarisie timieme xetemaitü naimecü, <sup>10</sup>'axemu'uvanicü meta que

müreuyevese Ti'aitamesüa  
 miemete memu'uvanicü,  
 xe'inaqui'asitüatü naimecü.  
 Tepivavirie mütiutixuxuaverenicü  
 'aixüa xeteyuriecacu naimecü,  
 xemütivaverirümenicü  
 que xemüte'imate  
 Cacaüyari. <sup>11</sup>Tepivavirie  
 xemütürücariyarienicü,  
 naimecü xetürücvitü, 'iya  
 que mütitürücaüye marivetü,  
 para xemüyüvavenicü  
 xemüte'uca'enivanicü,  
 'exemütheutevinicü xecaha'atü,  
<sup>12</sup>xeyutemamavietü pamüpariyusi  
 xemipitüacacü ta'uquiyari. 'Iya  
 yüvemetecatanayeitüani, tahesie  
 mütinaquenicü tita mütinaqueni  
 Cacaüyari teüterimama vahesie,  
 hecüaripa me'u'uvacacu.  
<sup>13</sup>Cataniutavicueisitüani Cacaüyari,  
 yüriya heiserie mücaxexeyanicü  
 tahepaüsita. Cataniupata, que  
 mü'ane münaqui'erie tati'aitüvame  
 mayanicü, nu'ayatütü. <sup>14</sup>Mücüsie  
 teteviyatü tecaniuxünarieni,  
 que mütareuyehüviri 'axa  
 temüte'uyuricü.

**Cürisitu mumücü, que  
 temüte'upitüarie 'aixüa  
 temütexeyarienicü**

<sup>15</sup>Tepücaüvave  
 temixeyacü Cacaüyari, peru  
 'iya cani'üquisicayatüni.  
 Canive'emetüni heiserie hexeyatü  
 tita mütiunetüarie hepaüsita.  
<sup>16</sup>Hesiena tiviyatü, naitü  
 tiniunetüarieni, tita taheima  
 mütimieme, tita cuiepa mütimieme,  
 tita temütexeyia, tita temücatexeyia  
 meta, vavemete, müme  
 memüva'uquiyarima, te'aitamete,

müme heiserie memexeyia, naitüri  
 tiniunetüarieni 'iya 'inetüacu.  
 Hesiena mieme tiniunetüarienita.  
<sup>17</sup>'Iya 'acaniuyeicacaitüni  
 tixaütü catinetüarievecacu  
 cuxi. Naitü catiniyuxevini  
 'iyasie tiviyatü. <sup>18</sup>Mücü meta,  
 tame temütatixexeüriva tevi  
 vaiyarieyapaü te'anecacacu, 'iya  
 canitamu'utüni, tisütüvame  
 hücütütü. 'Iya müquite  
 memanucu'uni vamexüacame  
 canihücütüni, naimecü ve'eme  
 mayanicü. <sup>19</sup>Cacaüyari que  
 mütiyuvaüriya, naitü que 'anetü  
 mühücü Cacaüyari, mücü  
 Cürisitusie 'acaniuveni. <sup>20</sup>Müpaüta  
 tiniuyuvaüriya, mipatacü naime  
 Cürisitu yatiyurienecacu, para  
 naitü 'aixüa mütixeyarienicü 'iya  
 que mütixeyia. Curuxisie yuxuriya  
 que mütiutayeyuri, pipitüa tita  
 cuiepa mütimieme tita taheima  
 mütimieme hamatüana 'aixüa  
 memütexeyianicü.

<sup>21</sup>Xemeta 'anapai xepüyupatacä  
 xaüsie miemete xe'ayuyeyitüatü.  
 Que xemütexeyicühuavecai,  
 xecani'uxive'eriecaitüni mexi 'axa  
 xeteyuriecä. Hicürixüa 'aixüa  
 xetexeyarietü xecanayeitüarieni,  
<sup>22</sup>'iya tevitütü yuvaiyarisie  
 mumücü. Müpaü tiniuyurieni  
 müxe'aye'atüanicü Cacaüyari  
 huxie, hesiena mieme xepasiecacu,  
 xecaseviximariyecacu, xehesie  
 carahüivacacu. <sup>23</sup>Müpaü  
 catiniyümücü xücate xeyuhayeva  
 yuri xete'erietü, xetesariya  
 türücaüyecacu xebetüa,  
 xeseiriyarietü xecacuyaximetü,  
 masi xe'icuevietü tita mütixata  
 niuqui 'aixüa manuyüne.

Xecani'enieni 'iya niuqui, canihēcüasieca naisarie que müranetüarie muyuavitüa. Ne Papuru neniuhürütüarieni hepaüsitana.

**Papuru que mütiuhürütüarie nuivarite vahesie mieme**

<sup>24</sup>Hicüsüari ne necaninetemavieca sepa nemü'uximatüarie xehesie mieme. Necaney'e'atüani tita müreyevese nemü'uximatüariecacü, Cürisitu que müti'uximatüarie. Nevaiyarisie müpaü netiniyurieneni 'iya vaiyarieyasie mieme, memüyutixexeüriva mehümetüacu.

<sup>25</sup>Ne vaparevivame necanayani, Cacaüyari que münetiuhürütüa xehesie mieme, 'aye'arücamecü nemüticuxatanicü Cacaüyari niuquieya. <sup>26</sup>Iya niuqui cani'aviesiecaitüni. Tucari manucatüasie pücamaşıücücai, teüteri quepaucua memanüticü müpaü mepücatemaicai. Masi hicü masiücütü canayani, Cacaüyari teüterimama müpaü memütemaicacü. <sup>27</sup>Cacaüyari niuyuvaüriya müpaü mütiva'üquitüanicü müme, vaücavamecü visi que müti'ane 'icü niuqui mü'aviesiecai, que mütimarive nuivarite vasata. Cürisitu xehesie catiniviyani, 'ayumieme xecanicuevieca visi müti'ane. Mücü canihücütüni niuqui mü'aviesiecai.

<sup>28</sup>Tame tecanihecüatani Cürisitu, que temütevacu'imaiya yunaime teüteri, que temüteva'üquitüa yunaime teüteri tetemaivavetü naimecü, temüvaraye'atüanicü

yunaime teüteri me'aye'arücame Cürisitusie meteviyame.

<sup>29</sup>Ayumieme netinine'uxitüaca, yemecü neti'uximayatü, 'iya türücaüyemecü que münetiuyütüa.

**2** Neuyeveca xemütemaicacü vaüca que nemütine'uxitüa xehesie mieme, Rautiseyatari vahesie mieme meta, hipameta queyupaümetü memücanesixeiyavave vahesie mieme, <sup>2</sup>va'iyari mütuicarienicü, memüyutaxeviceü meyunaqui'erietü, memeuca'unicü yemecü yametemaitü que mütiheiserie, memeitimanicü tita Cacaüyari müti'avietacai. Mücü Cürisitu canihücütüniri, <sup>3</sup>hesiena mü'aviesiecü nai que müreucave Cacaüyari, que mütimate que mütimaive. <sup>4</sup>Ipaü nepaine, xevitü pücatixe'irüviyani visi tiuniütü xeicüa. <sup>5</sup>Sepa nevaiyarisie xehesüa nemüca'uyeica, ne'iyarisie püta xehesüa neniuyeicani nenetemavietü, nexexeiyatü 'aixüa xete'aitüariecame, xesese'ime yuri xete'erietü Cürisitusie.

<sup>6</sup>Qesusi que xemüteyeturiyarie Ti'aitametüme Cürisitütüme, yaxeixüa hesiena xeteviyatü 'axequeneu'uvani.

<sup>7</sup>Hesiena xequeteneviyani cüye que mütiyiya yunanayarisie, qui que mütiyiya tesariyasie. Heiseriemecü xequeneseiriyarieni yuri xete'erietü, xemüte'u'üquitüariepaü. Pamüpariyusi xequenepitüaca Cacaüyari, vaücava yuri xete'erietü.

**Tucari que mürexeyia yemecü, Cürisitusie tiviyatü**

<sup>8</sup>Xequeneyucuerivayurieca capa xevitü xenavanicü,



timaivemepaü ticuxatatü, yacü  
 xEICÜA tixe'irüviyatü teüteri  
 que memüteyuyetui ri yuyeyari,  
 hehecua mete cuiepa memütama  
 que memüte'üquitüarie, peru  
 Cürisitu que maine caticuxatatü.

<sup>9</sup>Iya vaiyarieyasie 'acaniuveni  
 naitü que 'anetü mühücü Cacaüyari.

<sup>10</sup>Xemeta hesiena xeteviyatü  
 xecanaye'axüani. Yunaitü  
 memüte'aita heiserie memexeiya  
 canivamu'utüni. <sup>11</sup>Hesiena  
 xeteviyatü xecaniu'inüaritüarieni  
 yacütütü, peru ramamacü que  
 mütixitequeie pücatixaü. Cürisitu  
 püta que mütixe'u'inüaritüa,  
 canixe'upitüani xemüthayevacü  
 yaxeteyurietü teüteri vavaiyari que  
 mütivacuyuitüva. <sup>12</sup>Quepauca  
 xemuca'üyarie, hamatüana  
 xepucateuqui. Mücü meta,  
 quepauca xemuca'üyarie,  
 xecananucu'uitüarieni, yuri  
 xete'erietü quename müpaü  
 tixecuyuitüaniquecai Cacaüyari,  
 yaxEICÜA que mürenucuquetüa  
 Cürisitu müquite vasata.

<sup>13</sup>Sepa xemümüquitetücai  
 xeheyexürüvetü  
 xeca'inüaritüarievavetü  
 que xemüteteüteri, 'iya  
 canixe'anutanieritüani  
 Cürisitumame.

Catatineuyehüvirieni naime que  
 temüteheuyexürüvecai. <sup>14</sup>Que  
 temüte'ataca'utüa yacütütü  
 'aitüaricasie yatemütecahunicü,  
 mücü 'utüarica hixüapa 'uветü  
 que mütatica'unaquecai, Cürisitu  
 neyeitüani heihurieca yacütütü,  
 yucuruxisie 'icürapuximaca.

<sup>15</sup>Ixuriqui müye'ipaü nivarevivi  
 müme memüte'aita heiserie

memexeiya, vahecüatüatü yunaime  
 vahüxie. Curuxisie 'uyevietü,  
 nivarehapani yu'utüma, vara'ivaca.

**Taheima timiemecü  
 xequeneyuvaüriyani**

<sup>16</sup>Xevitü 'ayumieme  
 pücaxexanetani que xemütecua'a,  
 que xemüte'uye'e, que  
 xemüte'ivevie 'ixüarari ya mesa  
 'ixüarariyari ya 'uxipiya tucari, que  
 xemücate'ivevie nusu. <sup>17</sup>Mücü tita  
 'umüramie 'etüriyaya canihücütüni,  
 peru que mü'ane 'umamie,  
 Cürisitu canihücütüni. <sup>18</sup>Xevitü  
 pücaxetave'erieca, sepa 'iya  
 müyuvaüriya müyu'usiviecacü, sepa  
 müyuvaüriya müvarayexeyanicü  
 Cacaüyari tupirisiximama, sepa  
 vaüca müyu'iyaritüa yuheinüsi  
 hepaüsita. Que mü'ane müya  
 mü'ane canihüsierieca, tita  
 vaiyarieyasie mütimieme xEICÜA  
 cana'erivani, <sup>19</sup>tamu'usie  
 cativiyatü. Peru mücü tamu'utütü  
 canihücütüni que mü'ane  
 mütimicua yuvaiyari. Turuyaricü  
 tatayaricü canitaxeviriyani  
 yuvaiyari mütaverecü, Cacaüyari  
 que mütiveriya.

<sup>20</sup>Mericiute, Cürisitumatü  
 xüca xe'ucuini, para tavari  
 xemücacuyuitüarienicü  
 hehecua mete cuiepa memütama  
 que memüte'üquitüarie, titayari  
 'aumü 'axete'u'uva cuiepa  
 memütama que memütexe'aitüa,  
<sup>21</sup>Tixaü pepüca'icumaüvani  
 'icü, pepüca'icuaaca 'iya,  
 pepüca'imayüani 'icü, que  
 memutiyuane. <sup>22</sup>Mücü naitü  
 canitixümücü mayüiyatücaitü.  
 Xepücateyu'aitüarinüa teüteri que

memüte'aita que memüte'üquita.

<sup>23</sup>Que memüteyurie, timaiveme niuqueiyapaü catini'eniüriücüni, que memüteyumaive'erie, que memüteyu'usiviva, carima que memiyurie yuvaiyari. Peru que memüteyurie, 'asimepücayüvave para memücateha'erivanicü tita vavaiyarisie mütimieme xeciüa.

**3** Xüca Cürisitumatü xe'anucu'uitüarieni, taheima timiemecü xequeneyuvaüriyani, haque meca Cürisitu, Cacaüyari serieta 'acaitü, mana timiemecü. <sup>2</sup>Taheima timiemecü xequeneyumaica, cuiepa timiemecü pücatixaü. <sup>3</sup>Xeme xecaniucuniri. Que xemüte'ayeyuyuri, xecani'aviesieca Cürisitumatü, Cacaüyarisie xemüteviyacü. <sup>4</sup>Cürisitu canitaturarütüni. Quepaucua masiücütü mayani, 'anata xeme hamatüana xemasiücütü xecanacünicuni visi müracu'anesie.

**Que temüte'u'uvacai meripai,  
que temüte'uhecuarivarie**

<sup>5</sup>Ayumieme müquite xequenayueitüaca que xemütecumaüvacai yuvaiyarisie cuiepa timiemecü. Xepüca'icumaüvani que mü'ane mücaxe'üya mücaxecüna. Xepücateyucahive'erieca. Xepücate'ihive'erieca tita 'aixüa mücati'anene, tita mücatixepini. Que mü'ane müthive'erie tita mücatipinieya, tete 'ayexeiamepaü caniyüanemücü. <sup>6</sup>Müpaü memüteyuriecü, 'ayumieme Cacaüyari haxüa canivapitüamücü müme yamemücatecahu. <sup>7</sup>Xemeri

quepaucua müpaü xeteyurietü 'axemu'uvacai 'anapai, yaxeciüa yaxecateniyuriecäitüni que memüte'u'uva. <sup>8</sup>Hicü masi xequeteneuhayeva que xemüteyuriecäi naime, que xemüteyuca'uxive'erieca, que xemüteyuhaxüatüacai, 'axa que xemüteyuriecäcäi, 'axa que xemutiyanecäi hipame vahepaüsita, niuqui 'axa manuyüne que xemütexüatüacai yutetacü.

<sup>9</sup>Xepücateyu'itaiyani. Xequenehüva mücü tevi müye'li, xecahe'erivatü que xemüteyuriecäi meripai.

<sup>10</sup>Mühecua püta xequenacatüqui, xehecuarivarie ximetü yemecü que xemüteyurie hicü, xemimaicacü Cacaüyari, xeveviece mepaü xe'anenetü xemacünecü. <sup>11</sup>Iyasie tiviyatü sepanetü mücüriyecu mühuriyu, sepa mu'inüasie Huriyusixi vaxitequiyacü, sepa müca'u'inüasie, sepa tahepaü mücäniuve, sepa müsitiyatanaca, sepa vaüriyarica müti'uximaya, sepa müyunü'a, Cürisitu naitü canihücütüni, yunaime vahesie catiniviyani.

<sup>12</sup>Ayumieme nepaine, Cacaüyari müxe'anuyexeciü, teüterimama xemühümeccü, xemünaqui'erivacü, xeteyucananimayatü xequenacüni yu'iyarisie, mühecua xe'anacatütü. 'Aixüa xequeneuyuyuriecä, xequenayueitüa, xepücateyucatave'erieca, 'axequeteneutevini xecaha'atü.

<sup>13</sup>Xequeneyunevieca, xequeteneuyuyehüviriecä masi, xüca xevitü 'iniuquimamücüni xeime. Ti'aitame que mütixehueyhüviri, xemeta

hepaüna xequeneyüaca.

<sup>14</sup>Xe'ixeviriyatü naime, xequeteneyucanaqui'erieca, xemaye'axüanicü. <sup>15</sup>Cürisitu que mütixepitüa yu'iyarisie xemüca'uximatüariecacü, quetixe'aitüaca xe'iyarisie. Xecaniuta'inierieni yu'iyarisie xemüca'uximatüariecacü, xei vaiyari xemühümeccü. Mücü meta, pamüpariyusi teyupitüvamate xequenacüni.

<sup>16</sup>Cürisitu niuquieya xehesie queheycani yemecü, naimeccü xetemaivavecacu. Müccü xequeteneyü'üquitüaca xequeneyutuicani, Cacaüyari cuicarieyacü, nüavari Cacaüyari hepaüsita manuyü necü, cuicari 'Iyarisie timieme hepaüsita manuyü necü xeteyücühüavetü. Xequeneuticuicani, yu'iyarisie xe'linüavatü Cacaüyari, pamüpariyusi xe'ipitüatü. <sup>17</sup>Naime sepa tita xemüteyurie, sepa xemutiniuca sepa xemütecumaüva, naime xequeteneyurieca Ti'aitame Quesusisüa xemiemetetütü. 'Iya xepareviecacu, pamüpariyusi xequenepitüaca Cacaüyari müta'uquiyari.

**Que müreuyevese  
yamüvayurienenicü hipame,  
xüca hecuameccü 'ayeyurini**

<sup>18</sup>'Ucari xequeniva'enieca yücünama, que müreuyevese Ti'aitamesie xeteviyacacu. <sup>19</sup>'Uquisi meta, xequenivanaqui'erieca yü'üitama, 'axa xepücatevacühüaveni. <sup>20</sup>Türi meta, yaxequetenecahuni naime que memütexecühüave xe'uquiyarima.

Ti'aitamesie xeteviyacacu, müpaü püreuyevese. Müpaü xeteyuriecacu, caninaqui'aca. <sup>21</sup>Xeme meta xemüva'uquiyarima, xepüca vahaxüatüaca yunivema, capa me'utivaüripenicü. <sup>22</sup>Xeme vaüriyarica xemüte'uximaya, yaxequetenecahuni naime que memütexe'aitüa xecusiyarima cuiepa memütama. Vahüxie xeicüa xepücateyurieca vanaqui'eriyacü, xevanaqui'asitüanique teüteri. 'Aixüa 'iyaricü püta xequetene'uximayaca Ti'aitame xeteheuyehüvirietü. <sup>23</sup>Sepa tita xemüteyurie, yu'iyaricü yaxequeteneyurieca Ti'aitamesie mieme, teüteri vahesie mieme pücatixaü, <sup>24</sup>müpaü xetemaitü, 'apuve yuri cusiyari. Que mütiunaquixü xehesie xemayüitaricü, xehesie catininaquisitüamücü 'iya. Yucusiyarisie mieme xequetene'uximayaca Cürisitusie mieme. <sup>25</sup>Que mü'ane heiseriemecü yamücatiyuriene, mücü catinapiniyariemücü que mütiuyuri. Cacaüyuri yücü pücativaxeiya teüteri.

**4** Xemeta xemüvacusiyarima, que mütheiserie xequetenivapitüaca te'uximayatamete, yaxeicüa xevayurietü, müpaü xetemaitü, xemeta taheima xemeixeyacü yucusiyari.

<sup>2</sup>Xepücatehayevani xeyunenevietü. Neneviericü xequenayeneniereni, pamüpariyusi xe'ipitüatü. <sup>3</sup>Quepaucua xemüyunenevie, tahesie miemeta xequeneyunenevieca, Cacaüyari

quitenie müreyepienicü tahesie mieme, niuqui temütecuxatanicü, tita müti'aviesiecai Cürisitu hepaüsita temütecuxatanicü. Müpaü nemütiyuriencü nepanutahüiya hicü. <sup>4</sup>Xequeneyunenevieca nemihecüatanicü tita müti'aviesiecai, que müreyeveşe yanemüticuxatanicü.

<sup>5</sup>Xetemaivavetü xequeneyüaca tacua miemete xevacühüavetü. Quepaucua xemüyüvave 'aixüa xemüteyurienicü, yemecü müpaü xequeteneuyuri. <sup>6</sup>Que xemütecuxata, 'aixüa xete'u'iyaritä xequetenecuxatani 'unacü yacütütü, xeniucü cahamuricacu. Xequeteneyü'üquitüaca quepaü 'aixüa müyüni xemüvata'eiyacü yuxexuime.

#### Vaürisica que mütivarunü'airiexüa

<sup>7</sup>Naime que nemütiuyuri catinixetaxatüamücü Tiquicu. 'Iya canita'ivatüni teminaqui'erie, tiparevivame yamüticamie canihücütüni, tahepaü catini'uximayaca Ti'aitamesie mieme. <sup>8</sup>Xemütemaicacü tahepaüsita, xe'iyari mütuicarienicü, 'ayumieme necanenunü'amücü xehesüa, <sup>9</sup>'Unesimumame. Mücüta canita'ivatüni teminaqui'erie, yacatinicamieni, xehesüa miemetütü. 'Uva que mütiyüane naime mecatenixetaxatüacuni.

<sup>10</sup>Canixevaüritüaca 'Arisitaricu nehepaü muviyarie. Maricuxita Verunave masuya püxevaüritüa. Xepüte'aitüarie hepaüsitana. Xüca xehesüa nuani, xequeneutanaqui'eri.

<sup>11</sup>Qesusi meta Cusitu mütiteva nixevaüritüaca. Huriyusixi vasata, 'ime xeiçüa nehamatü meteni'uximayaca Cacaüyari 'ena ti'aitatü mayanicü. Mecanenivaüriyani müme.

<sup>12</sup>Epaüraxi xehesüa mümieme canixevaüritüaca, Cürisitu Qesusisie mieme ti'uximayatü. Yuheyemecü xehesie mieme tiniyu'uxitüaca yunenevietü, müpaü 'utaitü, xemücacuyuitüarienicü xe'aye'atü, yemecü xeyuvaüriyatü naimecü que mütinaque Cacaüyari. <sup>13</sup>Necanihēcüataniqueyu, ca'uxetü que müti'uximaya xehesie mieme, Rautiseyatari vahesie mieme, Hierapuritari vahesie mieme. <sup>14</sup>Rucaxi canixevaüritüaca tiyu'uhayemavametütü neminaqui'erie, Remaxi meta püxevaüritüa.

<sup>15</sup>Xequenivavaüritüaca 'ivamarixi Rautiseyatari, Nimüpamame, müme memüyuyexexeüriva quitana vahamame. <sup>16</sup>Quepaucua 'icü xapa mütiterüvarieni xehüxie, xequenivaruhüritüa Rautiseyatari memüyuyexexeüriva memiterüvanicü mümeta. Rautiseya mieme xapa xequeneterüvani xemeta. <sup>17</sup>'Ipaü xequeteneutahüavi 'Aruquipu, Quene'acuerivayurieca pemeye'atüanicü 'ahüritüarica, que pemütühüritüarie Ti'aitamesie petiviyatü.

<sup>18</sup>Ne Papuru nemamacü neti'utütü necanixevaüritüaca. Xequenena'erivani ne'anutahüiyacame. 'Aixüa quetiüca'iyarini xehesie mieme.

# TESARUNICATARI

## Mexüacame Xapayari Que Mütivarunü'airi Papuru

---

### Vaürisica

**1** Papuru Sirivanumatü  
Timuteumatü  
tecanixevaüiritüaca Tesarunicatari  
xemüyuyexexeüriva Cacaüyari  
müta'uquiyarisie xeteviyatü,  
Ti'aitame Quesusi Cürisitusieta  
xeteviyatü. 'Aixüa xüca  
mete'u'iyarini xehesie mieme,  
xüca mexepitüaca yu'iyarisie  
xemüca'uximatüariecacü.

### Tesarunicatari 'üquisica que memüte'acü

<sup>2</sup>Taheyemecü pamüpariyusi  
tecanipitüaca Cacaüyari yunaime  
xehesie mieme, texexatatü  
quepaucua temütatineneviva.  
<sup>3</sup>Tecatehayevatü yatetena'erivani  
que xemüteyurie yuri  
xete'erietü, que xemüte'uximaya  
xeteyucanaqui'erietü, que  
xemüte'uca'eniva xe'icuevietü  
Tati'aitüvame Quesusi Cürisitu,  
tacacaüyari ta'uquiyari hüxie.  
<sup>4</sup>Neuxei ne'ivama Cacaüyari  
müxenaqui'erie, tepütamate  
xemanayexeyariecü. <sup>5</sup>Müpaü  
tepütamate taniquü 'aixüa

manuyüne xehesüa mücanuacü  
niuquicü xeicüa. Türücariyacü  
püta punua, 'Iyari Mütiyupatacü  
punua, yuricü tetetamaicacu punua.  
Xeme xepütamate xesata que  
temü'anenecai xehesie mieme.

<sup>6</sup>Xeme xetasi'üquetü  
xenacüne, Ti'aitameta xe'üquetü  
xepacü. Xepitanaqui'erie niuqui  
vaüca xe'uximatüarietüvetü,  
xeyutemamavietü siepüre 'Iyari  
Mütiyupata que mütixetemavieriya.

<sup>7</sup>Müpaü xeyüatü 'üquisica  
xenacüne yunaime yuri  
memüte'erie vahesie mieme,  
Maseruniyatari 'Acaiyatarita.

<sup>8</sup>Xehesüa putiraurüca Ti'aitame  
niuquieya. Cacaüyarisie yuri que  
xemüte'erie xeme, Maseruniyasie  
'Acaiyasie xeicüa pücatücuxasiva,  
masisü naisarie tinicuxasivani.  
'Ayumieme tixaüri pücareuyevese  
tame temütiniunicü. <sup>9</sup>Mümetütü  
tahepäsüta metenicuxatani quetütü  
reyü quepaucua tame xehesüa  
temeta'axüa, que reyü quepaucua  
ta'aurie xemaxürie, quepaucua  
Cacaüyarisie xemüte'uviyaxü  
tetexi xavarucu'eirica,  
xemüte'uximayacacü Cacaüyari

mayeyuri yuricü 'amuyeicasie mieme, <sup>10</sup>xemicueviecacü Nu'aya taheima macaneni. Cacaüyari yunive nanucuquetüani müquite vasata. Quesusi canihücütüni que mü'ane mütasi'utavicueisitüa haxüa maye'axime mücatasi'axixüanicü.

**Papuru que müti vapareviecai  
Tesarunicatari**

**2** Neuxei ta'ivama, xemetütü müpaü xepütemate, xüanacüa püca'uyü quepaucua xehesüa temu'axüa. <sup>2</sup>Sepa temüte'ucuinixü xehesüa tecata'axüavavetü cuxi, sepa 'axa temütecühüavarüvacai Piripusie, xeme que xemütemate, tacacaüyarisie teteviyatü tepücama macai, 'ayumieme tetenixe'utaxatüani Cacaüyari niuquieya 'aixüa manuyüne cui tete'uxitüarietü. <sup>3</sup>Que temütexetuica, temeuyexürüvecü temüca'itiyatücacü tepücatecuxata tete'irüvietü, <sup>4</sup>masi Cacaüyari que mütatiuta'inüataxü temühüritüariecacü niuqui 'aixüa manuyüne hepaüsita, müpaü püta tetenicuxatani. Teüteri tevatemavieritüacutü tepücatecuxata, que mü'ane ta'iyari müta'inüatane tetemavieritüacutü tetenicuxatani püta Cacaüyaritüme. <sup>5</sup>Tame hasuacu visi tete'unütü 'irümaricü tepüca'yüacai, que xemütemate xeme. Tixaü tepücatehive'eriecai 'avie. Cacaüyari munierixü yacatinihecüatani. <sup>6</sup>Tepücatecuvautüvecai teüteri tahepaüsita 'aixüa memutiyanenicü, ni xeme ni hipatü, sepa temüyüvavecai

väüriyarica temüxepitüanicü Cürisitu nü'arimama temühümeccü. <sup>7</sup>Masisüari xesata tepüyüacai carima tecateyurietü. Sisivame yunivema müvaveriyapaü teniyüacaitüni. <sup>8</sup>Tame yaxeciüa texehive'erietü tenitaväüriyacaitüni temüxeyetüirienicü Cacaüyari niuquieya 'aixüa manuyüne, masisü cuxi tenitaväüriyacaitüni temüxeyetüirienicü ta'iyarita, tanaqui'erima xemacücü. <sup>9</sup>Camüsü ta'ivama, müpaü xetena'erivani que temüte'uximayacai que temüteta'uxitüacai. Tucaricü tücaricü tete'uximayatü capa tetexe'uxitüanicü ni xeime, tetenixecuxaxatüvacaitüni Cacaüyari niuquieya 'aixüa manuyüne.

<sup>10</sup>Xeme xemunenierixü Cacaüyarimatü xetenihecüatani que temüyüacai xeme yuri xemüte'erie xehesie mieme, Cacaüyarisie mieme yatetecahutü, heiseriemecü teteyurietü, tahesie carahüivacacu. <sup>11</sup>Müpaüta yaxeciüa xecatenimaica que temütexetuicacai, va'uquiyari yunivema müvatuicapaü, texteuicatü texe'imajyatü yuxexuime, <sup>12</sup>texehüritüatü 'axemu'uvanicü que müreyeyese 'amuyeicanicü Cacaüyarisie mieme. Mücü canixe'inieca 'axemu'uvanicü 'iya tixe'aitüacacu, müxe'inie visi xe'ananetü xemayeitüarienicü hepaüna.

<sup>13</sup>'Ayumieme tameta tecatehayevatü pamüpariyusi tecanipitüaca Cacaüyari 'icücü, quepaucua xemitanaqui'eri Cacaüyari niuquieya xetasi'u'enieca, teüteri vaniucü xe'erietü

xemüca'itanaqui'ericü, yuricü  
 Cacaüyari niuquieya que mütiñücü  
 püta xemitanaqui'ericü. Mücü  
 canixecuyuitivani xeme yuri  
 xemüte'erie. <sup>14</sup>Xeme ta'ivama,  
 te'üquemete xenacüne xe'vä'üquetü  
 müme Cacaüyarisie mieme  
 memüyutixexeüriva Cureya  
 cuieyarisie Quesusi Cürisitusie  
 memüteviya. Xeteniucüne  
 xeteüterima mexe'uximatüacacu  
 vahepaü, yaxecüa Huriyusixi  
 memüva'uximatüacaipaü müme.  
<sup>15</sup>Huriyusixi Ti'aitame meniumieni  
 Quesusi, menivarucuini  
 Cacaüyari texaxatametemamata.  
 Mepütasi'anuyexüri tame.  
 Mepüca'inaqui'aritüa Cacaüyari  
 mepüvaraye'unie yunaimie  
 teüteri. <sup>16</sup>Mepücatasitaunie  
 temütevacühüavenicü  
 müme memücahuriyusixi  
 memütavicueisitüarienicü. Müpaü  
 mecateniyurieni yuheyemecü  
 memeye'atüanicü tita 'axa  
 memüteyurie. 'Imatürieca haxüa  
 nivaru'axixüani müme.

**Papuru que mücativeütacai  
 memüyuyexexeürivacai**

<sup>17</sup>Masi ta'ivama, tame sepa  
 yapaümexa xemütasinutüita  
 tahüxi teca'utinenierecacu peru  
 ta'iyarisie xecatasinutüitatü, masi  
 cuini mieme tenitamexüitüacaitüni  
 temixeyacü xenierica, cui  
 texehive'erietü. <sup>18</sup>'Ayumieme  
 xehesüa tepeucünicuca. Ne  
 Papuru heivari tavarita  
 nepeuyeimücücai, peru  
 Cauyumarie pütasinencai. <sup>19</sup>Tita  
 tetecuevie, titacü tetetatemamavie,  
 titacü 'aixüa tetetacühüaveni

tahepaüsita, muma manamana  
 'aixüa mütiyücühüavepaü,  
 Tati'aitüvame Quesusi  
 hüxie 'aixüa tetetacühüavetü  
 quepaucua munuani. Xemeri  
 xecatehüme. <sup>20</sup>Xeme xecümana  
 visi tetenixeiyarieca, xeme  
 xecatanitemavieritüaca.

**3** 'Ayumieme  
 tecate'uca'enivatüri, 'aixüa  
 tetenitamaicaitüni 'Atenasie  
 temücu'eirivacü taxaüta. <sup>2</sup>Timuteu  
 tenenü'ani. Mücü canita'ivatüni,  
 Cacaüyari caniparevivameyatüni,  
 tahamatü catini'uximayaca  
 niuqui Cürisitu hepaüsita 'aixüa  
 manuyüne ticuxatatü. Teneinü'ani  
 müxeseiriyanicü müxeväüriyanicü  
 yuri xemüte'eriecacü 'aixüa,  
<sup>3</sup>ni xevitü mücacunüitüarienicü  
 xe'uximatüarietacacu hicü. Xemetütü  
 müpaü xepütamate, tepucayasari  
 'uximatüaricacü. <sup>4</sup>Xehesüa  
 te'u'uvatü, yacatiyüvecacu cuxi,  
 müpaü tetenixe'utahüave quename  
 te'uximatüarietacacacai. Müpaü  
 tiniuyüni, müpaü xetenimaica  
 xeme. <sup>5</sup>Nesü 'ayumieme  
 necatiuca'enivatüri nepüretanü'a  
 yanemüretimanicü yuri que  
 xemüte'erie, cauca tiyu'isipavame  
 xeta'isipave neticu'erivatü, cauca  
 xüanacüa 'ayani tete'uta'uxitüacu  
 neticu'erivatü.

<sup>6</sup>Hicürixüa Timuteu xehesüa  
 heyeyaca tahesüa caninuani.  
 'Aixüa catatiniutahecüatüani  
 yuri que xemüte'erie, que  
 xemüteyucanaqui'erie, 'aixüa  
 que xemütatecu'eriva,  
 yuheyemecü xetasixeyacutü  
 tame temüxexeyacupaü.  
<sup>7</sup>'Ayumieme teniutuicarieni

xehepaüsita yuri xemüte'eriecü ta'ivama, sepa temüteuyehüva temü'uximatüarie naimecü. <sup>8</sup>Hicüsüari tenayeyuyurini xüca 'axe'uti'luca xeme, Ti'aitamesie xeteviyatü. <sup>9</sup>Queri teteyüvave temütehpinirieni Cacaüyari pamüpariyusi te'ipitüatü xehepaüsita, temavierica xemütasi'upitüacü vaücavame tacacaüyari hüxie. <sup>10</sup>Tucaricü tücaricü panuyuhayeva ta'ivaurica, te'ivaviriecacu temixeyiacü xenierica, temüxe'aye'atüirienicü tita müreyeveve yuri xete'eriecacu.

<sup>11</sup>Mücütütü Cacaüyari müta'uquiyari, Qesusi mütati'aitüvame, xüca 'aixüa 'iyurieni tahuye xehesüa temeta'axüanicü. <sup>12</sup>Xemeta xüca Ti'aitame xeve'eriyanı xeteyucanaqui'eriecacu, xenaqui'eriya manuyuhayevanicü xeyunaqui'eriecacu yunaitü, xevanaqui'eriecacu yunaime, yaxeciüa que temütexenaqui'erie. <sup>13</sup>Müpaü xeyüacacu, xe'iyari caniseiriyariemücü, xehesie carahüivacacu, xemeta Cacaüyarisie mieme xepasieyu Cacaüyari müta'uquiyari hüxie, quepaucua munuani Tati'aitüvame Qesusi yunaime Cacaüyarisüa miemete vahamatü.

**Que mütiuyeicani Cacaüyari  
münaqui'acacü**

**4** 'Imatürieca ta'ivama tepüxetavaviri, Tati'aitüvame Qesuisüsia temiemetetütü tepüxetuica 'axemu'uvanicü que xemütehima tame tetexecuxaxatüvacacu que

müreyeveve 'axemu'uvanicü xeminaqui'aritüanicü Cacaüyari, müpaütütü cuini mieme 'axemüte'u'uvanicü, 'axemüte'u'uvapaü.

<sup>2</sup>Xeme xepütemate que temütexe'uta'aitüa Ti'aitame Qesusi tasipareviecacu. <sup>3</sup>Ipaü pütinaque Cacaüyari, hesiena mieme xemüpasienicü. 'Ayumieme xepücavacumaüvani que mü'ane mücayü'üya mücayücüna. <sup>4</sup>Xeme yuxexuitü xequetenemaica xemüvaravitücünicü yü'üya, Cacaüyarisie mieme xepasietü, ve'eme xe'erietü, <sup>5</sup>xecateyucahive'erietü que mütixenaque xeicüa, nuivarite Cacaüyari memücamate vahepaü. <sup>6</sup>Xepüca'anuyehaitürüveni, xepüca'icua mana yu'iva que xemüteyurie. Ti'aitame 'apürapica mücü naimecü, meripai que temütexe'utahüavixü, que temütexecuhecüasitüiya.

<sup>7</sup>Cacaüyari pücatasi'uta'inie teca'itiatücaitü temacünecü. Hesiena mieme temüpasienicü püta pütasi'uta'inie. <sup>8</sup>'Ayumieme que mü'ane mixani'erie 'icü, tevi pücaxani'erie, masi Cacaüyari püta püxani'erie, que mü'ane mütatimicua Yu'iyari Mütiyupata.

<sup>9</sup>Xeme tixaü xepücateheuyehüva nemütixeta'utüirienicü tevi que mütivanaqui'erie yu'ivama ne'utaitü. Cacaüyari tinixe'üquitüaca xeme xemüyunaqui'eriecacü. <sup>10</sup>Müpaü xecatenivanaqui'erieca yunaime yu'ivama naisarie Maseruniasie memütama. Camü ta'ivama, tenixevavirica masi müpaü xemüteyuriecacü, <sup>11</sup>vaücava



xemütecuaunicü cayuvatü  
 xemexeianicü, yuxexuitü  
 yu'uximayasicacü xemüyüacacü,  
 yumamacü xemüte'uximayacacü  
 que temütexe'uta'aitüa. <sup>12</sup>Müpaü  
 xeteyurietü 'aixüa xeni'u'vacuni  
 que müreyeveese müme vana  
 memücu'u vahepaüsita, tixaü  
 xepücateheuyehüaca.

### Ti'aitame que mütinuani

<sup>13</sup>Ta'ivama, müpaü  
 pücatatinaquequeyu xüca  
 'asixecatemaicaque müme  
 memücusu vahepaüsita.  
 Pücatasinaquequeyu xüca  
 xeyuheiveriecaque hipatü yuri  
 memücate'erie meta'icuevatü  
 vahepaü. <sup>14</sup>Tame yuri teteni'erieca  
 Quesusi mumü peru manucque.  
 'Ayumieme Cacaüyari yaxeicüa  
 niva'atüamücü Quesusisimame  
 müme memeucusixüa Quesusisie  
 meteviyatü.

<sup>15</sup>Ipaü tetenixecühüaveni  
 Ti'aitame niuquieya mühücücü,  
 tame temütahayeva te'ayeyuyuritü  
 cuxi Ti'aitame munuanique, tame  
 tepücvaranuyehaitüiyaxüani  
 müme memeucusixüa. <sup>16</sup>Mücü  
 Ti'aitame taheima pacaneni  
 'utaniütü ti'aitatü, niuqui tuayamete  
 tiva'aitüvame 'utaniucacacu,  
 Cacaüyari cuxinetaya hüsiriecacu.  
 Müme memeucusixüa Cürisitusie  
 meteviyatü menanucu'ucuni  
 meri. <sup>17</sup>Tameta temücu'eirivani  
 te'ayeyuyuritü cuxi, 'ana cuitü  
 tecananutivitüquiecuni vahamatü  
 'axeicüa haisata, Ti'aitame  
 temanunaquecü taheima. Müpaü  
 tiyüyu, taheyemecü 'ateniu'vacuni  
 Ti'aitamematü. <sup>18</sup>'Ayumieme

xequenyünütüaca yuxexuitü 'icü  
 niuquicü.

**5** Ta'ivama, vitarite  
 tucarite hepaüsita  
 tixaü xepücateheuyehüa  
 xemüteta'utüiyarienicü. <sup>2</sup>Xeme  
 heiseriemecü müpaü xepütemate,  
 Ti'aitame tucarieya müpaü  
 catinaye'amücü tinavayame  
 tücacüta mü'axepaü. <sup>3</sup>Quepaucua  
 müpaü memutiyuaneni,  
 Cayuvatü tepexeiya,  
 tepücacueriva'a me'utiyuatü, 'ana  
 menica'unariecuni. Yapaucua  
 püva'axe 'uca mütiniverüme  
 cuiniyaya mi'axepaü.  
 Mepücatavicueni. <sup>4</sup>Xeme püta  
 ta'ivama, yüvipa xepüca'u'uva, 'iya  
 tucari pücaxe'axeni tinavayamepaü.  
<sup>5</sup>Xeme yunaitü hecüaripa  
 xecanimiemetetüni, tucarisie  
 xepümiemete que xemüte'ununuiva.  
 Tücacüta tepücamiemete, yüvipa  
 tepücamiemete. <sup>6</sup>Merücüte,  
 'ayumieme tepüca'utütupeni  
 hipame vahepaü. Tepayeneniereni  
 püta, tepütamaica. <sup>7</sup>Cucusumete  
 tücacüta mecanicusuni.  
 Tarüvecarixi tücacüta  
 mecanitarüveca. <sup>8</sup>Tame tucarisie  
 püta temümiemete tenitamaicacuni.  
 Yuri que temüte'erie, que  
 temütetacanaqui'erie, müpaü  
 tetenenacatücücuni cuya  
 camixayapaü temütacuerienicü  
 tatavisie. Tamu'usie cuya  
 xupureruyapaü tepenacaqueni  
 que temüteta'icuevacü  
 temütavicueisitüarierenicü.  
<sup>9</sup>Cacaüyari 'ena pücatasi'ucaye  
 temühecarienicü. Pütasi'ucaye  
 temaye'axüanicü püta que  
 temütetavicueisitüarieni,

Tati'aitüvame Qesusi Cürisitu yatatipitüacacu. <sup>10</sup>Mücü tahesie mieme pumü, tame 'axeicüa temayeyuyurinicü hamatüana, sepa temayeneniere sepa temücucusu. <sup>11</sup>'Ayumieme xequeneyuvaüriyani, xequeneyuseiriyani xemüyutaxevirecü, yaxaicüa que xemüteyurie.

**Papuru que mütivatuicacai  
'ivamarixi**

<sup>12</sup>Ta'ivama, 'ipaü tetenixevavirieca, xemüvamatenicü müme memüte'uximaya xesata, müme memüxe'uquiyarima Ti'aitamesie meteviyatü, müme memüxe'imaiya. <sup>13</sup>Cui ve'emetete xequeniva'erieca xevanaqui'erietü müpaü memüte'uximayacü. 'Aixüa xequeteneyuxeiyani yunaitü.

<sup>14</sup>Ta'ivama, 'ipaüta tetenixetavavirieniqueyu, xequenivaruta'imaiya müme memi'üraxie 'aisica. Xequenivavaüriyani müme memücatürüicavi yu'iyarisie. Xequenivatüicani müme memüverarani. Müixa xequeteneucanenevieca yunaime vahesie mieme.

<sup>15</sup>Xequeneyucuerivayurieca capa xevitü 'axa tipinirienicü xeime, 'iya 'axa miyuricü. Masi yuhayemecü xequetenecuvava 'aixüa xemüyuyuriecacü yuxexuitü, 'aixüa xemüvayuriecacü yunaime.

<sup>16</sup>Xequeneyutemamavieca yuhayeme. <sup>17</sup>Xecatehayevatü xequeneyunenevieca.

<sup>18</sup>Pamüpariyusi xequenepitüaca Cacaüyari naime hepaüsita. Müpaü catininaqueni Cacaüyari yaxemüteyuriecacü Cürisitu Qesusisie xeteviyatü.

<sup>19</sup>'Iyari xepücacütüsani. <sup>20</sup>Xepüca'itave'erieca texaxatamete vaniuiqui, <sup>21</sup>masi xequeteneuta'inüata naime. Tita 'aixüa müti'anesie xequeteneviyani.

<sup>22</sup>Nai 'axa müti'anene sepa que mü'ane xequeteneuhayeva.

<sup>23</sup>Mücütütü Cacaüyari mütasipitüa ta'iyarisie temüca'uximatüariecacü, mücü xüca xe'aye'atüani xepatatü yuhesie mieme. Xüca xe'üviyarieni xe'aye'axüavavetü que xemüte'u'iyari que xemüteyumate que xemütevaiyarite, xehesie carahüivacacu quepauca Tati'aitüvame Qesusi Cürisitu munuani. <sup>24</sup>Que mü'ane müxe'uta'inie yacatinicamieni, müpaü catiniyuriemücü.

**Que mütivavaürütüa, que müreyenü  
'aixüa 'utaitü vahepaüsita**

<sup>25</sup>Ta'ivama, tahesie miemeta xequeneyunenevieca.

<sup>26</sup>Xequenivavaürütüaca ta'ivamarixi yunaime, pasiecate que memüteyuvaürütüa.

<sup>27</sup>Ne nepüxehürütüa Ti'aitame nesi'eniecacu, yunaitü 'ivamarixi memüterüviyarienicü 'icü xapa.

<sup>28</sup>Tati'aitüvame Qesusi Cürisitu xüca 'aixüa tiuca'iyarini xehesie mieme. Müpaü xeicüa cani'aneni.

# TESARUNICATARI

## Hutarieca Mieme Xapayari Que Mütivarunü'airi Papuru

---

### Vaürisica

**1** Papuru Sirivanumatü  
Timuteumatü  
tecanixe vaüiritüaca Tesarunicatari  
xemüyuyexexeüriva Cacaüyari  
müta'uquiyarisie xeteviyatü,  
Ti'aitame Quesusi Cürisitusie  
xeteviyatü. <sup>2</sup>Cacaüyari  
müta'uquiyari, Quesusi Cürisitu  
müti'aitame, 'aixüa xüca  
mete'u'iyarini xehesie mieme,  
xüca mexepitüaca yu'iyarisie  
xemüca'uximatüariecacü.

**Cacaüyari que mütiva'inüatani  
müme 'axa memüteyurie  
quepauca Cürisitu munuani**

<sup>3</sup>Neuxei ta'ivama, neuyeveca  
tame taheyemecü pamüpariyusi  
temipitüacacü Cacaüyari  
xehepaüsita, que müreyeveve  
yatemüteyuriecacü xeme  
xemütetave'eriyarümecü yuri  
xete'erietü, yuxexuitü yunaitü  
xemütetamüiriyarümecü  
xeteyucanaqu'erietü.

<sup>4</sup>Ayumieme tameri 'aixüa  
te'utiyuatü xehepaüsita  
yatecatenivacuxaxatüvani

müme memüyutixexeüriva  
Cacaüyarisie meteviyatü.  
Müpaü tetenivacühüaveni, que  
xemüte'uca'eniva, yuri que  
xemüte'erie mexi xetaveveiyarüva,  
mexi xe'uximatüarie, nai  
que xemü'itüarrietüve.

<sup>5</sup>Yaxe'itüariecacu canimasiücünü  
Cacaüyari heiseriemecü que  
müti'inüata 'isücametütü.  
Müpaü xeteta'inüasieme xemeta  
xecanimarivacacuni, xehesie que  
mütinaqueni 'axemu'uvanücü  
Cacaüyari tixe'aitüvametücacu.  
Müpaü mütiyünicü xetenicuineni  
xemeta.

<sup>6</sup>Camüsü, Cacaüyari  
heiseriemecü catiniyuridemücü que  
mütivapinirieni va'uximatüatü  
müme memüxe'uximatüa,  
<sup>7</sup>que mütixepinirieni  
xemeta xe'uxipitüatü xeme  
xemü'uximatüarie, yatati'uxipitüatü  
tameta, quepauca masiücütü  
mayani Ti'aitame Quesusi taheima  
'acamietü, yuniuqui tuayamete  
memütürüccavi vahamatü 'acamietü,  
<sup>8</sup>taipäu merücaüyetü. Heiseriemecü  
canivaranutaxürimücü müme  
memüca'imate Cacaüyari,

müme yamemücatecahu  
 Tati'aitüvame Quesusi  
 niuquieya 'aixüa manuyünesie.  
<sup>9</sup>Müme müpaü memü'anene  
 que memüte'anutaxüriyani,  
 vahesie tininaquimücü  
 memüca'unarienicü yuheyemecü,  
 Ti'aitame hüxieya mecaxeyatü,  
 türücaüyetü que mütimarive  
 meca'ixeyatü <sup>10</sup>quepaucua  
 munuani. Caninuamücüsü visi  
 mütixeyarienicü yuteüterima  
 vahesie tiviyatü, yunaitü yuri  
 memüte'uta'erie memühüxiyanicü  
 me'l'ixüarietü 'iya tucarisie.  
 Müpaü catiniyümücü yuri  
 xemüte'ita'eriricü tita  
 temütehecüatacai xehesüa.

<sup>11</sup>Müpaü mütiyünicü, xehesie  
 mieme tenitanenevieca taheyemecü,  
 tacacaüyari müpaü mütixemaicacü  
 xeme xe'u'uvame que müreuyevese  
 'amuyeicanicü Cacaüyari 'ita'inieyu.  
 Tepütanenevieta tacacaüyari  
 yütürücariyacü meye'atüanicü  
 naime que xemüteyuvaiüriya  
 'aixüa xeteyuricutü, naime que  
 xemüteyurie yuri xete'erietü.

<sup>12</sup>Müpaü tiyüyu, que mü'ane  
 Tati'aitüvame Quesusi mühücü visi  
 catinixeyariemücü xehesie tiviyatü.  
 Xemeta visi xecatenixeyariyecuni  
 hesiena xeteviyatü, tacacaüyari  
 Tati'aitüvame Quesusi Cürisitu  
 'aixüa mütiuca'iyaricü.

**Masiücütü que mürayani 'iya tevi  
 yamütiyurieneni que mücatiheiserie**

**2** Hicü ta'ivamarixi, 'ipaü  
 tetenixetavavirieniqueyu  
 yaxemüteyuriecacü xeteha'erivatü  
 que mütinuani Tati'aitüvame  
 Quesusi Cürisitu, xeteha'erivatü

hesüana que temütecuxeüriyani.  
 Tepüxetavavirie <sup>2</sup>yapaucua  
 xemüca'ucuyuitüarienicü  
 que xemüteyumate,  
 xemücamuinariecacü sepa  
 müxemuina xevitü 'iyari ya  
 niuqui ya xapa tahesüa vaniu  
 mümieme, müpaü 'utaitü quename  
 Ti'aitame tucarieya 'aye'ari.  
<sup>3</sup>Xüca tüma haquevasü xevitü  
 caxe'ucuamanaque. 'Asipücaüni  
 mexi cuya cayusutüave meri,  
 'arique mexi masiücütü ca'ayeive  
 mücü tevi yamütiyurieneni  
 que mücatiheiserie, que  
 mü'ane müca'unarieni. <sup>4</sup>'Iya  
 neye'uniecamücü nitave'eriecamücü  
 naime cacaaüyari mütiteva, naitü  
 mürayexeyari. Yücümana  
 canayerümücü Cacaüyari  
 tuquieyata, cacaaüyari yuxatatü.

<sup>5</sup>Müpaü xecateha'eriva  
 müpaü nemütixetaxatüacaicü  
 quepaucua xehesüa nemeyeicacai  
 cuxi. <sup>6</sup>Hicürita xecatenimaica  
 tita mütinena, masiücütü  
 müca'ayanicü mexi tucariyari  
 ca'aye'ave. <sup>7</sup>Tita mücatiheiserie  
 'ari 'avie caniyüaneni. Masi  
 hicü xEICÜa caniyüaneni mexi  
 que mü'ane hixüatapai 'uvetü  
 minena ca'anuyevitüquieve  
 cuxi. <sup>8</sup>Yemieyu, masiücütü  
 nayeimücü 'iya yamütiyurieneni  
 que mücatiheiserie. Ti'aitame  
 Quesusi canimiemücü 'iya yu'iyacü  
 yuteta miemecü, canica'unamücü  
 masiücütü 'ayuyetitüame quepaucua  
 munuani. <sup>9</sup>'Iya püta caninuamücü  
 Cauyumarie 'icuyuitüvacacu.  
 Nai türücaüyetü punuani  
 'inüarite müti'itava tiyurienetü  
 mamarivaveme. <sup>10</sup>Yamütiyurienecü

que mücatiheiserie, naimecü  
nıvacuamanamücü müme  
memüca'unariexime,  
memücayuvaüriyacaicü  
memınaqu'eriecacü tita yuri  
müraine memütaviceisitüarienicü.  
<sup>11</sup>'Ayumieme Cacaüyari  
püvaranü'airiva 'irümarı  
müvacuyuitüva, yuri  
memüteta'erienicü 'itaricasie,  
<sup>12</sup>memanutaxüriyanicü yunaitü  
yuri memücate'ita'eriri tita yuri  
müraine, masi memünaqui'a  
yameteyurietü que mücatiheiserie.

**Que memüte'anayexeyarie  
memütaviceisitüarienicü**

<sup>13</sup>Masi neuyeveca tame  
taheyemecü pamüpariyusi  
temipitüacacü Cacaüyari  
xehepaüsita, ta'ivama Ti'aitame  
müxenaqui'erie. Sutüapai  
Cacaüyari nixe'anuyexeyia  
xemütaviceisitüarienicü hesiena  
mieme xepasietü 'Iyari que  
mütixepata, yuri xete'erietü  
yuri que maine. <sup>14</sup>'Ayumieme  
canixe'uta'inieni tame niuqui 'aixüa  
manuyüne tetexecuxatüvacacu,  
Tati'aitüvame Qesusi Cürisitupaü  
visi xe'ananetü xemacüneceü.

<sup>15</sup>Hicümüsüari ta'ivama,  
xequeneuti'uti 'aixüa. Xequeneuviya  
tita xemüteyetuiriyari que  
xemüte'uta'üquitüarie ya niuquicü  
ya taxapacü. <sup>16</sup>Tati'aitüvame  
Qesusi Cürisitütütüri, Cacaüyari  
müta'uquiyari, que mü'ane  
mütasinaqui'erie, mütasituica  
yuheyeme, mütasipitüa 'aixüa  
temüta'icuevanicü yuri tete'erietü,  
<sup>17</sup>'iya xüca xetuicani xe'iyarisie,  
xüca xeseiriyani nai que

xemüteyurie que xemaitüca 'aixüa  
ti'aneme.

**Cacaüyari niuquieya 'aixüa  
quecuxasivani**

**3** Mericüsü 'ivamarixi,  
xequeneyunenevieca tahesie  
mieme, Ti'aitame niuquieya  
cuitüva mü'enierienicü naisarie,  
'aixüa mücuxasivanicü que  
müyüane xehesüa, <sup>2</sup>tameta  
temütaviceisitüarienicü müme  
teüteri yamemüteyurie que  
mücareuyevese, 'axa memüte'u'iyari  
'asimemücatasiyurienicü.  
Yunaitüsietü yuri mepücate'erie.  
<sup>3</sup>Masi Ti'aitame que  
maine yacatinicamieni.  
Mücü canixeseiriyamücü,  
canixe'üviyacamücü que  
mü'ane 'axa mütiuca'iyari  
'asimücaxeyurienicü. <sup>4</sup>Ti'aitamesie  
teteviyatü 'ipaü yuri  
teteni'erieca xehepaüsita, müpaü  
xeteniyurieni que temüte'aita,  
müpaü xeteniyuriecacunita.  
<sup>5</sup>Ti'aitame xüca 'aixüa  
'iyurieni xe'iyari Cacaüyariipaü  
xemüteyucanaqui'eriecacü,  
Cürisitupaü xemüte'uca'enivanicü.

**Que müreuyevese müti'uximayacacü**

<sup>6</sup>Ta'ivama, Tati'aitüvame Qesusi  
Cürisitusüa temümiemetecü 'ipaü  
tetenixe'aitüaca, xemüvahayevacü  
yunaima ta'ivama 'amemu'uva  
meyü'üraxietü yamecatecahutü  
que temütexe'uyetüri. <sup>7</sup>Xeme  
yücümama xecatenimaica que  
müreuyevese xemütasi'üquenecü  
tame. Xehesüa te'u'uvatü  
tepücata'üraxiecai. <sup>8</sup>Ni xeimesüa  
pa tepücatecuacai tecatetatuatü.

Masi tete'uximayatü teteta'uxitüatü tucariçü tücaricü tecateni'uximayacaitüni xeme temücatexe'uxitüanicü ni xeime. <sup>9</sup>Heiserie tecahexeyatü tepüçayüacai. Heiserie tecanexeyanitütü temütexe'uxitüanicü, peru müpäü tecateni'uximayacaitüni masi 'üquisica tematayeitüanicü, xemütasi'üquenicü. <sup>10</sup>Mücü meta, quepaucua xehesüa teme'uvcaci müpäü tetenixe'aitüacaitüni, xüca xevitü cayuvaüriyani müti'uximayacacü, mecuxi mücü tixaü mücaticuani. <sup>11</sup>Tepü'lenana quename hipatü 'ame'u'uva xesata meyu'üraxietü, mecate'uximayatü, yacü xeicüa meniuquixietü püta. <sup>12</sup>Müpäü tepüteva'aitüa müme müpäü memü'anene, Ti'aitame Qesusi Cürisitusüa temümiemetecü müpäü tepütevatuica, cayuvatü metitetü mete'uximayatü yu'icuai memütecuanicü. <sup>13</sup>Xemeta ta'ivama, xepüca'u'uxeni 'aixüa xeteyurietü.

<sup>14</sup>Xevitü xüca ca'lenieni tita temüte'utiyuane 'icü xapasie tete'utüatü, xequentimati 'iya, hamatüana xepüçayünüca, 'iya müteviyasitüarienicü. <sup>15</sup>Xepücatecu'erivani hepaüsitana xemütecuerivapaü que mü'ane müxe'aye'unie hepaüsita, masi xequene'imaiyani xemi'imaiyapaü yu'iva püta.

**'Imatürieca que mütivaxata  
'aixüa memü'itüarienicü**

<sup>16</sup>Masi que mü'ane yu'iyarisie müca'uximatüarie Ti'aitametütü, yuheyemecü xüca xepitüaca yu'iyarisie xemüca'uximatüariēcacü sepa naimecü. Ti'aitame yunaime xehamatü xüca 'a'uyeicani. <sup>17</sup>Ne Papuru nenixevaüritüaca nemamacü neti'utüatü. 'Icü canine'inüaritüni naime xapasie, 'ipaü nepütüu'utüa. <sup>18</sup>Tati'aitüvame Qesusi Cürisitu 'aixüa xüca tiuca'iyarini yunaime xehesie mieme. Müpäü xeicüa cani'aneni.

# TIMUTEU

## Mexüacame Xapayari Papuru Que Mütinü'airi

---

### Vaürisica

**1** Ne Papuru Cürisitu Qesusi nü'arieya necanihücütüni müpaü mütiu'aitaxücü tasivicueisitüvame Cacaüyari, que mü'anesie yuri temüte'erie mexi teta'icueva meta Cürisitu Qesusi müpaü mütiu'aitaxücü. <sup>2</sup>Nemanivaüiritüaca Timuteu. Yuricü pecaninenivetüni yuri temüte'eriecü. Cacaüyari müta'uquiyari, Cürisitu Qesusita mütatü'aitüvame, xüca 'aixüa mete'u'iyarini 'ahesie mieme, xüca memasinenimayaca, xüca memasipitüaca 'a'iyarisie pemüca'uximatüariecücü.

**'Uquisica 'axa mü'ane hepaüsita que müti'imaiyaxü**

<sup>3</sup>Maseruniya cuieyarisie quepaucua nemüyemieximecai, müpaü nepümatituicacai 'Epesusie pemü'ahayevacü, pemütiva'aitüanicü hipame capa yücü mete'üquitanicü <sup>4</sup>capa meva'enienicü yacü xeicüa que memüte'üxasita niuqui mücaparivecü xeime ramare

hepaüsita. Que mü'ane müpaü müti'üquita niuqui xüatüarica püvevie xeicüa, pücaheye'atüa tita Cacaüyari müti'hüritüa para yuri ti'erietü yamütiyurienenicü.

<sup>5</sup>Icü 'ayumieme pucuyüane xasica, mütiyucanaqui'eriecacü 'iyarieya 'itiyacacu, ca'itate'acacu, yuri ti'erietü peru huta 'iyariyari cahexeyatü. <sup>6</sup>Hipatü xaüsie me'ucuyuneca mücü hepaüsita, ta'aurie menaxürieni. 'Ayumieme yacü xeicüa mecatenicuxatani.

<sup>7</sup>Püvanaque 'inüari niuquiyari hepaüsita memüte'üquitanicü, peru 'asimepücatemate tita memütehaitüca.

Mepücaheitimaivave tita memütexata, sepa türücaüyemecü müpaü memütécuxata.

<sup>8</sup>Süricüte müpaü tepütémate, 'inüari niuquiyari 'aixüa cani'aneni tevi xüca yaticamieni he'erivatü 'inüari mühücücü, <sup>9</sup>müpaü timaitü, 'inüari pücaheuyevese xüca tevi heiseriemecü yaticamieni hesiena. Müme 'inüari memütisana vahepaüsita püta pücuxasiva, müme memüca'enana vahepaüsita, müme Cacaüyari memüca'ayexeyia

'axa memüteyurie vahepaüsita, müme 'axa memü'anene Cacaüyari memüxani'erie vahepaüsita, müme memüvacuya yu'uquiyarima yuvarusima memüteyumemiva vahepaüsita, <sup>10</sup>memüvacumaüva que mü'ane mücava'üya mücavacüna vahepaüsita, 'uquisi hipame 'uquisi memüvacumaüva vahepaüsita, müme memüvanava teüteri vahepaüsita, müme memüteyu'itaiya vahepaüsita, müme memüyühürütüa mete'itavatü müme vahepaüsita. Hipatü yunaitü memeye'unie 'üquisica müseüye, müme vahepaüsita pücuxasiva 'inüari, <sup>11</sup>que maine mücü niuqui müpaü manuyüne visi que mütimarive Cacaüyari yutemavietü, que nemütühürütüarie yanemüticuxatanicü ne.

### Papuru que mütiuhürütüarie

<sup>12</sup>Pamüpariyusi necanipitüaca que mü'ane münesitürücarüya Quesusi Cürisitu mütati'aitüvame, mücü yaneticamieme münesi'eriecü, münesi'ucayecü müpaü nemütü'uximayacacü, <sup>13</sup>sepa ne meripai nemiseviximacai 'axa ne'utaitü hepaüsitanä, sepa nemitaveiyarümeccai, sepa nemitave'eriecai. Nepunenimayasie masi müpaü nemütüyurienecaicü 'asinecatimaitü quepaucua yuri nemücati'eriecai. <sup>14</sup>Tati'aitüvame cuini mieme 'aixüa pütüca'iyaricai nehésie mieme, pünesi'upitüa yuri nemütü'eriecacü nemütinecanaqui'eriecacü Cürisitu Quesusisie netiviyatü.

<sup>15</sup>Icü niuqui yuricü paine, neuyeveca münaqui'erivanicü

yemecü, quename Cürisitu Quesusi cuiepa nua 'axa teyuruvamete vatavicueisitüanique. Ne 'axa teyuruvamete vasata nepüve'eme. <sup>16</sup>Peru 'ayumieme nepunenimayasie, Quesusi Cürisitu masi vaücavamecü masiücüme mayeitüanicü nehésie, naimecü que müreuterive tiuca'enivatü, 'inüari nemayanicü mexüacame nehücütütü, memünesiha'erivanicü müme 'arique hesiena yuri memüteta'erieni yuheyemecü memayeyuyurinicü. <sup>17</sup>Que mü'ane cuie naime müti'aitame yuheyemecü, que mü'ane capünivetü caxeyarievettü yuxevitü timaivetü mücacaüyari, mücü ve'eme quexasivani, visi quetixeyarieca yuheyemecü. 'Icü niuqui canise'ini.

<sup>18</sup>Neuxei nenive Timuteu, 'ipaü nepümati'aitüa, nepümasihürütüa yaxecüa niuqui 'ahepaüsita que mütixasivacai meripai quename müpaü petiyurieniquecai. Que pemütihēcüasiecai, cuyapaü queneýüaneni, 'aixüa 'anemecü quene'amieneni yuri peti'erietü 'a'iyari camasi'utate'acacu. <sup>19</sup>Hipatü memitixani'ericü yu'iyari varutate'acacu, vacanuva pucayunixü yuri que memüte'eriecai. <sup>20</sup>Müpaü mecani'aneneni Himeneu Herecanituru. Nepüvayetua Cayumarie müvaviyacü. Mücücü müpaü mepüte'üquitüarieca 'axa memüca'utiyuanenicü.

### Nenevieri hepaüsita que müti'üquitüa

**2** 'Ayumieme müpaü nepümatituica müpaü



yemecü müreuyevsecü,  
 xequenevavirica Cacaüyari,  
 nenevieri xequenepitüaca,  
 vaüriyarica xequenepitüaca,  
 pamüpariyusi xequenepitüaca  
 yunaime teüteri vahesie mieme,  
<sup>2</sup>cuiepa te'aitamete vahesie  
 mieme, yunaime vavemete vahesie  
 mieme, tame cayuvatü te'umatü  
 teca'uximatüarietü 'atemu'uvanicü,  
 naimecü Cacaüyari te'ayexeyatü  
 'aixüa tetecahutü. <sup>3</sup>Xüca müpaü  
 'aneni, 'aixüa caniyümücü,  
 catininaquimücü tasivicueisitüvame  
 Cacaüyari que mütixeyia. <sup>4</sup>Müpaü  
 pütinaque yunaitü teüteri  
 memütavicueisitüarienicü, tita yuri  
 müraine metemaitü memacünece.  
<sup>5</sup>Cacaüyari caniyuxevini. Niucame  
 meta que mü'ane Cacaüyari teüteri  
 müvatahüave, mücüta püyuxevi  
 tevitütü Cürisitu Quesusitütü.  
<sup>6</sup>Mücü püyuyetua yunaime  
 vahesie mieme vaxünaque. Müpaü  
 pütühecüasie tucari 'aixüa  
 mü'ane 'aye'acu. <sup>7</sup>Neta 'ayumieme  
 nepuqueri tixaxatame nü'ari.  
 Yuri nepaine, nepücati'itava.  
 Nepuqueri memücahuriyusixi  
 nemütivata'üquitüanicü tita yuri  
 temüte'erie hepaüsita tita yuri  
 müraine hepaüsita.

<sup>8</sup>Ayumieme müpaü pünetinaque,  
 haqueva memeyutixexeüriva 'uquisi  
 mequeyunenevieca yumamatecü  
 meheutimetü mepasietü tixaü  
 mecaha'atü niuqui mecaxüatüatü  
 yu'iyarisie. <sup>9</sup>Ucari yaxecüa,  
 va'ixuriqui 'aixüa requemericacu  
 mequeyuquemaritüaca  
 mecateyucatave'erietü que  
 memütüyuxexeyia, meyumaivavetü  
 püta. Sarica huru perüra

'ixuriqui cui müraye'axe  
 mücü naitü pücavaquemari.

<sup>10</sup>'Aixüa meteyurietü visi  
 mequeteyuquemaritüaca  
 püta. 'Aixüa caniyümücü  
 müpaü memütüyuriecacü 'ucari  
 xüca müpaü me'utiyaneni  
 quename Cacaüyari me'ayexeyia.  
<sup>11</sup>'Uca cayuvatü 'umatü  
 queti'yü'üquitüaca, naimecü  
 ti'aitüarietü. <sup>12</sup>Nepüca'itauni 'uca  
 müti'üquitanicü müti'aitüacacü  
 'uqui, masi peuyevese cayuvatü  
 mumacacü püta. <sup>13</sup>'Arani meri  
 putaveviya, 'arique 'Eva. <sup>14</sup>'Arani  
 meta pücati'irüvyarie, peru 'uca  
 tiu'irüvyarieca 'aisica saname  
 patüa. <sup>15</sup>Nitavicueisitüarienicü  
 quepaucua mütiniveni, yuri  
 mete'erietü meteyucanaqui'erietü  
 mepasietü xüca meyhahayevani  
 meyumaivavetü.

**Que müreuyevese te'üviyamete  
 müpaü memü'anenenicü**

**3** 'Icü niuqui yuricü paine. Que  
 mü'ane ti'üviyame mayeimücü,  
 mücü 'uximayasica 'aixüa  
 mü'ane pühive'erie. <sup>2</sup>Ayumieme  
 caneuyevaca ti'üviyamesie  
 tixaütü mücarahüivanicü, sepa  
 mutaxanesie. Xeime hüciä  
 pavitücünü 'uca, püyumaica,  
 pütimaiveni, 'aixüa pütiquemaca,  
 püvanaqui'erieca tevanarixi,  
 pütü'üquitaveni, <sup>3</sup>tavecame  
 pücahücütünü, pücavativayani, masi  
 püca'ayu'eriyani, pücayumieneni,  
 tumini pücahive'erieca, <sup>4</sup>'aixüa  
 'anemecü pütiva'aitüaca yuquie  
 quiecatari, yütüriyama  
 püvarexeyani tiva'aitüatü  
 naimecü 'aixüa ticamietü. <sup>5</sup>Que

mü'ane 'asimücatimate yuquie  
 quiecatari mütiva'aitüacacü, queri  
 tiva'üviyani memüyuexexeüriva  
 Cacaüyarisüa miemete. <sup>6</sup>Xique  
 yuri mütiuta'eri püchücütüni,  
 capa 'uhüsierieme 'acavenicü  
 Cauyumariepäü tatacuri pitüarietü.  
<sup>7</sup>Caneuyeveca tacua miemete  
 'aixüa memüte'ihécüatanicü  
 capa tatierivatü 'uviyarienicü  
 Cauyumarie viniyarieyasie.

**Que müreuyevese teparevivamete  
 müpäü memü'anenenicü**

<sup>8</sup>Teparevivamete yaxecüa  
 peuyevese müpäü memü'anenenicü.  
 'Aixüa mepütécahunü, hutacüa  
 mehaitücaütü yücü mepüchahitücani,  
 yamepüca'ayumiemetetüni väicava  
 vinucü, tumini mepüchahive'erieca  
 meteyucuanacutü, <sup>9</sup>va'iyari  
 'itiyatücaicacu cavatate'acacu  
 mepi'üviyani niuqui masiücütü  
 mayeitüarie titasie yuri temüte'erie  
 hepäüsita. <sup>10</sup>Müméta yaxecüa  
 vahepäü meque'uta'inüasieni  
 meri xüca meyüvaveni, 'arique  
 teparevivamete meque'acüne xüca  
 vahesie carahüivani. <sup>11</sup>Va'üitama  
 yaxecüa 'aixüa mepütécahunü,  
 niuquiperaixi mepücaüyaca,  
 mepüyumaica, yamepütécahunü  
 näimecü que memaitüca.  
<sup>12</sup>Teparevivamete 'ameque'u'uvani  
 yuxexuime mevaravitütü yü'üitama,  
 'aixüa 'anemecü meteva'aitüatü  
 yütüriyama yuquie quiecatari.  
<sup>13</sup>Müme teparevivamete 'aixüa  
 memeye'atüa yühürütüarica,  
 müme mepüte'iva 'aixüa  
 memümarivanicü, cui meyuyetuatü  
 yuri memüte'eriecacü Cürisitu  
 Quesusisüa miemete vahepäü.

**Niuqui masiücütü matüa,  
 que temüteheyexeiya  
 Cacaüyari manuyüne**

<sup>14</sup>Müpäü nepütita'icueva,  
 cuitüva 'ahesüa nemeta'anicü.  
<sup>15</sup>Me xüca 'enereutevini, müpäü  
 nepümatü'utüirie pemütimaicacü  
 que müreuyevese yamütüyeicanicü  
 Cacaüyari quie quiecatari  
 vasata. Müme mecanihümetüni  
 memüyutixexeüriva Cacaüyari  
 mayeyurisie memiemetetütü,  
 'iquisaraü tenari mecanihümetüni  
 mitituica tita yuri müraine.  
<sup>16</sup>Müpäü catinihecüaca, pümarive  
 mücü niuqui masiücütü matüa,  
 que temüteheyexeiya Cacaüyari  
 manuyüne.

'Iya masiücütü nayani  
 Yuvaïyarisie 'uyeicatü.  
 Heiserie pupitüarie  
 Yu'iyari hexeyatü.  
 Niuqui tuayamete mepixei.  
 Pücuxaxasivacai  
 Nuivarite vasata.  
 Yuri mepüte'uta'eri hesiena  
 cuiepa.  
 Visi 'anetü panutivitüquie.

**Que mutayü, 'arique que  
 memütehayeveni yuri mete'erietü**

**4** Yacatinihecüaca 'Iyari  
 que maine. 'Imatürieca  
 'aye'aximecacu, hipatü  
 metenihayevacunü yuri que  
 temüte'erie. Mepüva'enieni  
 'iyarite memüte'irüma,  
 cacaüyarixi 'axa memü'anene que  
 memüte'üquita, <sup>2</sup>mete'itavatü  
 yacü xecüa metecuxatatü.  
 Cauyumarie 'inüarieyacü  
 mepütitepüatüarieni yu'iyarisie,

'ayumieme pücvavarutate'ani  
va'iyari. <sup>3</sup>Müpaü mepüte'aitani  
memücaneneüqueniciü  
memücaviquiecacü,  
memütehayevanicü hipame 'icuai  
metecuatu, sepa Cacaüyari minetüa  
'icuai memenu'ünicü pamüpariyusi  
me'ipitüatü müme yuri memüte'erie,  
müme tita yuri müraine  
memütehetime. <sup>4</sup>'Aixüa cani'aneni  
naitü Cacaüyari mütiunetüa.  
Tixaütü pücatixani'eriva xüca  
'utanaqui'eriva pamüpariyusi  
'ipitüacacu Cacaüyari. <sup>5</sup>Cacaüyari  
niuquieyacü nitipasivani  
neneviericü.

**Cürisitu Qesusi parevivameya  
'aixüa mü'ane**

<sup>6</sup>Müpaü xüca petiva'aitüaca  
'ivamarixi, Cürisitu Qesusi  
parevivameya 'aixüa mü'ane  
pecaniyüanemücü, peveretü niuqui  
yuri que temüte'erie pe'enietü,  
'üquisica müseüye pe'enietü que  
pemütiveiya 'inüaritüme. <sup>7</sup>Que  
memüte'u'üxasita Cacaüyari  
meca'ayexeyatü 'ucaravesixi  
va'üxasicü, mücü quenexani'erieca.  
Quetine'a'üquitüaca masi  
pemü'iyamacacü Cacaüyari  
pemayexeyanicü türücaüyemecü.  
<sup>8</sup>Xüca tiyü'üquitüaca vaiyari  
mü'iyamacacü, 'esiva püyüne,  
peru xüca Cacaüyari 'ayexeyani,  
'aixüa püyüne naimecü, tucari  
mexeyacü que temüte'utahüavarie  
temeixeyanicü. Payeyurini hicü,  
tucari 'umamiesieta payeyurini.  
<sup>9</sup>Mücü niuqui yuricü paine,  
neuyevaca münaqui'erivanicü  
yemecü. <sup>10</sup>Müpaü mü'anecü,  
'ayumieme tepüteta'uxitüa,

'axa tepütecühüavarüva, yuri  
temüte'uta'ericü Cacaüyari  
mayeyurisie teta'icuevatü.  
Mücü yunaime teüteri  
canivavicueisitüvametüni, masi  
yemecü

<sup>11</sup>Müpaü quetine'aitatü  
quetine'üquitani. <sup>12</sup>Xevitü  
pücamasitave'erieca pemühecuacü.  
Masi müme yuri memüme yuri  
memüte'erie püvavicueisitüvame.  
müte'erie müpaü memü'anenenicü,  
'inüari quena'ayeitüvani que  
pemütütaniuca, que pemütüyeica,  
que pemütü'acanaqui'erie, que  
yapemüticamie 'aniuquicü, que  
pemütü'litiya. <sup>13</sup>Nemunuanique  
quene'ayumiemetüni petiterüvatü  
niuqui memü'enienicü, pevatuicatü,  
peti'üquitatü. <sup>14</sup>Quetineuhayeva  
pe'itümayatü tita pemütüpitüarie  
'iyarisie timieme. Müpaü  
pepütüpitüarie tixaxatame  
ticuxatacacu, quepaucua  
'uquiravesixi 'axeicüa 'ahesie  
memutimeixüa.

<sup>15</sup>Müccü quene'ayumiemetüni,  
müccü queneuyecani  
yunaitü memümasixeyacü que  
pemüraye'axime. <sup>16</sup>Quene'a'üviyari  
quene'üviyani 'üquisica. Müpaü  
petiyurienetü quene'ahayeva.  
Müccü pepü'atavicueisitüani  
pepüvatavicueisitüani müme  
memümasi'enieta.

**Que müreuyevese müpaü  
müvayurienicü hipame**

**5** 'Uquirasi pepücatatieni,  
masi pepinütüani  
'a'uquiyaripaü. 'Uquisi 'a'ivama  
vahepaü quetinivacühüaveni.  
<sup>2</sup>Ucaravesixi 'ateteima vahepaü

quetinivacühüaveni, 'ucari 'a'ivama vahepaü quetinivacühüaveni naimecü pe'itiatü.

<sup>3</sup>Quetinivareuyehüvirieca 'ucari vacünama memucui xüca yemecü meyuxeveni. <sup>4</sup>Que mü'ane cünaya 'umücu yütüriyama yumama'üma müvarexeiya, masi yemecü neuyeveca müme yamemüteyü'üquitüanicü memütevarueyhüvirienicü yuquie quiecatari, 'amemüte'apicacü mevaparevietü yu'uquiyarima. Müpaü memüteyuriecacü pinaque Cacaüyari. <sup>5</sup>Que mü'ane cünaya mumü yuxaüta 'amuca yemecü, mücü yuri pütü'erie Cacaüyarisie, 'ivavrietü nenevieri 'ipitüatü pü'ayumieme tucaricü tücaricü. <sup>6</sup>Peru 'ucatütü que mü'ane que mütiyücühüave xeicüa 'amuyeica hive'ericacü, mücü müquitü 'apuyeica sepa mayenieme. <sup>7</sup>Müpaü quetiniva'aitüaca tixaü vahesie mücarahüivanicü. <sup>8</sup>Mesü, que mü'ane mücätivamicua yumarema, yuquie quiecatari masi, mücü püyucu'imava, yuri temüte'eriesie camiemetütü püyuhecüata, tevi yuri mücati'erie hepaüna 'axa pücaüiane.

<sup>9</sup>'Uca cünaya mumü que'acayerieni xüca haica teviyari viyari hüca xeicüa, xüca yücünasie xeimesie tiviyacaitüni, <sup>10</sup>xüca 'aixüa timarivani 'aixüa mütiyuriencü, xüca türi vaveriyaveni, xüca tevanarixi vanaqui'erieca, xüca Cacaüyari teüterimama va'ücate hauxinaveni, xüca vapareviveni müme memü'uximatüariecai, xüca yaticamiecaitüni naimecü 'aixüa tiyurienetü.

<sup>11-12</sup>Memüheheca vacünama memucui, pepücavaracayasa. 'Uxa'atüni varie mepüviquiecuni, yunaqui'eriyacü mepücuhanpanieni. Mücücü yuhesie mepüte'ahüpani yamemücatecahucü que memüte'uyuhüritüa Cürisitu hesie mieme. <sup>13</sup>Mücü meta, müpaü mepüteyü'üquitüaca memüyü'üraraxiecacü quieta me'u'uvatü xeicüa. Meyü'üraraxietü, masicutari niuquiperaxi mepüyüaca, tita 'aixüa mücati'ane yamütayünicü, müpaü mepütecuxatani. <sup>14</sup>'Ayumieme müpaü nepüticu'eriva, peuyevese müme memüheheca vacünama memucui memütivitüquienicü, memütinivexüanicü, yuquita memüte'aitanicü. Xüca müpaü meteyurieca, tixaütü mepücate'ipitüaca que mü'ane mütasi'aye'unie misütüanicü 'axa taticühüavetü. <sup>15</sup>Hipatüsietü 'ari ta'aurie mepaxürie Cauyumarie me'anuveiyaque.

<sup>16</sup>Que mü'ane yuri müti'erie 'uquitütü 'ucatütü xüca yumarema varexeiyani 'ucari vacünama memucui, quevaparevieca müme. Pücava'uximatüaca memüyuyexexeüriva. Müme püta mepüvaparevieca 'ucari yemecü yuxaüta memü'uva.

<sup>17</sup>Ta'uquiyarima 'aixüa 'anemecü memüte'aita 'aixüa mequete'uxeiyarieni masi vaüca. Müme memüte'uximaya metecuxatatü mete'üquitatü masi yemecü mequeteheuyehüviyarieni. <sup>18</sup>'Utüarica xapayari müpaü paine, Pepüca'isurihüaca puixi quepaucua türicu müquesinani

mütihenarienicü. Müpaürita paine, Ti'ivamesie catininaqueni 'ivarica.

<sup>19</sup>Heiserie haineme pepüca'erieca

xüca 'itaxaneta mühürütüarie,

me xüca yuhutatü yuhaicatü

memunenierixü metehecüatani

xeicüa pepüva'enieca. <sup>20</sup>Müme

'axa memüteyurie quenivarutati'a

yunaitü memasi'eniecacu

hipatüta marica memexeiyanicü.

<sup>21</sup>Nemanihürütüaca Cacaüyari

masixeyacacu Cürisitu

Quesusi masixeyacacu niuqui

tuayamete memanayexeyarie

memasixeyacacu, müpaü

yaquetinecamieni, cuitü

pepüca'itahüave tevi petimarietü

xeicüa peru peca'ienievetü.

'Asipepücatiyurieneni xeimesie

petiviyatü xeime püta petave'erietü.

<sup>22</sup>Cuitüva tevisie pepüca'utimemeni

'umarivacacunque. Mücü meta,

'axa que memüteyurie hipatü,

'ahesieta rahüivanicü. Pe'itiyatü

quene'a'üiviyani.

<sup>23</sup>Peru quetineuhayeva ha

xeicüa peharetü, masi 'esiva

vinu quenanuye'eni 'ayuriepa

pemüticuyecü müixa.

<sup>24</sup>Axa que memüteyurie

hipatü mepanuhaitürüve, cuitü

mepümasiücü sepa 'isücame

mücavatahüavive. Hipatü 'axa

que memüteyurie mepu'imatü

mepücaviyarievave cuitüva.

<sup>25</sup>Yaxeicüa müme 'aixüa

memüteyurie cuitüva mepümasiücü,

me sepa memücamasiücü,

mepüca'yüvave memü'aviesiecacü

yuhayemecü.

**6** Vaüriyarica te'uximayatamete

cüye memanuyetequiyarie,

yemecü vavemete mequeva'erieca

yucusiyarima. Xüca müpaü

meteyurieca, 'axa pücatixasivani

que mü'ane Cacaüyari mühücü,

'üquisicata 'axa pücatixasivani.

<sup>2</sup>Me vacusiyarima xüca yuri

mete'erieca, mepücavatave'erieca

yu'ivama mevaxeyatü, masi

'aixüa 'iyaricü mequete'uximayaca

vahesie mieme yuri memüte'eriecü

memünaqui'erivacü müme 'aixüa

memü'itüarie mete'uximayacacu.

Müpaü quetine'üquitani müpaü

quetinivatuicani.

**Cacaüyari que mürayexeyia,**

**que mütinaqui'a**

<sup>3</sup>Xüca yücü ti'üquitani xevitü,

xüca yaca'aneni, niuqui müseyüve

ca'eniemütü Tati'aitüvame

Quesusi Cürisitu münüquieya

ca'l'eniemütü 'icü 'üquisica

cümana Cacaüyari temayexeyia,

<sup>4</sup>mücü pühüsierie, 'asipücatimate.

Catinicuyeni niuqui xüatüarica

cuvauetü xeicüa, niuqui

hepaüsita tiyumiemütü. Mücüsie

payeneica que memüteyü'ütesa,

que memüteyuheca, que

memütevasevixima hipame 'axa

me'utiyuatü vahepaüsita, 'axa

que memüteyücühüave, <sup>5</sup>que

memücatehayeva meniuquixietü.

Müpaü mepüteyurie teüteri

memütüpünirüme que

memüteyumate memeivivi tita yuri

müraine. Müpaü metenicu'erivani,

que mü'ane mürayexeyia 'ivarica

pexeyia. <sup>6</sup>Siepüre xüca Cacaüyari

'ayexeyiani tixaütü careuyehüatü,

yemecü püti'iva. <sup>7</sup>Tixaütü

tepücate'atücücai cuiepa temu'axüa,

'ayumieme tepüca'yüvave tixaütü

temüte'anütüni temüyehu.

<sup>8</sup>Icuai quemari tehexeyatü, mücücü tequenaqui'aca. <sup>9</sup>Müme memeuca'unicü xeicüa memüyüa, müme mepecaxürieni me'inüasietü, viniyaricü mepüvyarieni, vaüca mepüteyucahive'erieca 'asimecatemaitü, meteyucuinütüatü. Mücü hive'erica teüteri püvacatuica memüca'unarienicü memütatümaiarienicü. <sup>10</sup>Teüteri que memüte'ihive'erie tumini, mücü nanarisie canitutineicani naitü 'axa müti'anene. Hipatü müpaü meteyuvaüriyatü mepeuyexüri, yuri mecate'erietü mepacü. Yu'iyarisie mepüyucuseve vaücava hivericacü.

**Yuri ti'erietü quemütiunanausani  
yutatuatü**

<sup>11</sup>Ecüsü Cacaüyari teviyari pecanihücütüni. Quene'ata'una mücücü. Müpaü püta quetine'amexüitüaca, heiseriemecü yapemüticamienicü, Cacaüyari pemayexeyanicü, yuri pemüti'eriecacü, pemüti'acanaqui'eriecacü, pemütiuca'enivanicü, pemücaha'a'erianicü. <sup>12</sup>Aixüa 'anemecü pe'atatuatü queneutananausani yuri peti'erietü, queneuviya tucari mücaxüve. Mücü 'ayumieme peputa'inierie, yumüiretü thecüatamete memasixeyacacu 'aixüa 'anemecü pepü'ahecüatagai yape'aretü. <sup>13</sup>Cacaüyari nai mürayenieritüa masixeyacacu, Cürisitu Qesusi 'aixüa 'anemecü muyuhecüata ya'aretü Punisiyu Piratu hüxie, mücüta masixeyacacu müpaü nepümati'aitüa <sup>14</sup>yaquetinecamieni que pemütiu'aitüarie,

peca'iseviximatü 'aisica, hesiena pecarahüpatü, Tati'aitüvame Qesusi Cürisitu masiücütü mayanique. <sup>15</sup>Tucari 'aixüa mü'ane 'aye'ayu, masiücüme canayeitüamücü

Que mü'ane yutemavietü yuxevitü Ti'aitame mühücü,

Que mü'ane te'aitamete mütiva'aitüvame

Cusiyarima müvacusiyari,

<sup>16</sup>Que mü'ane yuxevitü mücamüve,

Hecüaripa meca haque mücayüve 'aura mayanicü xevitü,

Que mü'ane tevi müca'ixeyave Mücayüve mixeyacü,

Mücü ve'eme quexasivani

Quehetürücaüyeni yuheyemecü.

Müpaü xeicüa cani'aneni.

<sup>17</sup>Müpaü quetiniva'aitüaca müme memeuca'u hicü cuiepa, mepücateyucatave'erieca, yuri mepücate'erieca yupinisie, 'asimücatimasiücücü xüca xuavecämücü, masi yuri mequete'erieca Cacaüyarisie püta. Mücü nai pütatipitüa yemecü masi temütatemamaviecacü.

<sup>18</sup>Müpaü quetiniva'aitüaca meta 'aixüa memüte'uximayacacü, memeuca'unicü 'aixüa meteyurietü, 'aixüa memüte'u'iyarinicü, hipame vahamatü memüyuxevinicü.

<sup>19</sup>Müpaü meteyurietü mepüyutatenaritüani 'aixüa 'aneme 'uxa'a varie maye'anisie mieme, tita yuricü mütitucari metehexeyatü mepacüne.

**Papuru Timuteu que mütiuhüritüa**

<sup>20</sup>Neuxei Timuteu quene'üviyani 'ahüritüarica. Ta'aurie quenavesie

pemücava'enienicü yacü  
 xeicüa que memutiyuane  
 mecate'ayexeyatü. Vaniquisie  
 pepücativiyani metasi'aye'unietü  
 que memutiyuane müme  
 temaivavemete memüyuxata

mete'itavatü. <sup>21</sup>Hipatü  
 mücüsie mete'uviyaca xaüsie  
 meneucuyunixüani yuri que  
 memüte'eriecai.

'Aixüa que tiuca'iyarini xehesie  
 mieme.

# TIMUTEU

## Hutarieca Mieme Xapayari Papuru Que Mütinü'airi

---

### Vaürisica

**1** Ne Papuru Cürisitu Qesusi nü'arieya necanihücütüni müpaü mütinaquecü Cacaüyari, müpaü mutayücü meripai quename tucari xuaveni Cürisitu Qesusisie tiviyacacu.

<sup>2</sup>Nemanivaüritüaca Timuteu pemünenive nemümasinaqui'erie. Cacaüyari müta'uquiyari, Cürisitu Qesusi mütati'aitüvame, xüca 'aixüa mete'u'iyarini 'ahesie mieme, xüca memasinenimayaca, xüca memasipitüaca 'a'iyarisie pemüca'uximatüariecacü.

### Que mütihecüatani Cürisitu hepaüsita

<sup>3</sup>Mücü Cacaüyari nepayexeiya ne'iyari 'itiyacacu, ne'uquiyarimata que memüteheyexeyacai. Mücü pamüpariyusi necanipitüaca nemasiha'erivatü necatihayevatü tucaricü tucaricü quepaucua nemünenenevie. <sup>4</sup>Yuheyemecü nepümasiheuxeiyamücü nemasiha'erivatü que pemütiutasuacacai pe'ahiverietü. Xüca nemasixeiyaque,

nepünetemaviecaqueyu yemecü.

<sup>5</sup>Ahepaüsita niuqui nepü'atüiyarie yuri que pemüti'erie yacü pecaticuxatatü. Müpaü yuri tiuta'erieca meri 'apucatei 'acusi Ruhira, 'avarusita 'Eunisi. Yuri nepüti'erie 'ecüta vahepaü yuri pemüti'eriecü.

<sup>6</sup>Ayumieme nepümati'eritüaniqueyu pemücaratütümaianicü, pe'atatuatü yaquetineyurieneni Cacaüyari que matiupitüa 'ahesie ne'utimecu. <sup>7</sup>Cacaüyari que mütatiumi, pücatasi'upitüa ta'iyarisie temümamacacü, masi 'iyari pütasi'umi mütürücaüye püta, tasipitüatü temütetacanaqui'eriecacü temüseseyenicü. <sup>8</sup>Ayumieme 'uxa'atüni varie pepüca'ateviyani petihecüatatu Tati'aitüvame hepaüsita, pepücanesiteviyani ne, sepa nemanutahüiya hesüana nemümiemecü. Niuqui 'aixüa manuyünesie mieme masi quetineucaine 'ecüta, Cacaüyari masitürücariyacacu. <sup>9</sup>Mücü canihücütüni que mü'ane mütasi'utavicueisitüa, mütasi'uta'ini



temüpasiecacü hesiena miemecü. Tita temüteyuriecäi tame, mücücü 'asipücatuyuri, masi müpaü mütiyuvaüriyacaicü yücümana, 'aixüa mütiuca'iyaricü, 'ayumieme püta'utavicueisitüa. Müpaü tiniuca'iyaricaitüni tahesie mieme tucari caxuavecacu cuxi, tasiha'erivatü Cürisitu Quesusisie que temüteviyaniquecaicü. <sup>10</sup>Hicürixüa masiücütü nayani 'aixüa que mütiuca'iyari, munuacü tasivicueisitüvame Cürisitu Quesusi. Mücü que mütiuyuri, taheyemecü temücacui'inicü yatiniuyurieni. Tiniutahecüatani que temüte'ayeyuyurini que temücatetipüne. Müpaü catinimasiücünü niuqui 'aixüa manuyüne cuxasivacacu.

<sup>11</sup>Ne nepucayeri mücü niuqui hepaüsita nemüticuxatanicü, nü'ari nuivarite tiva'üquitüvame nemayanicü. <sup>12</sup>Müpaü nemü'anecü, 'ayumieme 'ipaü nepü'itüariexime hicüpaü, peru nepücaneteviya nemimatecü que mü'anesie yuri nemütiuta'erie. Yuri necatini'erieca mücü müyüvecü mi'üviyanicü tita münetyetui 'iya tucari mexi ca'aye'ave.

<sup>13</sup>Para pemimaicacü niuqui müseüye que mütvaiyacü, tita pemütü'eni yaneticuxatacacu quenexeyani 'a'inüaritüme, yuri peti'erietü peti'acanaqui'erietü Cürisitu Qesusisie tiviyatü que mütiyüveni. <sup>14</sup>Quene'üviyani tita 'aixüa müti'ane temüteyeturiyarie, 'Iyari Mütiyupata tahesie müyeca masiparevecacu.

<sup>15</sup>Müpaü que pemütimate, yunaitü 'Asiya cuieyarisie

miemete mepünesi'ucu'eirie, Piqueru Herumuquenexi hipatüta. <sup>16</sup>Ti'aitame xüca vanenimayaca 'Unesipuru que quiecatari. Mücü müixa pünesi'uxipitüa, pücanesiteviyacai sepa nemanutahüiyacai, <sup>17</sup>masi Xumasie 'uyeicatü püyumexüitüacai nesticuvaunetü, pünesi'utaxei. <sup>18</sup>Ti'aitame xüca 'ipitüaca münenimayasiecacü 'iya tucari 'aye'ayu Ti'aitame que mütxeyani. Naime que mütvaparevecäi 'Epesusie heyeicatü, 'ecü 'aixüa 'anemecü yapepütimate.

**Cuya 'aixüa mütiuca'iyaripaü yüanetü Qesusi Cürisitusie mieme que mütiyumiene**

**2** Mericüte nenive queneturücaüyeni Cürisitu Qesusi yamatipitüacacu 'aixüa mütiuca'iyaricü. <sup>2</sup>Tita pemütü'enie neticuxatacacu tehecüatamete yumüireme vahüxie, mücü quenivayeturieni teüteri yamemütecahu, mümeta memüyüvavenicü müpaü memütevati'üquitüanicü hipameta.

<sup>3</sup>Quetineucüne 'ecüta pe'amienetü Cürisitu Qesusisie mieme, cuya 'aixüa mütiuca'iyaripaü peyüanetü.

<sup>4</sup>Que mü'ane mücuya pücauyüviyanüa yu'uximayasica cuvevienetü yücümana, masi ninaqui'aritämücünü que mü'ane mitahüavixü cuya mayanicü. <sup>5</sup>Que mü'ane parecu münausame, sepa mürayu'ivaxü nausaricü, neuyeveca 'inüari manuyünepaü mütananausanicü muma manutiquesiyaricü

mürayu'ivaxücü. <sup>6</sup>Mücü meta, que mü'ane mü'esame müti'uximaya, caneuveveca mücü meri mütipitüarienicü tita mütitixuavere.

<sup>7</sup>Yaquetini'acühüaveni que nemaine mücü hepaüsita. Ti'aitame pümasipitüaca pemütimaivenicü naime hepaüsita.

<sup>8</sup>Quena'erivani Qesusi Cürisitu. Mücü müquite vasata nanucuquetüarieni, Ravirisie niyeyani. Müpaü paine niuqui 'aixüa manuyüne que nemüticuxata ne. <sup>9</sup>Müpaü nemüticuxatacü 'axa nepü'itüariexime, 'asita nepanutahüiya 'axa tiyuruvamepaü. Peru Cacaüyari niuquieya tixaü püca'anutahüiva.

<sup>10</sup>'Ayumieme ne naime nepütiunevi memanayexeyarie vahesie miemecü, mümeta memaye'axüanicü memütavicueisitüarienicü Cürisitu Qesusisie meteviyatü, müpaü memütepitüariecacü meta yuheyemecü visi me'ananetü memacüneccü.

<sup>11</sup>Mücü niuqui yuricü paine, Xüca hamatüana te'ucuini Hamatüanata tepayeyurini.

<sup>12</sup>Xüca tete'uca'enivani Hamatüanata tepüte'aitametetüni. Xüca tetacu'imavani Quename teca'imate te'utiyuatü, Mücürita püyucu'imavani Quename catasimate 'utaitü.

<sup>13</sup>Xüca tetehayevani yatetecahutü Mücü yaticamietü 'apuve cayupatatü. Pücaüyve yamütiyurienicü que mücatiucayari.

### Ti'uximayatame mümasiücü que müti'inüasie

<sup>14</sup>Mücü hepaüsita quetiniva'eritüaca, quenivahüritüaca Cacaüyari hüxie memücauyucitüvenicü niuqui hepaüsita. Müpaü tiyurienetü 'asipücaüyüni 'aixüa mü'anecü, püvaca'unaxüani memü'enana xEICÜA. <sup>15</sup>Quene'amexüitüaca Cacaüyari hüxie pemümasiücünicü que pemüti'inüasie, ti'uximayatamepaü peyüanetü mücaheuyevese müyuteviyanicü 'aixüa müti'uximayacü, heiseriemecü peti'üquitatü niuqui yuri maine hepaüsita. <sup>16</sup>Yacü xEICÜA que memütecuxata mecate'ayexeyatü, mücü hepaüsita quene'acuerivayurieca. Müpaü metecuxatatü masi yemecü Cacaüyari metümayatü mepayuyeitüaximeni xEICÜA. <sup>17</sup>Vaniuqui püyemie püniyapaü. Müpaü mepü'anene Himeneu Piretu. <sup>18</sup>Müme müpaü memüyüa xaüsie meneucuyunixüani tita yuri müraine hepaüsita, müpaü memutiyanecü quename 'ari te'anucu'ui. Hipame mepüvamuina 'aixüa mü'anecü yuri memücate'eriecacü. <sup>19</sup>Sepasü müpaü memüteyurie, Cacaüyari yutesariya canütavevieni qui tutuicame. 'Apuve se'itü 'uxaya masiücücacu müpaü manuyüne, Ti'aitame püvamate yuteüterima, 'ipaü meta manuyüne, Yunaitü memehüave Ti'aitame mequeyucuerivayurieca tita mücatiheiserie hepaüsita. <sup>20</sup>Qui 'amüevata huru pürata xacürüteyari puxuave, peru cüye

haxu xacürüteyari puxuaveta. Hipatü visi mü'anicü pü'ayumieme, hipatüta 'axa mü'anicü pü'ayumieme. <sup>21</sup>Mericusü xüca 'uyu'itieni müpaü memü'anene vahesie mücativiyanicü, xacü visi mü'anicü mü'ayumieme payani pasietü, 'aixüa tinaqui'erivatü cusiyari quepaucua meiyehüva, ha'arisietü 'aixüa mütiyurienenicü naimecü sepa que mütitita.

<sup>22</sup>Quene'ata'una pemücati'acahive'eriecacü memühehecua vahepaü. Müpaü püta quetine'amexütüaca, heiseriemecü yapemüticamienicü, que pemaine yapemütiyurienenicü, pemüti'acanaqui'eriecacü. Müme memehüave Ti'aitame va'iyari 'itiyatücaicacu, müme vahamatü 'axeicüa yaxequeteneyurieca 'aixüa xemüteyuxeiyanicü.

<sup>23</sup>Memücatemaivave niuqui que memütexüatüa 'asimecatemaitü, mücü quenexani'erieca müpaü petimaitü, niuqui metixüatüame mepüyutacuini xeicüa. <sup>24</sup>Caneuyeveca que mü'ane Ti'aitamesie mieme müti'uximayatame mücayumienenicü, masi que müvayuriene yunaime carima 'asimücatiyurienenicü, müti'üquitavenicü, minevienicü tita 'axa müti'ane, <sup>25</sup>'iyarieya 'aixüa 'anecacu müvatiheiseriyanicü müme memeye'unie. Tietüsü Cacaüyari vapitüaca memütehayevanicü que memüteyuriecai, tita yuri müraine memütehetimanicü, <sup>26</sup>memanutahütüarienicü memütavicienicü Cauyumarie viniyariyasie cümana

memuviyarie yamemütecahunicü que mütinaque 'iya.

### Teüteri que memüte'u'iyarini taparirümecacu

**3** 'Ipaü quetinemaica, tucari taparirümecacu 'ana cuanivemecü mepüyüaca. <sup>2</sup>Teüteri yuhesie mieme mepütenaqui'erieca xeicüa, tumini mepühive'erieca, mepüyuxeümacani, mepüyuxani'erieca, mepüvaseviximani hipame 'axa me'utiyaatü vahepaüsita, mepücava'enieni yu'uquiyarima, pamüpariyusi mepüca'ipitüani xeime, 'axa mepü'aneneni, <sup>3</sup>mepücayunaqui'erieca, mepücayuhaxüapitüaca, mepüyuniuquimani, mepücateyu'aitüaca, mepayu'eririyani, mepihecani tita 'aixüa müti'ane, <sup>4</sup>mepüvayetüani hipame, mepüyuxünani, mepühüsierietücani, mepinaqui'erieca tita mütivanaque peru mepüca'inaqui'erieca Cacaüyari. <sup>5</sup>Cacaüyari mayexeyapaü mepüteyuhecüaca, peru mepüyuhecüatani catürücaüyeme memü'eriecü tita memüte'ayexeyia.

Ta'aurie quenavesi müya memü'anene vahesiia pemüca'uyeicanicü. <sup>6</sup>Hipatü müme teüteri vaquita meneutahaqueni 'avie meteva'irüviyaque 'ucaravesixi 'asimemücatemate, müme mevaru'iniecu va'ica mahetecü 'axa que memüteyuriecai, memeuhapanietücacü naime metehive'erietü. <sup>7</sup>'Ucaravesixi müpaü memü'anene yuheyemecü

mepüteyü'üquitüatüve peru  
hasuacu mepüca'yüvave  
memeitimanicü tita yuri müraine.  
8 Yaxeicüa Canesi Camüpüresi  
que memüteheye'uniecai  
Muisexi, 'imeta meneye'unieca  
tita yuri müraine. 'Icü teüteri  
mcanitipünirümeni que  
memüteyumate. Mepüxani'eriva  
yuri que memüte'erie, masi yuri  
memücate'eriecü. 9 Perusü masi  
vaücavamecü 'asimepücate'yüvaveni.  
'Asimemücatematecü memasiücütü  
mcanacünicuni yunaime  
vahüxie, meripai miemetexi  
memütemasiücücaipäu 'ana.

#### **Papuru Timuteu que mütiuhürütüa**

10 'Ecü püta peniveiyani ne'inüari  
tita nemüti'üquitasie petiviyatü,  
que nemüticuyeica yapetiyurienetü,  
que nemütiyuriemücü,  
que yanemüticamie, que  
nemüreuterive netiuca'enivatü,  
que nemütinecanaqui'erie,  
que nemütiuca'eniva,  
11 que nemütiuveiyarie, que  
nemütiucuinixü nai que nemu'itüarie  
'Anuti'yüquiyasie 'Icuniyusie  
Risitürasie. Sepa que nemütiucuinixü  
ne'uveyarietü, Ti'aitame  
caneniutavicueisitüani naimecü.  
12 Siere menitaveiyariexüacuni  
yunaitü memüyuväuriya Cacaüyari  
me'ayexeyatü memu'uvanicü  
Cürisitu Quesusisie meteviyatü.  
13 Teüteri 'axa memüteyuricu  
memüteyucamana masi vaüca  
'axa me'anenetü mepacünirümeni  
mete'irümatü mete'irüviyarietü meta.  
14 Peru 'ecü titasie pemüti'a'üquitüa  
tita pemüretima mütiyuricü,  
mücüsie petiviyatü quene'ahayevani.

Pepüvamate quehate müpaü  
memate'üquitüacacu müpaü  
pemüretima, 15 müpaü pepütimate  
nunusiyaripai pemütimaicaicü  
que maine 'utüarica xapayari  
müpasie. Mücü püyüve  
petimaiveme mümasi'ayeitüanicü  
pemütavicueisitüarienicü yuri  
peti'erietü, müpaü que mütiyüve  
Cürisitu Quesusisie tiviyatü. 16 Naitü  
'utüarica xapayarisie müre'uxa  
Cacaüyari 'inetüacu, mücü peuyevese  
müti'üquitanicü mütatierivanicü  
mütaheiseriyarienicü ti'üquitüarietü  
mayanicü quepaü heiseriemecü  
yamüticamieni. 17 Mücü 'utüaricacü  
Cacaüyari teviyari paye'ani  
püha'arisieca 'aixüa mütiyurienenicü  
naimecü sepa que mütitita.

#### **Niuqui quenecuxatani**

**4** Cacaüyari hüxie, Cürisitu  
Quesusi hüxie que mü'ane  
'isücametütü müvatahüaveni  
memayeyuyuri müquite yunaime,  
mücü munuaximecü ti'aitametütü,  
müpaü nematinihürütüaca.  
2 Niuqui quenecuxatani.  
Müccü quene'ayumiemetüni  
penaqui'erivatü pecanaqui'erivatü.  
Quenivarutati'a quenivacu'imaiyani  
quenivatuicani. Naimecü  
'equetineutevini petiuca'enivatü,  
naimecü quetine'üquitani.  
3 Tucari naye'amücü quepaucua  
memüca'inevieca 'üquisica  
müseüye, masi que mütvanaque  
mepüvaxexeürivani te'üquitamete,  
vanacate varusicuaquivacacu.  
4 Ta'aurie mepaxürieni  
meca'i'eniecutü tita yuri müraine.  
Xäusie mepeucuyunixüani  
yü'üxasisie memüteviyanicü.

<sup>5</sup>'Ecüsü naimecü quene'amaica. Quetineucanevieca sepa 'axa pemü'itüariene. Quetine'uximayaca peticuxatatü niuqui 'aixüa manuyü necü. 'Ahüritüarica quenaye'atüa yemecü.

<sup>6</sup>Neri mavari nepayeitüariexime. Tucari canahuraniri nemüyemiecü.

<sup>7</sup>'Aixüa 'anemecü nenetatuatü nepünemiencai. Que nemütinausanecai nepeta'a. Nepücatihayevaxü yaneticamietü.

<sup>8</sup>Hicü nepe'usiyarie muma nemümarivacü heiseriemecü yanemüticatüacü. Ti'aitame 'isücame canihücütüni heiseriemecü yamüticamie. Mücü müpaü pünetipitüani 'iya tucari 'aye'ayu. Ne xeücüame müpaü pücanetipitüani, masi yunaitü memünaqui'a münuaximecü müpaü pütivapitüani müme.

#### Que müti'aitüa

<sup>9</sup>Quene'amexüitüaca cuitü nehesisü pemünuanicü. <sup>10</sup>Remaxi pünesi'ucu'eirie cuiepa timieme tinaqui'erietü. Tesarunicapaitü neyani. Cüreseniti Carasiya cuieyarisie petüa, Titu Tarümasiyasiepaitü retüa. <sup>11</sup>Rucaxi yuxaita nehamatü puyeica. Quenavitüqui Maricuxi, 'a'utüma quene'atüa. Mücü 'aixüa pü'ane munesipareviecacü. <sup>12</sup>Tiquicu nepenü'a 'Epesupaitü. <sup>13</sup>Mücü 'ücarü Türuhasisie nemeicu'eirie Carüpüsüa quenahuri pemamiecü. Xapate quenahuri navi müraye'utüca masi.

<sup>14</sup>Herecanituru tepüa vevivame 'axa pünesi'uyuri vaücava. Ti'aitame 'epürepinirieni

müpaü 'axa munesi'uyuricü.

<sup>15</sup>'Ecüta quene'acuerivayurieca hepaüsitana. Yemecü peye'uniecai taniuqui.

<sup>16</sup>Nehesie mieme ne'utaniucacacu meri miemecü, ni xevitü neheima püca'utana. Yunaitü mepünesi'ucu'eirie. Mericüte xüca vahesie catihüiyani mücücü. <sup>17</sup>Ti'aitame masi ne'aurie puvecai nesitürücariyatü 'icü xasicaya yemecü mücuxaxasivanicü yaneticuxatacacu, yunaitü nuivarite memi'enienicü. Neputavicueisitüarie maye pücanesi'utacuai. <sup>18</sup>Ti'aitame pünesitavicueisitüani sepa que memüteyurie 'axa menesiyuriecütü. 'Asineca'itüarievecacu pünesi'aye'atüani haque müre'aita muyuavisie, mana nemaye'anicü. Hepaüsitana 'aixüa queticuxaxasivani yuheyemecü. 'Icü niuqui canise'ini.

#### Que mütaruvaüritüa, 'aixüa que mutayü 'aixüa memü'itüarienicü

<sup>19</sup>Quenivavaüritüaca Pürisira 'Aquiramame, 'Unesipuru quie quiecatari meta. <sup>20</sup>'Erasitu mana peyuhayevaxü Curinitusie. Türupimu nepecu'eirie Miretusie ticuyecacu. <sup>21</sup>Quene'amexüitüaca pemünuanicü ca'uhaütücacu cuxi. 'Eupuruxi Purenisi Rinu Cürauriya yunaitü ta'ivama mepümasivaüritüa.

<sup>22</sup>Ti'aitame 'a'iyari xüca masiteütani. 'Aixüa xüca tiuca'iyarini xehesie mieme.

# TITU

## Papuru Que Mütinü'airi

---

### Vaürisica

**1** Ne Papuru ti'uximayatame necanihücütüni Cacaüyarisie mieme. Quesusi Cürisitu nü'arieya necanihücütüni, yuri neti'erietü yaxeicüa yuri que memüte'erie müme Cacaüyari müvaranayexei, müpaüta netimaitü tita yuri müraine, que müreuyevese yamütimaicacü Cacaüyari xüca 'ayexeiyani. <sup>2</sup>Müpaü netiniyurieneni nemitacueviecü tucari mücaxüve nemexeiyanicü. Cacaüyari pücati'itava. Meripai tucari caxuavecacu cuxi müpaü putayü tucari mütasipitüaniquecaicü. <sup>3</sup>Hicürixüa tucari 'aixüa mü'ane 'aye'acu, masiücüme canayeitüani yuniuqui, teüteri yametecuxatacacu. Necaniuhüritüarieni müpaü nemüticuxatanicü ne, müpaü mütiuta'aicü tativicueisitüvame Cacaüyaritütü. <sup>4</sup>Ne necamanivaüritüaca Titu. Yuricü pecaninenivetüni, yuri que temüte'erie tanaitü. Cacaüyari müta'uquiyari, Cürisitu Quesusi mütativicueisitüvame, 'aixüa xüca mete'u'iyarini 'ahesie mieme,

'aliyarisie xüca memasipitüaca pemüca'uximatüariecacü.

'Uquiravesixi te'üviyamete  
que müreuyevese müpaü  
memü'anenenicü

<sup>5</sup>Mücücü nemanecu'eirieni Cüretasie, pemeiheiserietüanicü tita müreuyevese, pemüvacuyasaxüanicü va'uquiyarima xexuime quiecarisie, yaxeicüa que nemümüatiutahüavixü, <sup>6</sup>que mü'ane mücaniуquimarie, que mü'ane xeüciame mü'üya, que mü'ane yütüriyama müvarexeiya yuri mete'eriecame vahesie carahüivacacu, quename merucuyatüve quename meca'l'enie müpaü caraniuvacacu. <sup>7</sup>Cacaüyarisie mieme mühüritüariecü, neuyeveca que mü'ane ti'üviyame mühücü mücaniуquimariecacü, yuxaüta xeicüa mücayüanenicü mayu'eriya mücahücütünicü, tavecame mücahücütünicü, mücavativayanicü, tumini mücarchive'eriecacü tiyucuamanamütü. <sup>8</sup>Masi peuyevese müvatanaqui'erienicü teva quiecatari, minaqui'eriecacü

tita 'aixüa müti'ane, mütimaivenicü, heiseriemecü yamüticamienicü, Cacaüyari mayexeyanicü cuini mieme, müseyenicü yu'iyarisie que mütiyu'aitüa. <sup>9</sup>Peuyevese mütiyianicü niuqui yuri mainesie, 'üquisica manuyünepaü müyüvenicü müvatuicani ti'üquitatü que mütiyaiyacü yemecü, müyüvenicü meta müvahecüatanicü memünüquixie.

<sup>10</sup>Yümüiretü 'ameniu'uvani mecaheu'enanatü, yacü xeicüa metecuxatatü, meteyucumanatü. Müme xitequiya 'inüariyarisie memüteviya masi yemecü müya mepü'anene. <sup>11</sup>Peuyevese memanunatücanicü que memütecuxata. Que memü'anene, mepüvamuina 'asita xeime qui quiecatari 'axeicüa yunaime, mepüteti'üqita tita 'aixüa mücati'ane, mete'ivacutü 'axa ti'anemecü.

<sup>12</sup>Vahesüa mieme tixaxatame xevitü müpaü niutayüni, Cüretatari yuheyemecü mecateni'itavani, yeutari memayu'eririya mecanihümetini, mecaniyu'üraraxieca yuhuriepa meteviyatü xeicüa. <sup>13</sup>Mücü yemecü yuricü catiniutahecüata. 'Ayumieme quenivarutatü'a türücaüyemecü, müme memüseseyenicü, yuri mete'erietü que mütiyaiyacü, <sup>14</sup>mecava'enietü Huriyusixi yacü xeicüa que memüte'üxasita, mecahe'erivatü tita memüte'aita teüteri memixani'erie tita yuricü müraine.

<sup>15</sup>Que memüte'ixeiya müme memü'itiyatüca, naitü catini'itiyaca. Müme memüseviximarie

yuri memücate'erie püta que memüte'ixeiya, tixaü pücatixuave müti'itiya, masi mecaniseviximarieca que memüteyumate, yu'iyari que memüte'enie vatate'acacu.

<sup>16</sup>Mecaniyuhecüatani yutetacü quename vaniu me'imate Cacaüyari me'utiyuatü, peru que memüteyurie, mepüyuhecüata masi quename meca'imate. Cuini mieme 'axa mecani'aneneni, yamepücatecahu, mecanixani'erivani sepa que memüteyurie 'aixüa memücateyuriecü.

### 'Üquisica müseye

**2** 'Ecüsü püta müpaü quetinecuxatani que müreuyevese, seiyyemecü pemüti'üqitanicü.

<sup>2</sup>Uquiravesixi mequeyumateni, 'aixüa mequetehecahun, mequeteHEMAIVAVENI que müreuyevese yamütiyurienenicü, mequeseseüyeni yuri que memüte'erie que memüteyucanaqui'erie, que memüte'uca'eniva. <sup>3</sup>Yaxeicüa 'ucaravesixi que memüte'u'uva, müpaü mequeteyurieca que müreuyevese yamütiyurienenicü Cacaüyarisüa miemetütü, niuquiperaxi mepücayüaca, vinucü mepüca'u'uvani xeicüa, tita 'aixüa müti'anecü xeicüa mequete'üqitani <sup>4</sup>müpaü meteva'üquitatü 'ucari, müme memüvanaqui'eriecacü yücünama yütüriyama, <sup>5</sup>memütemaivavenicü que müreuyevese yamütiyurienenicü, yücünama vahesie memüteyianicü me'itiyatücaitü,

yuquie memüte'uximayacacü,  
 'aixüa memüte'u'iyarinicü,  
 memüteyu'aitüarinüacacü  
 vacünama que memaitüca. Xüca  
 müpaü me'aneneni, Cacaüyari  
 niuquieya pücaseviximarieca, 'axa  
 pücatucuxaxasivani hepaüsitana.

<sup>6</sup>Müpaü yaxeicüa quetinivatuicani  
 'uquisi memütemaivavenicü que  
 müreuyevese yamütiyurienenicü.

<sup>7</sup>Naime hepaüsita 'inüari  
 quena'ayeitüvani 'aixüa  
 petiyurienetü. Que pemüti'üquta,  
 'a'iyarisie 'aixüa peti'acühüavetü  
 quetine'üquta 'aixüa peticamietü.

<sup>8</sup>Müpaü quetincexatani 'aniuqui  
 seüyemecü, xevitü mücayüvenicü  
 mitave'eriecacü, que mü'ane  
 müxe'aye'unie müteviyasitüarienicü  
 masi, cayüvetü mayanicü 'axa  
 mainenicü xehepaüsita.

<sup>9</sup>Müme väüriyarica  
 memüte'uximaya  
 mequeteyu'aitüarinüaca  
 vacusiyarima que memaitüca  
 naimecü. Mequevanaqui'aritäaca  
 masi, mepücani quixieca.

<sup>10</sup>Mepücavanavatüveni, masi  
 mequevahecüasitüiyani  
 'aixüa 'iyari yamemütecahucü,  
 tativicueisitüvame Cacaüyari  
 'uquiscaya visi mütixeyarieracü  
 que memüteyurie naimecü.

<sup>11</sup>'Ari masiücütü canayani  
 'aixüa que mütiuca'iyari  
 Cacaüyari. Müpaü mü'anecü,  
 yunaitü teüteri mecaniyüvaveni  
 memütavicueisitüarienicü.

<sup>12</sup>'Ayumieme müpaü  
 teteni'üquitüarieni  
 temütahecüatanicü quename  
 müme Cacaüyari memüca'ayexeiya  
 vahesüa tecamiemete, quename

tame teca'ihive'eri tita cuiepa  
 memütama memütehive'eri. Masi  
 yeme 'ipaü püta tepüte'üquitüarie  
 que temüte'u'uvanicü,  
 tetemaivavetü que müreuyevese  
 yatemüteyurieracü,  
 heiseriemecü yatetecahutü,  
 Cacaüyari te'ayexeyatü hicü  
 temu'uvanicü 'ena cuiepa, <sup>13</sup>meta  
 temicuevieracü que mü'ane  
 yemecü mütasitemaviritüani.  
 Hicü tepicuevie, masiücütü  
 mayanicü visi 'anetü que  
 mü'ane Cacaüyaritütü mümarive  
 tativicueisitüvame Cürisitu Qesusi  
 hücütütü. <sup>14</sup>'Iya niyuyetuan  
 tahesie mieme, mütasitaxünacü,  
 yemecü temüca'itisanacü 'inüari,  
 mücü mütas'itienicü masi  
 yuhesie mieme, teüterimama  
 temacü necü tetavaüriyatü 'aixüa  
 temüteyurieracü.

<sup>15</sup>Müpaü quetincexatani,  
 väüriyarica quenivapitüaca,  
 quenivahecüatüaca heiserie  
 petiva'aitüatü, xevitü  
 mücamasitave'eriecacü.

### Heiserie tepupitüarie 'iya 'aixüa mütiuca'iyaricü

**3** Quenivarata'eritüvani  
 yamemütecahunicü  
 te'aitamete heiserie  
 memexeiya que memaitüca,  
 memüteyu'aitüarinüacacü,  
 memüyuväüriyanicü 'aixüa  
 memüteyurieracü sepa que  
 mütitita 'aixüa müti'ane,  
<sup>2</sup>memücavaseviximacacü hipame  
 'axa me'utiuyatü vahepaüsita,  
 memücayucütüvenicü,  
 memüca'ayu'eririyanicü,  
 mümasiücünicü quename



tixaütü mecatehüme que memütevaxeiya yunaime teüteri. <sup>3</sup>Tameri tanaitü meripai 'asitecatemaitü teniu'uvacaitüni, yatepücatecahucai, tepeuyexüriecai, vaüriyarica tepüte'uximayacai tita temütehive'eriecaisie mieme xeicüa, müiremecü temünaqui'acacü xeicüa tepüyüacai, 'atepu'uvacai 'axa teteyuriecütü te'ütesatü. Tepü'uxive'erivacai, tepüta'uxive'eriecai tanaitü.

<sup>4</sup>Anatütüri masiücütü canayani 'aixüa que mütiuca'iyari tativicueisitüvame Cacaüyari, que mütatinaqui'erie teüteri. <sup>5</sup>Tame heiseriemecü yatetecahutü temüyüacaicü 'asipücatiuyuri, masi mücü mütasinenimayacaicü püta pütasi'utavicueisitüa. Pütasi'u'iti hutarieca tasitinuivitüaca, 'Iyari Mütiyupata tasihecuarivyacacü. <sup>6</sup>Mücü 'Iyari niutatuanü vaücavamecü temeixeiyanicü, tativicueisitüvame Qesusi Cürisitu yatatiumicu. <sup>7</sup>Heiserie tepupitüarie 'iya 'aixüa mütiuca'iyaricü, 'ayumieme tahesie catininaqueni tucari mücaxüve temexeiyanicü. Müpäü yuri tete'erietü tepüta'icueva.

<sup>8</sup>Mücü niuqui yuricü paine. Müpäü nepüticu'eriva, peuyevese türücaüyemecü müpäü pemütivatahüavecü. Peuyevese müme yuri memüteta'erivave Cacaüyarisie memüyu'iyaritüacacü quepäü 'aixüa memüteyurieca. 'Aixüa cani'anemücü nivaparevicamücü teüteri, müpäü memüteyuriecacü. <sup>9</sup>Peru niuqui que memütexüatüa

'asimecatemaitü, que memütecuvaitüve xeime ramare hepaüsita, que memüteyuheca, 'inüari niuquiyari hepaüsita que memüteyucuitüve, mücü hepaüsita quene'acuerivayurieca. 'Axa 'anetü payeica que memüteyurie, xüanacüa payeica. <sup>10</sup>Que mü'ane yuhesie mütivaviyasitüa 'ivamarixi, mücü quenanuyehüva hutacüa pe'ita'imaiyame, <sup>11</sup>müpäü petimaitü, que mü'ane müpäü mütiyuriene neutunini, 'axa tiniuyurieneni, yücümana yuhesie tiniuhüpani.

#### Que mütiavaruta'aitüa

<sup>12</sup>'Ahesüa quepaucua menuani 'Arütema nehenunü'ayu, Tiquicu nusu, quene'amexüitüa nehesüa pemümiyecü Nicupuripai. Müpäü nepüticu'eriva, mana nepecani muhaütüsie. <sup>13</sup>Senaxi 'inüaricü müti'üquitame, 'Apuruxi yunaime quenivaparevieca vahuyeta, 'aixüa 'iyaricü pe'atuatü, tixaütü memücateheuyehüacacü. <sup>14</sup>Tateüterima müpäü mequeteyü'üquitüaca 'aixüa memüteyuriecacü memeixeiyanicü tita müreuyevese, capa meca'utixuxuaveretü me'acüneccü.

#### Que mütiavaruvaüritüa, 'aixüa que mutayü 'aixüa memü'itüarienicü

<sup>15</sup>Yunaitü nehesüa memü'uva mecamanivaüritüaca. 'Ecüta quenivavaüritüaca müme memütasinaqui'erie yuri mete'erietü. 'Aixüa quetiuca'iyarini yunaime xehesie mieme tacacaüyari. Müpäü xeicüa.

# QUIRIMUNI

## Papuru Que Mütinü'airi

---

### Vaürisica

<sup>1</sup>Ne Papuru, ne'anutahüiyatü Cürisitu Qesusisie mieme, ta'iva Timuteumatü, tecanixevaüiritüaca, Quirimuni temümasinaqui'erie tahamatü pemüti'uximaya, <sup>2</sup>tamita meta 'Apiya titevacame temünaqui'erie, 'Aruquipu meta tahepaü cuya, müme meta memüyuyexexeüriva 'aquita. <sup>3</sup>Cacaüyari müta'uquiyari, Tati'aitüvame Qesusi Cürisitumatü, xüca 'aixüa mete'u'iyarini xehesie mieme, xüca mexepitüaca yu'iyarisie xemüca'uximatüariecacü.

### Quirimuni que mütiyucanaqui'eriecai, yuri que müti'eriecai

<sup>4</sup>Pamüpariyusi necanipitüaca necacaüyari neheyemecü, quepaucua nemümasicuxata nenenevietetü, <sup>5</sup>nemü'enacü que pemütivanaqui'erie Cacaüyari teüterimama yunaime, Ti'aitame Qesusisie yuri que pemüti'erie. <sup>6</sup>Ipaü netininenenevieca, 'axeicüa temüpütüarienicü masi yemecü Cürisitusie teteviyatü temacüneccü,

'ahamatü temütaxevicü yuri tete'erietü. Xüca 'aixüa tetemaica tita temütehexeiya 'aixüa müti'ane naime, müpaü teni'itüariecacuni. <sup>7</sup>Vaücava nepünetemavie nepütüicarie 'ecü pemüti'acanaqui'eriecü. Cacaüyari teüterimama mecani'uxipitüarieca yu'iyarisie, 'ecü que pemütüyuriene ne'iva.

### Papuru que mütitavavirie 'Unesimu hepaüsita

<sup>8</sup>'Ayumieme, Cürisitusie netiviyatü sepaü heiserie nemexeiya necamatü nemümati'aitüacacü tita müreuyevese, <sup>9</sup>masi temütetacanaqui'eriecü, 'ayumieme vaüriyarica nemanipitüacaqueyu püta. Ne Papuru que nemü'ane, ne'uquirasitütü, ne'anutahüiyacame nehücütütü hicü Cürisitu Qesusisie mieme, <sup>10</sup>vaüriyarica necamanipitüaca nenive hepaüsita, que mü'ane ne'anutahüiyatü nemitinüvitüia. 'Unesimu necanixatani. <sup>11</sup>Mücü 'asipücatiyurienecai 'aixüa mü'ane 'ahesie

mieme, perusü hicü 'ecü ne tecaneiyehüaca tanaitü. <sup>12</sup>'Ahesüa nenenuñü'amücü ne'iyaritüme.

<sup>13</sup>Nehesüa nepicayeniquecai, 'ahesie mieme münesiparevienicü ne'anutahüiyacacu niuqui 'aixüa manuyünesie mieme.

<sup>14</sup>Masiri 'ecü 'asipecatimaicacu, nepücanevaüriyacai. Xüca ne'icayenique, 'aixüa pepütiyurieneniqueyu

'ecü, peru vaüriyarica yapepütiyurieneniqueyu. Mecuxi pemü'avaüriyaniqueyu püta.

<sup>15</sup>Pepitatümaiya yareutevicacu, peru xüari müpäü tiniuyüni 'aheyemecü peheixeyatü pemayanicü. <sup>16</sup>Ti'uximayatame xeicüa pücahücü, masi vaücava peuyevese hicü. Ta'iva canayani münaqui'eriva. Ne yemecü nepinaqui'erie, 'ecüta masi vaüca peninaqui'eriecamücü tevitüme, Ti'aitamesie tiviyacameta.

<sup>17</sup>'Ayumieme xüca tetaxevime pe'erieca, queneutanaqui'eri que pemüneretanaqui'erieniqueyu ne.

<sup>18</sup>Xüca 'axa masi'uyurieni, xüca tixatütü reuyeveca mütiyutuanicü, yaquenetineucuetatüa ne. <sup>19</sup>Ne Papuru nemamacü müpäü

nepütüu'utüa, ne nepürapica. Siqueresü 'asinepücamarahüaveni que müreuyevese masi pemünerapiniriecacü 'ecü tucari pemexeyacü. <sup>20</sup>'Eri ne'iva, Ti'aitamesie temüteviyacü nepaine, 'aixüa nepülitüarieniqueyu 'acümana. Queneneu'uxipitüa ne'iyarisie, Cürisitusie que temüteviya.

<sup>21</sup>Nepümatüu'utüiri yuri neti'erietü quename yapeticamieni, müpäü netimaitü, que nemutaine ne, 'ecü pecananuyehaitürüvemücü. <sup>22</sup>Mücü meta, queneneucuha'aritüiri haque nemayecani. Nepüta'icueva müpäü yuri neti'erietü, xeyuneneviecacu nepüpütüarieni xehesüa nemüyemiecü.

#### **Vaürisica que mütiyarunü'airiexüa**

<sup>23</sup>Mecamanivaüritüaca, 'Epapüraxiri nehepäü muviyarie Cürisitu Qesusisie mieme, <sup>24</sup>Maricuxiri, 'Arisitaricuri, Remaxiri, Rucaxiri. Müme nehamatü meteni'uximayaca.

<sup>25</sup>Ti'aitame Qesusi Cürisitu xüca 'aixüa tiuca'iyarini xe'iyarisie mieme.

# HEPÜRAYSIXI

## Que Memüte'u'utüiyari

### Cacaüyari pütatiutaxatüa nu'aya yaticuxatacacu

**1** Cacaüyari meripai tinivacuxaxatüvacaitüni ta'uquiyarima, texaxatametemama yametecuxatacacu, yuxexuitü que memüte'upitüarie niuqui yücü mü'anene hepaüsita. <sup>2</sup>Hicü tucari taparirümecacu pütatiutaxatüa tame, yaticuxatacacu que mü'ane nu'aya mühücü püta. Mücü yunive canicayasa hesiena mütinaquenücü naitü. Mücü 'inetüacu meta Cacaüyari caninetüani tita 'amüticuma. <sup>3</sup>Mücüsie que mütixavatü canimasiücüni que mütimarive Cacaüyari, Cacaüyari cani'inüariyatüni que mütivaıyacı. Naime meta püratücü yuniuqui mütürücaüyecü. Mücü yücümana 'aixüa 'iyurieca tita 'axa temüte'uyuri hepaüsita mütasıl'tienicü, 'ana que mü'ane mumarive serieta nayerüni muyuavisie.

### Nu'aya püve'eme, niuqui tuayamete taheima miemete hepaüna mecave'emetüacu

<sup>4</sup>Mücü niupitüarieni yemecü mumarivanicü que mü'ane

mühücü, peru taheima miemete niuqui tuayamete hepaüna mepücate'upitüarie. Yaxeicüata ve'emetütü nayani, müme hepaüna mecave'emetüacu. <sup>5</sup>Querı Cacaüyari müpaü titahüavive niuqui tuayamete xeime heiva, müpaü ticühüavetü,

'Ecü pepünenive,  
Hicü 'a'uquiyari nepaneyeitüa,  
'utaitü. Nusu querı 'utayü,  
Ne 'uquiyarieya nepayani,  
Mücü nenive payani,  
'utaitü. <sup>6</sup>Masi tucari hepaüsita ticuxatatatü quepaucua cuiepa mi'atüani yumatüari müpaü püta canaineni,

Yunaitü Cacaüyarisüa miemete Niuqui tuayamete Meque'ineneviyani,  
'utaitü. <sup>7</sup>Quepaucua niuqui tuayamete müvaxata müpaü paine, Yuniuqui tuayamete 'Eca nivarayeitüvani, Yutupirisixima meta Tai nerücuari nivarayeitüvani.

<sup>8</sup>Yunive püta xatatü müpaü paine, 'Ecü Cacaüyari 'a'uveni haque pemüra'aita Yuheyemecü 'apuve,

- Canixeuraüyeni  
 'A'isü pemacue'e pemüti'aitamecü  
 'Inüari canihücütüni  
 Heiseriemecü que pemüticamie  
 'ecü.
- <sup>9</sup> Pepinaqui'erie tita mütiheiserie,  
 Pepi'uxive'erie tita 'aisica  
 mütitisana.  
 Cacaüyari 'acu  
 Que mü'ane mü'acacaüyari  
 Pümasi'anayexei,  
 Temavierica masipitüatü  
 'Inüaritüme  
 'Ahamicuma cavaratahüavetü.
- <sup>10</sup> Müpaü paineta,  
 'Ecü Ti'aitame sutüapai  
 pepicaque cuie,  
 Muyuavi peputavevie 'amamacü.
- <sup>11</sup> Mücü pütüyünare  
 'Ecü püta 'apeniuvemücü.  
 'Ixuriquipaü mücü naitü  
 nitaye'irimücü.
- <sup>12</sup> Muyuavi pepütatuna 'ücaripaü  
 Camixapaü püpasieni.  
 Masi 'ecü yaxaicüa pe' Janetü  
 pepü'ahayeva,  
 'Atucari pücatixüni.
- <sup>13</sup> Queri hasuacu titahüavive niuqui  
 tuayamete xeime müpaü ticühüavetü,  
 Neserietta mexicuxi quenacani  
 Memümasi'aca'unie  
 nemüva'atüani 'ahetüa.
- <sup>14</sup> Camüsü niuqui tuayamete  
 yunaitü 'iyarite mecanihümetüni,  
 Cacaüyari memütupirisiximama.  
 Mepütanü'ariva memüvaporevienicü  
 müme vahesie mütinaquirüme mem  
 ütavicueisitüarienicü.

**'Icü vicueisitüarica vaüca  
 pütürücaüye**

- 2** Müpaü mü'anecü,  
 'ayumieme caneuveca

masi vaüca teme'erivanicü tita  
 temüte'u'eni capa yacü xaicüa  
 teyüatü teva te'u'uvanicü.  
<sup>2</sup> Camü mücü niuqui mutaxasie  
 niuqui tuayamete taheima  
 miemete yametecuxatacacu,  
 mücü niseüyecaitüni.  
 Yunaitü memitisanaxüa  
 yunaitü memüca'l'eniecai  
 metenapiniyariyecaitüni  
 mecanimari'itüariyecaitüni,  
 vahesie que mütinaquecai, que  
 müreuyevecai. <sup>3</sup> Mericüte, xüca  
 müpaü 'aneni, quesü tetetavicueni  
 tame xüca te'itave'erieca 'icü  
 vicueisitüarica müya mütitürücaüye.  
 Mücü caniusütüarieni  
 Ti'aitame yaticuxatacacu que  
 temütetavicueisitüarieni haitü.  
 Niuquieya mepuseiriyaxü  
 mümeta memi'eniecai müpaü  
 temütemaicacü tame. <sup>4</sup> Cacaüyarita  
 'axeicüa vahamatü müpaü  
 tinihecüatacaütüni 'inüari vevietü  
 mamarivaveme, türücaüyemecü  
 tiyurienetü müremecü, 'Iyari  
 Mütiyupata vatapitüacacu  
 yuxexuime, que mütinaquecai  
 Cacaüyari.

**Que mü'ane misütüa  
 temütavicueisitüarienicü**

<sup>5</sup> Que mütiu'aitaxü mücü cuie  
 'umamie hepaüsita, niuqui tuayamete  
 memüte'aitanicü muva 'asipüca'utayü.  
 Mücü cuie canihücütüni tita  
 hepaüsita temütécuxata. <sup>6</sup> Hecüasica  
 canixuaveni xapasie müpaü  
 manuyüne,  
 Teüteri que metetitamexi  
 pemüvara'erivanicü.  
 Teüteri vanivema quesü  
 metetitamexi

Pemü'avaüricü vahesie mieme.

<sup>7</sup> Penivaranucayasa niuqui  
tuayamete vahepaü  
memücatürücavinicü  
yapaümexa.

Penivaranutumatumäni visi  
me'ananetü memacüneccü  
Ve'emecü memüxeiyarienicü.

<sup>8</sup> Pepicayasaxü naime pehe'ivaca  
vahesie mieme

Müme memüte'aitanicü  
hepaüsitana.

Merücüsü, que müticayasaxü  
naime he'ivaca para teüteri  
memüte'aitanicü hepaüsitana, tixaü  
pücaranuyuhayeva hepaüsitana  
memücate'aitanicü. Peru hicü  
cuxi que temütevaxeiya teüteri,  
naitü 'acuxi pücaha'ivarieve müme  
memüte'aitanicü hepaüsitana.

<sup>9</sup> Qesusi xeicüa que temüte'ixeiya,  
mücü yapaümexa niucayerieni  
niuqui tuayamete vahepaü  
mücatürücaüyenicü. Mücü  
mütiucuinxücü quepaucua mumü,  
cananutimumatüarieni visi 'anetü  
mayanicü ve'emecü müxeiyarienicü.  
Cacaüyari 'aixüa mütiuca'iyaricü  
müpaü tiniuyüni, mumünicü  
tanaime tahesie mieme.

<sup>10</sup> Mücü nisütüani naime,  
'inetüacu caniuneni naitü. 'Aixüa  
caniuyüni Cacaüyari, varavitütü  
yumüreme yunivema visi  
me'ananetü memacüneccü,  
meyeratüacü que mü'ane misütüa  
memütavicueisitüarienicü,  
yatipitüatü müticuineccü para  
maye'anicü. <sup>11</sup> Que mü'ane  
müvapata, mümeta memupasie,  
xeimesie mecaniyecüne yunaitü.  
'Ayumieme pücayuteviya yu'ivama  
vaterüvatü <sup>12</sup> müpaü 'utaitü,

Nepümasiheccüatani que mü'ane  
pemühücü

Ne'ivama menesi'enieccacu  
Memüyutixexeüriva vahixüapa  
ne'uvetü

Nemasinüavani.

<sup>13</sup> Müpaü paine meta,  
Ne yuri nepütü'erieca hesiena.

Müpaü meta paine,  
Camü ne necaniyüaneni,  
Nenivemata Cacaüyari que  
münetiuhüritüa mecaniyüaca.

<sup>14</sup> Merücüsü, ranivema 'axeicüa  
mecaniyuxevini xei xuriyari  
xei vaiyari. 'Ayumieme mücütä  
yaxeicüa tahamatü yuxevitü  
nayani, tahepaü yemecü. Müpaü  
mütiuyuricü mumücü meta  
püyüvecäi mica'unanicü que  
mü'ane türücariya mexeiya  
yemecü mütasicuinicü  
Cauyumarietütü. <sup>15</sup> Püyüvecäi  
meta müvaxünacü müme mexi  
me'ayeyuyuricäi meuyevecäi  
vaüriyarica memüte'uximayacacü  
meteha'erivatü que  
memütecuinequecäi.

<sup>16</sup> Canimasiücünü niuqui tuayamete  
memücahümeccü müvaparevie,  
masi 'Apurahami xiüyarimama  
püta püvaparevie. <sup>17</sup> 'Ayumieme  
peuyevecäi yu'ivama vahepaü  
'anetü mayeitüarienicü naime  
hepaüsita. Müpaü 'anetü  
caniyüvecäitüni mara'acame  
mayanicü tiyucananimayatü  
yaticamietü, Cacaüyarisie mieme  
hüritüarietü, 'aixüa miyurienicü  
tita teüteri 'axa memüte'uyuri  
hepaüsita. <sup>18</sup> Mücü mütiucuinxücü  
mu'inüasieccü, caniyüveni  
müvaparevienicü hipame mexi  
me'inüasie.

**Quesusi püve'eme, Muisexi  
hepaüna cave'emetücacu**

**3** Mericüte ne'ivama  
xemupasie Cacaüyarisie  
mieme, 'axeicüa xemuta'inierie  
que mü'ane taheima macave  
xehahüavecacu, müpaü mü'anecü  
'ayumieme müpaü nepaine,  
xequena'erivani Quesusi. Mücü  
nü'ari nayani, mara'acameta nayani  
cuini mieme mütiuhürütüarie.  
Mücü canihücütüni hesiena  
teteviyatü temütahecüata. <sup>2</sup>Mücü  
yatinicamieni que maine que  
mü'ane mihürütüa, yaxaicüa  
que müticamiecai Muisexi,  
Cacaüyari quie quiecatari  
vahepaüsita hürütüarietü.  
<sup>3</sup>Peru 'licüsie pütünaquixü  
masi yemecü ve'emecü  
müxeiyarienicü, Muisexi hepaüna  
catixeyarievecacu, yaxaicüa  
qui vevivame cui ve'emecü  
que müticuxaxasiva, veviyaya  
hepaüna caticuxaxasivacacu  
qui. <sup>4</sup>Tevi pitivevie naime  
qui, peru que mü'ane nai  
mütiutivevie, mücü Cacaüyari  
canihücütüni. <sup>5</sup>Merücüsü, Muisexi  
yapüticamiecai Cacaüyari quie  
quiecatari yunaime vahepaüsita  
que mütiuhürütüarie, peru  
tiparevivame canihücütücaitüni  
xeicüa mucayeri mütihecüatanicü  
tita 'arique müticuxaxasivaniquecai  
hepaüsita. <sup>6</sup>Cürisitu püta  
yapüticamie quiecame nu'aya  
hücütütü, Cacaüyari quie quiecatari  
vahepaüsita que mütiuhürütüarie.  
Merücüsü tame quiena quiecatari  
tepühüme xüca tetahayeva  
tecamamatü 'aixüa te'utiuyatü

tita temütecuevie hepaüsita  
tecacuyütüarivatü quepaucua  
mütapareque.

**Cacaüyari teüterimama que  
memüte'uxipitüarieca**

<sup>7</sup>'Ayumieme que maine 'Iyari  
Mütiyupata,  
Hicü xüca xe'l'enieni  
'utaniucacacu,  
<sup>8</sup>Xe'u'itutupetü xepüca'acüne  
yu'iyarisie  
Que memüte'acü müme 'ana  
Quepaucua memüyucuitüvecai  
nehamatü  
Que memüte'uyuri mücü  
tucarisie  
Quepaucua  
memünesi'uta'inüataxü  
Macumavesie me'u'uvatü,  
<sup>9</sup>Haque xe'uquiyarima  
memünesihe'isipatüvecai,  
Sepa ne'uximayasica  
memüxeiyacai huta teviyari  
viyari.  
<sup>10</sup>'Ayumieme nepuyeha'a 'ana  
miemetexi vahepaüsita.  
Müpaü neputayü,  
Yuheyemecü yu'iyarisie  
meneuyexürüveni, nehaitü.  
Que nemütiuyeica,  
'asimepücateheitimavave.  
<sup>11</sup>'Ayumieme müpaü  
nepütinehürütüa neha'atü,  
Müpaü ne'utaitü,  
Yemecü mepüca'aye'axüani  
haque nemüvareca'uxipitüani.  
<sup>12</sup>Xequeneyucuerivayurica  
xeme ne'ivama capa xevitü xeme  
'iyarieya 'axa 'anenicü, capa  
yuri cati'eriecacü 'ihayevamütü  
Cacaüyari mayeyuri. <sup>13</sup>Masisü  
xexuime tucarisie xequeneyutuicani

mexicuxi hicü xasiva, capa  
 'u'lituperecü xevitü xeme, tita  
 'axa müti'ane xecuamanacacu.  
<sup>14</sup>'Axeicüa tepütaxevi Cürisitumatü  
 xüca yuri tete'erietü tetahayeva,  
 matüaripai yuri que temüte'uta'erie,  
 'asitecacuyuitüarivatü quepaucua  
 mütapareque, <sup>15</sup>müpaü que  
 manuyüne,

Hicü xüca xe'l'enieni  
 'utaniucacacu,  
 Xe'u'itutupetü xepüca'acüne  
 yu'iyarisie  
 Que memüte'acü müme 'ana  
 Quepaucua memüyucuitüvecai  
 nehamatü.

<sup>16</sup>Que hate mepüyucuitüvecai  
 hamatüana sepa memi'eniecai.  
 Müme mecanihümetücaitüni  
 yunaitü 'Equipitu cuieyarisie  
 memeyecü Muisexi varavitücücacu.

<sup>17</sup>Meriçüte, que hate vahepaüsita  
 püha'acai huta teviyari viyari.  
 Müpaü catinimasiücünü, müme  
 mecanihümetücaitüni 'axa  
 memüte'uyuri 'ana. Müme  
 vacaxari 'apucuhetei me'atixüriecu  
 macumavesie. <sup>18</sup>Meriçüte, que  
 hate tivarahüavetü tiyühürütüa,  
 müpaü 'utaitü quename  
 meca'aye'axüaniquecai yemecü  
 haque müvareca'uxipietüaniquecai.  
 Müme mecanihümetücaitüni yuri  
 memücate'eriecai. <sup>19</sup>Meriçüte  
 'ayumieme müpaü tepütamate,  
 mepüyutatexi me'aye'axüanique  
 yuri memücate'eriecaicü müme.

**4** Meriçüsü niuquieya puxuave  
 cuxi que mutayü quename  
 tevi yüve maye'anicü haque  
 meica'uxipitüani. 'Ayumieme  
 teque'umamaca capa xevitü xeme  
 ca'aye'avemepaü tixeyariecacü.

<sup>2</sup>Tamesietü niuqui 'aixüa  
 manuyü necü tepüte'utaxatüarie  
 yaxecüa vahepaü. Peru mücü  
 niuqui memü'eni 'asipücavaruyuri  
 müme, mücayutaxeviriyaxücü  
 müme memi'eniecai vahamatü yuri  
 mecateta'erivavecacu. <sup>3</sup>Tame püta  
 yuri temüte'uta'eri tepaye'axüaxime  
 haque mütasiheca'uxipitüani,  
 müpaü que mutayü,

Yanepütinehürütüa neha'atü,  
 Müpaü ne'utaitü,  
 Yemecü mepüca'aye'axüani  
 müme

Haque nemüvareca'uxipitüani.  
 Müpaü putayü sepa 'uximayasicaya  
 münürüe cuie munetüaripai.

<sup>4</sup>Xapasie niuqui puxuave mücü  
 'atahutarieca mieme tucari müxata  
 müpaü 'anuyütü, Cacaüyari  
 'atahutarieca tucarisie niuca'uxipieni  
 'inüca yu'uximayasica naima.

<sup>5</sup>Müpaü paine meta,  
 Yemecü mepüca'aye'axüani  
 müme

Haque nemüvareca'uxipitüani.

<sup>6</sup>Meriçüsü 'uxipiya 'acuxi puxuave  
 hipatü yamemüte'aye'axüanicü,  
 peru müme matüari niuqui  
 'aixüa manuyü necü müpaü  
 memütecühüavarüvacai  
 mepüca'aye'axüa yuri  
 memücate'eriecaicü. <sup>7</sup>Tavari tucari  
 niupata xeime, Hicü müterüvarie.  
 Raviri xapayasie müpaü putayü  
 müixa viyari 'anuyeyacu, yaxecüa  
 meripai que mutayü müpaü 'utaitü,

Hicü xüca xe'l'enieni  
 'utaniucacacu,  
 Xe'u'itutupetü xepüca'acüne  
 yu'iyarisie.

<sup>8</sup>Hicümüsü, xüca mücü Cusue  
 vareca'uxipitüanique 'ana,



Cacaüyari 'asipücahaineniqueyu xeime tucari hepaüsita 'arique maye'aniqueaicü. <sup>9</sup>'Ayumieme 'uxipiya tucari puxuave cuxi Cacaüyari teüterimama vahesie mieme. <sup>10</sup>Que mü'ane maye'ave haque meica'uxipitüa, mücü pütüihayevaxü yu'uximayasica 'unüca, yaxaicüa Cacaüyari que mütiuhayevaxü 'inüca yu'uximayasica. <sup>11</sup>'Ayumieme tequetamexüütüaca temaye'axüanicü haque mütasieheca'uxipitüani, xevitü capa 'ativenicü capa masiücünicü hesiena yuri que mücati'erie yaxaicüa müme vahepaü.

<sup>12</sup>Cacaüyari niuquieya payeyuri pütürücaüye. 'Aixüa püreutiquequema, hepaüna careutiquequemacacu 'ixipara sepa naisata meutixicacauni. Pitixiteque 'ipatatü ratucari ra'iyari, raturuyari ratutanayari naime. Pi'inüata tevi que mütiyumate que mütiyu'iyaritüa yu'iyarisie. <sup>13</sup>Sepa que mütitita munetüarie pücaüve mü'aviesiecacü mücü que mütxeiya. Naitüri masi pümasiücü panutiyeipiya que mü'ane mütasitahüave 'ixeyiacacu.

**Quesusi mara'acame canihücütüni cui mühürütüarie mümarive**

<sup>14</sup>Mericsü tepeixeiya mara'acame cuini mieme mühürütüarie mümarive muyuavi heima manutitüa Qesusitütü Cacaüyari münü'aya. 'Ayumieme tequetahayevani yatetetahecüatatü hesiena que temüteviya. <sup>15</sup>Mara'acame que temüte'ayexeiya, tepücaheixeiya que mü'ane

mücaüve tahepaü mütiyumaicacü que temütevararani tame.

Tepeixeiya püta que mü'ane naime hepaüsita mü'inüasie yaxaicüa tahepaü, peru 'axa catiyurievettü.

<sup>16</sup>'Ayumieme tecamamatü 'aura teque'acüne que mü'ane 'aixüa mütiuca'iyari 'uvenieya manuve 'aurie, temünenimayasiecacü, temüpareviyanicü quepaucua müpaü temüteheuyehüva, mücü 'aixüa tiuca'iyaricacu.

**5** Mara'acate cuini mieme memühürütüarie teüteri vasata mecananuyexeiyarieca yunaitü, mecaniucayasarieni Cacaüyarisie mieme memühürütüariecacü, teüteri vahesie mieme memixatüanicü 'imiquieri mavari, 'aixüa me'iyurienique tita 'axa memüteyurie hepaüsita.

<sup>2</sup>Xüca müpaü 'aneni mara'acame, caniyüveni müvatahüave müme 'asimecatemaitü memeuyexürüve carima cavayurienetü, vahepaü veranitü 'amuyeiacü. <sup>3</sup>Müpaü müveranicü quepaucua mixatüa Cacaüyari teüteri tita 'axa memüteyurie hepaüsita, müpaüta püreuyevese mavari müvevienicü yücümana tita 'axa mütiuyuri hepaüsita 'aixüa miyurienicü.

<sup>4</sup>Mücü meta, tevi yücümana püca'uyucaye 'ipaü mütihürütüariecacü, masi Cacaüyari yatitahüavecacu xEICÜA pucayeri 'Arunipäü. <sup>5</sup>Yaxaicüa Cürisitu visi 'aneme püca'ayuyeitüa yücümana mara'acame mayanicü cui mühürütüarie, masisü müpaü pütipitüa que mü'ane müpaü mütitahüavixü,

'Ecü pepünenive,

Hicü 'a'uquiyari nepaneyeitüa.  
<sup>6</sup>Müpaü puyü que maine xeime xapasie,

'Ecü 'aheyemecü  
 pecanimara'acametüni,  
 Merüquiserequipaü que  
 mütiuhürütüarie

Yapepütüühürütüarie 'ecü.

<sup>7</sup>Mücü mexi tevitütü 'a'uyeicacai carima niyutanenevieni 'ahivatü 'utasuatü, nitavavirieni que mü'ane müyüvecai mitavicueisitüanicü capa 'umünicü. Pu'enierie müreyehüviriecaicü Cacaüyari.

<sup>8</sup>Sepa nu'aya mühücütücai, tiucuineca yapüretima yamüticamienicü. <sup>9</sup>Müpaü raye'atüarieca, yuheyemecü memütavicueisitüarianicü vapitüatü nayani, yunaitü yamemütecahu que maine,  
<sup>10</sup>Cacaüyari 'icayecu mara'acame cuini mieme mühürütüarie mayanicü Merüquiserequi que mütiuhürütüarie.

**Que mütivacu'imavacai  
 memücatehayevanicü  
 yuri mete'erietü**

<sup>11</sup>Mücü Merüquiserequi hepaüsita vaücavame tepeixeiya niuqui mücuanive yatemütexehécüasitüiyanicü, xeme xemüyu'üraraxiecü que xemüte'u'enana. <sup>12</sup>Tamüsü, müpaü püreuyevese masi te'üquitamete xemühümetünicü, müixa manuyetüacü yuri xemüte'uta'eri, peru xecaneiyehüaca que mü'ane hutarieca misütüiani tixe'üquitüatü sutüapai mieme 'üquisica Cacaüyari que maine, hecuamete que memüte'üquitüarie.

Resi xeheyehüatü xecanacüne, 'icuai mütürücaüye xequematü xepüca'acünivave. <sup>13</sup>Yunaitü resi memüsise mecacani'iyamatücani niuqui müheiserie hepaüsita. Mepütüri cuxi. <sup>14</sup>'Icuai mütürücaüye 'amemütütü vahesie canimiemetüni, müme memü'iyamatücacü yu'iyarisie memüteyü'üquitüavavecü para memipatanicü tita 'aixüa müti'ane tita 'axa müti'ane, müme vahesie pümieme.

**6** Mericüsü peuyevese temütehayevanicü hicü tetecuxatatü sutüa mieme niuqui hepaüsita Cürisitu hepaüsita manuyüne xecüa. Tepucüne püta temaye'axüanicü. Tavari tenari tepücatavevieni quitüa mieme, müpaü tepücatecuxatani que müreyevese tevi mütihayevanicü que mütiyurienecai cümana mümüniquecai, que müreyevese yuri mütitä'erienicü Cacaüyarisie. <sup>2</sup>Müpaü tepücate'üquitani hicü 'üyarica hepaüsita, tevisie que memüte'utime hepaüsita, müquite que memüte'anucu'uni hepaüsita, yuheyemecü 'isicame que mütiwaranutaxürieni hepaüsita. <sup>3</sup>Mericüte, temaye'axüanicü tepucüne, xüca Cacaüyari müpaü tatitaunieca.

<sup>4</sup>Müme heiva memuhecüariyari, yuhesie memeitima mücü 'imiquieri taheima mümieme, 'Iyari Mütiyupata mehexeyatü memacü 'axeicüa tahepäi, <sup>5</sup>yücümana müpaü memütehetima 'aixüa que müti'ane Cacaüyari niuquieya türücarिया memetima tucari 'umamiesie

mieme, <sup>6</sup>müme xüca ta'aurie me'axüriexüani, mepücayüvave tavari memühecuariyarienicü para memütehayevanicü que memüteyuriecäi. Müme masi curuxisie mepimi Cacaüyari nu'aya yücümana, masiücüme mepeyeitüva münanaimarienicü. <sup>7</sup>Tamüsü, cuie xüca viyeri yatiyuineni hesiena mucaviviye, xüca 'itinetüani tupiriya 'aixüa mü'anene 'esamete vahesie mieme, Cacaüyari 'aixüa pütipitüa. <sup>8</sup>Me cuie xüca xuya visaxa 'utinetüani püxani'eriva püta, pücueriva'ane hepaüsitana müticuxaxasivanicü para 'axa mü'itüarienicü. Mütataiyarienicü pü'ayumieme xeicüa.

#### **Tepüseiriyari yateteta'icuevatü**

<sup>9</sup>Perusü sepa müpaü temaitüca, masi 'aixüa 'anemecü quename xeteyurie yuri tepüte'erie xehepaüsita tanaqui'erima, quename xetavicueisitüariexime. <sup>10</sup>Cacaüyariri müpaü pücaýüane que mü'ane heiseriemecü yamücaticamiepaü. Pücaxetümaiya que xemüte'uximayacai que xemüteyuhecüatataci xeteyucanaqui'erietü xeme'erivacaicü. Que xemüteyucanaqui'eriecäi pümasiücücai xemüvapareviecaicü teüterimama, hicüta que xemütevaparevie. <sup>11</sup>Müpaü pütatinaque, yuxexuitü xeme xemüyuhecüatanicü yaxaicüa xeyumexüitüatü yemecü yuri que xemüte'erie, xeta'icuevatü quepaucua mütapareque. <sup>12</sup>Peuyevese

xemücayu'üraraxiecacü, masi peuyevese xemüva'üquenicü müme yuri mete'eriecacu 'emeteutevicacu mecavaüripietü, müme vahesie mütinaquirüme tita memütehahüavarüvacai quename meheixeiyaniquecai.

<sup>13</sup>Cacaüyari quepaucua müpaü mütitahüavixü 'Aurahami tita mürexeiyaniquecai hepaüsita, xevitü masi vaüca mütürücaiyecai 'apüca'uyeicacai Cacaüyari mixatanicü yühüritüatü. 'Ayumieme yuxatatü yücümana puyühüritüa müpaü 'utaitü, <sup>14</sup>Yemecü 'aixüa nemaniyuriecämücü, yemecü nemanimüiriyacamücü. <sup>15</sup>Müpaü 'ereutereca cavaüripietü 'Aurahami, que mütiutahüavarie, heixeiyatü nayani. <sup>16</sup>Teüteri quepaucua memüyühüritüa, mepixata que mü'ane masi vaüca mütürücaiyecai. Naimecü xüca yuhüritüani, mücücü püseiriyarie niuqui, pünami niuqui xüatüarica. <sup>17</sup>'Ayumieme Cacaüyari yaxaicüa pütüuyuri quepaucua muyuvaüri masi heiseriemecü müvahecüasitüiyanicü müme vahesie mütinaqueniequecai tita memütehahüavarüvacai, müpaü memütemaicacü que mücatipasieve tita mütiyuriemücü. 'Ayumieme pitaxeviriyaxü yuniuqui yühüritüatü. <sup>18</sup>Tame 'ayumieme tita mücatipasieve tepexeiya hutame. Mücü hepaüsita Cacaüyari pücaýüve mütati'itaiyanicü. Mücücü 'ayumieme türücaiyemecü tecanituicarieca, tame temütata'unaxü te'iviyatü tita temütecuevie. <sup>19</sup>Müpaü xüca teteta'icuevani yuri tete'erietü,

tepeixeiya tiyuhaname tatarisise mieme mütasiseiriyanicü. Pücahateque püsel'i. Cacaüyari manuvesie pütiviya, tuquieyasie mieme 'ixuriqui reunacame varie peutahave, <sup>20</sup>haque tahesie mieme meutaha Quesusi tasi'anuyehaitüiyatü, mara'acame 'ayaca yuheyemecü, Merüquiserequipaü mütiuhüritüar ie.

**Merüquiserequi que mütiuhüritüarie mara'acametütü**

**7** Mücü Merüquiserequi, Saremetari pütiva'aitüvemetücai, Cacaüyari taheima macave pümaral'acameyatücai. Quepaucua 'Apurahami mamieximecai varal'ivaca te'aitamete, mücü penucunaquixü, 'aixüa putayü hepaüsitanana para 'aixüa mü'itüarienicü. <sup>2</sup>Mücü 'Apurahami tita mütiavarunavairi naimesie mieme yapäu meme tamamatasie mieme xeime pimi. Merüquiserequi taniuquicü Ti'aitame Heiseriemecü Yamüticamie catinitevaca, Saremetari Tiva'aitüvame catinitevaca meta, Ti'aitame 'Aixüa Memütexuyexiyanicü Müti vapitüa maine. <sup>3</sup>Quemasieya varusieya maremama mepücaxasiva. Pumave niuqui que mütisütüa 'ayenieretü, que mütiutixü tucarieya hepaüsita. Cacaüyari nu'ayapaü cani'aneni, mara'acametütü 'acaniuveni catihayevatü yuheyemecü.

<sup>4</sup>Merücüte, xequena'erivani que müti marivecai mücü. 'Asita que mü'ane mütatüsitücai 'Apurahamitütü xei tapari pimi

tita cuyaxi mütiavarunavairisie mieme. <sup>5</sup>Merücüsü, hipatü Revi xiüyarimama mara'acariyacü memühüritüarie, müme 'aitüarica mecanexeiyani tamamatasie mieme xei tapari memüvavaviriecacü teüteri yu'ivama 'inüari niuquiyari que maine, sepa mümeta yu'ivama vahepaü 'Apurahamisie memüyecü yunaitü. <sup>6</sup>Icü masi 'asipücativamaretücai, peru 'Apurahami xei tapari pimi, mücüta 'aixüa putayü hepaüsitanana para 'aixüa mü'itüarienicü. Que mü'ane mütiutahüavarie tita mütipitüarieniquecai, mücü hepaüsita müpaü putayü. <sup>7</sup>Niuqui pücayu'uxienüa, que mü'ane masi mütürücaüye canihücütüni 'aixüa maine que mü'ane hepaüna mücatürücaüye hepaüsita, mücü 'aixüa mü'itüarienicü. <sup>8</sup>Mücü meta, 'icü teüteri memücuixime mepitanacu'eri xeime tapari tamamatasie mieme. Mücü püta müpaü xeicüa pütihēcüasie quename 'ayeyuri. <sup>9</sup>Püyüve müpaü mütayüni, que mü'ane xiüyarimama memitanaqu'eri hicü xei tapari, mücüta Revitütü xei tapari pimi, 'Apurahami müpaü timicu. <sup>10</sup>Yu'uquiyarisie pücayeveveci cuxi quepaucua Merüquiserequi menunaquixü.

<sup>11</sup>Merücüsü teüteri 'inüari niuquiyari mepupitüarie Revi xiüyarimama memümaral'acatetücaicü. Merücüte, xüca tevi yüvenique maye'anicü memara'acatetücacu müme, titayari reuyevecaqueyu xevitü mara'acame yücü 'anetü manucuquenicü Merüquiserequipaü tihüritüarietü,

'Arunipaü catihürütüarietü mütahüavarienicü. <sup>12</sup>Mara'acate va'inüari xüca 'upasiene, 'inüari niuquiyarita vaüriyarica pücupasiva.

<sup>13</sup>Que mü'ane hepaüsita müpaü müticuniuva, mücü xeime nuivarisie canimiemetücaitüni.

Mücü nuivarisie mieme xevitü mavari pücavevive hasuacu.

<sup>14</sup>Canimasiücünü Tati'aitüvame Curasie müyetüacü, sepa mücü nuivari hepaüsita Muisexi 'asimücahainecai quename memara'acatetüniqeyu.

<sup>15</sup>Mücü meta, masi cuxi müpaü catinimasiücünü xüca mara'acame 'anucuqueni yücü mü'ane Merüquiserequipaü 'anetü. <sup>16</sup>Mücü püca'uqueri 'inüari müpaü mütiuta'aitaxücü quename ranivetütü heiserie hexeiya, masi puqueri mütürücaüyecü tucarieya mücaxüvecü. <sup>17</sup>Müpaü pütihecuasie,

'Ecü 'aheyemecü  
pecanimara'acametüni  
Merüquiserequipaü que  
mütiuhürütüarie.

<sup>18</sup>Aisica meripai mümieme payeitüarie müveranicaicü 'asimüca'uyücü. <sup>19</sup>Inüari niuquiyari hasuacu pücaheye'atüave tevi. 'Utixani'eriecu tepupitüarie tita masi 'aixüa müti'ane müpaü püta temüteta'icuevanicü. Müpaü teteta'icuevatü 'aura tepacüca Cacaüyarisüa.

<sup>20</sup>Mücü meta, 'asipüca'uyü xevitü cayühürütüacacu. 'Ana mara'acate mepucayasaruivacai mecayuhürütüatü, <sup>21</sup>peru mücü que mütiucayeri, que mü'ane mitahüavixü niyühürütüani müpaü 'utaitü,

Ti'aitame puyühürütüa,  
Yücü pücatiyücühüaveni,  
'Ecü 'aheyemecü

pecanimara'acametüni  
Merüquiserequipaü que  
mütiuhürütüarie.

<sup>22</sup>Ayumieme yaxecüa  
Quesusi nitaseiriya xeime  
türatu masi mütürücaüye.

<sup>23</sup>Ana miemete mara'acate mecaniyümüirecaitüni, peru mecuicui'itü mepücapitüariecai memüyuhayevanicü. <sup>24</sup>Peru mücü yuheyemecü 'amuyeicacü canimara'acametüni, hürütüaricaya mücayupatacü. <sup>25</sup>Ayumieme caniyüveni müvatavicueisitüanicü yuheyemecü müme 'aura memacüca Cacaüyarisüa mücü vapareviecacu, yuheyemecü 'ayeyuritü püyüve yamütivaviriecacü vahesie mieme.

<sup>26</sup>Aixüa caniyüunita temeixeiyacü mara'acame müpaü mü'ane. Canipasieca, 'axa pücatiyuriene, pücaseviximarie, 'axa teyuruvamete vahepaü püca'ane, muyuavi heima nanutiyeicani. <sup>27</sup>Müme memümara'acate vahepaü püca'ane, pücareuyevese tucaricü mavari mütivevienicü yuhesie mieme meri 'axa mütiuyuricü, 'arique teüteri 'axa memüte'uyuricü. Masi xei mieme 'aixüa piyuri quepaucua mavari mayuyeitüa yücümana. <sup>28</sup>Inüari niuquiyaricü meniucayasarieni mara'acate cui memühürütüarie peru memüverarani. Mücü niuqui cümana muyühürütüa, 'inüari niuquiyari sepa mutaxasie meri, mücücü püta niucayerieni

nu'ayatütü maye'atüarieve  
yuheyeme 'amuve.

**Türatu que mütiyetuiriyari  
que müti'atüa hecuame**

**8** Mericüsü masi 'acuxi  
caneuyeveca yamütayünicü.  
Müpaüta mü'ane tecanexeyani  
mara'acame. Mücü mana paya  
muyuavisie, haque müre'aita que  
mü'ane mümarive, mücü serieta  
paya. <sup>2</sup>Haqueva miemecü mepasie,  
püti'uximaya mana. Que mü'ane  
yuricü tuqui mühücü, que mü'ane  
Ti'aitame mitavevi tuqui, tevi  
pücatixaü, mana püta püti'uximaya  
mücü. <sup>3</sup>Mericüsü yunaitü  
mara'acate meniuti'uitüarieni  
memütemavanicü. 'Ayumieme  
caneuyeveca mücüta tixaütü  
mürexeyanicü mütixatüanicü.  
<sup>4</sup>Masi xüca cuiepa 'uyeicanique,  
pücamara'acametüniqeyu,  
'amemu'uvacü hipatü püta  
memütemava que maine 'inüari  
niuquiyari. <sup>5</sup>Peru müme haque  
memütehetimava, mücü pi'üque  
xeicüa tita taheima mütimieme,  
peru pücahücü. 'Etüriyayapaü  
xeicüa pü'ane. Yaxeicüa pü'ane  
hicü, que mütiutahüavarie Muisexi  
quepaucua mitaquetüaniquecai  
'ixuriqui tuquiyari, yaticühüavecacu,  
Quene'acuerivayurieca  
pemitivevienicü naima  
yaxeicüa peti'üquetü 'inüari  
que pemütiuta'üquitüarie  
yemurisie pe'uvetü. <sup>6</sup>Hicü masi  
Cürisitu türatu 'aixüa mü'ane  
caniuyetuiriyarieni cani'atüani,  
türatu meripai mieme 'aixüa  
müca'anecaicü hepaüna. 'Ayumieme  
mara'acame que mütihücü, visi

pütihütüarie, meripai miemete  
visi memücatehütüariecaicü  
hepaüna. Türatuya meta niuqui  
müse'isie pütiviya, Cacaüyari  
türücaüyemecü müpaü mutayücü  
que mütiyurieni. Peru meripai  
mieme türatu hepaüna pücase'icai.

<sup>7</sup>Mücü türatu meripai  
mieme xüca 'aixüa 'anenique,  
xüca careuyevecaque  
müniuquimarietacü, tavari  
pücaheuyevecaqueyu xevitü.

<sup>8</sup>Siepüre canivanuquimaca teüteri  
müpaü mainecü,

Camü tucari canaye'amücü,  
Müpaü canaineni Ti'aitame.

'Ana türatu mühecua  
nepüvapitüani

'Ixaheri xiüyarimama  
Cura xiüyarimama.

<sup>9</sup>Mücü türatu va'uquiyarima  
nemüvarutaveviriepaü  
püca'aneni

Meripai que nemütitavevi  
Quepaucua nemüvaruviyaxüa  
vamamasie

Nevareyevitüni que 'Equipitu  
cuieyarisie.

Müme netüratusie  
yamepücatecahucai.

'Ayumieme neta  
nepüvaratümaiyaxü,

Müpaü paine Ti'aitame.

<sup>10</sup>Peru müpaü paineta Ti'aitame,  
Türatu que nemütivatavevirieni  
'Ixaheri xiüyarimama  
Mücü tucari 'aye'ayu  
Ne'inüari niuquiyari  
nepüvamin

Mücücü memüyu'iyaritüacacü.  
Va'iyarisie nepütita'ütüani  
ne'inüari niuquiyaricü.

Ne vacacaüyari nepüyüaneni,

Müme neteüterima  
mepühümetüni.

<sup>11</sup> Yuxexuitü  
mepücatevati'üquitüani  
'auravatari,

Yuxexuitü  
mepücatevati'üquitüani  
yu'ivama

Müpaü me'utiyuatü, Tilaitame  
quenetimati.

Yunaitü masi mepünesimateni  
Türi 'uquiravesixi yunaitü.

<sup>12</sup> Ne nepüvanenimayaca  
Sepa heiseriemecü  
yamemücatecahucai,  
Tavari nepücahe'erivani  
Sepa 'axa memüte'uyuri.

<sup>13</sup> Mericüte türatu yücü mü'ane  
xatatü, meripai mieme putayeitüa.  
Tita mütitaye'itüre mütiverani  
meripai mütimieme, mücü cuitü  
pütaxüni.

#### Tuqui cuiepa mieme tuqui taheima mieme

**9** Mücü türatu meripai  
miemesie meteviyatü,  
mepeixeyacai 'inüari heiseriemecü  
que mütimavariecai manuyünecai.  
Tuquita mepexeyacai müpasiecai  
'ena cuiepa. <sup>2</sup>Mücü tuquipa xevitü  
hüxiena puvecai 'ixuriqui tuquiyari.  
Mana püti'ucai hecüarivivame,  
mexa, pa mexasie xatüariecacu.  
Mücü Müpasie catinitevacaitüni.  
<sup>3</sup>'Ixuriqui reunacame varie,  
mana puvecai 'ixuriqui tuquiyari  
taüta mieme, Yemecü Müpasie  
mütitevacai. <sup>4</sup>Mana püti'ucai 'ücu  
vivivame hurucü veviyatü, cacuni  
meta türatu mü'inüariyaritücai  
hurucü heuvesitüarietü herie.  
Cacunisieta mana püyecatei xari

huru xariyari manana payari  
muyemanecai, 'Aruni mumuxieya  
mutaxutui cacunisie püyecateita,  
tete 'esimüsuye mana püyecatei  
türatucü müraye'uxacai. <sup>5</sup>Cacunisie  
naisata mepa'ucai Queruvinisixi  
memütetetevacai memamarivavetü.  
Müme meni'etüriviyacaitüni 'inüari  
cümana mühecüarecü Cacaüyari  
'aixüa mütiuyuricü 'aixüa  
temütexeyarienicü. Pücayüve  
naimecü hicü temütécuxatanicü  
mücü hepaüsita.

<sup>6</sup>Mücü naitü müpaü tiunüriecu,  
mara'acate tucaricü hüxiena  
mieme tuquita meneutahaqueni  
yametecahutü yu'uximayasicasie.  
<sup>7</sup>Taütana mieme tuquita xei  
viyari 'anuyeyeicacacu xEICÜA  
neutahaqueni yuxaüta mara'acame  
cui mühüritüarie mücü tucarisie.  
Quepaucua mana neutahaque,  
xuriya 'al'ütü xEICÜA püyüve.  
Pütimava meri 'aixüa miyurienicü  
yuhesie mieme. 'Arique pütimava  
'aixüa miyurienicü teüteri 'axa  
memüte'uyuricü 'asimecatemaitü.  
'Anarique tiutimavaca mana  
peutahaque. <sup>8</sup>'Iyari Mütiyupata  
müpaü catinihecüatani, huye cuxi  
pücamasüücü tevi maye'anicü que  
mü'ane müpasiesüa mexi 'a'uve  
mücü tuqui hüxiena mieme. <sup>9</sup>Mücü  
tuqui 'inüari patüa. Tita hicü  
mütimieme, mücü pühecüata.  
Mücü tuqui que mü'ane, 'imiquieri  
mavari yapütüxatüariva, sepa  
müca'yüve meye'atüanicü que  
mü'ane mütiutimava, 'iyarieya  
müca'itate'anicü. <sup>10</sup>Que  
memüte'ayexeiya, yamepütécahu  
que mütiu'aisie ravaiyari hepaüsita,  
mepe'eriva que mütücuani que

mütiu'ieni que mütiucamaima que mütiuca'üva xeicüa. 'Aisica müpaü müti'aita putaxasie mexi tucari ca'aye'avecai naitü mütihecuarecü.

<sup>11</sup>Peru Cürisitu caninuani.

Mara'acame canihücütücaitüni cui muhürütüarie. Cani'atüani tita 'umüramiecai 'aixüa müti'ane. Tuqita peutaha, peru tuquieya 'aixüa pü'ane masi, paye'ave, mamacü pücaveviya, 'ena cuiepa pücamieme. <sup>12</sup>Mücü tuqita quepaucua meutaha, sipuri siqerusixi vaxuriya 'a'ütü pücayüanecai. Yuxuriya püta 'a'ütü xei mieme xeicüa mana neutahani Müpasieta. Müpaü tiyurieca pütasitixünaxü taheyemecü temüxüxüninicü. <sup>13</sup>Meripai sipuri turusixi vaxuriyacü, vaquiya mumierie mutataiyari naxiyari cuamariyarcü, mücücü mepühapüsiriecai teüteri, que mü'ane museviximarie. Mücücü mepüpasiecai, yuvaiyarisie memü'itiyatücanicü. <sup>14</sup>Mericüsü xüca müpaü 'anecaitüni, masi vaücavamecü catati'itieni Cürisitu xuriyaya. Mücü mavari 'aixüa mü'ane mücaseviximarie nayuyeitüani mixatüanicü Cacaüyari, 'Iyari yuheyemecü 'amuyeica müpaü tipitüacacu. Mücü xuriyaya catani'itieca ta'iyari mücatasitate'anicü que mütatitate'acai quepaucua müpaü temüteyuriecai cümana temütecuinequecai. Te'u'itiyaca, Cacaüyari mayeyurisie mieme tete'uximayatü tepacü.

<sup>15</sup>Ayumieme mücü canihücütüni que mü'ane mi'atüa türatu hecuame, müme memuta'inierie

meheixeyatü memacünecü tita yuheyemecü vahesie mütinacue que memüte'utahüavarie. Müpaü tiniuyurieni quepaucua mumü, püvarunanai müvataxünacü teüteri memitisanaxücü 'inüari mexi 'a'uvecai meripai mieme türatu. <sup>16</sup>Tevi xüca türatu 'utavevieni yupini hepaüsita, queyupaüme mütivamini quepaucua mumüni, caneuyeveca mühecuarecü quename 'ümü, 'ariqueque niseirimücü mücü türatuya. <sup>17</sup>Türatu müpaü mü'ane 'aixüa müyünicü, peuyevese tevi mümünicü meri. Mücü niuquieya 'asipücayüve mexi cuxi 'ayeyuri que mü'ane mitavevi. <sup>18</sup>Asita mücü türatu meripai mieme quepaucua mutaveviya, xuriya putayeyuriya. <sup>19</sup>Muisexi 'ana tinivarutaxatüani yunaime teüteri naime 'aisica que mütiu'aisie 'inüari niuquiyaricü. 'Arique siqerusixi sipuri vaxuriya ha canionütüiani. 'Urecanu cüyeyari 'anahüaca vita mütaüraüyecü, mücücü xuriyacü nivaruhapüsieni teüteri yunaime, niuqui xapayarita, <sup>20</sup>müpaü 'utaitü, 'Icü xuriya türatu 'inüariyari canihücütüni, que mütxe'utaveviri Cacaüyari. <sup>21</sup>Yaxeicüa xuriyacü nitahapüsieni 'ixuriqui tuquiyari, xacürüteta naime, mücüsie mütiutimavarüva. <sup>22</sup>Inüari niuquiyari que maine, 'esivatücacu naitü xuriyacü caniti'itvani. Xüca xuriya catiyeuriveni pücareuyehüviyarüva.

**Cürisitu que mütitayeitüa tita 'axa müti'ane, mavari mayuyeitüacü**

<sup>23</sup>Mericüsü, caneuyeveca mü'itivanicü tita müti'üquisica, mi'üquecü tita taheima mütimieme.



Peru tita taheima mütimieme,  
 mücü mavari masi yemecü  
 'aixüa mü'anezü caniu'itiani  
 püta. <sup>24</sup>Cürisitu quepaucua  
 meutaha Tuqui Müpasieta, mana  
 pücaheutaha mamacü müveviyata.  
 Haque yuricü mütuqui, mücü  
 'üquisicayarita pücaheutaha.  
 Muyuavisie miemeta püta  
 neutahani. Hicü Cacaüyari hüxie  
 caniuyeicani, tahesie mieme  
 mütanianicü. <sup>25</sup>Mücü meta,  
 quepaucua mana meutaha müixa  
 mavari 'ayuyeitüvatü pücaüanecai,  
 mara'acame cui mühürütüarie que  
 müreutahaque Tuqui Müpasieta  
 xei viyari 'anuyeyeicacacu, xeime  
 xuriyaya 'a'ütü. <sup>26</sup>Xüca 'acu müpaü  
 'anenique, müixa pümüniqeyu cuie  
 munetüariepaitü hicürique. Hicü  
 masi xei mieme xeiçüa masiücütü  
 canayani tucari taxüximecacu,  
 mitayeitüanicü tita 'axa müti'ane,  
 mavari mayuyeitüacü. <sup>27</sup>Teüteri  
 vahesie catininaquimücü xei  
 mieme memücinicü, 'ariqueta  
 'isücame nivatahüavimücü.  
<sup>28</sup>Yaxeicüata Cürisitu  
 mecanixeyacuni müme memicuevi,  
 canivatavicueisitüamücü.  
 Que mü'ane xei mieme  
 mavari mayeitüarie hesiena  
 mütiuhüivanicü tita 'axa  
 memüte'uyuri yuvaicavatü, mücü  
 'arique mecanixeyacuni tita 'axa  
 müti'ane caxuavecacu.

**10** Mücü 'inüari niuquiyarisie  
 canimasiücünü tita  
 'aixüa ti'aretü 'umürämie, peru  
 'etüriyaripaü catinimasiücünü  
 xeiçüa. Yemecü hepaüna  
 püca'ane que mütiyaiacü.  
 Mücü mavari yuheyemecü

mücuxatüariva xei viyari  
 'anuyeyeicacacu, mücü hasuacu  
 pücaüve müvaraye'atüanicü  
 müme 'aura memacüca. <sup>2</sup>Me  
 xüca varaye'atüanique,  
 mecatehayevaquyeyu  
 memütemavatüvecai. Va'iyari  
 que tivatate'aniqueyu tita 'axa  
 memüte'uyuri hepaüsita, xüca xei  
 mieme me'u'itiani que müme müya  
 memüte'ayexeiya. <sup>3</sup>Masi xexuime  
 viyarisie mepa'eritüarivani 'axa  
 memüte'uyuricü. <sup>4</sup>Turusixi sipuri  
 vaxuriya pücaüve tevi tita 'axa  
 mütiuyuri menuyeitüirienicü.

<sup>5</sup>Ayumieme quepaucua cuiepa  
 munuaniquecai müpaü caniutayüni,  
 Mavari pepücanaqui'erie que  
 pemütixatüarie.  
 Masi pepünesi'ucuha'arütüiri  
 nevaiyari.

<sup>6</sup>Pepücanaqui'a sepa mavari  
 mütaxüni taipa.  
 Mavari menuyeitüaniqueyu tita  
 tevi 'axa mütiuyuri,  
 Mücü pücamasinaque.

<sup>7</sup>'Ana müpaü neputayü, Camüsü  
 ne,  
 Que müre'uxa xapa  
 mücuicuiyasie nehepaüsita,  
 Necaninuani  
 yanemütüyurienenicü  
 Que mümatinaque 'ecü  
 Cacaüyari.

<sup>8</sup>Mericiüsü mana müpaü paine,  
 Pepüca'inaqui'erie mavari, que  
 pemütixatüari, mavari mütaxüni  
 taipa, mavari menuyeitüaniqueyu  
 tita tevi 'axa mütiuyuri, mavari  
 müxatüarie que maine 'inüari.  
 Mücü pücaüve pepücanaqui'a. <sup>9</sup>'Ana  
 cuitüta müpaü canaineni,  
 Camüsü ne necaninuani

yanemütiyurienenicü que mümatinaque. Nitayeitüani meripai mieme, mitaseiriyacü 'arique mieme. <sup>10</sup>Müpaü mütinaquecü, 'ayumieme tepupasie tame, mavari mayeitüariecü xei mieme Qesusi Cürisitu yuvaiyarisie 'uyeicatü.

<sup>11</sup>Yunaitü mara'acate tucaricü mana meniuti'uni mete'uximayatü, mavari yaxeicüa 'aneme me'icuxaxatüvatü. Peru mücü mavari müpaü mü'ane hasuacu pücaýüve mütasi'anuyeitüirienicü tita 'axa temüte'uyuri. <sup>12</sup>'Iya püta mavari puvevie xei mieme müta'anuyeitüirienicü tita 'axa temüte'uyuri. Mavarieya yuheyemecü 'aixüa miyuricü, 'ayumieme mücü Cacaüyari serieta canayerüni. <sup>13</sup>Hicü xeicüari püta'icueva mexi me'al'ivariexime müme memeye'unie, mexi me'ahapava hüxiena. <sup>14</sup>Xei mieme mavari mayeitüariecü, yuheyemecü püvaraye'atüa müme memüpasietüve yuxexütü. <sup>15</sup>Iyari Mütiyupata pütasihecüatüa yaxeicüa 'utaitü. Müpaü canaineni,

<sup>16</sup>Türatu müpaü 'aneme necanivataveviriemücü Mücü tucari 'aye'ayu. 'Arique müpaü paineta Ti'aitame. Ne'inüari niuquiyari nepüvapitüani Yu'iyarisie memexeiyanicü. Mana nepita'utüani Mücücü memüyu'iyaritüacacü.

<sup>17</sup>'Axa que memüte'uyuri, 'Inüari que memüte'utisanaxü, Müpaü nepücara'erivaniri.

<sup>18</sup>Mericüte mücü hepaüsita xüca reyehüviyarieni, tavari mavari

pücaxatüarieni, menuyeitüanicü tita 'axa mütiuyuri.

### 'Aurava teque'acücani

<sup>19</sup>'Ayumieme nepaine ne'ivama, Qesusi xuriyaya mutaxüriyacü, heiserie tepexeiya tecamamatü temeutahaquenicü Tuqui Müpasieta. <sup>20</sup>Huye hicüque mümieme mücücü temayeyuyurinicü, mücü tecanexeyani, mücü mütahuyetaxücü tahesie mieme. Que mu'itüarie yuvaiyarisie, tahuye patüa, temeutahaquenicü tame haque müreunamecai mücü 'ixuriquicü. <sup>21</sup>Mücü meta, tecaneixeyani mara'acame mütürücaüye Cacaüyari quiya mühürütüarie. <sup>22</sup>Mericüsü müpaü mü'anecü 'aurava teque'acücani, ta'iyari yemecü yuxevicacu, yemecü yuri tete'erietü, ta'iyari 'itiyacacu 'axa tecateyurietü capa ta'iyari tasi'utatienicü tita 'axa temüte'uyuri hepaüsita, tavaiyari meta hauxinariecacu ha 'aixüa mü'anecü. <sup>23</sup>Yatequetecahunü, müpaü tetetahecüatatü que temüte'icuevie ta'aurie teca'axürüvetü, müpaü tetemaitü, que mü'ane müpaü mütatiutahüavixü tita mütatimini, mücü yacatinicamieni que maine. <sup>24</sup>Tequehetata'eritüvani tanaitü, temütavaüriyanicü temütetacanaqui'eriecacü 'aixüa temütüyuriecacü. <sup>25</sup>Tepücatehayevani tepütacuxexeürivani, hipame vahepaü tepücatehayevani. Tepütatuicani masi. Que xemüte'imate mücü tucari

maye'aximecü, masi vaücava müpaü xequeteneyurieca.

<sup>26</sup>Ta'iyari ya'anecacu xüca tetavaüriyani 'axa temüteyuriecacü teheitimaime tita yuri müraine, mavari pücaxuave tavari menuyeitüanicü tita 'axa temüte'uyuri. <sup>27</sup>Xücari müpaü 'aneni temamatü tepüta'icueva temüta'ivaviyarienicü xeicüa, yuhaxüacü quepaucua müvataxütüani müme memeye'unie, yumexütüatü taipaü. <sup>28</sup>Xüca 'itixani'erieni 'inüari niuquiyari Muisexi mi'atüa, caniumümücü canenimayasietü, yuhutatü ya yuhaicatü müpaü metetahecüatayu.

<sup>29</sup>Que xetecu'eriva. Masi yemecü hesiena catinaque tatacuri, que mü'ane minanaima Cacaüyari nu'aya, que mü'ane seviximariecame mü'erie mücü xuriyaya türatu mutaseiriyari cümana, mupasie cümana, que mü'ane mitave'erie 'Iyari 'aixüa mütatipitüa. <sup>30</sup>Tame tepimate que mü'ane müpaü mutayü, Necümana nepünemieneni, 'anepürapica ne. Tavari müpaü putayü, Ti'aitame tatacuri nivapitüamücü yuteüterima. <sup>31</sup>Pümariveni quepaucua Cacaüyari mayeyuri miviyani.

<sup>32</sup>Xequena'erivani masi meripaü que mütiuyü. 'Ana cuitü xe'uhecüariyarieca, cuini mieme xepüte'ucacucuecaü peru xepüteneviecai. <sup>33</sup>Sepa yunaima vahüxie xemütevinüariecai 'axa xetecühüavarüvatü xe'uximatüarietü, sepata hipame xemüvaporeviecai quepaucua müpaü memü'tüarie,

xeme xepüteneviecai.

<sup>34</sup>Memanutaxüriyacai que memüte'ucuinüarie, xemeta vahepaü xepüteyumaicai. Xeyutemamavietü xepüvaneviecai quepaucua memüxete'unavairi xepini, müpaü xetematü, yupini masi 'aixüa müti'anene 'emütiterive xemütehexeyacü xeme muyuavisie. <sup>35</sup>Ayumieme nepaine, xepücaheivivivani tita xemütehexeyia. Heiserie xepexeyia xecamamatü xemüyüacacü. Mücücü vaücava xepüte'iva. <sup>36</sup>Caneuyeveca xemüte'ucaneviecacü, xeheixeyatü xemacüneccü que xemüte'utahüavarie quename müpaü tixepitüani, yaxeteyurieyu que mütinaque Cacaüyari.

<sup>37</sup>'Esiva yareutevicacu cuxi, Que mü'ane 'umamie caninuamücü, 'Epücareutere.

<sup>38</sup>Mücü heiserie mexeyia nehesüa miemetütü Mücü canayeyuricamücü yuri müti'eriecü. Xüca vaüripieca Ne'iyarisie nepücanaqui'aca que nemütixeyia.

<sup>39</sup>Peru tame müpaü tepüca'anene. Tepücavaüripietüca, tepücatatümayarieni. Masi yuri tepüte'erie tatucari temücatatümai yacü.

#### Que mü'ane yuri müti'erie

**11** Que mü'ane yuri müti'erie müpaü pütimate, peixeyani tita müticuevi. Müpaüta catiniyumaica, 'apuve tita mücatixeyarieve. <sup>2</sup>Müpaü yuri memüte'eriecaicü

mecanimarivacaitüni ta'uquisiema meripai miemete 'aixüa memüteyuriecaicü.

<sup>3</sup>Yuri temüte'eriecü müpaü tepütemate, cuie munetüariecü Cacaüyari müpaü 'utayücu. Tita mütxeiyarieve que mütiuveviya, tita mücarahecüacü catiniutiveviyani.

<sup>4</sup>Yuri müti'eriecaicü Haveri mavari 'aixüa mü'ane pixatüa Cacaüyari, Caini mavarieya 'aixüa ca'anicacu hepaüna. Müpaü mütiutimavaxücü pütahecüasie quename heiserie hexeiyacai, Cacaüyari müpaü tihecüatacacu 'imiquierieya hepaüsita. 'Ayumieme sepa müümüqui, 'inüarieya püticuxata cuxi.

<sup>5</sup>Yuri müti'eriecaicü, 'Enuqui pevitüquie müqui müca'ayanicü. Pumavecai Cacaüyari heivitücu. Cahevitüquievetu cuxi, müpaü pütihecüasiecai minaqu'arütücaicü Cacaüyari. <sup>6</sup>Tevi yuri xüca cati'erieca, pücayüve minaqu'arütüanicü. Caneuyeveca müpaü yuri müti'eriecacü que mü'ane Cacaüyari 'aurie maye'amücü, quename 'a'uyeica, quename tiva'ivisitüa müme memicuvautüve.

<sup>7</sup>Yuri müti'eriecaicü Nuhexi yucuerivayurietü nitavevieni naviya müvatavicueisitüanicü yuquie quiecatari, müpaü tiutahüavarieca tita teüteri 'acuxi memücatexeiyavavecai hepaüsita. Müpaü mütiuyuricü, cuiepa memütama vahesie pütühüüya, mücüsie püta pütünaquixü heiserie mexeiyanicü yuri ti'erietü.

<sup>8</sup>Yuri müti'eriecaicü, 'Apurahami quepaucua muta'inierie,

yaticamietü manapaitü caneyani haque hesiena mürenaqueniquecai. Caneyani 'asicatimaitü

haqueva menuaniquecai. <sup>9</sup>Yuri ti'erietü mana caniyuyupata mücü cuieyarisiepaütü que mütiutahüavarie hesiena müтинаqueniquecaicü, peru xeime cuieyapaü pütümaicai. 'Ixuriqui quiyarita menayetecaitüni mücü 'Isahaquimatü Cacuvumatü.

Mümeta vahesie pütünaqueniquecai que memüte'utahüavarie, yaxecüa 'Apurahamipaü. <sup>10</sup>Canicueviecaitüni mücü quiecarü qui hetüa mieme tenari mexeiyä yemecü, 'inüarieya metimacü Cacaüyari, mitavevicü.

<sup>11</sup>Yuri müti'eriecaicüta, Saramatü türücarüya mepupitüarie nunusi mehexeiyatü memacüneccü, sepa tucarieya manutitüa sepa mü'ucarasitücai. Müpaü pütüyü yaticamiecame mü'eriecaicü que mü'ane müpaü mütitahüavixü quename müpaü tipitüaniquecai. <sup>12</sup>'Ayumieme xeimesie meniyeccüne, sepa mücü mumüximecai. Taheima miemete xuravesixi vahepaü meyupaümetü mecanacüne, xiecarü haramara tesita miemepaü meyupaümetü menacüne mücayü'inüasinüapaü.

<sup>13</sup>Yuri mete'erietü meneutacuixüani müme yunaitü. Meheixeiyatü mepüca'acü que memüte'utahüavarie. Masi tevapai mepixei yuri mete'erietü, mepivaürütüa. Müpaü mepütüyuecüatacai quename xaüsie miemete cücamete mehümetücai xecüa 'ena cuiepa me'u'uvatü. <sup>14</sup>Que mü'ane vahepaü maine, mücü püyuhecüata

quename 'icuvaune yucüe. <sup>15</sup>Xüca me'icuxatani que mücü cuie haque memeyecü, tucari mepühücaqueyu memücunuaxüanicü mana. <sup>16</sup>Hicü masi mepihive'erie cuie masi 'aixüa mü'ane taheima mieme. Cacaüyari 'ayumieme pücaüteviya müme vacacaüyari mümarivanicü. Quiecarü püvarunüsiri.

<sup>17</sup>Yuri müti'eriecaicü quepaucua muta'isiparie 'Apurahami, mavari payeitüa tüma 'Isahaqui. Que mü'ane müpaü mütiutahüavarie que mürexeianiquecai, mücü mavari payeitüaniquercai yunive muyuxevicai. <sup>18</sup>'Apurahami müpaü pütiutahüavarie meripaitü, 'Isahaqui xiüyarimama mepüte'uterüvarüvani müme 'ahesie memüyecüne. <sup>19</sup>'Apurahami müpaü tiniyücühüavecaitüni, Cacaüyari müyüvemetücaicü tavari menucuquetüanicü müquite vasata. 'Ayumieme hutarieca heixeyatü que müratüa, 'inüari canayani.

<sup>20</sup>Yuri müti'eriecaicü 'Isahaqui 'asita tita 'umüramiecaicü müpaü ra'erivatü, 'aixüa caniutayüni Cacuvu 'Esahu vahepaüsita, 'aixüa memü'itüarianicü. <sup>21</sup>Yuri müti'eriecaicü Cacuvu quepaucua mümüximecai 'aixüa caniutayüni yuxexuime Cuse nivemama vahepaüsita, müme 'aixüa memü'itüarianicü. Puyutanenevi yutuicatü yu'isücü. <sup>22</sup>Yuri müti'eriecaicü Cuse 'umüximetü müpaü püra'erivacai mana memüyecünequecaicü mücü cuieyarisie 'Ixaheri xiüyarimama, puyuta'aitaxü caxarieya manutüquienicü.

<sup>23</sup>'Utünuivacu Muisexi yuri memüte'eriecaicü 'uquiyarimama

meniti'avieta haica mesayari visi memüte'ixeyacaicü nunusi, memücateheiyehüviriecaicü cuiepa ti'aitame que mütiuta'ai. <sup>24</sup>Yuri müti'eriecaicü Muisexi 'e'utevitü, mücü cuiepa ti'aitame tevarieya pücaüterüvanüacai, püca'uyuvaüri Parahuni nu'aya 'uca niveya müxasivanicü. <sup>25</sup>Puyuvaüri masi 'axa mü'titüarianicü Cacaüyari teüterimama vahamatü, cayuvaüriyatü münaqui'acacü 'axa tiyurienetü yapaümexa viyari. <sup>26</sup>He'erivatü tita müra'ivaquecai xecüa, müpaü püticu'erivacai, quename masi vaüca hexeyaniquercai 'axa ticühüavarüvatü Cürisitupaü, quenameta tixaütü carexeianiquercai pini xüca rexeianique 'Equipitusie timieme vaücava. <sup>27</sup>Yuri müti'eriecaicü 'Equipitu cuieyarisie neyeyani ca'imacatü cuiepa ti'aitame sepa müha'acai. Pütücaneviecai, que mü'ane Cacaüyari müxeiyapaü püyüanecai, sepa mücü mücaxeyarieve hasuacu.

<sup>28</sup>Yuri müti'eriecaicü Pasicua 'ixüarari pusütüa memüteha'erivanicü Cacaüyari que müti varuhayevaxü vateüterima. 'Ana quitenie pü'üyaxü xuriyacü, que mü'ane müvaca'unarümecai vamatüarima mücavamayüanicü 'Ixaherisixi vamatüarima. <sup>29</sup>Yuri memüte'eriecaicü Haramara Muxuresie mecananucüne macuvaquipaü 'anecacu. 'Equipitütari müpaü meteyuriecütü menehauxüani haramarasie.

<sup>30</sup>Yuri memüte'eriecaicü, Quericutari vatesariya nanaca'uni

'atahutamexa 'auriena me'acünecu.

<sup>31</sup>Yuri müti'eriecaicü Xahavi püca'utatümaiari teüteri yuri memücate'eriecai vahamatü. Mücü 'uca tuminicü müyuvitünüacai canihücütücaitüni, peru 'ana yuquita cuyaxi nivarutanaqui'erieni mema'avienenierecai, 'aixüa pütivaxeyacai.

<sup>32</sup>Mericiute, tita cuxi netitaxata. Quereuni Varaqui Sanisuni Quepite Raviri Samueri texaxatamete yunaimexüa mücü ne'ixasitanique, tucari nepücahücaqueyu. <sup>33</sup>Müme yuri memüte'eriecaicü mepüvara'livaxü cuipepa te'aitamete, heiseriemecü mepüte'aitacai, meheixeyatü mepacü que memüte'utahüvarie, menivarata'imaiya mayesi memücavaticuanicü, <sup>34</sup>menitüni tai sepa mütürücaüyecai, meniutavicueni cusiracü memücacui'ivacü, sepa memuveraranicai meputürücaritarie, cuyacü yüvavemete mecanacüne, menivaranucuveiya cuyaxi xaüsie miemete. <sup>35</sup>Ucari tavari menivarutanaqui'erieni yuhesüa miemete, me'ucuicu me'anucu'ucu.

Hipatü menitiveivacaitüni mecayuvaüriyatü memüxünarienicü. Müpaü mepütëyuriecäi memüpitüarienicü masi 'aixüa 'anemecü memanucu'unicü.

<sup>36</sup>Hipatüta que memüte'upitüarie, mecaninanaimariecaitüni mecanitiveivacaitüni, meta mepütihüivacai mepanutaxüriyacai.

<sup>37</sup>Mepütituaxivacai tetexicü, sexusücü mepütixitevacai, mepü'inüasietüvecai,

mepücui'ivacai cusiracü.

Menicu'uvacaitüni muxa naviyari sipu naviyari me'anacatütücaitü me'icuteüxütüvetü, meteheuyehüatü me'uximatüarietü 'axa me'itüarietüvetü.

<sup>38</sup>Cuiepa memütama 'aixüa mepücate'u'iyaricai vasata memüxuavenicü teüteri müya memü'anenecai. Macumavesie hürisie mecanicu'uvacaitüni meheuyexürietü, terüta meucatevasie meyetetücaitü.

<sup>39</sup>Mücü yunaitü sepa memühecüasiecai yuri memüte'eriecaicü, 'acuxi tita memüte'utaxatüarie metehexeyatü mepüca'acü. <sup>40</sup>Cacaüyari meripai tixatü pütüutavevi masi 'aixüa müti'ane tahesie mieme, müme memaye'axüanicü 'ate'u'uvacacu tame xeixüa.

### Quesusi xeixüa tepa'erivani

**12** 'Ayumiemericü hicü ta'aurie meyuxeüriecacu müya me'anenetü tehécüatamete cui meyuvaücavatü, tepeihüani naime mürahete, naime 'axa müti'ane mütasicuhapana. Tecavaüripietücaitü tepuhuni, tepütanausaxüani temeta'axüanicü haque temecueviya, <sup>2</sup>cuini mieme Quesusi teha'erivatü, que mü'ane misütüa meye'atüa titasie yuri temüte'erie. Mücü müpaü ra'erivatü que mütiyutemaviecaquecai 'ariqueque, pitanevie curuxi sepa mutevinüarie. Hicü mana paca Cacaüyari 'uvenieya serieta.

<sup>3</sup>Capa xe'u'uxenicü xeme, yu'iyarisie capa xeavaüripecacü, xequena'erivani mücü que

mütiucaneviecai 'axa teyuruvamete  
cuini mieme meheye'uniecau.

<sup>4</sup>Xeme que xemüteyucuitüve tita  
'axa müti'anematü, 'acuxi xexuriya  
püca'uhane. <sup>5</sup>Xüari xepücahetümai  
que mütixetuica tevi yunive  
müticuxaxatüvapaü, müpaü 'utaitü,

Neuxei nenive,

Pepücatiucatave'erieca

Ti'aitame mati'üquitüacacu

cuini mieme 'uximatüaricacü.

Pepücavaürriepica mücü

masi'utate'acacu.

<sup>6</sup>Ti'aitame 'uximatüaricacü

Püti'üquitüa que mü'ane

münaqui'erie,

Yunaime püvacuvaya yunivema

müvarutanaqui'erie.

<sup>7</sup>Quepaucua xemüte'uca'eniva,

xete'üquitüarrietü xemacüneccü

'uximatüaricacü xepüyüa.

Cacaüyari püxeyuriene que

müvayurie yunivema. Quepai

ranivetücacu, mücü 'uquiyarieya

püti'üquitüa 'uximatüaricacü.

<sup>8</sup>Me xüca 'uximatüaricacü

xecate'üquitüarieni yunaitü

'axeicüa que memütepitiarie,

cari 'avienuari xepünivemama,

Cacaüyari xepücanivemama.

<sup>9</sup>Mücü meta, tepüvarexeiyacai

ta'uquiyarima memüteüteritücai.

Müme metate'üquitüacacu

'uximatüaricacü tepüvareu'eniecai.

Hicü yeme masi tepi'enieca 'iyarite

va'uquiyari temayeyuyurinicü.

<sup>10</sup>Müme yapaümexa tucari

mepütate'üquitüacai que

mütivanaquecai 'uximatüaricacü.

Mücü masi 'aixüa temü'itüaricacü

pütati'üquitüa 'uximatüaricacü,

hepaüna tepasietü temacüneccü.

<sup>11</sup>'Uximatüaricacü mexi

tete'üquitüarie, tetatemamaviecame  
tepücata'erie, masi tetahiveriecame

tepüta'erie. 'Ariqueque

müme müpaü memü'itüarie

mecanipitüarieca heiseriemecü

yamemütecahunicü, yu'iyarisie

meca'uximatüarrietü.

**Müme memixani'erie Cacaüyari**

**'aixüa tiuca'iyaricacu**

<sup>12</sup>'Ayumieme yumama

xequeneuseiriyaxüa

müveraranicü, yutunuteta

mücatürücacicü xequeneutiseiriya

mütitürücacüanicü. <sup>13</sup>Huye

müxexeuravi xequeneutivevi

yü'ücasie mieme, mücatatunireccü

tita mütitunirive,

müranayehüiyanicü püta.

<sup>14</sup>'Aixüa xemütevaxeiyanicü

yunaime xequeneyumexüitüaca,

xemüpasiecacü Cacaüyarisie

miemecü meta. Xüca müpaü

catipasieca, hasuacu püca'ixeiya

Ti'aitame. <sup>15</sup>Xequeneyü'üviyani

xevitü ca'aye'avetü müca'ayanicü,

Cacaüyari 'aixüa tiuca'iyaritetü que

mütiminiqueyu. Xequeneyü'üviyani

xevitü capa xemuinanenicü, nana

cuiepa mutineica hasivimeccü

mütixuxuaverepaü yüanetetü.

Müpaü xüca tiyurienevi,

yümüiretütü meniseviximariecacuni.

<sup>16</sup>Xequeneyü'üviyani capa

xevitü 'icumaüvanicü que mü'ane

mücaüyü'üya mücaüyü'üca, capa

Cacaüyari ca'ayexeyatütü yüanenicü

'Eshapüa. Mücü xei 'icuaiyaricü

nipata heiserie mexeyacacü

mümatüarrietücaicü. <sup>17</sup>Müpaü

xepütemate, 'arique quepaucua

heixeyatütü mayeimüccüca tita

hesiena mütiutaxasie 'aixüa

mül'itüarienicü, püxani'erivacai.

Müpaü pücatiupitüarie  
müyupatanicü tavari, sepa  
'utasuatü müpaü mütivaucai.

<sup>18</sup>Haque xeme'axüa xeme, mana  
xepüca'u'axüa meripai miemetexi  
vahepaü haque tevi müyüve  
mimayüanicü yemuri, haque  
tai müta'a, haque meyüvi, teüca  
haque meyeica, <sup>19</sup>cuxineta haque  
mehüsierie, haque xevitü me'enierie  
'utaniucacacu. Müme quepaucua  
memi'eni mepitavaviri xeime  
niuquicü memücatahüavarienicü  
tavari. <sup>20</sup>Mepüca'iquemacai  
tita memüte'uta'aitüarie  
müpaü metecühüavarüvatü,  
Sepa yeutanaca mimayüa  
yemuri, tetexicü pümierieni  
tituaxivatü. <sup>21</sup>Yemecü marivetü  
mütüyuxexeyacaicü, 'asita Muisexi  
müpaü niutayüni, Ne nepuma  
nepuyüyüaca.

<sup>22</sup>Xeme masi xepu'axüa  
Siyuni yemuriyari haque meve,  
Cacaüyari mayeyuri quiecariena,  
Querusareme taheima mieme haque  
maniere, yumüireme vahesüa  
xepu'axüa, taheima miemete  
niuqui tuayamete va'ixüararipa,  
<sup>23</sup>mana matüarixi memutinunuiva  
muyuavisie memacayasari  
haque memeyuxexeuriva,  
mana xepu'axüa, que mü'ane  
'isücametütü müvata'ivaviyani  
yunaime Cacaüyaritütü,  
mücüsüa xecaniu'axüani, müme  
heiseriemecü yamemütecahucai  
memaye'axüavave yu'iyarisie  
memu'uva, müme vahesüa  
xecaniu'axüani, <sup>24</sup>que mü'ane  
türatu hecuame mu'atüa  
Quesusitütü, mücüsüa

xecaniu'axüani, haque xuriyacü  
müre'üyarie cümana tevi mül'itüa  
xecaniu'axüani. Mücü xuriya masi  
'aixüa 'anemecü catinihecüatani,  
Haveri xuriyaya hepaüna  
catihecüatacacu.

<sup>25</sup>Xequeneyucuerivayurieca  
capa xe'ixani'eriecacü que mü'ane  
maniuca. Müme mepüca'utavicuei  
me'ixani'erieca que mü'ane 'ena  
cuiepa müpaü mütivarutahüavixü  
que memül'itüarieniquecai. Tame  
masi yemecü tepücatavicueni  
xüca ta'aurie te'axürieni  
temüca'ienienicü que mü'ane  
taheima maniuca. <sup>26</sup>Mücü  
'utaniucacacu caniyutayüni cuie  
'ana. Hicüta que mütiyurieni  
müpaü paine ya'utaitü, Xei  
mieme cuxi cuie hücüa  
nepücatayuitüani, muyuavita  
nepütayuitüani naime masi.  
<sup>27</sup>Xei mieme cuxi 'utaitü, müpaü  
pütihecüata, tita mütayuitüarieni  
pütitayeitüarieni, tita mütiutiveviya  
xatatü. Peru pütüyuhayevani tita  
mücatitayuitüarieni. <sup>28</sup>'Ayumieme  
pamüpariyusi teque'ipitüaca mücü  
temupitüariecü tati'aitüvame.  
Haque müre'aita mücü, mana  
pücatayuitüarieni. Müpaü  
tequete'uximayaca Cacaüyarisie  
mieme pamüpariyusi te'ipitüatü,  
'aixüa 'anemecü que mütiinaque,  
teheyexeyatü teteheyehüvirietü.  
<sup>29</sup>Tacacüyari tai naime  
mütitixüsütüvapaü cani'aneni.

Que müreuyevese yamütüyurienenicü  
Cürisitusie tiviyatü

**13** Xepücatehayeva  
ni xevanaqu'ierietü  
'ivamarixi. <sup>2</sup>Xepücatehatütümאיני



xemüvatanaqui'erienicü teva  
quiecatari. Müpaü meteyurietü  
hipatü mepüvarutanaqui'erie niuqui  
tuayamete 'asimecatemaitü.

<sup>3</sup>Xequenivara'erivani que mü'ane  
memanutaxüriya, vahamatü  
xemanutaxüriyapaü xeteyumaitü.  
Xequenivara'erivani müme  
'axa memü'itüariexime müpaü  
xetemaitü, xemeta yuвайaricü  
xemu'uvacü.

<sup>4</sup>Teüteri xüca meneneüqueni,  
'aixüa mequetexeyarieca naime  
hepaüsita, peru me'itiyatücaitü  
xeicüa mepüyucumaüvani. Mesü,  
Cacaüyari tatacuri canivapitüamücü  
müme memicumauva que  
mü'ane mücava'üya mücavacüna,  
memicumaüva xeime 'üyaya, peru  
müme memü'itiya pücatixaü.

<sup>5</sup>Müpaü xequeteneu'uvani tumini  
xecahive'erietü. Xequenenaqui'aca  
xeheixeyatü tita xemütehxeiya.  
Mücü canihücütüni que mü'ane  
müpaü mutayü, Ne yemecü  
nepücamasihayevani 'axaütame,  
nepücamasicu'erieni hasuacu.

<sup>6</sup>'Ayumieme tecamamatü müpaü  
teputiyuane,

Ti'aitame canihücütüni que  
mü'ane münesiparevi.

Nepücamaca,

Qesü nesi'uyurieni tevi.

<sup>7</sup>Xequenivara'erivatü müme  
memütexe'aitüacai. Que  
memü'anenecai, Cacaüyari  
niuquieyacü mepütexe'utaxatüa.  
Xevara'erivatü que  
memüte'utiparixü, müpaü que  
memüte'u'uvacai, xequeniva'üqueni  
yuri que memüte'eriecai.

<sup>8</sup>Qesusi Cürisitu meripai  
hicüta yaxecüa cani'aneni,

yuheyemecüta. <sup>9</sup>Tevapai  
xepücayuvitünüa, 'üquisica yücü  
'aneneme xepüca'enietüveni  
hipame vayeiyarisie mieme.  
'Aixüa caniyümücü yu'iyarisie  
müseiriyarienicü 'iya 'aixüa  
tiuca'iyaricacu, peru 'icuaicü  
hasuacu pücaseiriyarieni. Müme  
'icuaisie meteviyatü memü'uva  
havai mepüca'upareviya.

<sup>10</sup>Tame mürayutimavatüre  
tecanexeyani. Mana mieme  
memütecuacacü heiserie  
mepücahexeiyaya müme  
memütemava 'ixuriqui tuquiyarita  
miemecü. <sup>11</sup>Mara'acame cuini  
mieme mühüritüarie Tuqui  
Müpasieta quepaucua mi'atüva  
vatevama vaxuriya 'aixüa  
miyurienicü tita 'axa memüte'uyuri,  
caxari mana pütaiyari quiecarü  
tesita. <sup>12</sup>'Ayumieme Qesusita  
quitenie 'aurie pütücuinixü  
tacua, Cacaüyarisie mieme  
müvapatanicü teüteri, mücü  
mumieriecü. <sup>13</sup>Hicümü hesüana  
tepüyehu quiecarü tesitapai,  
niuquimarica tenevietü hepaüna.

<sup>14</sup>'Ena cuiepa tepücaheixeyaya  
quiecarü 'emütiterive. Tepitacuevie  
quiecarü xevitü 'umamie.

<sup>15</sup>'Ayumieme mücü tasipareviecacu,  
tamavari teque'ivevirieca  
Cacaüyari taheyemecü, 'aixüa  
te'utiyuatü hepaüsitana. Tateta  
mayeneicacü tequetahecütani  
hesüana temiemetütü que  
mü'ane mühücü, mücü  
canihücütüni tamavari. <sup>16</sup>Mücü  
meta, xepücatehatütümaiyanü  
'aixüa xemüteturiecacü  
xemütetyumicuanicü. Mavari müpaü  
mü'ane pinaque Cacaüyari.

<sup>17</sup>Yaxequetenecahuni que memutiyuane müme memütexe'aitüa, xeve'enietü. Müme mepi'üviya xe'iyari müpaü metemaitü, yühüritüarica hepaüsita memüta'ivaviyarienicü. Müpaü xequeteniva'enieca, müme müpaü memüte'uximayacacü meyutemamavietü, me'uti'aivatü memüca'yüacacü. Me xüca xevahiveritüaca, xeme masi xepücapareviyani.

<sup>18</sup>Tahesie mieme xequeneyunenevieca. Tame müpaü tepütetamate, ta'iyari 'aixüa pü'ane 'asipücahaine, naimecü temütavaüriyacü 'aixüa 'anemecü temeu'uvaniciü. <sup>19</sup>Nepüxetuica müpaü xemüteyuriecacü masi yemecü, cuitüva xemüpitüarienicü tahüxi temutinenierecü.

**'Aixüa que mutayü 'aixüa  
memü'itüarienicü, que  
mütivaruvaüritüa**

<sup>20</sup>Que mü'ane Cacaüyaritütü mütasipitüa ta'iyarisie temüca'uximatüariecacü, que mü'ane müquite vasata menayevitü

muxasi vahüveme mümarive Tati'aitüvame Qesusi, mücü 'itaseiriyaca türatu yuheyeme 'amuve mücü xuriyayacü, <sup>21</sup>mücü xüca xe'aye'atüani que mütinaque yaxemüteyuriecacü naimecü 'aixüa xeteyurietü, mücü xüca xeyuitüani xeminaqui'aritäanicü que mütixexeiya, Qesusi Cürisitu xepareviecacu. Mücü hepaüsita 'aixüa queticuxaxasivani yuheyemecü. Müpaü xEICÜA cani'aneni.

<sup>22</sup>Ne'ivama nepüxetuica, xequeueyuvauüriya xemi'enieniciü neniucü que nemütixetuica. Yapaümemecü nepütixe'uta'utüiri. <sup>23</sup>Müpaü xequetenemaica, ta'iva Timuteu muxüariyecü. Cuitü xüca nuani tahamatü tepüxexeiya tanaitü.

<sup>24</sup>Xequenivavaüritüaca yunaime memütexe'aitüa, yunaime Cacaüyari teüterimama. 'Itariya cuieyarisie miemete mepüxevaüritüa.

<sup>25</sup>'Aixüa xüca tiuca'iyarini yunaime xehesie mieme. Müpaü xEICÜA.

# SATIYACU

## Meitanü'axüa

---

### Vaürisica

**1** Ne Satiyacu  
Cacaüyarisie mieme  
necatini'uximayatametüni  
Ti'aitame Quesusi Cürisitusie  
mieme. Naisarie xemeutayeixüa  
necanixevaüiritüaca yunaime  
tamamata heimana yuhutame  
nuivarite.

### Cacaüyari que mütatipitüa temütemaivavenicü

<sup>2</sup>Ne'ivama naimecü  
xeyutemamaviecame  
xequenyu'erieca quepaucua  
xemüta'inüasieni 'inüari yücü  
mü'anecü, <sup>3</sup>müpaü xetemaitü,  
müpaü xete'inüasieme yuri xüca  
xete'erieca yemecü, mücücü  
xete'uca'enivatü xepacüne.  
<sup>4</sup>Xequenaye'axüa xete'uca'enivatü  
müpaü xemütemasiücünicü  
müyuxevicü xe'iyari, tixaü  
mücareuyevesecü.

<sup>5</sup>Me xüca xevitü xeme  
ca'aye'aveni mütimaivenicü, müpaü  
quetitavavirieni Cacaüyari. Müpaü  
catinapitüamücü. Cacaüyari  
'aixüa 'iyaricü catinivamicuani

yunaime cavatate'atü. <sup>6</sup>Müpaü  
quetitavavirieni yuri ti'erietü  
xeicüa, tixaü huta 'iyariyari  
cahexeyatü. Que mü'ane  
huta 'iyariyari mexeiya, mücü  
hamevaripaü caniyüneni  
haramarasie mieme mu'equapaü  
muyuanepaü. <sup>7</sup>Mücü müya  
mü'ane mecuxi pütihayeva müpaü  
ticu'erivatü quename tipitüarieni.  
Ti'aitame tixaü pücatipitüani <sup>8</sup>tevi  
huta 'iyariyari mexeiya mühücücü,  
müyuxamurie yuyeyacü naimecü.

<sup>9</sup>Ta'iva tixaü mücatihücü ve'eme  
queyuxatani müpaü ra'erivatü  
ve'eme que mürayeitüarie.  
<sup>10</sup>Xicutütü meta ve'eme  
queyuxatani müpaü ra'erivatü tixaü  
catihücütütü que mürayeitüarieni,  
müpaü timaitü, 'üxa xuturipaü  
peuyani. <sup>11</sup>Tau paneica xücatü, 'üxa  
pütivasiüxa. Xuturiyari pücaxürüve,  
visi mütiyuxexeyacai putiyünaxü.  
Yaxeicüata tevi müxicu pütavaxime  
yuyeyacü sepa que mütiyuriene.

### Que mütiuca'eniva 'inüasietü

<sup>12</sup>Aixüa cani'itüarieca que mü'ane  
mütiuca'eniva 'inüasietü. Mücü  
'inüasieme tucari canipitüariemücü

'inüaricü, yaxeicüa muma que müranutimaniyarie que mü'ane müvara'iva nausaricü, müpaüta catinitamarivamücü, Cacaüyari que mutayü quename vamini müme meminaqui'erie. <sup>13</sup>Tevi mexi 'inüasixime müpaü pücahaineni, Cacaüyari püta caniyüaneni nesil'inüatätü haitü. Cacaüyari pücayüve müta'inierienicü para 'axa mütiyurienenicü. Yaxeicüa mücü püca'ita'inieni tevi, para mücü 'axa mütiyurienenicü. <sup>14</sup>Yuxexuitü masi yücümana mepü'inierie 'axa memüteyurienicü. Meteyucahive'erietü mepüyuyivanüa mepüyuhapaninüa yücümana. <sup>15</sup>Tiyucahive'erietü cuitü 'axa pütiyurieneni. 'Aye'ame 'axa tiuyurienetü, vaüriyarica pümüni, yaxeicüa 'uca 'ayehucatü vaüriyarica mütinivenipaü. <sup>16</sup>Xepücate'irüviyarieca ne'ivama nenaqui'erima. <sup>17</sup>Naitü 'imiquieri 'aixüa mü'ane, nai temüte'umiquie müraye'axe, mücü taheima canimiemetüni. Canacaneicani hecüarivivamete va'uquiyarisüa miemetütü. Mücü pücayupata, ni 'etüriya que mütiyupata tau 'acayunirümecacu, müpaü pücatiyupata. <sup>18</sup>Yücümana müpaü tiuyühüaveca püta'utavevie, müpaü 'utayüca niuquicü yuri mainecü, para tame tita mütiunetüasie mieme visi temütexeyariacacü, tame nivesicapü temütexeyariacacü yacütünüquetü.

**Que müreuyevese yatemüteyuriecacü niuqui que maine**

<sup>19</sup>Ipaü xequetenemaica ne'ivama nenaqui'erima. Peru yunaitü

teüteri mequeyumexüitiaca memü'enananicü.

'Emequeteheutevini püta memütiniunicü memüyeha'anicü. <sup>20</sup>Tevi ha'atü yapücatiamieni heiseriemecü, Cacaüyari que mütixeiya. <sup>21</sup>'Ayumieme xequenevivi nai mütiyusevixima, nai 'axa müti'ane naisarie manayuhayeva. Xeca'ayu'eririyatü xequeneutanaqui'eri niuqui xe'iyarisie muca'iteüsie. Mücü caniyüveni xe'iyari mütaviceuisitüani.

<sup>22</sup>Niuqui que maine yaxetecahütü xequenacüni. Xe'l'enietü xeicüa xepücayüaca capa xeyucuananicü yücümana.

<sup>23</sup>Xüca niuqui 'enieni xeicüa, xüca yacaticamieni, tevipaü caniyüaneni xicürisie müyu'ixüari yühüxie que mütiyuxexeiya. <sup>24</sup>Yu'ixüarieme caniyemieni, yapaucua que mütiyuxexeyacai püratümaiya. <sup>25</sup>Que mü'ane masi mütaniere mücü 'inüarisie müraye'axesie mütasixünasie, que mü'ane mücüsie mü'ayumieme, xüca 'u'ename caratümaiya, masi xüca yaticamieni müpaü tiyurienetü, mücü 'aixüa canil'itüariacamücü yatiyurienetü.

<sup>26</sup>Tevi xüca rayexeyame yu'erieca, peru xüca cal'ipirenutüaca yuneni, mücü masi yücümana caniyucuananeni, yacü xeicüa catinayexeyani. <sup>27</sup>Me xüca rayexeyani 'litiyatü caseviximarietü, Cacaüyari müta'uquiyari que mütixeiya, müpaü püta caniyüanemücü. Caniva'üviyacamücü memünutuixietüca viyurasixi meta mexi me'uximatüarie.

Püyü'üviyanita, tita cuiepa  
mütimieme ca'iseviximanicü.

**Que mütivaru'imaiyaxü yücü  
memücatevaxeiyacü teüteri**

**2** Ne'ivama, Qesusi  
Cürisitu Tati'aitüvame  
visi mü'anesie yuri que  
xemüte'erie, xequeteneuhayeva  
yücü xetevaxeiyatü teüteri.  
<sup>2</sup>Mana tevi xüca heutahani  
xemüyuyexeürivasie huru  
hanirayari vatimanatücaitü visi  
mü'ane 'anacatütü, xücarita  
mana heutahani xevitü cui  
mavetü 'anacatünitü, quesü  
'uyüni. <sup>3</sup>Xücaricui xe'ixeiyani que  
mü'ane visi mü'ane manacatücü,  
xüca müpaü xete'icühüaveni,  
'Ecü xüa 'ena quenacani 'aixüa  
mü'anesie, xüca müpaü püta  
xete'icühüaveni tevi mümave,  
'Ecüsü 'umapaitü queneuveni, mesü  
'ena nehetüa queneucani, <sup>4</sup>cari  
huta 'iyariyari xepexeiya, cari  
'isücate xepayuyeitüa, peru 'axa  
xeteyücühüavetü.

<sup>5</sup>Xequenene'enieca ne'ivama  
nenaqui'erima. Tamüsü Cacaüyari  
püvaranuyeteüxixü müme cui  
memümamave cuiepa memütama  
que memütevaxeiya. Müme masi  
meheuca'ucame püvarayeitüa  
yuri que memüte'erie, para  
vahesie mütinaquenicü müme  
memaye'axüanicü tiva'aitüvame  
mayanicü, que mutayü quename  
vapitüani müme meminaqui'erie.  
<sup>6</sup>Xeme püta ca'aye'aveme xepüxata  
mümave. Tamüsü xicusixi  
mecatehüme memütexe'uxitüa.  
Müme mecatehüme memüxehapa  
'isücate vahesüa. <sup>7</sup>Tamüsü

mümetütü mecatehüme  
memisevixima que mü'anesüa  
xemümiemete, 'axa me'utiyaatü  
hepaüsitana. Mücü que mü'ane  
mühücü, mücü 'aixüa pü'ane.

<sup>8</sup>Me xüca 'acu xeheye'atüani  
Ti'aitame 'inüarieya, 'utüarica  
que maine, Pepinaqui'erieca  
'ahepaü tevi yaxecüa que  
pemüti'anaqui'erie manuyüne,  
'aixüa cani'aneni. <sup>9</sup>Me xüca  
yücü petivaxeiyani teüteri, 'axa  
xecaniyüaca. 'Inüari niuquiyari  
püxehecüata que xemüte'itisana.  
<sup>10</sup>Que mü'ane naimesie  
yamüticamie 'inüari niuquiyari que  
mainesie peru xüca xei niuquiyari  
hepaüsita 'utiquetamüre, masi  
hesiena pütühüivani miseviximacü  
'inüari naimie. <sup>11</sup>Que mü'ane müpaü  
mutayü, Pepüca'icumaüvani xeime  
'üyaya haitü, mücürita müpaü  
niutayüni, Pepücare'amemivani.  
Mericüsü sepa xeime 'üyaya  
pemücacumaüva, perusü xüca  
peti'amemivani, pepitisanaxü  
'inüari niuquiyari. <sup>12</sup>Que  
xemutiyuane, que xemüteyurie,  
müpaü xequetenemaica, 'isücame  
canixeta'ivaviyamücü 'inüari  
mütasixüna que maine. <sup>13</sup>Que  
mü'ane mücatiyucanemimaya,  
'isücame ca'inenimayatü  
pitahüave. Perusü que mü'ane  
mütiyucanemimaya, mücü püra'iva  
sepa 'isücame mitahüave.

**Xüca yuri ti'erieca niu tixaü  
catiyurienetü, yuri que  
müti'erie canimüquini xecüa**

<sup>14</sup>Qesü 'uyüni ne'ivama,  
tevi xüca yuri ti'eriecame  
yuxatani, peru tixaü

'asicatiyurienetü. Müpaü niu yuri que müti'erie, queri tiyüveni para mütaviceuisitüarienicü. <sup>15</sup>Ta'iva 'uquitütü 'ucatütü xüca 'anacavixurieca, xüca 'icuai heuyehüaca tucarisie mieme, <sup>16</sup>xevitü xeme xüca müpaü ticühüaveni, 'Aixüa pereu'erietü quenemie. 'E'ayesuime quenanacatüqui, queneutahuxai, 'utaitü, peru xüca ceca'imini tita müreyehüva yuvaiyarisie mieme, quesü 'uyünicuta, 'aixüa püca'yüni. <sup>17</sup>Yaxeicüa xüca niu yuri ti'erieca, peru xüca tixaü 'asicatiyurieneni, yuri que müti'erie pümüqui xEICÜA, yücümana 'asimüca'yüvecü. <sup>18</sup>Perusü xevitü xüari müpaü pütayüni, Mericüte 'ecü xeniü yuri pepüti'erie, ne masi tixaütü nepütiyuriene. Quene'ahecüata yuri que pemüti'erie tixaü 'asipecatiyurienetü, ne masi tixaütü 'asinetiyurienetü nepünehecüatani yuri que nemüti'erie. <sup>19</sup>Xüari yuri pepüti'erie xeniü quename Cacaüyari yuxevi. Mericüte 'aixüa pepaine, peru 'asita cacaüyarixi 'axa memü'anene müpaü yuri mepüte'erieta. 'Ayumieme mepuyüyüacatüca maricacü. <sup>20</sup>Cari yacü xEICÜA pepüticuxata. Tietüsü pe'avaüriyani müpaü pemüretimanicü, tevi 'asimüca'yüvecü xüca yuri niu ti'erieca tixaü 'asicatiyurienetü. <sup>21</sup>Mericüsü ta'uquiyari 'Apurahami heiserie pupitüarie tixaütü mütiuyuricü quepaucua yunive 'Isahaqui mavari mayeitüaniquecai müratimavarüvasie. <sup>22</sup>Müpaü xüari pepütimate, yuri ti'erietü 'iya, 'axeicüa tixaü 'asipütiyurienecai.

Yuri que müti'eriecai, paye'atüarie müpaü tiyurienetü. <sup>23</sup>Müpaü tiyurieneccacu 'utüarica naye'ani müpaü manuyüne, 'Apurahami yuri tinita'eririeni Cacaüyari, 'ayumieme heiserie hexeiyame cani'erivacaitüni. Cacaüyari hamicuya niutaterüvariени. <sup>24</sup>Müpaü xüari xepütimate, 'asitiyurienetü xEICÜA heiserie püpitüarieni tevi, yuri ti'erietü xEICÜA pücatixaü. <sup>25</sup>Mücürita yaxeicüa pütüuyuri 'asita Xahavi 'ucatütü tuminicü muyuvitünüacai. Tamüsü tixaütü mütiuyuricü heiserie canipitüarieni, quepaucua cuyaxi müvarutanaqui'eri niuqui tuayamete, quepaucua xaüsie müvarenü'a xeime huyeyari 'utüa. <sup>26</sup>Ravaiyari canimüquini careca'iyaritü. Yaxeicüata yuri ti'erietü, peru tixaü 'asicatiyurienetü, canimüquinita yuri que müti'erie.

### Taneni que mütiyuruva

**3** Ne'ivama te'üquitamete xepüca'acüne yunaitü, hipatü xEICÜA, müpaü xetemaitü, tame temüte'üquitamete tahesie masi vaüca pürahüivani. <sup>2</sup>Vaücavamecü tepecaxürüve tanaitü. Xüca tevi niuquisie cahecavauseni, mücü canaye'aveni. Caniyüveni müyupirenutüanicü yuvaiyarisie naime. <sup>3</sup>Xüca pirenü tevarutaqueisitüiani cavayasixi memütasi'anü'enienicü, mücücü vavaiyari naime ta'aurie tepahüpani. <sup>4</sup>Neuxeita naviyasixi 'ememünene. Sepa memü'equetüca 'eca mütürüca'yüvecü, ta'aurie mepaxüriva titunisitüvame

'esimüyevacü, que mütiyuvaüriya ta'aurie mehüanicü 'inü'avame. <sup>5</sup>Yaxeicüa taneni püyuxevi xEICÜA 'esipetü, peru marivemecü caniyüveni ve'eme müyuxatanicü. Camü macucüyexiyasie xüca 'utinaini tai 'esipemecü, mücü caniyüveni 'e'acuyeume mütaxüsitüani. <sup>6</sup>Taneni meta taipäü caniyüveni. Cuiepa timieme tixatatü 'epüyeca tavaiyarisie, tita mücatiheiserie naime tixatatü. Tavaiyari püsevixima naime. Pütasixürimüsütüa tatucari naime. Xasi taiyariyarisie mieme panunetüarie mütacacü. <sup>7</sup>Yunaitüri que memü'anene yeutari, viquixi, cuterixi, haramarasie quiecatari, yunaitü mecanimaxiusievaveni, teüteri yücümana menivamaxiutavaveni. <sup>8</sup>Peru tevi püca'yüve mimaxiutani yuneni. 'Axa catiniyurieneni, püyuxamuriene xEICÜA. 'Uhaye mümüiyacü xEICÜA pühüne. <sup>9</sup>Tanenicü 'aixüa teputiyuane Ti'aitame müta'uquiyari hepaüsita. Tanenicü meta teüteri tepüvaruxaxata 'axa memü'itüarienicü, sepa Cacaüyaripäü me'anenetü memutiveviya. <sup>10</sup>Xei tetayarisie püvayeneica niuqui para 'aixüa mü'itüarienicü para 'axa mü'itüarienicüta 'axeicüa. Mücü 'aixüa püca'ane ne'ivama. <sup>11</sup>Haixapa que tivatineica heuxeicüa ha hacacatü hacucutü. <sup>12</sup>Ne'ivama xapasie que tiyüve huriva tacariyari mütiXUXUAVERE, 'icü meta, caxie nanayarisie que tiyüve mütiXUXUAVERE xapa. Yaxeicüata haixa ma'usivi müvatineica 'aixüa ha'aneme mayuyeitüani püca'yüve.

### Que mütimaive müpäü

#### tüpütüarieca taheima miemecü

<sup>13</sup>Xevitü xeme xüca timaiveni, xüca vaüca timaica, 'aixüa 'anemecü yüanetü queyuhecüatani, quename ca'ayu'eriyatü yatiyuriene, que müreuyevese müpäü mütiyurienenicü timaivetü. <sup>14</sup>Me xüca hasivimecü xe'ütesaca xüca yuhesie mieme xEICÜA xeyüaca yu'iyarisie, mecuxi xepücateyucatave'erieca, mecuxi xepücate'itavani xeheye'unietü tita yuri müraine. <sup>15</sup>Müpäü que xemütemate xüca müpäü 'aneni, taheima miemecü xepüca'upitüarie. Cuiepa püta canimiemetüni, teüteri va'iyarisie pümieme, cacaiyarixi 'axa memü'anene vahesüa pümieme que xemütemaivave. <sup>16</sup>Haque memü'ütesa haque yuhesie mieme xEICÜA memüyüa, manarita mecaniyuxamuriecuni, naime 'axa müti'anecü mepüyüaca. <sup>17</sup>Masi que mütimaive taheima miemecü 'upitüarieca, pü'itüya meri, meta 'aixüa pütivaxeyiasitüa hipame, püca'ayu'eriya, pütüyu'aitüarinüa, yuheyemecü pütüyucanenimaya, 'aixüa pütüyuriene, 'uximayasica que müreuyevese, huta 'iyariyari pücahexeiyä, yacü xEICÜA pücati'itava. <sup>18</sup>Müme 'aixüa memütevaxeyiasitüa teüteri, yu'uximayasica que memüte'u'esa cayuvatü mehexeyatü yu'iyarisie, que mütitixuavere, mücücü heiserie mecanipitüariecuni.

### Tepüca'inaqui'erieca tita

#### cuiepa mütimieme

**4** Titayari xeteyucuyatatüve, mücü haque pemieme. Titayari xeteyucuitüve. Tamüsü

xemünaqui'acacü xeicüa  
 xepüyüa, 'ayumieme müpaü  
 xepüteyurie, mücü naqui'eriya  
 müyumieneccü xevaiyarisie.  
<sup>2</sup>Tixaütü xepütehive'erie, peru  
 xepücaheixeiya, 'ayumieme  
 xepüteyumemiva. Mücü meta,  
 xepüyumexüitüa hipame  
 vahepaüsita xevara'ivacutü,  
 peru xepüyutexie tixaütü  
 xetehexeyatü xemacüneccü,  
 'ayumieme xepüyucuitüve  
 xepüyucuyatatüve. Masi  
 xepücaheixeiya xemüca'ivavacü.  
<sup>3</sup>Sepa xemütevava, tixaü  
 xepücateyetuiriyarüva, xe'iyari  
 'axa 'anecacu xemütevavacü,  
 xemicasitaruvanicü xenaqui'acutü  
 xeicüa. <sup>4</sup>Cari xeme teüteri hipame  
 va'ütama memüvacumaüva  
 vahepaü xepüyüa. Xüari müpaü  
 xepücatemate, xüca 'inaqui'erieca  
 tita cuiepa mütimieme, pi'uxive'erie  
 Cacaüyari. 'Ayumieme que mü'ane  
 müyuvauüriya minaqui'ericacü  
 tita cuiepa mütimieme, mücü  
 Cacaüyari 'aye'unietü payuyeitüva.  
<sup>5</sup>Mesü müpaü püta xetecu'eriva  
 'acu, quename xeniu 'utüarica  
 yacü xeicüa haine, Cacaüyari  
 'ütesatü pihive'erie mücü 'iyari  
 mütasü'utuitüa tataüta, que  
 maine. <sup>6</sup>Peru mücü vaücavameccü  
 masi 'aixüa tiuca'iyaritä  
 pütasiyurie. 'Ayumieme müpaü  
 paine, Cacaüyari nivaraye'unieca  
 müme memüte'ucatave'erie, 'aixüa  
 tiuca'iyaritä püta püvayurie  
 müme tixaü memücatehüme.  
<sup>7</sup>'Ayumieme xequeneyuvaüriyani  
 Cacaüyari mütxe'aitüacacü.  
 Xequenaye'unieca Cauyumarie.  
 Xüca müpaü xeteyurieca, mücü

Cauyumarie püyuta'una xehesüa.  
<sup>8</sup>'Aura xequenacüni Cacaüyarisüa,  
 mücüta 'aura payani xehesüa.  
 Xequeneyu'itiexüa yumamasie  
 xeme 'axa teyuruvamete. 'Aixüa  
 'ane xequenayeitüa yu'iyari xeme  
 huta 'iyariyari xemexeyacü.  
<sup>9</sup>Xequene'uximatüarieca yu'iyarisie  
 masi, xequeneyuhiverieca  
 xequeneutisuanani. Xenanai  
 quepasieca hiverica mayanicü.  
 Xetemavierica quehüiyani  
 xexüxünitü püta xequenacüne.  
<sup>10</sup>Tixaü xecatehümetütü  
 xequenayuyeitüani Ti'aitame hüxie.  
 'Ana mücü vavemete püxe'ayeitüani.

#### Ta'ivama vahesie tepücate'uhüpani

<sup>11</sup>Xepücayuniuquimaca ne'ivama.  
 Que mü'ane miniuquima yu'iva,  
 que mü'ane yu'ivasie mütiuhüpa,  
 müpaü tiyurienetü piniuquima  
 'inüari niuquiyari, pütüuhüpa 'inüari  
 niuquiyarisie. Mericüsü xüca  
 'inüari niuquiyarisie petüuhüpani,  
 que mü'ane 'inüari niuquiyarisie  
 yamüticamiepaü pepücaüane,  
 'isücamepaü xeicüa pepüyüane.  
<sup>12</sup>Que mü'ane 'inüari niuquiyari  
 mucaye, que mü'ane mü'isücame,  
 mücü caniyuxevini. Mücü  
 caniyüveni mütiyutavicueisitüanicü  
 mütiyuca'unanicü. Quecuta  
 'ecü pe'ane 'ahepaü tevisie  
 pemütiuhüpanicü.

#### 'Asixepücatemate 'uxa'atüni que mütiyüni hepaüsita

<sup>13</sup>Neuxei xeme müpaü  
 xemutiyuane, Hicüri 'uxa'a  
 nusu tepüyehu mücü  
 quiecarisie ya mücüsie,  
 mana xei viyari tepeyurieni,



mana tepetaharerutatüveni  
 tepüte'ivatüveni xeniu  
 xemutiyanepaü. <sup>14</sup>Xeme  
 'asixepücatemate 'uxa'atüni  
 que mütiyünicü. Qesü titita  
 xetucari. 'Aüxi xecanihümetüni  
 xEICÜA. 'Aüxi 'epücareutere  
 xeyarietü, cuitü caxeyarietü  
 payeica. <sup>15</sup>Masi peuyevese müpaü  
 püta xemutiyanenicü, Xüca  
 müpaü tinaqueni Ti'aitame,  
 tepayeyuyurini, meta 'ipaü ya  
 müpaü tepüteyurieca, müpaü  
 xe'utiyuatü. <sup>16</sup>Peru hicü masi  
 ve'emetepüxata xeteha'erivatü  
 que xemüteyucatave'erie xEICÜA.  
 Naimemüpaü que xemutiyuane  
 yuhepaüsita, 'axa xepüteyurie.  
<sup>17</sup>Mericüsü que mü'ane müpaü  
 mütimate 'aixüa mütiyurienicü,  
 peru müpaü mücatiyuriene, mücü  
 'axa pütiyuriene püta xEICÜA.

#### Xicusixi memüteyuca'uximatüa

**5** Hicümüsü xeme xemeuca'u.  
 Neuxei, xequeneutisuani  
 xequeneutihivani müpaü  
 xeteha'erivatü 'uximatüarica  
 müxe'axirümecü. <sup>2</sup>Titacü  
 xemütheuca'u, mücü pütitipüque.  
 Xe'ixuriqui püticümiva  
 cüpsi mepiyuine. <sup>3</sup>Xehuru  
 tepüayari xepürata tepüayari  
 püyucuitamatüca. Cuitayari  
 pütihecüata xehepaüsita.  
 Xepüyuhiveritüa, yaxEICÜA  
 tai que mütiyucucuinecü  
 xevaiyarisie. Sepa tucari  
 mütaparirüme xepeyuca'uitüa  
 xEICÜA. <sup>4</sup>Camü te'uximayatamete  
 va'ivarica. Mepicuxeüri xevaxata  
 mieme, peru xepüvacuamana  
 xeme. Va'ivarica pümasiücü

meuyevesecü. 'Isanamete  
 metihivacacu, que mü'ane  
 Yümüireme Tiva'aitüvame mühücü  
 nivaru'enieni. <sup>5</sup>Xemeri hive'ericacü  
 xEICÜA xeyüatü 'axepu'uvacai  
 cuiepa, xerucuyatüvetü  
 xEICÜA xepü'ayumiemetetücai.  
 Xepüyuvaiyatüacai vacaisixi  
 vahepaü xemücüi'ivanicü xEICÜA.  
<sup>6</sup>Xepixanetacai que mü'ane  
 heiseriemecü yamüticamiecai.  
 Xepe'ivaxü, xepimi. Peru mücü  
 pücaxe'aye'uniecai.

#### Xepücavaüripieca xete'uca'enivatü, xequeneyunenevieca

<sup>7</sup>Ayumieme ne'ivama  
 xete'uca'enivatü  
 xepücavaüripietücani, Ti'aitame  
 mexi canuave. Camü cuiepa 'esame  
 picuevie 'icuaxi cuiepa mieme  
 cui müraye'axe. Pücavaüripi sepa  
 'emüreutere 'auracacu mieme  
 'icürixa mieme ha tacuevietü.  
<sup>8</sup>Xemeta xepücavaüripietücani  
 xete'uca'enivatü.  
 Xequeneyutürücariyani yu'iyarisie.  
 Canaye'aximeni Ti'aitame  
 munuanicü. <sup>9</sup>Neuxei ne'ivama,  
 xeme niuqui xepücaxüatüca  
 yu'ivama vahepaüsita, capa  
 'isücame xetixani'erienicü. Camü  
 mücü quitenie püta'axime.  
<sup>10</sup>Texaxatamete Ti'aitamesüa  
 memiemetetütü memütecuxatacai,  
 müme xequenivara'erivani  
 ne'ivama 'üquisica  
 memühümetücaicü, 'axa mü'ane  
 menvietü que memüte'uca'enivacai  
 temüva'üquenicü. <sup>11</sup>Camü  
 müme memüte'uca'eniva 'aixüa  
 me'itüaricame tepü'erie.  
 Xepu'enana que mütiuca'enivacai

Cuvi. Müpaüta xepütehetime  
'arique Ti'aitame que müreye'atüa,  
Ti'aitame cuini mieme que  
mütiyucanenimaya.

<sup>12</sup>Sepa naimecü ne'ivama,  
xepücayühürütüaca. Sepa taheima  
mieme xexatatü sepa cuie  
xexatatü sepa que tita mütiücü  
xexatatü, xepücayühürütüaca.  
Xüca xeyuvaüriyani, hü  
xequeneutiyuaneni xEICÜA. Me  
tixaü xüca xecayuvaüriyani, tixaü  
xequeneutiyuaneni xEICÜA, capa  
xehesie tiuhüivatü 'ayanicü.

<sup>13</sup>'Axa mü'ane xüca nevieximeni  
xevitü xeme, queyutanenevieni. Me  
xüca yutemavieca que'utacuicani.

<sup>14</sup>Xüca ticuyeni xevitü xeme,  
yu'aurie quevaretacuevieni  
memüyuyexexeüriva va'uquiyarima.  
Müme meque'lnenevinyani  
me'icavirivatü haseiti, que mü'ane  
müti'aitame mücü mehahüavetü.

<sup>15</sup>Que memüteyunenevie  
yuri mete'erietü, mücücü  
pütavicueisitüarieni ticuicame,  
Ti'aitame penucuquetüani. Mücü  
meta, xüca 'axa tiuyurieni,  
mücücü püreuyehüviyarieni.

<sup>16</sup>'Ayumieme hipatü mexe'eniecacu  
xequenyuhecüatani xüca 'axa  
xete'uyurieni, xemüyuneneviecaci  
yuxexuime yuhesie mieme  
yunaitü, müpaü xete'ivautü  
xemanayexüriyanicü. Que mü'ane  
heiseriemecü yamüticamie,  
mücü nenevierieya vaüca  
caniyüvemücü Cacaüyari müpaü  
xüca ticuyütüvani. <sup>17</sup>'Eriyaxi  
canitevitücaitüni tahepaü  
tiuca'iyaritü. Mücü cuini mieme  
püyuneneviecai mücacaviyecü.  
Püca'ucaviyexü mana cuiepa  
haica viyari heimana 'ataxeime  
meseri. <sup>18</sup>Tavari puyutanenevi,  
'ana muyuavisie pucaviyexü, cuie  
pitixuavitüa 'icuaxi.

<sup>19</sup>Ne'ivama xüca xevitü  
xeme heuyevauseri tita yuri  
mürainesie cativiyatü, xüca  
xevitü ta'aurie hehüani, <sup>20</sup>müpaü  
xequetenemaica, que mü'ane  
ta'aurie mehüa 'axa tiyuruvame  
haque meuyeve müca'uyeicanicü,  
mücü pitavicueisitüani tucarieya  
müca'umünicü. Sepa vaüca 'axa  
mütiuyuri, mücü canayeitüariemü  
cü.

# PECURU

## Meitanü'axüa Mexüacame Xapayari

---

### Vaürisica

**1** Ne Pecuru necaninü'aritüni Quesusi Cürisitusüa nemiemetütü. Necanixevaüritüaca xeme xemanayexeyarie xemeucuyaxixüa teüteri vasata, Punitutari Carasiyatari Caparusiyatari 'Asiyatari Vitiniyatari vasata xemetitei hicü. <sup>2</sup>Xecananayexeyarieni Cacaüyari que mütimaicai meripaitü ta'uquiyaritütü. 'Iyarieya xepatacacu Cacaüyarisie mieme xecaniyüaca. Quesusi Cürisitu mumieriecü, xemeta xecaniu'itiyani xuriyayacü, xemüyuvaüriyanicü yaxemütecahunicü que maine. Cuini mieme 'aixüa xüca tiuca'iyarini xehesie mieme, xüca xepitüaca yu'iyarisie xemüca'uximatüariecacü.

### Tucari que temütepitüarie mexi teta'icueva yuri tete'erietü

<sup>3</sup>Que mü'ane Tati'aitüvame Quesusi Cürisitu mücacaüyarieya mü'uquiyarieya, mücü hepäüsita 'aixüa queticuxaxasivani. Mücü väicavamecü tatinenimayatü,

hutarieca cataniutinuivitüani tucari temexeyanicü mexi teta'icueva yuri tete'erietü. Quesusi Cürisitu müquite vasata manucuquecü yunivema catanayeitüani. <sup>4</sup>'Ayumieme tahesie catininaquimücü tita mücatipünive mücatiyüvi mücatiyeive, tita muyuavisie müre'üviyarie xehesie mieme. <sup>5</sup>Xemesü yuri xete'erietü xecani'üviyarieca Cacaüyari türücariyayacü. 'Ayumieme xecanitavicueisitüariecuni, Cacaüyari que mütiha'arisie hicü, que mütimasiücünü xevicueisitüatü tucari 'aye'ayu quepaucua mütäpare.

<sup>6</sup>Müpaü xetemaitü xecaniyutemamavieca, sepanetü müreuyevese hicü yapäumexa xemüyeheiveriecacü xeta'inüasietüvetü müiremecü. <sup>7</sup>Xüca xemasiücünü yuri yemecü que xemüte'erie, Cacaüyari 'aixüa pütayüni xehepäüsita, visi pütixexeyia, ve'emecü 'aixüa pütixexeyia quepaucua masiücütü mayani Quesusi Cürisitu. Xüca müpaü xetemasüücünü xeta'inüasietü, cuini mieme

'aixüa püyüni. Ni huru tuminiyari mütipünive mücüpäu 'aixüa püca'ane, sepa taipa mü'inüasieve.

<sup>8</sup>Sepa hasuacu xemüca'ixeiavave Quesusi Cürisitu, xepinaqui'erie. Xeca'ixeiyaatü cuxi, hesiena yuri xepüte'erie. 'Ayumieme xepüyutemamavie

'anuyuhayevacamecü visi 'aneme que xemütepitiuarie.

<sup>9</sup>Titayari yuri xete'erie. Xe'iyari mütavicueisitüarienicü, 'ayumieme yuri xeteni'erieca. Mericüte, müpäu xe'itüarietü xenacünirümeni.

<sup>10</sup>Mücü vicueisitüarica hepaüsita mepüyu'iyaritüatüvecai mepütevautüvecai Cacaüyari niucametemama quepaucua memütecuxatacai que xemütemiquieniquecai hepaüsita. <sup>11</sup>Mepütevautüvecai quepaucua müxatacai, que mü'ane tucari mühecüatacai Cürisitu 'Iyarieya vahesie mütiyiyacai. Yacatiyüvecacu cuxi 'Iyari pütihecüatacai Cürisitu que müticuinequecai, 'arique visi 'anetü que mürayaniquecai. <sup>12</sup>Mümeri müpäu mepüte'u'üquituarie, yuhesie mieme müpäu mepücayüacai que memütehüriritüariecai, tame püta tahesie mieme mepüyüacai mücü hepaüsita. Xemesü hicü vicueisitüarica hepaüsita xepüte'utahüavarie vahepaü, texaxatamete yametenixecuxaxatüvacaitüni, 'Iyari Mütiyupatasie meteviyatü taheima meyenü'ariesie. Cacaüyari niuqui tuayametemama müpäu mepütemaicaqueyu que xemüte'utahüavarie.

**Que xemüte'upasie, müpäu xequeteneu'uvani**

<sup>13</sup>'Ayumieme xequeneyuha'aritüaca yu'iyarisie 'aixüa 'anemecü xetecu'erivatü. Xequeneyumateni. Naimesie xequetenecuevieca tita xemütemiquieni quepaucua masiücütü mayani Quesusi Cürisitu. <sup>14</sup>Türi yamemütecahu vahepaü xeyüatü, müpäu xepücayumaica meripaipäu, que xemüteyucahive'eriecai 'asixecatemitü 'ana. <sup>15</sup>Que mü'ane müxe'uta'ini canipasieca. 'Ayumieme xemeta mücüpäu püta xe'ananetü xequenacüni, hesiena mieme xequenepasieca naimesie que xemüte'u'uva, <sup>16</sup>müpäu müre'uxacü, Xeme xequenepasieca nehiesie mieme, ne nemupasiecü.

<sup>17</sup>Mücü yücü cativaxeyiatü niva'inüatani que memüteyurie yuxexuitü. Müya mü'ane xüca xe'utahüave yu'uquiyaritüme, xeteheiyehüviritü xequeneyüaca mexi 'uva xe'utitei <sup>18</sup>müpäu xetemitü, tita mütipünivecü cumu püratacü huru tuminiyaricü, mücücü xepüca'unanaiya quepaucua xemuxünarie 'uxa'atüni varie yacü xeicüa xemüca'u'uvanicü, xetevarima que memütexe'üquitüacai yututuyari. <sup>19</sup>Xepuxünarie Cürisitu xuriyayacü püta cuini mieme masi müraye'axecü. Mücü mavariipäu muxa nunusipäu caniumierieni, hesiena carahüivacacu 'asicatiyüvitü, 'aixüa 'anetü mavari mayanicü. <sup>20</sup>Cuie canetüarievacacu cuxi, Cacaüyari yacatinimaicaitüni

que mütiyurieniquecai 'iya.  
Tucari 'aye'aximecacu, xeiyarietü  
nayani xehesie mieme  
<sup>21</sup>yuri xemüte'erie Cacaüyarisie  
Cürisitu yatixepitüacacu, xeme  
xehesie mieme. Cacaüyari  
canenucuquetüani müquite vasata.  
Visi 'aneme nayeitüani yuri  
xemüteta'erienicü Cacaüyarisie,  
xemicueviecacü Cacaüyari.

<sup>22</sup>Xecaniyu'itirieni yu'iyari, tita  
yuri mürainesie yaxetecahutü  
'Iyarieya xepareviecacu, 'ayumieme  
xecanivanaqu'erieca yu'ivama  
yacü xecüa xecateva'litaiyatü.  
Mericüte, 'aixüa 'iyaricü  
xequeneyunaqu'erieca müiremecü.  
<sup>23</sup>Hutarieca xeniutinunuiva.

'Imüari müpünivesie  
xecaputinexüa. Mücapünivesie  
püta xeputinexüa, Cacaüyari  
niuquieya yatixepitüacacu  
mayeyuri yuheyemecü 'emütiterive.

<sup>24</sup>Tamüsü,  
Yunaitü teüteri  
'Üxapaü mecani'aneneni.  
Nai visi que memü'anene,  
'Üxapa mieme tuturipaü  
Mecani'aneneni.  
'Üxa pütayüna,  
Tuturiyari pücaxürieni.

<sup>25</sup>Perusü Ti'aitame niuquieya püta  
Yuheyemecü 'apütiterive.  
Mücü niuqui müxata, niuqui  
'aixüa manuyüne canihücütüni  
xemuxatüarie.

**2** Xequetenehayeva 'axa  
xeteyurietü naime,  
xepücate'irümaca, yacü xecüa  
xepücatecuxatani, xepüca'ütesaca,  
xepücavaniuquimaca hipame.  
<sup>2</sup>Türi xique memutinunuivaxü  
vahepaü püta xequenehive'erieca

resi 'iyarisie mieme mücahatuiyarie.  
Mücücü xecanitivericuni,  
xetavicieisitüarietü xecanacünicuni.  
<sup>3</sup>Xüari xecane'inüatavaveni,  
müpaü xepütehetima 'aixüa que  
mütiuca'iyari Ti'aitame.

#### Tetepaü que mü'ane mayeyuri

<sup>4</sup>Mücüsie xequeteneviyani.  
Tetepaü cani'aneni mayeyuri.  
Teüteri menixani'erieca, Cacaüyari  
püta nenayexeiya, ve'emecü 'aixüa  
tinixeyani. <sup>5</sup>Xeme meta, tetexi  
que mütiu'uitüariva qui mayanicü,  
yaxeicüa xeme xe'ayeyuyuritü  
xequeneti'uitüarie qui xemacünecü  
'iyarisie mieme. Mara'acate  
xequenacüni Cacaüyarisie mieme  
xemupasiecü, xemixatüanicü  
mavari 'iyarisie mieme que  
mütinaque Cacaüyari, Quesusi  
Cürisitu xepareviecacu. <sup>6</sup>Tamüsü  
'ayumieme müpaü püre'uxa,  
Neuxei, Siyunisie nenitaqueni  
Tete manayexeyarie  
Sicurita mieme,  
Cui ve'eme.  
Que mü'ane yuri müti'erie  
hesiena

Tixaü pücayuteviyani.

<sup>7</sup>Cuini mieme ve'emecü 'aixüa  
que mütixeyarie, xemeta yuri  
xemüte'erie yaxecüa xepütexeyarie  
hepaüna. Yuri memücate'erie  
vahepaüsita püta que maine,  
Mücü tete qui vevivamete  
memixani'eri,  
Mücütütü securita mieme  
tutuicame nayani.

<sup>8</sup>Mücü metatü,  
Mücü tetesie mepüti'ucamüre  
Tete mürecaxüriritüre  
canihücütüni.

Müme meniuti'lücamüre niuquisie yamemücatecahucü. Müpaü memüteyurienicü meniucayasarieni.

### Cacaüyari teüterimama

<sup>9</sup>Xeme püta xeime nuivari xecanihümetüni xemanayexeyarie. Mara'acate xepühüme xemüte'aitamete meta, xeime nuivari Cacaüyarisie mieme mupasie xepühüme, Cacaüyari yuteüterima püxe'ayeitüa. Müpaü xepü'anene xemütehecüatanicü marivemecü que mütiyuriene que mü'ane müxe'uta'ini xemütehayevacü yüvipa xe'u'uvatü, mücü hecüariyayasie püta xemu'uvanicü mümarivesie. <sup>10</sup>Anapai nuivari xepücahümetücai, hicüsü Cacaüyari teüterimama xecanihümetüni. Xepücanenimayasiecai, hicü xeputinanimayasie.

### Cacaüyari te'uximayatametemama xequeneyüaca

<sup>11</sup>Nenaqui'erima cücamete xecanihümetüni cu'uvamete xecanihümetüni. 'Ayumieme müpaü necatinixetuicaniqueyu, xemütehayevacü yaxeteyurietü que mütiyucahive'erie vaisie tiviyatü. Mücü hive'erica ta'iyarimatü caniyucuitüveni. <sup>12</sup>Hipame nuivarite vasata 'aixüa 'anemecü xequeneyüaca. Xüca müpaü xeteyurieca, sepa memüxeniuquima 'axa xemüteyurie me'utiyuatü, 'aixüa 'anemecü xemüteyuriecü, mexexeyatü 'aixüa me'utiyuatü mecanacünicuni masi Cacaüyari hepaüsita, mücü tucari 'aye'ayu quepaucua müvaxeyia.

<sup>13</sup>Ti'aitamesüa xemümiemetecü, yaxequetenecahuni que memutiyuane yunaitü heiserie memexeyia teüteri vasata. Yaxequetenecahuni cuiepa ti'aitame que maine mücü müve'emecü. <sup>14</sup>Yaxequetenecahuni 'isücate que memutiyuane, cuiepa ti'aitame müvareyenü'axüacü memüvatamari'itüanicü müme 'axa memüteyurie, 'aixüa memütevatahüavecü müme 'aixüa memüteyurie. <sup>15</sup>Ipaü cani'aneni tita mütinaque Cacaüyari, xeme 'aixüa xeteyurietü xemenucunacacü tita yacü xeicüa memüte'utiyuane teüteri 'asimemücatemate.

<sup>16</sup>Xecanixüxünini, peru xexüxünitü, heiserie xehexeyame 'axa xemüteyuriecacü xepücayu'erieca. Cacaüyari te'uximayatametemama xecanihümetüni püta. <sup>17</sup>Ve'emecü 'aixüa xequetenivaxeyiani yuxexuime. Xequenivanaqui'erieca 'ivamarixi. Xequeteneuyehüvirieca Cacaüyari. Cuiepa ti'aitame ve'emecü 'aixüa xequetenexeyiani.

### Cürisitu ta'inüari patüa mütiucuinixücü

<sup>18</sup>Te'uximayatamete yaxequetenecahuni que memutiyuane xecusiyarima naimecü xetevareuyehüvirietü. 'Aixüa memüte'u'iyari memüca'ayu'eririyi nepücavaxata xeicüa, masi memüses'e'ita que memutiyuane yaxequetenecahuni. <sup>19</sup>'Aixüa püticühüavarüvani xüca hiveritüarieca Cacaüyari ha'erivatü, xüca tiucacucüinini heiseriemecü ca'itüarietü. <sup>20</sup>Titacü

'aixüa xetecühüavariüvani xüca xete'uca'enivani 'axa xete'uyurieme xeicüa, xe'utiveiyame. Masi 'aixüa püta xete'uyurieme xe'utiveiyame xüca xete'uca'enivani, Cacaüyari 'aixüa pütixetahüave. <sup>21</sup>Müpaü mütiyünicü xeputa'inierie, Cürisituta mütiucuinixücü xehesie mieme, 'inüari xepitüatü, xemiveiyanicü 'iya que mütiyurienecai. <sup>22</sup>Mücü 'axa pücatiuyuri. 'Irumari pücaxuavecai tetana. <sup>23</sup>'Axa ticühüavarüvatü 'axa pücativarutahüavixü. Ticuinetü 'asipücahainecai quename 'axa vayurieniquecai. Masi caniuuyetüani, que mü'ane heiseriemecü müva'inüata 'aixüa miyuririenicü. <sup>24</sup>Mücü yuvaïyarisie canititüni tita 'axa temüte'uyuri cüyesie 'ucavivatü, tame te'utixünarieme 'axa temücateyurienicü 'uxa'atüni varie, temayeyuyurinicü püta heiseriemecü yatetecahutü. Mücü meucuveyaxüacü, xepanayexüriya xeme. <sup>25</sup>Masi muxasi memeyexürüpaü xepüyüacai. Hicirixüa ta'aurie xe'axürieca muxasi vahüvemesie xepüte'uvi, que mü'ane xe'iyari mü'üviyasie.

#### Que müreuyevese

#### yamemüteyuriecacü meyu'üitatü

**3** 'Ucari yaxaicüa, yaxequetenecahuni que memutiyuane xecünama. Müpaü xeteyuriecacu, sepa hipatü yamemücatecahu niuqui que maine, va'üitama 'aixüa 'anemecü xe'u'uvacacu yuri mepüteta'eritüarieni 'asixeca'utiyuanecacu, <sup>2</sup>mexexeyatü

que xemüte'u'uva Cacaüyari xeteheuyehüvirietü xe'itiyatücaitü.

<sup>3</sup>Que xemüteyuquemaritüa, herie miemecü xeicüa xepücamarivani, que xemüteyusa'a yücüpaside, hurucü que xemüte'aticuca, que xemüte'encatücü 'ixuriqui.

<sup>4</sup>Masi xequenemarivani que xemü'ane yutaüta haque mücahemesiücü herie, yu'iyarisie püta. Xüca xe'iyari ca'ayu'eriyani xüca cayuvatü 'umaca, mücü masi visi pürequemarie mücapünivecü. Que mü'ane müpaü mü'ane, Cacaüyari cuini mieme ve'emecü 'aixüa pütixeyia.

<sup>5</sup>'Ucari meripaitü 'amemu'uvacai memüpasiecai Cacaüyarisie miemecü, memüta'icuevacai yuri mete'erietü hesiena, müme müpaü mepüteyuquemaritüacai yametecahutü que memutiyuanecai vacünama. <sup>6</sup>Sara meta yacatinicamiecaitüni 'Aurahami que mainecai, ti'aitame tinitamare. Xemeta nivemama xecanacüne hepaua 'aixüa xeteyurietü, xecamamatü xüca xemariusieca.

<sup>7</sup>'Uquisita yaxaicüa, xetemaivavetü yu'üitama vahamatü xequeneutiteni, müpaü xetemaitü, xehepaü memücatürüicavicü yuvaïyarisie. Ve'emecü 'aixüa xequetenivaxeyiani, müpaü xetemaitü, mexeteütacacu vahesieta pütinaque tucari memümüquienicü xehamatü. Müpaü xüca xeteyurieca xenenevieri püca'anunamieni.

#### Yaxequeteneyurieca xe'iyari caxe'utatienicü

<sup>8</sup>Imatürieca yunaitü xequeneyuxeveni que

xemüteyücihüave, xequenyuxeveni  
'axeiciüa xeyutemamavietü  
xeyuhiverietü nusu,  
xequenivanaqui'erieca 'ivamarixi,  
xequeteneyucanenimayaca,  
xepüca'ayu'eririyani.

<sup>9</sup>'Axa xete'upitüarieme 'axa  
xepüca'ayurieni. 'Axa  
xete'utahüavarieme 'axa  
xepücatevacühüaveni. Masisü  
xequeneutavaviri Cacaüyari  
'aixüa memü'itüarienicü püta.  
'Ayumieme xeputa'inierie,  
xehesie mütinaquenicü 'aixüa  
xemu'itüarienicü.

<sup>10</sup>Que mü'ane minaqu'erimücü  
tucari,  
Que mü'ane mixeyamücü叔ari  
'aixüa mü'ane,  
Quetihayevani 'axa 'utaitü  
yunenicü,  
Quetihayevani yutetacü  
cuamanarica ticuxatatü.

<sup>11</sup>Que'icu'eirieni tita 'axa  
müti'ane,  
'Aixüa queti'yurieneni püta.  
Queticuvauni 'aixüa  
mütivaxeyanicü teüteri.  
Queyumexüitiüaca mücücü.

<sup>12</sup>Ti'aitame nivaxeyani müme  
heiseriemecü yamemütecahu,  
Nacaya vaneneviericü  
pü'ayumieme.  
'Axa pütivaxeyia müme 'axa  
memüteyurie.

<sup>13</sup>Mücü meta, quepaicüsü 'axa  
püxeyurieni xüca xeyuvaüriyani  
hicü xemüyumexüitiüacacü  
tita 'aixüa müti'ane hepaüsita.

<sup>14</sup>Mesü xüca xete'ucacucineni  
heiseriemecü yaxemütecahucü,  
xequenyutemamavieca  
masi. Xepücamacarüca,

xepüca'yuxamurieca. <sup>15</sup>Masi  
yu'iyarisie xequeteneuyehüvirieca  
Ti'aitame Cürisitu que mütiupasie.  
Yuheyemecü xequeneha'arisieca  
xemütiniunicü tita xemütecueviesie  
mieme, yaxete'icühüavetü que  
mü'ane müxeta'ivaviya. Müpaü  
xetecuxatatü xepüca'ayu'eririyani  
xeiciüa, xequeteneuyehüviri  
masi que mü'ane müxeta'ivaviya,  
<sup>16</sup>xe'iyari 'aixüa 'anecacu  
caxetate'acacu. Müpaü que  
memütexeniuquima, mücü  
hepaüsita mepüyuteteviyani müme  
memüxeniuquima que xemüteyurie  
'aixüa 'anemecü, Cürisitusie  
xeteviyatü que xemüyüa. <sup>17</sup>'Aixüa  
caniyümücü xüca xete'ucacucineni  
'aixüa xemüteyuriecü, xücate  
müpaü tinaqueni Cacaüyari, peru  
'axa xemüteyuriecü pücatixaü.

<sup>18</sup>Cürisitutütü xei mieme  
xeiciüa caniumüni tita teüteri  
'axa memüteyurie hepaüsita.  
Que mü'ane heiseriemecü  
yamüticamiecai, mücü caniumüni  
tame heiseriemecü yatemücatecahu  
tahesie mieme, mütasi'aye'atüanicü  
Cacaüyarisüa. Que mütitevitücai,  
caniumierieni. Yu'iyari que  
mürexeyiacai, panutanierittiarie.  
<sup>19</sup>Müpaü 'anetü 'asita caneyani,  
püvarutaxatüa 'iyarite  
memanutaxüriyacai. <sup>20</sup>Müme  
meripai mepüca'yuvaüriyacai  
yamemütecahunicü quepaucua  
Cacaüyari müta'icuevacai  
tiuca'enivatü 'ana Nuhexi  
'amuyeicacaisie, mexi naviya  
veviecai. Mücüsie meyetetü  
yayupaümetü 'atahaicatü  
meputavicuei memutihausie.  
<sup>21</sup>Mücü 'inüari canayani, 'üyarica



cani'inüaritüni. 'Üyaricacü xevaiyari xepücahaxina que müticuiema, mücücü masi xe'iyari caxetate'acacu xepüyuhütüa Cacaüyari xe'eniecacu. Müpäü xepüteyuvicueisitüa hicü, Quesusi Cürisitu manucuquecü. <sup>22</sup>Mücü Cacaüyari serieta 'apuve muyuavisiepai heyaca. Niuqui tuayamete heiserie hexeyamete türücariya hexeyamete yunaitü yamepütecahu que maine.

'Aixüa xequetenaye'atüa que xemüte'uhürütüarie Cacaüyari 'imiquierieya hepäüsita

**4** 'Ayumieme, Cürisitu yuvaiyarisie que mütiucuinixü tahesie mieme, xemeta xequeneyuha'arütüaca que xemüteyucuinicü, hepäüna xeteyumaitü. Tamüsü que mü'ane yuvaiyarisie mütiucuinixü catiniuhayeva 'axa tiyurienetü. <sup>2</sup>'Ayumieme mexi yuvaiyarisie 'uyeica cuxi, tiucahive'erietü pücaýüaneneni, teüteri que memüte'ucahive'erie, Cacaüyari que mütinaque püta yatiniyurienemücü. <sup>3</sup>Senecatü tucari manuyetüasie tucari xepühücai yaxemüteyurienicü que mütivanaque nuivarite. 'Axecaniu'uvacaitüni xerucuyatüvetü, xete'ucahive'erietü xetarüvetü xe'ixüaratüvetü xecu'ietüvetü tetexi xevarayexeyatü que mücatitauniva. <sup>4</sup>Müpäü xemücateyuriecü hicü mecanihüxiyaca, xeme vahamatü xemüca'utananausacü vahepäü xeyutatuatü xemütümaiyyarienicü. 'Axa metenicuxatani.

<sup>5</sup>Caneuyevacamücü müme niuqui memütaniunicü yuhesie mieme quepaucua müvata'ivaviya que mü'ane 'amuve ha'arisietü müvata'ivaviyacü memayeyuyuri müquite yunaitü. <sup>6</sup>'Ayumieme teüteri memucui mecaniutaxatüarieni hepäüsitana niuqui 'aixüa manuyü necü, memüta'ivaviyarienicü yuvaiyarisie teüteri que memü'itüariva, yu'iyarisie püta memayeyuyurinicü Cacaüyari que mürayeyuri.

<sup>7</sup>Mücü meta, canaye'aniri naitü mütiparecü. 'Ayumieme xetemaivavetü xequeneyüaca. 'Aixüa xequeneyumateni xemüyuneneviecacü. <sup>8</sup>Sepa naimecü, xequeneyunaqui'erieca yuheymecü. Tiyucanaqui'eriecacu canayeitüarivani vaüca 'axa mütiuyuri. <sup>9</sup>Yuquita xequeneyunaqui'erieca niuqui xecaxüatüatü. <sup>10</sup>Cacaüyari que mütixepitüa yuxexuime, müpäü xequeteneyuparevieca. Que xemüte'uhürütüarie Cacaüyari 'imiquierieya hepäüsita mümüire hepäüsita, müpäü 'aixüa xequetene'uximayaca. <sup>11</sup>Xüca niucametüni, Cacaüyarisie mieme 'utaniütü queticuxatani. Xüca tiparevivametüni, müpäü quetivaparevieca Cacaüyari que mütitürücariya. Müpäü xeteyuriecacu, Quesusi Cürisitu yatixepitüacacu, Cacaüyari visi catinicuxaxasivamücü naimecü. Mücü visi queticühüavarüvani, türücariya quepitüarieca yuheymecü. 'Icü niuqui caniseiyeni.

Cürisitusie tiviyatü que mütiyurieni tiucacucuinetü

<sup>12</sup>Nenaqui'erima, xepücahüxiyaca xeta'inüasietüvetü sepa

taicü. Xe'iyarixitüariename  
xepücayuerieca müpaü  
xemü'itüarieximecü. <sup>13</sup>Masisü  
que xemüteyuxevi Cürisitumatü,  
xete'ucacucuetü 'iya  
mütiucuinixüpaü, mücücü  
xequeneyutemamavieca. Mücü  
meta, xüca müpaü 'aneni, cui  
xecaniyutemamaviecacuni  
quepaucua masiücütü  
mayani visi 'anetü.

<sup>14</sup>Xüca 'axa xete'utahüavarieni  
Cürisitusüa xemümiemetecü,  
xequeneyutemamavieca, müpaü  
xetemaitü, 'Iyari visi mü'ane  
xehesie pütiviya, Cacaüyari  
'Iyarieya hücütütü. Vahesüa 'axa  
püticuxaxasiva, xehesüa 'aixüa  
püticuxaxasiva püta. <sup>15</sup>'Aixüa  
pücayüni xüca xevitü xeme  
tiucacucuiñeni mütiyumemivacü  
mütinavayacü 'axa mütiyuriñecü  
maniuecü. <sup>16</sup>Masi xüca  
tiucacucuiñeni Cürisitusie  
mütiviya, pücayuteviyani.  
Cürisitusüa miemetütü müpaü  
que'itüarieni masi, Cacaüyari 'aixüa  
müticuxaxasivanicü.

<sup>17</sup>Tucari naye'ani 'ivaurica  
müsütüariñicü, Cacaüyari quie  
quiecatari meri temüta'inüasiñicü.  
Xüca tahesie sutüarieni meri  
'ivaurica, quesü me'u'itüarieni  
müme memücayuväriya  
yamemütecahunicü niuqui que  
maine Cacaüyari hepaüsita 'aixüa  
manuyüne.

<sup>18</sup>Müme heiseriemecü  
yamemütecahu  
Xüca haveri mieme xEICÜA  
me'utavicueisitüarieni,  
Haquevari müme Cacaüyari  
memüca'ayexeiya,

Haquevari müme 'axa  
memüteyurie.

<sup>19</sup>'Ayumieme müme  
memüte'ucacucuiñe müpaü  
mütinaquecü Cacaüyari, müme  
caneuyeveca 'aixüa meteyurietü  
memüyuyetuanicü, que mü'ane  
müvarunetüa müva'üviyanicü  
va'iyari. Mücü yacatinicamiñeni que  
maine.

**Cacaüyari muxasimama  
xequeniva'üviyani**

**5** 'Ayumieme 'ipaü  
nepütivatucaniquayu  
xe'uquiyarima. Neta xehepaü  
necani'uquirasitüni, necaniuniere  
Cürisitu tiucuiñecu, neta  
neheixeiyañe necanayani  
tita 'umüramie visi 'anetü que  
temütexeisitüarieni, 'ayumieme  
nepaine. <sup>2</sup>Cacaüyari muxasimama  
xehesie memüte'unaquixü  
xequeniva'üviyani. Väüriyarica  
xecayüatü, xe'iyari ya'anecacu  
püta xequeniva'üviyani  
que mütinaque Cacaüyari.  
Tumini xehive'erietü xEICÜA  
xepücayüaca xeteyucuanatü,  
yaxequeteneyuväriyani püta.  
<sup>3</sup>Xevamarivecatüatü müme xehesie  
memütinaque xepücayüaca, masi  
'inüari xequenayuyeitüaca muxasi  
vahesie mieme. <sup>4</sup>Quepaucua  
muxasi vahüvemete va'uquiyari  
xeiyariñe mayani, muma  
xecananutimaniyarieñeni mücayeive,  
visi xe'anenetü xepayeitüarieni.

<sup>5</sup>Xeme xemüheheca  
yaxeicüa, que memutiyañe  
'uquiravesixi yaxequetenecahuni.  
Xeca'ayu'eririyatü xequeneyüaca  
yunaime vahepaüsita naimecü.

Cacaüyari nivaraye'unieca  
 Müme memüte'ucaxani'erie,  
 'Aixüa pütiuca'iyari püta  
 Tixaütü memücatehüme vahesie  
 mieme.

<sup>6</sup>Ayumieme Cacaüyari  
 yütürücarıyacı xetuicacacu, tixaütü  
 xecatehümetütü xequenacüne,  
 mücü yemecü tixaü xetehümetüme  
 müxe'ayeitüanicü tucari

'aye'ayu. <sup>7</sup>Que xemüteyu'iyaritüa,  
 xequeteneyetuiri naime, mücü  
 xehepaüsita müyu'iyaritüacü.

<sup>8</sup>Xequeneyumateni  
 xequenayeneniereni. Xeneüquixivi  
 pücuycica maye mahivapaü  
 'icuvaunetü que mü'ane  
 mütacuanı Cauyumarietütü.

<sup>9</sup>Xequenaye'unieca,  
 xequeneyuseiriyani yuri xete'erietü,  
 müpaü xetemaitü, caneuveveca  
 yaxecüa memüte'ucacucuinenicü  
 yunaitü 'ivamarixi naisarie  
 cuiepa. <sup>10</sup>Mücü meta, Cacaüyari  
 naimecü 'aixüa catiniuca'iyarini.  
 Mücü canixe'uta'inieni  
 hepaüna visi xe'aneneme  
 müxe'ayeitüanicü yuheymecü  
 Cürisıtusie xeteviyacacu. Mücüri

yapaümexa xetecuineyu  
 canixemanesiquitüamücü,  
 canixeseiriyamücü,  
 canixetürücarıyamücü, xequitüa  
 mieme tesariya canitaquemücü.  
<sup>11</sup>Mücü türücarıya quepitüarieca  
 yuheymecü. 'Icü niuqui  
 caniseüyeni.

### Teütüarica

<sup>12</sup>Sirivanu ta'iva yamüticamie  
 que nemüticu'erıva nesipareviecacu,  
 yapaümecü 'ıpaü  
 netinixe'uta'ütüirieni nexetuicatü  
 netixehecüatütü quename yurıcü  
 'ıpaü 'aixüa tiuca'iyari Cacaüyari.  
 Mücü 'aixüa tiuca'iyaricacu xehesie  
 mieme xequeneti'uca.

<sup>13</sup>Müme Vavirunıyatari  
 memüyutıxexeürıva  
 xehepaü memanayexeıyarie  
 mecanixevaürıtüaca. Nenıve  
 Marıcuı meta canixevaürıtüaca.  
<sup>14</sup>Xeteyucanaquı'erıetü  
 xequeneuyuvaürıtüaca xeyunaquetü.

Yunaitü Cürisıtusie xemüteviya  
 xüca xepitüarieca yu'iyarisie  
 xemüca'uximatüarıecacı. Müpaü  
 xecüa canı'aneni.

# PECURU

## Meitanü'axüa Hutarieca Mieme Xapayari

---

### Vaürisica

**1** Ne Simuni Pecuru Quesusi Cürisitusie mieme necatini'uximayatametüni necaninü'aritüni. Necanixevaüiritüaca xeme xemupitüarie yuri xemüte'eriecacü tahepaü, tacacaüyari tasivicueisitüvame Quesusi Cürisitu que mütixepitüa heiseriemecü yamüticamiecü. <sup>2</sup>Cuini mieme xüca 'aixüa tiuca'iyarini xehesie mieme vaücavamecü, xüca xepitüaca yu'iyarisie xemüca'uximatüariecacü, que xemüte'imate Cacaüyari, Quesusi meta Tati'aitüvame.

### Hamatüana tepütataxevire que müti'ane Cacaüyaritütü

<sup>3</sup>Mücü Cacaüyaritütü mütürücaüyecü, pütasi'upitüa naime que müreyevese temayeyuyurinicü 'aixüa 'anemecü temüte'ayexeianicü. Müpaü tecateniupitüarieni temeitimanicü que mü'ane mütasita'ini visi 'anetü marivetü. <sup>4</sup>Müpaü mü'anecü 'iya pütasi'umi tita mütatiutahüavixü temeixeianicü

cuinie raye'arücame mariveme. Müpaü pütatiumi, mücücü hamatüana xemüyutaxevirecü que müti'ane Cacaüyaritütü, quepaucua xemütavicueni capa xeseviximariecacü, cuiiepa memütama que memüteyusevixima memüte'ucahive'eriecü. <sup>5</sup>Mücü 'ayumiemeyaricü yuri xete'erietü cuini mieme xequeneyumexütüaca 'aixüa xe'ananetü xemayuyeitüanicü. 'Aixüa xe'ananetü, tita müreyevese xetematetü xequenacünita. <sup>6</sup>Yaxetemaitü, xeseseüyetü xequenacünita yu'iyarisie que xemüteyu'aitüa. Xeseseüyetü que xemüteyu'aitüa yu'iyarisie, yaxeicüa xecayupatatü xequenacünita sepa 'axa xemü'ittiarie. Xecayupatatü, xete'ayexeyatü xequenacünita. <sup>7</sup>Xete'ayexeyatü, yu'ivama xevanaqui'erietü xequenacünita. Yu'ivama xevanaqui'erietü, yeme xeteyucanaqui'erietü xequenacünita. <sup>8</sup>Müpaü xüca xeteyurieca, cuini mieme xüca yaxeteyurieca, yacü xeicüa xete'uximayatü xepüca'ayeitüarieni, masi pütitixuavere püta que

xemüte'imate Tati'aitüvame Quesusi Cürisitu. <sup>9</sup>Que mü'ane müpaü müca'ane, mücü 'aura xeiçüa caniniereni, masi canacüpeni. Catinatümaiya que mütiu'itiya, tita meripai 'axa mütiuyuri mütiunavaiyari. <sup>10</sup>'Ayumieme ne'ivama masi vaüca xequeneyumexüütüaca xemitürücariyacü mücü 'uximayasica para münürecü que xemüte'uta'inierie que xemüte'anayexeyarie. Müpaü xüca xeteyurieca hasuacu xepücaheuyexürieni. <sup>11</sup>Müpaü xeteyurietü, yemecü masi xecanipitüariecacuni xemaye'axüanicü haque yuheyemecü müre'aíta Tati'aitüvame Tasivicueisitüvame Quesusi Cürisitu.

<sup>12</sup>'Ayumieme ne sepa müpaü xemütemate, 'icü hepaüsita neheyemecü necanixeha'eritüvamücü, sepa xemutürücariyari tita yuri müraine müxe'a'axixücü.

<sup>13</sup>Müpaü nepüticu'eriva, mexi 'icü vaisie neyecä püheiserie para nemüxe'anutahütüanicü müpaü xemüteha'erivanicü <sup>14</sup>müpaü netimaitü, cuitü nepenutihüna 'icü nevaiyari, que münetiuhecüasitüa Tati'aitüvame Quesusi Cürisitu.

<sup>15</sup>Nepünemexüütüa yuheyemecü xemüyüvavenicü müpaü xemüteha'erivanicü neyemieyu.

#### **Tepixei que mütimarive Cürisitu**

<sup>16</sup>'Üxasi cuamanarica mütaveviyasie, mücüsie tepücateviyacai tame quepaucua temütexe'utaxatüa, müpaü

te'utiuyatü que mütitürücaüye Tati'aitüvame Quesusi Cürisitu, que mütinuani meta. Masi tame temunenierixü tepühüme, temixeicü que mütimarive 'iya. <sup>17</sup>Quepaucua Cacaüyari müta'uquiyari ve'eme mixatacai, visi 'aneme quepaucua mayeitüa, quepaucua xevitü mutaniu visi 'anemesie marivemesie 'ayevetü müpaü 'utaitü hesiena mieme, 'Icü nenive canihücütüni münaqui'eriva, hepaüsitana nemünaqui'a, 'utaitü, <sup>18</sup>'ana tame teni'enieni 'utaniucacacu taheima, quepaucua hamatüana temu'uvacai yemurisie Cacaüyarisie mieme müpasiecaisie.

<sup>19</sup>Mücü meta, tita masi vaüca mütise'i tecanexeyianita texaxatamete vaniuquitüme. 'Aixüa xepütüyurie xüca xe'l'enieca. Macuyüvisie mühecüariviepaü cani'aneni. Xepi'enieca mexi cacatarive, tuxacüta mieme xurave mexi ca'atineve xe'iyarisie. <sup>20</sup>Yemecü peuyevese müpaü xemütemaicacü, texaxatamete vaniuqui naitü 'utüarica xapayarisie müre'uxa, tevi pücaüve yücümana mihecüatanicü. <sup>21</sup>Mücü niuqui quepaucua munua, tevi müpaü mütinaquecaicü xeiçüa hasuacu püca'atüarie. Masi pü'atüarie 'Iyari Mütiyupata vacuyütüvacacu teüteri memüpasiecai. Müme yametenicuxatacaitüni Cacaüyarisüa miemecü.

#### **Müme texaxatamete te'üquitamete memüuterüva peru memücahüme**

(Cura 4-13)

**2** Hipatü texaxatamete memüuterüvacai

peru memücahümetücai  
 meripai mepanucu'ui teüteri  
 vasata. Yaxeicüata hicü xeme  
 xesata hipatü te'üquitamete  
 mepüyuterüvani, peru mücü  
 mepücahümetünita. Niuqui  
 mecani'atüacuni 'avie cümana  
 teüteri memütatümaiarienicü  
 yücü manuyüecü. 'Asita  
 mepüyucu'imavani, müpaü  
 me'utiuyatü quename meca'limate  
 yucusiyari que mü'ane  
 müvaruxünaxü müvarunanai.  
 Yapaucua meyütümayatü  
 menayuyeitüacuni. <sup>2</sup>Yümüiretü  
 vahesie mecateniviyacuni vahepaü  
 memüyutatuanicü merucuyatüvetü  
 xeicüa. Müme vacümana, tita yuri  
 müraine huyeyari püseviximarieca  
 'axa ticuxaxasivacacu hepaüsitana.  
<sup>3</sup>Pinite metehive'erietü, yacü xeicüa  
 me'utiniütü xecümana mepüte'ivani.  
 Sepa meripai 'amemu'uva,  
 xüanacüa pücaüyane 'isücame  
 'arique müvatahüave, que mü'ane  
 müvaca'una pücacusu.  
<sup>4</sup>Camüsü, Cacaüyari  
 pücavaruhayevaxü 'asita niuqui  
 tuayamete taheima miemete  
 'axa memüte'uyuri. Masi  
 püvayetua tatacuri müvaxuavesie  
 memüta'üviyarienicü meucatevasie  
 müvatiyüvisie mexi cavatahüavive  
 'isücame. <sup>5</sup>Pücavaruhayevaxüta  
 cuiepa memütama meripai  
 miemete, masi pita'üviyaxü  
 Nuhexi 'atahutame vahamame.  
 Mücü pütixaxatametücai  
 mütivacuxaxatüvacai heiseriemecü  
 yamemütecahunicü. Pita'üviyaxü  
 Cacaüyari, peru püvarutihausitüa  
 cuiepa memütama Cacaüyari  
 memüca'ayexeiyacü. <sup>6</sup>Mücü

meta, tatacuri nivarupitüani  
 memüca'unarienicü Surumasie  
 Cumuxasie quiecatari, naxi  
 nayeitüani vaquiecarite.  
 'Inüari nivarayeitüani, müme  
 'arique 'amemu'uvaniquecai  
 Cacaüyari meca'ayexeiyatü  
 memüvara'erivanicü que  
 memüte'anayecü. <sup>7</sup>Siepüre tevi  
 heiseriemecü yamüticamiecai  
 niutavicueisitüani Ruti  
 titevacame. Mücü cuinie  
 tiniuti'uxitüarivacaitüni, 'inüari  
 sanamete que memüte'u'uvacai  
 merucuyatüvetü. <sup>8</sup>Mücü  
 heiseriemecü yacatinicamiecaitüni,  
 peru que mütinierecai que  
 müti'enacai mexi vasata  
 'ayecatei, tucaricü yu'iyarisie  
 pü'uximatüariecai vaxeiyatü  
 que memüteyuriecai 'inüari  
 memüsanacacü. <sup>9</sup>Caniyüveni  
 Ti'aitame müvatavicueisitüanicü  
 müme Cacaüyari memayexeiya  
 quepaucua memüta'inüasie.  
 Püyüveta müme heiseriemecü  
 yamemücatecahu müvata'üviyacı  
 va'uximatüiatü, 'isücame 'arique  
 müvata'ivaviyacı.  
<sup>10</sup>Müme masi püvaquema,  
 müme 'amemu'uva yuva'yarisie  
 meteviyatü, mete'ucahive'erietü  
 memüseviximarienicü,  
 me'ixani'erietü que mü'ane  
 ti'aitame mühücü. Mümeri  
 mepüca'yucuerivayurie,  
 masi yuhesie mieme xeicüa  
 mepüyutatua. Mepücamama sepa  
 memüvasevixima mamarivavemete  
 'axa me'utiuyatü. <sup>11</sup>Taheima  
 miemete niuqui tuayamete  
 sepa masi cuini mieme  
 memümamarivave meyüvavetü

metürücvitü, peru müme  
mepücavasevixima quepaucua  
yamemutiyua, mevaxanetatü müya  
memü'anene Ti'aitame hüxie.

<sup>12</sup>Müme tatevama  
memücate'u'iyari vahepaü  
me'ananetü, yücümana xeicüa  
mepüte'u'iyari, mepütinunuiva  
memütiviyarienicü  
memücüi'ivacü xeicüa, müme  
'axa me'utiyuatü mepisevixima  
tita 'asimemücatemate hepaüsita.  
Mericüte, tatevama vahepaü  
mepütatümaiarieni müme. <sup>13</sup>Axa  
me'itüarietü yamepütepiniyarieni  
'axa memüvaruyuricü hipame.  
Naqui'eriya mepü'erie hecüta  
merucuyatüvetü müme.  
Mepüyusevixima mepüyuyüriya  
sepa xehamatü memütecua'a xeicüa,  
memünaqui'acü metel'irümatüvetü.

<sup>14</sup>Yühüxicü 'ucaravesixi  
memüvacuvautüvenicü püvanaque  
xeicüa memüvacumaivanicü sepa  
hipame va'ütama. Mepücatehayeva  
metecuvautüvetü 'axa que  
memüteyurienicü. Mepüteva'irüviya  
mepüvaviya müme va'iyari  
mücasese'i. Müme masi  
yu'iyarisie mepü'iyamate hipame  
vapinite memütehive'eriecacü.  
Vahesie pütinaque 'axa  
memütetahüavarienicü para  
'axa memü'itüarienicü. <sup>15</sup>Huye  
me'ucu'eirieca müxeuräuye,  
meneuyexürieni. Varami Vehuri  
nu'aya huyetana meniuyune  
masi. Mücü pihive'eriecai  
tita müti'ivaniquecai sepa  
mücaheiseriecai, <sup>16</sup>peru  
niutatierieni 'inüari mütisanacaicü.  
Puxuri sepa memücaniuvave  
tevi niuquieyacü tiuniütü

puxu caninena tixaxatame que  
mütüyurienecai cayumaitü.

<sup>17</sup>Mümetütü haixapaü  
mecani'aneneni peru  
memayeavaquai. 'Aüxipaü  
mecani'aneneni teücacü  
mü'equetücapaü. Yüriya cui müyüvi  
vahesie mieme cani'üviyariecamücü.

<sup>18</sup>Marivemecü que memütecuxata  
peru yacü xeicüa me'utiyuatü,  
mepüteva'irüviya mepüvaviya  
müme haveri mieme memutavicuei,  
teüteri memeyexürie vahepaü  
'amemu'uvacai. Mepüteva'irüviya  
mevahive'ericasitüatü, teüteri  
yuvaiyarisie meteviyatü que  
memüte'ucahive'erie, para  
memürucuyatüvenicü xeicüa.

<sup>19</sup>Müpaü mepütevacuxaxatüva  
quename vaniu meyüvaveni  
memüyunü'acacü yücümana  
me'utiyuatü, peru mümetütü  
müya memutiyua masi yemecü  
vaüriyarica mepüte'uximaya tita  
mütüpünisie miemecü. Tita  
müre'liva tevi, mücüsie mieme  
vaüriyarica catini'uximayacamücü.

<sup>20</sup>Müme memutavicuei  
mepüte'uhayevaxü que  
memüteyusevixima cuiepa  
memütama, memeitimacü  
Ti'aitame Tiyuvicueisitüvame  
Quesusi Cürisitu, peru müme  
xüca me'a'ivarieni tavari  
me'uviniyarietü meripaipaü,  
'imatürieca masi yemecü 'axa  
me'itüarietüvetü menacünicuni,  
memüca'itüarietüvecaipaü  
matüaripaü.

<sup>21</sup>Masi 'aixüa püyüniqueyu  
xüca mecaheitimanique  
huye que mü'anesie 'uyeicatü  
heiseriemecü yamüticamienicü,

peru 'aixüa püca'yüni'queyu  
 xüca me'ucunuaxüanique  
 meheitimaime, me'icu'eirieme  
 'aisica memüetuiriyari müpasie  
 Cacaüyarisie mieme. <sup>22</sup>Müpaü  
 meniuyüni, mücü xasica que  
 maine, Sücü pucunua yuhayari  
 müticuanicü. Mücü meta,  
 'Uca'üyarieca tuixu niucunuani  
 hutarieca müyutahaxumanicü. Yuri  
 paine xasica.

**Tucari paye'ani quepaucua  
 Ti'aitame munuani**

**3** Hicüri nenaqui'erima 'icü  
 pühücü hutarieca mieme xapa  
 nemutavevie nemüxe'uta'utüirie.  
 'Icüsie mieme 'iyasie mieme  
 yanepütix'e'utaxatüa tita  
 xemüteha'eriva, nex'e'anutahütüatü  
 nex'e'iyaritüatü xe'iyari  
 müyuxevicü <sup>2</sup>xeme'erivanicü  
 que memutiyuanecai  
 texaxatamete Cacaüyarisie mieme  
 memüpasiecai, yacatiyüvecacu  
 cuxi, xeme'erivanicüta Ti'aitame  
 tiyuvicueisitüvame que müti'aitacai  
 müme memenü'arie xehesüa que  
 memütexecuxaxatüvacai.

<sup>3</sup>Yemecü peuyevese  
 müpaü xemütemaicacü,  
 tucari taparirümecacu  
 teyunanaïmavamete  
 mecanitixuavericuni.  
 'Ameniu'uvacuni que  
 memüte'ucahive'erie xeicüa  
<sup>4</sup>müpaü me'utiyuatü, Haquevasü  
 püca'aye'ave cuxi mücü que mutayü  
 quename nuani. Ta'uquiyarima  
 memeucusixüapai hicüque, naitü  
 yaxeicüa 'anetü 'acanitamaca que  
 müti'anecai sutüapai quepaucua  
 munetüarie, me'utiyuatü. <sup>5</sup>Müpaü

me'utiyuatü, mepüyuväüriya müpaü  
 memütehatümaiycü, Cacaüyari  
 ya'utayücu muyuavi matüaripai  
 'apuyemacai, cuie meta hapa pune,  
 putaveviya hacü. <sup>6</sup>Mücücüta 'ana  
 miemete cuiepa memütamacai  
 mecaniutatümaiarieni ha  
 'utahünecu. <sup>7</sup>Mücü müpaü  
 mutayücüta, hicü mieme muyuavi  
 cuie ni'üviyarieca mütataiyarienicü,  
 tucari 'aye'ayu quepaucua  
 teüteri memücaheyexeiya  
 Cacaüyari memüta'ivaviarieni  
 memütatümaiarieni.

<sup>8</sup>Müpaü xeicüa  
 xepücatehetütümaiyani xeme  
 nenaqui'erima, Ti'aitame que  
 mütixeiya, xei tucari xei miriyari  
 viyaripaü cani'aneni, xei miriyari  
 viyari meta xei tucaripaü pü'ane.  
<sup>9</sup>Ti'aitame 'ereutevitü püca'yüane  
 yuniuqui hepaüsita que mutayü  
 quename müpaü tiyurieni, sepa  
 hipatü caheye'atüaveme memü'erie.  
 Masi püca'väüripie 'emüreuterecü  
 xecuevietü xeme. Püca'yuväüriya  
 teüteri memütatümaiarienicü  
 ni xevitü, masi püyuväüriya  
 yunaitü memaye'axüanicü  
 para memütehayevanicü que  
 memütayuriecäi.

<sup>10</sup>Peru tucari canaye'amücü  
 quepaucua Ti'aitame munuani,  
 tinavayame mü'axepaü yüvicüta.  
 'Ana muyuavi canitayeimücü carima  
 'utayuanecacu, titacü mütiutiveviva  
 naitü canicumaveriyariemücü taicü.  
 Cuie, tita meta cuiepa memütama  
 memüte'utivevie, naitü masiücütü  
 catinayeimücü.

<sup>11</sup>Mericüte, naitü müpaü xüca  
 tiicumaveriyarieni, quepaü  
 reuyevese que xemü'anenenicü



xeme, naimecū xepasietū  
 Cacaūyarisie mieme que  
 xemūte'u'uva, xeheyexeyatū,  
<sup>12</sup>xe'icuevietū mūcū tucari,  
 xe'imexūitūatū cuitūva  
 maye'anicū para Cacaūyari  
 munuanicū. 'Anasū muyuavi  
 tana'iyarieme pūtaxūsitūarieni,  
 titacū mūtiutiveviva naitū  
 canitavesitūarimūcū taicū. <sup>13</sup>Mūcū  
 meta, tame tecanicuevieca  
 muyuavi mūhecua cuie mūhecua,  
 mūcū que mūtatiutahūavixū.  
 Mana quiecatari heiseriemecū  
 yamecateniyuriecacuni.

<sup>14</sup>Ayumieme nenaqui'erima,  
 xemicueviecū mūya 'aneme,  
 xequeneyumexūitūaca mūcū  
 xeta'ivaviyame mūxexeyacū  
 xecaseviximariyecame  
 xecayūyūvime 'aixūa  
 xeteyuxeiyacame pūta.  
<sup>15</sup>Tati'aitūvame que mūreuterive  
 tiuca'enivatū, tucari xehūme  
 xequeneyu'erieca para  
 xemūtavicueisitūarienicū. Ta'iva  
 Papuru teminaqui'eri yaxaicūa

'utaitū catinixe'uti'utūirieni, que  
 mūtipitūarie mūpaū mūtimaivenicū.

<sup>16</sup>Naime xapasie yaxaicūa paine  
 'icū xatatū. Xapateyasie niuqui  
 canixuaveni mūcuanive. Mūme  
 'asimemūcateyū'ūquitūavave  
 memūcaseseūye meneitatunani  
 niuquieya, yaxaicūa que  
 memūte'ituna 'utūarica hipame.  
 Peru mūpaū meteyurietū yūcūmana  
 mepūyutatūmaiya xaicūa.

<sup>17</sup>Mericsū nenaqui'erima,  
 mūpaū xepūtemate  
 yacatiyūvecacu cuxi. 'Ayumieme  
 xequeneyucuerivayuriecaca  
 xecaseseūyetū xe'acūnecū, 'inūari  
 sanamete metexe'irūviyacacu  
 que memūteheuyexūrie mūme.  
<sup>18</sup>Masisū xequenevevereni  
 vaūcava masi 'aixūa xete'u'iyaritū  
 xemacūnirūmenicū, xe'imatetū  
 xemacūnirūmenicū Tati'aitūvame  
 Tasivicueisitūvame Quesusi Cūrisitu.  
 Mūcū ve'lemecū quecuxaxasivani  
 hicū, tucari mūcaxūve mexi  
 ca'aye'ave. Mūpaū xaicūa  
 cani'aneni.

# VANI

## Meitanü'axüa Mexüacame Xapayari

---

### Niuqui tucari tiyupitüvame hepaüsita

**1** Tita matüaripai mütimieme, tita temüte'u'enie, tita temüte'uxei tahüxicü, tita temütexeyacai, tita tamamacü temüte'umayüa, mücü tecanixecuxaxatüvani niuqui tucari tiyupitüvame hepaüsita. <sup>2</sup>Tucari masiücütü nayani. Tame tecanixeyia, tecanihecüatani, tetenixe'utaxatüani mücü tucari mücaxüve hepaüsita. Mücü yu'uquiyari caniteütacaitüni, tepuxeisitüarie tame. <sup>3</sup>Tita temüte'uxei, tita temüte'u'enie, mücü tecanixecuxaxatüvani xemeta tanaitü temütaxevinicü. Que temütetaxevi tame, ta'uquiyarimatü tepütaxevi nu'ayamatüta Qesusi Cürisitumatü tepütaxevi. <sup>4</sup>Ipaü tecateniu'ütüani xemaye'axüanicü xeyutemamavietü.

### Cacaüyari hecüariyapaü cani'aneni

<sup>5</sup>Ipaü panuyüne niuqui hesüana mümieme temi'enie temüxecuxaxatüva. Cacaüyari hecüariyapaü cani'aneni, yüriya

pumave hesiena haquevasü. <sup>6</sup>Xüca yate'utiyuani quename hamatüana tetaxevi, yüvipa xüca te'u'uvani, tepüte'itava, yuri yatepücatecahu. <sup>7</sup>Masisü hecüaripa xüca te'u'uvani 'iya hecüaripa macavepaü, tanaitü tecanitaxevicacuni. Mücü meta, Qesusi Cacaüyari münü'aya xuriyaya naime 'axa temüteyurie catani'itirieca.

<sup>8</sup>Xüca yate'utiyuani quename tita 'axa müti'ane tecatehexeyia, tacümana tepeutayexürüva, tita yuri müraine tahesie pumave. <sup>9</sup>Me xüca te'itahecüata tita 'axa temüte'uyuri, 'iya que maine yapüticamie, que mütiheiserie yapütiyuriene, tita 'axa temüte'uyuri pütareuyehüvirieni, catani'itirieca naime mücatiheiserie. <sup>10</sup>Xüca yate'utiyuani quename 'axa tecateyurievave, mücü ti'itavame tenayeitüvani, niuquieya tahesie pumave.

### Cürisitu tahesie mieme pütaniuni

**2** Nenivema 'icü nepüxe'utüirrie 'axa xemücateyuriecacü. Me xüca 'axa tiuyurieni xevitü, tame tepeixeyia que mü'ane tahesie

mieme mütaniuni yu'uquiyari hūxie, Quesusi Cürisitu hūcütütü que mütiheiserie yamütiyuriene. <sup>2</sup>Iya canihücütüni que mü'ane 'aixüa mütiuyuri 'aixüa temütexeyariecacü tame 'axa temüteyurie. Tita tame temüteyuriecü xEICÜa püca'uyü, masi yunaitü cuiEpa memütama vahesie mieme puyü.

<sup>3</sup>Xüca yatetecahuni que müti'aita, müpaü tecatenimaica temeitima. <sup>4</sup>Que mü'ane ne nemeitima maine, yacaticamietü que müti'aita, mücü tini'itavani, tita yuri müraine hesiena pumave. <sup>5</sup>Que mü'ane yamüticamie 'iya niuquieyasie, yuricü mücü naye'ani tiyucanaqui'erietü Cacaüyaripai. 'Ipaü tecatenimaica hesiena temüteviya. <sup>6</sup>Que mü'ane hesiena tiviyatü 'emuyeica maine, caneuyeveca hepaüna müyüaneni 'iya müyüanecaipaiü.

### 'Aisica hecuame

<sup>7</sup>Nenaqui'erima, hecuamecü netixe'aitüatü nepücatixe'utüiri. 'Aisica meripai canimiemetüni püta matüaripai xemeixeiya. 'Icü 'aisica meripai mümieme, niuqui canihücütüni matüaripai xemei'enie. <sup>8</sup>Mesüte hecuamecü netixe'aitüatü netinixe'utüirica, tita yuri müraine 'iya hepaüsita xehepaüsitata, yüriya macuyeiximecü, tita yuricü mütihecüariya mühecüariyacüri.

<sup>9</sup>Que mü'ane hecüaripa muyeica maine, yu'iva mu'uxie, mücü yüvipa cuxi caniuyeicani. <sup>10</sup>Que mü'ane yu'iva münaqui'erie hecüaripa caniuveni,

pücatiquetamüre yücümana.

<sup>11</sup>Que mü'ane yu'iva mu'uxie yüvipa caniuveni, yüvipa tiuyeica, 'asipücatimate que mütimie yüriya mecüpiriyacü.

<sup>12</sup>Nenivema nepütixe'utüiric tita 'axa xemüte'uyuri xemüteuyehüviyariecü 'iyasüa xemümiemetecü. <sup>13</sup>Xeme xemüva'uquiyarima nepütixe'utüiric xemeitimacü 'iya matüaripai 'amuyeica. 'Uquisi nepütixe'utüiric xeme'ivaxücü 'iya 'axa mütiyuriene.

Türi nepütixe'uta'utüiri yu'uquiyari xemetimacü. <sup>14</sup>Xeme xemüva'uquiyarima nepütixe'uta'utüiri xemeitimacü 'iya matüaripai 'amuyeica. 'Uquisi nepütixe'uta'utüiri xemütürüvacücü, Cacaüyariniuquieya xehesie mütiyiyacü, 'iya 'axa mütiyuriene xema'ivaxücü.

<sup>15</sup>Tita cuiEpa mütimieme xepücatenaqui'erieca. Quepaümetü cuiEpa mütiXuave xepücatenaqui'erieca. Tita cuiEpa mütimieme xüca tinaqui'erieca, haquevasü yu'uquiyari pücanaqui'erie. <sup>16</sup>Tamüsü naitü cuiEpa mütiXuave, tevitütü tita mütihive'erie, tita yühüxicü mütihive'erie, yacü xEICÜa que mütiyucatave'erie yupini hepaüsita, mücü ta'uquiyarisüa pücatimieme, mücü cuiEpa pütimieme püta. <sup>17</sup>'Icü cuiE canacuyeiximeni. Tita cuiEpa memütama memütehive'eri canacuyeiximenita. Masi que mü'ane yamüticamie que mütiNaque Cacaüyarini, mücü caniyuhayevani yuheyemecü.

### Que mü'ane Cürisitu maye'unie

<sup>18</sup>Neuxei türi, hicü tucari canaye'aniri quepaucua mütapare.

Que xemüte'enanacai quename xevitü 'uhamie Cürisitu 'aye'unietü, hicütütüri yumüiretü Cürisitu memaye'unie mecanixuaveni.

'Ayumieme tepütemate tucari maye'a quepaucua mütapare.

<sup>19</sup>Tasata mepayecü, masiri tahesüa mepücamiemetetücai. Xüca tahesüa memiemetetücaitünique, tahamatü mepuyuhayevaquyu. Mecanayecünesüari memümasiücünicü tahesüa memücamiemetecü.

<sup>20</sup>Mücü müpasie heiserie canixe'upitüani, yunaitü xepütemate. <sup>21</sup>Nepücatixe'uti'utüiri tita yuri müraine xemücamatecü, tita yuri müraine xemümatecü püta nepütixex'uti'utüiri, naitü 'itarica yurisie müca'ayeneica xemütematecü.

<sup>22</sup>Quepai pütü'itava. Que mü'ane müyuheciata müpäü 'utaitü quename Quesusi heiserie cahexeiya Cürisitutütü, mücüri catini'itavani. Que mü'ane müyuheciata 'uquiyarieya cahexeyatü ni nu'ayata, mücü Cürisitu maye'unie canihücütüni. <sup>23</sup>Yunaitü nu'aya mecahexeyatü memüyuheciata, 'uquiyarieyata mepücahexeiya. Que mü'ane 'iya nu'aya hexeyatü muyuheciata, mücü 'uquiyarieyata canexeyani.

<sup>24</sup>Xeme tita xemüte'enie matüaripai, xehesie tiviyatü queyuhayevani. Xüca xehesie tiviyatü yuhayevani tita matüaripai xemüte'enie, xemerita nu'ayaside 'uquiyarieyasieta xeteviyatü xecaniyuhayevacuni. <sup>25</sup>Tucari mücaxüve canihücütüni tita 'iya mütatiutahüavixü temeixeianicü.

<sup>26</sup>'Icü 'ipaü nepütixex'uti'utüiri memüxeheuyexürüva vahepaüsita.

<sup>27</sup>Xemeri heiserie que mütixex'upitüa 'iya, mücü heiserie xemexeiya xehesie tiviyatü caniyuhayeva. Tixaü xeime xepücaheuyehüva mütixex'üquitüanicü. Mücü heiserie xemupitüarie 'iyasüa mieme mütixex'üquitüapaü naime hepaüsita, yuri mainepaü, mücati'itavapaü, mütixex'uti'üquitüapaü, müpäü hesiena xeteviyatü xequeneyuhayeva.

<sup>28</sup>Hicüsüari nenivema hesiena xeteviyatü xequeneyuhayeva. Xüca müpäü xeteyurica, quepaucua masiücütü mayani 'iya, 'aixüa tepütetamaica tecatateteviyatü huxiena quepaucua munuani. <sup>29</sup>Xüca xetemaica 'iya yamütiyurienne que mütiheiserie, xequetenemaica yunaitü yamemüteyurie que mütiheiserie hesiena memüyecü.

### Cacaüyari nivemama

**3** Neuxei ta'uquiyari que tatinaqui'erie. Mücücü Cacaüyari nivemama teputaterüvari, nivemama tepühüme. 'Ayumieme cuiepa memütama mepücatasimate memücaheitimavavecaicü 'iya. <sup>2</sup>Nenaqui'erima hicütütüri Cacaüyari tecaninivemamatüni. Tixaü cuxi pücamasiücü que temü'aneneni. Müpäü tepütemate, quepaucua masiücütü mayani Cürisitu, mücü que mü'ane, hepaüna tepü'aneneni, te'ixeyatü mücü que mü'ane. <sup>3</sup>Yunaitü 'ipaü memüte'icuevi mepuyu'itie yücümana 'iya que müti'itipapaü.

<sup>4</sup>Yunaitü 'axa memüteyurie 'aisica menitisanani. Tita 'axa müti'ane

'aisica saname canihücütüni. <sup>5</sup>Xeme müpaü xepütemate 'iya masiücütü matüacü mütasinavairienicü tita 'axa temüteyurie. Tita 'axa müti'ane pumave hesiena.

<sup>6</sup>Yunaitü hesiena memüteviya 'axa mepücateyurie. Yunaitü 'axa memüteyurie mepüca'ixeiayavave mepücaheitimaivave.

<sup>7</sup>Nenivema xüca tüma xevitü caxeheyexürerienique. Que mü'ane yamütiyuriene que mütiheiserie, mücü heiserie canexeiya 'iya heiserie mexeiypaü. <sup>8</sup>Que mü'ane 'axa mütiyuriene Cauyumariesüa canimiemetüni, Cauyumarie 'axa mütiyuriencü matüaripai. Cacaüyari nu'aya 'ayumieme masiücütü nayani mita'unacü Cauyumarie tita mütiyuriene.

<sup>9</sup>Yunaitü Cacaüyarisie memüyecü 'axa mepücateyurie 'iya 'imüarieya vahesie müyuhayevacü. 'Axa memüteyuriene mepüca'yivave Cacaüyarisie memüyecü.

<sup>10</sup>Ipaü mepütemasücü Cacaüyari nivemama Cauyumarie nivemama. Yunaitü yamemücateyurie que mütiheiserie, que mü'ane yu'iva mücanaqui'erieta, mücü Cacaüyarisüa mepücamiemete.

#### **Xequeneyunaqui'erieca yunaitü**

<sup>11</sup>Müpaü canaineni niuqui matüaripai xemi'enie. Tanaitü tepütanaqui'erieca paine. <sup>12</sup>Cainipaü tepüca'yüaca. 'Iya 'axa mütiyurienesüa canimiemetücaütüni, yumuta caniumieni. Titayari timi. Tita mütiyuriencal 'axa müti'anecaicü, mutaya tita mütiyuriencal müheiseriecaicü.

<sup>13</sup>Ne'ivama xepücahüxiyaca xüca cuiepa memütama mexe'uxieca. <sup>14</sup>Tame ta'ivamarixi temüvanaqui'eriecü 'ayumieme tepütemate temütapataxü tecamüquitetütüri te'ayeyuyuritü püta. Que mü'ane mücatiyucanaqui'erie müquitü 'apuyeica cuxi. <sup>15</sup>Yunaitü yu'ivama memüva'uxie teyumemivamete mecanihümetüni. Xeme xepütemate tiyumemivame yücümana tucari mücaxüve pücahexeiya. <sup>16</sup>Icücü tepeitama naqui'eriya, 'iya tahesie mieme yutucari müyetuacü. Caneuyeveca tameta ta'ivama vahesie mieme tatucari temüyetuani. <sup>17</sup>Que mü'ane yupini cuiepa timieme mürexeyya, mixeiyayü'iva reuyehüacame, xüca yu'yari 'anunaca hepaüsitana, queri tinaqui'erieca Cacaüyari. <sup>18</sup>Neuxei nenivema tepücatanaqui'erieca niuquicü xeicüa yacü xeicüa. Que temüteyurie püta yuricü püta tepütanaqui'erieca.

#### **'Aixüa tepütemaica Cacaüyari hüxie**

<sup>19</sup>Müpaü tetenimaicacuni tita yuri mürainesie temümiemetecü. Cacaüyari hüxie müpaü ta'yari tepütenütüaca <sup>20</sup>xüca ta'yari tasi'utatieni. Tita ta'yari mücatimate Cacaüyari püta catinimaica, naime pütimate. <sup>21</sup>Nenaqui'erima ta'yari xüca catasi'utatieni 'aixüa tepütemaica Cacaüyari hüxie, <sup>22</sup>naime temitavaviricü tepütanaqui'eri yatemütecahucü que müti'aita, tita mütinaque yatemüteyuriencü. <sup>23</sup>Ipaü catini'aitani, yuri temüteta'erienicü que mü'ane Cacaüyari nu'aya

mühücüsie Qesusi Cürisitusie, temütanaqui'eriecacü tanaitü mücü que mütatiu'aitüa. <sup>24</sup>Que mü'ane yamüticamie que müti'aita, Cacaüyarisie tiviyatü puyuhayeva, Cacaüyarita hesiena tiviyatü tiyuhayeva. 'Ipaü tecatenimaica tahesie tiviyatü muyuhayeva, yu'iyari mütasi'umicü.

**'Iyari yuri maine, 'iyari meuyuyehüpa**

**4** Nenaqui'erima yunaime 'iyarite yuri xepücateva'erierieca. Xequeteneuta'iniüataxüa 'iyarite masi, siparasü xüca Cacaüyarisüa memiememetetüni. Yümüretü yacü xeicüa texaxatamete meneutayeixüani cuiepa. <sup>2</sup>Ipaü xepüteheitimani Cacaüyari 'Iyarieya. Yunaitü 'iyarite memüyuhecüata Qesusi Cürisitusie tevi matüasie meteviyatü, müme Cacaüyarisüa mecanimiemetetüni. <sup>3</sup>Yunaitü 'iyarite memücayuhecüata Qesusisie meteviyatü Cacaüyarisüa mepücamiemete. Mücü Cürisitu mu'uxiesüa mecanimiemetetüni. Xeme xepu'enana quename 'uhamie, hicüri cuiepa caniuyeicani.

<sup>4</sup>Nenivema xeme Cacaüyarisüa xecanimiememetetüni, xepüvara'ivaxü. 'Iya xehesie mütiviya canitürücaüyeni. Mücü cuiepa memütama vahesie mütiviya masi pücatürücaüye 'iyapaü. <sup>5</sup>Müme cuiepa mecanimiemetetüni. 'Ayumieme cuiepa mieme metenicuxatani, 'ayumieme cuiepa memütama mecaniva'enieca. <sup>6</sup>Tamesü Cacaüyarisüa tecanimiememetetüni. Que mü'ane

Cacaüyari mümate catani'enieca. Que mü'ane Cacaüyarisüa mücamieme pücatasi'enie. 'Icücü tepüvamate 'iyari yuri maine 'iyari meuyuyehüpa.

**Cacaüyari catiniyucanaqui'erieca**

<sup>7</sup>Camüsü nenaqui'erima tepütanaqui'erieca tanaitü. Naqui'eriya Cacaüyarisüa canimiemetüni. Yunaitü memütayucanaqui'eri Cacaüyarisie mecaniyecüne, Cacaüyari mecanimaica. <sup>8</sup>Que mü'ane mücatiyucanaqui'eri Cacaüyari pücahetimaive Cacaüyari mütiyucanaqui'eriecü. <sup>9</sup>'Icücü tahesie masiücütü nayani Cacaüyari que mütatinaqui'eri, Cacaüyari yunive muyuxevi meyenü'acü cuiepa, müccü temayeyuyurinicü. <sup>10</sup>Müpaü cani'aneni naqui'eriya. Tameri tepüca'inaqui'eriecai Cacaüyari. Mücü püta pütasinaqui'eriecai, yunive reyenü'a 'aixüa miyurienicü 'aixüa temütexeyarienenicü tame 'axa temüteyurie.

<sup>11</sup>Nenaqui'erima Cacaüyari xüca müpaü tatinaqui'eriecaitüni, caneuyeveca tameta müpaü temütetanaqui'eriecacü tanaitü. <sup>12</sup>Xevitü püca'ixeyave Cacaüyari hasuacua. Xüca tetanaqui'erieca tanaitü, Cacaüyari tahesie tiviyatü caniyuhayeva. Mücü que mütiyucanaqui'eri, naqui'eriya naye'ani tahesie. <sup>13</sup>Ipaü tepütemate hesiena temüteviya mücürta tahesie mütiviya, yu'iyari mütasi'umicü taxexuime. <sup>14</sup>Tame tepunenierixü tecatenihecüatani ta'uquiyari yunive meyenü'acü cuiepa

memütama vavicueisitüvame. <sup>15</sup>Que mü'ane müyuecüata müpaü 'utaitü quename Quesusi Cacaüyari nu'aya hücü, Cacaüyari hesiena tiviyatü caniyuhayeva, mücüta Cacaüyarisie tiviyatü tiyuhayeva.

<sup>16</sup>Tame tecatenetimani que mütatinaqui'eri Cacaüyari, yuri teteniuta'erieni naqui'eriyayasie que mütatinaqui'erie. Cacaüyari catiniyucanaqui'erieca. Que mü'ane tiyucanaqui'erietü muyuhayeva, mücü Cacaüyarisie tiviyatü caniyuhayevamücü, Cacaüyarita hesiena tiviyatü tiyuhayeva.

<sup>17</sup>Naqui'eriya müpaü tinaye'ani tahesie 'aixüa temütetamaicacü mücü tucarisie quepaucua 'isücame mütasita'inüata, hepaüna temü'anenecü tame 'ena cuiepa 'iya mü'anepaü. <sup>18</sup>Xüca tiyucanaqui'erieca marica pücaxüave. Naqui'eriya maye'axe marica payeveveiya. Que mü'ane müma cani'uximatüarieca. Que mü'ane müma püca'aye'ave tiyucanaqui'erietü.

<sup>19</sup>Tame tepütetacanaqui'erie mücü meri mütasi'utanaqui'ericü.

<sup>20</sup>Xüca xevitü ya'utayüni, Ne Cacaüyari nepünaqui'erie haitü, xüca yu'iva 'uxieca, mücü catini'itavani. Que mü'ane yu'iva xeyiatü müca'inaqui'erie, capüyüve minaqu'erieca Cacaüyari ca'ixeyavetü. <sup>21</sup>Icü 'aisica tecanexeyani hesüana mümieme. Que mü'ane Cacaüyari münaqui'eri, yu'ivata quenaqui'erieca.

**Yuri ti'erietü, tita cuiepa  
mütimieme püra'iva**

**5** Yunaitü yuri memüte'erie quename Quesusi heiserie

'upitüarie Cürisitutütü Cacaüyarisie mecaniyecüne. Que mü'ane 'iya 'uquiyarieya münaqui'erie, 'iya hesiena müyetüata caninaqui'erieca.

<sup>2</sup>Tame 'ipaü tepütemate Cacaüyari nivemama temüvanaqui'erie, quepaucua Cacaüyari temünaqui'erie, quepaucua yatemütecahu que müti'aita. <sup>3</sup>Ipaü tetenyurieca xüca Cacaüyari tenaqui'erieca, yatepütecahuni que müti'aita. 'Aisicaya pücahahete.

<sup>4</sup>Naitü Cacaüyarisie müyetüa cuiepa mieme cana'ivarümeni. Tita yuri temüte'erie, mücü canihücütüni tita 'ari müre'iva cuiepa timieme. <sup>5</sup>Quepaicü pühücü cuiepa mieme ma'ivarüme. 'Icürü pühücü, que mü'ane yuri müti'erie quename Quesusi Cacaüyari nu'aya hücü.

### **'Iyari catinihecüatani**

<sup>6</sup>Icü Quesusi Cürisitutütü canihücütüni que mü'ane ha xuriya 'inüariyaricü munua. Ha 'inüariyari hexeyatü xeiçüa pücanua, masi ha xuriya 'inüariyari hexeyatü punua. 'Iyari müpaü tiniheciatanita, 'Iyari yuri mainecü.

<sup>7</sup>Mepüyuhaica memütehecüata taheima, ta'uquiyari, Nu'aya, Iyarieya Mütiyupata mepühüme.

'Icü yuhaicatü mecaniyuxevini.

<sup>8</sup>Mepüyuhaica memütehecüata cuiepa. Cacaüyari 'Iyarieya, ha, xuriya mepühüme. Yuhaicatü 'axeicüa mepütehecüata. <sup>9</sup>Teüteri que memütehecüata tecaniva'enieca. Mericüte, Cacaüyari que mütihecüata masi caniheiserietüni. 'Ipaü catinihecüatani Cacaüyari, yunive hepaüsita tiniutahecüata.

<sup>10</sup>Que mü'ane yuri müti'erie  
Cacaüyari Nu'ayasio mücü  
hecüasica pexeiya yuhesie. Que  
mü'ane Cacaüyari yuri mücati'eriri,  
mücü Cacaüyari ti'itavame  
canayeitüvani, yuri mücatiuta'ericü  
que mütiutahecüataxü Cacaüyari  
yunive hepaüsita. <sup>11</sup>Müpaü paine  
tita mütihecüata. Cacaüyari  
cataniupitüani tucari mücaxüve.  
Nu'ayacü canixuaveni mücü tucari.  
<sup>12</sup>Que mü'ane 'iya nu'aya mexeiya,  
tucari pexeiya. Que mü'ane  
Cacaüyari Nu'aya mücahexeiya,  
tucari pücahexeiya.

**Xepütemate tucari  
mücaxüve xemexeyacü**

<sup>13</sup>Icü nepütixe'uti'utüiri xeme  
yuri xemüte'erie que mü'ane  
Cacaüyari nu'aya mühücüsie  
xemütemaicacü tucari xemexeiya  
mücaxüve.

<sup>14</sup>Ipaü 'aixüa tepütetamate  
hüxiena. Xüca tixaütü  
tete'itavavirieni que mütinaque,  
pütasi'enie. <sup>15</sup>Mücü meta, xüca  
müpaü tetemaica mütasi'enie  
tita temüte'ivaviri, tepütemate  
temeixeiya tita temüte'ivaviri.

<sup>16</sup>Xüca xevitü 'ixeiya yu'iva 'axa  
tiyurieneme que mücatimüni,  
canitavaviriemücü yu'ivasio mieme.  
Tucari mecanipitüariecuni müme  
'axa memüteyurie que mücatimüni.  
Tita 'axa müti'ane puxuave 'axa  
xüca tiyurieni mümünücü.  
Mücüsie mieme xemitavavirieni  
'asinepücahaine. <sup>17</sup>Naitü  
mücatiheiserie 'axa cani'aneneni.  
Tita 'axa müti'ane puxuave 'axa  
xüca tiyurieni mücamünücü.

<sup>18</sup>Tame tepütemate yunaitü  
Cacaüyarisie memüyecü 'axa  
mepücateyurie. 'Iya Cacaüyarisie  
müyetüa caniva'üviyani, 'iya 'axa  
mütiyuriene pücavamayüa.

<sup>19</sup>Tepütemate Cacaüyarisüa  
temümiemete, naitü cuiepa  
mütimieme 'iya 'axa mütiyurienesie  
tivyatü 'amuve.

<sup>20</sup>Tepütemate Cacaüyari  
nu'aya munua, mütasi'enatüa  
temimaicacü mücü muyuri. Tame  
'iya muyurisie tepüteviya nu'ayasio  
Qesusi Cürisitusie. 'Icü yuricü  
canicacaüyaritüni, tucari mücaxüve  
canihücütüni. <sup>21</sup>Nenivema  
xequenyucuerivayurieca  
cacaüyarixi vahepaüsita.



# VANI

## Meitanü'axüa Hutarieca Mieme Xapayari

---

### Vaürisica

<sup>1</sup>Ne nemüxe'uquiyari necanixevaüiritüaca 'uca pemanayexeyari 'anivemata. Yuricü nenixenaqui'erieca. Ne xeicüa pücatixaü, masi tanaitü temeitima tita yuri müraïne tepüxenaqui'eri <sup>2</sup>tita yuri müraïne tahesie tiviyatü muyuhayevacü, mütasiteütacü yuheymecü. <sup>3</sup>Cacaüyari ta'uquiyari, Qesusi Cürisitu ta'uquiyari münu'aya, yuricü me'utiyuatü meteyucanaqui'erietü, xüca 'aixüa mete'u'iyarini xehesie mieme, xüca mexenenimayaca, xüca mexepitüaca yu'iyarisie xemüca'uximatüariecacü.

<sup>4</sup>Vaüca nepünetemaviecai nemütimariecü 'anivema hipatü tita yuri müraïnesie meteviyatü memü'uvacü, 'aisica ta'uquiyarisüa mieme que temüte'upitüari.

<sup>5</sup>Hicüri 'uca hecuamecü nemati'aitüatü nepücamati'ütüirie, mücü 'aisica matüari temeixeyacai nepümati'ütüirie püta. 'Ipaü nepümativaviri, tanaitü temütanaqui'eriecacü.

<sup>6</sup>'Ipaü tetenyurieca xüca tetetacanaqui'erieca, tepu'uvani que müti'aita. 'Icü cani'aisicayatüni, xeteyucanaqui'erietü xemu'uvanicü, matüaripai que xemüte'u'enana.

### Memeuyuyexürüva

<sup>7</sup>Yümüretü memeuyuyexürüva mecaneutayeixüani cuiepa. Müme mepücayuhecüata quename Qesusi Cürisitusie tevi matüasie meteviya. Müya 'anetü canihücütüni reuyuehüpame, müya 'anetü tihücü 'iya Cürisitu maye'unie.

<sup>8</sup>Xequeneyucuerivayurieca capa xeheiyexürienicü ta'uximayasica, masi yu'ivarica naima xemüpitüarïenicü.

<sup>9</sup>Yunaitü memanuyehaitürüve, tita Cürisitu müti'üquitasie meteviyatü memücayuhayeva, mücü Cacaüyari mepücahexeiyä. Que mü'ane tita müti'üquitasie tiviyatü müyuhayeva, mücü yu'uquiyari pexeyä nu'ayata rexeiyä. <sup>10</sup>Xevitü xüca xehesüa nuani 'icü 'üquisica cahexeyatü, xepüca'l'inieca yuquie, xepüca'ivaüiritüaca. <sup>11</sup>Que mü'ane mitvaüiritüani, mücü

'uximayasicaya 'axa que mü'anene,  
müpaü 'anetü canayeimücü.

**Xehesüa nepeuyeimücü**

<sup>12</sup>Sepanetü müireme  
nemütixeti'utüirieniquecai,  
nepücanevaüriya xapacü tauxicü.

Masisü xehesüa nepeuyeimücü  
püta, tahüxi te'utinenieretü  
temütetaxatacü xemaye'axüani  
xeyutemamavietü.

<sup>13</sup>'A'iva 'uca manayexeyari  
nivemama mepümasivaüritüa.  
Müpaü xeicüa cani'aneni.

# VANI

## Meitanü'axüa Hairieca Mieme Xapayari

---

### Vaürisica

<sup>1</sup>Ne nemü'a'uquiyari  
nepümati'utüirie  
nemümasinaqui'erie Cayu. Yuricü  
nepümasinaqui'erie ne.

<sup>2</sup>Neuxei, 'ecü nemümasinaqui'erie,  
nepünenenevie naimecü 'aixüa  
pemüreumienicü, 'aixüa  
pemüreu'eriecacü 'al'iyari  
'aixüa mütimiepaü. <sup>3</sup>Vaüca  
nepünetemaviecai me'u'axecacu  
ta'ivama metehcüatacacu  
'ahepäüsita yuri que pemaine.  
Yaxeicüa 'ecü tita yuri mürainesie  
petiviyatü pepuyeica. <sup>4</sup>Que  
yanemücatinetemavi, vaüca  
masi nepünetemavi yanetimaitü  
quename nenivema hipatü me'u'uva  
tita yuri mürainesie meteviyatü.

<sup>5</sup>Neuxei, 'ecü nemümasinaqui'erie,  
yamüticamiepaü peniyüaneni  
naima ta'ivama vahesie  
mieme pemütiyuriene sepa  
memücu'uvamete. <sup>6</sup>Müme  
mecateniutahecüata meyucuxeüriecu  
que pemütü'acanaqui'erie. 'Aixüa  
penivayuriemücü pevaparevietü  
vahuyeta, Cacaüyaripaü  
petiüca'iyaritü. <sup>7</sup>Que mü'ane

Quesusi Cürisitu mühücüsie mieme  
meteta'uximayataque menayecüne.  
Tixaü mepücatevarutanaqui'eriri  
hipame nuivarite. <sup>8</sup>Ayumiemicü  
caneuyeveca müya memü'anene  
temüvatanaqui'erieni tame, tanaitü  
tita yuri mürainesie mieme  
temüte'uximayacacü.

### Riyütürepexi que mütiyaraye'uniecai

<sup>9</sup>Ne 'esiva nepütivaruta'utüiri  
memüyutixexeüriva, peru  
mücü Riyütürepexi va'uquiyari  
mayuyeitüamücü pücatasi'upitüa.  
<sup>10</sup>Ayumieme xüca nehenuani  
neneye'eritüamücü que mütiyuriene  
niuqui 'axa mü'anenecü  
tasiniuquimatü. Mücücü xecüa  
pücanaqui'a, masi müireme  
pütiyurieniqueyu. Ta'ivama  
pücavapitüa, pücavatauni müme  
memüvapitüacu, memüyutixexeüriva  
vasata püvaranuyenü'ava.

<sup>11</sup>Neuxei, 'ecü nemümasinaqui'erie,  
'axa müti'ane pepüca'üqueni, 'aixüa  
müti'ane püta quene'üqueni. Que  
mü'ane 'aixüa mütiyuriene  
Cacaüyarisüa canimiemetüni. Que  
mü'ane 'axa mütiyuriene püca'ixeyave  
Cacaüyari.

**Remetüriyu hepaüsita mepütehecüata**

<sup>12</sup>Yunaitü mepütehecüata Remetüriya hepaüsita, tita yuri müraine tihecüatacacuta hepaüsitana, tameta tepütehecüata hepaüsitana. 'Ecü pepütimate yuricü temütehecüata.

**Teutüarica**

<sup>13</sup>Nesü vaüca nepümatiti'utüirieniquecai peru tauxicü

ti'utüvamecü nepücamati'utüiriamücü.

<sup>14</sup>Nepümasiheuxeiyamücü püta yareutevitü, tahüxie te'utinenieretü tepütetaxata.

<sup>15</sup>'A'iyarisie xüca peca'uximatüarieca. Müme temüvanaqui'erie mepümasivaüritüa. 'Ecüta quenivavaüritüaca müme temüvanaqui'erie yuxexuime que memüteteteva.

# CURA

## Meitanü'axüa

---

### Vaürisica

<sup>1</sup>Ne Cura Quesusi Cürisitusie mieme necatini'uximayatametüni Cacuvu 'ivaya nehücütütü. Necanixevaürütüaca xeme xemünaqui'eriva Cacaüyari müta'uquiyarisie xeteviyatü, Quesusi Cürisitu müxel'üviya xemuta'inierie. <sup>2</sup>Xüca xenenimayasieca, xüca xepitüarieca yu'iyari xemücamüiriyanicü, xüca xenaqui'erivani yemecü.

### Metel'itavatü que memüte'üquitani

*(2 Pecuru 2:1-17)*

<sup>3</sup>Nenaqui'erima, cuini mieme necaninemexütüacaitüni nemütixeti'ütüirienicü tanaitü 'axeicüa que temütetavicueisitüarixime hepaüsita, peru neuyeveca yanemütixeti'ütüirienicü hicü vaüriyarica nexepitüatü xemüyucuitüvenicü tita yuri temüte'erie hesie mieme, tita Cacaüyari teüterimama xei mieme temüteteyuiriyarie hesie mieme. <sup>4</sup>Hipatü teüteri tasata menatahaxüani 'avie. Meripai

meniucayasariexüani müpaü memütemari'itüarienicü. Cacaüyari mepüca'ayexeiya, mecanipata tita Cacaüyari mütivamicua 'aixüa tiuca'iyaritü, para memüyutatuanicü merucuyatüvetü xeicüa. Mecaniyucu'imavani müpaü me'utiyyatü quename mecal'imate que mü'ane hücüatü mütacusiari mütatü'aitüvame Quesusi Cürisitu.

<sup>5</sup>Sepa xei mieme müpaü xemütehetima naimecü, necanixe'eritüamücünü que mütiuyü hepaüsita quepaucua Ti'aitame müvarutavicueisitüa 'Ixaherisixi teüteriyari 'Equipitu cuieyarisie vareyevitüca. Varutavicueisitüaca 'arique nivaruca'una müme yuri memücate'eriecai. <sup>6</sup>Taheima miemete niuqui tuayamete meta hipatü mepücayü'üviyacai que memütehüritüariecai matüaripai, mepicu'eirie masi yuquie. Mücü Cacaüyari caniva'üviyani memütaxanesienicü tucari mümarive 'aye'ayu, nivaranutaxürüvani yüriyasie tepüa mücaxüvecü. <sup>7</sup>Vahepaüsü mecaniuyünü Surumatari Cumuxatari va'aurie miemete

quiecaritiese quiecatari.  
 'Ameniu'uvacaitüni müme  
 mevacumaivatu que mü'ane  
 mücava'üyatücai mücavacünatücai,  
 me'icumaivatu titacü  
 memüteyuseviximacai. Mümeta  
 meniucayasariexüani 'inüari  
 memacü necü memari'itüarietüvetü  
 taipu yuheyemecü mütaivesie.

<sup>8</sup>Peru hicü miemeteta  
 yaxecüa mecani'aneneni. Que  
 memüteheinüsa meniseviximaca  
 yuwayari. Menixani'erieca  
 que mü'ane ti'aitame  
 mühücü, mecanivaseviximani  
 mamarivavemete 'axa me'utiyaütü  
 vahepaüsita. <sup>9</sup>Mücü Miyeri niuqui  
 tuayamete tiva'aitüvame mühücü,  
 quepaucua Cauyumariematü  
 mücü niuqui memüxüatüacai  
 Muisexi caxarieya hepaüsita,  
 mücü pücayuvaüriyacai  
 miseviximanicü Cauyumarie  
 hesiena tiuhüpatü, masi müpaü  
 niutayüni, Ti'aitame quematitieni.

<sup>10</sup>Ime püta meniseviximaca tita  
 'asimemücatemate hepaüsita 'axa  
 me'utiyaütü. Que memütemate,  
 yücümana xecüa mepütemate  
 tatevama memücate'u'iyari  
 vahepaü. Müpaü metemaitü  
 'ayumieme mecanitümaiyarieca.

<sup>11</sup>Xüa 'ui müme. Caini  
 huyeta meneucayune hepaüna  
 mete'u'uvatü. Tuminicü  
 meniutatuanı memeyexürıenicü  
 Varamipaü müti'livamücüaipäü.  
 Meniutatümaiyarieni yaxecüa  
 que mütiyüü quepaucua Cure  
 meye'uniecai Muisexi. <sup>12</sup>Ime  
 meniseviximaca xe'icuai quepaucua  
 xeyunaqui'erietü xemütecua'a,  
 memücateheuyuehüviriecü

quepaucua xehamatü memütecua'a.  
 Muxasi vahüvemete meyuterüvatü  
 mepüteyumicua xecüa. Haivitüri  
 mayevavaquipaü mecani'aneneni  
 'ecacü mecu'enetüvetü.

Cüyexipaü mecani'aneneni  
 memüca'utixuxuavere  
 tucari maye'axesie. Hutacüa  
 mepucui, mepüvatihunarietüca.  
<sup>13</sup>Memasiücütü mepayuyeitüva que  
 memüteyurie meyuteviyasitüatü,  
 yaxecüa hamevari mayu'erıya  
 mücuaimuxa masiücüme que  
 mürayuyeitüva haramarasie.  
 Xuravesixi memeyexürüve  
 vahepaü mecani'aneneni. Yüriya  
 cui müyüvi canü'üviyarıeni  
 vahesie mieme yuheyemecü.

<sup>14</sup>Müya memü'anene meripai  
 catinivacuxaxatüvacaitüni  
 'Enuqui 'Arani müxiüyarietacai  
 'atahutarieca mieme, müpaü  
 'utaitü, Nenixeıya Ti'aitame  
 nuaximeme yuteüterima varavitütü  
 müireme miriyari meyupaümeme,  
<sup>15</sup>yunaimeme vataxanetaque, yunaitü  
 Cacaüyari memüca'ayexeıya  
 vahesie tiuhüanique naimeme  
 hepaüsita que memüte'uyuri  
 Cacaüyari meca'ayexeıyatü  
 vatahüaveque, naimeme niuqui  
 mü'aüxaüna hepaüsita, que  
 memüte'iniuquıma Cacaüyari  
 hepaüsita 'axa teyuruvamete  
 Cacaüyari memüca'ayexeıya.

<sup>16</sup>Ime mecanihümetüni niuqui  
 xüatüacate niuquixivivamete.  
 Que memüte'ucahive'erie xecüa  
 'ameniu'uvanı. Yutetacü vaüca  
 mepütecuxata meteyucatave'erietü.  
 Niuquicü me'utiniütü  
 menivatemavieritüaca teüteri  
 memüvara'ivanicü.

**Que mütiva'imaiyacai  
que mütivatucacai**

<sup>17</sup>Xemesü nenaqui'erima,  
niuqui xequena'erivani meripai  
que memutiyua Tati'aitüvame  
Quesusi Cürisitu nü'arimama  
yacatüyüvecacu cuxi. <sup>18</sup>Müpaü  
metenixecühüavecaitüni, Tucari  
taparirüvecacu 'amenitamacacuni  
teyunanaimavamete.

'Ameniu'uvacuni que  
memüte'ucahive'erie xeciüa  
Cacaüyari meca'ayexeyatü. <sup>19</sup>Ime  
mecanihümetüni memüvapata  
teüteri 'iyarisie vaniu memüteviya  
'iyarisie vaniu memücateviya sepa  
yu'iyari xeciüa memexeyia müme,  
yuri 'iyari memücahexeyia.

<sup>20</sup>Peru xeme nenaqui'erima,  
xequenyuseiriyani yunaitü, yuri  
que xemüte'erie tita mütipasiesie.  
Xequenyunenevieca 'Iyari  
Mütüyupatasie xeteviyatü.

<sup>21</sup>Xequenyü'üviyani  
Cacaüyari xenaqui'eriecacu.  
Xequeneuta'icuevani maye'anicü  
Tati'aitüvame Quesusi Cürisitu  
quepauca müxenenimayacacü

xepitüatü yuheyemecü  
xemayeyuyurinicü.

<sup>22</sup>Xequenivanenimayaca  
hipame memeu'erietüve,  
<sup>23</sup>xequenivatavicueisitüani müme  
xevaranayehapanatü taipa. Hipame  
meta que xemütevanenimaya  
xequeneumamaca masi,  
xe'ixeümatü 'asita va'ixuriqui xüca  
seviximarieca que memüte'uyuri  
yuvaiyarisie meteviyatü.

**'Aixüa que mutayü  
Cacaüyari hepaüsita**

<sup>24</sup>Que mü'ane  
müyüve müxe'üviyani  
xemüca'atixürüvenicü, müyüve  
meta müxe'aye'atüanicü que  
mü'ane visi mü'ane hüxie  
xehesie catiuhüivacacu  
xeyutemamaviecacu, <sup>25</sup>que  
mü'ane yuxevitü mücacaüyari  
mütimaive mütasi'utavicueisitüa,  
mücü visi quetixeyarieca que  
mariveni heiserie quehexeyiani  
quetürücaüyeni tucari  
casutüarievecacu, hicüta, tucari  
catixüvecacu yuheyemecü. Müpaü  
cani'aneni.

# MASIÜCÜTÜ QUE MÜRATÜA,

Vani Que Mütixei

Tita Qesusi Cürisitu  
masiücüme mürayeitüa

**1** Qesusi Cürisitu 'icü masiücüme canayeitüani. Cacaüyari müpaü catinipitüani müpaü mütivahecüatüacacü müme hesiena mieme memüte'uximaya, müpaü memütemaicacü yareutevitü que mütiyüni vaüriyarica. Masiücüme nayeitüani ne Vanitütü müpaü nemütimaicacü, nehesüa neiyenü'ani yuniuqui tuayame hesiena mieme nemüti'uximayacü. <sup>2</sup>Cacaüyari niuquieya que maine, müpaü necatinihecüatani, Qesusi Cürisitu que mütihecüata. Que nemütixei yanecatinihecüatani. <sup>3</sup>'Aixüa cani'itüariemücü que mü'ane mititerüva, mümeta memi'enie 'icü niuquiyari 'aixüa mecani'itüariecuni xüca yametecahunı que müre'uxa 'icüsie. Tucari caneutihuraniri.

Que müttivaruvaüritüa  
memüyutixexeürivacai  
'atahutariECA quiecarisie

<sup>4</sup>Ne Vani necanixevaüritüaca  
'atahutariECA quiecarisie

xemüyutixexeüriva 'Asiya cuieyarisie. 'Aixüa xüca tiuca'iyarini xehesie mieme mücü, xüca xepitüaca yu'iyarisie xemüca'uximatüariecacü. Müpaü pütüyurieneni que mü'ane 'amuyeicacai 'amuyeica 'umamie, mümeta 'atahuta 'iyari mücü 'uvenieya hüxie memüti'u, <sup>5</sup>Qesusi Cürisitu meta que mü'ane yaticamietü müyuhecüatacai, que mü'ane müquite memanucu'uni vamexüacame mühücü, que mü'ane mütiva'aitüa cuiepa te'aitamete. Mücü canihücütüni que mü'ane mütasinaqui'erie, que mü'ane yuxuriyacü müta'utixünaxü tahesie mücarahüivanicü 'axa temüte'uyuricü, <sup>6</sup>que mü'ane teüterimama müta'ayeitüa tati'aitüvametütü, mara'acate müta'ayeitüa 'uquiyarieyasie mieme temüte'uximayacacü Cacaüyarisie mieme. Mücü 'aixüa quecuxaxasivani quettürücaüyeni yuheyemecü. 'Icü niuqui canise'ini. <sup>7</sup>Camü, haisata pacaneni. Yunaitü yuhüxicü mecanixeyacuni, mümeta memeitiseixüa mepixeyia. Yunaitü nuivarite cuiepa memütama



meniyutiheiveriecuni me'ixeyatü.  
Müpaü cani'aneni, niuqui canise'ini.

<sup>8</sup>Ti'aitame mücacaüyari müpaü  
paine, Ne Mexüacame 'Imatüreme  
netitevatü necanihücütüni que  
mü'ane misutüa minüni. Que  
mü'ane 'amuyeicacai 'amuyeica  
'umamie, que mü'ane nai  
mütürücaüye, ne necanihücütüni.

### Que mütixei Yuri Tevi

<sup>9</sup>Neri Vanitütü necanixe'ivatüni.  
Xehepaü nepü'itüariene  
te'uximatüariecacu  
tete'aitametetücacu  
tete'uca'enivacacu Qesusisie  
teteviyatü. Cuie Patümuxi  
müracutevasie haramara hixüapa  
mayemasie neneyeicacaitüni  
Cacaüyari niuquieyasie  
nemütiviyacü Qesusi hepaüsita  
nemütihecüatacü. <sup>10</sup>Ti'aitame  
tucarieyasie 'Iyari nesi'uviyacu,  
nevarita 'uvecacu neni'enieni  
que mü'ane carima mutaniucacai  
cuxinetapaü ti'eniürücütü.  
<sup>11</sup>Müpaü niutayüni, Ne que mü'ane  
misutüa minüni necanihücütüni,  
Mexüacame 'Imatüreme nepühücü.  
Tita pemütixeiya quetinaca'utüa  
xapasie, queneutanü'axüa  
memüyutixexeüriva vahesüa  
'atahutarieca quiecarisie memetitei,  
müme 'Epesusie 'Esimirünasie  
Perücamusie Tiyatirasie Sarütixisie  
Piratepiyasie Rautiseyasie  
memetitei.

<sup>12</sup>Hicü ta'aurie nenaveni  
niucame nexeiyaque, que  
mü'ane müneretahüavixü  
netinecühüavetü. Ta'aurie ne'aveca,  
cüxeme 'utame neniuxeiya  
'atahutame huru tepüyaricü

muveviya. <sup>13</sup>Ti'utame hixüapa  
'uvecacu nepixei que mü'ane  
Yuri Tevipaü mütiyuxexeyacai.  
'Etevime panacatücücai,  
yutavisie panayücühüacai huru  
hüiyameyaricü. <sup>14</sup>Mu'uuya cüpaye  
pütuxacai muxa huxariyaripaü  
'üvipaü. Hüxiteya tai  
mütacapaü cani'anenecaitüni.  
<sup>15</sup>Quetateya tepüa müxavatüpaü  
pütüyuxexeyacai huxunuta  
hüsieriecamepaü. Niuquieya vaüca  
hapaü putatürarücacai. <sup>16</sup>Yuserieta  
xuravesixi nivaratücücaütüni  
'atahutame. Tetana püvayeneicacai  
cusira naisata heutixicacaunitü. Tau  
que mütixavatü türücaüyemecü  
tatü, müpaü canaye'anecaitüni.  
<sup>17</sup>Quepaucua nemixei, hetüana  
neniucaveni müquipaü. Mücü  
yuseriecü nehiesie caniutimeni  
müpaü 'utaitü, Pepücamaca.  
Ne mexüacame 'imatüreme  
necanihücütüni. <sup>18</sup>Que mü'ane  
mayeniere necanihücütüni  
sepa nemümüquicai. Neuxei,  
nepayeniere hicü neheyemecü.  
Nene'üca yaviyari heiserie  
nemexeyacü müquite vahepaüsita,  
nereunarümatü nereuyepivatü  
haque meme'uva. <sup>19</sup>'Ayumieme  
nepaine, quetinaca'utüa  
tita pemütixeiya, hicüque  
mütüyüane, 'arique que mütiyüni.  
<sup>20</sup>'Ipaü catinimasiücüni niuqui  
mü'aviesiecai 'atahutame  
xuravesixi neserietta nevaratücüme  
pemüvaruxei vahepaüsita,  
'atahutame cüxeme 'utame hurucü  
muveviya pemüvaruxei vahepaüsita.  
Mücü xuravesixi 'atahutatü, niuqui  
tuayamete mecanihümetüni  
müme 'atahutarieca quiecarisie

memüyutixexeüriva vahesüa miemete. Cüxeme 'utamete, müme memüyutixexeüriva 'atahutarieca quiecarisie mecanihümetüni.

**Que mütivarunü'airi  
memüyutixexeürivacai**

**'atahutarieca quiecarisie**

**'Epususie memüyutixexeürivacai  
que mütivarunü'airi**

**2** Müpaü quetine'utüiri niuqui tuayame 'Epususie memüyutixexeüriva vahesüa mümieme, Müpaü paine que mü'ane yuserieta müvaratücü xuravesixi 'atahutame, que mü'ane 'atahutame cüxeme 'utame hurucü muveviya vahixüapa muyeica. <sup>2</sup>Neri müpaü nepütimate que pemütiyuriene peti'a'uxitüatü petiüca'enivatü. Müpaüta nepütimate, pemücavaneviecü 'axa memü'anene. Pepüvaruta'inüataxü müme nü'arisixi memüyuxata peru memücahüme, pepüvaretima memüte'litavacü. <sup>3</sup>Pepütiüca'eniva, vaüca pepütiücanevie nehesüa pemümiemecü, pepüca'uxive. <sup>4</sup>Peru tixaütü püreuyevese nemasixeyiacacu, pemütiuhayevaxücü peti'acanaqui'erietü matüaripai que pemüti'acanaqui'eriecai. <sup>5</sup>Ayumieme nepaine, quene'a'erivani que pemü'anecai haitüari, 'arique que pemüracave. Quetineuhayeva que pemütiyuriene hicü, matüaripaipaü püta quetineyuriene. Me xüca pecatiuhayeva, nepunuani 'ahesüa, 'acüxeme 'utame nepüvatixüna huyelitana. <sup>6</sup>Siere tixaütü pepürexeyia 'aixüa ti'aneme,

pemü'uxive'eriecü tita memüteyurie müme Nicuraitasixi vahesie memüteviya. Neta nepi'uxive'erie. <sup>7</sup>Xaütü netü mu'enaxü, que'i'enieca tita 'Iyari mütivatahüave memüyutixexeüriva. Que mü'ane mürayu'iva, ne nepütimini mürecuanicü mücü cüyesie mieme cümana mayeyurinicü, Cacaüyari haraveritana meve.

**'Esimirünasie memüyutixexeürivacai  
que mütivarunü'airi**

<sup>8</sup>Hicü müpaü quetine'utüiri niuqui tuayame 'Esimirünasie memüyutixexeüriva vahesüa mümieme, Müpaü canaineni que mü'ane mexüacame 'imatüreme mühücü, que mü'ane müqui matüa manutanierixüta. <sup>9</sup>Neri müpaü nepütimate que pemütiyuriene, que pemüti'uximatüariexime, que pemütimave. Masisüari pepeucave. Müpaü nepütimate que memütexesevixima hipatü Huriyusixi teüteriyari memüte'uyuterüva 'axa me'utiyuatü xehepaüsita. Huriyusixi masi mepücahüme, Cauyumarie tuquitana mepümümetexi püta müme. <sup>10</sup>Pepücamaca sepa pemüticuineni. Camüsü Tücacame casariyanata püxe'anutaxürieni hipame xemüta'isiparienicü. Xepü'uximatüarieca tamamata tucari. Xüca yapeticamiene sepa pemümüni, ne tucari nemanipitüamücü pemümarivanicü, yaxecüa muma que müranutiquesiyarie rayu'ivaca nausaricü mümarivanicü. <sup>11</sup>Xaütü netü mu'enaxü, que'i'enieca tita 'Iyari mütivatahüave

memüyutixexeüriva. Que mü'ane mürayu'iva, mücü 'axa püca'itüarieni, hutarieca pücamüni.

**Perücamusie memüyutixexeürivacai  
que mütivarunü'airi**

<sup>12</sup>Hicü müpaü quetineu'utüiri niuqui tuayame Perücamusie memüyutixexeüriva vahesüa mümieme, Müpaü canaineni que mü'ane meixeiya cusira naisata neutixicacauni cui müreutiquematüca. <sup>13</sup>Neri müpaü nepütimate que pemütiyuriene. Müpaüta nepütimate, haque pemeca, mana Cauyumarie 'uvenieya peve haque müre'aita. Sepa mücü, que mü'ane nemühücüsie pepütiviya, pepüca'acu'imava, quename nehesie yuri pecati'erie pe'utaitü. Müpaü pepücati'acu'imavacai sepa 'iya tucarisie quepauca xehesüa mumierie 'Anütipa. Mücü nehesüa miemetütü püyuhcüatacai yaticamietü que nemainecai, pumierie haque Cauyumarie manuca. <sup>14</sup>Perusü 'esiva püreuyevese tixaütü nemasixeiyacacu. Muva pepüvarexeiya müme Varami 'üquisicayasie memüteviya. Mücü müpaü pütita'üquitüa Varaqui müvacunuitüanicü 'Ixaheri xiüyarimama, memicuacacü tita cacaiyarixi memütemaviyarie, memüvacumaüvanicü hipame memüca'yü'üitamatücai memüca'yücünamatücai. <sup>15</sup>Yaxeicüa 'ecü pepüvarexeiya hipame Nicuraitasixi va'üquisicacie memüteviya, que nemüti'uxive'erie. <sup>16</sup>Ayumieme nepaine,

quetineuhayeva que pemütiyuriene. Me xüca pecatiuhayeva, cuitü nepunuani 'ahesüa, vahamatü nepütinemienei necusira nehacuetü neteta mayeneicacü. <sup>17</sup>Xaütü netü mu'enaxü, que'l'enieca tita 'Iyari mütivatahüave memüyutixexeüriva. Que mü'ane mürayu'iva, ne nepütimini manana payari muti'aviesiecai. Tete mütuxa nepipütianita, mücü tetesie püra'utüarieni hecuamecü que mütitevaca. Xevitü müpaü pücatimaica, que mü'ane mitanaqui'erieni, mücü xEICÜA müpaü pütimaica.

**Tiyatirasie memüyutixexeürivacai  
que mütivarunü'airi**

<sup>18</sup>Hicü müpaü quetineu'utüiri niuqui tuayame Tiyatirasie memüyutixexeüriva vahesüa mümieme, Müpaü canaineni Cacaüyari Nu'aya, que mü'ane yühüxie tai mütacapaü maye'ane, que mü'ane yü'ücatesie tepüa müxavatüpaü mü'ane. <sup>19</sup>Neri müpaü nepütimate que pemütiyuriene, que pemüti'acanaqui'erie, que yapemüticamie, que pemütivaparevie hipame, que pemütiuca'eniva. Müpaü nepütimateta, 'imatürieca masi vaüca pepütiyuriene hicü, matüaripaü 'esiva xEICÜA pepütiyurienecai. <sup>20</sup>Perusü tixaütü püreuyevese nemasixeiyacacu, pemitauniecü mücü 'uca Qesaveri mütiteva yamütiyurieneicü que mütinaque. Niucame püyuxata Cacaüyarisüa mieme, peru que mütü'üquita, pütiva'irüviya nehesüa

miemete te'uximayatamete  
 memüvacumaüvanicü  
 müme memüca'yü'ütama  
 memüca'yücünama,  
 memicua'cacü tita cacaiyarixi  
 memütemaviyarie. <sup>21</sup>Ne tucari  
 nepipitüa müti'hayevanicü que  
 mütiyuriene, peru püca'yuva'riya  
 müti'hayevanicü vacumaüvatü  
 müme memüca'cünamama.  
<sup>22</sup>Tamüsü nepüticu'initüani,  
 nepeca'hüani 'utayasie, müme  
 memicumaüva cava'üyatücacu  
 nepüvareuca'xürieni vaüca  
 memü'uximatüariecacü  
 xüca mecate'hayevani  
 hepaüna meteyurietü.  
<sup>23</sup>Nivemama nepüvacuini. Müpaü  
 netiyurieu yunaitü naisarie  
 memüyutixexeüriva müpaü  
 mepütemaica, ne nemühücücü que  
 mü'ane xe'iyari müta'inüata que  
 xemüte'yücühüave. Yuxexuime  
 nepütixe'apinirieni que  
 xemüte'uyuri. <sup>24</sup>Peru hipatü  
 xeme Tiyatirasie xemütama,  
 queyupaümetü 'icü 'üquisicasie  
 xemücateviya, queyupaümetü  
 teva xemücaheutahaxüavave  
 xeteyü'üquitüatü Cauyumarie  
 'üquisicayacü que memüteniniuqui,  
 müpaü nepütixecühüave  
 xeme, tavarü cuanivemecü  
 nepüca'ecatüani. <sup>25</sup>Mücü  
 xeicüa, tita xemütehexe'iyaya, mücü  
 xequeneuviya nenuayuque.  
<sup>26</sup>Que mü'ane mürayu'liva, que  
 mü'ane mücati'hayevani nehepaü  
 tiyurienetü tapareyuque, mücü  
 heiserie necanipitüamücü nuivarite  
 müti'va'aitüacacü. <sup>27</sup>Tepüa  
 'isüyari 'acuetü pütiva'aitüaca,  
 haxu xariyari'paü püvatitara,

neta heiserie que münetiupitüa  
 ne'uquiyari. <sup>28</sup>Neta nepimini  
 xurave tuxacüta maneica. <sup>29</sup>Xaütü  
 netü mu'enaxü, que'l'enieca tita  
 'Iyari müti'vatahüave memüyutixex  
 eüriva.

**Sarütixisie memüyutixexeürivacai  
 que müti'varunü'airi**

**3** Hicü müpaü quetine'utüiri  
 niuqui tuayame Sarütixisie  
 memüyutixexeüriva vahesüa  
 mümieme, Müpaü canaineni  
 que mü'ane Cacaiyari 'iyariteya  
 'atahutame müvarexe'iyaya,  
 xuravesixi 'atahutame. Neri müpaü  
 nepütimate que pemütiyuriene.  
 Sepa pe'ayenieretü pemüxasiva,  
 pepümüqui. <sup>2</sup>Quenanutahütüa,  
 queneutatürücarüya tita  
 mücatimüve mütiuyuhayevaxü  
 mücü mümüximecü. Necacaiyari  
 que matixe'iyaya, nemasixe'iyacacu ne,  
 que pemütiyuriene peuyevese cuxi  
 pemüraye'atüanicü. <sup>3</sup>'Ayumieme  
 nepaine, quetina'erivani que  
 pemütüpitüarie que pemütü'enaxü.  
 Müpaü yaquetinecamieni,  
 quetineuhayeva que pemütüyuriene  
 hicü. Me xüca peca'anutahütüani,  
 tinavayamepaü nepunuani.  
 'Asipepücatimaica quepaucuatücacu  
 'ahesüa nemunuani. <sup>4</sup>Siepüre  
 hipame pepüvarexe'iyaya teüteri  
 Sarütixisie memütama yu'ixuriqui  
 memücasevixima. Müme nehamatü  
 meniu'uvacuni me'anacatuxatü,  
 'aixüa memüte'u'iyaricü vahesie  
 müpaü müti'naquenicü. <sup>5</sup>Que  
 mü'ane mürayu'liva, mücü vahepaü  
 pütiquemaritüarieni 'ixuriqui  
 müti'xacü. Que müti'teva  
 nepüca'heyetitüani haque

macayasarie quename tucari  
hexeiya. Nepünehecüatani  
quename ne'imate, müpaü ne'utaitü  
ne'uquiyari hüxie hesüana miemete  
niuqui tuayamete vahüxie. <sup>6</sup>Xaütü  
netü mu'enaxü, que'l'enieca  
tita 'Iyari mütivatahüave  
memüyutixexeüriva.

**Piratepiyasie memüyutixexeürivacai  
que mütivarunü'airi**

<sup>7</sup>Hicü müpaü quetineu'utüiri  
niuqui tuayame Piratepiyasie  
memüyutixexeüriva vahesüa  
mümieme, Müpaü canaineni  
que mü'ane Cacaüyarisie mieme  
müpasie, que mü'ane yuri maine,  
que mü'ane Raviri yavieya  
macue'e. Mücü reuyepieyu xevitü  
pücareunani, reunayu xevitü  
pücareuyepieni. <sup>8</sup>Neri müpaü  
nepütimate que pemütiyuriene.  
Camüsü, quitenie müreuyepie  
nepümasi'uxeiyasitüa. Xevitü  
pücaýüve müreunanicü. 'Esiva  
xeicüa türücaríya pepexeiya  
peru nenuquisie yapepüticamie,  
pepüca'acu'imava quename  
pecanesimate pe'utaitü.

<sup>9</sup>Tamüsü müpaü nepütivapitüaca  
müme Cauyumarie tuquitana  
memümiemete, müme Huriyusixi  
teüteriyari memüte'uyuterüva  
peru memücahüme, memüte'itava  
xeicüa. Tamüsü müme  
nepüvarahapani, me'a'ivarieme  
memütihüxima'unicü 'ahetüa.  
'Ana müpaü mepütehemaní,  
nemümasinaqui'eriecü 'ecü.  
<sup>10</sup>Nenuquisie yapemüticatüacü  
petiüca'enivatü nehapaü, neta  
nepümasi'üviyani quepaucua  
tucari maye'ani cuiépa naisarie,

quepaucua cuiépa memütama  
memü'inüasieni. <sup>11</sup>Cuitü  
nepunuani. Queneuviya tita  
pemürexeiya, xevitü 'amuma  
camasi'unavairienicü 'a'inüari.  
<sup>12</sup>Que mü'ane mürayu'iva,  
necacaüyari tuquitana nepicaqueni  
'iquisaraütüme. Yuheyemecü  
pücavayeyani hasuacu. Hesiena  
nepüra'utüani necacaüyari  
que mütiteva, necacaüyari  
quiecarieya Querusareme  
mühecua taheima macaneni  
necacaüyarisüa miemetütü  
que mütiteva, neta hecuamecü  
que nemütiteva. <sup>13</sup>Xaütü netü  
mu'enaxü, que'l'enieca tita 'Iyari  
mütivatahüave memüyutixexeüriva.

**Rautiseyasie memüyutixexeürivacai  
que mütivarunü'airi**

<sup>14</sup>Hicü müpaü quetineu'utüiri  
niuqui tuayame Rautiseyasie  
memüyutixexeüriva vahesüa  
mümieme, 'Ipaü canaineni  
que mü'ane Niuquieya Müse'lí  
mütiteva, que mü'ane yaticamietü  
yuri haitü müyuhécüata, que  
mü'ane misütüa tita Cacaüyari  
mütünetüa. <sup>15</sup>Neri müpaü  
nepütimate que pemütiyuriene.  
Ni pepücase'lí ha mühaütüpaü, ni  
pepücacuyuane ha mücuanapaü.  
Xüca tüma yemecü pehaütünique,  
xüca tüma pecuananique  
nusu. <sup>16</sup>Hicü masi 'esiva xeicüa  
xücamepaü pepü'ane pecacuanatü  
pecahütütü. 'Ayumieme ne  
nemananatihayamücü neteta.  
<sup>17</sup>'Ecü müpaü pecanaineni, Cari  
ne nepeucave, nepütita'iva,  
tixaü nepücareuyehüva  
pe'utaitü. 'Asipepücatimate que

pemü'ane. 'Axa pepü'itüarie pepünenimayasiva, tuminicü pepümave, pepacüpe, 'ixuriquicü pepümave. <sup>18</sup>Nepümasita'imaia, nehesüa queneunanai huru tuminiyari taipa mütapariyarieve. Mücücü pepeucaveni. 'Ixuriqui mütuxa queneunanaita pemenacatünicü. Mücücü pücamasücünü que pemüti'ateviya pemavetü. Hüxi cuiniya 'uhayeyari queneunanaita pema'avirixüanicü 'ahüxita. Mücücü pepeuniereni. <sup>19</sup>Queyupaümeme nemüvanaqui'erie, müme nepüvatate'a nepütiva'üquitüa neva'uximatüatü. 'Ayumieme 'aixüa 'anemecü quene'avaüriyani, quetineuhayeva que pemütiyuriene hicü. <sup>20</sup>Neuxei 'itupari varita neputive neheihusunatü. Tevi xüca nesi'u'enieni ne'utaniucacacu, xüca reuyepieni, nepeutahani hesüana, hamatüana nepüticuani, 'iyata nehamatü püticuani. <sup>21</sup>Que mü'ane mürayu'iva, mücü necanipitüamücü nehamatü mayerünicü ne'üvenisie haque nemüti'aita, neta ne'uquiyarimatü que nemütiuya 'üvenieyasie nerane'ivaca. <sup>22</sup>Xaütü netü mu'enaxü, que'ienieca tita 'Iyari mütvatahüave memüyütixex eüriva.

**Muyuavisie nenevieri que memüte'ipitüa Cacaüyari**

**4** Mericüsü mücü ne'uxeiyaca, tavari neneutaniere, mana nenixeiya quitenie reuyepiyacame muyuavisie. Que mü'ane nemu'eni matüaripaitü cuxinetapaü ti'eniürüücüme nehamatü ticuxatame, mücü müpaü

canetiniutahüave, 'Uva quenatiye'a. Nepümasixeyasitüani que mütiyüni 'arique vaüriyarica. <sup>2</sup>Yapaucua 'Iyari pünesi'uvi. Mericüsü ti'aitame 'üvenieya mana puvecai muyuavisie. Xevitü 'üvenisie nacateitüni. <sup>3</sup>Que mü'ane mana macatei que mütiyuxexeyacai, casüpe teteyaripaü curunarina teteyaripaü tiniyuxexeyacaitüni. Cuvivi 'üveni 'aurie punierecai 'esümerarüta teteyaripaü tiyuxexeyatü. <sup>4</sup>'Üveni 'aurie niti'ucaitüni 'üvenite xei teviyari heimana naucatü. 'Üvenitesie 'uquiravesixi menatecaitüni xei teviyari heimana yunaucatü me'anacatuxatü, yumu'usie huru mumayari me'anamanatü. <sup>5</sup>Mücü 'üveni manuvecaisie mana nivayemerücacaitüni neyeyuanecaitüni neyetürarücacaitüni. Cüxeme mana canicutatavecaitüni 'üveni hüxie 'atahutatü. Cüxemete Cacaüyari 'iyariteya canihücütüni 'atahutatü. <sup>6</sup>'Üveni hüxie haramarapaü tiyuxexeyatü pucumacai xicüripaü 'anetü tete manuyeheciüapaü tiyuxexeyatü.

'Üveni 'aurie naisarie mana meniu'uvacaitüni memayeneniere yunaucatü, mehahüxütücaitü yuhüxie yuvarita naisarie. <sup>7</sup>Mexüacame mayepaü pütüyuxexeyacai, hutarieca 'ütüana mieme puixipaü pütüyuxexeyacai, hairieca mieme tevipaü paye'anecai, naurieca mieme verica mütaviximepaü pütüyuxexeyacai. <sup>8</sup>Mücü yunaucatü memayeneniere yuxexuitü 'ataxeime 'anayari mecanexeyacaitüni, naisarie

yuxetüapaitü menahüxitücateitüni.

Tucaricü tücaricü

mepüca'uxipivavecai müpaü

me'utiyuatü,

Canipasieca, canipasieca,

canipasieca

Ti'aitame mücacaiyari nai

mütürücaüye,

Que mü'ane 'amuyeicacai,

Que mü'ane 'amuyeica,

Que mü'ane 'umamie.

<sup>9</sup>Quepaucua müpaü

memutiyuaneni müme

memayeneniere, 'Aixüa

quecuxaxasivani, ve'emetütü

quemarivani, pamüpariyusi

quepitüarica que mü'ane

'uvenisie maca, que mü'ane

mayeniere yuheyemecü,

me'utiyuatü, <sup>10</sup>'uquiravesixita

xei teviyari heimana yunaucatü

mepütihüxima'uni que mü'ane

'uvenisie maca hüxie. Nenevieri

menipitüaca que mü'ane mayeniere

yuheyemecü, yumumate

meneucamanani 'uvenieya hüxie

müpaü me'utiyuatü,

<sup>11</sup>Tati'aitüvame

Tacacaiyari 'acu,

'Aixüa pepütüca'iyari

'Ahesie mütinaqueniciü

'Aixüa pemücuxaxasivaniciü

Ve'eme pemümarivaniciü

Petürücaüyetü pemümarivaniciü.

'Ecü nai pepütünetüa.

Müpaü mümatinaquecü

'Apütüive naitü,

'Ayumieme pütünetüarie.

**Xapa mutacuicuiya, Muxa Nunusi**

**5** Mericüsü que mü'ane

'uvenisie macatei yuserieta

hehuriecame neniuxeiya

xapa mutacuicuiya naisata

müraca'utüarie 'atahuta seyuyaricü

meumanariexüa. <sup>2</sup>Hicü nenixeiya

niuqui tuayame mütürücaüyecai

müpaü mutayü carima,

Quepaicü 'aixüa pütüca'iyari

hesiena mütinaqueniciü

mitaveracü xapa, hexünaxüame

seyuyari. <sup>3</sup>Muyuavisie cuiepa

cuietüa ni xevitü pücaüyecai

mitaveracü xapa, mixeiyacü.

<sup>4</sup>Ne vaüca neputasuacacai xevitü

mücataxeiyarievecaicü 'aixüa

tiuca'iyaritü hesiena mütinaqueniciü

mitaveracü xapa, mixeiyacü.

<sup>5</sup>Müme 'uquirasi xevitü müpaü

netiniutahüave, Pepüca'utasuacani.

Neuxei, mayepaü marivetü

Cura nuivarieyasie miemetütü

Raviri quie mutine nana, mücü

pürayulivaxü, püyüve mitaveracü

xapa, hexünaxüame seyuyari

'atahutame.

<sup>6</sup>Hicü mana neneutaniere. 'Uveni

'aurie yunaucatü memayeneniere

vahixüapa 'uquiravesixi

vahixüapa nenixeiya Muxa Nunusi

mana 'uveme. Mumieriepaü

pütüyuxexeyacai, 'atahuta 'avayari

'atahuta hüxiyari pexeyacai.

Hüxiteya Cacaüyari 'iyariteya

canihücütüni 'atahutatü, naisarie

cuiepa meutanü'ariexüa. <sup>7</sup>'Iya

'aura nayani, que mü'ane 'uvenisie

macatei yuserieta mehuriecai

xapa nihuritüani. <sup>8</sup>Quepaucua

xapa muhuritüarie, yunaucatü

memayeneniere xei teviyari

heimana yunaucatü 'uquiravesixi

yunaitü meniutihüxima'uni

Muxa hüxie. Yuxexütü harupa

meniu'ücaitüni huru xacüyari

mepu'ücai 'ücuacü hüpüneme.

'Ücua Cacaüyari teüterimama  
vanenevieri canihücütüni. <sup>9</sup>Hicü  
cuicari hecuame meniutacuica  
müpaü me'utiyuatü,  
'Aixüa pepütiuca'iyari  
'Ahesie mütinaqueniciü  
Pemenuhurieniciü xapa  
Pemexünaxüanicü seyuyari,  
'Ecü pemumiereciü.  
'Axuriya mutayeuriciü  
Cacaüyarisie mieme  
Pepüvarutinana teüteri  
Pevaxünaque,  
Yunaima nuivarite  
Vahesüa miemete hipatü  
Naime niuquiciü memutiniuca  
Naisarie cuiepa quiecatari  
Yunaima teüteriyari vahesüa  
miemete.

<sup>10</sup>Tacacaüyari teüterimama  
Pepüta'ayeitüa  
Tati'aitüvametücacu 'iya.  
Mara'acate pepüta'ayeitüa.  
Cuiepa tepüte'aitani.

<sup>11</sup>Hicü neheutaniereca neni'enieni  
tita yumüireme niuqui tuayamete  
vaniquipaü müti'eniürüicücai.  
'Uveni 'aurie memayeneniere  
va'aurie 'uquiravesixi va'aurie  
meniti'ucaitüni müireme  
miyuniyari meyupaümetü. <sup>12</sup>Müpaü  
carima meniutyuanecaitüni,  
Muxa mumierie  
'Aixüa catiniuca'iyarini  
Hesiena mütinaqueniciü  
Türücaiyetü heucavetü  
Timaivetü yüvetü  
Mümarivaniciü  
Ve'eme mücuxaxasivaniciü  
'Aixüa mücuxaxasivaniciü  
Visi müticühüavarüvaniciü.  
<sup>13</sup>Hicü naitü mütiunetüarie  
muyuavisie cuiepa cuietüa

haramarasie, naitü mana mütitama,  
nai neniuenieni müpaü 'utaineme,  
Que mü'ane 'uvenisie maca,  
Muxa meta,  
Visi mequetecühüavarüvani,  
Ve'emetete mequecuxaxasivani,  
Visi mequecuxaxasivani,  
Mequete'aitani yuheyemeciü.

<sup>14</sup>Memayeneniere yunaucatü  
müpaü meniutyuanecaitüni, Mücü  
niuqui canise'ini, me'utiyuatü,  
'uquiravesixi me'utihüxima'ucacu  
nenevieri me'ipitüacacu que mü'ane  
yuheyemeciü mayeniere.

#### Xapa seyuyari

**6** Mericüsü neneutaniere  
quepaucua Muxa Nunusi  
mixünaxü xeime 'atahuta  
seyuyarisie mieme. Yunaucatü  
memayeneniere xeime  
neniuenieni müpaü haineme  
türanaripaü ti'eniürüicüme,  
Quenaye'a, queneuxeiya,  
'utaineme. <sup>2</sup>Hicü neneutaniere.  
Camüsü cavaya meutuxa  
mana panierecai. Que mü'ane  
hesiena macatei tupi pacuecai.  
Muma cananutimaniyarieni.  
Rayu'ivarümetü neyani,  
rayu'ivaque meta.  
<sup>3</sup>Hicü quepaucua mixünaxü  
seyu hutarieca mieme, mayeniere  
neniuenieni hutarieca mieme  
müpaü 'utaineme, Quenaye'a  
queneuxeiya. <sup>4</sup>Hicü xevitü  
cavaya nivayeyani heuxuretü.  
Que mü'ane hesiena macatei  
müpaü catiniupitüarieni  
müvamuinanicü cuiepa memütama  
'aixüa memücateyuxeiyanicü,  
memüyucuinicü. 'Ixi para 'amütevi  
pucueitüarie.



<sup>5</sup>Hicü quepaucua mixünaxü seyu hairieca mieme, mayeniere neniuenieni hairieca mieme müpaü 'utaineme, Quenaye'a queneuxeiya. Hicü neneutaniere. Camüsü cavaya meuyüvi mana panierecai. Que mü'ane hesiena macatei quiru ti'inünüatame nahapacaitüni yumamasie. <sup>6</sup>Hicü xeime neniuenieni yunaucatü memayeniere memati'ucai hixüapa heyeniucame que müti'eniüriücücai. Müpaü niutayüni, Türicu merie cacuniyari müpaü quetinaye'atüa xei tucari que müti'iva tevi, sevara meta xei cacuniyari yaxeicüa raye'arücame. 'Asipepüca'iyurieni viya caxie xeicüa.

<sup>7</sup>Hicü quepaucua mixünaxü seyu naurieca mieme, mayeniere neniuenieni naurieca mieme müpaü 'utaineme, Quenaye'a queneuxeiya. <sup>8</sup>Hicü neneutaniere. Camüsü cavaya meucutuxie mana panierecai. Que mü'ane hesiena macatei Tacucuyame catinitevacaitüni. Müquite vahüveme 'utüana niveiyacaitüni. Heiserie mecaniupitüarieni cuiepa memütama vahepaüsita, nauca taparisie mieme, xei tapari vahepaüsita que memüteyupaüme, memüvacuinicü 'ixiparacü hacacü cuiniyacü cuiepa miemete yeutari vacü.

<sup>9</sup>Hicü quepaucua mixünaxü seyu 'auxüvirieca mieme, mürayutimavatüretüa me'ateme nenivaruxeiya 'iyarite, müme memucui'ivaxü Cacaüyari niuquieyasie memüteviyacaicü, hesiena memiemetetütü

memüyuhecüatacaicü, müme va'iyarite. <sup>10</sup>Carima meniutihivacaitüni müpaü me'utiyaütü, Cusiyari 'acu pemüpasie yuri pemaine, quepaucuaque petivatahüaveni, quepaucuaque tataruri petivapitüani cuiepa memütama taxuriya memutayeuricü. <sup>11</sup>Hicü yuxexütü mecaniuhuritüarieni 'ixuriqui mütuxa memenacatünicü. Müpaü mepüte'utahüavarie memü'uxipiecacü yareutevicacu 'acuxi, te'uximayatamete memücayunaitütücaicü cuxi va'ivama memücüi'ivaquecai vahepaü.

<sup>12</sup>Hicü neneutaniere quepaucua mixünaxü seyu 'ataxevirieca mieme. 'Ana cuie carima niutayuanecaitüni. Tau puyürixü 'ücarü müyüvipaü. Meseri naitü xuriyapaü 'anetü nayani. <sup>13</sup>Xuravesixi muyuavisie memeucatecai meniucaxürieni cuiepa, xapasie que müticaxürüve tacariyari carima 'ucu'ecacacu. <sup>14</sup>Muyuavi hixüapa pusanixü xapa mütacuicuiyanipaü. Naitü yemurite cuiepa haramara hixüapa mayemata xaüsie püta pupasi, haque mütinierecai pumavecai. <sup>15</sup>Hicü cuiepa te'aitamete vavemete cuyaxi va'uquiyarima memeuca'ucai memütürücaicai, yunaitü vaüriyarica memüte'uximayatametetücai memüyünü'acaita, yunaitü meniuyuti'avietaxüani terüta 'aitüa hürisie. <sup>16</sup>Müpaü metenitahüave hürite 'aite, Quetananucanama, quetaneuti'avietta catasixeyacü que mü'ane 'uvenisie maca Muxa Nunusi catasiehcanicü. <sup>17</sup>Tucari

mümarive canaye'aniri quepaucua memüyeha'ani. Quepai püyüve 'amuveni, meputiyuanecai.

### Queyupaümetü memuseyumarie

**7** Mericüsü 'ana niuqui tuayamete nenivaruxeiya yunaucame. Taserieta ta'utata tahixüapa tasutüa meti'utü meninenacaitüni 'eca, naisarie müca'uyeicanicü cuiepa haramarasie naime cüyesie. <sup>2</sup>Hicü xeime neniuxeiya niuqui tuayame tau manatineica 'utimiecame, Cacaüyari mayeniere seyuya 'acuetü. Hicü carima nivarutahivieni niuqui tuayamete yunaucame, müme müpaü memütepitüariecai 'axa memiyurienicü cuie haramara. <sup>3</sup>Müpaü niutayüni, Mexicuxi 'axa xepüca'iyurieni cuie haramara naime cüye, tecavati'inüaritävavecacu tacacaüyari te'uximayatametemama vacanata. <sup>4</sup>Hicü 'inüarite nenetimani, que memüteyupaümecai memuti'inüaritärie. Xei sienituyari miriyari heimana huta teviyari miriyari heimana nauca miriyari meyupaümetü mecaniu'inüaritärieni 'Ixaheri xiüyarimama. Xexütü nuivarite mepuxuavecäi. <sup>5</sup>Cura nuivarieyasie miemete tamamata heimana huta miriyari mecaniu'inüaritärieni, Xuveni nuivarieyasie miemete tamamata heimana huta miriyari, Cari nuivarieyasie miemete tamamata heimana huta miriyari, <sup>6</sup>Aseri nuivarieyasie miemete tamamata heimana huta miriyari,

Nepütari nuivarieyasie miemete tamamata heimana huta miriyari, Manasexi nuivarieyasie miemete tamamata heimana huta miriyari, <sup>7</sup>Simiyuni nuivarieyasie miemete tamamata heimana huta miriyari, Revi nuivarieyasie miemete tamamata heimana huta miriyari, 'Isacari nuivarieyasie miemete tamamata heimana huta miriyari, <sup>8</sup>Savuruni nuivarieyasie miemete tamamata heimana huta miriyari, Cuse nuivarieyasie miemete tamamata heimana huta miriyari, Venicamini nuivarieyasie miemete tamamata heimana huta miriyari mecaniu'inüaritärieni.

### Meyümüiretü memanacatuxacai

<sup>9</sup>Mericüsü 'ana neneutaniere. Camüsü teüteri mecaniyümüirecaitüni, tevi püca'yüvecäi müvaruti'inüatacäi. Yunaimie teüteriyari vahesüa mecanimie metetücaitüni, yunaimie nuivarite vahesüa mepümüie metetücai, naisarie cuiepa mepüquiecataritäcäi, naime niuquicü meputiniucacai. Mana meniti'ucaitüni 'uveni huxie Muxa huxie me'anacatuxatü, tacü me'a'ütü yumamasie. <sup>10</sup>Carima müpaü meniutiyuanecaitüni, Catiniyuvicueisitüvamettüni tacacaüyari 'uvenisie maca, Muxa meta. <sup>11</sup>Yünaitü niuqui tuayamete mana meniti'ucaitüni 'uveni 'aurie, 'uquiravesixi va'aurie, yunaucatü memayeniere va'aurie. Hicü meniutihüxima'uni 'uveni huxie. Nenevieri mecanipitüani Cacaüyari <sup>12</sup>müpaü me'uti'yuatü, Niuqui canise'ini.

Visi queticühüavariüvani  
 'Aixüa quecuxaxasivani  
 Timaivetü quemarivani  
 Pamüpariyusi quepitüarieca  
 Ve'eme quexasivani  
 Türücaüyetü yüvetü quexasivani  
 Tacacäyari yuheyemecü.  
 Müpaü xeicüa cani'aneni.

<sup>13</sup>Mericsü xevitü müme  
 'uquirasi müpaü canetiniutahüave,  
 'Ime memanacatuxa quehate.  
 Haque mepeyecü. <sup>14</sup>Ne müpaü  
 netinicühüaveni, Neuxei, masi  
 'ecü yapepütimate. 'Iya nerahüave,  
 'Ime mecanihümetüni memu'axüa  
 vaücava me'uximatüarieca.  
 Meniti'ecua yu'ixuriqui, menitituriya  
 Muxa Nunusi mumieriecü.

<sup>15</sup>Ayumieme Cacaüyari 'uvenieya  
 hüxie meniti'uni.

Tucaricü tücaricü  
 Hesiena mieme  
 meteni'uximayaca tuquitana.  
 Que mü'ane 'uvenisie maca  
 Püvateütani va'üviyatü.

<sup>16</sup>'Uxa'atüni varie  
 Mepücaheuhacacuicuni,  
 Mepücaheuharicuni.  
 Tau pücvaxürimütüaca,  
 Xüri pücvaxü'uximatüaca.

<sup>17</sup>'Uveni manuve 'aurie  
 Mücü Muxa mana 'uветü  
 Mücü püva'üviyani  
 Muxasi vahüvemepaü yüanetü.  
 Püvacuvitüneni  
 Naisarie haixa mücuneniere  
 Mana meharetü mepayeyuyurini.  
 Cacaüyari naime va'ucai  
 Cana'itiexüamücü vahüxita.

#### Seyu 'atahutarieca mieme

**8** Mericsü quepaucua  
 mixünaxü seyü 'atahutarieca

mieme, muyuavisie cayuvatü  
 putamarixü merie hurayari  
 yacütütü. <sup>2</sup>Hicü niuqui tuayamete  
 Cacaüyari hüxie memüti'u  
 necanivaruxeiya 'atahutame.  
 Cuxineta meniuta'üitüarieni  
 'atahutame. <sup>3</sup>Hicü xevitü  
 'aura nayani niuqui tuayame.  
 Mürayutimavatüre niutaqueni  
 huru pusiyaari 'ahanatü. Vaüca  
 'üca visi mu'üa caniutitüarieni,  
 yunaime Cacaüyari teüterimama  
 vanenevierisie mieme, mimavanicü  
 mürayutimavatüresie hurucü  
 muveviya 'uveni hüxie maniere.  
<sup>4</sup>Hicü 'üca cuauniyari  
 niuti'enirümecatüni Cacaüyari  
 teüterimama vanenevierisie mieme,  
 niuqui tuayame 'etucacu Cacaüyari  
 hüxie. <sup>5</sup>Hicü niuqui tuayame  
 'enuhanaca pusi, 'itahüniyaca  
 tai mürayutimavatüre mieme,  
 neihüani cuiepa. Pecütürarücaai  
 putayuanecai pucumerücaai cuie  
 putayua.

#### Cuxinetate

<sup>6</sup>Hicü niuqui tuayamete  
 'atahutatü, 'atahuta cuxinetayari  
 mema'ücai meniuyucuha'aritäni  
 memitihüsienicü.

<sup>7</sup>Hicü mexüacame nitahüsieni  
 yucuxineta. Te taimatü xuriya  
 nütü neucaxüriyani cuiepa.  
 Cuie 'esivatücacu xei terisi  
 niutataiyarieni cüyexi 'esivatücacu  
 xei terisi meta, 'üxa müsisiüravi  
 naitü niutataiyarieni.

<sup>8</sup>Hicü hutarieca mieme niuqui  
 tuayame nitahüsieni yucuxineta.  
 Yemuripaü tiyuxexeyatü 'enetü  
 tatü neucahüiyani haramarasie.  
 Haramara 'esivatücacu xei terisi

xuriya nayani. <sup>9</sup>Haramarasie memüye'uva 'esivatücacu xei terisi meniucui. Naviyasixi meniutatümayarieni 'esivatücacu xei terisi.

<sup>10</sup>Hicü hairieca mieme niuqui tuayame nitahüsieni yucuxineta. Taheima 'acanea cuiepa niucaveni xurave 'enetü cüxemepäu tatü.

Hatuxame haixa mücunenieresie 'esivatücacu xei terisise niucaveni.

<sup>11</sup>Xurave Masivi catinitevacaitüni. Ha 'esivatücacu xei terisi hasivitü nayani. Yümüiretü teüteri meniucui ha masiürixücü.

<sup>12</sup>Hicü naurieca mieme niuqui tuayame nitahüsieni yucuxineta. Tau puveiya 'esivatücacu xei terisi, meseri yaxeicüa, xuravesixi yaxeicüa. Niucuyüre, tucari mücahecüacacü 'esivatücacu xei terisi, tücarita yaxeicüa.

<sup>13</sup>Hicü neneutaniere. Niuqui tuayame neniuenieni muyuavi hixüapa 'aviximeme, carima müpäü 'utaineme, Xüa 'ui, xüa 'ui, xüa 'ui que me'itüarieni cuiepa memütama quepaucua hipatü cuxineta müthüsierieni haicatü, quepaucua niuqui tuayamete memitihüsieni.

**9** Hicü 'auxüvirieca mieme niuqui tuayame nitahüsieni yucuxineta. Xurave neniuxeiya taheima mieme cuiepa 'ucavecu. Müvatixavasie mieme yaviyari caniuceitüarieni cümana müreyepienicü meucatevasie.

<sup>2</sup>Hicü tineuyepieni müvatixavasie. Hicü meucatevasie cuauni nivatineicani teca 'amüpa cuauniyaripäu 'anetü. Tau cahecüacacu pucuyürixü, ca'anuyehcüatü patüa cuauni

müvatineicacacü müvatixavasie.

<sup>3</sup>Hicü cuaunisata mehatinexüaca, cuiepa menivacüne 'usicari.

Türücarिया mecaniupitüarieni yaxeicüa terücaxi cuiepa miemete que memütetürücavi.

<sup>4</sup>Müpäü meteniutahüavarieni, 'asimemüca'iyurienicü cuiepa mieme 'üxa, naime müsisiüravi naime cüye, masi 'axa memüvayurienicü teüteri Cacaüyari seyuya memücahexeiya yucanata.

<sup>5</sup>Müpäü meteniupitüarieni, memücavacuinicü, masi memüva'uximatüacacü 'auxüme meseri. Que memüteva'uximatüacai, yaxeicüa mecaniyüacaitüni cumu quepaucua tevi terüca miquei. <sup>6</sup>Mücü tucarisie teüteri mepeucuicuni peru mepüyutatexieni memücuinicü. Mepüyuvautüveni memücuinicü, peru müiya püyuta'una, vahesie pumaveni.

<sup>7</sup>'Uscari que memüteyuxexeiyacai, cavayasixi memücuha'arisie cuyacü mecani'anenecaitüni. Yumu'usie huru mumayaripäu 'aneneme menanutimanacaitüni. Yühüxie teüteri que memüte'aye'anene müpäü mepaye'anenecai müme.

<sup>8</sup>'Ucari vahepäü mepüte'ucüpacai. Vatame mayesi vatamepäü pü'anenecai. <sup>9</sup>Tepüapäu 'aneneme mepanacatütücatei yutavisie. Yu'anacü meputixuvarücacai, cuyaxi vacaxetatepäü que mütiuyuatüca cavayasixi mehehapacacu cuyacü meheutanausaxüaximetü.

<sup>10</sup>Vacuaxi terücaxi vacuaxipäu cani'anenecaitüni 'anuyemümüsütü.

Yucuaxicü mecanitürücavicaütüni, 'auxüme meseri 'axa memüvayurienicü teüteri. <sup>11</sup>Que mü'ane mütiva'aitüvacai niuqui tuayame canihücütücaütüni mana müre'aitacai meucatevasie. Hepürayusixi vaniuquicü 'Avaruni catinitevacaitüni, Cüriyecusixi vaniuquicü Tiyuca'uname titevatü.

<sup>12</sup>Naye'aniri, xüa 'ui matüari que mutayü. 'Arique cuxi canaye'amüci hutacüa xüa 'ui que mutayü.

<sup>13</sup>Hicü 'ataxevirieca mieme niuqui tuayame nitahüsieni yucuxineta. Haqueva meve mürayutimavatüre nauca 'avayari mexeiya hurucü müveviyatüca Cacaüyari huxie muve, 'ava hixüapa 'utaniucame xeime neni'enieni. <sup>14</sup>Müpaü tinitahüave 'ataxevirieca mieme niuqui tuayame cuxineta macuecai, Niuqui tuayamete quenivarutixüna yunaucame, müme hatuxame 'amüpasie 'Eupürate mütitevasie memanutaxüriya. <sup>15</sup>Hicü meniutixünarieni yunaucatü niuqui tuayamete memücuha'arisiecai mücü hurayari mücü tucari mücü meseri mücü viyari mecuevietü, memüvacuinicü teüteri 'esivatücacu xei terisi. <sup>16</sup>Vacuyaxima cavayasixi vahesie mematecai huta sienituyari miriyari miriyari mecaniyupaümeccaitüni. 'Inüari nenetimani.

<sup>17</sup>Hicü heinüsitapaü nepütünierixü, 'ipaü me'aneneme nenivaruxeyia cavayasixi, müme vahesie mematecai meta. Yutavisie menenacatütücateitüni tepüa mayetaimäyütücatei mayecuauniyatücatei mayetataxavi 'asupürepäü. Cavayasixi

vamu'u mayesi vamu'upaü cani'anenecaitüni. Vateta nivayeneicacaitüni tai cuauni 'asupüre. <sup>18</sup>Haica cuiniyayaricü meniucuini teüteri 'esivatücacu xei terisi, taicü cuaunicü 'asupürecü vateta müvayeneicacai.

<sup>19</sup>Cavayasixi yütürücaria mecanexeyiacaitüni yuteta yucuaxisie. Vacuaxi cuterixi vahepaü cani'anenecaitüni 'anutimu'utücaütü. Mücücü 'axa mepüvayuriecai.

<sup>20</sup>Hipatü teüteri mepüca'ucui'livaxü mevacuicacu. Müme mepücatehayevacai mete'ayexeyatü tita yumamacü memütevevie. Mepücatehayevacai nenevieri mevapitüatü cacäyarixi 'axa memü'anene, huru pürata vürunise tete cüye cacäyarixiyari sepa memücaheuneniere memücaheu'enana memücaheucünivave.

<sup>21</sup>Mepücatehayevacai que memüteyummivacai que memüteyuquevayacai que memütevacumaüvacai müme memücava'üitamaticai memücavacünamatücai, que memütenavayacai.

### Niuqui tuayame xapa mahuriecai

**10** Hicü xeime niuqui tuayame neniuxeiya türücaüyeme taheima 'acamiecame, haivitüri 'anacatücumé, cuvivi 'anamacame yumu'usie. Taupaü nayexavatücaütüni yühüxie, 'ücateya tai 'iquisaräyariipaü pütüyuxexeyacai. <sup>2</sup>Yumamasie xapa nahuriecaütüni 'esiyeeume verime. Yuserieta niutaqueni

haramarasie, yu'utata cuiepa.  
<sup>3</sup>Hicü carima niutaniuni maye que mütiuhiva. 'Utaniucu, 'atahuta türanariyari niuyuani. <sup>4</sup>Quepaucua muyua 'atahuta türanariyari ne nepütiti'utüaniquecai. Xeime neniuenieni taheima müpaü haineme, Seyücü queneunama tita pemütü'eni müretüranaxü 'atahuta türanariyari, yapepücaraca'utüani.  
<sup>5</sup>Hicü mücü niuqui tuayame nemuxei haramarasie cuiepa 'uveme, yuserieta neutimeni muyuavisiepaitü. <sup>6</sup>Niuyuhiritüani 'i'eniecacu que mü'ane yuheyemecü mayeniere, que mü'ane mitivevi muyuavi tita muyuavisie mütixuave cuie tita cuiepa mütixuave haramara tita haramarasie mütixuave naime mütiitivevi. Müpaü niutayüni, 'Ari hicürixüa neutipareri, <sup>7</sup>masi quepaucua 'atahutariECA mieme niuqui tuayame mütaniuni, quepaucua mitahüsieni yucuxineta, 'ana tita Cacaüyari mütiuti'avietaxü canaye'amücü caniunüre, que mütivacuxaxatüvacai texaxatamete hesiena mieme memüte'uximayacai.  
<sup>8</sup>Hicü que mü'ane nemu'eni taheima 'utaniucame, mücü tavari pünesi'utahüavixü müpaü 'utaitü, 'Uma quenemie, quenahuri 'iya xapa 'esimüyeva muveri niuqui tuayame mehurie haramarasie cuiepa 'uvetü. <sup>9</sup>Hicü neneyani niuqui tuayamesüa müpaü neticühüavetü munesihuritüanicü xapa 'esimüyeva. 'Iya müpaü netinicühüaveni, Quenanuhurisü queneutacua'i. 'Ayuriepa pasiüre, peru 'ateta xietepaü pacacare. <sup>10</sup>Hicü xapa 'esimüyeva ne'anuhurieca niuqui

tuayame mehuriecai, nenitacuani. Neteta xietepaü pacacarixü. Quepaucua nemitacuai, neyuriepa hasivitü nayani. <sup>11</sup>'Iya müpaü pünetiutahüavixü, Neuyeveca 'ecü tavari Cacaüyarisie mieme pemüticuxatanicü yumüireme nuivarite vahepaüsita naisarie cuiepa miemete vahepaüsita müireme niuquicü memütiniuca vahepaüsita yumüireme te'aitamete vahepaüsita.

### Tehecüatamete yuhutatü

**11** Mericüsü haca necaniucueitüarieni ti'inünüatamepaü 'aneme. Müpaü netiniutahüavarieni, Quenanucuquexi, Cacaüyari tuquieya queneuti'inüata mürayutimavatüre meta, mümeta memüyunenevietive tuquipa quenivaruti'inüata. <sup>2</sup>Tuqui tacua queneuhayeva xeicüa. Pepüca'iti'inüata, mana memupitüariecü nuivarite hipatü. Müme meniquesicuni Cacaüyari quiecariena huta teviyari heimana huta meseri. <sup>3</sup>Neri yuhutame necanivarexeiyani tehecüatamete. Müme nepüvatiyasani que memüte'unenierixü müpaü memütécuxatanicü xei miriyari heimana huta sienituyari heimana haica teviyari tucari, maixa me'anacatütücaitü hiverica hepaüsita.  
<sup>4</sup>Huriva cüyeyari hutatü, cüxeme hutatü cuie cusiyari hüxie müti'u, 'ime mecanihümetüni. <sup>5</sup>Xüca xevitü 'axa vayuriemücüni, tai püvayeneica vateta, püvatixüsitüani müme memüvaraye'unie.

Müpaü catinimieriemücü que mü'ane 'axa müvayuriamücü.  
<sup>6</sup>Müme heiserie mecanexeyani memeitinanicü muyuavi mücacaviyecü mexi metecuxata. Heiserie mecanexeyanita ha hepaüsita, xuriya memayeitüanicü, memüvativanicü cuiepa memütama naima cuiniyacü sepa quepaümexa mütivanaque. <sup>7</sup>Quepaucua meminüni müpaü metehécüatatü, yeutanaca meucatevasie matine vara'ivamütü püyumieneni. Vara'ivame nivacuimücü.  
<sup>8</sup>Vacaxarite quiecarı hixüapa pütiheni quiecarı 'amacuyevásie. 'Iyari que mütimate 'inüaricü, Suruma catinacutévaca, 'Equipitu meta racuteva mücü quiecarı. Mana Tati'aitüvame curuxisie caniumierieni. <sup>9</sup>Hipatü naisarie cuiepa miemete, nuivarite vahesüa miemete müireme niuquitecü memutiniuca vahesüa miemete yumüireme teüteriyari vahesüa miemete yunaitü menixeyiacuni vacaxari haica tucari heimana merie tuca. Mepücvataunieni memücateuquiyanicü vacaxari teuquiyapa. <sup>10</sup>Cuiepa memütama mepüyutemamavieca mevaxeyatü, temavierica mecanexeyiacuni, 'imiquieri mepüyutanü'airiexüani, texaxatamete yuhutatü memüva'uximatüacaicü cuiepa memütama. <sup>11</sup>Hicü haica tucari heimana merie tuca 'anucayacu 'iyari nieritüvame nivaruviya Cacaüyari heiyenü'acu. Yü'ücatecü menanucu'uni, müme memüvaruxei cuini mieme meniutimamani. <sup>12</sup>Hicü xeime meniu'enieni taheima 'utaniucame

müpaü mütivarutahüavixü, 'Uva xequenanicüni. Muyuavisie menanüticüne haivütürisata, müme memüvaraye'uniecai mevaxeyiacacu. <sup>13</sup>'Anari cuie carima niutayuani. Quiecarı tapa xecüa nacaxürieni tamamata taparisie mieme xei tapari. 'Atahuta miriyari meyupaümetü teüteri meniucui'iva cuie 'utayuacu. Hipatü meneumamacaitüni, 'aixüa metenicuxatacaitüni Cacaüyari taheima macave hepaüsita.  
<sup>14</sup>Naye'ani xüa 'ui hutarieca que mutayü. Cuitüva canaye'amücü hairieca xüa 'ui que mutayü.

#### **Cuxineta 'atahutarieca mieme**

<sup>15</sup>Hicü 'atahutarieca mieme niuquı tuayame nitahüsieni yucuxineta. Hicü carima menetiniucacaitüni muyuavisie müpaü me'utiyuatü, Hicüsüari Tati'aitüvamematü hesüana mieme Cürisitumatü, müme cuiepa mete'aitatü mecanacüne. Catini'aitacamücü yuheyemecü.  
<sup>16</sup>Hicü 'uquiravesixi xei teviyari heimana yunaucatü Cacaüyari hixie mematecai 'uvenitesie, müme meniutihüxima'uni. Nenevieri mecanipitüani Cacaüyari <sup>17</sup>müpaü me'utiyuatü,

Pamüpariyusi tepümasipitüa  
 'Ecü Ti'aitame Cacaüyari  
 Naimecü pemütürücaüye 'acu,  
 Que mü'ane 'amuyeicacai  
 Que mü'ane 'amuyeica,  
 Que mü'ane 'umamie  
 'Ecü pecanihücütüni,  
 Penisütüani  
 'Acümana peyüanetü  
 Cuini mieme que  
 pemütitürücaüye.

Penisütüani

Peti'aitatü.

<sup>18</sup>Nuivarite meniha'acaitüni,  
Peru 'ahaxüa canaye'ani,  
Tucari raye'a  
Pemüvatahüavecü müquite,  
Va'ivarica pemüvaminicü  
'Ahesüa miemete  
te'uximayatamete,  
Texaxatamete,  
Cacaüyari teüterimama,  
Müme memümateheuyehüviri  
Que mü'ane pemühücü,  
Türi 'uquiravesixi yunaitü.  
Naye'ani meta  
'Ecü pemüvaseviximanicü  
Müme cuie memüseviximacai.

<sup>19</sup>Merücüsü Cacaüyari tuquieya  
caneuyepiere muyuavisie.  
Cacuni türatuya mü'inüariyari  
canimasiücücäitüni tuqita  
yecaitü. Nivayemerücacaitüni  
neyeyuanecaitüni  
neyetürarücacaitüni cuie  
niutayuani te 'enenetü  
niucaxürieni.

### 'Uca cumatü

**12** Merücüsü 'inüari masiücütü  
nayani muyuavisie  
marivetü. 'Uca mana nanierecaitüni  
tau 'anacatütü meserisie 'avetü,  
yumu'usie muma 'anamatü  
tamamata heimana huta xuravesixi  
mumayari <sup>2</sup>nunusi 'ayetütü.  
Niutahivacaitüni 'icucüinecacu cui  
tinivenique. <sup>3</sup>Xevitüta masiücütü  
nayani muyuavisie 'inüaritütü, cu  
'epatü heuxuretü 'atahuta mu'uyari  
hexeyatü, tamamata 'avayari  
hexeyatü, yumu'utesie 'atahuta  
mumayari 'anamanatü. <sup>4</sup>Yucuxicü  
nivananacahapani xuravesixi

muyuavisie 'esivatücacu xei teresi,  
nivareucaxürieni cuiepa. Cu 'amüpa  
'uca mütiniverümecai hüxie niuhuni  
'icuaimütü nu'aya quepaucua  
mütiniveniquecai. <sup>5</sup>Hicü 'uquitüme  
niutiniveni, que mü'ane yunaime  
nuivarite tiva'aitüvame mayani, que  
mü'ane tepüa 'isüyari müticueni.  
Nu'aya panutivitüque Cacaüyarisüa  
'uvenieya macavesiepaütü. <sup>6</sup>Hicü  
'uca niuyuta'una macumavesiepai,  
haque Cacaüyari meicuha'aritüiri  
mana me'üvyarienicü xei miriyari  
heimana huta sienituyari heimana  
haica tevyari tucari.

<sup>7</sup>'Ana cuya niutaveni muyuavisie.  
Miyeri, niuqui tuayametemama  
yunaitü menisütüani  
cumatü meyucüitüvetü. Cu  
niyumienecaitüni, niuqui  
tuayametemama hepaüna, <sup>8</sup>peru  
mepüyutatexi, huyeri pumavecai  
memütenaquenicü muyuavisie.  
<sup>9</sup>Hicü mücü cu 'amüpa, mücü cu  
matüaripai mümieme Cayumarie  
mütiteva Satanaxi mütiteva,  
que mü'ane mütiva'irüviya  
yunaime cuiepa memütama,  
mücü cananuyehüiyani mana.  
Cuiepapai neucahüiyani, niuqui  
tuayametemama 'utümana  
meneucaxüriyani mana.

<sup>10</sup>Hicü xeime neniuenieni  
müpaü mutayü carima, Hicürixüa  
canaye'ani, canimasiücünü  
tacacaüyari que mütiyuvicueisitüva  
que mütitürücäiye que müti'aita.  
Canimasiücünü Cürisitu heiserie que  
mürexeyia hesüana miemetütü. Que  
mü'ane müvaxaneta ta'ivamarixi,  
mücü cananuyehüiyani, que mü'ane  
tacacaüyari hüxie müvaxaneta  
tucarcü tücaricü. <sup>11</sup>Mümeri



mene'iva Muxa xuriyayacü, memütecuxatacaicü meyuhecüatati, yutucari memücauyucueriricaicü sepa memucui'ivaxü. <sup>12</sup>Ayumieme quene'atemavieca muyuavi 'acu, xeme muyuavisie xemetitei xequeneyutemamavieca. Xüa 'ui cuiepa xemütama haramarasie xemütama. Cauyumarie neucahüiyani xehesüa cui ha'atü müpaü timaitü, yapaümexa xeiçüa püyüveni.

<sup>13</sup>Meriçüsü quepaucua cu müpaü müretima cuiepapai macahüiya, niveiyacaitüni mücü 'uca 'uqui mutinivexü. <sup>14</sup>Hicü 'uca caniupitüarieni ma'anatücanicü verica 'amünenapaü, macumavesiepai manuvienicü yuhuyeripa, haque müca'ixeiyacü cu, haque müremiquieca xei viyari, 'ariqueta huta viyari, 'ariqueta merie viyari. <sup>15</sup>Hicü cu hatuxamepaü pame ha nanatihayani 'uca 'utüma 'enuhausitüanique. <sup>16</sup>Peru cuie nipareviecaitüni 'uca. Nivatixavare, muva neucayeurieni hatuxame cu menatihayaxü yuteta. <sup>17</sup>Hicü cu niuyeha'ani 'uca hepaüsita. Neyani müyumienenicü, hipame hesiena memüyenunuiva varaye'unietü, müme yamemütecahu Cacaüyari que müti'aita, memüyuhēcüata Quesusisüa memiemetetütü, müme varaye'unietü.

#### Yeutari yuhutatü

**13** Meriçüsü mana ne'utaqueca xiücaripa haramara tesita, yeutanaca neniuxeiya haramarasie 'anatiyeiximeme. Tamamata 'avayari

nexeyacaitüni, 'atahuta mu'uyari meta, 'avateyasie tamamata mumayari nanamanacaitüni. Mu'uteyasie püra'utücatei que mütiyuseviximacai 'axa titevatü.

<sup>2</sup>Mücü yeutanaca nemuxei tüvepaü catiniyuxexeyacaitüni, husepaü re'ücatü, mayepaü retenitü. Hicü cu 'amüpa nipitüani yütürüariya, heiserie nipitüanita müti'aitanicü 'uvenisie 'acaitü haque cu müre'aitacai, heiserie vaüca nipitüanita.

<sup>3</sup>Mu'uya xevitü mumieriepaü pütüyuxexeyacai, peru que mütiucuinixü nanayehüiyani sepa mümüximecai. Yunaitü cuiepa memütama meni'iyarixiecaitüni me'ixeiyatü yeutanaca, hesiena mepüteviyacucai. <sup>4</sup>Nenevieri menipitüani cu, mücü heiserie mipitüacü yeutanaca. Yeutanacata nenevieri menipitüani müpaü me'utiyuatü, Quepaicü mücü yeutanacapaü pü'ane, quepaicü püyüve hamatüana müyumieneni.

<sup>5</sup>Hicü niuqui niupitüarieni vaüca müticuxatanicü, miseviximanicü Cacaüyari 'axa 'utaitü hepaüsitana. Heiserie caniupitüarienita huta teviyari heimana huta meseri müpaü mütiyurienenicü. <sup>6</sup>Hicü nisütüani 'axa 'utaitü Cacaüyari hepaüsita, 'iseviximatü que mü'ane mühücü, 'iseviximatü tuquieyata, mümeta muyuavisie memütitei vaseviximatü nisütüani.

<sup>7</sup>Hicü müpaü tiniupitüarieni müyumienenicü Cacaüyari teüterimama müvaraye'uniecacü, müvara'ivanicü. Heiserie pupitüarie yunaime nuivarite vahepaüsita, naime cuiepa quiecatari

vahepaüsita, naime niuquicü memutiniuca vahepaüsita, yunaime teüteri xi vahepaüsita. <sup>8</sup>Yunaitü cuiepa memütama nenevieri menipitüacaitüni, müme xeicüa cuie munetüariepai memacayasarie Muxa mumierie xapayasie quename tucari mehexeiya manuyünesie, müme xeicüa nenevieri mepüca'ipitüacai.

<sup>9</sup>Xaütü netü mu'enaxü.

<sup>10</sup>Que mü'ane teüteri teva müvarahapa

Vaviyatü,

Mücü nanuhaniemücü tevapai.

Que mü'ane 'ixiparacü

mütiyumemiva,

Mücüta 'ixiparacü

Canimieriemücü vaüriyarica.

Müpaü metemaitü Cacaüyari teüterimama mepüte'uca'enivani yuri mete'erietü.

<sup>11</sup>Merücüsü 'ana xeime necaniuxeiya yeutanaca cuieta matine. Cana'avatücateitüni muxapaü. Cupaü tiniuxaxatacaitüni.

<sup>12</sup>Yeutanaca matüari müyüanecai heiserie que mürexeyacai, 'icü naimecü yaxecüa catiniyurieneni hüxiena 'uветü. Nicuyuitüani cuie, müme cuiepa memütamata nivarucuyuitüani nenevieri memipitüanicü mücü yeutanaca matüari müyüanecai, que mü'ane manayehüiya müximetü quepauca mütiucuinxü. <sup>13</sup>Inüari püvevie mamarivaveme, tai 'aitüatü taheima macanenicü cuiepa teüteri me'ixeyiacacu. <sup>14</sup>Cuiepa memütama tiniva'irüviyani müireme 'inüari pitüarietü, yamütiyurienenicü yeutanaca hüxie 'uветü. Müpaü tinivaruta'aitüani

cuiepa memütama 'üquisica memütavevienicü yeutanacapaü tiyuxexeyame, que mü'ane manutanierixü sepa 'ixiparacü mütiucuinxü, mücüpaü 'aneme. <sup>15</sup>Hicü müpaü catiniupitüarieni 'iyari mipitüanicü yeutanaca 'üquisicayari, mücü müticuxatanicü yeutanacapaü tiyuxexeyatü, müpaü müti'aitanicü memücüi'ivacü queyupaümetü nenevieri memüca'ipitüa yeutanaca 'üquisicayari. <sup>16</sup>Hicü müpaü tinivaruta'aitüani türi 'uquiravesixi yunaime, memeuca'u memümamave, müme memüyünü'a müme vaüriyarica memüte'uximaya yunaime, yumamasie yuserieta memü'inüaritüarienicü yucanata. <sup>17</sup>Tevi püca'yüve tixaütü mütinanenicü mütitanicü me xüca ca'inüaritüarieveni, ra'utü que mütiteva yeutanaca, que müti'inüasie terüvaricaya 'inüariyari nusu. <sup>18</sup>Icücü yapüretimani, que mü'ane 'aixüa müremu'u que'iti'inüata yeutanaca 'inüasicaya. Tevi müpaü catini'inüasicaya que mütiteva. 'Inüasicaya 'ataxeime sienituyari heimana haica teviyari heimana 'ataxevi canipaümeni.

#### Mümüiremete vanüavari

**14** Merücüsü 'ana neneutaniere. Camüsü mücü Muxa Nunusi mana navecaitüni yemurisie Siyuni mütitevasie. Hamatüana mana meniti'ucaitüni xei sienituyari miriyari heimana huta teviyari miriyari heimana nauca miriyari meyupaümetü, yucanata mete'a'utücaitü mücü

que mütiteva, 'uquiyarieyata que mütiteva. <sup>2</sup>Yuariya neniuenieni muyuavisie haineme, ha 'amüpapau ti'eniüriücüme, türanari mütürücaüyepau ti'eniüriücüme. Yuariya nemu'eni, canarivivamete vacuicari canihücütücaitüni. <sup>3</sup>Cuicari mühecua menicuicacaitüni mana meti'utü 'uveni huxie, yunaucatü memayeneniere vahüxie, 'uquiravesixi vahüxie. Xevitü pücaüyivecai meitimanicü mücü cuicari, müme xei sienituyari miriyari heimana huta teviyari miriyari heimana nauca miriyari memüyupaümecai xeicüa mepimaicai, queyupaümetü memutixünarie me'utinanaiyaca cuiepa memütama vasata. <sup>4</sup>Müme mecanihümetüni memücauyusevixima 'ucaravesixi mevaveiyatü, mepücaxuriquitüca. Müme mecanihümetüni memeveiya mücü Muxa que mütimie. Teüteri vasata meputinaniya memütixünarienicü, Cacaüyari nivesicaya Muxa nivesicaya memacünecü. <sup>5</sup>Vateta 'itarica pumave, vahesie pücarahüiva.

**Niuqui tuayamete haica  
niuquiyari memü'atüa**

<sup>6</sup>Hicü xeime neniuxeiya niuqui tuayame muyuavi hixüapa haviecame. Niuqui 'aixüa manuyüne yuheyemecü mücuxaxasiva nexeyacaitüni yamütivataxatüanicü cuiepa memütama, yunaime teüterixi yunaime nuivarite naimie niuquicü memutiniuca naimie cuiepa quiecatari. <sup>7</sup>Müpaü nainecaitüni carima, Xequeteneuyehüvirieca

Cacaüyari, ve'eme xequene'erieca. Tucari canaye'ani müvatahüavecü 'isücametütü. Nenevieri xequenepitüaca que mü'ane mitivevi muyuavi cuie haramara haixate.

<sup>8</sup>Hutariecata niuqui tuayame 'utümana niemiecaitüni müpaü 'utaitü, Quiecarari mümarive niuca'unarieniri Vaviruniya quiecariyari. Yaxeicüa 'ucapaü yuvinu que mütiva'itüa memü'axenicü memicumauvanicü, mana quiecatari meniva'itüacaitüni yunaime nuivarite memühecarienicü. Hicürixüa vaquiecarari niuca'unarieni.

<sup>9</sup>Hairiecata niuqui tuayame va'utüma niemiecaitüni ya'utaitü carima, Que mü'ane nenevieri mipitüa yeutanaca, que mü'ane nenevieri mipitüa 'üquisica hepaüna mütiyuxexeiya, que mü'ane mitanaqui'erie seyuya yucanata yumamasie, <sup>10</sup>mücü nenu'iemücü Cacaüyari vinuya mucatuariva tecüxitana canütüarievettü, yapüretimani que mütiha'a Cacaüyari quepaucua mücü mihecari. Cani'uximatüariemücü taicü 'asupürecü Cacaüyari niuqui tuayametemama vahüxie Muxa huxie. <sup>11</sup>Yamete'uximatüariecacu cuauniyari yuheyemecü petineicani. 'Uxipiya mepücaxexeiyani tucariücü tücaricü queyupaümetü nenevieri memipitüa yeutanaca, müme nenevieri memipitüa 'üquisica hepaüna mütiyuxexeiya, memitanaqui'erie seyuya que mütiteva ra'ucacu vahesie. <sup>12</sup>Müpaü metemaitü mepüte'uca'enivani

Cacaïyari teüterimama, müme yamemütecahu Cacaïyari que müti'aita yuri memüte'erie Quesusisie.

<sup>13</sup>Hicü xeime neniuenieni müpaü hetaineme taheima, Müpaü quetineu'utüa, 'Aixüa mecani'itüariecacuni müme Ti'aitamesie meteviyatü memücuini hicü 'uxa'atüni varie. Hü, naineni 'Iyari, meni'uxipiecacuni que memüte'u'uximayacai. Tita memüte'uyuri pümasiücünü sepa haque meme'uva.

#### Cuiepa que mütiucaxirie

<sup>14</sup>Hicü neneutaniere. Camüsü haivitüri mütuxa 'acananierecatüni. Haivitüri heima nacateitüni que mü'ane Yuri Tevipaü mütiyuxexeyacai, yumu'usie huru mumayari 'anamatü, yumamasie huxa mataxicauncai 'acuetü.

<sup>15</sup>Hicü xevitü niuqui tuayame tuquita 'ayeneca nitahivieni que mü'ane haivitüri heima macatei, müpaü 'utaitü carima, 'Ahuxacü queneuacaxica. Tucari naye'ani xirica, türicu müsese'icü cuiepa.

<sup>16</sup>Hicü haivitüri heima 'acaitü yuhuxacü cuiepa necuxini. Cuiepa nacuxirieni naitü.

<sup>17</sup>Hicü xevitü niuqui tuayame nivayeneni tuquita muyuavisie. Mücüta huxa mataxicauncai nacuecaitüni. <sup>18</sup>Xevitiüxa mürayutimavatüresie neyeyani niuqui tuayame heiserie mexeyacai tai hepaüsita. Carima nitahivieni que mü'ane huxa mataxicauncai macuecai ya'utaitü, 'Ahuxa mataxicaunicü queuencuxeüri caxie tacariyari cuiepa. 'Ari caxie

caniuticuacuaxeniri. <sup>19</sup>Hicü mücü niuqui tuayame yuhuxacü nicuxeürieni caxie cuiepa. Caxie pünameta 'amüyevata neicaxürieni, 'inüari mayanicü Cacaïyari que mütiha'a. <sup>20</sup>Hicü caxie pünameta mieme niutiquesinarieni quiecaritese. Xuriya nivayeneicacaitüni caxie pünameta, cavayasixi vapirenuipaü suitü, haica sienituyari heimana xei teviyari quirumeturuyari 'acuyeucacu.

#### 'Atahuta cuiniyari 'atahutatü memi'atüa niuqui tuayamete

**15** Mericüsü xeime 'inüari neniuxeiya muyuavisie mariveme tiyühüxyatüvame. Niuqui tuayamete nenivaruxeiya 'atahutame 'atahuta cuiniyari memexeyacai 'imatürieca miemete.

<sup>2</sup>Hicü haramarapaü 'aneme nepuxeixicüripaü tiyuxexeyame tai nücame. Mümeta nepüvaruxeime'ivaxü yeutanaca, meme'ivaxü üquisica hepaüna mütiyuxexeyacai, meme'ivaxü seyuya 'inüasicaya cümana mü'inüasie que mü'ane mühücü. Xicüri haramarayari tesita meniti'ucaitüni harupa me'u'ütü Cacaïyari menüavatü. <sup>3</sup>Muisexi Cacaïyarisie mieme ti'uximayatü que mütinüavacai, Muxa que mütinüava, müpaü meteniucucacaitüni müpaü me'utiyuatü,

Que pemütiyuriene  
Pepümarive  
Pepüti'ahüxüsiyatüvame  
Ti'aitame Cacaïyari  
Nai pemüti'aita.  
Heiseriemecü yapeticamietü  
Yuri pehaitü 'apepuyeica,

Nuivarite tiva'aitüvame.

<sup>4</sup>Yunaitü

mepümateheuyehüvirieca

Ti'aitame,

Visi mepümatexatani

Que mü'ane pemühücü.

'Ecü 'axaütame pepüpasie,

Yunaitü nuivarite

meni'axüacuni,

Meniyuneneviecacuni

'Ahüxie meti'utü

Mümasiücücü

Tita pemütüyuriene

Heiseriemecü yapeticamietü.

<sup>5</sup>Merücüsü 'ana neneutaniere.

Haque masi yemecü mepasie

tuquita muyuavisie, haque

Cacaüyari mehecüasie, mana

tineuyepiyani. <sup>6</sup>Tuquita

menayenexüani niuqui tuayamete

'atahutatü memi'atüa 'atahuta

cuiniyayari. Rinu 'ixuriquiyari

mü'itüyacai müxavatücai

mepanacatütücatei, yutavisie huru

hüyameyaricü mepühüatücatei.

<sup>7</sup>Hicü yunaucatü memayeneniere,

xevitü mücü nivaruhanitüani

niuqui tuayamete huru xacüyari

'atahutame haxüa hüpüneme,

Cacaüyari yuheyemecü mayeyuri

que mütiha'a 'inüariyari. <sup>8</sup>Hicü

tuquita cüsi niutahüne, Cacaüyari

que mütimarive que mütitürücaüye

'inüariyari puyü cüsiyari. Xevitü

pücaüyecai tuquita meutahanicü

mexi catiparivecai 'atahuta

cuiniyayari, 'atahutatü niuqui

tuayamete memi'atüa.

**Haxüa que memüte'upitüarie  
xacürüte müpaü tihüpüneme**

**16** Merücüsü xeime  
nenu'enieni carima

'utaniucame tuquita müpaü  
tivacühüaveme niuqui tuayamete  
'atahutame, Mana xequenehu,  
cuiepa xequeneucatuaxüa 'atahuta  
xacüyari Cacaüyari haxüaya  
mühüpüne.

<sup>2</sup>Hicü mexüacame neyani.

Neicatuani yuxacü cuiepa.

Hicü teüteri memüte'a'utücatei

yutanaca seyuyacü nenevieri

memipitüacai 'üiquisica

yutanacapaü mütiyuxexeyacai,

müme cuini mieme 'axa 'anemecü

meniuti'esata.

<sup>3</sup>Hicü 'utümana mieme neicatuani

yuxacü haramarasie. Xuriya nayani

müqui xuriyayapaü 'anetü. Yunaitü

memayenenierecai meniucuni

haramarasie memü'uvacai.

<sup>4</sup>Hicü hairieca mieme

neicatuani yuxacü hatuxametesie

haixatesie. Mücüta xuriya

nayani. <sup>5</sup>Hicü mücü niuqui

tuayame hacü mühürütüariecai

nenu'enieni müpaü 'utaineme,

'Ecü 'apemuyeicacai 'apemuyeica

pemüpasie, heiseriemecü

pepütüyurie müya

pemutivamari'itüacü. <sup>6</sup>'Ateüterima

vaxuriya niucamete yaxuriya

memutiyeurixücü, 'ecüta xuriya

pepüvaru'itüa. Müpaü pütünaquixü

vahesie. <sup>7</sup>Xeimeta nenu'enieni

mürayutimavatüresie müpaü

'utaineme, Hü, Ti'aitame Cacaüyari

nai pemüti'aíta, yuri pehaitü

heiseriemecü yapeticamietü

pepüti'amari'itüva.

<sup>8</sup>Hicü naurieca mieme

neicatuani yuxacü tausie. Tau

müpaü catiniupitüarieni

müvativarücanicü teüteri taicü.

<sup>9</sup>Teüteri menitivariquecaitüni cuini

mieme, peru meniseviximacaitüni que mü'ane Cacaüyari mühücü, 'axa me'utiyuatü hepaüsitana heiserie mexeyacaicü müpaü mütvacuiniyatüanicü.

Mepücatehayevacai que memüteyuriecäi, mepücayuvaüriyacai ve'eme memü'eriecacü.

<sup>10</sup>Hicü 'auxüvirieca mieme neicatuani yuxacü yeutanaca 'uveniyasie haque müre'aita.

Naisarie müra'aitacai nacuyüre. Teüterimama yuneni menicuquevecaitüni müvarucucünecaicü 'ana.

<sup>11</sup>Cacaüyari muyuavisie macave mecaniseviximacaitüni 'axa me'utiyuatü hepaüsitana, mücü müvarucuitücateicü memeu'esatücateicü. Peru mepücatehayevacai que memüteyuriecäi.

<sup>12</sup>Hicü 'ataxevirieca mieme neicatuani yuxacü hatuxame 'amüpasie 'Eupürate müttitevasie. Ha mana niucavani macuha'arisienicü te'aitamete vahuye tau manatinecasie miemete.

<sup>13</sup>Hicü necanivaruxeiya cacaüyarixi yuhaicame memüca'itiyatücatei, temusi vahepaü me'aneneme, cu teta yeutanaca teta tixaxatame müti'itavacai teta me'ayenexüacu. <sup>14</sup>Müme cacaüyarixi 'axa memü'anene va'iyarite mecanihümetüni. Marivemecü metenyuriecäitüni, meneutayeixüani yunaime cuiepa memütama teva'aitüvamete vahesüa, memüvacuxeürienicü cuyacü, mücü tucari mümarive

'aye'ayu que maine Cacaüyari nai ti'aitame. <sup>15</sup>Mücü müpaü paine, Neuxei, tinavayame mü'axepaü nepunuani. 'Aixüa pü'itüarieni que mü'ane müyühütüa, que mü'ane müha'arisie yu'ixuriqui mücavaune capa mavetü 'uyeicanicü 'uxa'a varie me'ixeyacacu que mütiyuteviya. <sup>16</sup>Mericüsü teüteri menivarucuxeürieni haque 'Arümaquetuni mütiuyeteva Hepürayusixi teüteriyari vaniuquicü.

<sup>17</sup>Hicü 'atahutarieca mieme neicatuani yuxacü 'ecapa. Hicü muyuavisie niuqui nivayeyani tuquita 'uveni manuvesie carima 'utaitü, Canaye'aniri. <sup>18</sup>Caniucumerücacaitüni necuyaneacaitüni necutüarücacaitüni. Cuie carima niutayuanı, que mücatitayuvecai quepaucua tevi cuiepa 'ucaitü matüa hicüque, cuini mieme tiutayuatü nayani. <sup>19</sup>Hicü quiecarı 'amacuyeva haicacüa niutitare. Hipame nuivarite vaquiecarite caniucaxürieni. 'Ana Cacaüyari Vaviruniya quiecarı mümarive quiecatari pücvavarutatümayaxü, masi yutecüxita mieme yuvinu nivaru'itüani yuhaxüa. <sup>20</sup>Naitü cuie haramara hixüapa mayema niyupata, yemurite niutumamavere. <sup>21</sup>Teüteri vahesie niucaxürieni te nauca haxuvayari rahetetücaitü. Teüteri meniseviximacaitüni Cacaüyari 'axa me'utiyuatü hepaüsitana, te 'acaxüriecu memüte'ucuinixicü cuini mieme.

'Uca mümari'itüarieni

**17** Mericüsü 'atahutatü niuqui tuayamete 'atahuta

xacüyari memexeyacai, xevitü mücü 'aura canayani. Müpaü canetiniutahüave, Quenaye'a. Nepümasixeisitüani que mütimari'itüarieni mücü 'uca tuminicü müyuvitünüa marivetü, hatuxame 'amüpa tesita 'acaitü. <sup>2</sup>Mücü menicumaüvacaitüni cuiepa te'aitamete cava'üyatüacu. Vinuyacü cuiepa memütama menitarüvecaitüni, mücü yuvitünüacu. <sup>3</sup>Hicü 'Iyari nesi'uviyacu mücü canenevitüni macumavesiepai. 'Uca neniuxeiya yeutanaca meutaüraüyesie 'acaimé. Yeutanaca naisarie hesiena püra'ucal 'axa que mütitevacai yuseviximatü. 'Atahuta mu'uyari tamamata 'avayari canexeyacaitüni. <sup>4</sup>'Uca taüraüyeme xureme panacatücücai. Hurucü tetexi visi müraye'arücü perüracü püquemaritüariecai. Huru tecüxiyari pahanacal yumamasie hüneme. Pü'inüarieyatücai que mütüyuseviximacal que mücatil'itiyacal müpaü tiyuvitünüatü. <sup>5</sup>Canatana que mütitevacal na'ucaitüni 'üquisica mü'aviecü, Vaviruniya quiecaril 'amacuyeva, 'anuyütü, Cuiepa miemete tuminicü memüyuvitünüa, yunaitü memüyusevixima, 'icü pühücü vavarusi, 'anuyütü. <sup>6</sup>Hicü mücü 'uca neniuxeiya tavecame Cacaüyari teüterimama vaxuriya 'anu'ieca, müme memüyuhécüatacal Quesusisüa memiemetetütü vaxuriya 'anu'ieca. Hicü ne'ixeyatü cuini mieme neni'iyarixiecaitüni. <sup>7</sup>Niuqui tuayame müpaü canetiniutahüave, Titayarisü peti'iyarixie. Nepümatihecüatüani

'avie niuqui 'uca hepaüsita yeutanaca metücü 'atahuta mu'uyari tamamata 'avayari mexeiya hepaüsita. <sup>8</sup>Mücü yeutanaca pemüxeiya, mücü 'aniyueicacaitüni, hicü 'apüca'uyeica. Meucatevasie vatineme, püyemie müca'unarienicü. Cuiepa memütama queyupaümetü memüca'acayasarie cuie munetüariepai xapasie tucari memexeyal manuyünesie, müme neni'iyarixiecacuni quepaucal memixeyal mücü yeutanaca 'amuyecacal, hicü 'amüca'uyeica, mayeneni.

<sup>9</sup>'Üquisica 'ipaü canil'aneni meitimanicü que mü'ane 'aixüa müremu'u mütimaive. 'Atahuta mu'uyari, mücü 'atahuta yemuriyari canihücütüni hesiena macal 'uca. <sup>10</sup>Te'aitamete 'atahutatü mecanihümetüni meta. Yu'auxüvitü menacaxürieniri, xevitü 'apuyeyica, xevitüta pücueviya pücanuave cuxi. Quepaucal munuani, peuyevese 'esiva yamüreuterecü xeicüa.

<sup>11</sup>Mücü yeutanaca 'amuyecacal 'amüca'uyeica, mücü 'atahairieca mieme canihücütüni müme. 'Atahutatü vahesüa canimiemetüni. Caniyemieni müca'unarienicü.

<sup>12</sup>Tamamata 'avayari pemuxei, mücü tamamata te'aitamete mecanihümetüni. Mete'aitatü mepüca'isütüavave cuxi. Heiserie mecanitanaqu'ericuni xei hurayari memüte'aitanicü yeutanacamatü. <sup>13</sup>Müme val'yari caniyuxevini. Yütürücarिया mecaniyetuiriecuni yeutanaca vatürücarिया mexeyanicü, heiserie mexeyanicü müme

heiserie memexeyapaü. <sup>14</sup>Cuya meniveiecuni Muxa me'aye'unietü. Muxa nivaral'ivamücü cusiyarite müvacusiyaricü te'aitamete mütiva'aitüvamecü. Müme hamatüana mem'uva meputa'inierie mepanayexeyarie yamepütecahu.

<sup>15</sup>Hicü müpaü netiutahüavixü, Ha pemuxe haque meca 'uca müyuvitünüa, mücü nuivarite mecanihümetüni mümüremete teüterixi niuquitecü memutiniuca mepühüme. <sup>16</sup>Tamamata 'avayari pemuxe, yeutanacata, 'axeicüa mecaniti'uxive'eriecuni 'uca müyuvitünüa. 'Ucu'eirivame menayeitüacuni maveme. Menitacuaicuni vaiyarieya, menitataiyacuni taicü. <sup>17</sup>Cacaüyari müpaü pütiva'iyaritüani müpaü memüteyuriecacü mücü püta que mütiyurimücü va'iyari yuxevicacu me'ipitüacacu yeutanaca mücü püta müti'aitametünicü vahesie mieme. Müpaü meteyurieyu catinaye'atüariemücü nai Cacaüyari que mutayü. <sup>18</sup>'Uca pemuxe, mücü quiecarari mümarive canihücütüni haque cuiepa te'aitamete meme'aitüarie.

#### Vaviruniya que mütiuca'unarie

**18** Mericüsü 'ana nenixeiya xeime niuqui tuayame taheima 'acamecame cuini mieme heiserie mexeyacai. Cuiepa canacuhecüare 'iya marivecacu. <sup>2</sup>Hicü türücaüyemecü niutahiva müpaü 'utaitü, Quiecarari mümarivecai niuca'unarieniri Vaviruniya. Cacaüyarixi 'axa memü'anene vaqui nayani, yunaitü

'iyarite memüca'itiyatüca, yunaitü viquixi memüca'itiyatüca yunaitü memü'uxive'eriva vatesariya ratüa. <sup>3</sup>Yaxeicüa 'ucapaü yuvinu que mütiva'itüa memü'axenicü memicumauvanicü, mana quiecatari yunaime nuivarite meniva'itüacaitüni cümana memühecarienicü. Cuiepa te'aitamete menicumauvacaitüni cava'iyatücacu. Tetuayamete cuiepa miemete meheuca'utü menayuyeitüacaitüni visi 'ane müyupitüacacü 'anayuhayevamecü.

<sup>4</sup>Hicü neni'enieni xeime müpaü mainecai taheima, Quiecarisie xequenevayecüni neteüterima 'acu, xehesieta rahüiyanicü tita 'axa memüte'uyuri mana quiecatari, xemücate'ucacucuinenicü 'iya que müticuine. <sup>5</sup>Tita 'axa mütiuyuri niucuxeüriyani muyuavisiepaütü. Cacaüyari püca'itatümai que mütiuyuri heiseriemecü yacaticamietü.

<sup>6</sup>'Axequetenapiniri que mürapicai. Hepaüna capaümeme masi tavari cuxi 'axequetenapiniri müpaü mütiuyuricü. Tecüxitana haque meinüitüacai yuvinu tavari cuxi yaxequeteneutanüitiiri.

<sup>7</sup>Marivetü que mürayuyeitüacai visi 'ane que mütiyupitüacai, yaxeicüa 'uximatüarica heiverica xequenepitüaca. Yu'iyarisie müpaü paine, 'Ena neti'aitametütü 'enepuca. Necarecacünatü nepüca'ayani, heiverica nepüchexeyani.

<sup>8</sup>'Ayumieme cuiniyaya xei tucarisie caninüamücü, müyacü cuiniyacü hacacü püpitüarieni. Taicü nitataiyariemücü. Canitürücaüyeni



que mü'ane mitamari'itüani  
ti'aitametütü Cacaüyaritütü.

<sup>9</sup>Hicü cuiepa te'aitamete  
queyupaümetü memicumaiüvacai  
cava'üyatücacu hamatüana visi  
'ane memüyupitüacai, müme  
meniutisuanacuni meyuheiverietü  
mehe'erivatü quepaucua  
memixeiya cuauni 'atineicame  
tataiyarieximecacu. <sup>10</sup>Memamatü  
müpaü müti'uximatüarieximecü,  
teva meniti'uicuni müpaü  
me'utiyuatü, Xüa 'ui, xüa 'ui,  
yapaucua quetiumari'itüarie  
Vaviruniya quiecar marivetü  
türücaüyetü.

<sup>11</sup>Tetuayamete cuiepa  
miemete mecaniutisuanacuni  
meyuheiverietü mehe'erivatü,  
müpaü metemaitü, xevitü  
tavari püca'inaneni va'licate.

<sup>12</sup>Meneiye'licatacaitüni mana huru  
me'atüvatü pürata tete müraye'arü  
perüra rinu 'ixuriquiyari 'ixuriqui  
mütataüravi sera 'ixuriquiyari  
'ixuriqui müxuxure, naime cüye visi  
mu'üa, naitü mutiveviya herepanite  
tameyaricü, naitü mutiveviya cüye  
müraye'aricü, tepüa müxeta tepüa  
mümerücavi marümuri teteyari  
<sup>13</sup>canera visi mu'üatüca 'üca  
mixaxi rivanu vinu viya harina  
türücu vacaisixi muxasi cavayasixi  
caxetate teüteri, teüteri va'iyarite  
meta. <sup>14</sup>Müpaü meputiyuaneni  
'ana, Tita pemütihive'eriecai  
'a'iyarisie cuacuaxicacu, 'ahesüa  
caniumaveni. Xavatütü marivetü  
naitü tiniutatümaiaryieni 'ahesüa.  
Yuheyeme pütiumaveni.

<sup>15</sup>Müme memituacai müya  
'aneneme, müme meheuca'utü  
memayuyeitüacai cümana, yunaitü

tevpai meniti'uicuni memamatü  
müpaü müti'uximatüarieximecü,  
me'utisuatü meyuheiverietü  
<sup>16</sup>müpaü me'utiyuatü, Xüa 'ui, xüa  
'ui, yapaucuaque pumaveriyari  
quiecar marivetü. Rinu  
'ixuriquiyari 'ixuriqui mütataüravi  
müxuxure nanacatücaitüni,  
yuquemaritüatü hurucü tetexi  
visi müraye'aricü perüracü. <sup>17</sup>Xei  
hurayarisie niutimavere cui que  
müreucavecai.

Naviya nü'avamete, yunaitü  
naisarie memü'axe naviyasie  
meyetetü, naviya vequemete,  
queyupaümetü haramarasie  
memüte'ivacai, mümeta  
tevpai meniti'ucaitüni.

<sup>18</sup>Me'ixeyatü cuauni  
'atineicame tataiyarieximecacu  
meniutihivacaitüni müpaü  
me'utiyuatü, Haquevasü xevitü  
quiecar mücü 'amacuyeucaipäu  
'anetü. <sup>19</sup>Tumuanari  
meneutivivacaitüni yumu'usie  
me'utisuatü meyuheiverietü  
müpaü me'utiyuatü, Xüa 'ui, xüa  
'ui, yapaucua que tumaveriyari  
quiecar marivetü. Mana  
meheuca'utü menacüne yunaitü  
naviyasixi memüvarexeiya  
haramarasie, mücü vaüca  
mürexeyacaicü. <sup>20</sup>Muyuavisie  
xequeneyutemamavieca  
xehe'erivatü. Cacaüyari  
teüterimama, nü'arisixi  
texaxatamete yunaitü  
xequeneyutemamavieca. Cacaüyari  
'imari'itüatü nixehecüatani heiserie  
xemexeyacü xeme.

<sup>21</sup>Hicü niuqui tuayame  
mütürücaüye nenutuni tete  
matapaü necame. Haramarasie

neicahüani müpäü 'utaitü, Yaxeicüa carima tinica'unariemücü Vaviruniya quiecarari mumarive. Tavari 'uxa'a varie pacumaveni. <sup>22</sup>Canarivivamete xavererusixi cürautavivamete cuxineta hüsivamete mepüca'enierieni 'ahesie. Naime tevevivamete mepücaxuaveni 'ahesie. Tüxüme püca'enierieni 'ahesie. <sup>23</sup>Cüxeme 'ahesie pücacüxeniri. Neneüqueme viquivame vaniüqui püca'enierieni 'ahesie. 'Ahesüa quiecatari memütetuacai cuiepa memütama va'isücate mecanihümetücaitüni. Peti'aquevayacacu meteni'irüviyariecaitüni yunaitü nuivarite. <sup>24</sup>Mana mücü quiecarisie masiücütü nayani texaxatamete vaxuriya mutayeuricü Cacaüyari teüterimama vaxuriya mutayeuricü, yunaitü cuiepa memucui'ivaxü vaxuriya mutayeuricü mana.

**19** Mericüsü 'ana neni'enieni yuariya yumüireme teüteri vaniüquipäü ti'eniürücümeme türücaüyeme. Müpäü meniutiyanecaitüni muyuavisie, 'Aixüa xequeneutiyaneni Cacaüyari hepaüsita. Pütiyuvicueisitüvame püve'eme pütürücaüye tacacaüyari. <sup>2</sup>Yuri haitü heiseriemecü yaticamietü pütüyumari'itüva. Nitamari'itüani mücü 'uca mumarivecai tuminicü müyuvitünüacai, que mü'ane müvaseviximacai cuiepa memütama yuvitünüatü. Cacaüyari 'apürepiniri 'uca metayeuricü teüterimama vaxuriya. <sup>3</sup>Hicü hutarieca müpäü meniutiyaneni, 'Aixüa xequeneutiyaneni Cacaüyari hepaüsita. Camü, cüsü yuheyemecü

nivatineicani mana. <sup>4</sup>Hicü 'uquiravesixi xei teviyari heimana yunaucame vahamatü yunaucatü memayeneniere meniutihüxima'uni yunaitü. Nenevieri mecanipitüani Cacaüyari 'uvenisie 'acaicu müpäü me'utiyaatü, Niuqui canise'ini. 'Aixüa xequeneutiyaneni Cacaüyari hepaüsita. <sup>5</sup>Hicü niuqui nivayeneni 'uveni manuvecaisie müpäü 'utaitü, 'Aixüa xequeneutiyaneni Tacacaüyari hepaüsita Yunaitü 'iparevivametemama Yunaitü xemütheiyehüviri Türi 'uquiravesixi yunaitü.

**Neüquiya 'ixüarariyari  
Muxa mivevie**

<sup>6</sup>Hicü mümüiremete vaniüqui neni'enieni. Ha 'amüpapäü püti'eniürücücai, türanari mütürücaüyepäü. Müpäü mecaniutiyanecaitüni, 'Aixüa xequeneutiyaneni Cacaüyari hepaüsita, Ti'aitatü matüacü Ti'aitame mütacacaüyari Nai müti'aita.

<sup>7</sup>Tequetatemamavieca Temavierica tequehexeyiani Visi tequete'ixatani Maye'acü Muxa mütineüquecü. 'Üyaya puyucuha'aritüa.

<sup>8</sup>Canüpitüarieni rinu 'ixuriquiyari Müxavatü mü'itiya manacatünicü.

Rinu 'ixuriquiyari cani'inüaritüni, tita memütayurie heiseriemecü yametecahütü Cacaüyari teüterimama va'inüariyari.

<sup>9</sup>Hicü müpäü pünetiutahüavixü niuqui tuayame, 'Aixüa

mecani'itüarieca müme  
 memuta'inierie 'ixüararipa, Muxa  
 neüquecacu. Müpaüta nerahüave,  
 'Icü Cacaüyari niuquieya müyuri  
 canihücütüni. <sup>10</sup>Hicü hetüana  
 neniutihüximaqueni nenevieri  
 ne'ipitüanique. Müpaü nerahüave,  
 Quetineuhayeva. 'Ahepaü  
 necatini'uximayatametüni  
 ne, 'a'ivama memüyuhecüata  
 Quesusisüa memiemeteütü  
 vahepaü nepüti'uximaya. Nenevieri  
 quenepitüaca Cacaüyari püta.  
 Que mü'ane müyuhecüata  
 Quesusisüa miemetütü, mücü  
 'iyari canipitüarieca Cacaüyari  
 texaxatametemama vahepaü.

**Que mü'ane cavaya  
 neutuxasie macatei**

<sup>11</sup>Mericsü müyuavi neniuxeiya  
 reutenime. Cavaya neutuxa  
 mana niuvecaitüni. Que mü'ane  
 hesiena macatei Yamüticamie  
 catinitevacaitüni, Yuri Maine  
 titevatü. Heiseriemecü yaticamietü  
 catiniyumari'itüvametücaitüni  
 caniyumienecaitüni. <sup>12</sup>Hüxiteya  
 tai mütacapaü pütüyuxexeyacai,  
 yumu'usie müireme muma  
 nanamanacaitüni. Que mütiteva  
 naye'ucaitüni hesiena, peru  
 xevitü 'asipücatimaicai que  
 mütiteva, 'iya xeicüa yapütimaicai.  
<sup>13</sup>Ixuriqui xuriyacü müxure  
 nanacatücücaitüni. Cacaüyari  
 Niuquieya catinitevaca.  
<sup>14</sup>Cuyaximama muyuavisie  
 miemete meneveyacaitüni  
 'ütümana cavayasixi memeutuxa  
 vahesie me'utetü, rinu 'ixuriquiyari  
 mütuxa mü'itiya me'anacatütücaitü.  
<sup>15</sup>Tetana niyeneicacaitüni 'ixipara

meutixicacaunicai cümana  
 müvativitenicü nuivarite.  
 Pütiva'aitüa tepüa 'isüyari 'acuetü.  
 Mücü canihücütüni que mü'ane  
 mitiquesina caxie pünameta  
 mieme, 'inüari vevienetü Cacaüyari  
 nai müti'aita que mütiha'a que  
 mütivaheca. <sup>16</sup>Camixayasie  
 teurieyasie müpaü püre'uxacai  
 que mütiteva, Te'aitamete  
 Tiva'aitüvame titevacacu,  
 Cusiyarima Vacusiyari titevacacu.

<sup>17</sup>Mericsü xeime neniuxeiya  
 niuqui tuayame tausie 'uveme.  
 Carima niutahiva müpaü  
 tivacühüvetü yunaime viquixi  
 muyuavi hixüapa me'avüximecacu,  
 Xequenacüni, xequeneyucuxeürie,  
 Cacaüyari 'icuai püvevieneni vaücava.  
<sup>18</sup>Xequetenecuaca te'aitamete  
 vavaiyari, cuyaxi va'uquiyarima  
 vavaiyari, memütürücavi  
 vavaiyari, cavayasixi vavaiyari,  
 müme vahesie memutecai  
 vavaiyari, yunaitü memüyünü'a  
 memüte'uximayatamete  
 türi 'uquiravesixi yunaime  
 vavaiyari. <sup>19</sup>Hicü yeutanaca  
 neniuxeiya, cuiepa te'aitamete  
 vacuyaxima me'üarime. Yunaitü  
 meniyucuxeürieximecaitüni  
 memüyutacuinicü me'eye'unietü  
 que mü'ane cavayasie macatei  
 cuyaximama mevaraye'unietü.  
<sup>20</sup>Hicü yeutanaca niuviyarieni,  
 hamatüanata tixaxatame  
 müti'itavacai niuviyarieni, que  
 mü'ane 'inüari mütiveviecai  
 yeutanaca hüxie cümana  
 mütiva'irüviyacai müme  
 memitanaqui'eri yeutanaca  
 seyuya müme nenevieri  
 memipitüacai 'üquisicaya hepaüna

mütiyuxexeyacai. Mücü yuhutatü me'ayenenieretü meneucaxüriyani haracuna müta'asie 'asupürecü müta'asie. <sup>21</sup>Hipatü yunaitü meniucui'liva 'ixipara vayeneicacacu que mü'ane cavayasie macatei tetana. Yunaitü viquixi meniutihuxani vavaiyaricü.

### Xeï miriyari viyari

**20** Mericüsü niuqui tuayame neniuxeiya muyuavisie 'acamiecame yavi 'acuecame para mürevatıyepienicü meucatevasie, carena caunariyari 'amüpa 'ahurietü yumamasie. <sup>2</sup>Hicü mücü cu niuviya meripai mümieme Cauyumarie mühücü Satanaxi mühücü. Canecuvieni xeï miriyari viyari. <sup>3</sup>Meucatevasie heicahüaca nenunani, quiteniena niseyumani, mücative'irüviyanicü nuivarite mexi cataparivecai xeï miriyari viyari. 'Anaque neuyeveca müxünarienicü yapaümexa.

<sup>4</sup>Hicü te'aitamete va'üvenite neniuxeiya mana 'a'ucame. Hesiena menayaxe müme heiserie memupitüarie. Mecani'isücatetücaıtüni que memüte'upitüarie. Hicü hipameta nenivaruxeiya, müme vamu'u mantivitequietüca memüyuhcüatacaicü Qesusisüa memiemetetütü, Cacaüyari niuquieya memücuxatacaicü yeutanaca nenevieri mecapitüatü hepaüna 'aneme meta 'üquisica, seyuya mecanaqui'erietü yucanata yumamasie, müme va'iyarite neniuxeiya. Müme me'anutaneniereca, Cürisitumatü te'aitamete menacüne xeï

miriyari viyari. <sup>5</sup>Hipatü müquite mepüca'anutanenierixü cuxi 'ana, xeï miriyari viyari 'utaparecuque menanutaneniere 'imatüremete. Que memüte'anucu'uitüarie haitürüvemete, matüari mieme catinitevaca.

<sup>6</sup>Aixüa cani'itüaricamücü, canipasiecamücü que mü'anesie mütinaque matüari miemecü manuquenicü. Vacucuyame heiserie pücahexeiya vahepaüsita hutarieca memücuinicü, müme masi mara'acate mepühümetüni Cacaüyarisie miemete Cürisitusie miemete. Hamatüana te'aitamete mehümetütü mepüte'aitani xeï miriyari viyari.

<sup>7</sup>Mericüsü quepaucua mütapare xeï miriyari viyari, Cauyumarie nixünariemücü manutahüiyasie.

<sup>8</sup>Püvatineni mütiva'irüviyanicü nuivarite taserieta ta'utata tahixüata tasütüapai memetitei cuiepa, Cuquitari Macuquitari yunaime. Nivacuxeüriemücü memüyutacuinicü haramara tesita miemepaü xiücaripaü meyupaümetü. <sup>9</sup>Hicü cuie 'amacuyevasie menentiyunixüani. Quiecarı münaqui'eriva 'aurie menicutecaitüni Cacaüyari teüterimama memütühipitecaisie, peru tai nacaneni muyuavisie nivarutixüsitüani müme.

<sup>10</sup>Que mü'ane mütiva'irüviyacai Cauyumarietütü mana neucahüiyani haracuna 'asupürecü müta'asie, haque yeutanaca tixaxatame müti'itavamatü memüyetecai. Tucaricü tücaricü meni'uximatüaricacuni yuheyemecü.

**'Uveni mütuxa hüxie memuhapanie  
'isücame müvatahüavecü**

<sup>11</sup>Hicü ti'aitame 'uvenieya neniuxeiya 'amüpa mütuxa. Que mü'ane hesiena macatei mexeyatü cuie muyuavi naitü niyupataxüani hüxiena memücatitenicü. Vahuyeri pumavecai muva memücatitenicü. <sup>12</sup>Hicü müquite nenivaruxeiya 'uquiravesixi türi yunaime, 'uveni manuvecai hüxie meti'ucame. Xapate niutiverarieni. Xevitüta niutaverarieni xapa haque memacayasarie müme tucari memexeiya. Hicü müquite meniuta'ivaviyarieni que memüte'uyuri hepaüsita que müre'uxacai xapatesie, müpaü meteniupitüarieni. <sup>13</sup>Mana müquite menivayecüne haramarasie memüyetecai, Tacucuyamesüa, Müquite Vahüvemesüa menivayecüne müquite mana memüyetecai. Yuxexuitü me'uta'ivaviyariECA que memüte'uyuri hepaüsita, müpaü meteniupitüarieni. <sup>14</sup>Tacucuyame caneucahüiyani haracuna müta'asie Müquite Vahüveme 'üaritä. Müpaü que memüte'ucui'ivaxü müme, hutariECA müya catinitevaca. <sup>15</sup>Que mü'ane müca'acayerie xapasie tucari mexeiya manuyünesie, mücüta haracuna müta'asie caneucahüiyani.

**Muyuavi mühecua cuie mühecua**

**21** Hicü muyuavi mühecua cuie mühecua neniuxeiya. Meripai mieme muyuavi meripai mieme cuie neutayeixüani, haramara

püca'anierecai. <sup>2</sup>Cacaiyari quiecarieya Querusareme mühecua neniuxeiya muyuavisie 'acamiecame, Cacaiyari manucasie 'acamieme, ha'arisiecame viquivame que mürequemarie yücünasie mieme. Ne Vanitütü necanixeiya. <sup>3</sup>Hicü neni'enieni que mü'ane carima müpaü mutayü muyuavisie, Hicürixüa Cacaiyari teüteri vasata nitaquimücü, vasata 'ucaitü nayeimücü. Teüterimama mecanihümetücacuni, mücütütü nivateütacamücü vacacaiyaritütü. <sup>4</sup>Naime va'ucai cana'itixüamücü vahüxita. Tavari mepücacuini mepücayuheiverieca mepüca'utihivani mepücate'ucacucuieni. Tita meripai mütimiemetücai catinanacayaniri.

<sup>5</sup>Hicü que mü'ane 'uvenisie macatei müpaü niutayüni, Camü, naime hecuame nepayeitüaxime. Müpaüta netiniutahüave, 'Ipaü quetineu'utüa, müyüvecü 'icü niuquisie yuri müti'eriecacü, yuri mainecü. <sup>6</sup>Müpaüta pünetiutahüavixü, 'Ari tinaye'ani naitü. Ne Mexüacame 'Imatüreme netitevatü, ne necanihücütüni que mü'ane misütüa minüni. Que mü'ane meuharimücü, ne neca'icuetatüatü neniharitüamücü nehaixacü cümana tucari mexeyanicü. <sup>7</sup>Que mü'ane mürayu'iva, hesiena catininaquimücü 'icü naitü. Neta Cacaiyarieya necanayeimücü, 'iyata nenive rayani. <sup>8</sup>Peru queyupaümetü memamatü memucunuaxüa, yamemücatecahu, memüyusevixima,

memüteyumemiva,  
 memüvacumaüva müme  
 memücava'üitama  
 memücavacünama,  
 memüteyuquevaya, tetexi  
 memüvarayexeiya, yunaitü  
 memüte'itava, yunaime vahesie  
 pütinaqueni haracuna 'asupürecü  
 müta'asie memeucaxüriyanicü  
 haque hutarieca memecuini.

### Querusareme quiecariyari mühecua

<sup>9</sup>Hicü 'atahutatü niuqui  
 tuayamete 'atahuta xacüyari  
 mema'ücai hüpüneme 'atahuta  
 cuiniyari 'imatürieca mieme,  
 xevitü müme 'aura 'ayaca müpaü  
 pünetiutahüavixü, Quenaye'a.  
 Viquivame nepümasixeisitüani  
 Muxa 'üyaya mayani. <sup>10</sup>Hicü 'iyari  
 nesi'uviyacu, canenevitüni yemuri  
 'amünenasie 'emutevisie. Cacaüyari  
 quiecarieya pünesi'uxeisitüa  
 Querusareme. Muyuavisie  
 nacaneni Cacaüyari manucasie  
 'acamietü <sup>11</sup>Cacaüyaripaü  
 visi 'anetü. Que mütixavatücai,  
 tete visi müraye'arüpaü  
 catiniyuxexeyacaitüni casüpe  
 teteyaripaü tete manuyehcüapaü.  
<sup>12</sup>Tesariyari 'enetü 'e'utevitü  
 canitinierecaitüni tamamata  
 heimana huta quitenieyari  
 hexeyatü. Maquitenietücateisie  
 niuqui tuayamete meniti'ucaitüni  
 tamamata heimana yuhutatü.  
 Que memüteteteva nuivarite  
 mana tina'utücateitüni nuivarite  
 'Ixaheri nivemama vahesie  
 memüyecü tamamata heimana  
 yuhutatü que memüteteteva.  
<sup>13</sup>Tau manatineicasie haicacüa  
 natetenicaitüni, ta'utata haicacüa,

taserieta haicacüa, tasutüapai  
 haicacüa. <sup>14</sup>Quiecarie tesariyari  
 tamamata heimana hutame  
 canexeyacaitüni 'itutuicame.  
 Hesiena que memüteteteva  
 tamamata heimana yuhutatü  
 teyü'üquitüvametemama Muxasie  
 miemete catine'ucaitüni.

<sup>15</sup>Que mü'ane müneticühüavecai  
 ti'inüatame nacuecaitüni huru  
 hacayari 'i'inüataque quiecarie,  
 quiteniete, tesariyari naime.

<sup>16</sup>Quiecarie 'uta'isiquinatü 'epuma  
 yaxeicüa heutatevetatü yaxeicüa  
 'acuyeutü. Hicü niti'inüata  
 quiecarie mücü hacacü xei meserie  
 yeiyari heutatevacacu. Yaxeicüa  
 peutateteva 'apacuyeva 'apatitütü.  
<sup>17</sup>Tesariyari niuti'inüata, xei  
 sienituyari heimana huta tevyari  
 heimana nauca sicuriyari naye'ani  
 tevi que müti'inüata, niuqui  
 tuayame tevipaü yati'inüatacacu.

<sup>18</sup>Tesariyari casüpe teteyaricü  
 püveviya. Quiecarie naitü huru  
 tepüyari mü'itiyacü caniveviyaca  
 xicüri maye'itiyapaü tiyuxexeyatü.

<sup>19</sup>Tetexi quiecarie tesariyari  
 mütituica xexütü tetexi visi  
 müraye'arücü püquemaritüarie.  
 Mexüacame tete 'ituicatü tesariya  
 canicasüpetüni tuxatü, hutarieca  
 mieme sapiru yuavitü, hairieca  
 mieme 'acata teteyari yuavitü,  
 naurieca mieme 'esimerarüta  
 siüraüyetü, <sup>20</sup>'auxüvirieca mieme  
 'unise teteyari tuxatü, 'ataxevirieca  
 mieme curunarina xuretü,  
 'atahutarieca mieme cürisuritu  
 taxaüyetü, 'atahairieca mieme  
 veriru siüraüyetü, 'atanaurieca  
 mieme tupasiyu taxaüyetü,  
 tamamata mieme cürisupürasu

siüraiyetü, tamamata heimana xevirieca mieme casinitu yuavitü, tamamata heimana hutarieca mieme 'amatisüta taüraiyetü. <sup>21</sup>Quiteniete mieme tamamata heimana huta 'itupariyari tamamata heimana huta perürayari canihücütüni. 'Itupari xexuitü xei perürayaricü putiveviya. Quiecarisie cayete huru mü'itiya canihücütüni xicüri mayehécüapaü mütiyuxexeiya.

<sup>22</sup>Mana tuqui nepüca'uxei quiecarisie. Ti'aitame mücacaüyari nai müti'aita yücümana canituquitüni, Muxa meta.

<sup>23</sup>Quiecarisie mepücaheiyehüva tau meseri mühecüarivienicü mana. Cacaüyari visi 'anetü püvahecüariviya püta. Muxa canihücütüni vahecüarivivame.

<sup>24</sup>Nuivarite metavicueisitüarieme 'ameniu'uvacuni müpaü metehécüariyarietü. Cuiapa te'aitamete tita memütehhexeiya visi ti'ananeme meteni'atüacuni mana, ve'emetete que memütemarivani.

<sup>25</sup>Quitenie pücareunatücani tucari. Tücarü pücacuaveni muva. <sup>26</sup>Tita nuivarite memütehhexeiya visi ti'ananeme raye'arücame mecateni'atüiricuni.

<sup>27</sup>Hasuacu hesiena pücaheutahani tita mütiheviximarie, tita mütiyusevixima meta müti'itava. Müme xeciüa memacayasarie Muxa xapayasie quename tucari mehhexeiya manuyünesie, müme meneutahaqueni mana.

**22** Mericüsü 'ana hatuxame pünesi'uxeisitüa cümana tucari memexeiyanicü. Tete manuyehécüapaü nixavatücaitüni

ha Cacaüyari 'uvenieya manucasie Muxa 'uvenieya manucasie 'ayeneicatü. <sup>2</sup>Caye hixüapa, hatuxame tesita 'anataüye 'anutaüye cüye niti'ucaitüni cümana tucari mexeiya. Tamamata heimana hutamexa niutixuxuavereni, xexuime meserisie niuticuacuaxeni. Cüye xavariyari nuivarite memanayexürüvenicü cani'ayumiemetüni. <sup>3</sup>Naitü mütixani'eriva pücacuaveni hasuacu, muva catiniumavecämücü. Cacaüyari 'uvenieya Muxa 'uvenieya mana puveni, me'eyexeyacacu müme hesiena mieme memüte'uximaya. <sup>4</sup>Yühüxie meniutineniericuni, que mütiteva püre'uxani vacanata. <sup>5</sup>Tücarü pücacuaveni muva, mepücaheiyehüca cüxeme müvahecüarivienicü ni tau. Ti'aitame Cacaüyari püvahecüariviyani püta. Yuheyemecü te'aitamete mepüyüaca.

#### Canehuraniri Cürisitu munuani

<sup>6</sup>Hicü müpaü netiniutahüave, 'Icü niuquisie caniyüveni yuri müti'eriecacü, yuri paine. Ti'aitametütü, que mü'ane Cacaüyariütütü 'iyari müvatütüta texaxatamete, mücü neiyenü'ani yuniuqui tuayame yamütiva'üquitüacacü yuhesüa miemete te'uximayatamete, müme müpaü memütemaicacü que müreyeveve yamütüyünicü cuitüva. <sup>7</sup>Neuxei, cuitü nepunuani.

'Aixüa cani'itüaricämücü Que mü'ane yamüticämie 'Icü xapasie xasica que maine.

<sup>8</sup>Nesü Vani necanihücütüni que mü'ane mi'eni mixei 'icü. Quepaucua nemu'enaxü nemunierixü, neniutihüximaqueni nenevieri ne'ipitüanique niuqui tuayame müpaü münetiü'üquitüa, hetüana ne'ucaveca. <sup>9</sup>Müpaü nerahüave masi, Neuxei, quetineuhayeva. 'Ahepaü necatini'uximayatametüni, 'a'ivama Cacaüyarisie miemecü memütecuxata vahepaü, müme yamemütecahu 'icü xapa que maine vahepaü nepüti'uximayatame. Nenevieri quenepitüaca Cacaüyari püta.

<sup>10</sup>Hicü müpaü netiniutahüave, Pepüca'inenaca tita mütixata 'icü xapasie, pepüca'iseyumaca niuquiyari. Tucari nehuraniri maye'anicü. <sup>11</sup>Que mü'ane heiseriemecü yamücticamie, yaxeciüa püyüaneni heiseriemecü yacaticamietü. Que mü'ane müyusevixima yaxeciüa quetiyuseviximaca. Que mü'ane heiseriemecü yamüticamie meta heiseriemecü yaqueticamieni. Que mü'ane Cacaüyarisie mieme müpasie, yaxeciüa pasietü queyuhayevani.

<sup>12</sup>Camüsü, cuitü nepunuani. Nenuame nepürapica, yuxexuime netinivarapiniriemücü que memüte'uyuri. <sup>13</sup>Neri Mexüacame 'Imatüreme necatinitevaca, que mü'ane misutüa minüni nemühücücü.

<sup>14</sup>Aixüa mecani'itüariēcacuni müme 'aixüa 'anemecü memü'uvani va'ixuriqui 'itiyatücaicacu que memüteheye'ecua. Heiserie mecanexeyacacuni mücü cüyesie

mieme memütecuacacü, cümana tucari memexeiyanicü heiserie mepexeiyanita quiecarisie memeutahaquenicü quiteniesie. <sup>15</sup>Quiecarie varie meniu'uvacuni müme süicüri vahepaü memüyüa teyuquevayamete müme memüvacumaüva que mü'ane mücava'üya mücavacüna memüteyumemiva tetexi memüvarayexeiya, yunaitü 'itarica memünaqui'erie memüte'itava.

<sup>16</sup>Neri Quesusitütü neneinü'ani neniüqui tuayame müpaü mütixehēcüasitüiyanicü haque xemeyutixexeüriva. Ne nana necanihücütüni Ravirisie nemüyetüa nemutine. Xurave müxavatü tuxacüta mieme necanihücütünita.

<sup>17</sup>Iyari Quenaye'a canaineni, Viquivameta yaxeciüa paine. Que mü'ane mü'ena Quenaye'a que'utayüni. Que mü'ane meuharimücü, mücü que'ayani. Que mü'ane müyuväüriya cacuetatüarietü que'anuhareni cümana tucari mexeiyanicü.

<sup>18</sup>Ne 'ipaü nepütivahecüatüa yunaime memi'enie 'icü xapasie xasica que maine. Xüca xevitü 'icü niuqui 'utanüittivani, Cacaüyari mücü pünüittiani cuiniya 'ipitüatü 'icü xapasie que müre'utüca.

<sup>19</sup>Xevitü 'icü xapasie que maine xasica xüca niuqui 'unavani, Cacaüyari pinavairienita tita hesiena mütinaquequecai. Müpaü pücatipitüarieni macayerienicü xapasie tucari memexeiya manuyünesie, ni Cacaüyari quiecariena maye'anicü que müre'uxa 'icü xapasie yapücatipitüarieni.



<sup>20</sup>Que mü'ane müpaü mütihecüata  
müpaü naineni, Hü, cuitü nepunuani.  
Mücü niuqui canise'ini. Quenaye'a  
Ti'aitame Qesusi.

<sup>21</sup>Ti'aitame Qesusi 'aixüa  
quetiuca'iyarini yunaime  
xehesie mieme. Müpaü xeicüa  
cani'aneni.